

पहाड़ी महासुई बाइबिल

The Mahasu Pahari New Testament, 2017

This Bible is copyrighted by Free Bibles India and made available under a Creative Commons Attribution-ShareAlike 4.0 International License. Original work available at <http://www.free-biblesindia.com>.)

This Bible is provided at the cost of printing by the Digital Bible Society (dbs.org). This Bible, and many others, are available for free download in a variety of digital formats at dbs.org/bibles.

मत्ती.....	4
मरकुस	26
लूका	42
यूहन्ना	67
प्रेरितु रै काम	83
रोमियो.....	103
1 कुरिन्थियों	112
2 कुरिन्थियों	121
गलातियों.....	127
इफिसियों	130
फिलिप्पियों.....	133
कुलुस्सियों	136
1 थिस्सलुनीकियों	138
2 थिस्सलुनीकियों	140
1 तीमुथियुस.....	142
2 तीमुथियुस.....	145
तीतुस	147
फिलेमोन.....	149
इब्रानियों	150
याकूब.....	156
1 पतरस	159
2 पतरस	162
1 यूहन्ना.....	164
2 यूहन्ना.....	167
3 यूहन्ना.....	168
यहूदा	169
प्रकाशित वाक्य.....	170

मत्ती

यीशु रौ वंश (लूका 3:23-38)

1 अब्राहमा री सन्तान, दाऊदा री सन्तान, यीशु रौ वंश। 2 अब्राहम कु इसहाक पैदौ हुआ, इसहाका कु याकूब पैदौ हुआ, याकूबा कु यहूदा और तेसरै भाई पैदौ हुए 3 यहूदा और तामारा कु फिरिस और जोरह पैदौ हुआ, फिरिसा कु हिस्त्रोन पैदौ हुआ, और हिस्त्रोना कु एराम पैदौ हुआ, 4 एरामा कु अम्मीनादाब पैदौ हुआ, अम्मीनादाबा कु नहशोन, और नहशोन कु सलमोन पैदौ हुआ, 5 सलमोन और राहबा कु बोअज पैदौ हुआ, बोअज और रुता कु ओबेद पैदौ हुआ, और ओबेदा कु यिशै पैदौ हुआ, 6 और यिशै कु दाऊद राजा पैदौ हुआ। और दाऊदा कु सुलैमान तिया छेउडी कु पैदौ हुआ जुण पैहला उरियाह रै छैऊडे थे, 7 सुलैमाना कु रहबाम पैदौ हुआ, रहबामा कु अबिय्याह पैदौ हुआ, और अबिय्याहा कु आसा पैदौ हुआ, 8 आसा कु यहोशाफात पैदौ हुआ, यहोशाफाता कु योराम पैदौ हुआ, और योरामा कु उज्रियाह पैदौ हुआ, 9 उज्रियाहा कु योताम पैदौ हुआ, लयोतामा कु आहाज पैदौ हुआ, और आहाजा कु हिजकिय्याह पैदौ हुआ, 10 हिजकिय्याहा कु मनशिशह पैदौ हुआ, मनशिशहा कु आमोन पैदौ हुआ, और आमोना कु योशिय्याह पैदौ हुआ; 11 और बंदी बौणियो बेबीलोन डेऊणा रै बौगै दी योशिय्याह कु युकुन्याह, और तेसरौ भाई पैदौ हुआ। 12 बंदी बौणियो से बेबीलोना दी निणा कु बासिरे युकुन्याह कु शालतिएल पेदा हुआ, और शालतिएला कु जरुब्बाबिल पैदौ हुआ, 13 जरुब्बाबिला कु अबीहूद पैदौ हुआ, अबीहूदा कु इल्याकीम पैदौ हुआ, और इल्याकीमा कु अजोर पैदौ हुआ, 14 अजोरा कु सदोम पैदौ हुआ, सदोमा कु अखीम पैदौ हुआ, अकीमा कु इलीहूदा पैदौ हुआ, 15 इलीहूदा कु इलियाजार पैदौ हुआ, इलियाजारा कु मतान पैदौ हुआ, मताना कु याकूब पैदौ हुआ, 16 याकूबा कु यूसुफ पैदौ हुआ, जुण मरियमा रौ बोउटौ थी, और मरियमा कु यीशु जासलै मसीह भी बोलाई, पैदौ हुआ। 17 इणै कौरी अब्राहमा कु दाऊदा झाऊं चौदहा पीडी हुई, और दाऊदा कु बेबीलोना लै गुलाम हुईऔ पौउंछणै झाऊं चौदहा पीडी, गुलाम चाणीऔ बेबीलोना दी पौउंछणै झाऊं रै बौगता कु मसीह झाऊं चौदहा पीडी हुई।

यीशु रौ जौनम (लूका 1:26-38, 2:1-7)

18 यीशु मसीह रौ जनम इणै कौरी हुआ, कि जेबी तेसरी मां मरियमा री मांगणी यूसुफा आइलै हुई गोई, ता तिउरै कौठै हौणै कु पैहलै ई मरियम पवित्र आत्मा री तौरफा कु गौरकडी हुई। 19 तैबै तियांरौ बोउटौ यूसुफ जुण धर्मा थी और तिणै बदनाम कौरणौ नाई चाहा थी, तिणै चुटुक चार पोरु छाडनै रै बारै दी सुंचदै लागौ। 20 जेबी सेऊ ईऊं बुशै सुंचदै थी लागौ औन्दौ ता प्रभु रौ स्वर्गदूत तेसरै सुइणै दी दिशियो बोलदै लागौ, “ओ यूसुफ! दाऊदा री औलाद, तू आपणी छेउडी मरियम आपणै रै कारे आणना लै नाई डौर, कैलैकि जो तियांरै गर्भा दी आ, सेऊ पवित्र आत्मा री तौरफा कु आ। 21 सै छेहरु पैदौ कौरा और तू तेसरौ नाऊं यीशु छाडै, कैलैकि सेऊ आपणै लोगु रौ तिउरै पापा कु छुटकारौ कौरा लौ।” 22 एऊ सब एथीलै हुआ कि जो वचन प्रभु रै गुरु रै जरीए बोलौ औन्दौ थी, सेऊ पुरौ हुआ : 23 “देखौ, एक कुंवारी गौरकडी हुआ और एक छेहरु पैदौ कौरा, और तेसरौ नाऊं इम्मानुएल हुणौ, “जेथरौ मतलब आ—परमेश्वर आमु आइलै आ। 24 तैबै यूसुफ नीजा कु बीऊजुऔ प्रभु रै दूता रौ हुकमा कौरी आपणी छेउडी आपणै घौरै आणौ;

25 और जेबी झाऊं तिआंरौ छेहरु नाई हुआ लौ तेभी झाऊं सेऊ तियां कारे नाई डैऔ : और तिणीए तेसरौ नाऊं यीशु छाडौ।

ज्योतिषी रौ आशणौ

2 हेरोदेस राजा रै बौगता दी जेबी यहूदिया रै बैतलहमा दी यीशु रौ जनम हुआ, त देखौ, पूर्वा कु कई धर्मा रै गुरु यरुशलमा दी आशियो पूछदै लागै। 2 की यहूदिया रौ राजा जासरो जनम हुआ सा, कियै सा? आमुए पूर्वा कु तेसरौ तारौ देखौ आ और आमै तेसकै ढाल कौरदै आशै औन्दै। 3 इणौ शुणियो हेरोदेस राजा और तेस आइलै सारौ यरुशलम डौरी गौ। 4 और तिणीए लोगु रै सौबी महायाजक और शास्त्री कौठै कौरीयो तिऊंकु पूछौ, की मसीह रौ जनम किये हुणौ चाई? 5 तिउरै तेसलै बोलौ, “यहूदिया रै बैतलहमा दी; कैलैकि भविष्यवक्ता री तौरफा कु इणौ आ लिखौ औन्दौ। 6 “ओ बैतलहम, जो यहूदा रै देशा दी आ, तू किये कौरीए भी यहूदा रै सौबी अधिकारीउ कु छोटौ नाई; कैलैकि ताऊं माझिआ कु एक अधिपति निकला सा, जो मेरी प्रजा इस्राएला री रखवाली कौरालौ। 7 तैबै हेरोदेसै धोर्मा रै गुरु चुटुक चार औटाइऔ तिऊंकु पुछौ, की तारौ ठीक कैजै बौगै दिशौ थी। 8 और तिणीए इणौ बोलीऔ सै बैतलमहा लै भेजै, की डेइऔ तेस माऊं रै बारै दी ठीक-ठीक पौतौ कौरौ और जेबी सेऊ मिला लौ ता मुकै खबर कौरैऊ ताकी हाऊं भी आशियो तेसकै ढाल कौरौ। 9 सै राजै री बुशै शुणियो डेइ गौरे, और देखौ, जो तारौ तिउरै पूर्वा दी देखौ थी, सैऊ तिऊंकु औगाडी-औगाडौ चालौ, और जीए माऊं थी, सेजी जागा दी पौउंचिऔ टेकी गौ। 10 तेस तारै देखियो सै भौरी खुश हुए। 11 और तेस घौरा दी पौउंचियो सेऊ माऊं तेसरी मां मरियम आईलै देखौ, और आपणौ-आपणौ झोलौ खोलियो तेस कालै सूनौ, और लोबान, और खुशबुदार चीजै भेटा देई। 12 और सुइणै दी स्वर्गदूत इणौ हुकम दैऔ की हेरोदेशा कारे औजौ नाई डेवेऊ, सै दुजी बाटा दी डेइयो आपणै देश मिस्रा लै डेइ गौरे।

मिस्र देशा लै डेऊणौ

13 तिउरै डेऊणै बासीए प्रभु रै एकी दूतै सुइणै दी आशियो यूसुफा कें दिशियो बोलौ, “उठ, एस माऊं और एसरी मां निउ और मिस्र देशा लै डेऊ; और जेबी झाऊं हाऊं ताऊंके नाई बोलुलौ तेबी झाऊं तिरे रौऊ; कैलैकि हेरोदेस एस माऊं लोडदै लागौ औन्दौ ताकी एस पोरु झांगा।” 14 तैबै सै रावी उठीयो माऊं और तेसरी मां निइऔ मिस्रा लै डेइ गौरे, 15 और हेरोदेसा रै मौरणै झाऊं तिरे ई रौरे। एथीलै की सेऊ वचन जो प्रभुए गुरु री तौरफा कु बोलौ औन्दौ थी पुरौ हुआ : “मुईए अपणौ छेहरु मिस्रा कु औटाओ।” 16 जेबी हेरोदेसै इणौ देखौ, की धर्मा रै गुरुए तेस आइलै धोरखौ कियो आ, तैबै सेऊ रोशा कु भौरौऔ, और लोग भेजीऔ धोर्मा रै गुरु रै जरीए ठीक-ठीक बोलै औन्दै बौगता रै अनुसार बैतलहम और तेसरै ओरु-पोरु री जागहा रै सौबी माऊं जो दुई साला रै या तिऊंकु छोटै थी, झांगी गौरे। 17 तैबै जो वचन यिर्मयाह गुरुए बोलौ औन्दौ थी, सेऊ पुरौ हुआ : 18 “रामाह दी एक करुण-नाद शुणुऔ, लेरणौ और बौडौ दुःख राहेल आपणै माऊं लै थी लेरदै लागी औन्दौ, और चुटुक रौइणौ नाई चाहा थी, कैलैकि सै आबै नाई रौरे।”

मिस्र देशा कु वापिस आशणौ

19 हेरोदेसा रै मौरणै बासीए, प्रभु रै दूतै यूसुफा कें सुइणै दी दिशियो बोलौ, 20 “उठ माऊं और तेसरी मां निइऔ इस्राइला रै देशा दी डेऊ, कैलैकि जो

माऊं रौ प्राण निणौं चा थौ, सेऊ मौरौ गौ आ।" 21 सेऊ ऊजूओ, और माऊं और तेसरी मां आपु आईलै निर्ईओ इसाइला रै देशा दी आशौ। 22 पर इणै शुणियों की अरखिलाउस आपणै बाब हेरोदेसा री जगाह दी यहूदिया माथै राज कौरदै आ लागौ औन्दौ। तिरे डेउणा लै डोरौ। तैबै सुइणै दी परमेश्वरा कु हुकुम मिलीओ गलील परदेशा दी डेई गौ, 23 और नासरत नावां रै गावां दी डेईओ बौसौ, ताकी सेऊ वचन पूरौ हुआ, जो भविश्यवक्तु री तौरफा कु बोलौ औन्दौ थौ : "तेसलै नासरी बोलाई।"

यूहन्ना बपतिस्मौ देणै वालौ

(मरकुस 1:1-8, लूका 3:1-18, यूहन्ना 1:6-8, 15-34)

3 सेजै बौगता दी यहून्ना बसिस्मा देणै वालौ आशियौ यहूदिया रै जांगला दी इणौ परचार कौरदै लागौ : 2 "मन बौदलौ, कैलैकि सौरगा रौ राज नजदीक आशी गौ आ।" 3 ऐऊ सेऊ आ ज़ासरै बारै दी यशायाह गुरे बोलौ थौ, "जांगला दी एक आकै मारीयौ बोलदै आ लागौ औन्दौ, की प्रभु री बाट तयार कौरौ।" तेसरी बाट सीधी कौरौ। 4 यहून्ना ऊंटा रै बाला रै जुड़कै भीडै औन्दै थै, और आपणी कौमरा दी चामडै रौ गाचौ थी बानी ऐनदी। तेसरी रोटी थाडै और बौणा री माकखी रौ मौ थौ। 5 तैबै यरुश्लेम और सारौ यहूदिया और यरदन रै ओरु-पोरु रै सौबी जगाहा रै लोग तेस कारे निकलीओ आशौ। 6 तिउंरे आपणै-आपणै पाप मानीओ यरदन नौई दी तेसकु बसिस्मौ निंओ। 7 जेबी तिणीरे भौरी फरीसि और सदुकि लोग बसिस्मा लै आपु कारे आशदं देखै, त तिणीरे बोलौ, ओ सापा रै लोलडेउओ, तुमुकै कुणीरे बोलौ कि आशणै वालै रोशा कु भागौ? 8 आबै तुमै मन बदुलनै लाईक फल आपणौ। 9 और आपणै-आपणै मौना दी इणौ नाई सुंचौ की आमारौ बाब इब्राहिम आ; हाऊं तुमुलै बोलाऊ की परमेश्वर इऊ पात्थरु कु भी इब्राहमा काले सन्तान पैदौ कौरौ बौला सा। 10 आबै कुराड पेडु री जौडी कारे छाडी औन्दी आ, ताकी जो पेड आच्छौ फल नाई आणदौ, तेस काटियो आगी दी पा आ। 11 हाऊं ता पाणी कौरौ तुमुलै मन बौदुलणै रौ बसिस्मौ दिआऊ, पर जो मुं बासीरे आशणै वालौ आ; सेऊ मुंकु भी ताकती वालौ आ; हाऊं ता तेसरै बुटा चुंगणै रै लाईक भी नाई आसतौ। सेऊ तुमुलै पवित्र आत्मा और आगी कौरौ बसिस्मौ दिआ। 12 तेसरौं शुणौं तेसरै हाथा दी आ, और सेऊ आपणौ खौलौ आच्छै कौरौरे साफ कौरा, तैबै गिऊं छाडा आपणी खौन्दीआली दी भूस जाला आगी दी जो आग केबी ना इशदी।

यूहन्ना कौरौ यीशु रौ बपतिस्मौ

(मरकुस 1:9-11, लूका 3:21,22, यूहन्ना 1:31-34)

13 सेजै बौगते यीशु गलीला कु यरदन नौई रै डिका दी यहून्ना कारे तेसकु बसिस्मा निंदै आशौ। 14 पर यहून्ना इणै बोलियौ तेस रोकदै लागौ, "मुं ता तैरै हाथा कु बसिस्मा निणै री जरुरत आ, और तू आशौ मुं कारे?" 15 यीशुए तेसलै जवाब दैओ, "आबै ता इणी ई हौणै दै, कैलैकि आमुंरे इणी ई रीति कौरौ धौमै रै सौबी काम पूरे कौरणै ठीक आ।" तैबै तिणीरे तेसरी बुशें मानी गोई। 16 और यीशु बसिस्मा निइंओ खरकचार पाणी मांझीऊ कु उपरै आशौ, और देखौ, तेसलै सौरग खुली गौ, और परमेश्वरा री आत्मा कबुतरा रै रुपा दी यीशु माथे आशी। 17 और देखौ, सौरगा कु परमेश्वरा री हाक शुणुई : "ऐऊ मैरौ प्यारौ छोहरु आ, एसकु हाऊं भौरी खुश ऊ।"

यीशु परखुणौ

(मरकुस 1:12-13, लूका 4:1-13)

4 तैबै आत्मं यीशु जांगला दी नियौं ताकी शैताना कौरौ तेसरौ इन्ताहान हुआ। 2 यीशु चालिस दिन और चालिस राची भूखौ रौ, तैबै यीशु कै भूख लागी। 3 तैबै पोरखणै वालै नजदीक आशियौ तेसलै बोलौ, "अगर तू परमेश्वरा रौ छोहरु ई, ता बोल, की इरे पात्थर रोटी बौणा।" 4 यीशुए जवाब दैओ, "लिखौ औन्दौ आ, 'आदमी सिरफ रोटी ई कौरौ नाई, पर हर एकी वचना कु जो परमेश्वरा रै मुंआ कु निकलौ औन्दौ आ, जीउंदौ रौआ लौ।" 5 तैबै शैतानै यीशु पवित्र गाउं यरुश्लेमा दी नीं गौ, और परमेश्वरा रै घौरा रै छापरा माथे खौडौ कियो, 6 और तेसलै बोलौ, "अगर तू परमेश्वरा रौ छोहरु

ई, ता इदरु तौलै फाल दै; कैलैकि लिखौ औन्दौ आ : 'सेउ तैरै बारै दी आपणै दूता लै हुकम दिआ आ, और सै ताऊं हाथा-हाथा दी चुंगा ई ताकी तैरै बांगणै दी पात्थरा कौरौ ठोकर ना लागा।" 7 यीशुए तेसलै बोलौ, "इणौ भी लिखौ औन्दौ आ : 'तू प्रभु आपणौ प्रभु परमेश्वर नाई पोरखै।" 8 तैबै शैतानै यीशु एक भौरी ऊंचे पहाडा माथे निओं और दुनिया रौ सारौ राज और तेथरौ सुख देखालियो, 9 तेसलै बोलौ, "अगर तू मुकै झुकियो डाल कौरालौ, ता हाऊं एस सारौ कुछ ताउंकै दिआ ऊ।" 10 तैबै यीशुए तेसलै बोलौ, "ओ शैतान दूर डेऊ, कैलैकि लिखौ औन्दौ आ : 'तू प्रभु आपणै परमेश्वरा कै डाल कौर, और सिर्फ तेसी री भौक्ती कौर।" 11 तैबै शैतान तेस कारे कु डेई गौ, और देखौ, सौरगा रै दूत तेस कारे आशियौ यीशु री सेवा कौरदै लागै।

यीशु री सेवा रै कामा री शुरुआत

(मरकुस 1:14,15; लूका 4:14,15, 31)

12 जेबी तिणीरे इणौं शुणौं की यहून्ना कैदा दी पाई गौ, ता यीशु गलीला लै डेई गौ। 13 और नासरत छाडियौ कफरनहूमा दी, जो झीला रै डिका कारे जबूलून और नमाली रै देशा दी सा, डेईओ रौईदै लागौ; 14 ताकी जो यशायाह गुरु रै जरीयै बोलौ औन्दौ थौ, सेऊ पुरौ हुआ: 15 "जबूलून और नमाली रै देश, झीला री बाटा कु यरदन पार, दुर्जा जाति रौ गलील- 16 जो लोग न्यारै दी बोशें औन्दै थै, तिउंरे बोडौ प्याशौ देखौ; और जो लोग मौरै औन्दै देश और छाईं दी बोशें औन्दै थै, तिउं माथे प्याशौ चौमकौ।" 17 सेजै बौगता कु यीशुए परचार कौरणौ और इणौं बोलणौं शुरु कौरौ गौ कि, "जीऊ बौदलौ कैलैकि सौरगा रौ राज्य नजदीक आशी गौ आ।"

पैहलै चलेऊ औटाऊणै

(मरकुस 1:16-20; लूका 5:1-11; यूहन्ना 1:35-42)

18 यीशुए गलीला री झीला रै डिका कारे घुमदै दुई भाई देखै ज़ासरै नाऊं शमौन ज़ासलै पतरस बोला ई, और तेसरौ भाई आन्द्रियास झीला दी जाल पाईदै देखै; कैलैकि सै झीवर थै। 19 यीशुए तिउंलै बोलौ, "मुं पीछु आशौ, ता हाऊं तुमु आदमीऊ पाकुडणै वालै चाणाऊ।" 20 सै खरकचार जाला छाडियौ यीशु पीछु हुई गोरे। 21 तदरु आगुडै डेईयौ, यीशुए तौइंरे दुई भाई जबदी रै छोहरु याकूब और तेसरौ भाई यूहन्ना देखौ। सै अपणै बाब जबदी आईलै किशती दी आपणै जाल ठीक कौरदै थै लागै औन्दै। यीशुए सै भी औटाए। 22 सै खरकचार किशती और आपणौ बाब छाडियौ तेस पीछु हुई गोरे।

यीशु बीमार आदमिउ ठीक कौरा

(लूका 6:17-19)

23 यीशु सारै गलीला दी डेईयौ तिउंरी धार्मिक खूबली दी शिक्षा दैदै, और राज्य रौ परचार कौरदै, और लोगु री हर बिमारी और लाचारी दूर कौरदै लागौ। 24 और सारै सीरिया देशा दी यीशु री महीमा फैली गोई; और लोग सारी बिमारी, जो कई रौंगा री बिमारी और दुखा दी पौडे औन्दै थै, और ज़ासदी बुरी आत्मा थी, और मिर्गीवालै और इणै आदमी ज़ासरै जिस्मा रौ केजो भी आंग नाई हिला थौ, यीशु कारे आणै और यीशुए सै ठीक किये। 25 गलील और दिकापुलिस, यरुश्लेम, यहूदिया और यरदन नौई रै पारा कु भीडा री भीड यीशु पीछु आशी गोई।

यीशु रौ पहाडी उपदेश

5 यीशु एजी भीड देखियो पहाडी माथे डेई गौ, और जेबी बोशी गौ ता तेसरै चेलै तेस कारे आशै। 2 और यीशु आपणौं मुं खोलियो तिउंलै एजी शिक्षा दैदै लागौ :

भौलै वचन

लूका 6:20-23

3 "आशीष वाले ई सै, जो मौना रै निऊलै ई, कैलैकि सौरगा रौ राज्य तिऊंरौ आ। 4 "आशीष वाले ई सै, जो दुख कौराई, कैलैकि सै शांति पाआ लै। 5 "आशीष वाले ई सै, जो निऊलै ई, कैलैकि सै धौतरी रै हकदार हुआ

लै।⁶ “आशीष वाले ई सै, जो धोमारे भुखे और चीशे ई, कैलैकि तिउंलै रोजीयो मिला।⁷ “आशीष वाले ई सै, जो दया कौरणे वाले ई, कैलैकि तिउं माथे दया हुआ।⁸ “आशीष वाले ई सै, जासरौ मन साफ आ, कैलैकि सै परमेश्वर देखाले।⁹ “आशीष वाले ई सै, जो मेल कराउणें वाले ई, कैलैकि तिउंलै परमेश्वर रें छोहर बोला ई।¹⁰ “आशीष वाले ई सै, जो धोमारे री वजा कु सताई आई, कैलैकि सौरगा रौ राज्य तिउं रौ आ।¹¹ “आशीष वाले ई सै, जेबी आदमी मरै कारण तुमुरी बुराई कौराई, और सतावा और झूठ बोली-बोलियो तुमुरे बिरोधा दी सोबी रोंगा री बुरी बुशें बोला।¹² तेबी खुश और मौगन हौणो, कैलैकि तुमुलै सौरगा दी बोडौ इनाम आ। एथीलै कि तिउंरें सै जो हुणें वाली बुशें बोलणें वाले गुरु थै जो तुमु कु पैहलें थै इणें कौरी सताए थै।

लूण और प्याशौ

(मरकुस 9:50; लुका 14:34-35)

¹³ “तुमै धौतरी रें लूण ई; पर अगर लूणा रौ स्वाद बिगड़ा लौ, ता सेऊ तैबै केजी चीजा कौरी लुणुओ चाणीया लौ? तैबै सेऊ केजे कामा रौ नाई, सीरफ बाइरें पाइणा लै और आदमी रें लाता थाली फेचणा लै।¹⁴ तुमै दुनिया रें दिवै ई। जो गाउं पहाडी दी बौसौ औन्दौ आ सेऊ नाई चोरीदौ।¹⁵ और लोग दिवौ जालियो टेबला थाली नाई पर ऊंची जागहा दी छाड़ा ई तैबै तेसकु घौरा रें सोबी लोगु लै प्याशौ पौउंचा आ।¹⁶ तिणी ई तुमुरौ प्याशौ भी आदमी कारे चौमका कि सै तुमुरे भौलें कामा देखियो तुमुरे बाबा री, जो सौरगा दी आ, बोडौई कौरा।

कानूना री शिक्षा

¹⁷ “इणो ना सौमझौ, कि हाऊं नियम या गुरु री किताबा मिटाऊंदै आशौ ऊ, मिटाऊंदै नाई, पर पूरी कौरदें आशौ ऊ।¹⁸ कैलै कि हाऊं तुमुलै सौचौ-सौचौ बोलाऊ, कि जेबी झाऊं सौरग और धौतरी नाई टौला ली, तेभी झाऊं नियमा रौ एक बिन्दु भी पूरौ हुईयो नाई टौला लौ।¹⁹ एथिलै जुण-कुण इऊं छोटै-छोटै हुकमा माझीआ कु एक भी चोडालौ, और तिणी ई लोगु कारे शीखावालौ, तेसलै सौरगा रें राज्य दी सोबी कु छोटौ बोला ई; पर जुण कुण तेस हुकम मानालौ और लोगु लै शीखावालौ, तेसलै सौरगा रें राज्य दी बोडौ बोला ई।²⁰ कैलैकि हाऊं तुमुलै बोलाऊ, कि अगर तुमरी धार्मिकता शास्त्रिऊ और फरीसिऊ री धार्मिकता कु बोडियो नाई हुआ ली, ता तुमै सौरगा रें राज्य दी केबी नाई डेई सौकदौ।

रोश और खून कौरणो

²¹ “तुमुए शुणी गो, कि पैहलें जमाने रें लोगु लै बोलौ औन्दौ थौ कि ‘खून नाई कौरणो’ और ‘जुण खून कौरालौ सेऊ कोरटा दी सौजा रौ हौकदार औलौ।’²² पर हाऊं तुमुलै इणो बोलाऊ, कि जुण आपणें भाई माथे रोश कौरालौ, सेऊ कोरटा दी सौजा रौ हौकदार औलौ, और जुण-कुण आपणें भाई लै निकाम्मो बोलालौ सेऊ बौडी खुम्बली दी सौजा रौ हौकदार औलौ; और जुण-कुण बोलालौ ‘ओ मूर्ख’ सेऊ नौरका री आगी दी सौजा रौ हौकदार औलौ।²³ एथिलै अगर तू आपणी भेंट वेदी माथे आणालौ, और तिरे ताउंकें याद आशाली, कि तैरें भाई रें मौना दी ताउंलै कुछ विरोध आ,²⁴ ता आपणी भेंट तिरे वेदी कारे छाड़, और डेइयो पैहलें आपणें भाई कु मेल-मिलाप कर और तैबै आशियो आपणी भेंट चोडाऊ।²⁵ जेबी झाऊं तू आपणें दुश्मना आइलें बाटा दी ई, तेस आइलें फेटी मेल मिलाप कर किये इणो ना चाई हुओ कि दुश्मन ताऊं हाकिमा कै दिया, और हाकिम ताऊं सिपाई रें हाथा दी दिया, और ताऊं जेला दी पा।²⁶ हाऊं तुमुलै सौचौ बोलाऊ कि जेबी झाऊं तू पाई पाई रौ हिसाब नाई भौरालौ तेबी झाऊं तू तिवरु नाई छुटदौ।

गाँदे विचार (गाँदे काम)

²⁷ तुमुए शुणी गो आ कि बोलौ औन्दौ थौ, ‘बुरे काम नाई कौरणो।’²⁸ पर हाऊं तुमुलै बोलाऊ, कि जुण-कुण केजी दुजी छेउडी माथे बुरी नौजर पा लौ तिणीए आपणें जीवा दी तियां आइलें बुरौ काम की गो आ।²⁹ अगर तेरी

सूलटी आख ताउंलै ठोकर खिलावा ली, ता तिणें गाडीयो पोरु शोट; कैलैकि ताउंलै इणो भौलौ आ कि तैरें शरीरा रौ एक अंग खातम हुई गो और तैरौ सारौ शरीर नौरका दी नाई पौडा।³⁰ अगर तैरौ सूलटौ हाथ ताउंलै ठोकर खिलावा लौ, ता तेस काटीयो पोरु शोट; कैलैकि ताउंलै इणो भौलौ आ कि तैरें अंगा माझीऊ कु एक खातम हुई गो और तैरौ सारौ शरीर नौरका दी नाई पौडा।

राजीनाऊं

(मती 19:9; मरकुस 10:11,12; लूका 6:18)

³¹ “एऊ भी बोलौ औन्दौ थौ, ‘जुण-कुण आपणी छेउडी लै तलाक देणो चाहा लौ, ता तियां लै लिखियो राजी नाऊं दिआ लौ।’³² पर हाऊं तुमु लै इणो बोलाऊ कि जुण-कुण आपणी छेउडी लै बुरे कामा रें सिवाए केजी ओरी कामा कु तलाक दिआ, ता सेऊ तियांकु बुरे काम करावा सा; और जुण-कुण तिणें पोरु गाडी ऐन्दी कु शादी कौरा, सेऊ गान्दौ काम कौरा आ।

कौसम

³³ “तैबै तुमुए शुणी गो कि पैहलें रें आदमीऊ के बोलौ औन्दौ थौ, ‘झूठी कौसम नाई खाणी, पर प्रभु कालें आपणी कौसम पूरी कौरौ।’³⁴ पर हाऊं तुमुलै इणो बोलाऊ कि केबी भी कसम नाई खाणी; ना ता सौरगा री कैलैकि सै परमेश्वर री बोशणा री जागाह आ;³⁵ ना धौतरी री, कैलै कि सै तेसरें बागणें री चोचकी आ; ना यरुशलेमा री, कैलैकि सेऊ बौडें राजें रौ इलाकौ आ।³⁶ आपणें मुण्डा री कौसम भी नाई खाणी कैलैकि तू एक भी बाल ना ता उजलौ, ना ता कालौ कौरी सौकदौ।³⁷ पर तुमुरी बुश ‘हां’ री ‘हां,’ या ‘नाई’ री ‘नाई’ चाई हुई; कैलैकि जो कुछ एथ कु भौरी हुआ आ सेऊ बुराई कौरी हुआ सा।

बौदलौ

(लूका 6:29-30)

³⁸ “तुमुए शुणी गो कि बोलौ औन्दौ थौ, ‘आखी रें बौदलें आख, ओर दांदा रें बौदलें दांदा।’³⁹ पर हाऊं तुमुलै इणो बोलाऊ कि बुरे रौ सामनो नाई कौरणो; पर जुण-कुण तैरें सुलटै गौलौण्टें दी थापें ला लौ, तेस भिलें दुजौ गौलौण्टें भी कौरें।⁴⁰ अगर कोई ताऊं माथे जुलम कौरीयो तैरौ कुरतौ निणौ चाहा, ता तेस दुजौ भी निणें दै।⁴¹ जुण-कुण ताऊं कोस भर बेगारा दी नियां ता तेस आइलें दुई कोस डेऊ।⁴² जुण-कुण ताऊं कु मांगा, तेसलें दै; और जो ताऊं कु उधार नियां लौ, तेसकु मुं नाई मोड़।

दुशमणु आइलें प्यार

(लूका 6:27,28, 32-36)

⁴³ “तुमुए शुणी गो आ कि बोलौ औन्दौ थौ, ‘आपणें पडोसी कु प्यार छाड़ौ, और आपणें दुश्मना कु दुश्मनी।’⁴⁴ पर हाऊं तुमु लै बोलाऊ आ कि आपणें दुश्मना कु प्यार छाड़ौ और आपणें सताउणें वाले लै कौर प्राथना,⁴⁵ जेथ कौरी तुमै आपणें सौरगा रें बाबा री संतान बोणा ई कैलैकि सेऊ भौले और बुरे दुइआ माथे आपणी रूडी रौ प्याशौ ला सा, और धोर्म और अधर्म दुइआ माथे पाणी ला सा।⁴⁶ कैलैकि अगर तुमै आपणें प्यार छाड़णें वालेउ आइलें प्यार छाड़ा ई, ता तुमुलै का फल औआ? का मामलें निणें वालें भी इणो ई नाई कौरदे? ⁴⁷ “अगर तुमै सिरफ आपणें भाई ई कै ढाल कौरा लै, ता केजो बोडौ काम कौरा ई? का दुजी जाति भी इणो नाई कौरदी? ⁴⁸ एथिलै चाई कि तुमै भी पाकें बौणो, जिणो तुमुरौ सौरगा रौ बाब पाकौ आ।

दान

6 खोबरदार रौओ! तुमै आदमी के देखाउणा लै आपणें धोर्म रें काम नाई कौरौ, नाई ता आपणें सौरगा रें बाबा कु कुछ भी फल नाई पा लौ।² “एथिलै जेबी तू दान कौरालौ, ता तू पैहलें बाँइशी नाई बाजें, जिणें कुडी लोग, खुम्बली दी और गौली दी कौराई, ताकी लोग तिउं री बोडौई कौरा। हाऊं तुमु कु सौचौ बोलाऊ कि तिउंरें आपणो फल पाई गो।³ पर जेबी तू

दान कौरा लौ, ता जो तैरौ सुलटै हाथ कौरा आ, तेस तैरौ उलटौ हाथ नाई जाणा लौ। 4 ताकी तैरौ दान गुसा दी रौआ, और तैबै तैरौ बाब जो गुसा दी देखा आ, और ताउंलै प्रतिफल दिया।

प्राथना

(लूका 11:2-4)

5 “जेबी तू प्राथना कौरा लौ, ता कुड़ी लोगु रै जिणौ नाई कर, कैलैकि लोगु कै दिखाउणा लै धार्मिक खुंबली दी और सौडकी रै मोडा दी खौडै रौईयो प्राथना कौरणौ तिउंकै आछौ लागा सा। हाऊं तुमुलै सौचौ बोला ऊ कि तिउंरे आपणौ प्रतिफल पाई गौ। 6 पर जेबी तू प्राथना कौरा लौ, ता आपणै घोरा भीतै डेरु; और दार बौन्द कौरौओ आपणै बाबा कु जो गुसा दी आ प्राथना कौर। तैबै तैरौ बाब जो गुसा दी देखा सा, ताउंलै प्रतिफल दिया। 7 प्राथना कौरदी बारै दुजी जातिरु कारे बक-बक नाई कौरै, कैलैकि सै सौमझाई कि तिउंरै भौरी बोलणै कु तिउंरी शुणा ई। 8 एथीलै तुमै तिउं जिणौ नाई बौणौ, कैलैकि तुमुरौ बाब तुमुरै मांगणै कु पैहलै जाणा आ कि तुमुरी का-का जरुरत आ। 9 “ता तुमै इणै रीति कौरौ प्राथना कौरौ : ‘ओ आमारे बाब, तू जो सौरगा दी ई; तैरौ नाऊं पवित्र मानणौ चाई। 10 तैरौ राज्य आशा। तेरी इछा जीणी सौरगा दी पूरी हुआ आ, तिणी ई धौतरी दी भी पूरी हुआ। 11 ‘आमारी पूरे दिना री रोटी आज आमुलै दै। 12 ‘और जिणै आमुए आपणै दुश्मन माफ किए ई, तिणी ई तू भी आमारे गुनाह माफ कौर। 13 ‘और आमु इन्तीहाना दी नाई पा, पर बुराई कु बचाऊ; (कैलै कि राज्य और पराक्रम और महीमा सौदा तेरी ई आ।’ आमीन।) 14 “एथीलै अगर तुमै आदमीउ रै गुनाह माफ कौरालै, ता तुमुरौ सौरगा रौ बाब भी तुमु माफ कौरा। 15 और अगर तुमै आदमी रै गुनाह माफ नाई कौरा लै, ता तुमुरौ बाब भी तुमुरै गुनाह माफ नाई कौरदौ।

ब्रौत (उपवास)

16 “जेबी तुमै ब्रौत कौरा लै, ता कुड़ी लोगु रै जिणौ तुमुरै मुंआ दी उदासी ना चाई छाई, कैलैकि सै आपणौ मु चडांगी छाडाई, ताकी लोग तिउं जाणा कि इउंरै ब्रौत छाडै औन्दै। हाऊं तुमु लै सौचौ बोलाऊ कि तिउंरे आपणौ प्रतिफल पाई गौ। 17 पर जेबी तू ब्रौत छाडालौ ता आपणै मुण्डा दी तेल माँड और मुं धोऊ, 18 ताकी लोग नाई पर तैरौ बाब जो गुसा दी आ, ताउंलै ब्रौती जाणा। एजी हालता दी तैरौ बाब जो गुसा दी देखा सा, ताउंलै प्रतिफल दिया।

सौरगा रौ धन

(लूका 12:33-34)

19 “आपु कालै धौतरी माथे धन कौठे नाई कौरौ, जिरे किडौ और काई बिगाडा आ, और जिरे चोर चोरा सा। 20 पर आपु कालै सौरगा दी धन कौठे कौरौ, जिरे ना ता किडौ और ना काई बिगाडदौ, और ना ता चोर चोरदौ। 21 कैलै कि जिरे तैरौ धन आ तिरे तैरौ मन भी लागी रौआ सा।

शरीर और प्याशौ

(लूका 11:33-36)

22 “शरीरा रौ दियो आखा आ : एथीलै अगर तेरी आख नीम्बली आ, ता तैरौ सारौ शरीर भी प्याशै दी आ।” 23 पर अगर तेरी आख बुरी आ, ता तैरौ सारौ शरीर भी न्यारै दी आ; एजै कारण सेऊ प्याशौ जो ताऊं दी आ अगर न्यारौ हुआ ता सेऊ न्यारौ किणौ बौडौ ओआ।

परमेश्वर और धन

(लूका 16:13, 12:22-31)

24 “केजौ भी आदमी दुई मालिका री सेवा नाई कौरौ सौकदौ, कैलैकि सेऊ एकी आइलै दुश्मनी और दुजै आइलै प्यार छाडा लौ, या एकी कु मिली रौआ और दुजौ कुछ नाई सौमुझदौ। तुमै परमेश्वर और धन दुईया री सेवा नाई कौरौ सौकदौ। 25 एथीलै हाऊं तुमु लै बोलाऊ कि आपणै प्राणा लै इणी

फिकर नाई कौरौ कि आमै का खाऊ लै और का पीऊ लै; और ना आपणै शरीरा लै कि का भिडु लै। का प्राण रोटी कु, और शरीर जुडके कु बौडियो नाई आ? 26 सौरगा रै चोडकु देखौ! सै ना बौडै, और ना काटदै, और ना कोठारा दी सांजदै; तैबै भी तुमुरौ सौरगा रौ बाब तिउंलै रोटी दिया सा। का तुमै तिउं कु भौरी किमती नाई आ? 27 तुमु मांझीए इणौ कुण आ, जो फिकर कौरियो आपणी उमर थोडी भी बडाई बौला सा? 28 “और जुडके लै फिकर कैलै कौराई? जांगला रै सोसना (बरासा) रै फुला दी ध्यान दैओ कि सै किणै कौरौ बौडा ई; सै ना ता मैहनत कौरदै, ना आपुलै जुडके चाणदै। 29 तैबै भी हाऊं तुमु लै बोलाऊ कि सुलैमान राजै (जो यहूदीऊ रौ सारेऊ कु बुद्धिमान राजौ थौ) सेऊ भी आपणी सुखी जीन्दगी दी इऊं फुलु जिणै बांठणै जुडके नाई भीडी बौलौ। 30 अगर परमेश्वर इयँ धौतरी री घास, जमावा सा जो घास आज औआ और बासीए जौला पोरु, तिउंके इणै जुडके भीडावा, ता ओ अविश्वासी लोगुओ, तुमुके सेऊ इऊं कु बौडियो कैलै नाई भिडाऊंदौ? 31 “एथीलै तुमै फिकर कौरियो इणौ ना बोलियो कि आमै का खाऊ लै, या का पिऊ लै, या का भीडु लै। 32 कैलै कि पुरी दुनिया रै लोग इऊं सारी चिजेउ लै फिकर कौरदै थाका ई लागी, पर तुमारौ सौरगा रौ बाब जाणा सा की तुमुके इऊं चिजा री जरुरत आ। 33 एथीलै पैहलै तुमै परमेश्वर रौ राज और तेसरै धौर्म लोडौ तैबै ऐ सारी चिजै भी तुमुके पोरु मिला ई। 34 काला री फिकर नाई कौरौ, कैलैकि काल कौ दिन आपणी फिकर आपु ई कौरा सा; आज्ञा लै आज्ञा रौ दुख भौरी सा।

दुजेऊ माथी दोष नाई लाइणौ

(लूका 6:37,38,41,42)

7 “कासी दी भी झुठे आरोप नाई लाओ तैबै तुमुदी भी झुठे आरोप नाई लागदै। 2 कैलैकि जिणौ तुमै आरोप ला ई, तिणी ई तुमु दी भी आरोप लागा ई; और जेजे पाथे कौरियो तुमै नापा लै सेजे पाथे कौरियो तुमुलै भी नापिआ सा। 3 “तू आपणै भाई री आखी दी सांगर कैलै देखाई, का ताउंकै आपणी आखी रौ डिगंचौ नाई चौगरिंदौ? 4 जेबै तेरी ई आखी दी डिगंचौ आ ता तैबै तू आपणै भाई लै किणौ बोली सौका ई, ‘भाई टेक हाऊं तेरी आखी रौ सांगर गाडाऊ?’ 5 ओ कौपटी! पैहलै आपणी आखी रौ डिगंचौ गाड, तैबै तू आपणै भाई री आखी कु तेस सांगर आच्छे कौरौ गाडी सौका ई। 6 “पवित्र चीज कुकरा लै नाई दै, और आपणै मोती सूरंग कैं नाई पा; इणौ ना चाई कि सै तिउं बांगणा थाली फेंचा और पोलटियो तुमु चीरा खा।

मांगा लै ता तुमुलै मिला सा

(लूका 11:9-13)

7 “मांगा लै, ता तुमुके दियाई, लोडा लै ता तुमुके मिला; खटखटावा लै, ता तुमुलै खुला सा। 8 कैलैकि जुण मांगा लौ ता, तेसलै दियाई; और जुण लोडा लौ, तेसकै मिला लौ; और जुण खट-खटावा लौ, तेसलै दार खुला सा। 9 तुमु मांझीए कुण इणौ आदमी आ, कि जेबी तेसरौ छोहरु रोटी मांगा लौ, ता तेसलै पात्थर दिया लौ? 10 या माछी मांगा लौ, ता तेसलै साप दिया? 11 जेबै तुमै बुरै हुईयो आपणै लोलडेऊ लै आच्छी चीजै दैणौ जाणाई, तैबै सौरगा दी रौइणै वालौ सारैऊ रौ बाब आपणै मांगणै वालै लोलडेऊ लै पवित्र आत्मा कैलै ना दैदौ? 12 एजी बजाह कु जो कुछ तुमै चाहा ई कि आदमी तुमु आइलै कौरा, तुमै भी तिउं आइलै तिणी ई कौरौ; कैलैकि नियम और गुरु रौ एजौ ई ज्ञान (शिक्षा) आ।

साँगडी और बिली बाट

(लूका 13:24)

13 “साँगडे दारा बाटी डैओ, कैलैकि खुलौ आ सेऊ दार और आसान आ सै बाट जो विनाशा री तौरफा दी पोउंचावा; और भौरी सी जुण तिआं बाटा दी डेआई। 14 कैलैकि साँगडौ आ सेऊ दार और काठी आ सै बाट जो जिन्दगी भिलै पौउंचावा सा; और थोडै ई सै लोग जो तिआं बाटा दी आंडाई।

जिणों पेड़ तिणों फौल (लूका 6:43,44; 13:25-27)

15 “झुठे गुरु कु बौचियौ रोएऊ, जो भेरी रै रूपा दी तुमु कारे आशा ई, पर बासीए सें धड़ने वालें भेड़िए ई। 16 तिउरै फला कु तुमै तिऊं प्राणा ई। का लोगु झाडी कु अंगूर, या काँडे वालें पेड़ा कु अंजीर चोड़ाई? 17 एजै जरीए हर एक आच्छौ पेड़ आच्छौ फल आणा सा। 18 आच्छौ पेड़ निकामौ फल नाई आणी सौकदौ, और ना निकामौ पेड़ आच्छौ फल आणी सौकदौ। 19 जो-जो पेड़ आच्छौ फल नाई आणदौ, तेस काटियो आगी दी पा ई। 20 एजी ताइए तिउरै फला कु तुमै तिऊं प्राणा ई। 21 “जो मुलै, ‘ओ प्रभु! ‘ओ प्रभु!’ बोला ई, तिऊं मांझीए कु हर एक सौरगा रै राज्य दी नाई डेई सौकदौ, पर सेऊ ई डिआ सा जो मेरै सौरगा रै बाबा री इच्छा दी आण्डा आ। 22 सेजे दिने भौरी लोग मुलै बोला लै, ‘ओ प्रभु, ओ प्रभु, का आमुए तैरै नाऊं कौरी भविष्यवाणी नाई की, और तैरै नाऊं कौरी बुरी आत्मा नाई गाडी, और तैरै नाऊं कु भौरी हैरान कौरणावालें काम नाई किये?’ 23 तैबै हाऊं तिऊं कु खुलियो बोलु लौ, ‘मुंइए तुमै केबी नाई जाणै। ओ निकामै काम कौरणै वालेंउओ, मुंकाए कु पोरु डैओ।’

घौरा चाणनै वालें दुई आदमी बुद्धी वालों और मूर्ख (लूका 6:47-49)

24 “एथीलै जुण-कुण मेरी एजी बुशै शुणियो तिऊं माना सा, सै तिऊं बुद्धिमान आदमीऊ जिणै ई जुणीए आपणौ घौर चटाना (डोके) माथे चाणौ। 25 और पाणी आशौ, और बाड़ आशी, और बागुर लागी, और घौरा दी टकराई, तैबै भी सेऊ नाई ढौलौ, कैलैकि तेसरी पौई पाकी जागहा दी थी लाई औन्दी। 26 पर जुण-कुण मेरी एजी बुशै शुणाई और तिऊं माथे नाई आण्डदै, सेऊ तेस निर्बुद्धी आदमी जिणौ औआ लौ जुणिए आपणौ घौर बालु माथे चाणौ। 27 और पाणी लागौ, और बाड़ आशी, और बागुर लागी, और तेस घौरा दी टकराई और सेऊ घौर ढौलियो सत्या नाष हुई गौ आ। 28 जेबी यीशुए एजी बुशै बोली गोई, ता इणौ हुओ कि भीड़ तेसरै उपदेशा कु हैरान हुरे, 29 कैलैकि यीशु तिऊं शास्त्रिऊ जिणै नाई पर अधिकारी रै जिणौ तिउलै उपदेश दिआ थौ।

कोढ़ा वालों आदमी ठीक कौरणौ (मरकुस 1:40-45, लूका 5:12-16)

8 जेबी सेऊ तेस पहाड़ा कु तौलै उतरौ, ता एक बौडी भीड़ तेस पीछु हुई गोई। 2 और देखौ, एक कोढ़ीए नजदीक आशीयो यीशु के ढाल की और बोलौ, “ओ प्रभु, अगर तू चाह लौ, ता मु चांगौ कौरी बौला ई।” 3 यीशुए तेस कोढ़ी माथे हाथ छाडौ, और बोलौ, हाऊं चाह ऊ कि तू चांगौ चांई हुओ। और सेऊ खरकचार कोढ़ा कु ठीक हुई गौ। 4 यीशुए तेसलै बोलौ, “देख, कासी के नाई बोलै, पर डेऊ याजका कारे देखाळ और जो परमेश्वरा रै आपणै सेवक मुसा रै जरीए जेजे नियम ई दैओ औन्दै तिऊं अपणाईयो बौली चोड़ाऊ ताकी सै तैरै बारै दी लोगु कारे बोला कि चांगौ और शुद्ध हुई गौ आ।”

एकी सुबेदारा रौ विश्वास (लूका 7:1-10)

5 जेबी यीशु कफरनहूमा दी आशौ ता एकी फौजीए यीशु कारे आशियो तेस कु औरज की, 6 “ओ प्रभु, मेरौ नुकुर घौरा दी भौरी बीमार पौडी औन्दी आ जासके आपणै जिस्मा रौ केजो भी अंग नाई हिलाईदौ।” 7 यीशुए तेसलै बोलौ, “हाऊं आशियो तेस ठीक कौराऊ।” 8 फौजीए जवाब दैओ, “ओ प्रभु, हाऊं इणै लायक नाई कि तू मेरै घौरा के आश, पर सीरफ आपणै मुंआ कु बोल ता मेरौ नुकुर ठीक हुआ सा। 9 कैलैकि हाऊं भी एक फौजी ऊ, मुकै हक आ और कई सिपाही मेरै हाथा दी आ जेबी हाऊं एकी लै, बोलाऊ ‘आश!’ तैबै सेऊ आशा सा; और दुजे लै बोलुलौ कि, ‘डेऊ!’ तैबै डेवा सा, अगर आपणै कास नुकरा लै बोलु लै कि ‘इणौ कौर!’ तैबै सेऊ तीणी कौरा

सा।” 10 इणौ शुणियो यीशु के हैरानी हुई, और जो यीशु पीछु थे आशदै लागे औन्दै तिऊं लै बोलौ, हाऊं तुमु लै सौचौ बोलाऊ कि मुंइयै इस्राएला दी भी इणौ विश्वास नाई देखौ। 11 और हाऊं तुमुलै बोलाऊ कि पूर्व और पश्चिमा कु लोगु आशियो अब्राहम ओए इसहाक और याकूबा आइलै सौरगा रै राज्य दी बोशालै। 12 पर एजै राज्य री औलाद बाइरै न्यारे दी पा लै : तिरे लेरनौ और दांदा रौ चाकणौ औलौ। 13 तैबै यीशुए फौजी लै बोलौ, “डेऊ, जिणौ तैरौ विश्वास आ, तिणी ई ताउलै औआ।” और तेसरौ नुकुर तेबी ई ठीक हुई गौ।

भौरी रोगिऊ ठीक कौरणै (मरकुस 1:29-34, लूका 4:38-41)

14 जेबी यीशु पतरसा रै घोरै आशौ, ता यीशुए तेसरी शाशु बुखारा कौरी बीमार पौडी औन्दी देखी। 15 यीशुए तियांरौ हाथ छुंओ और तियांरौ बुखार उतरौ गौ, और सै उठीयो यीशु री सेवा कौरदै लागी। 16 जेबी ब्याल हुई तैबै सै यीशु कारे भौरी लोगु आणदै लागे जासदी बुरीआत्मा थी और यीशुए सै आत्मा आपणै वचना कौरै गाडी गोई; और सारै बिमार लोग चांगै किये। 17 ताकी जो वचन यशायाह गुरु रै जरीए बोलौ औन्दी थौ सेऊ पुरौ हुआ : “तिणीए आपु ई आमारे कमजोरी निई गोई और आमारी बिमारी उठाई गोई।”

यीशु रै चेलै बौणनै री कीमत (लूका 9:57-62)

18 यीशुए जेबी आपणै चारो तौरफा दी एक बौडी भीड़ देखी ता झीला रै पाराभिले डेउणा रौ हुकम दैओ। 19 तैबै एकी शास्त्रिरे यीशु कारे आशियो बोलौ, “ओ गुरु, जीए तू डेवा लौ, हाऊं ताऊं पीछु आशा ऊ।” 20 यीशुए तेसलै बोलौ, “शालटा, रै रौइणा लै डेरै हुआई और चिडु-चिटकेरु रै रौइणा लै कोलै हुआई; पर आदमी रै छोहरु रौ कोई घौर नाई और मुंडा छाडने री भी जागहा नाई आसती।” 21 एकी औजौ चेलै बोलौ, “ओ प्रभु, मूं पैहलै डेरुणै दै ताकी हाऊं आपणौ बाब कौबरा दी दाबु।” 22 यीशुए तेसलै बोलौ, “तू मूं पीछु आश, और जो मौरै औन्दै ई तिऊं आपणै मुदं दाबणै दैओ।”

बागुर शान्त कौरणौ (मरकुस 4:35-41; लूका 8:22-25)

23 जेबी यीशु किशती दी चोडौ, ता तेसरै चेलै तेस पीछु आशी गौए। 24 और देखौ, झीला दी एक इणौ बौडौ तूफान आशौ कि किशती पाणी कु बौरिंदै लागी, और यीशु सुतौ औन्दी थौ। 25 तैबै चेलेउए नजदीक डेइयो यीशु उजयाओ और बोलौ, “ओ प्रभु, आमु बचाऊ आमै नाश ई औन्दै लागे औन्दै।” 26 तिणीए तिउलै बोलौ, “ओ अविश्वासि लोगुओ, कैलै डौराई?” तैबै यीशुए उठीयो बागुर और पाणी डांटे, और सब शान्त हुई गौ। 27 और सै हैरान हुईओ बोलदै लागे, “एऊ किणौ आदमी आ कि बागुर और पाणी भी एसरौ हुकम मानाई।

बूरी आत्मा वालों आदमी चांगौ कौरणौ (मरकुस 5:1-20; लूका 8:26-39)

28 जेबी यीशु पाराभिले गदरैनियो रै देशा दी पौउंचौ, ता दुई आदमी जासदी बुरीआत्मा थी कौबरा कु निकलै और यीशु के मिलै। सै एती रोशा आलै थे कि कोई भी सेजी बाटा दी नाई डेई सौका थै। 29 तिउंए हाके मारीयो बोलौ, “ओ परमेश्वरा रै छोहरु, आमारौ ताऊं के का काम आ? का तू बौगता कु पैहलै ई आमु लै दुख दैदें आशौ ई?” 30 यीशु कु कुछ दुर भौरी का सुंगरा रौ एक झुड़ चोरदै लागौ औन्दी थौ। 31 बुरी आत्माए यीशु कु औरज किये, “अगर तू आमु गाड़ाई, ता सुंगरा रै शाला दी भेज। 32 यीशुए तिउलै बोलौ, “डैओ!” और सै निकलियो सुंगरा दी डेई गौए और देखौ, सारौ गोल मातोलै दुडियो झिला दी पौडे और दुबियो पोरु मौरै। 33 तिऊं सुंगरु चारणै वालें इणौ देखीओ तदरु पोरु भागे, और इलाके दी डेइओ ए सारी बुशै और जासदी बुरी आत्मा थी तेसरौ सारौ हाल शुणाओ। 34 तैबै सारै लोगु यीशु कारे मिलदै डेई गौए, और यीशु कु औरज कौरदै लागे कि आमारी सिवा कु बाइरै डेऊ।

अधरोंगा वालों आदमी चांगों कौरणों

(मरकुस 2:1-12; लूका5:17-26)

9 तैबे यीशु किशती दी चोड़ियों पारभिले डैओ, और आपणें इलाके दी आशौ। 2 और देखौ, भौरी लोग एक आदमी चारपाई दी बानिओ यीशु कारे आपणें ज़ासरौ ज़िस्मा रौ केजो भी अंग नाई हिलाइया थौ। यीशुए तिजंरौ विश्वास देखीयौ, तेस बिमार आदमी लै बोलौ, “ओ छोहर, हिम्मत छाड़; तैरे पाप माफ हुई गौरे ई।” 3 एथ माथे कई शास्त्रिउरे सुंवौ, “एऊ ता परमेश्वरा री बुराई कौरा सा?” 4 यीशुए तिजंरी मौना री बुशें ज़ाणीओ बोलौ, “तुमै लोग आपणें-आपणें मौना दी बुरौ कैलै सुचदैं लागे औन्दै? 5 आसान का सा? बिमार आदमी लै इणौ बोलनौ कि खोड़ौ ऊठ आपणौ बिस्तर चुंग और आंडदैं लाग? 6 तुमके देखाइला लै कि “आदमी रै छोहर” के धौतरी माथे पाप माफ कौरनै रौ भी हक आ तैबे यीशुए तेस बिमार आदमी भीलै देखीयौ बोलौ हाऊं ताउलें बोलाऊ, खोड़ी उठ, आपणौ बिस्तरौ चुंग और आपणें घोरें डेऊ। कैलैकि तू ठीक हुई गो ई। 7 सेऊ उठीयो आपणें घोरें डेइ गौ आ। 8 लोग इणौ देखीयो डोरै गौरे और परमेश्वरा री महिमा कौरदैं लागे ज़ुणीए आदमी लै इणौ हक दैओ सा।

मती आपु आइलै औटाउणों

(मरकुस 2:13-17 लूका5:27-32)

9 तदिरा कु औगाड़िरे डेइयो यीशुए मत्ती नावां रै एकी आदमी लै जो मामलें निणें वालें रै आडे माथे थौ बोशौ औन्दौ सेऊ देखौ, और तेसलै बोलौ, “मु पिछु आश।” सेऊ उठीयो यीशु पिछु आंडदैं लागौ। 10 और जेबी यीशु मत्ती रै घौरा दी रोटी खांदे बोशौ ता तिए भौरी मामलें निणें वालें और पापी लोग आशीयो यीशु और तेसरें चेलें आइलै रोटी खांदे बोशें। 11 इणौ देखीयो फरीसिऊ ए यीशु रै चेलैऊ लै बोलौ, “तुमारौ गुरु मामलें निणें वालें और पापी लोग आइलै रोटी कैलै खा पिआ आ?” 12 इणौ शुणीयो यीशुए तिजंलै बोलौ, “डाक्टरा री जरूरत भौलै-चांगें आदमी के नाई पर बिमार आदमी के औआ सा। 13 एथीलै तुमै डेइयो एथरौ मतलब शीखौ : ‘हाऊं बलिदान नाई पर दया चाह ऊ। कैलैकि हाऊं धर्मी आदमीउ नाई पर पापी आदमीउ औटाउंदेऊ आशौ ऊ।”

ब्रौता(उपवासा) रौ सवाल

(मरकुस 2:18-22 लूका 5:33-39)

14 तैबे यूहन्ना रै चेलेउए यीशु कारे आशीयो बोलौ, “का मतलब आ कि आमै और फरीसी एती ब्रौत छाड़ी ई, पर तैरे चेलें ब्रौत नाई छाड़दैं?” 15 यीशुए तिजंलै बोलौ, “का बराती, जेबी झाऊं लाडौ तिऊं आइलै आ, शोक कौरौ सौका ई? पर सैं दिन आशालै जेबी लाडौ तिऊं कु अलग कौरालै, सेजे बौगता दी सैं ब्रौत कौराई। 16 केजौ भी आदमी नौरें जुड़के रौ टालकौ पुराणें जुड़के दी नाई लाईदौ। नाई ता धोइंदीं बारें सेऊ नौरें जुड़के रौ टालकौ तेस पुराणौ जुड़कौ थोसियो ज़ादड़ौ चीरा सा। और सेऊ टालकौ पुराणें जुड़के आइलै मेल भी नाई खान्दौ। 17 कोई भी आदमी अगुरा री सूर चाणना लै ताजौ अगुरा रौ रस पुराणें चामडैं री थोउली दी नाई छाड़दौ। नाई ता अगुरा रौ रस दख बौगता बासीए फैलीयो तेस पुराणें चामडैं रौ थौउलौ भी पोरु चीरा जेथ कौराए अगुरा रौ रस और थौउलौ दुइया बरबाद हुआ ई; पर नौऊओ अगुरा रौ रस नौऊई थौउली दी भौरा ई और सैं दुईया बोची रौआई।”

मौरी औंदी छोटी और बीमार छेवड़ी

(मरकुस 5:21-43; लूका 8:40-56)

18 यीशु तिऊं आइलै एजी बुशें लाईदैं थौ लागौ औन्दौ, कि देखौ, एक मुखरे आशीयो यीशु के ढाल की और बोलौ, “मेरी माई ईबी मौरी आ, पर चाल आपणौ हाथ तिआं माथे छाड़, ता सैं जीऊंदी हुआ सा।” 19 यीशु उठीयो आपणें चेलें आइलै तेस पिछु डेई गौरे। 20 और देखौ, एक छेउडीए ज़ासदी बारहा बौरशा ओऊलै लोऊ बौइणै री बिमारी थी, पिछु कु आशीयो

यीशु रै जुड़के छुंए। 21 कैलै कि सैं आपणें मौना दी बोला थी, “अगर हाऊं यीशु रै जुड़के छुंउ लै ता हाऊं ठीक औआ ऊ।” 22 यीशुए मुडीयो सैं देखी और बोलौ, “धीआ हिम्मत छाड़, तैरे विश्वास तू ठीक कौरौ गोई आ।” तैबे सैं छेउडी तेबी ई ठीक हुई गोई। 23 जेबी यीशु तेस मुख्या रै घौरा कारे पौउंचौ ता तिए बांइशी बजाउणें वालें और भीड़ देखी, 24 तैबे बोलौ, “दूर हुओ इदर, माई मौरी नाई, पर सुती ऐन्दी आ।” एथ माथे सैं यीशु रौ मजाक उड़ाऊंदै लागै। 25 पर जेबी भीड़ गाड़ी गोई, ता यीशुए भितरें डेइयो तिरें माई रौ हाथ पाकडौ, और सैं जीऊंदी हुई गोई। 26 और एजी बुशें री खौबर तेस सारें देशा दी फैली गोई।

दुई शेडैउ लै आखी देणी

27 जेबी यीशु तदिरा औगाऊं डैओ, ता दुई शेडै तेस पिछु इणौ औटाउंदै लागै, “ओ दाऊदा री औलाद, आमु माथे दया करा!” 28 जेबी यीशु घौरा दी पौउंचौ, ता सैं शेडै यीशु कारे आशें, और यीशुए तिजंलै बोलौ, “का तुमारौ विश्वास आ कि हाऊं इणौ कौरौ सौकाउ आ? तिउंए यीशु लै बोलौ, “ओ, प्रभु!” 29 तैबे यीशुए तिजंरी आखी छुंउओ बोलौ, “तुमारें विश्वास रै अनुसार तुमुलै हुआ सा। 30 और तिजंरी आखी खुली गोई। यीशुए तिजंके चितलाइओ बोलौ, “खौबरदार, कासी के भी एजी बुशा रौ पौतौ ना चांई लागौ।” 31 पर तिउंए डेइयो सारें देशा दी यीशु रौ नाऊ फैलाई गो।

एक लाटौ चांगों कौरणों

32 जेबी सैं बाइरें थै डेउंदै लागे औन्दै ता देखौ, लोगु एक लाटौ ज़ासदी बुरी आत्मा थी लागी ऐंदी, यीशु कारे आपणें; 33 और जेबी बुरी आत्मा गाड़ी गोई, ता लाटौ बोलदैं लागौ। एथ माथे भीड़ हैरान हुईओ बोलदैं लागी, “इसाइला दी इणौ केबी नाई देखौ।” 34 पर फरीसिऊरे बोलौ, “एऊ ता बुरी आत्मा रै मुख्या री सहायता कौरौ बुरी आत्मा गाड़ा सा।” 35 यीशु सारें इलाके और गांव दी फिरदैं रौओ और तिउरें धार्मिक खुंबली दी डेइओ उपदेश दैंदै थाकौ लागी, और राज्य रौ खुशी री खबरा रौ परचार कौरदैं, और सौबी रौंगा री बिमारी और कमजोरी दूर कौरदैं थाकौ लागी। 36 जेबी यीशुए भीड़ देखी ता तेसरें लोगु माथे दया आशी, कैलैकि सैं तिऊं भेरी ज़िणी थी ज़ासरौ कोई भेरालडु नाई औन्दौ, और सैं परेशान और भटकें औन्दै थै। 37 तैबे यीशुए आपणें चेलैऊ लै बोलौ, “पाचें औन्दै डोखरें ता भौरी सी पर लौइणें वाले थोडे जेई ई। 38 एथीलै डोखरें रै मालिका कु औरज कौरौ कि सैं आपणें फसला लौइणा लै मजदूर भेजा।”

यीशु रै बारह चेलें

(मरकुस3:13-19; लूका6:12-16)

10 तैबे यीशुए आपणें बाहरा चेलें आपु कारे औटाइरे, और तिजंलै बुरीआत्मा माथे हौक दैओ कि तिऊं गाडौ और सौबी रौंगा री बिमारी और सौबी रौंगा री कमजोरी दूर कौरौ। 2 इऊं बारह चेलें रै नाऊं ए आ : पैहलौ शमौन, ज़ासलै पतरस भी बोला ई, और तेसरौ भाई अन्द्रियास; जबदी रौ छोहरु याकूब, और तेसरौ भाई युहन्ना; 3 फिलिप्पुस, और बरतुल्लै, थोमा, और मामलै निणा वालौ मत्ती, हलफाई रौ छोहरु याकूब, और तद्दे, 4 शमौन कनानी, और यहूदा इस्करियोती जुगिरे यीशु पकड़वाओ आ।

बारह (प्रेरित) चेलेउ री सेवा और काम

(मरकुस 6:7-13; लूका 9:1-6,10:4-12)

5 इऊं बारह लै यीशुए ऐजें हुकमा देइओ भेजे : “दुजी जाति बीलै नाई डेइओ, और सामरीऊ रै केजें इलाके दी नाई डेइओ। 6 पर इस्राएला रै घौरा ई री औचै ऐन्दी भेरी कारे डैओ। 7 और आंडदैं-आंडदैं इणौ परचार कौरौ : ‘सौरगा रौ राज्य नजदीक आशी गौ सा।’ 8 बिमार लोगु ठीक कौरौ, मौरें ऐन्दै जीऊंदै कौरौ, कोडीऊ ठीक कौरौ, बुरी आत्मा गाडौ। तुमुए मुफता दै पाओ सा, और मुफता दी दैओ। 9 आपणें गाची दी ना ता सूनौ, और ना ता रूपाए, और ना चांबौ छाड़णौ; 10 बाटा लै ना बैग निओ, ना दुई कुरतै, ना बूट और ना डिगें निओ, कैलैकि मजदूर लै तेसरी रोटी मिलणी चाई। 11 “जेजे कजे

इलाके या गांवा दी डेआ लै, ता पौतौ लाओ कि तिरे कुण आ ठीक। और जेबी झाऊं तिरु कु नाई निकलालै, तेसी रै काए सौओ, 12 घौरा दी डेउंदै ई तेसलै आशीष दैओ। 13 अगर तेस घौरा रै लोग शान्ती रै लायक औलै ता तिउंलै आशीष मिला सा, अगर सै इणै लायक नाई औलै ता सै आशीष और शान्ती वापिस आशा सा। 14 जुण-कुण तुमु नाई अपनावालै और तुमारी बुशौ नाई शुणालै, तेस घौरा या तेस इलाके कु डेउंदी बारै आपणै बांगणै री धूल पोरु झाडौ। 15 हाऊं तुमु कु सौचौ बोलाऊ कि न्याय रै दिने तेस इलाके री हालता कु सदोम और अमारा रै देशा री हालत भौरी सैहन ना कौरणै रै लायक औआली।

आशणै वाली मुश्किल

(मरकुस 13:9-13; लूका 21:12-17)

16 “देखौ, हाऊं तुमु भेरी रै जिणौ शालटै रै मांझिरे भेझाऊं ई, एथीलै सापा रै जिणै चलाक और कबूतरा रै जिणै भोलै बौणौ। 17 पर लोगु कु होशिया सौओ, कैलैकि सै तुमु बौडी खुम्बली दी निआं ई, और आपणी पंचाइता दी तुमुदी डिगै ला ई। 18 तुमै मु कालै जजा और राजो काए तिउं माथै, और दुजी जाती माथै गवाह हौणा लै पौरुचावा लै। 19 जेबी सै तुमु पाकडालै ता एजी फिकर नाई कौरीओ कि आमै केजी रीति कु या का बोलीलै, कैलैकि जो कुछ तुमुरौ बोलणौ औलौ, सेऊ सेजी बौगै तुमुलै बोला सा। 20 कैलैकि बोलणा वालै तुमै नाई ई, पर तुमारै बाबा री आत्मा तुमु दी बोला सा। 21 “भाई भाई के और बाब छोहरु कै, झागणा लै दिआलै, और छोहरु माँ बाबा रै विरोद्धा दी उठीओ तिउं झंगवा ई। 22 मैरै नावां रै कारण सौबी लोग तुमु कु दुश्मनी छाड़ा लै, पर जो आखरी झाऊं सौबर कौरा लौ तेस ई सौ उद्धार ओआ लौ। 23 जेबी सै तुमु एकी इलाके दी तंग कौरालै, ता दुजो लै भागणौ। हाऊं तुमुलै सौचौ बोलाऊ, ता तुमै इस्राएला रै सौबी इलाके दी नाई भागालै की आदमी सौ छोहरु आशा लौ। 24 “चेलौ आपणै गुरु कु बौडौ नाई औन्दै; और ना नुकुर आपणै मालिका कु। 25 चेलै सौ गुरु रै, और नुकुरा सौ मालिका रै बराबर हौणौ ई भौरी आ। जेबी तिउं घौरा रै मालिका लै शैतान बोलौ ता तेसरै घौरवालै लै का कुछ नाई बोलालै।

कास कु डौरी लै

(लूका 12:2-7)

26 “एथीलै आदमीऊ कु नाई डौरौ; कैलैकि कुछ ढौकौ औन्दै नाई कि जो नाई खोलालै, और ना कुछ छुपौ सा जो नाई जाणियां लौ। 27 जो हाऊं तुमु कु निआरिया दी बोलाऊ, तेस तुमै पयाशा दी बोलौ; और जो काना ई कान शुणाई, तेस छापरा माथै कु परकट कौरौ। 28 जो शरीरा कौरी झांगाई सा, पर नाई झांगी सौकदौ, तिउंकु नाई डौरौ; पर तेस कु डौरौ, जो आत्मा और शरीर दुई नौरका दी नाश कौरी सौका आ। 29 का रुपाए कौरी दुई चोडकी नाई बीकदी? तैबे भी तुमारै बाबा री मौरजी रै बिना तिउं मांझिऊ कु एक भी जमीना माथै नाई लोटदी 30 तुमारै मुंडा रै बाल भी गौणै औन्दै आ। 31 एथीलै डौरौ नाई; कैलैकि तुमै परमेश्वरा लै तिउं चोडकी रै बालरा कु भी जादँ किमती ई।

यीशु मानणौ या नाई मानणौ

(लूका 12:8,9)

32 “जो कोई मुँ आदमीऊ मांझिरे माना लौ ता हाऊं आदमी सौ छोहरु तेस आदमी परमेश्वरा रै सामनै मानाऊ। 33 पर जो कोई आदमी रै सामनै मैरौ इन्कार कौरा लौ, तेसकु हाऊं भी आपणै सौरगा रै बाबा रै सामनै इन्कार कौराउ। यीशु रै आशणै सौ नतीजौ

यीशु आशणै सौ नतीजौ

(लूका 12:51-53, 14:26-27)

34 “इणौ ना सौमझौ की हाऊं धौतरी दी मेल मिलाप कौरदँ ऊ आशौ औन्दै; हाऊं मेल मिलाप नाई, पर तलवार चलाऊंदँ आशौ आ। 35 हाऊं ता आशौ सा कि: ‘आदमी लै तेसरै बाबा कु, और छोटी लै तिआं री माँ कु, और

बोऊ लै तिआं री शाशु कु अलग कौरु; 36 आदमी रै दुश्मन तेसरै घौरा रै ई लोग हुआई।’ 37 “जो माँ या बाबा मुकु भौरी प्यारौ जाणाई, सेऊ मैरै लायक नाई; और जो आपणै माऊ या मांई मुकु भौरी प्यारौ जाणा लौ, सेऊ मैरै लायक नाई; 38 जो आपणौ कूस निओ मु पिछु नाई हांडा लौ सेऊ मैरै लायक नाई। 39 जो आपणै जान बचावालौ, सेऊ तेस नाश कौरालौ लौ; और जो मैरै कारण आपणी जान नाश कौरा लौ, सेऊ तेस बचावालौ। प्रतिफल

आच्छै कौरीयो आच्छौ (प्रतीफल)

(मरकुस 9:41)

40 “जो तुमु अपनावालौ, सेऊ मुं अपनावा सा; जो मुं अपनावा सा सेऊ मैरै भेजणै वालौ अपनावा सा। 41 जो गुरु (भविष्यदवक्ता) लै गुरु जाणीओ अपनावालौ, सेऊ गुरु सौ बौदलौ पालौ; और जो धौमी लै धौमी जाणीओ अपनावालौ, सेऊ धौमी सौ बौदलौ पालौ। 42 जो कोई इऊं छोटै मांझिऊ कु एकी लै मैरौ चेलौ जाणीओ सीरफ एक गिलासा शैलौ पाणी पिलावालै, हाऊं तुमु कै सौचौ बोलाऊ, सेऊ केजी रीति कु आपणौ प्रतिफल नाई खोआलौ।”

यीशु और यूहन्ना बपतिस्मा देणै वालौ

(लूका 7:18-35)

11 जेबी यीशुए आपणै बारह चेलेऊ लै हुकम देई ऐरौ, ता सेऊ तिउरै इलाके दी उपदेश और परचार कौरणै लै तिरु कु डेइ गौ। 2 यूहन्नै केदा दी मसीह रै कामा सौ संदेश शुणौ और आपणै चेलै यीशु काए इणै पुछणा लै भेजे, 3 “का आशणै वालौ मसीह तू ई आ (जास पौखधे आमै लागै औन्दै थै), या आमै कास ओरी पौखलै? 4 यीशुए तिउंलै जवाब दैओ, “जो कुछ तुमुए देखौ और शुणौ, डेइओ तेस यूहन्ना के बोलौ, 5 कि शेडै देखाई, लोंगडै ई आणडाई, कोडी हुआई ठीक, टौणै ई शुणा, मौरै औन्दै हुआई जीऊंदै, और गरीब आदमीऊ लै शुणावा खुशी सौ संदेश। 6 आशीष वालै आ सै, जासदी मैरै कारण ठोकर ना लागाली।” 7 जेबी सै तिरु कु डेइ गौरै, ता यीशु यूहन्ना रै बारै दी लोगु आइलै बोलदँ लागौ, “तुमै जागला दी का देखदँ थै डैओ औन्दै? का बागुरा कौरी हिलणै वालै शाऊंदँ देखदँ? 8 तैबे तुमै का देखदँ डैओ औन्दै थै? का चोगै-बागै भिडे औन्दै आदमीउ देखदँ डेवे थै? नाई कैलैकि जो आदमी चोगै-बागै बीडाई सै टाटा (आरामा) कौरी आपणै मैहला दी सौआई। 9 ता तैबे तुमै का देखदँ थै डैओ औन्दै? का कास गुरु देखदँ? ओ, हाऊं तुमु लै बोलाऊ कि सेऊ (यूहन्ना) भविष्यवक्ता कु भी बौडौ आ। 10 यूहन्ना ही सा सेऊ गुरु (दूत) जासरै बारै दी धर्मशास्त्रा दी इणौ लिखौ औन्दै: ‘कि देखौ, हाऊं आपणौ दूत ताऊंकु औगाडीए भेझाऊं, सेऊ ताऊंकु औगाडीए डेइयो ताऊं काले बाट तैयार कौरा।’ 11 तैबे यीशुए बोलौ, हाऊं तुमुलै सौचौ बोलाऊ कि इबी झाऊं कोई भी इणौ आदमी पैदौ नाई हुओ जो यूहन्ना कु बौडौ आ। पर परमेश्वरा रै राजा दी जुण छोटै कु छोटौ आ सेऊ यूहन्ना कु भी बौडौ आ। 12 यूहन्ना बपतिस्मा देणैवालै रै दिने दी ऐबी झाऊं सौरगा रै राजा दी ताकती कौरी डेआ सा, और और शक्तीशाली तेस छुड़ावा आ। 13 यूहन्ना झाऊं सारै गुरु और नियम भविष्यवाणी कौरा ई। 14 और चहा ता मानौ कि एलिय्याह जो आशणैवालौ थौ, सेऊ एऊ ई सा। 15 जासरै शुणना रै कान सा, सै शुणालै। 16 “हाऊं ऐजी पीडी री मसाल कास आइलै देउ? सै तिउं माऊं सै समान आ, जो बजारा दी बोशै औन्दै एकी-दुजै लै औटाइयो बोलाई 17 ‘आमुए तुमुलै बांइशी बजाई, और पर तुमै नाचै नाई; आमुए दुख किओ, और तुमुए छाती नाई पीटी।’ 18 कैलैकि यूहन्ना ना खाइओ आशौ और ना पिओ, और सै बोलाई, ‘तेसदी बुरी आत्मा आ।’ 19 हाऊं आदमी सौ छोहरु, खा पिआ ऊ, पर तुमै बोलाई इणौ कि हाऊं पेटु और सूरी पिणै वालौ, मामलै निणै वालौ और पापी लोगु सौ गौश्टण पर जुण परमेश्वरा री शिक्षा (ज्ञान) मानीओ चाला सा तिउंरी जीन्दगी कु परमेश्वरा सौ ज्ञान सौचौ साबीत हुआ आ।

बिण विश्वास माथी हाथ (लूका10:21,22)

20 तैबे यीशु तेस इलाकाँ फिटकारदे लागौ, जासदी तिणीए भौरी चमतकार काम किये थै, कैलैकि तिउंरे आपणौ ज़ीऊ नाई फिराओ थौ। 21 “हाए, खुराजीन! हाए, बैतसैदा! जो चमतकार और आच्छे काम मुइयै तुमु मांजीए किई अगर तिउं काम हाऊं बुरै इलाके सूर और सैदा दी कौरा थौ ता सै तिउंरे बौणै औन्दै बोरी रे जुडके भीडीयौ और आपणै जिवा (शरीरा) दी छारा मांडीयौ केबके आपणौ मन पापा कु बौदला थै। 22 पर हाऊं तुमु लै बोलाऊ कि फैसलै रे दिना दी तुमारी हालत तिउं सूर-सैदा गावां कु भी जादी बुरी हुणी आ। 23 ओ कफरनहुमा रे लोगुओ, का तुमु सौरगा झाऊं ऊंचौ कौरा ई? ताऊं ता तौलै उतारा ई आधोलोका (पैताला) लै! जो चमतकार काम तुमु मांझिए कौरै ई, अगर सोदमा दी कौरै थै, ता सेऊ आज्ञा झाऊं बौणी रौआ थौ। 24 पर हाऊं तुमु लै बोलाऊ कि फैसलै रे दिने तेरी हालत सदोमा री हालता कु जादी बुरी हुणी आ।” 25 सेजै बौगैतै यीशुए बोलौ, “ओ बाब, सौरगा और घौतरी रे मालिक हाऊं तैरौ धन्यावाद कौरा ऊ कि तू इयै बुशै ज्ञानी और समझदार कु चोरी छाडी और छोहरु माथै परगट की आ। 26 ओ, बाब ताऊंके इणौ ई आच्छे लागौ। 27 “मैरे बाबै मुके सब कुछ देई गौ आ; कोई ना जाणदौ कि छोहरु कुण आ, सिर्फ बाब जाणा सा, और बाब कुण आ इणौ भी कोई ना जाणदौ सिर्फ छोहरु या जास माथै छोहरु तेस परगट कौरणै चाह लौ। 28 “ओ सब मैहनत कौरणै वातैउओ और गौरके थाली दाबुए औन्दै लोगुओ, मु कारे आशौ; हाऊं तुमुलै आराम दिआऊ। 29 मैरौ शमाई आपु माथै चुंगौ, और मुकु शीखौ; कैलैकि हाऊं शांत और जिवा कु भोलौ आ : और तुमै आपणै जिवा दी आराम पा लै। 30 कैलैकि मैरौ शमाई आसान और मैरौ भार होलखौ आ।”

छुट्टी रे दिना रौ भी प्रभु (मरकुस 2:23-28, लूका6:1-5)

12 सेजै बौगैतै यीशु आरामा रे दिना दी डोखरै दी थौ डेऊंदै लागौ औन्दौ, और तेसरै चेलैऊ रे भूख लागी ता सै गिऊंआ रे सील चोडीयौ खान्दै लागै। 2 तैबे फरीसीऊ मांझीए कु कुछ लोगुए बोलौ जेजौ काम आरामा रे दिना दी नाई जान्दौ कौरनौ, सेजौ काम तुमै कैलै कौराई? 3 यीशुए तिउंलै जवाब दैओ, “का तुमुए धर्म शात्रा दी नाई पौडौ, जेबी राजौ दाऊद और तेसरै साथी भुखे थै, तिउंकु खानालै कुछ भी नाई थौ, तैबे राजै दाऊद का कियौ? 4 सेऊ परमेश्वर रे घौरा दी डैओ, और तिरे परमेश्वर लै चडाई औन्दै भोगा री रोटी खाई और आपणै साथीऊ लै भी देई, जो सिरफ याजक ही खा थै? 5 या का तुमुए नियमा दी नाई पौडौ कि याजक आरामा रे दिना परमेश्वर रे घौरा दी आरामा रे दिना री विधि चोड़ना दी भी निर्आरोप ठहराई? 6 पर हाऊं तुमुलै बोलाऊ कि इयै सेऊ आ जो परमेश्वर रे घौरा कु भी बौडौ आ। 7 अगर तुमै ऐथारौ मतलब जाणाई, ‘हाऊं दया कौरी खुश हुआउ, बलिदाना कु नाई,’ ता तुमै निर्आरोपी लै आरोपी नाई बोला थै। 8 आदमी रौ छोहरु ता आरामा रे दिना रौ भी प्रभु आ।”

शुकै औन्दै हाथा वालौ आदमी चांगौ कौरणौ (मरकुस3:1-6; लूका6:1-5)

9 तिवरु कु डेइयौ यीशु तिउंरे परमेश्वर रे घौरा दी आशौ। 10 तिरे एक आदमी थौ, जासरो हाथ शुकौ औन्दौ थौ। तैबे कुछ फरीसी और शात्री लोग यीशु माथे आरोप लाईणा लै बोलौ, “का आरामा वालै दिना दी चांगौ कौरणौ ठीक आ?” 11 यीशुए तिउंलै बोलौ, “तुमु मांझिऊ इणौ कुण आ जासरी एक ही भेरी आ, और से आरामा रे दिने खाली दी पौडाली, ता सेऊ तियां पाकडीयौ नाई गाडदौ? 12 भौलौ, आदमी री किमत भेरी कु केती बौडीओ आ! एथीलै आरामा रे दिने भलाई कौरनी ठीक आ।” 13 तैबे यीशुए तेस आदमी लै बोलौ, “आपणौ हाथ बौडाऊ।” तिणीए आपणौ हाथ ओगाऊं कियौ, और सेऊ तैबे दुजे हाथा जिणौ ठीक हुई गौ। 14 तैबे फरीसीऊरे बाइरै डेइयौ यीशु रे विरोधा दी गुणमुणादै लागै कि ऐस किणै कौरी ज्ञांगी।

परमेश्वरौ छांटौ औंदौ सेवक

15 इणौ ज्ञाणीयौ यीशु तिवरु कु डेइ गौ। और भौरी लोग यीशु पीछु हुइ गौरे, और यीशुए सौबी लोग चांगे किये, 16 और यीशुए सै चितलायै कि मूँ परगट नाई कौरीयो। 17 ताकी जो वचन यशायाह गुरुए रे जरीयै बोलौ औन्दौ थौ, सेऊ पुरौ हुआ : 18 “देखौ, एऊ मैरौ नुकुर आ, जो मुइयै छांटौ आ; मैरौ प्यारौ, जासकु मैरौ ज़ीऊ खुश आ : हाऊं आपणी आत्मा ऐस माथे पा ऊ, और सेऊ दुजी जाति लै फैसला रौ संदेश दिआलौ। 19 सेऊ ना झौंगडौ कौरालौ, और ना नाचा गा लौ, और ना बजारा दी कोई तेसरी बाच शुणालौ। 20 सेऊ फेचै औन्दै डाल नाई चोडालौ, और ना धुओं देणै वालौ दियो इशावालौ। जेबी झाऊं सेऊ फैसलै माथे जीत नाई दिलावालौ। 21 दुजी जाति तेसरै नाऊं माथे आश छाडालै।”

यीशु और बालजबूल

(मरकुस 3:20-30; लूका11:14-23)

22 तैबे लोगुए एक शेडो और गुंगो आदमी यीशु कायै आणौ जासदी बुरीआत्मा थौ; और यीशुए सै ठीक कियो, और सै बोलदै और देखदै लागै। 23 एथ माथे सारै लोग हैरान हुइयो बोलदै लागै, “एऊ का दाऊदा री सन्तान आ!” 24 पर फरीसीऊरे इणौ शुणीयो बोलौ, “एऊ ता बुरीआत्मा रे मुख्यौ बालजबूला री सहायता रे बिणा बुरी आत्मा नाई गाडदौ।” 25 पर यीशुए तिउंलै मना री बुशै ज्ञाणीयो तिउंलै बोलौ, “जेजै राज्य दी आपु मांझीयै फूट हुआ सा, सेऊ पोरु उझडा सा; और जेजै घौरा या इलाके दी फूट हुआ सा, सेऊ घौर नाश हुआ सा। 26 और अगर शैतान ई शैतान गाडा, ता सेऊ आपणौ ही विरोधी हुइ गौ आ; तैबे तेसरौ राज किणै कौरीयै बौणी रौआ सा? 27 अगर हाऊं शैताना रे जरीयै बुरी आत्मा गाडा ऊ ता, तुमारी सन्तान कासरै जरीयै बुरी आत्मा गाडा ई? एथीलै सै ई तुमारौ फैसलौ कौरा ई। 28 अगर हाऊं परमेश्वर री शक्ति कौरीयै बुरी आत्मा गाडा ऊ ता परमेश्वर रौ राज तुमारै बिचा दी आशी गौ आ। 29 या किणै कौरी कोई आदमी कास ताकती वालै रे घौरा दी डेइयौ तेसरी धन-जयदाद लूटी सौका आ, जेबी झाऊं कि पहलै सेऊ तेस ताकती वालौ आदमी नाई बानालौ? तैबे सेऊ तेसरौ घौरा री धन-जयदाद लूटा सा। 30 जो मैरे साथी दी नाई आ सै मैरे विरोधा ई, और जो मूँ आइलै कोठे नाई कौरदै सै ढाला ई। 31 एथीलै हाऊं तुमुलै बोलाऊ कि आदमी रे सारै चांगे रे पाप और बुराई माफ हुआ, पर पवित्र आत्मा री बुराई माफ नाई औली। 32 जुण-कुण आदमी रे छोहरु रे विरोधा दी कोई बुश बोलालौ, तेसरौ एऊ गुनाह माफ हुआ लौ, पर जुण-कुण पवित्र आत्मा रे विरोधा दी कुछ बोलालै, तेसरौ गुनाह ना ता लोका दी और ना परलोका दी माफ हुआ लौ।

पेड़ और तेसरौ फौल

(लूका 6:43-45)

33 “अगर पेड़ा लै आच्छे बोलाई, ता तेसरै फला लै भी आच्छे बोलौ, या निक्कामौ बोलाई, ता तेसरै फला लै भी निक्कामौ बोलौ; कैलैकि पेड़ आपणै फला कौरी पराणिआ। 34 ओ सापा रे लौलडेऊ, तुमै बुरे हुइयो किणै कौरै आच्छे बुशे बोली सौकाई? कैलैकि जो मना दी भोरुओ औन्दौ, सेऊई मुआ दी आशा। 35 भौलो आदमी आपणै भौलै जीवा कु भौली बूशै ला सा, और बुरौ आदमी ला सा आपणै बुरै जीवा कु बुरी बूशै; जो तुमारै जीवा दी औलौ, सेऊ निकला मुआ कौरी बाइरे। 36 और हाऊं तुमु कु बोलाऊ कि आदमी जो-जो निक्कामौ बूशै बोलालै, फैसलै रे दिने सै हर एक तिउं बूशै रौ लेखौ दिआलै। 37 कैलैकि तू आपणी बूशा रे कारन निर्आरोप, और आपणी बूशै ही रे कारण दोशी ठहराइयाइ।”

सौरगा रे निशाणा री मांग

(मरकुस 8:11,12; लूका11:29-32)

38 एथ माथे कुछ शास्त्रिऊ और फरीसीऊरे यीशु लै बोलौ, “ओ गुरु, आमै ताऊं कौरी एक निशाणी देखणी चाई सा” 39 यीशुए तिउंलै जवाब द्यौ, “एजै

पोस्तै रै बुरे और गलत लोग निशाणी लोड़ाई, पर योना गुरु री निशाणी छाड़ीयो हाऊं केजी भी निशाणी नाई देखावदौ। 40 योना चीयै दिनें और राची झाऊं पाणी दी माछी रै पेटा दी रौआ, तिणी ई आदमी रौ छोहरू चीन दिनें ओ राची धौतरी रै भीतै रौआलौ। 41 निनवे देशा रै लोग भी एजै पोस्तै रै लोगु आइलै उठीयो परमेश्वरा रै फैसलै दिना दी तिऊं माथै इलजाम ला ई, कैलैकि तिउंरे योना गुरु रौ परचार शुणीयो आपणौ मन पापा कु बौदलौ आ और इदैं ता योना गुरु रौ भी गुरु आ। 42 दक्षिणा रै तौरफा री राणी परमेश्वरा रै फैसलै रै दिना दी एजै पोस्तै रै लोगु आइलै उठीयो तिऊं माथै इलजाम ला सा, कैलैकि इयै राणी सुलेमान गुरु रै ज्ञान शुणना लै धौतरी रै धुरै कु आशी थी, सुलेमान राजे काए। और देखौ, इदैं ता सुलेमान गुरु कु भी बौड़ौ गुरु आ।

आधै सुधारा कु मुश्किल

(लूका 11:24-26)

43 जैबै आदमी कु बुरी आत्मा निकाला सा तैबै सै बुरी आत्मा आपु कालै खाली जागहा दी आरामा वाली जागहा लोडा आ, और जैबै बुरी आत्मा कै किये भी जागहा नाई मिलदी। 44 तैबै सै बोला सा, 'हाऊं आबै आपणै सेजै घोरा दी डिआऊ ज़िदरू हाऊं निकली ऊ।' और जैबै सै बुरी आत्मा वापिस तिए आशा जीदरू सै निकाली थी तिये तिआंकै सै जागहा साफ-सुधरी और सज़ी औन्दी मिला आ। 45 और सै बुरी आत्मा डेइयो आपु आइलै औजौ सात बुरी आत्माएँ आणा सा, जो तियांकु भी बुरी हुआ ई। इणै कौरीयै सै सारी बुरी आत्माएँ तेस शरीरा दी डेइयो वास कौरा ई तेस आदमी री हालत जासदी सै बुरी आत्माएँ हुआई पैहलै कु भी जादी बुरी बाणा सा। एजै पोस्तै रै बुरे लोगु री हालत भी इणी ही हुआई।"

यीशु री आमा और भाई

(मरकुस 3:31-35; लूका 8:19-20)

46 जेबी यीशु भिडा आइलै बूशै लाइदैं लागौ औन्दी थौ, तैबै यीशु री मां और भाई बाइरै खौडै थै और सै तेस आइलै बूशै लाइणौ चहा थै। 47 तेस आइलै कुणि एकीयै बोलौ, "देख, तेरी मां और तेरौ भाई बाइरै खौडै आ, और ताऊं आइलै बूशै लाइणै चहा ई।" 48 यीशुए तिउंलै जवाब देयो, "कुण आ मेरी मां? और कुण आ मेरौ भाई?" 49 और आपणै चेलै री तौरफा आपणौ हाथा बड़ाईयो बोलौ, "देखौ, मेरी मां और मेरै भाई ऐ आ।" 50 कैलैकि जुण-कुण मेरै सौरगा रै बाबा री इच्छा माथै आँडा ई, सैई मेरै भाई, और मेरी बाइणी, और मेरी आमा सा।

बीजा बाइणै वालै रौ औनेणौ

(मरकुस 4:1-9 लूका 8:4-8)

13 सेजै दिनें यीशु घौरा कु निकलीयो झीला रै डीका कायै बोशौ। 2 और तेस काए इणी बौड़ी भीड़ कौडै हुई कि सेऊ किशती दी डैऔ और सारी भीड़ ढिका काए खौडी रौई। 3 और यीशुए तिउंलै अनेणै दी भौरी बूशै बोली : "एक बीजा बाइणै वालौ बीजा बाइदैं डैऔ। 4 बाइदैं बारै कुछ बीज बाटा दी फोकुओ और सेऊ बीज चुणौ चिडु-चिटकोरुए। 5 कुछ बीज पौडौ पथरियाली ज़बीना दी, जिरे तिउंलै भौरी माटौ नाई मिलौ और डूंगौ माटौ नाई मिलणै रै कारण सै फेटी ही ज़ोमी गौए। 6 पर जैबै ताती रुद लागी, तैबै सै आंगुरै पोरू शूकी गौए। 7 कुछ बीज पौडौ झाड़ुऊ मांझियै और सेऊ बौडिदैं-बौडिदैं दाबुओ पोरू झाड़ीऊ थाल। 8 पर कुछ बीज पौडौ आच्छी ज़बीना दी, और सेऊ भौरी फौलौ। कुछ फौलौ तीस पाथै, कुछ साठ पाथै और कुछ शौ पाथै। 9 जासरै कौन्थू सा सै शुणा लै।"

औनेणै रौ मतलब

(मरकुस 4:10-12 लूका 8:9,10)

10 चलेउए यीशु काए आशिओ तेसकु पुछौ, "तु लोगु कु अनेणै दी का बूशै ला ई?" 11 यीशुए तिउंलै जवाब दैओ, "तुमुकै ता सौरगा रै राजा रै भेता री समझ देई ऐन्दी आ, पर तिउंलै नाई। 12 कैलैकि जासकै आस्ती सा, तेसकै

औजौ मिला सा, और तेसकै भौरी हुआ लौ; पर जासकै कुछ नाई सा, तेसकु जो कुछ तेस काए आ, तेस भी पोरु निआ ई। 13 हाऊं तिऊंकु अनेणै दी एथलै बूशै बोलाऊ कि जो लोग देखा ताई रौंगै, पर सुंचदैं नाई, और शुणा ताई रौंगै पर समझदैं नाई। 14 तिउंरै बारै दी यशायाह गुरु री ऐजी भविष्यवाणी पूरी हौआ सा : 'तुमै कौथु कु ता शुणा लै, पर समझदैं नाई; और आखी कु ता देखालै, पर नाई दिशदौ।' 15 कैलै कि इऊं लोगु रै जीऊ मोटै हुई गौए, और सै कौथु कु ऊंचौ शुणाई सा और तिउंरे आपणी आखी मीची गौई आ; किये इणौ ना चाई हुआ कि सै आखी कु देखा, और कौथु कु शुणा और जीवा कु समझा, और फिरा लै, और हाऊं तिऊं ठीक कौराउ।' 16 पर भौली आ तुमारी आखी, कि सै देखा सा; और तुमारे कौथु कि सै शुणा ई। 17 कैलै कि हाऊं तुमुलै सौचौ बोलाऊ की भौरी गुरुए और धौर्मिए चाओ कि जो बूशै तुमै देखाई, देखा, पर नाई देखी; और जो बूशै तुमै शुणाई, शुणा, पर नाई शुणी।

बीजा बाइणै वालै रै औनेणै रै बारै दी समझाऊणौ

(मरकुस 4:13-20; लूका 8:11-15)

18 "एबै तुमे बाइणै वालै रै अनेणा रौ मतलब शुणौ : 19 जुण-कुण राज्य रौ वचन शुणीयो नाई समझदौ, तेसरै जीवा दी जो कुछ औइनौ औन्दी थौ, तेस सेऊ दुष्ट आशियो छुड़ाइयो निया पोरु। ऐऊ सेऊई बीज आ, जो बाटा रै धूरै दी औइनौ औन्दी थौ। 20 और जो बीज पथरियाली ज़मीना दी औइनौ औन्दी, ऐऊ सेऊ आ, जो वचन शुणीयो खरकचार खुशी कौरियै माना ई। 21 पर आपणै दी ज़ौडी नाई पाकुडणै रै कारण सेऊ थोडै ही दीना रौ सा, और जेबी वचना रै कारन दुख या सताव हुआ आ, ता खरकचार ठोकर खा सा। 22 जो बीज झाड़ीऊ मांझिए औइनौ थौ, ऐऊ सेऊ आ, जो वचन शुणा ई, पर दुनिया री चिन्ता और रुपाए पैसै रौ धोखौ वचन दाबा सा, और सेऊ फल नाई आणदौ। 23 जो आच्छी ज़बीना दी औइनौ औन्दी, सेऊ ऐऊ आ, जो वचन शुणीयो समझा सा, और फल आणा सा; कोई शौ गुणौ, कोई साठ गुणौ, और कोई तीस गुणौ।"

जांगली बीजा रौ औनेणौ

24 यीशुए तिउंलै एक औजौ अनेणौ दैओ : "सौरगा रौ राज तेस आदमी रै समान सा जुणिए आपणै डोखरा दी आच्छौ बीज बो। 25 पर जेभी लोग सुतै औन्दी थै ता तेसरौ दुष्मनै आशीयो गिऊं मांझिए जांगली बीज बाइयो डैओ। 26 जेबी मीण्डु निकलै और सील लागै, ता जांगली गुलै रै पौधे भी दिशै। 27 ऐथ माथै घौरा रै नुकुरै आशीयो तेसलै बोलौ, 'ओ मालीक, का ताइए आपणै डोखरै दी आच्छौ बीज नाई बौ थौ? तैबै जांगली गुलै रै पौधे तिऊं मांझिए किये कु आशै ई?' 28 तिणिए तेसलै बोलौ, 'ऐऊ कास दुष्मना रौ काम आ।' नुकुरै तेसलै बोलौ, 'का तेरी इच्छा सा, कि आमै डेइयो तेस कौठै कौरौ?' 29 तिणिए बोलौ, 'नाई, इणौ ना चाई हुआ कि जांगली गुलै रै पौधे कौठै कौरदैं बारै तुमै तिऊं आइलै गीऊं भी पोटा लै। 30 लौइणै झाऊं दुईया एकी दूजा आइलै बाइणै दैओ, और लौइणै रै बौगै झाऊं हाऊं लौइणै वालैऊ कै बोलुलौ की पैहलै जांगली गुलै रै पौधे कौठै कौरियो ज़ालना लै तिउंरै पुलटै बानौ, और गीऊं मेरै कोठे दी कौठे कौरौ।"

राई रै बीजा रौ औनेणौ

(मरकुस 4:30-32; लूका 13:18,19)

31 यीशुए तिउंलै एक औजौ अनेणौ दैओ : "सौरगा रौ राज राई रै एक गुलै रै जिणौ आ, जो एकी आदमीए नियौ आपणै डोखरा दी बाई गौ। 32 सेऊ सौबी बीजा रै गुलै कु छोटौ ता औआ सा पर जेबी सेऊ बाइसा सा तैबै सौबी पौधे कु बाइसौ औआ सा; और इणौ झोटौ बाणा सा कि सौरगा रै चडकु आशियो तेसरी डाली दी डेरौ पा ई।"

खमीरा (आमलै) रौ औनेणौ (लूका 13:20,21)

33 यीशुए एक औजौ अनेणौ तिके शुणाओ : "सौरगा रौ राज संजेडै जिणौ सा जो एकी छेउडीए निओ चीन पाथे पिठै मांझीए मुछौ आ और देखद-देखद सारौ पिठौ ओसरी गौ आ।"

औनेणै दी बुशै रौ काम (मरकुस 4:33,34)

34 ए सारी बूशै यीशुए अनेणै दी लोगु कु बोली, और बिना अनेणै देईयो यीशु तिके कुछ नाई बोला थौ, 35 कि जो वचन गुरु रै जरीयै बोलौ औन्दै थौ, सेऊ पूरौ हुआ : "हाऊं अनेणै बोलणा लै आपणौ मुं खौलुलौ : हाऊं तिके बूशै जो दुनिया रै बौणना कु छुपी रौई आ परगट कौरुलौ।"

जांगली बीजा रै औनेणै रै बारै दी

36 तैबै यीशु भीड़ा छाडियौ घौरा दी आशौ, और यीशु रै चलेउए तेस काए आशियौ बोलौ, "डोखरा रै जांगली बीजा रौ अनेणौ आमु कै समझाऊ।" 37 यीशुए तिके जवाब दैओ, "आच्छौ बीज बीजणै वालौ आदमी रौ छेहरु आ। 38 डोखरै इयै धौतरी आ, आच्छौ बीज राज्य री संतान, जांगली बीज दुष्टा री संतान आ। 39 जुणी दुश्मनै सेऊ बौ सेऊ शैतान सा; लौइणौ धौतरी रौ अन्त आ, लौइणै वालौ सौरगा रौ दूत आ। 40 जिणै जांगली गुलै कौठै कौराई और जाला ई तिणी ही इयै धौतरी रै अन्ता दी हुआ लौ। 41 आदमी रौ छेहरु आपणै सौरगा रै दूत भेजालौ, और सै तेसरै राज्य मांझीऊ कु सौबी ठोकरा रै कारण लै और बुरै काम कौरणै वालै कौठै कौरा सा, 42 और तिके आगी रै भाठै दी पाई, जिणै लेरनौ और दांद चाकणै हुआ आ। 43 सेजे बौगै धौर्म आपणै बाबा रै राजा दी सुरजा जिणौ चौमका लौ। जासरै कौथू आ सै शुणा लै।"

छुपै औन्दै खौजानै रौ औनेणौ

44 "सौरगा रौ राज डोखरै दी छुपै औन्दै रुपारे पैसै रै जिणौ आ, जो कास आदमी कै मिलौ और चोरी गौ, और भौरी खुश हुईयो डैओ और आपणौ सब कुछ बेची गौ और सेऊ डोखरौ खरीदी गौ।"

अनमोल मोती रौ औनेणौ

45 "तैबै सौरगा रौ राज एकी बणीए जिणौ सा जो आच्छे मोतीऊ लोडदै थौ लागौ औन्दै। 46 जेबी तेसकै एक भौरी मँहगौ मोती मिलौ ता तीणिए डेईयो आपणौ सारौ कुछ बेची गौ और सेऊ मोती खरीदी गौ।"

जाला रौ औनेणौ

47 "तैबै सौरगा रौ राज तेस बौडै जाला रै जिणौ आ जो समुद्रा दी पाओ, और सौभी रौंगा री माच्छी कौठै कौरियो आणी। 48 और जेबी जाल भौरुइ गौ, ता झीवरै सेउ जाल झीडीओ डीका माथे आणौ, और बोशियो आच्छी-आच्छी ता ओखरा दी कौठी की और निकामी-निकामी शोटी गोई पोरु। 49 दुनिया रै अन्ता दी इणौ ही हुआ लौ। सौरगा रौ दूत आशियौ दुष्ट लोग धौर्मिऊ लोगा कु औलग कौरा लौ, 50 और तिके आगी रै भाठै दी पा लै। जिणै लेरनौ और दांद चाकणौ औलौ। पुराणी और नौई शिक्षा रौ दौरजौ

पुराणी और नौई शिक्षा रौ महत्व

51 "का तुमुए ऐजी सारी बुशै समझी गोई?" तिके यीशु लै बोलौ, "ओ।" 52 यीशुए तिके बोलौ, "एथिलै सौबी शास्त्री जो स्वर्गा रै राज्य रौ चेलौ बौणौ औन्दै, तेस घोर वालै रै जिणौ आ जो आपणै भण्डारा कु नौई और पुराणी चीजे गाड़ा सा।"

नासरता दी यीशु री बेइज्जती (मरकुस 6:1-6; लूका 4:16-30)

53 जेबी यीशु ए सौबी अनेणै बोली गोए थे, ता तिवरु कु डेई गौ। 54 और आपणै इलाके दी आशियो तिके धार्मीक खुबली दी तिके इणौ उपदेश देन्दै लागौ कि सै हैरान हुइयो बोलदै लागै, "ऐसके ए ज्ञान और शक्ती वालै काम किवरा कु मिलै इ? 55 का ऐऊ बाडी रौ छेहरु नाई आ? और का ऐसरी मां रौ नाऊं मरियम और ऐसरै भाई रै नाऊं याकूब, यूसुफ, शमोन और यहूदा नाई आ? 56 और का ऐसरी सारी बौइणी आमु मांजी नाई रौईदी? तैबै ऐसके ऐऊ सौब किवरा कु मिलौ आ? 57 ऐजी ताए तिके तेसरै कारन ठोकर खाई, पर यीशुए तिके बोलौ, "गुरु रौ आपणै देश और आपणै घौरा छाडीयो और किरै बेइज्जती नाई औन्दै।" 58 और तीणिए तिके तिके अविश्वासा रै कारन भौरी का सामर्था रै काम नाई किरै।"

यूहन्ना बपतिसमा देणै वालै रौ खून (मरकुस 6:14-29; लूका 9:7-9)

14 सेजे बोगतै दी चौथे हिसै रौ राज हैरोदेसै यीशु रै बारै दी शुणौ, 2 और आपणै नुकुरा लै बोलौ, "ऐऊ यूहन्ना बपतिसमा देणै वालौ आ! सेऊ मौरै औन्दै मांझीऊ कु जिऊंदौ हुई गौ आ, एथिलै तेसकु सामर्था रै काम परगट हुआ। 3 कैलैकि हैरोदेसै आपणै भाई फिलिप्पुसा री छेउडी हैरोदियासा रै कारन, यूहन्ना पाकडीयो बानौ और जेला दी पाई गो थौ। 4 कैलैकि यूहन्ना तेसलै बोलौ औन्दै थौ कि ऐऊ छाडनौ ताउंलै ठीक नाई आ। 5 एथिलै सेऊ तेस झांगणौ चहा थौ, पर लोगु कु डोरा थौ कैलैकि सै तेस गुरु माना थै। 6 पर जेबी हैरोदेसा रौ जनम दिन आशौ, ता हैरोदियासा री छोटीए पार्टी दी नाचीयो हैरोदेस खुश कियो। 7 एथे माथे तीणिए कौसम खाइयो वचन दैओ, "जो कुछ तू मागा ली, हाऊं ताउंलै दिला ऊ।" 8 से आपणी मां रै उकसाणै माथे बोली, "यूहन्ना बपतिसमा देणैवालै रौ मूंड थाली दी इरे मुं काए आणौ! 9 राजौ दुखी हुआ, पर आपणी कौसमा का, और साथा दी बोशणै वालै रै कारण, हुकम देणौ कि पोरु दैओ। 10 और तीणिए जेला दी लोग भेजियो यूहन्ना रौ मूंड काटौ; 11 और तेसरौ मूंड थाली दी आणौ और छोटी कै देणौ, और तीए सेउ मूंड आपणी मां काए नियो। 12 तैबै यूहन्ना रै चले आशौ और तेसरौ मौडौ निइयो दाबी गौ, और डेईयो यीशु कै खबर देई।"

पाँज हजार पूरषा लै रोटी खिलाउणी (मरकुस 6:30-44; लूका 9:10-17; यूहन्ना 6:1-14)

13 जेबी यीशुए इणौ शुणौ, ता सेऊ किशती माथे चौडियो तिवरा कु केजी सुनसान जागा दी, ऐखुले दी डेई गौ। लोग इणौ शुणीयो इलाके-इलाके कु पैदल ई तेस पिछु हुई गोए। 14 तीणिए निकलियो एक बौडी भीड़ देखी और तिके माथे दया की, तिके बिमार लोगु ठीक की। 15 जेबी ब्याल हुई ता यीशु रै चलेउए तेस काए आशियो बोलौ, "ऐजी जागा सुनसान आ और बेर औन्दै लागी गोई; इऊं लोगु नीजुका रै बस्ती और गांव दी छाडौ ताकी इयै लोग आपकाले रौइणै रौ और रोटी (खाणै) रौ इन्तजाम कौरा। 16 पर यीशुए तिके बोलौ, "तिकेरौ डेऊणौ जरुरी नाई! तुमै ही इऊं लै खाणा लै दैओ।" 17 तिके यीशु लै बोलौ, "इयै आमुकै पाँज रोटी और दुई माछी छाडीओ कुछा ना आसतौ।" 18 यीशुए बोलौ, "तिके इदँ मू काए आणौ।" 19 तैबै यीशुए लोगु लै घासा माथे बोशणै लै बोलौ, और तैबै यीशुए सै पाँज रोटी और दुई माछी आपणै हाथा दी की और सौरगा बिलै देखीओ परमेश्वर रौ धन्यवाद देईयो आशीष मांगी और रोटी चेलैऊ कै देई और चेलै लागै लोगु कै बांटदै। 20 तैबै सारै लोगुए पेटा भौरीओ रोटी खाई। तेती माथे भी चलेउए बौचै औन्दै रोटी और माछी रै बारह छाबडै भौरै। 21 और खाणा वालै छेउडीऊ और लोलडेऊ छाडीयो, पाँज हजार ता मोद थै।"

यीशु सै पाणी माथी आण्डणौ (मरकुस 6:45-52; यूहन्ना 6:15-21)

22 तैबे यीशुए खरकचार आपणै चेलै किशती दी डेरुणा लै मजबूर किये कि सै तेसकु पैहलै पारै डेआ लै, जेबी झाऊं सेऊ लोगु छाड़ा लौ। 23 यीशु लोगु छाड़ीयो, प्राथना कौरना लै औलग पाहाड़ा दी डेई गौ; और ब्याली यीशु तिए ऐखुली थौ। 24 सेजी बौग्तै किशती झीला रै बीचा दी बागुरा कौरी हीलदै-दुलदै थी लागी औन्दी, कैलैकि बागुर सामनै ओउलै थी लागी औन्दी। 25 और यीशु राचकै चार बाजै झीला माथे हाण्डदी बारै तिऊं कारे आशौ। 26 चेलै यीशु झीला दी पाणी माथे हाण्डदी बारै रे देखीयो घबराई गौए। और बोलदै लागै, "एऊ भूत आ!" और डौरा रै मारै सै हाकै मारदै लागै। 27 तैबे यीशुए खरकचार तिऊं आइलै बूशै लाई और बोलौ, "हिम्मत कौरौ! हाऊं आ, नाई डौरौ!" 28 पतरसै यीशु लै जवाब दैओ, "ओ प्रभु, अगर तू आ, ता मू आपु कारे पाणी माथे हाण्डयो आशणा सौ हुकुम दैओ!" 29 यीशुए बोलौ, "आश!" तैबे पतरस किशती कु उतरीयो यीशु कारे डेरुणा लै पाणी माथे हाण्डदै लागौ। 30 पर बागुर देखीयो डौरी गौ, और जेबी डूबदै लागौ ता हाकै मारीयै बोलौ, "ओ प्रभु, मू बचाऊ!" 31 यीशुए खरकचार हाथ बड़ाईयो सेऊ पाकडी गौ और तेसलै बोलौ, "ओ अविश्वासी, ताइरे कैलै शक कियो?" 32 जेबी सै किशती दी डेई गौए, ता बागुर रुकी गौ। 33 एथ माथे तिउं जे किशती दी थै, यीशु लै डाला कौरियै बोलौ, "सौचै ई, तू परमेश्वरा सौ छोहरु आ।"

गन्नेसरता गाँवा दी रोगी ठीक कौरणै (मरकुस 6:53-56)

34 तैत बासियै सै गन्नेसरता गाँवा दी पौउचै। 35 तिटलै लोगुए यीशु पराणी गौ और तिटलै लोगुए सारै परदेशा दी खबर पउंचाई और सारै बिमार लोगु यीशु कारे आणै, 36 और सै यीशु कु औरज कौरदै लागै कि सै तिऊं आपणै जुडकै ई छुइंगै दै; और जेती लोगुए भी यीशु छुंओ, सै ठीक हुई गौए।

रीती रिवाजा सौ पालन कौरना सौ सवाल (मरकुस 7:1-13)

15 तैबे फरीसी लोग और कुछ यहूदी शास्त्री लोग, जो यरुशलैम शहरा कु आशै थै सै यीशु कारे आशीयो पूछदै लागै, 2 "तैरे चेलै बजुरगा रै नियमा माथे कैलै ना चालदै, सै ता बिणा हाथा धोइयो ई रोटी खा ई?" 3 यीशुए तिउंलै जवाब दैओ, "तुमै भी आपणै रीति-रिवाजा रै कारण कैलै परमेश्वरा सौ हुकुम टाला ई? 4 कैलैकि परमेश्वरै बोलौ आ, "आपणै मां-बाबा री इज्जत कौरियो", और 'जो आपणै मां-बाबा लै बुरो बोला लौ, सेऊ जरूर मौरा सा।' 5 पर तुमै ऐस हुकुमा सौ बोल्कुल उल्टौ कौरा ई। अगर केजै आदमीए आपणै मां-बाबा री मजद कौरनी चाई, पर सेऊ आपणै मां-बाबा लै बोला लौ इणौ कि, 'जो कुछ मुइयै तुमुकै दैणौ थौ सेऊ देई गौ मुइयै सारौ परमेश्वरा कै,' 6 ता सेऊ आपणै बाबा री मजद नाई कौरदौ, इणै कौरियै तुमै आपणै चाणै औन्दै रीति-रिवाजा कौरिये परमेश्वरा सौ हुकुम चोड़ा ई। 7 ओ कपटी लोगु, यशायाह गुरुए तुमरै बारै दी आशणै वालै बौगता री बूशै ठीक ई लिखी औन्दी आ, 8 'इयै लोग मेरी इज्जत मुंआ कोरिये ता कौरा ई पर जीवा कोरिये ई मूक भौरी दूर। 9 और इयै मेरी तारिफ फजूल कौरा ई। और आदमी रै चाणै औन्दै नियमा माथे चाला और शिखावा ई।'

अशुद्ध कौरणै वाली बुशै (मरकुस 7:14-23)

10 यीशुए तौं सारै लोग आपू कारे औटाइयो बोलौ, "तुमै सारै मेरी बूशै शुणियो समझौ। 11 केजौ भी खाणौ जो आदमी खा सा, सेऊ खाणौ आदमी सौ मन गान्दौ नाई कौरदौ, पर जो गांटी बुशै आदमी रै जीवा कु बाइरे आशा सा, सेऊ आदमी सौ मन गान्दौ चाणा आ।" 12 तैबे चलेउए आशीयो यीशु कु बोलौ, "का तू जाणाई कि फरीसिऊए ऐरु वचन शुणियो ठोकर खाई? 13 यीशुए तिउंलै जवाब दैओ, "हर पेड़ जो मैरै सौरगा रै बाबा रै नाई लाओ औन्दौ, तेस सेऊ पोरु गाड़ा। 14 तिऊं डेरुणै दैओ; सै शेडै सा और शेडै कै

बाट देखाऊणा वालै आ अगर शेडौ शेडै लै बाट दिखाला लौ ता सै दुईयै खाली दी पोड़ा ई।" 15 इणौ शुणियो पतरसै यीशु लै बोलौ, "ऐजौ अनेणौ आमू लै समझाऊ।" 16 यीशुए बोलौ, "का तुमै इबी झाऊं अनजाण ई? 17 का तुमै नाई जाणदै जो चीज तुमै खाई सै पेटा भीतै डेया सा, और खाइयो निकला ई बाइरे? 18 पर जो कुछ मुंआ कु बुरी बुशै निकला ई, सै बूशै आदमी गान्दौ चाणा। 19 कैलैकि बुरै विचार, हत्या, छोटुडी-छेउडी या मर्दू आइलै गान्दै काम, छोटुडी-छेउडी आइलै गान्दै काम, चोरी, झूठी गवाई और पुराज मौना कु निकला ई। 20 ऐरु ई आ जो आदमी गान्दौ चाणा, पर बिणा हाथ धोइयो रोटी खाणौ आदमी गान्दौ नाई चाणदौ।"

कनानी जाती री छेवडी सौ विश्वास (मरकुस 7:24-30)

21 यीशु गलीला कु निकलीयो, सूर और सैदा परदेशा दी डैओ। 22 तेस परदेशा री एक छेउडी आशी, और हाकै मारीयो बोलदै लागी, "ओ प्रभु! दाऊदा री सन्तान, मूं माथे दया कर! बुरी आत्मे मेरी माई भौरी सताऊणी लाई ऐन्दी।" 23 पर यीशुए तियांलै कुछ जवाब नाई दैओ। तैबे यीशु रै चलेउए यीशु कु औरज की कि, "इयां डेरुणै देऊ, कैलैकि ऐ आमू पीछु हाकै मारीयो आ आशदै लागी ऐन्दी।" 24 यीशुए जवाब दैओ, "इसाएला रै घोरा री औची औन्दी भेरी छाड़ियो हाऊं कासी ओरी कारे नाई भेजौ।" 25 पर सै आशी, "और यीशु कै ढाला कौरियो बोलदी लागी*, "ओ प्रभु मेरी मजद कर।" 26 यीशुए जवाब दैओ, "लोलडेउ री रोटी कुकर लै दैणौ आच्छी नाई।" 27 तैबे तिरै छेउडीए बोलौ, "सौचौ आ प्रभु, पर मालिका कु रोटी खाइयो जो चुर-चार धौनी छुटा आ तिऊं गासडू ता कुकर खा ई। 28 यीशुए तिरै छेउडी रै इणै जवाब शुणियो तियांलै बोलौ, "ओ बौइण, तैरौ विश्वास भौरी बौडौ आ। जिणौ तू चहा ई, तिणौ ही ताउंलै हुआ।" 29

कई रोगिऊ ठीक कौरणै

29 तैबे यीशु तिरु कु डेइयो गलीला री झीला कारे आशौ, और पाहाड़ा माथे चौडियो बोशी गौ। 30 तैबे भौरी भीड़ यीशु कारे आशी। सै लोग आपु आइलै लौंगडे, शेडै, लाटै, टुण्डै, और भौरी जोणै यीशु कारे आणै, और यीशु रै बाणणै कारे पाए, और यीशुए सै ठीक किये। 31 जेबी लोगुए देखे कि गूंगे बोलदै लागै, और टुण्डै ठीक हुई गौए, और लौंगडे आण्डदै लागै, और शेडै देखाई सा ता सारै लोग हैरान हुईयो इस्राएला रै परमेश्वरा री बड़ाई कौरदै लागै।

चार हजार लोगु लै रोटी खिलाउणी (मरकुस 8:1-10)

32 यीशुए आपणै चेलै औटाए और तिउंलै बोलौ, "मूकै इऊं लोगू माथे तरस आशदै लागौ औन्दौ, कैलैकि इयै चिया दिने कु मू आइलै आ और इऊंकै खाणा लै कुछ भी नाई आ। इऊं हाऊं घोरै भूखे भेजू लै ता इऊंकै डेरुणै-डेरुणै बाटा दी रिणौ लागी सा। 33 चलेउए यीशु कु बोलौ, "इयै सुनशान जागहा दी रोटी सौ इन्तजाम किणै कोरिये हुआ सा?" 34 यीशुए तिऊंकु पूछौ, "तुमुकै केती रोटी ई?" तिऊंयै बोलौ, "सात, और थोडी जेई माछी। 35 तैबे यीशुए तिऊं लोगू लै धौनी बोशणा लै बोलौ। 36 और तैबे यीशुए सै सात रोटी और माछी आपणै हाथा दी पाकडी और परमेश्वरा सौ धन्यवाद दैइयो रोटी चोडी, और आपणै चलैऊ के दैदै थाकौ लागी, और चेलै थाकै लोगू के दैदै लागी। 37 सारै लोगुए पेटा भौरियो खाओ। और तेती माथे भी तिउंकै सात बौडै छाबडै रोटी रै बौचै। 38 खाणा वाली छेउडी और लोलडेउस छाड़ियो चार हजार ता मर्द थै। 39 तैबे यीशुए सै लोग आपणै-आपणै घोरै भेजै और आपू किशती दी बोशौ, और मगदन रै देशा दी आशौ।

सौरगा रै निशाणा री मांग (मरकुस 8:11-13 लूका 12:54-56)

16 फरीसिऊ और सदूकिये यीशुकारे आशीयो तेस परखुणा लै बोलौ, "आमूकै सौरगा री केजी इणी निशाणी देखाळ कि यीशु

परमेश्वरा कु आ आशौ औन्दौ। 2 यीशुए तिउंलै जवाब दैऔ, “ब्याली तुमै बोला ई कि, “सौरग आच्छौ रौआ, कैलैकि सौरग रातौ आ”, 3 और दोउती उठियौ तुमै बोला ई, ‘आज पाणी लागा, कैलैकि सौरग रातौ और धुंधलौ आ। तुमै सौरग रै हालत देखियौ तेसरौ भेद बोली सौका ई, पर बौगता री निशाणी रौ भेद कैलै नाई बोली सौकदै? 4 एजे जुगा रै बुरै और गान्दै काम कौरणा वालै लोग निशाण लोडा ई, पर योना रै निशाणी छाड़ियौ तिउंलै औजौ कोई निशाणी नाई दैन्दै।”

फरीसिउ और सदूकिउ री शिक्षा रौ संजेडौ

(मरकुस 8:14-21)

5 चेलै झीला कु पार पउंचे, “पर सै रोटी निणै बिसरुई गोरे थै। 6 यीशुए तिउंलै बोलौ, “शुणौ, फरीसीऊ और सदूकिऊ संजेडै कु बौचियौ रोए ऊ। 7 यीशु रै चेलै आपू मांझियै चोपड़िदै लागै, “आमुए रोटी नाई आणी, तैबै बोलौ यीशुए इणौ। 8 तिउंरै विचार जाणियो यीशुए तिउंलै बोलौ, “ओ दुनिया रै लोगुओ, तुमै आपू मांझिये कैलै ई लागै औन्दै चोपड़िदै कि आमू कै रोटी नाई? 9 का तुमै इबी झाऊं नाई समझुदै? का तुमुकै सै पांज हजारा री पांज रोटी आद नाई, और ना इणौ कि तुमुए केती छाबडी चुंगी थी? 10 और ना सै चार हजारा री सात रोटी, और ना इणौ कि तुमुए केती छाबडै भौरै थै? 11 तुमै कैलै नाई समझुदै कि मुझ्यै तुमुकै रोटी रै बारै दी नाई बोलौ, पर हाऊं बोलु थौ तुमुलै इणौ कि तुमै फरीसीऊ और सदूकिऊ रै बुरै विचार और शिक्षा कु बौचियौ रोएऊ। 12 तैबै यीशु रै चेलैऊ कै समझी दी आशौ कि यीशुए रोटी रै संजेडै कु नाई, पर फरीसीऊ और सदूकिऊ री शिक्षा कु बौचियौ रोणा लै बोलौ थौ।

पतरसा रौ प्रभु यीशु 'मसीह' मानणौ

(मरकुस 8:27-30; लूका9:18-21)

13 तैबै यीशु कैसरिया फिलिप्पी रै परदेशा दी आशौ, और आपणै चेलैऊ कु पुछुदै लागौ, “लोग आदमी रै छोहरु लै का बोलाई?” 14 तिउंरै बोलौ, “कुछ ता युहन्ना बसिस्मा देणैवालौ बोलाई, और कुछ बोला एलिय्याह, और बोला यिमयाह या कोई दुजौ गुरु समझा ई, जुण मौरियो जीउंदै हुए ई। 15 यीशुए तिउंलै बोलौ, “पर तुमै मुलै का बोलाई?” 16 शमौन पतरस जवाब दैऔ, “तुमै जीउंदै परमेश्वरा रौ छोहरु मसीहा ई।” 17 यीशुए तिउंलै जवाब दैऔ, “ओ शमौन, योना रै छोहरु, तू भौलौ आ; कैलै कि मासै और लौऊरै नाई, पर मैरौ बाबा जो सौरगा दी आ, एजी बूश ताऊं माथे परगट की आ। 18 और हाऊं भी ताऊं कु बोलाऊ कि तू पतरस आ, और हाऊं एस ढोला माथे आपणी कलीसिया चाणाउ, और धौतरी रै द्वार तेस माथे प्रबल नाई हुआ लै। 19 हाऊं ताउंलै सौरगा रै राजा री कुंजी दिआउ: और जो कुछ तू धौतरी माथे बानालौ, सेऊ सौरगा दी बानिया लौ; और जो कुछ तू धौतरी माथे खोलालौ, सेऊ सौरगा दी खुलालौ। 20 तैबै यीशुए आपणै चेलै वितलाए कि कासी कै नाई बोलियौ कि हाऊं मसीह ऊ।

आपणै मौरणै रै बारै दी यीशु रै बोलणौ

(मरकुस 8:31-33; लूका 9:22)

21 सेजै बौगता कु यीशु आपणै चेलै लै बोलदै लागौ, “जुरुरी आ कि हाऊं यरुशेमा लै डेऊ, और पुरनिऊ, और परधान याजकु, और शास्त्रिऊ रै हाथा कु भौरी दुख उठाऊ; और मूं पौरु जांगाई; और चीजे दिनै जीउंदै हुआ ऊ। 22 तैबै पतरस यीशु एकी भिलै नियौ और तेसलै डांटियौ बोलौ, “ओ प्रभु, परमेश्वरै केबी ना चाई इणौ कियो ताऊं आइलै इणौ केबी ना औन्दौ। 23 तैबै यीशुए पीछाऊं मुडियो पतरसा लै बोलौ, “ओ शैतान, मूकारे कु दूर डेऊ! तू मुलै ठोकरा रौ कारण आ; कैलैकि तू परमेश्वरा री बुशे माथे नाई, पर आदमी री बुशे माथे जीऊ ला ई।

यीशु पिछु आण्डणै रौ मतलब

(मरकुस 8:34—9:1; लूका 9:23-27)

24 तैबै यीशुए आपणै चेलैऊ लै बोलौ, “अगर कुण मूं पिछु हाण्डणौ चाहा, ता आपणी इच्छा पोरु छाड़ा लौ और आपणौ क्रूस चुगीयो, मुं पिछु हाण्डा लौ। 25 कैलैकि जुण-कुण आपणौ प्राण दैणै नाई चाह लौ तेसलै परमेश्वरा आइलै सौदा री जीन्दगी नाई मिलदी, पर जो मुकालै और मैरै खुशी रौ सन्देश शुणाऊणे री वजाह कु आपणै प्राण दैणा लै तयार औलौ तेसलै परमेश्वरा आइलै सौदा री जिन्दगी मिला आ। 26 अगर पुरी दुनिया री खुशी पाई बोला ई, पर एथरौ का फाइदौ आ आपणौ प्राण खोआ लौ पोरु? या आदमी आपणै प्राण रै बौदलै का दिआ लौ? 27 आदमी रौ छोहरु आपणै पवित्र स्वर्गदूत आइलै आपणै बाबा री शाना देखाईओ आशा लौ, और सेजै बौतै ‘सेऊ हर एकी लै तेसरै कामा रै अनुसार मिनतानौ दिया लौ।’ 28 हाऊं तुमुलै सौचौ बोलाऊ कि इदै इऊं खौदैं लोगू मांझिये कु कुछ आदमी जरुर आपणी जिन्दगी दी देखा लै कि परमेश्वर शक्ति भौलौ राज कौरना लै आशा आ।

यीशु रौ रूप बौदलियौ

(मरकुस 9:2-13; लूका9:28-36)

17 इऊं बुशैऊ कु छौ दिना बासीयै यीशुए पतरस और याकूब और तेसरौ भाई यूहन्ना आपु आइलै प्राथना कौरदै नियै, और सै एकान्ता दी केजी ऊंकी धारा दी डेवै। 2 जैबै यीशु प्राथना कौरदै लागौ, तैबै प्राथना कौरदै-कौरदै यीशु रै मुंआ रौ रूप बौदलुई गौ, और यीशु रै जुड़कै उजलै हुईयो चमकुंदै लागै। 3 तिरे तिउंकै पुराणै जमानै रै दुई गुरु दिशै ज़ासरौ नाऊं मुसा और एलिय्याह थौ, सै थै यीशु आइलै बुशै लाईदै लागै औन्दै। 4 एथ माथे पतरसै यीशु लै बोलौ, “ओ प्रभु, आमारौ इदै रौइणौ भौलौ आ। अगर तेरी इच्छा हुआ ता हाऊं इदै चीन बेदी चाणाउ; एक ताऊं कालै, एक मुसा गुरु कालै, और एक एलिय्याह गुरु कालै।” 5 जेबी सेऊ बोलदै थौ लागौ औन्दौ कि तेबी ई सौरगा दी बादल कौदै हुए और सै बादला दी घेरुई गोरे, और तैबै बादला मांझिये कु एक हाक शुणुई: “एऊ मैरौ प्यारौ छोहरु आ, ऐसकु हाऊं भौरी खुश उ: एसरी शुणौ 6 तैबै चेलै इणौ शुणियो धौनी पौडी गोरे, और सै भौरी डौरी गोरे। 7 यीशुए चेलै कारे डेइयो सै छुंयै, और तिउंलै बोलौ, “उज्जीयो, डौरौ नाई। 8 तैबै तिउंरै आपणी आखी खोली और तिउंरै तिरे यीशु एखुली देखौ। 9 जेबी सै टिरा कु डेउंदै थै लागै औन्दै ता यीशुए तिउंलै एजौ हुकम दैऔ, “जेबी झाऊं आदमी रौ छोहरु मौरै औन्दै माजिऊ कु जीउंदौ नाई हुआ लौ, तेबी झाऊं जो कुछ तुमुए देखौ आ कासी कै ना बोलियो। 10 एथ माथे यीशु रै चेलैउरे तेसकु पुछौ, “तैबै शास्त्री लोग कैलै बोलाई कि एलिय्याह सौबी कु पेंहलै आशा?” 11 यीशुए तिउंलै जवाब दैऔ, “एलिय्याह जरुर आशा, और सौब कुछ सुधारा लौ। 12 पर हाऊं तुमु लै बोलाऊ कि एलिय्याह आशी गौ आ, और लोगुए सेऊ नाई पराणौ; पर जिणौ चाओ तिणी ई तेस आइलै कियो। एजी रीति कु आदमी रौ छोहरु भी तिउंरै हाथा कौरी दुख उठाउवाई। 13 तैबै यीशु रै चेलैउरे सौमझौ कि यीशु आमुकै यूहन्ना बसिस्मा दैणैवालै रै बारै दी बोलौ आ।

बुरी आत्मा वालौ छोहरु चाणौ कौरणौ

(मरकुस9:14-29; लूका9:37-43)

14 जेबी सै भीड़ा कारे पौउंचे, ता एक आदमी यीशु कारे आशौ, और घुण्डे माथे टिकियो बोलदै लागौ, 15 “ओ प्रभु, मैरै छोहरु माथे दया कौर! कैलैकि तेसरै मुंआं दी आशा ई शेफे, और सेऊ भौरी दुख उठावा; और केबी सेऊ आगी दी और केबी सेऊ पाणी दी लोटा सा। 16 मुझ्यै तैरै चेलैऊ कु औरज की थी कि मैरौ माऊं ठीक कौरौ, पर सै मैरौ माऊं ठीक नाई कौरौ बोलै। 17 यीशुए जवाब दैऔ, “का कौरुलै, तुमुकै मूं माथे इबी झाऊं विश्वास नाई आसतौ? तुमारौ जीऊ ता भौरी काठौ आ, हाऊं केबी झाऊं रौआऊ तुमु आइलै और केबी झाऊं सहन कौराऊ? आपणौ छोहरु इदै आण। 18 तैबै यीशुए सै बुरी आत्मा डांटी, और सै बुरी आत्मा तेसकु निकली गोई; और

सेऊ छोहरु तेबी ठीक हुई गौ। 19 तैबे चलेउए एखुले दी यीशु कारे आशीयों बोलौ, "आमुकें सै बुरी आत्मा कैलै ना गाडुई?" 20 यीशुए तितुलै बोलौ, "आपणै विश्वास रै कमी रै कारण, कैलैकि हाऊं तुमु लै सौचौ बोलाऊ, अगर तुमारौ विश्वास राई रै गुलै रै बराबर भी हुआ, ता इयै पहाड़ी कु बोली सौका, 'इदरु डेइयौ इदै डेउ, ता सेऊ डिया लौ; और कोई भी बुश तुमुलै कठीण नाई हुआ ली। 21 पर इरे जाती बिण प्राथना और उपवासा कोरी नाई निकुलदी।)

आपणै मोरणे रे बारे दी यीशु रै दूजी बारे बोलणौ

(मरकुस 9:30-32; लूका 9:43-45)

22 जेबी यीशु और तेसरै चेलै गलीला दी थै, ता यीशुए तितुं ले बोलौ, "आदमी रौ छोहरु आदमीऊ रै हाथा दी पकड़वाईया सा; 23 सै तेस झांगाई, और सेऊ चिजे दिना जीउंदौ हुआ। एथ माथै सै भौरी उदास हुरे।

परमेश्वरा रै घौरा रौ मामलौ

24 जेबी सै कफरनहूमा दी पउचै, ता परमेश्वरा रै घौरा रै मामलौ निणै वालेउए पतरसा कारे आशीयों तेसकु पुछौ, "का तुमारौ गुरु परमेश्वरा रै घौरा रौ मामलौ नाई दैन्दौ?" 25 पतरसै बोलौ, "ओ, दिआ सा।" जेबी सै घौरा दी आशै, ता यीशुए पतरसा कु पुछणै कु पैहलै ही तेसलै बोलौ, "ओ शमोन, तू का सूचाई? धौतरी रौ राजौ मामलौ कास कु निआ ई? आपणै छोहरु कु या परायै कु?" 26 पतरसै यीशु लै बोलौ, "बिगाने कु।" यीशुए पतरसा लै बोलौ ता छोहरु बौचै गौरे। 27 तैबे भी एथीलै कि आमै तितुंले ठोकर ना लाइलै, तू झीला रै ढिका काई डेइयौ जाल पा, और जो माछी पैहलै निकला ली, तिरें निऊ; तियांरौ मुं खोलदी बारे ताउकै एक डौलर मिलालौ, तेस निर्ईओ मैरै और आपणै बौदलै तितुंके दैयौ।

सौरगा रै राजा दी बौडौ कुण आ

(मरकुस 9:33-37; लूका 9:46-48)

18 सेजे बौगै यीशु रै चेलै तेस कारे आशीयों यीशु कु पुछदै लागे, "सौरगा रै राजा दी सौबी कु बौडौ कुण आ?" 2 एथ माथै यीशुए एक माऊं आपु कारे औटाइयौ चेलैऊ माझिरे खौडौ किओ, 3 और तितुंले बोलौ, "हाऊं तुमुलै सौचौ बोलाऊ कि जेबी झाऊं तुमै नाई फिरालै और एस माऊं भाशिरे नाई बौणालै, तेबी झाऊं तुमै सौरगा रै राजा दी नाई डेइ बोलदें। 4 जुण-कुण आपुलै एस माऊं भाशिरे छोटौ कौरालौ, सेउ सौरगा रै राजा दी बौडौ हुआ सा। 5 और जुण-कुण मैरै नाऊं कौरी एक इणै माऊं अपणावा ई सै मुं अपणावा ई।

पापा कौरनै री परेशानी (इम्तीहान)

(मरकुस 9:42-48; लूका 17:1,2)

6 "जुण-कुण इऊं छोटेऊ माझिऊ कु जो मुं माथै विश्वास कौरा सा और एक पा लौ जौबरीयै पापा दी, ता तेसले आच्छौ इणौ हुआ थौ कि तेस आदमी रै गौलै दी घोरटा रौ जौन्दर बानियौ समुन्दरा दी पा। 7 पापा रै कारण दुनिया दी फिटकार! पापा री बाटा दी डेउणौ ता जरुरी आ; पर फिटकार! तेस आदमी लै जासरै जरुरीयै तुमै पापा री बाटा दी डेवै। 8 "तू आपनै हाथ और बांगणै कौरी इणै काम कौरा लौ, जो ताऊं पापा री बाटा दी नीईयौ विश्वास दी डगमगावा लै, ता तू तितुं काटियौ पोरु पा; दुई हाथ और दुई बांगणै कोरिरे तू नरका दी डिया लौ, जिरे आग केबी नाई इशदी, ताउंले एथकु आच्छौ आ कि टुंडौ या लौंगडौ रोइयौ तू सौरगा दी डिया ई। 9 अगर तेरी आख इणौ देखा कि तू विश्वास दी डगमगाइयौ पापा री बाटा दी डेवा लौ, ता तिरें आख तू पोरु गाडै। ताउंले शेडौ रौइणौ आच्छौ आ। कम से कम तू सौरगा दी ता डिया लौ। नाई ता दुइया आखी कोरिरे तू नरका दी डिया ई, जिरे आग आ जो केबी नाई इशदी।

औची औन्दी भेरी रौ औनेणौ

(लूका 15:3-7)

10 ताउंले शेडौ रौइणौ आच्छौ आ। कम से कम तू सौरगा दी ता डिया लौ। नाई ता दुइया आखी कोरिरे तू नरका दी डिया ई, जिरे आग आ जो केबी नाई इशदी। 11 "देखौ, तुमै इऊं छोटेऊ माझिया कु कासी भी कम नाई ज़ाणौ; कैलैकि हाऊं तुमु लै सौचौ बोलाऊ कि सौरगा दी तितुंले दूत मैरै सौरगा रै बाबा रौ मूंह सोदा देखाई। [कैलैकि आदमी रौ छोहरु औचै औन्दै लै बचाउदै आशौ औन्दै आ।] 12 "तुमै का सुंचा ई? अगर कास आदमी री शौ भेरी आ, और तितुं माझिया कु एक औचा ली पोरु, तैबे का सेऊ तितुं नडीनवे भेरी तिरै छाडियौ, और टिरा (पहाड़ी) दी डेइयौ, तिरै औची ऐन्दी भेर तेबी झाऊं ना लोडा जेबी झाऊं सै ओरु ना मिली? 13 और अगर सै औची ऐन्दी भेर ओरु मिला आ, ता हाऊं तुमु लै सौचौ बोलाऊ कि तैबे सेऊ ऐती खुश तितुं नडीनवे भेरी कालै नाई औन्दै जेती तिरै भेरी लै हुआ। 14 इणी ई तुमारै सौरगा रै बाबा लै जो सौरगा दी आ इणी इच्छा नाई आ कि इऊं छोटेऊ माझिऊ कु एक भी खातम हुआ।

अपराधिउ आइलै बर्ताव

15 "अगर तैरौ भाई ताऊं आइलै गलत कौरा, ता तू डेऊ और एखुले दी तेस आइलै बुशै लाइयौ तेस समझाऊ; अगर सेऊ तेरी शुणा लौ ता ताउंले आपनौ भाई मिली गौ। 16 अगर सेऊ नाई शुणा लौ, ता एक और दुई जौणै तेस कारे औजौ नीऊ, कि 'हर एक बुश दुई या चीन गवाई दैणै वाले रै मुंआ कु निकला।' 17 अगर सेऊ तितुं री भी नाई शुणा लौ, ता खुंबली दी बोल, पर अगर सेऊ खुंबली री भी नाई शुणदौ ता तू तेस दुजी जाती और महसूल निणै वालेऊ जिणौ ज़ाण।

रोकणौ और मोको देणौ

18 "हाऊं तुमु लै सौचौ बोलाऊ कि, जो कुछ तुमै धौतरी माथै बानालै, सेऊ सौरगा दी बानिया और जो कुछ तुमै धौतरी दी खोलालै, सेऊ सौरगा दी खुला। 19 तैबे हाऊं तुमु लै बोलाऊ कि, अगर तुमु माझिया कु दुई जौणै धौतरी माथै केजी बूश एक जिऊ हुइयौ मांगा लै, ता सेऊ मैरै बाबा री तौरफा कु जो सौरगा दी आ, तितुंले हुआ लौ। 20 कैलैकि जिंयै दुई या चीन जौणै मैरै नावां कौरी कौठे हुआइ, हाऊं तिरै तितुं माझियै हुआ ऊ।"

नीधीणै सेवका रौ औनेणौ

21 तैबे पतरसै यीशु कारे आशीयों तेसलै बोलौ, "ओ प्रभु, अगर मैरै भाई मुं आइलै गलत कौरा लौ ता, हाऊं तेस केती बारे माफ कौरु? का सात बारै झाऊं?" 22 यीशुए तेसलै बोलौ, "हाऊं ताउंले इणौ नाई बोलदौ कि तू तेस सात बारै झाऊं माफ कर पर सत्तर बारै तेस माफ कर। 23 "एथीलै सौरगा रौ राज तेस राजा जिणौ आ, जुणीए आपणै नुकरा रौ हिसाब-किताब निणौ चाओ। 24 जेबी सेऊ हिसाब-किताब निंदै लागौ, ता एक आदमी तेस कारे आणौ ज़ासकै दौस हज़ार तोडे रौ कौर्ज थौ। 25 जेबै कि कौर्ज वापीस दैणा लै तेस कारे कुछ नाई थौ, ता तिणीए आपणै मालिका लै बोलौ, "एस और एसरी छेउडी और एसरै लोलडै और जो कुछ एसरौ आ तेस सारौ बेचौ, और कौर्ज ओरु आणौ।" 26 एथ माथै तिणी नुकरै धौनी झुकियौ तेसलै ढाल की और बोलौ, "ओ मालिका चुटुक रौऊ, हाऊं सारौ कौर्ज भौराऊ।" 27 तैबे तेस नुकरा रै मालिका री तेस नुकरा माथै दया आशी और सेऊ छाडी गौ, और तेसरौ कौर्ज भी माफ की गौ। 28 "पर जेबी सेऊ नुकर बाइरै निकलौ, ता तेसरै गौश्टण माझिऊ कु एक नुकर तेसकै मिलौ ज़ासकै शौ दीनारा रौ कौर्ज थौ; तिणीए सेऊ पाकडियौ तेसरौ गौलौ घोटौ और बोलौ, "जो कुछ ताऊं माथै कौर्ज आ तेस वापिस दै।" 29 एथ माथै तेसरौ गौश्टण धौनी पौडियौ तेसकै औरज कौरदै लागौ, 'चुटुक रौऊ, हाऊं सारौ कौर्ज भौरु।' 30 तिणीए नाई मानौ, पर सेऊ पाकडियौ जेला दी पाओ और बी झाऊं कौर्ज नाई दैओ तेबी झाऊं इदै थाक रौई। 31 तेसरै गौश्टण इणौ जो हुआ थौ तेस देखीयौ भौरी उदास हुआ, और डेइयौ आपणै मालिका कारे सारी बुशै बोली गोई।

32 तैबे तेसरें मालिकें सेऊ अपनौ नुकर ओटा लियो तेसलें बोलौ, 'ओ पापी नुकर, ताइयें जो मुकें औरज की आ, ता मूइए तैरौ सारौ कौर्ज माफ कियो। 33 एथीलैं जिणौ मूइए ताऊं माथे दया की, तिणी ई का ताऊं भी आपणें गोश्टणा माथे दया नाई कौरणी चाई थी?' 34 और तेसरें मालिकें रोशा दी आशीयो सेऊ नुकर सजा देणैवालें रै हाथा दी देई गौ, कि जेबी झाऊं सारौ कौर्ज नाई भौरा लौ, तेबी झाऊं इऊं रै हाथा दी रौऊ। 35 "इणी कौरी अगर तुमु मांझिऊ कु हर एक आपणें भाई जीवा कु माफ नाई कौरालें, ता मैरौ बाब जो सौरगा दी आ, तुमु लैं भी तिणी ई कौरा लौ।

तलाका रै बारै दी यीशु री शिक्षा

(मरकुस 10:1-12)

19 जैबे यीशुए एजी बुशें बोली गोई, ता यीशु गलीला कु डेइ गौ; और तैबे यीशु और तेसरें चेलें यरदन नौई पारा रै परदेशा दी डेवे। 2 तिरे भी यीशु काए एक भौरी बोडी भीड़ कौठै हुई। और यीशुए तिरे सें चांगे कियै। 3 तैबे कुछ फरीसी लोग यीशु काए आशें और तेस परखुणा लैं पुछदैं लागै, "एक आदमी लैं आपणी छेउडी रौ फेंसलौ कौरणौ ठीक आ या नाई?" 4 यीशुए जवाब दैओ, "धर्म शास्त्रा दी इणौ आ लिखौ औन्दौ कि, परमेश्वरें दुनिया चाणने री शुरुआता दी छेउडी और मर्द चाणे ई। 5 'इणौ भी आ लिखौ औन्दौ कि मर्द आपणें मां-बापा छाड़ियो आपणी छेउडी आइलें मिली रौआ और सें एक जिसम बाणी रौआ।' 6 और सें दुई नाई, बल्कि एक जिसम बाणी रौआ। परमेश्वर एक मर्द और एक छेउडी शादी दी जोडा आ तैबे आदमीउए सें दुई नाई चाई अलग कौरनै। 7 तैबे तिऊं लोगुए बोलौ, "मूसा रै नियमा दी इणौ आ लिखौ औन्दौ, जो आदमी आपणी छेउडी रौ फेंसलौ कौरनौ च़ाहा सा, सेऊ आदमी राजीनांवा देइयो तिणें पोरु गाडी सौका सा। 8 यीशुए तिउंलें बोलौ, "मुसे तुमारें जीऊ काठौ हुणा रै कारण तुमुलें आपणी-आपणी छेउडी पोरु छाड़नै रौ हुकम दैओ, पर पैहलें कु इणौ नाई थौ। 9 और हाऊं तुमुलें बोलाऊ, कि जुण-कुण गान्दै काम छाड़ियो, और केजे कारणा कु आपणी छेउडी लैं राजीनांउ देइयो दुजे छेउडी आइलें शादी कौरा सा, सेऊ आपणी पहली छेउडी रै विरोधा दी गान्दै काम कौरा आसा; और जेजी छेउडी आपणें बोउटे लैं राजीनांउ देइयो दुजे आदमी आइलें शादी कौरा सा, सें छेउडी भी आपणें बोउटे रै विरोधा दी गान्दै काम कौरा आ।" 10 चेलेउए यीशु लैं बोलौ, "अगर मर्द रौ छेउडी आइलें इणौ रीशतौ आ, ता शादी कौरनी आछी नाई।" 11 यीशुए तिउंलें बोलौ, "सौबी एजौ वचन नाई मानदैं, सिर्फ सें जासलें इजौ वरदान दैओ औन्दौ आ। 12 कैलैकि कुछ नामोरद इणें ई, जो मां री कुखी ई कु इणें जन्मै; कुछ नपुंसक इणें ई, जो आदमीए नपुंसक चाणें; और कुछ नपुंसक इणें ई, जुणियें सौरगा रै राज्या लैं आपुलें नपुंसक चाणें ई। जो इऊं मानी सौका ई, सें माना लैं।"

छोहरु लैं आशीवाद

(मरकुस 10:13-16; लूका 18:15-17)

13 तैबे लोग लोलडेऊ यीशु काए आणदैं लागै ताकि यीशु तिऊं माथे हाथ छाड़ा और प्राथना कौरा, चेलेउए सें लोलडै धौमकाए। 14 यीशुए बोलौ, "लोलडेऊ मुं काए आशणें दैओ, और इऊं नाई रोकौ, कैलैकि सौरगा रौ राज इऊं जिणेउरौ आ।" 15 और यीशुए तिऊं माथे हाथ छाड़ियो तिदरा कु डेई गौ।

धनवान छोहरु और सदा री जिन्दगी

(मरकुस 10:17-31; लूका 18:18-30)

16 एक आदमी यीशु काए आशौ और तेसलें बोलौ, "ओ गुरु सौदा री जिन्दगी पाइणा लैं हाऊं केजौ भौलौ काम कौरु?" 17 यीशुए तेसलें बोलौ, "तू मुकें आच्छे कामा रै बारै दी कैलें पुछाई? भौलौ ता एक ई आ, पर अगर तू जिन्दगी दी डेउणौ च़ा ई, ता हुकम मानदैं थाक लागी।" 18 तिणीए यीशु लैं बोलौ, "केजौ हुकम?" यीशुए तेसलें बोलौ, "एजौ हुकम आ कि खून ना कौरणौ, गान्दै काम ना कौरनै, चोरी ना कौरनी, झुठी गवाही ना दैणी। 19 आपणें मां और बाबा री इज्जत कौरनी, और आपणें पड़ोसी आइलें आपु

जिणौ प्यार छाड़नौ।" 20 तिणी आदमीए यीशु लैं बोलौ, "इऊं सारी ता हाऊं माना ऊ; आबै मुं दी केजी बुशें री कामी आ?" 21 यीशुए तेसलें बोलौ, "अगर तू ठीक औणौ च़ाआई ता डेऊ, धन-जयदाद बेचियो गरीबु लैं दै, और ताउंलें सौरगा दी धन मिला सा; और आशियो मुं पीछु आंड।" 22 पर सेऊ आदमी इणी बुशें शुणियो उदास हुइयो डेई गौ, कैलैकि सेऊ भौरी सेठ थौ। 23 तैबे यीशुए आपणें चेलेऊ लैं बोलौ, "हाऊं तुमु लैं सौचौ-सौचौ बोलाऊ कि सेठा रौ परमेश्वरा रै राजा दी डेउणौ भौरी कठीण आ। 24 तुमु लैं औजौ बोलाऊ कि परमेश्वरा रै राजा दी सेठ आदमी रै डेउणें कु उंटा रै सिउणी रै शेडै बाटिये डेउणौ आसान आ।" 25 इणौ शुणियो चलेऊए भौरी हैरान हुइयो बोलौ, "तैबे कासरौ उदार हुई बौला सा?" 26 यीशुए तेस आदमी भिलें देखियो तेसलें बोलौ, "आदमीऊ कौरी ता इणौ नाई हुई बौलदौ, पर परमेश्वरा कौरी सारौ कुछ हुई बौला आ।" 27 एथ माथे पतरसे यीशु लैं बोलौ, "देख, आमै ता आपणौ सारौ कुछ छाड़ियो ताऊं पिछु हुई गोए आ : ता आमूलें का मिला सा?" 28 यीशुए तिउंलें बोलौ, "हाऊं तुमुलें सौचौ बोलाऊ कि नौई सृष्टि दी जेबी आदमी रौ छोहरु आपणी महिमा रै सिंहासना माथे बोशा लौ, ता तुमै भी जो मुं पीछु आ, बारहा सिंहासना माथे बोशियो इस्त्राएला रै बारहा गोत्रा रौ फौंसलौ कौरा लैं। 29 और जुणी कुणिए घौर, भाई, बौइणी, या मां, आपणें लोलडे, धूरें डौखरें मैरें नाऊं काले छाडी गोए आ, तेसलें शौ गुणा मिला सा, और सेऊ सौदा री जिन्दगी रौ हकदार हुआ। 30 पर भौरी का जो पैहलें आ, सें पिछाडी हुआई : और जो पिछाडी आ, सें पैहलें हुआई।

बगीचें रै मजदूरु रौ औनेणौ

20 "सौरगा रौ राज एक घौरा रै मालीका जिणौ आ, जो दोउती निकलौ और आपणें अंगुरा रै बगीचें दी मजदूरु लाए। 2 तिणीए मजदूरु कें एक दिना री दिहाडी देइयो कामा माथे लाए और सें आपणी अंगुरा रै बगीचें दी भेजें। 3 तैबे तिणी मालीकें कौलियारी कु पैहलें कुछ लोग बज़ारा दी बेलें खौडें देखे, 4 और तिणी मालीकें बोलौ, "तुमै भी अंगुरा री बारी दी डैओ, और जो कुछ ठीक आ, तुमुलें दिआऊ।" तैबे सें भी डेवै। 5 तैबे तिणी मालीकें कौलियारी टौलियो दुजे और चीजे पहरा रै नजदीका दी निकलियो तिणौ ई कियो। 6 दिना रौ एक घाटौ रौइयो सेऊ औजौ डेइयो दुजे आदमी खौडें देखे, और तिणीए तिउंलें बोलौ, 'तुमै कैलें इदें पुरें दिना दी बेलें खौडें रौए औन्दै? तिउंए तेसलें बोलौ, 'एथलें कि कोइए भी आमै कामा कौरदें नाई नीये।' 7 तिणी मालीकें तिउंलें बोलौ, 'तुमै भी अंगुरा बागिचें दी डैओ और तिरे काम कौरौ।' 8 "बयाली अंगुरा री बारी रै मालीकें आपणें खजानची लें बोलौ, 'मजदूरु लैं औटाइयो पिछले कु और पैहलें झाऊं तिउंलें मजदूरु दै।' 9 जैबे सें आशें जुणिए एकी दिना दी एका घाटौ लाओ थौ, ता तिउंलें एक दिनार मिलौ। 10 जो पैहलें आशें औन्दै थे तिउंए सौमझौ कि आमु लैं भौरी मिला सा, पर तिउंलें भी एक एक दिनार ई मिलौ। 11 जेबी मिलौ ता सें घौरा रै मालीका लैं कुडकुड़ाइयो बोलदैं लागै, 12 'इऊं पिछलें ता एक ई घाटै दी काम कियो, ताइयें सें आमारे बराबर की गोए, जुणियें पुरें दिनें रौ भार चुंगौ और ताती रुड सैहन की?' 13 मालीकें तिऊं मांझीयें कु एकी लैं जवाब दैओ, 'ओ गोष्टण, हाऊं ताऊं आइलें कुछ अन्याय नाई कौरदौ। का ताइयें मुकु एक दिनार नाई मांगौ थौ? 14 जो तैरौ आ, तेस चुंगु और डेऊ; मेरी मौरजौ आ कि जेती ताउंलें देऊ तेती ही इऊं पिछलें लैं भी देऊ। 15 का इणौ ठीक नाई कि हाऊं आपणें धना आइलें जिणौ च़ाऊ तिणौ कौरु? का मैरें भौलें हुणा रै कारण तू बुरी नौजरी कु देखाई?' 16 एजी रीति कु जो पिछलें आ, सें पैहलें हुआई; और जो पैहलें ई, सें पिछलें हुआई।"

आपणें मौरणें रै बारै दी यीशु रै चीजी बारें बोलणौ

(मरकुस 10:32-34; लूका 18:31-34)

17 यीशु यरुशलेमा लैं डेउंटी बारें आपणें बारहा चेलें एखुलें दी नियें, और बाटा दी तिउंलें बोलदैं लागौ, 18 "शुणौ, आमै यरुशलेमा लैं ई डेउंटी लागै औन्दै; और आदमी रौ छोहरु परधान याजकु और शास्त्रीऊ रै हाथा दी पकड़वाइया, और सें तेस चोरिए पाकड़ाई। 19 और तेस दुजी ज़ाति रै हाथा

दी दिआई कि सैं तेसरौ मजाक उडावा, और तेसदी कोढ़े ला, और तेस क्रूस माथे चड़ावा ई, और सेऊ चिजें दिनें जीउंदौ हुआ सा।"

एक माँ री औरज (मरकुस 10:35-45)

20 तैबे जब्दी रै छोहरु री मांए, आपणें छोहरु आइलै यीशु काए आशियौ तेसकै ढाल की, और तेसकु कुछ मांगदै लागी। 21 यीशुए तियां लै बोलौ, 'तू का चाहा ई?' तिऐं यीशु लै बोलौ, "एस वचन दै कि मैरै ऐ दुई छोहरु तैरै राजा दी एक तेरी सुलटी बिलै दुजौ तेरी उलटी बिलै बोशा।" 22 यीशुए तिआंलें जवाब दैऔ, "तू नाई ज्ञानदी कि तू का मांगा ई। जो खोरु हाऊं पीणें वालो ऊ, का तुमै पी बोला ई?" तिउंरै यीशु लै बोलौ, "पी बोली ई।" 23 यीशुए तिउंलें बोलौ, "तुमै मैरौ खोरु ता पीयालै, पर आपणें सुलटी और उलटी भिलै कासी बोशालनौ मैरौ काम नाई, पर जास कालें मैरै बाबा री तौरफा कु तैयार किऔ औन्दौ आ, तिउं ई कालें आ।" 24 इणौ शुणियों दस चेलै रै तिउं दुई भाई माथे रोश आशै। 25 यीशुए सैं आपु काए ओटाए और तिउंलें बोलौ, "तुमै जाणाई कि दुजी जाति रै हाकिम तिउं माथे हौक कौराई; और जो बौडै ई, सैं तिउं माथे हौक चलावा ई। 26 पर तुमु मांझीए इणौ नाई औलौ; पर जुण-कुण तुमु मांझीए बौडौ हुणौ चाहा, सेऊ तुमारौ नुकर बौणा; 27 और जो तुमु मांझीए परधान हुणौ चा सा, सेऊ तुमारौ नुकर बौणा; 28 जिणौ कि आदमी रौ छोहरु; सेऊ एथीलै नाई आशौ कि तेसरी सेवा टहल कौरौ, पर एथीलै आशौ आ कि आपु ई सेवा टहल कौरा, और सौबी लै आपणें प्राण दिया।"

दुई शेडैउ लै आखी देणी (मरकुस 10:46-52; लूका 18:35-43)

29 जेबी सैं यरीहो कु निकलदै थै लागै औन्दै, ता एक भौरी भीड़ यीशु पीछु हुई गोई। 30 और दुई शेडै जो बाटा दी एकी बिलै थै बोशै औन्दै, इणौ शुणियों कि यीशु इदरा बाटी डेउंदै लागौ औन्दौ, हाके मारियो औटाइंदै लागै, "ओ प्रभु, दाऊदा रौ छोहरु, आमू माथे दया कर।" 31 लोगुए सैं धौमकाए कि चुटुक थाकौ, पर सैं औजौ भी जोरै हाके मारियो बोलदै लागै, "ओ प्रभु, दाऊदा रौ छोहरु आमू माथे दया कर।" 32 तैबे यीशुए टेकियो, सैं ओटाए और बोलौ, "तुमै का चाहा ई कि हाऊं तुमुलै कौरु?" 33 तिउंरै यीशु लै बोलौ, "ओ प्रभु, इणौ कि आमारी आखी खुला ली।" 34 यीशु रै तिउं शेडै माथे दया आशी और तिउं री आखी छुई, और सैं शेडै तेभी देखदै लागै; और तैथ बासिरे सैं यीशु पिछु आपण्डै लागै।

यरुश्लेमा दी जीत आशणी (मरकुस 11:1-11)

21 जैबे यीशु और तेसरै चेलै यरुश्लेमा रै नजदीक पौउंचै और जैतूना री पहड़ी माथे बैतफगे काए आशै, ता यीशुए दुई चेलै इणें बोलियो भेजै, 2 सामनै वालें गावां दी डैऔ। तिऐ पौउंचीयौ ही तुमुकें एक गादी मिला खुंटी दी बानी औन्दी, और तियां आइलै तियांरौ गदेटु मिला। तिउं खोलीयौ मु काए आणौ। 3 अगर तुमु आइलै कोई कुछ बोला लै, ता तुमै बोलेऊ प्रभु कें ऐसरी ज़रुरत आ, तैबे सेऊ तेबी भेजा" 4 इणौ ऐथलै हुओ कि जो वचन पुराणें जमानें रै गुरु रै तौरफा कु बोलौ औन्दौ थौ सेऊ पुरौ हुआ : 5 "सिय्योना री छोटुडी कु बोलौ, 'देख, तैरौ राजौ ताऊं काए आशौ आ : सेऊ निऊलौ आ, और गदेटु माथे बोशौ औन्दौ आ : पर गादी रै माऊं माथे।" 6 चलैऊए डेइऔ, जिणौ यीशुए तिउंलें बोलौ थौ, तिणौ ही किऔ। 7 और गादी और तियां रौ गदेटु आणौ, तिउं माथे आपणें जुडकै छाडै, और यीशु तेस माथे बोशी गौ। 8 तैबे भौरी लोगुए आपणें जुडकै बाटा दी बिछाऊंदै लागै, और कुछ लोगुए पेड़ा रै शाऊंटे काटियो बाटा दी बिछाए। 9 जो भीड़ औगाडिरे और पिछाडिरे आपण्डै थै लागै औन्दै, सैं ओटाईयौ बोलदै थै लागै औन्दै, "दाऊदा रै संताना री बोडाई हो होशाना, आशीष वालौ ई तुमै जो प्रभु रै नावां कौरियै आशै ई, सौरगा दी परमेशवरा री बड़ाई हो होशाना।" 10 जैबे यीशु यरुश्लेमा दी डैऔ, ता सारै शहरा दी हलचल माची गोई, और लोग

बोलदै लागै, "एऊ कुण आ?" 11 लोगुए बोलौ, "एऊ गलीला रै नासरता रौ गुरु यीशु आ।"

परमेश्वरा रै घौरा कु सामाना बेचणें वालें गाड़नै (मरकुस 11:15-19; लूका 19:45-48; यूहन्ना 2:13-22)

12 यीशुए परमेश्वरा रै घौरा दी डेइयौ सैं सौबी, जो परमेश्वरा रै घौरा दी लेन-देन थै कोरदै लागै औन्दै, गाडी गोए, सराफो रै पीढे और कबूतर बेचणें वालेउ री रैदी पौल्टी ; 13 और यीशुए बोलौ, "लिखौ औन्दौ आ, 'मैरौ घौर प्राथना रौ घौर आ; पर तुमुए एउ लुटणे वालेऊ रौ आडौ चाणी गौ आ।" 14 तैबे शेडै और लोंगडे, परमेश्वरा रै घौरा दी यीशु काए आशै, और यीशुए सैं ठीक किये। 15 पर जैबे परधान याजकु और शास्त्रीउए एजै हैरान कोरनें वाले काम, जो यीशुए किये, और छोहरुए परमेश्वरा रै घौरा दी 'दाऊदा री संताना लै होशाना' ओटाउंदै बारै देखे, ता तिउंरै रोश आशी गोए, 16 और यीशु लै बोलदै लागै, "का तू शुणा ई कि ऐ का बोलाई?" यीशुए तिउंलें बोलौ, "ओ; का तुमुए इणौ केबी नाई पौडौ : 'लोलडै और दूध पीणें वालें माऊं कु ताइरे अपार स्तुति कराई?" 17 तैबे यीशु तिउं छाडियो तेस इलाकें कु बाइरै बैतनिय्याह लै डेवै और बयाली रौ औ तिदै ई।

बिणा फौला रौ फेडू रौ पेड (मरकुस 11:12-14; 20-24)

18 दोउती जैबे यीशु इलाकें कु डेउंदै थौ लागौ औन्दौ ता यीशु रै भूख लागी। 19 बाटा दी यीशुए एकी बिये फेडू रौ एक पेड देखौ और सेऊ तेस पेडा काए डैऔ, और पेडा दी पाचा छाडियो और कुछ नाई थौ और तेसलै बोलौ, "आजा कु पोरु ताऊंटी केबी फल नाई लागदै। और अंजीरा रौ पेड खरकचार शुकी गौ। 20 इणौ देखियो चेलै हैरान हुए और तिउंरै बोलौ, "एऊ फेडू रौ पेड खडकचार किणौ शुकी गौ?" 21 यीशुए तिउंलें जवाब दैऔ, "हाऊं तुमुलै सौचौ बोलाऊ, अगर तुमै विश्वास छाडा और शौक नाई कौरा लै, ता ना सीरफ इणौ कौरालै जो एस फेडू रै पेडा लै किऔ आ, पर अगर एस पहाडी लै बोला लै, 'तू उठ, और समुन्दरा दी डेऊ', ता इणौ हुआ ई। 22 और जो तुमै प्राथना दी विश्वासा कौरै मांगा ई सेऊ सौबी तुमुलै मिला ई।"

यीशु रै अधिकारा माथी सवाल (मरकुस 11:27-33; लूका 20:1-8)

23 यीशु परमेश्वरा रै घौरा दी शिक्षा दैदै थौ लागौ औन्दौ, ता परधान याजक और स्याणें लोग यीशु काए आशै और बोलदै लागै, "तू इणें काम केजै हौक्का कौरौ कौरा ई?" और ताउंके एजौ हौक कुणीए दैऔ आ?" 24 यीशुए तिउंलें जवाब दैऔ, "हाऊं भी तुमु कु एक सवाल पुछा ऊ; अगर तुमै मुकें जवाब दिया लै, ता हाऊं भी तुमुकें बोलाऊ कि इणें काम कासरै हौका कौरिरे कौराऊ। 25 यूहन्ना रौ बसिस्मा किदर कु थौ ? सौरगा री तौरफा कु या आदमी री तौरफा कु?" तैबे सैं आपु मांझीयै चोपडीदें लागै, "अगर आमै बोलुलै 'सौरगा री तौरफा कु', ता एऊ आमू कु बोला, 'तैबे तुमुए तेस माथे विश्वास कैलै ना कियो?' 26 और अगर आमै बोलुलै 'आदमी री तौरफा कु', ता आमू रै भीडा रौ डौर आ, कैलैकि इयै सौबी यूहन्ना गुरु माना ई।" 27 तैबे यिउंरै यीशु लै जवाब दैऔ, "आमै नाई जाणदै।" यीशुए भी तिउंलें बोलौ, "ता हाऊं भी नाई बोलदौ कि एजौ काम केजै हौक्का कौरियै कौरा ऊ।

दुई छोहरु लै आखी रौ दाण

28 "तुमै का सौमझा ई? कासी आदमी रै दुई छोहरु थै; तिणीए पैहलें छोहरु लै बोलौ, "ओ छोहरु, आज अंगुरा रै डोखरै दी काम कोर।" 29 तिणी छोहरुए जवाब दैऔ, "हाऊं नाई डेऊंदौ", पर बासीए पछताइऔ डैऔ। 30 तैबे सेऊ दुजै छोहरु काए डेइयौ तिणौ ई बोलौ, तिणी दुजै छोहरुए बोलौ, "ओ हाऊं डिआ ऊ", पर नाई डैऔ। 31 इऊ दुई मांझीए कु कुणीए बाबा री इच्छा पुरी की?" तिउंरै बोलौ, "पैहलै।" यीशुए तिउंलें बोलौ, "हाऊं तुमु लै सौचौ बोलाऊ कि मामलै निणावालै और गान्दै काम कौरणें वालें तुमु कु पैहलै परमेश्वरा रै राजा दी डेआ ई। 32 कैलैकि यूहन्ना धौर्मा री बाटा देखाऊंदै तुमु

कारे आशौ, और तुमुए तेसरौ विश्वास ना कियो; पर मामलै निणैवालेउए और गान्दे कामा कौरणै वालेउए तेसरौ विश्वास कियो : और तुमै इणौ देखीयो बासिए भी नाई पछताए कि तेसरौ विश्वास कौरा थै।

बुरै जिमीदारु रौ औनेणौ

(मरकुस 12:1-12; लुका 20:9-19)

33 "एक औजौ औनेणौ शुणौ : एक घौरा रौ मालिक थौ तिणीए अंगुरा रौ बौगीचौ लाओ, तेसरै चारो तौरफा दी तारबाड़ लाओ, तेस बौगीचा दी एकी भीलै अंगुरा रै रस गाड़ने री ज़ागहा भी चाणी और छोटी ज़ेई छानी भी चाणी, और तेसरौ ठेकौ जिमदारु कै दैइयो आपु डैओ परदेशा लै। 34 ज़ेबै अंगुरा चोड़ने रौ बोग्त आशौ, ता तिणी मालिके आपणै नुकुरा लै फल आपणालै जिमदारु कारे भेजै। 35 पर जिमदारुए तेसरै नुकुर पाकड़ीओ, केजै पिटै, और केजै झांगे पौर, और केजै डोलीयाए। 36 तैबै तिणी मालिके पैहलै कु भौरी औजौ नुकुर भेजै, और तिउंए तिउं आइलै भी तिणौ ई कियो। 37 बासीए तिणी मालिके आपणौ छोहरु तिउं कारे इणौ सुंचीयो भेजौ कि सै मैरै छोहरु री इज़्जत कौरा लै। 38 पर जिमदारुए सेऊ छोहरु देखीयो आपु माझीए चौपडीं दै लागै, 'एऊ ता ऐस बौगीचा रौ मालिक आ, आशौ, आमै ऐस पौरु झांगी, ताकी एऊ बौगीचौ आमाराँ हुआ।' 39 तैबै तिउंए सेऊ छोहरु पाकड़ौ और सेऊ अंगुरा रै बौगीचा कु बाइरा गाड़ीयो पौरु झांगौ। 40 एथीलै ज़बी बौगीचा रौ मालिक आशा लौ, ता तिउं ज़मीदारु आइलै का कौरा?" 41 तिउंए तेसलै बोलौ, "सेऊ तिउं लोग पोरु झांगा और अंगुरा रौ बौगीचौ ओरी लोगु कै सौंभाला, जो बोग्तै माथे तेसलै फल दिआ कौरा।" 42 यीशुए तिउंलै बोलौ, "का तुमुए केबी पवित्रशास्त्रा दी इणौ नाई पौदौ कि : 'जेजौ पात्थर मिस्रीए बेकार ज़ाणौ थौ, सेजौ पात्थर कुणे दी लागणे वालौ बौणौ? एजौ काम परमेश्वरा री तौरफा कु हुआ, और एजौ आमारी नौजरी दी नौखौ आ।' 43 एथीलै हाऊं तुमुलै बोलाऊ कि परमेश्वरा रौ राज तुमु कु निई बोलीया और इणी ज़ाति लै जो तेसरौ फल आणा, देई बौला लै। 44 जो एस पात्थरा माथे पौडालौ, सेऊ चूर-चूर हुआ; और ज़ास माथे सेऊ पात्थर पौडालौ, सेऊ पिशीया पोरु पा।" 45 परधान याजकु और फरीसी लोग यीशु रै औनेणौ शुणीए सोमझी गौए कि सेऊ तिउंरै बारा दी बोला आ। 46 और तिउंए यीशु पाकुडनौ च़ाओ, पर सै लोगु कु डौरी गौए कैलैकि सै यीशु भविष्यवक्ता माना थै।

शादी दी रोटी खांदे औटाउणै रौ औनेणौ

(लूका 14:15-24)

22 यीशु औजौ तिउंके औनेणै दी बोलदै लागौ, 2 "सौरगा रौ राज तेस राजे जिणौ आ, ज़ुणीए आपणै छोहरु री शादी की। 3 और तिणीए आपणै नुकुर भेजै कि ज़ासलै निऊंदौ आ दैओ औन्दौ तिउं लोगु शादी री धामा खांदे औटाऊ; पर सै नाई आशौ। 4 तैबै तिणीए औजौ आपणै नुकुर इणै बोलीयो भेजै कि, 'ज़ासलै निऊंदौ आ दैओ औन्दौ तिउं लोगु लै बोलौ : शुणौ, मुइंरे धाम तैयार की गौइ आ, (मैरै बौलद और धाचै औन्दै गूंड जांगे औन्दै आ,) और सब कुछ तैयार आ; शादी री धामा दी आशौ।' 5 पर सै माफी मांगीयो तिरु कु डेई गौए : कोई डेवै आपणै डोखरै लै, कोई डेवै आपणै कामा खौटदै। 6 दुजै लोग जो बौचदै थै लागै औन्दै तेसरै नुकुर पाकड़ै और तिउंरी बेइजती की और पोरु झांगे 7 तैबै राजे रै रोश आशौ, और तिणीए आपणै सिपाई भेजीयो सै खून कौरणै वालै पोरु झांगे, और तिउंरै इलाके दी आग लाइ और सारौ पोरु ज़ालौ। 8 तैबै तिणीए आपणै नुकुर लै बोलौ, "शादी री धाम ता तैयार आ पर निऊंदै वालै लोग नाई आशौ। 9 एथीलै सौडकी दी डैओ और जेती लोग तुमु कै मिला, सौबी लोगु शादी री धामा खान्दै औटाओ।" 10 तैबै तिउं नुकुरए सौडकी दी डेईयो का भौलै का बुरै, जेती मिलै, सारै लोग कौठै किये; और शादी रौ घोर पाऊणै कौरी भौरुई गौ। 11 "जेबी राजौ पाऊणै देखदै भीते आशौ, ता तिणीए तिरे एक आदमी देखौ, ज़ुणीए शादी रै जुडके भीडे औन्दै नाई थै। 12 तिणीए तेसकु पुछौ, "ओ गोश्टण; तू शादी रै जुडके भीडियो कैलै नाई आशौ?" तेस आदमी रौ मुंह बौन्द हुई गौ। 13 तैबै राजे आपणै नुकुरा लै बोलौ, 'एसरे हाथ और बांगणै

बानियो बाइरै नियारा दी पाओ, तिरे लेरनौ और दांद पिशणौ हुआ।' 14 कैलैकि औटाए औन्दै ता भौरी ई और छंटै औन्दै थोडै ई।"

कैसरा लै मामलौ देणौ

(मरकुस 12:13-17; लूका 20:20-26)

15 तैबै फरीसि डेईयो आपु माझी सुंचदै लागै कि एस केजै जरीए बुशु दी फसाई। 16 तैबै तिउंए आपणै चेलै हेरोदिया आइलै यीशु कारे इणौ बोलना लै भेजै, "ओ गुरु, आमै ज़ाणी आ कि तू सौचौ आ, और परमेश्वरा री बाट सौचाई कौरी शिखावा आ, और कासी री परवाह नाई कौरदौ, कैलैकि तू आदमी रौ मुंह देखीयो बूश नाई कौरदौ। 17 एथीलै आमु लै बोल तू का सुचा ई? कैसरा लै मामलौ देणौ चाई कि नाई।" 18 यीशुए तिउंरी चालाकी ज़ाणीओ तिउंलै बोलौ, "ओ कपटी लोगुओ, मुं कैलै पौरखा ई? 19 मामलै रौ सिक्को मुके देखाळौ।" तैबै तिउंए यीशु कारे एक सिक्को निओ। 20 यीशुए तिउंकु पुछौ, "एऊ छाप और नाऊं कासरौ आ?" 21 तिउंए तेसलै बोलौ, "कैसरा रौ।" तैबै यीशुए तिउंलै बोलौ, "जो कैसरा रौ आ तेस कैसरा कै दैओ; और जो परमेश्वरा रौ आ तेस परमेश्वरा लै दैओ।" 22 इणौ शुणियो सै लोग हँरान हुए, और तिरु कु डेई गौए।

दूजी बारै पैदौ हुणौ और शादी

(मरकुस 12:18-27; लूका 20:27-40)

23 सेजे दिने सदूकी लोगु जो इणौ मानाई कि ज़ुण मौरा ई सै दुजी बारै ज़ीऊंदै नाई हुन्दै, यीशु कारे आशे और तेसलै बोलौ, 24 "ओ गुरु, मूसै बोलौ थौ कि अगर केजौ आदमी बिण औलादीए मौरा लौ, ता तेसरौ भाई तेसरी विधवा छेउडी आइलै शादी कौरीयो आपणै भाई काले वंश पैदौ कौरा। 25 आबै आमारेँ घौरा दी सात भाई थै, पैहलौ भाई शादी कौरीयो मौरा गौ, और दुजै भाईए तिउं छेउडी आइलै शादी कौरी ताकि तेस भाई री औलाद बौणी रोआ। 26 इणी कौरै चीजे और चौथेऊए भी इणौ कियो, और साती भाईऊए तिउं आइलै शादी की और बिना औलादीए मौरा गौए। 27 तेत बासीए सै छेउडी भी मौरा गोई। 28 ज़ेबै सै छेउडी ज़ीऊंदै हुआ ली ता तिउं साता माझीऊ कु कासरी छेउडी हुआ? कैलैकि सै सारैऊ री छेउडी थी।" 29 यीशुए तिउंलै जवाब दैओ, "तुमै पवित्रशास्त्र और परमेश्वरा री शक्ति नाई ज़ाणद; एजे कारणे तुमै गौलती दी पौडै औन्दै आ। 30 कैलैकि ज़ीऊंदै हुणा दी सै ना ता शादी कौरदै और ना शादी लै दैदै पर सौरगा दी परमेश्वरा रै दुतै जिणै हुणै ई। 31 पर मौरनै बासियै ज़ीऊंदै हुणा रै बारै दी का तुमुए एजौ वचन नाई पौदौ जो परमेश्वर तुमु आइलै बोलौ आ : 32 'हाऊं अब्राहमा रौ परमेश्वर, और इसहाका रौ परमेश्वर, और याकूबा रौ परमेश्वर आ?' सेऊ मौरै औन्दै रौ नाई, पर ज़ीऊंदै रौ परमेश्वर आ।" 33 इणौ शुणियो लोग तेसरै उपदेश कु हँरान हुए।

सौबी कु बौडी आझा

(मरकुस 12:28-34; लूका 10:25-28)

34 ज़ेबै फरीसिऊए शुणौ कि यीशुए सदूकिऊ रौ मुंह बौन्द कौरी गौ, ता सै कौठै हुए। 35 तिउं माझीऊ कु एकी आदमीए यीशु पौरखुणा लै तेसकु पुछौ, 36 "ओ गुरु, कानूना दी केजौ हुकम सौबी कु बौडौ आ?" 37 यीशुए तेसलै बोलौ, "तू परमेश्वर आपणै प्रभु कु आपणै पूरे मन और आपणै पूरे प्राणा और आपणी सारी औकली आइलै प्यार छाडै। 38 बौडी और जरूरी हुकम ता ऐऊ ई आ। 39 और दुजी जरूरी हुकम भी तिणी आ कि जिणौ प्यार तू आपू आइलै कौरा ई तिणौ प्यार तू आपणै आस-पड़ोसा रै लोगु आइलै भी कौरै।" 40 एजे इ दुई हुकम सौबी कानून और पुराणै ज़माने रै गुरु री बुनियाद आ।"

मसीह कासरौ छोहरु आ?

(मरकुस 12:35-37; लूका 20: 41:44)

41 ज़ेबी फरीसी कौठै थै, ता यीशुए तिउंकु पुछौ, 42 "मसीह रै बारै दी तुमै का सुंचा ई? सेऊ कासरौ छोहरु आ?" तिउंए यीशु लै बोलौ, "दाऊदा रौ।" 43 यीशुए तिउंके पुछौ, "ता दाऊद आत्मा दी हुईयो तेसलै प्रभु कैलै बोला

सा? 44 'प्रभुए, मैंने प्रभु लै बोलौ, मैरी सुल्टी भिलै बोश, जेबी झाऊं हाऊं तैरे दुशमनु तेरी लाता थालै ना कौरु।' 45 भौलौ, जैबै दाऊद तेसलै प्रभु बोला सा, ता सेऊ तेसरौ छोहरु किणौ ठहरौ? 46 एस जवाबा दी कोईए भी एक बुश ना बोली बोलै। सेजै दिना कु कासी रै भी तेसकु कुछ पुछणा री हिम्मत नाई हुई।

शास्त्रिउ और फरीसिउ कु दूर रौएउ

(मरकुस12:38,39, लूका11:43,46; 20:45,-46)

23 तैबै यीशुए लोगु लै और आपणै चलेऊ लै बोलौ, 2 "शास्त्री और फरीसी मूसा री जगहा दी बोशे औन्दै; 3 एथीलै से तुमुलै जो कुछ बोला लै सेऊ तुमुए कौरणौ और मानणौ, पर तिऊं जिणै काम नाई कौरणै; कैलैकि सै बोला ता ई पर कौरदै नाई। 4 सै एक इणै भौरी भारा लै जो चुंगणौ भौरी गौरकौ आ, तेस बानीयौ तिऊं आदमीऊ रै काछा माथे छाड़ा ई; पर आपु तेस आपणी गुंठी कु भी झीड़नौ नाई चांहदै। 5 सै आपणै काम आदमीऊ कै देखालना लै कौरा ई : सै आपणै-आपणै जौतर बौड़ौ कौराई और आपणै जुड़कै साफ कौरा ई। 6 धामा दी खास आछी जगहा, और खुंबली दी आछी-आछी बोशणै री जगहा लोड़ा ई, 7 बजारा दी ढाल, और आदमीऊ जेबी तिउंलै रब्बी बोलाई ता तिउंके आचछौ लाग़ा आ। 8 पर तुमै रब्बी नाई बौणीयौ, कैलैकि तुमारौ एक ई गुरु आ, और तुमै सारै भाई ई। 9 धौतररी माथे कासी लै आपणौ बाब ना बौलीयौ, कैलैकि तुमारौ एक ई बाब आ, जो सौरगा दी आ। 10 और मालिक भी नाई बौलीयौ, कैलैकि तुमारौ एक ही मालिक आ, सिरफ मसीह। 11 जो तुमु माझीए बौड़ौ आ, सेऊ तुमारौ सेवक बौणा। 12 जुण-कुण आपूलै बौड़ौ बौणालौ, सेऊ छोटौ बौणालौ : और जुण-कुण आपूलै छोटौ बौणा, सेऊ बौड़ौ कौरीया लौ।

शास्त्रिउ और फरीसिउ री बुराई रै बारै दी रोशिणौ

(मरकुस12:40; लूका 11:39-42 44,52, 20:47)

13 "ओ कपटी शास्त्रिउओ और फरीसीउओ, तुमु लै फिटकार! तुमै आदमीऊ काले सौरगा रै राज्य रौ दार बौन्द कौरा ई, ना ता आपु तेसदी डेऊंदै और ना तेसदी डेऊणै वालै तेसदी डेऊणै देंदै। 14 (ओ कपटी शास्त्रिउओ और फरीसीउओ, तुमु लै फिटकार! तुमै विधवाऊ रौ घोर सारौ लूटा ई, और देखाउणा लै भौरी बोग्ता झाऊं प्राथना कौरदै रौआ ई : एथीलै तुमुलै भौरी सौजा मिला सा।) 15 "ओ कपटी शास्त्रिउओ और फरीसीउओ, तुमु लै फिटकार! तुमै एक आदमी आपणै वशा दी आणना लै सारै पाणी और धौतररी दी डिआ ई, और जैबै सेऊ वशा दी आशा सा ता तेस आपु कु दुगुणौ नारकीय चाणा ई। 16 "ओ शेडे चलेउओ, तुमु लै फिटकार! जुण बोला ई कि अगर कुण परमेश्वर रै घौरा री शौपतै खा ता कुछ नाई, पर अगर कुण परमेश्वर रै घौरा रै सुने री शौपतै खा ता तेसदी बानीया। 17 ओ मूर्खौ और शेडेउओ, कुण आ बौड़ौ ; सुनौ या सेऊ परमेश्वर जासकु सुनौ पवित्र हुआ सा? 18 तैबै बोला ई कि अगर कोई बेदी री शौपतै खा ता कुछ नाई, पर अगर जो भेटा तेसदी आ, अगर तेसरी शौतप खा ता बानीया सा। 19 ओ शेडेउओ, कुण आ बौड़ौ; भेटा या बेदी जास कौरी भेटा पवित्र हुआ सा? 20 एथीलै जो बेदी री शौपतै खा सा, सेऊ तेसरी और जो कुछ तेस माथे आ, तेसरी भी शौपतै खा सा। 21 जो परमेश्वर रै घौरा री शौपतै खा सा, सेऊ तेसरी और तेसदी रोइणावालै री भी शौपतै खा सा। 22 जो सौरगा री शौपतै खा सा, सेऊ परमेश्वर री जगहा री और तेत माथे बोशना वालै री भी शौपतै खा सा। 23 "ओ कपटी शास्त्रिउओ और फरीसीउओ, तुमु लै फिटकार! तुमै पुदीनै और सौफ, और ज़ीरै रौ दौसुओ भाग ता दिआ ई, पर तुमुए कानूना री गैहरी बुशै, मतलब फैसलौ, और दया, और विश्वास पोरु छाड़ी गौ आ; इणौ चाई थौ कि इऊं भी कौरा थै और तिऊं भी नाई छाड़ा थै। 24 ओ शेडे चलेऊओ, तुमै माचछर ता छाणा ई, पर ऊंट घुटा ई पोरु। 25 ओ कपटी शास्त्रिउओ और फरीसीउओ, तुमु लै फिटकार! तुमै डौंगै और थाली बाइटी ता माँजाई पर सै भितरी आइलै न्यारे और मौला कौरी भौरुड ऐन्दी। 26 ओ शेडे फरीसीउओ, पैहलै डौंगै और थाली भीतरी आइलै माँजाई कि सै बाइरी आइलै भी साफ हुआ। 27 "ओ कपटी शास्त्रिउओ और फरीसीउओ, तुमु लै फिटकार! तुमै चूनै कौरी माशी औंदी कौबरी जिणै ई जो बाइरी आले बड़िया

दिशा ई, पर भीतरी आइलै मौड़ै री हाडकेऊ और सारै रौंगा री गान्दी चीजा कौरी भौरुए औन्दै। 28 एजी रीति कौरी तुमै भी बाइरी आइलै भी आदमीऊ कै धौमी दिशा ई, पर भीतरी आइलै कपट और अधर्मा कौरी भौरुए औन्दै ई।

शास्त्रिउ और फरीसिउ माथी डाँडा री भविष्यवाणी

(लूका11:47-51)

29 "ओ कपटी शास्त्रिउओ और फरीसीउओ, तुमुलै ता ऐ केती बुरी बूश आ! तुमै पुराणै गुरु री ओड़ाची सज्जावा और धौमीऊ री ओड़ाची चाणाई, 30 और बोलाई कि, 'अगर आमै आपणै बाब दादै रै बोग्ता दी हुआ थै ता पुराणै गुरु झांगणा लै तिऊं आइलै साथा दी नाई हुआ थै।' 31 एथ कौरी ता तुमै आपु माथे आपु ई गवाही दिआ ई कि तुमै पुराणै गुरु रै खुनी री संतान ई। 32 और तुमुए आपणै बाब दादै रै पापा रौ घौड़ौ पूरौ भौरौ। 33 ओ साप करैतै रै लोलडेउओ, तुमै नौरका री सौजा कु किणै कौरिऐ बौचाई? 34 एथीलै देखौ, हाऊं तुमु काए पुराणै गुरु और बुद्धी वालै और शास्त्रिऊ भेजा ऊ; और तुमै तिऊं माझीआ कु कुछ पोरु झांगाई और कूसा माथे चड़ावाई, और कुछ आदमिउ लै तुमै आपणै आराधना कौरनै री खुंबली दी डींगे ला ई और एकी इलाकै कु दुजै इलाकै दी गाड़दै थाका इ लागी। 35 जासकै धौमी हाबीला कु बिरिक्याह रौ छोहरु जकरयाह झाऊं, जो तुमुए परमेश्वर रै घौरा दी और बेदी रै बिचा री जगहा दी झांगौ थौ, जेती धौमीऊ रौ लोहू धौतररी माथे बौओ औन्दौ आ तिऊं सौबी रौ पाप तुमारै मुंडा माथे सा। 36 हाऊं तुमुलै सौचौ बोलाऊ कि, ऐ सारी बुशै एजै जुगा रै लोगु माथे पौड़ाई।

यरुशलेमा लै लेरणौ

(लूका13:34,35)

37 ओ यरुशलेमा, ओ यरुशलेमा! तू पुराणै गुरु झांगा ई। और जो ताऊं काए भेजै ई, तिऊं तुमै ढोलीयावा ई। केती बारै मुइंरे चाओ कि जिणौ कुखड़ी आपणै टैणु आपणै पांखे थालै कौठै कौरा सा, तिणी ई हाऊं भी तैरे छोहरु कौठै कौरारु, पर तुमुए नाई चाओ। 38 देखौ, तुमारौ घोर तुमु कालै उजाडी छाड़ा ऊ। 39 कैलैकि हाऊं तुमुलै बोलाऊ कि इबी कु जेबी झाऊं तुमै नाई बोलालै, 'भौलौ आ सेऊ, जुण परमेश्वर रै नांवा कौरी आशा सा' तैबी झाऊं मुं तुमै केबी ना देखालै।"

परमेश्वर रै घौरा रै विनाशा री भविष्यवाणी

(मरकुस13:1,2; लूका 21:5,6)

24 जेबी यीशु परमेश्वर रै घौरा कु बाइरे निकुलदै थौ लागौ औन्दौ, ता तेसरै चेलै परमेश्वर रै घौरा रै बारै दी यीशु काए पुछदै आशै। 2 तिणीए तिउंलै बोलौ, "तुमै एस सब देखदै लागे औन्दै ई ना! हाऊं तुमुलै सौचौ बोलाऊ, इदै ढोला माथे ढोल भी नाई बौचदै कैलैकि इयौ सब कुछ ढालीया नाष हुआ।"

मुसीबत और क्लेश

(मरकुस13:3-13; लूका 21:7-19)

3 जेबी यीशु जैतुना री पहाड़ी माथे थौ बोशौ औन्दौ, ता चलेउए एखुली दी यीशु काए आशीयो तेसलै बोलौ, "आमुलै बोल कि एजी बुशै केबी हुआ ई? तैरे आशणै रौ और दुनिया आखरी हुणे रौ का निशाण हुआ सा?" 4 यीशुए तिउंलै जवाब दैओ, "बौचियौ रौएऊ! कुणिए तुमुलै धोखौ ना चाई दैओ, 5 कैलैकि कई लोग इणै हुआई जो मैरे नावां कौरीये आशीयो बोलाई, हाऊं मसिहा ऊ, और भौरी लोग तिऊं पीछु डेउणै ई। 6 तुमै लड़ाई और झांगडे रै बारै दी शुणालै, ता तुमै घौबराएऊ नाई कैलैकि इयै बुशै हुणी ता जरुरी ई, पर सेजौ बोग्त आखरी नाई हुन्दौ। 7 कैलैकि एकी जाती रै लोग दुजी जाती रै लोग रौ विरोध कौराई, एकी देशा रै लोग दुजै देशा रै लोग रौ विरोध कौराई, और जगहा-जगहा दी काल पौड़ाई, और भुईचाल हुणे ई। 8 इयै सब बुशै मुसिबता री शुरुआत ई। 9 तैबै सै दुख देणा लै तुमु पाकड़ा ई, और तुमु पोरु झांगाई, और मैरे नावां रै कारण सारै लोग तुमु आइलै दुश्मनी छाड़ाई। 10 तैबै भौरी लोग ठोकर खा ई, और एकी दुजै पकड़ावाई, और एकी दुजै आइलै

दुश्मनी छाड़ा है। 11 भौरी जौणें जुठे और पुराणें गुरु आशा है, और कई ता तिऊं आइलें डेआई। 12 अधर्म रें बौड़न कु भौरी लोगु रौ प्यार शेलौ पौड़ा सा, 13 पर जो आखरी झाऊं मुं आइलें बोणी रौआ लौ, तेसलें सौदा री जीन्दगी मिलाली। 14 और राजा रौ एक खुशी रौ संदेश सारी धौतरी माथे परचार कौरा लै, कि सब जाती माथे गवाही हुआई, तैबे आखरी बोग्त आशा सा।

बौड़ी मुसीबता री शुरुआत

(मरकुस13:14-23; लूका21:20-24)

15 "एथीलें जेबी तुमै तिरें उजाड़ने वाली बुरी चीज जेथरें बारें दी दानिय्येल गुरु रें जरीए बोली ऐन्दौ थी, एक भौरी बुरी आदमी आशियौ एस परमेश्वरा रें आराधना रें घौरा री सारेऊ कु शुद्ध जागह गान्दी कौरा आ (पढ़ने वालौ समझालौ), 16 तैबे जेजे लोग यहूदिरु दी औलें सैं बौचणा लै पहाड़ा दी जा डेउणौ। 17 जो छापरा माथे औलें, सैं आपणें घौरा कु समाना आणना लै तौलें नाई उतरियौ; 18 और जो डोखरें दी औलें, सैं आपणें जुड़के आणना लै घौरें नाई डेआलें। 19 सेजे दिनें दी जो छेउडी गौरकें जीवारी औली और जासकें दुध पिणें वालें लोलडें औलें, तुमुलें ऐ केती बुरी बुश आ। 20 प्राथना कौरदै थाकौ लागी कि तुमै शेलें रें दिनें या ब्रौता रें दीना दी नाई जा लौ भागणौ। 21 कैलैकि सेजे बोग्तें इणौ भौरी दुख हुआ, जिणौ धौतरी रें पैहलें कु ना इबी झाऊ हुआ और ना केबी हुणौ। 22 अगर सेजे दिन कम नाई कौरा थै ता कोई भी प्राणी नाई बौचा थौ, पर चुनें औन्दें रें कारण सैं दिन कम कौरा गोरै। 23 सेजे बोग्तें अगर तुमुलें कुण बोला लौ, 'शुणौ, मसीह इदै आ!' या तिदै आ!' ता विश्वास नाई कौरैऊ। 24 कैलैकि झूठे मसीह और झूठे गुरु आशा है, और बौड़ें निशाण, और हैरानी वालें काम देखाइयौ लोग परमेश्वरा री बाटा कु टालने री कोशिश कौराई। 25 शुणौ, मुइयें तुमुलें सारी कुछ बूशें पैहलें ई बोली गोई आ। 26 एथीलें अगर सैं तुमुलें बोलालें, 'शुणौ, सेऊ जांगला दी आ', ता बाइरें नाई निकलीयो; या बोलालें 'शुणौ, सेऊ कोठरिउ दी आ', ता विश्वास नाई कौरैऊ। 27 कैलैकि जिणौ बिजली पूर्वा कु निकलियो पश्चिमा झाऊं चोमका ई, तीणी ई आदमी रें छोहरु रौ आशणौ हुआ सा। 28 जियें मौरौ औन्दौ प्राणी हुआ सा, तिरें बाज कौठें हुआई।

आदमी रें छोहरु रौ दूजी बारें आशणौ

(मरकुस13:24-27; लूका 21:25-28)

29 "सेजे दिना रें दुखा बासिए सूरज कालौ पौड़ा सा, और सूरज और जून भी प्याशौ दैणौ बन्द कौरा, और तारें सौरगा कु छुटीयो तौलें पौड़ाई और सौरगा री शक्ति हिलणी। 30 तैबे आदमी रें छोहरु री निशाणी सौरगा दी दिशाई, और तैबे सौरगा रें सारें कुला रें लोग हिकडौ पीटाई; और आदमी रें छोहरु बौड़ी सामर्था और शाना कौरिए सौरगा रें बादला माथे आशदै देखाई। 31 सेऊ बांइशी बाजियो आपणें सौरगा रें दूत भेजा आ, और सैं पुरी दुनिया रें कुणें-कुणें कु मरें छोटै औन्दें लोग कौठें कौराई।

फेडु रें पेड़ा रौ उदाहरण

(मरकुस13:28-31; लूका21:29-33)

32 "फेडु रें पेड़ा कु एजौ अनेणौ शिखौ : जेबी फेडु रें पेड़ा रें शाउटै कौउलें हुआ ई और तेसदी पाच लागदै लागा ई, ता तेभी तुमुकें पौतौ लागा कि गोरमी आशणें वाली आ। 33 तिणी ई जेबी तुमै इऊं सब बुशें औन्दें देखा लै, ता तुमै सौमझैऊ कि मरौ दूजी बारें वापिस आशणें रौ बोग्त हुई ऐरौ आ। 34 हाऊं तुमुलें सौचूचौ बोलाऊ कि जेबी झाऊं इए सारी बुशें पुरी ना औली, तेबी झाऊं एजी पिडी रौ नाष नाई औन्दौ। 35 सौरग और धौतरी टौली सौका ई पर मेरी बोली ऐन्दी बुशें केबी ना टौलदी।

उजी रौएऊ

(मरकुस13:32-47; लूका17:26-30, 34=36)

36 "मरौ दूजी बारें आशणें रें बोग्त रें बारें दी कोई नाई जाणदौ, ना सौरगा रें दूत और ना छोहरु, सिरफ परमेश्वरा कें पौतौ। 37 जिणें नूहा रें दिन थै, तिणी

ई आदमी रें छोहरु रौ आशणौ भी हुआ सा। 38 कैलैकि जिणौ पाणी रें विनाशा कौरा पैहलें रें दिना दी, जेबी झाऊं कि नूह जाहजा दी नाई डैओ, सेजे दिनें झाऊं लोग खा-पिया थै, और और तिऊं मांझिए शदी ब्याए औआ थै। 39 और जेबी झाऊं पाणी रें विनाशा आशीयो सैं सारें बौआइयो नाई नियें, तेबी झाऊं तिऊंके कुछ भी सौमझिए नाई आशौ; तिणी ई आदमी रें छोहरु रौ आशणौ भी हुआ आ। 40 सेजे दिनें दी जो लोग डोखरें दी हुआई, एक नियाई पोरु दुजौ छाड़ाई तिदै। 41 दुई छेउडी जाँजे पिशदै रौआई, एक पोरु निया लै और दुजी छाड़ा लै तिदै। 42 ऐथली ऊजी रौओ, कैलैकि तुमै नाई जाणदें कि तुमारी प्रभु केजे दिना दी आशा सा। 43 पर इणौ जाणौ कि अगर घौरा रौ मालिक जाणदौ औलौ कि चोर केजे बोग्तें आशाई ता ऊजी रौआ थौ, और आपणें घौरा दी चोरी कौरणें नाई देया थौ। 44 एथिलें तुमै भी तैयार रौओ, कैलैकि जेजे बोग्तें रें बारें दी तुमै सुचदै नाई, सेजे बोग्तें आदमी रौ छोहरु आशा सा।

विश्वासा वालौ दास और दुष्ट दास

(लूका12:41-48)

45 "तैबे सेऊ विश्वासवालौ दास और बुद्धी वालौ दास कुण आ, जो मालिकें आपणें नुकरा-चाकरा रौ मुख्यौ चाणौ कि सेऊ बोग्त दी तिउलें रोटी दिआ? 46 भौलौ आ सेऊ दास, जो तेसरौ मालिक आशीयो इणौ कौरदै तेस देखा लौ। 47 हाऊं तुमुलें सौचूचौ बोलाऊ, "सेऊ मालिक आपणें तेस दासा कें आपणी सारी धन-जयदादा सौम्भालनै रौ हक दिआ सा। 48 अगर सेऊ दास सुंचा लौ कि मरौ मालिक ता कुछ दिना झाऊं वापिस ना आशदौ, 49 और दुजे नुकरा लै दुख दैणौ शुरु कौरा लौ, और आपुलें खाणें पिणें रौ इन्तजाम कौरा लौ और सूर पिआ लौ। 50 ता तेसरौ मालिक बिण बोली तेबी आशा जेबी तेसरौ सुंचौ औन्दौ भी नाई औलौ। 51 तैबे सेऊ मालिक तेस नुकरा लै सजा दिया और अविश्वासिऊ मांझिए भेजा : तिरें लेरनौ और दांद पिशाणौ हुआई।

दस बिण ब्याई छोटुडी रौ औनेणौ

25 "सौरगा रौ राज तिरुं दस बिण ब्याई छोटुडी जिणौ हुआ जो आपणें मशाल लालटेण निइयो लाडे कु मिलदै डेई। 2 तिऊं मांझिए पाँज मूर्ख और पाँज समझदार थी। 3 मूर्ख आपणी मशाल लालटेण ता नि ई, पर आपुकें तेल नाई निओ; 4 पर समझदार आपणें मशाल लालटेणा आइलें आपणी कुप्पी दी तेल भी भौरी गौ। 5 जेबे लाडें रें आशणें दी बेर हुई, ता सैं सारें दुइणी लाइदै लागी और सुती गोई। 6 "जेबी राच आधी हुई ता धूम माची : 'शुणौ, लाडौ आशदै लागौ औन्दौ आ! तेस मिलदै चालौ।' 7 तैबे सैं दस बिण ब्याई छोटुडी उठीयो आपणें मशाल ठीक कौरदै लागी। 8 और मूर्ख छोटुडीउरें समझदारा लै बोलौ, 'आपणें तेला मांझिआ कु कुछ तेल आमु कें भी दैओ, कैलैकि आमारी मशाल इशदै आ लागी ऐन्दी। 9 पर समझदारें जवाब दैओ, 'पर एक आमुलें और तुमुलें पूरौ नाई औन्दौ; तुमुलें ठीक आ कि तुमै बेचणें वालेऊ काए डैओ और आपु कालें तेल आणौ।' 10 जेबी सैं तेला आणदै डेउदें थी लागी औन्दी ता लाडौ पौउंची गौ, और जो त्यार थी, सैं तेस आइलें शदी रें घौरा दी डेई गोई और दार बौन्द की ऐरौ। 11 तेत बासिए सैं दुजी पाँज बिण ब्याई आशीयो बोलदै लागी, 'ओ मालिक, ओ मालिक, आमुलें दार खोला!' 12 तिणीए जवाब दैओ, 'हाऊं तुमुलें सौचूचौ बोलाऊ, हाऊं तुमु नाई जाणदौ।' 13 एथीलें ऊजी रौओ, कैलैकि तुमै ना सेजे दिन जाणदें, ना सेजे बोग्त जाणदें।

तोडें रौ औनेणौ

(लूका19:11-27)

14 कैलैकि ऐऊ तेस आदमी जिणी हालत आ जुण परदेशा लै डेउणें रें बोग्तें आपणें नुकर औटाए आपणी जायदाद तिउके देई। 15 तिणीए एकी कें पाँज शर्फी, दुजे कें दुई शर्फी, चीजे कें एक शर्फी देई; तिणीए हर एकी लै तेसरें ताकती रें अनुसार दैओ, और आपु डेई गौ दुजे देशा लै। 16 तैबे, जासकें पाँज तोडे मिलें औन्दें थै, तिणीए खरकचार डेईओ तिरुं लेण-देण

किओ, और तिणीए पांज शर्फी औजौ कोमाई। 17 इणी ई तिणी दुजै नुकरै भी जासकै दुई शर्फी मिली औन्दी थी, दुई शर्फी औजौ कोमाई। 18 पर जासकै एक मिली औन्दी थी, तिणीए डेइओ माटौ खोदौ, और आपणै मालिका री शर्फी दाबी गोई। 19 "भौरी दिनें बासीए तिउं नुकरा रौ मालिक आशौ और तिउंकें लेण-देणा रै बारै दी पुछ्दै लागौ। 20 जासकै पांज शर्फी मिली औन्दी थी, तिणीए पांज शर्फी आणीओ बोलौ, 'ओ मालिक, ताइए मुकै पांज शर्फी देई औन्दी थी, देख, मुंइए पांज औजौ कोमाई।' 21 तेसरै मालिकै तेसलै बोलौ, 'शाबाश, ओ आच्छौ और विश्वासा रै लायक नुकर, तू थोड़ै दी विश्वासा वालौ निकलौ; हाऊं ताऊं भौरी चीजा रौ मालिक चाणाऊ। आपणै मालिका री खुशी दी खुश रौऊ। 22 "और जासलै दुई शर्फी मिली औन्दी थी, तिणीए भी आशीयौ बोलौ, "ओ मालिक, ताइए मुकै दुई शर्फी देई औन्दी थी, देख, मुंइए दुई औजौ कोमाई।" 23 तिणीए मालिकै तेसलै बोलौ, 'शाबाश, ओ आच्छौ और विश्वासा वालौ नुकर, तू थोड़ै दी विश्वासा वालौ निकलौ; हाऊं ताऊं भौरी चीजेउ रौ मालिक चाणाऊ। आपणै मालिका री खुशी दी खुश रौऊ।" 24 "तैबै जासकै एक शर्फी थी मिली औन्दी, तिणीए आशीयौ बोलौ, "ओ मालिक, हाऊं जाणाउ कि तू काठौ आदमी ई : जिऐ तू नाई बौइंदौ तेस भी तू लौआ ई, जिऐ तैरौ नाई आ तिवरु भी तू निआई। 25 हाऊं डौरी गौ थौ और डेइओ तेरी शर्फी माटै थाली दाबी गोई। शुण, जो तैरौ आ, सेऊ इदँ आ।" एथीलै 26 तेसरै मालिकै तेसलै जवाब दैओ, "ओ दुष्ट और निकामौ नुकर, जैबै तू जाणा थौ कि जिऐ हाऊं नाई बौइंदौ तिऐ हाऊं लौआऊ, और जिऐ मैरौ नाई आ तिवरौ हाऊं चुंगाऊ; 27 ता ताएँ मेरी शर्फी ब्याजा माथै कैलै ना देई ताकि जेबी हाऊं आशा थौ ता तेबी सित ब्याजै निआ थौ। 28 एथीलै इयँ शर्फी एसकु ओरु छुड़ाओ, और जासकै दस शर्फी मुहरै ई, तेसकै दैओ। 29 कैलैकि जासकै आसती आ और सेऊ ठीक डौंगा रौ बौरता लौ तेसकै औजौ मिला। जुण ठीक डौंगा रौ ना बौरता लौ तेसकु सेऊ भी ओरु निर्ईआ सा जो तेसकै औलौ। 30 और एस निकाम्मौ नुकर बाइरै न्यारै दी पाओ, जिऐ लेरनो और दांद पीशणौ हुआ आ।

फैसलै रौ दिन

31 "जेबी आदमी रौ छोहर आपणी महिमा दी आशा लौ और सब सौरगा रै दूत तेस आइलै आशाई, ता सेऊ आपणी महिमा रै जागहा माथै बोशौ औन्दी हुआ। 32 और सारी ज्ञाती तेस काए कौठी कौराई; और जिणौ भेरालडु भेरी बाकरी कु औलग कौरा ई, तिणी ई सेऊ भी तिउं एकी दुजै कु औलग कौरा सा। 33 सेऊ भेरी आपणी सुलटी भिलै और बाकरी उलटी भिलै खौड़ौ कौरा सा। 34 तैबै राजौ जो आपणी सुलटी भिलै आ तिउंलै बोला लौ, 'ओ मैरे बाबा रै भौलै छोटी छोहरुओ, आशौ, तेस राज्या रै हिसेदार बोणौ, जो दुनिया रै पैहलै कु तुमुलै त्यार किओ औन्दी आ। 35 कैलैकि हाऊं भूखौ थौ, तुमुए मुलै खाणा लै दैओ; हाऊं चिशौ थौ, और तुमुए मुलै पिणा लै पाणी दैओ; हाऊं परदेसी थौ, और तुमुए हाऊं आपणै घौरा दी छाड़ौ; 36 हाऊं नांगौ थौ, तुमुए मुकालै भिडना लै जुडकै दै; हाऊं बिमार थौ, और तुमुए हाऊं पुछौ, हाऊं कैदा दी थौ, तुमै मुकारे मिलदँ आशौ।' 37 "तैबै धौमी लोग तेसलै जवाब दिआलै, 'ओ प्रभु, आमुए केबी तू भूखौ देखौ और खिलाओ? या केबी तू आमुए चिशौ देखौ और पाणी पिलाओ? 38 आमुए केबी तू परदेसी देखौ और केबी आमुए तू आपणै घौरा दी छाड़ौ? या केबी तू नांगौ थौ और केबी ताउंकें जुडकै भिडारे? 39 आमुए केबी तू बिमार और कैदा दी देखौ और केबी ताऊं काए मिलदँ आशौ?' 40 तैबै राजौ तिउंलै जवाब दिआ, "हाऊं तुमुलै सौच्यौ बोलाऊ कि तुमुए जो इऊं छोटे कु छोटे भाइऊ माझिऊ कास एकी आइलै किओ, सेऊ इ मू आइलै कियो।" 41 "तैबै सेऊ आपणी जो उलटी भिलै इ बोशालै औन्दी तिउंलै बोला, 'ओ शापित लोगुओ, मुं काए कु तिऐ सदा री आगी मांझीए डैओ, जो शैतान और तेसरै सारे दूता लै आ त्यार की ऐन्दी। 42 कैलैकि हाऊं भूखौ थौ और तुमुए मुलै खाणा लै नाई दैओ; हाऊं चिशौ थौ, और तुमुए मुलै पिणा लै पाणी नाई दैओ; 43 हाऊं परदेसी थौ, और तुमुए हाऊं आपणै घौरा दी नाई छाड़ौ; हाऊं नांगौ थौ, और तुमुए मुलै भिडनै लै जुडकै नाई दैणै; हाऊं बीमार और कैदा दी थौ, और तुमुए हाऊं नाई पुछौ।" 44 "तैबै सै जवाब दिआ लै, "ओ प्रभु, आमुए तू केबी भूखौ, या चीशौ, या

परदेसी, या नांगौ, या बीमार, या कैदा दी देखौ आ, और तेरी सेवा टहल नाई की?" 45 तैबै सेऊ तिउंलै जवाब दिआ, 'हाऊं तुमुलै सौच्यौ बोलाऊ कि तुमुए जो इऊं छोटे कु छोटे मांझीआ कु कास एकी आइलै भी नाई किओ, सेऊ मुं आइलै भी नाई कियो।' 46 और इऊंलै सौदा री जीन्दगी झाऊं सजा मिला सा, पर धौमी सौदा री जीन्दगी दी डेआई।"

यीशु रै बिरोधा दी यीशु पकुडना लै चाल

(मरकुस14:1,2; लूका22:1,2; यूहन्ना11:45-53)

26 जैबै यीशुए सब बुशै बोली एरी ता आपणै चेलैऊ लै बोलदँ लागौ, 2 "तुमै जाण ई कि दुई दिनें बासिए बिण संजेडे री रोटी रौ साजौ आ, और आदमी रौ छोहरु कूसा माथै चडावणा लै पकडावा ई।" 3 तैबै परधान याजक और प्रजा रै लोग काइफा नावां रै बौडै याजका रै खौलै दी कौठै हुऐ, 4 और आपु माझिऐ चौपडिंदै लागै कि यीशु चलाकी कोरिए पाकडिओ पोरु झांगी। 5 पर सै बोला थै, "साजै रै दिना दी नाई पाकुडदँ, किये इणौ ना चाई हुओ कि भीडा रै लोग मौचावा लै हालौ।

बैतनिय्याह दी यीशु रोटी खांदै

(मरकुस14:3-9; यूहन्ना12:1-8)

6 जेबी यीशु बैतनिय्याह दी शमौन कोद्री रै घौरा दी थौ, 7 ता एक छेउडी संगमरमरा री शीशी दी भौरी किमती तेल आणीयौ यीशु काए आशी, और जैबै यीशु रोटी खांदै थै बोशौ औन्दी ता सेऊ तेल यीशु रै मूडा तौलै पेरौ। 8 इणै देखीए यीशु रै चेलै रोशुए और बोलदँ लागै, "इओ मैहगो तेल बर्बाद कैलै कियो औलौ? 9 एस तेल ता आच्छे दामा दी बेचियौ एथरै रुपाए गरीब लोगु दी बांटणै चाई थै।" 10 इणौ जाणीओ यीशुए तिउंलै बोलौ, "तुमै इयँ छेउडी लै कैलै रोशीआई? इयँ छेउडीए मेरी भौलाई लै कियो आ। 11 गरीब लोग ता तुमु आइलै सौदा रौआ ई, पर हाऊं तुमु आइलै सौदा नाई रौइंदौ। 12 इयँ छेउडीए मैरै मूडा दी खुशबुदार तेल पेरौ आ, सेऊ मैरै दबाउणा लै कियो आ। 13 हाऊं तुमुलै सौच्यौ बोलाऊ, "पूरी दुनिया दी जिऐ-जिऐ परमेश्वर रै खुशी रौ संदेश शुणावा लै, तिऐ-तिऐ इयँ छेउडी रै कामा री बूशै भी हुआ ई।"

यहूदा इस्करियोती रौ विश्वासाघात

(मरकुस14:10,11 लूका22:3-6)

14 तैबै यहूदा इस्करियोतीए, जो बारह चेलैऊ माझिआ कु एक थौ, सेऊ बौडै याजकू काए डेईयौ बोलदँ लागौ, 15 "अगर हाऊं यीशु तुमारै हाथा दी पकडवाऊ लै ता तुमै का दिआ ई?" तिउंए तेसलै तीस चांदी रै सिक्के तोलीए देई गौए। 16 और सेऊ तेभी कु यीशु पकडाउणा री ताकी दी रौ।

चेलेउ आइलै आखरी बार साजै री रोटी खाणी

(मरकुस14:12-21; लूका22:7-13,21-23; यूहन्ना13:21-30)

17 तैबै बिणा संजेडे री रोटी रै पैहलै दिनें, चेलै यीशु काए आशीयौ पुछ्दै लागै, "तुमै किये चाहा ई कि आमै साजै री रोटी रौ इन्तजाम कौरी? 18 यीशुए तिउंलै बोलौ, "शहरा दी फलाणै आदमी काए डेईयौ तेसलै बोलौ, "गुरु जी बोला ई कि मैरौ बौग्त नजदीक आ। हाऊं आपणै चेलै आइलै तैरै घौरा दी साजौ मनाऊ।" 19 तैबै चेलेउए यीशु रौ हुकम मानौ और फसह री रोटी त्यार की। 20 जेबी ब्याल हई ता यीशु बारह चेलैऊ आइलै रोटी खान्दँ बौशौ। 21 जेबी सै रोटी खान्दँ लागै औन्दी थै ता यीशुए तिउंलै बोलौ, "हाऊं तुमुलै सौच्यौ बोलाओ कि तुमु मांझिये एक आ जो मू पकडावा ई।" 22 इणौ शुणियो सै भौरी परेशान हुऐ, और हर एक यीशु कु पुछ्दै लागै, 'ओ गुरु जी, का सेऊ हाऊं ऊ?" 23 यीशुए जवाब दैओ, "जुणिये मू आइलै थाली दी हाथ पाओ आ, सेऊ ई मू पकडावा। 24 आदमी रौ छोहरु ता जिणौ तेसरै बारै दी लिखी औन्दी आ, मैरौ मौरणौ ता इणी भी आ; पर तेस आदमी लै फिटकार आ जासरै जरीए आदमी रौ छोहरु पकडावाइआ: तेस आदमी लै तैबै आच्छे थौ कि तेसरौ जन्मा ना हुआ थौ।" 25 तैबै यीशु पाकुडनै वालै यहूद बोलौ, "ओ रब्बी, का सेऊ हाऊं ऊ?" यीशुए तेसलै बोलौ, "ताइयँ बोली गौ।"

प्रभू भोज

(मरकुस 14:22-26; लूका 22:14-20 और 1 कुरिन्थियों 11:23-25)

26 जेबी सैं रोटी खान्दै थै लागै औन्दै ता यीशुए रोटी चुंगी, और परमेश्वरा रौ धन्यावाद कौरीयो चोड़ी और चेलैऊ लै देईयो बोलौ, "नियौ, खाओ; इऔ मैरौ जीसम आ।" 27 तैबै यीशुए अंगूरा रौ खोर चुंगीयो परमेश्वरा रौ धन्यावाद कियो, और तिउंलै देईयो बोलौ, "तुमै सब एथकु पीओ, 28 कैलैकि एस अंगूरा रौ रस तुमै मैरौ लोख सौमझौ जो भौरी लोगू तिउरै पापा री सजा कु बचाउणा लै बौइणै वालो आ। मैरै मौरने कु परमेश्वर लोगू आइलै एक नौवौ रिशतै रो वाइदो पाकौ कौरा आ। 29 हाऊं तुमुलै सौचचौ बोलाऊ कि अंगूरा रौ एऊ रस सेजे दिना झाऊं केबी नाई पिदो, जेबी झाऊं तुमु आइलै आपणै बाबा रै राजा दी नौऊंओ नाई पीऊ।" 30 तैबै सैं भजन गाइयो जैतूना री पहाड़ी माथे डै।

पतरसा रै मुकरना री भविष्यवाणी

(मरकुस 14:27-31; लूका 22:31-34; यूहन्ना 13:36-38)

31 तैबै यीशुए तिउंलै बोलौ, "तुमै सारै आज राची मैरै बारै दी ठोकुर खाआई, कैलैकि लिखौ औन्दै आ : 'हाऊं भेरालडु झांगा ऊ, और शाला री भेरी ओरु-पोरु भागा ई।" 32 पर हाऊं जीउंदो हुइयो तुमु कु अगाडिरे गलीला लै डेआऊ।" 33 एथ माथे पतरसै यीशु लै बोलौ, "अगर सारै विश्वासा दी डगमगा लै, पर मैरौ विश्वास केबी नाई डगमगाऊदो।" 34 यीशुए तेसलै बोलौ, "हाऊं ताउंलै सौचचौ बोलाऊ कि आज राची कुखडै रै बाशणै कु पैहलै, आपणै मुंआ कु चिआ बारै बोला ई कि तू मुं नाई जाणदौ।" 35 पतरसै यीशु लै बोलौ, "चाऊं मुं ताऊं आइलै मौरनौ भी जा लौ, तैबै भी हाऊं केबी ना बोलदौ कि हाऊं तुमु नाई जाणदौ।" और सारै चेलै इणौ लागै बोलदै।

गतसमनी दी प्राथना

(मरकुस 14:32-42; लूका 22:39-46)

36 तैबै यीशु आपणै चेलै आइलै गतसमनी नाऊं री जागहा दी आशौ और आपणै चेलै लै बोलदै लागौ, "तुमै इदैं बोशी रौएऊ, जेबी झाऊं हाऊं प्राथना करुलै।" 37 यीशुए पतरस और जब्दी रै दुई छोहरु आपू आइलै नियै, और यीशु भौरी दुखी और घबराऊंदै लागौ। 38 तैबै यीशुए तिउंलै बोलौ, "मैरौ जीऊ भौरी दुखी आ, इदरा झाऊं कि मैरै प्राण डेउणै वालै ई। तुमै इदैं ई रुकौ और मुं आइलै ऊजी रौएऊ।" 39 तैबै यीशु आगुडै डेइयो धौनी जबीना माथे मूंडा लाइयो पौडो, और प्राथना कौरदै लागौ, "ओ मैरौ बाब, अगर तू चाहा ता एस दुखा रौ खोर पोरु टाल, तैबै भी जिणौ हाऊं चाहा ऊ तिणौ नाई, पर जिणौ तू चाहा ई तिणौ चाई हुओ।" 40 तैबै यीशु आपणै चेलैऊ कारे आशीओ देखे ता सैं थै सुतै औन्दै तैबै यीशुए पतरसा लै बोलौ, "का तुमै एकी घोड़ीयै भी ना ऊजी रौई बोलै? 41 ऊजी रौएऊ, और प्राथना कौरदैं रौओ कि तुमै मुसीबता दी नाई चाई पौडै।" 42 तैबै यीशुए दुजी बारै डेइयो इणी प्राथना कौरी, "ओ मैरौ बाब, अगर एऊ मैरै पीयै बिणा नाई टौली सौकौ ता तेरी इच्छा चाई पूरी हुई।" 43 तैबै यीशु दुजी बारै आशौ तेभी भी सैं सुतै औन्दै थै, कैलैकि तिउकै भौरी नीज थी लागी औन्दी। 44 तिउं छाडीयो यीशु औजौ चिजी बारै प्राथना कौरना लै डैओ। 45 तैबै यीशुए चेलैऊ कारे आशीयो बोलौ, "आबै सुती रौएऊ, और आराम कौरौ : देखौ सेऊ बौग्त आशी ऐरो आ, और आदमी रौ छोहरु पापी लोगू रै हाथा दी पकड़ाउणै वालौ ऊ। 46 उठौ! औगाऊं आण्डो; देखौ, मुं पकड़ाउणै वालौ आशी गौ आ।"

यीशु धोखे दी पाकुड़नौ

(मरकुस 14:43-50; लूका 22:47-53; यूहन्ना 18:3-12)

47 यीशु इणौ बोलदैं थौ लागौ औन्दै कि यहूदा जो बारह चेलैऊ माझिऊ कु एक थौ सेऊ आशौ, और तेस आइलै एक भौरी भीड़ भी थी जासकै तलवारै और डिगै थै। सैं भीड़ बौडै याजक, यहूदा शास्त्री और स्याणै लोगूरे भेजी औन्दी थी, यीशु पाकुड़णालै। 48 यहूदैं पैहलै बोलौ औन्दै थौ कि, "जास हाऊं खोबीयाऊलौ सेऊ ई आ; तेस पाकड़ऊ।" 49 और सेऊ

खरकचार यीशु कारे आशौ और बोलौ, "ओ गुरु जी, ढाल!" और यीशु भौरी खोबीयाओ।

बौडी खुम्बली कारे यीशु

(मरकुस 14:53-65; लूका 22:54,55, 63-71; यूहन्ना 18:13,14,19-24)

50 यीशुए तेसलै बोलौ, "ओ गोश्टण, जेजे कामा लै तू आशौ थौ, तेस कौर।" तैबै तिउं लोगूए आगुडै आशियो यीशु पाकड़ौ। 51 यीशु रै चेलैऊ माझिरे कु एकीयै आपणी तलवार गाडी और परधान याजका रै नुकरा रौ कौथु पोरु पा काटौ। 52 तैबै यीशुए तेसलै बोलौ, "आपणी तलवार म्याना दी छाड़ कैलैकि जो तलवार चलावा ई सैं सारै तलवारा कौरै नाष हुआई। 53 का तू नाई जाणदौ कि हाऊं आपणै बाबा कु औरज कौरी सौका ऊ, और सौ सौरगा रै दूता री बारह पलटणा कु भौरी मुं कारे इभी भेजी सौका? 54 पर धर्मशास्त्रा री सैं बुशै कि इणौ ई हुणौ जरुरी आ, किणै कौरी पूरी हुआई?" 55 सेजे बौग्तै यीशुए भीड़ा रै लोगू लै बोलौ, "का तुमै तलवारी और डिगै कोरिरे ई आशौ औन्दै। का तुमै मुं डाकू समझाई? हाऊं हर दिन परमेश्वरा रै घौरा दी बोशीयो तुमुलै शिक्षा दिआ थौ, और तुमुए हाऊं नाई पाकड़ौ। 56 पर एऊ सब एथीलै हुओ आ ताकी पुराणै गुरु रौ सेऊ वचन पुरौ हुआ।" तैबै सारै चेलै तेस छाडीयो भागी गोरै। 57 तैबै तिउं यीशु पाकड़ीयो बौडै याजका रै घौरा दी नियौ। तिये सारै शास्त्री और स्याणै लोग कौठे थै हुए औन्दै। 58 पतरस यीशु पिछू दूर-दूर आण्डियो बौडै याजका रै गौडै झाऊं डैओ, पतरस तिरे चोउकोदारु कारे बोशियो आगी तापदें लागौ। 59 बौडै याजक और सारै यहूदी फेसलै कौरनै वाली खुम्बली रै लोग चाह थै कि कोई यीशु रै विरोधा दी गवाई दिआ थै, 60 पर भौरी लोग यीशु रै विरोधा दी गवाई दैदें लागे पर तिउंरी बुशै आपू माँझियै नाई मिला थी। बासियै दुई जौणै गवाई दैदें आशौ, 61 और बोलदैं लागे, "आमुए शुणौ ई कि इयो यीशु बोला कि हाऊं परमेश्वरा रौ घौर ढाली सौका ऊ और चिया दिना दी चाणाऊ।" 62 तैबै बौडै याजकै खौडै हुइयो यीशु लै बोलौ, "का तू कोई जवाब नाई दैदो? इये लोग तैरै बारै दी का गवाई दिआ ई? 63 पर यीशु चुटक थाकौ। तैबै बौडै याजकै यीशु लै बोलौ, "हाऊं ताउंलै जीऊंदै परमेश्वरा री कौसम दिआऊ कि अगर तू परमेश्वरा रौ छोहरु मसीह ई, ता आमूलै बोल।" 64 यीशुए तेसलै बोलौ, "ताइरे आपू ई बोली गौ; पर हाऊं तुमु लै इणौ भी बोलाऊ कि इबी कु तुमै आदमी रौ छोहरु जो सौभी कु शक्तिवालै परमेश्वरा री सुलटी भीलै बोशै, और सौरगा रै बादला माथे आशदें दैखाई।" 65 एथ माथे बौडै याजकै आपणै जुडकै चीरै और बोलौ, "इणीयै परमेश्वरा री बुराई कौरी आ, आबै आमुकै कासी री गवाई री जरुरत नाई? शुणौ, तुमुए इबी एजी बुराई शुणी आ। 66 तुमै का सुंचाई?" सारै लोग बोलदैं लागे यीशु लै मौरणै री सजा चाई मिली।" 67 तैबै तिउं यीशु रै मुंआ दी थुकौ और यीशु पीटदैं लागे, दुजे लोगूरे यीशु दी थापै लाई और बोलदैं लागे, 68 "ओ मसीह, अगर तू गुरु ई ता बोल ताउंदी कुणिए लाई?"

पतरसा रौ इन्कार

(मरकुस 14:66-72; लूका 22:56-62; यूहन्ना 18: 15-18, 25-27)

69 पतरस बाइरी भिलै खौलै दी थौ बोशौ औन्दै तैबै परधान याजका री एक नुकराण तेस काई आशी और तेसलै बोलौ, "तू भी तेस यीशु गलीली आइलै थौ।" 70 तिणीए सौभी कारे इणौ बोलीयो इन्कार कियो, "हाऊं नाई जाणदौ तू का ई लागी औन्दी बोलदैं।" 71 जेबी पतरस बाइरै डैओ, ता दुजी नुकराणीयै पतरस देखियो तिउं लोगू लै बोलौ जो तिरे थै, "इओ भी ता यीशु नासरी आइलै थौ।" 72 पतरस कौसम खाइयो औजौ मुकरौ : "हाऊं तेस आदमी नाई जाणदौ।" 73 दख बौगता बासियै तिरे जो लोग खौडै थै, तिउं पतरसा लै बोलौ, "पाकौ तू भी तिउं माँझिआ कु एक ई, कैलैकि तेरी बोली तैरौ राज खोला सा।" 74 तैबै पतरस कौसमा खादें लागौ ; "हाऊं तेस आदमी बिल्कुल भी नाई जाणदौ।" और खरकचार कुखडो बाशौ। 75 तैबै पतरसा कै सैं बुशै याद आशी गौई जो यीशुए तेसलै बोली थी : "कुखडै री बाचा दैणे कु पैहले चिया बारै तू मैरौ इन्कार कौरा ई।" और सेऊ बाइरै डेइयो डीकरी-डीकरीयो लेरदैं लागौ।

आइलें यीशु रौं पैहरौ दैदें थें लागें औन्दें, तिउंरें भूंचाल और जो कुछ हुआ थो इणो देखीयो भौरी डौरी गोए और तिउंरें बोलौ, “सौचची इयो आदमी परमेश्वरा रौं छोहरु थौ!” 55 तिऐ भौरी छेउडी जो गलीला कु यीशु री सेवा कौरदें बारें तेस आइलें आशी थी, सैं दूरा कु थी लागी औन्दी देखदें। 56 तिउंरें मांझिऐ मरियम मगदलीनी, याकूब और योसेसा री मां मरियम, और जब्दी रैं छोहरु री मां थी।

यीशु ओडाची दी छाड़नौ

(मरकुस15:42-47; लूका23:50-56; यूहन्ना19:38-4)

57 जैबें ब्याल हुई ता यूसुफ नावा रौं जो अरिमतिया रौं एक सेठ आदमी, जो आपू ई यीशु रौं चैलें थो, सेऊ आशौ। 58 तिणीऐ पिलातुसा कु यीशु रौं मोड़ौ मांगौ। एथ माथें पिलातुसैं यीशु रौं मोड़ौ निणें दैऔ। 59 यूसुफे मोड़ौ नियौ, यीशु रौं मोड़ौ मखमला री चादरी दी मेटौ, 60 और सेऊ मोड़ौ आपणी नौई ओडाची दी छाड़ौ, जो तिणीऐ ढोके दी थी काटियो चाणी औन्दी, और ओडाची दी एक बौड़ें पात्थरा कौरिऐ बन्द कौरिऐ डेई गौ। 61 मरियम मगदलीनी और दुजी मरियम, दुइया तिऐ ओडाची कारे बोशी औन्दी थी।

ओडाची दी पैहरौ

62 दुजै दिनें जो त्यारी रैं दिना बासिऐ रैं दिन थो, बौड़ें याजक और फरीसिउरें पिलातुसा कारे कौठे हूइयो बोलौ, 63 “ओ महाराज, आमुकें याद आ तिणी भरमाणें वालें जेबी सौं जीऊंदौ थो, तिणीऐ बोलौ थो, ‘हाऊं चीजें दिना बासिऐ जीऊंदौ हुआऊ।’ 64 तैबें हुकम दैऔ कि चीजें दिना झाऊं ओडाची री चोकसी हुआ, इणो ना चाई हुआ कि तेसरें चैलें आशीयो तेस चोरीये निया लें पोरु, और लोगु लें बोलदें लागलें, ‘सेऊ मौरें औन्दें मांझिऊ कु जीऊंदौ हुई ऐरौ आ।’ तैबें पिछलौ धोखौ पैहलें कु भी बुरौ हुआ सा।” 65 पिलातुसैं तिउंलें बोलौ, “तुमकें पैहरुदार ता आसा ई, डैऔ, आपणी सौमझी कौरें चोकसी कौरौ।” 66 तैबें सैं पैहरुदार आपू आइलें नियें, और पात्थरा माथें मोहर लाइऔ ओडाची री चोकसी की।

यीशु रौं दूजी बारें जिऊंदौ हुणौ

(मरकुस16:1-10; लूका24:1-12; यूहन्ना20:1-10)

28 आरामा रैं दिना बासिऐ होपतें रैं पैहलें दिनें दोउती कांडें प्याशिदें ई मरियम मगदलीनी और दुजी मरियम ओडाची देखदें आशी। 2 और देखौ, एक भौड़ौ भूइचल आशौ, कैलैकि प्रभु रौं एक दूत सौरगा कु उतरौ और तिऐ आशीयो सेऊ पात्थर तिदरा कु पोरु घिसराऔ, और तेथ माथें

बौशी गौ। 3 तेस दूतें रौं रुप बिजली जिणौ और तेसरें जुड़कें चोमकिलें थें। 4 तेसरें डौरा कु पैहरुदार कांम्बदें लागें, और मौरें औन्दें जिणें हुई गोए। 5 सौरगा रैं दूतें तिउंरें छोऊंडी लें बोलौ, “नाई डौरौ, हाऊं ज़ाणाऊ कि तुमैं यीशु लोडादें ई लागें औन्दें जो क्रूसा माथें थो चडाऔ औन्दौ। 6 सेऊ इदें नाई आ, पर तेसरें वचना रैं अनुसार जीऊंदौ हुई ऐरौ आ। आशौ, इयां ज़ागाहा देखौ, जीयें प्रभु थो छाड़ौ औन्दौ, 7 और तुमैं फेटी डैऔ यीशु रैं चैलेंउलें बोलौ कि यीशु मौरें औन्दें मांझिआ कु जीऊंदौ हुई ऐरौ आ, और सेऊ तुमुकु पैहलें गलीला दी डेइ ऐरौ सा, तिऐ तुमैं तेस देखा ई! शुणौ, मुंईऐ तुमुलें बोलौ ऐरौ आ।” 8 सैं घबराइयो और बोडी खुशी आइलें तिदरा कु फेटी डेइयो तेसरें चैलेऊ लें एजी बुशें बोलणा लें दौडी गोई। 9 तैबें यीशु तिउंके मिलौ। और बोलौ, “ढाल।” तिउंरें यीशु कारे आशीयो और तेसरें लात पाकडीयो ढाल की। 10 तैबें यीशुऐ तिउंलें बोलौ, “नाई डौरौ; मेरें भाईऊ कें डेइयो बोलौ कि गलीला लें डैऔ, तिऐ मुं देखालें”

पैहरें देणें वालें खौबर

11 सैं डेउंदें ही थें लागें औन्दें कि पैहरुदारें मांझिऊ कु कुछें इलाकें दी आशीयो पूरौ हाल बौड़ें याजकें कें शुणाऔ। 12 तैबें तिउंरें स्याणें गुरु आइलें कौठें हूइयो चोपडुरे और सिपाईऊ लें भौरी चांदी देइयो बोलौ, 13 “इणो बोलणौ कि राची जैबें आमैं सुतें औन्दें थें, ता तेसरें चैलेंऊरें सेऊ चोरिऐ नियौ। 14 और अगर ऐजी बुशें पिलातुस हाकिमा रैं काना झाऊं पौउंचाली, ता आमैं तेस सौमझाई और आमैं तुमु मुश्केला कु बौचाई।” 15 तैबें तिउंरें रुपाऐ देइयो जिणौ तिउंके शीखाऔ औन्दौ थो, तिणी ई कियो। एजी बुशें आज्ञा झाऊं यहूदिऊ दी मशूर आ।

यीशु दिशणौ और यीशु मसीहा री आखरी आज्ञा

(मरकुस16:14-18; लूका24:36-49; यूहन्ना20:19-23; प्रेरितों के काम1:6-8)

16 म्यारह चैलें गलीला री तियां टिरा माथें डेवें, जो यीशुऐ तिउंके बोलौ थो। 17 तिउंरें यीशु देखीयो तेसलें ढाल की, पर कोइयें तेस माथें विश्वास नाई कियो 18 यीशुऐ तिउंरें कारे आशीयो बोलौ, “सौरग और धौतरी रौं सारौ हक मुंके आ दैऔ औन्दौ। 19 एथीलें तुमैं डैऔ, सारी ज़ाति रैं लोगु चैलें चाणौ; और तिउंलें बाब, और छोहरु, और पवित्र आत्मा रैं नावां कौरौ बसिस्मौ दैऔ, 20 और तिउंके सारी बुशें जो मुंईऐ तुमुलें हुकम दैऔ आ, मानणौ शिखाऔ : और शुणौ, हाऊं दुनिया रैं आखरी झाऊं तुमु आइलें सौदा रौंआऊ।

मरकुस

यूहन्ना बपतिसमा देणें वालें रौ प्रचार

(मती3:1-12; लूका3:1-18; यूहन्ना1:19-28)

1 एजौ खुशी रौ संदेश यीशु मसीहा रें बारें दी आ, जुण परमेश्वरा रौ छोहरु आ। एजौ खुशी रौ संदेश इणों शुरु हुआ। 2 यीशु रें संसारा दी आशणें कु पैहलें अलग-अलग गुरुएं आशणें वाले बोग्ता री बुशें कौरियौ धर्म शास्त्रा दी यीशु रें बारें दी लिखौं थौं। मलाकी गुरुएं इणों थौं लिखौं औन्दी कि परमेश्वरें आपणें छोहरु लें इणों बोलौं आ कि, “शुण! हाऊं ताऊं कु औगाडीएं आपणों एक आदमी भेजा ऊ। सेऊ ताऊं कालें बाट त्यार कौरा सा। जिणों बौडें नेतें रें स्वागता लें त्यार कौरा ई।” 3 यशयाह गुरुएं इणों थौं लिखौं औन्दी कि, “सुनसान जागहा दी एक आदमी री हाकें ई लागी औन्दी शुणिदै, “प्रभु कालें आशणा लें बाट त्यार कौरौ, जो बिल्कुल साफ और सीधी आ।” (मतलब कि आपणें-आपणें जीऊ त्यार कौरौ और आपणी-आपणी जिन्दगी सुधारौ।) 4 भौरी पैहलें जो आशणें वाले बोग्ता री बुशें हुई थी, तिणें पुरी कौरियौ एक आदमी आशौं जासरौं नाऊं यूहन्ना थौं। सेऊ यरदन नौई पारभिलें बंजर जबीना दी आशौं। और लोगू लें बोलदें लागौं कि बुरी बाटा छाडियौं मन बौदलौं और माफी पाईणें लें परमेश्वरा काएं आशौं। यूहन्ना लोगू लें बोलौं कि बपतिस्मा नियौं जो मन बदलणें री निशाणी आ। 5 सारें यहूदा परदेशा रें लोग और यरुशलैम शहरा दी रौइणें वाले सारें लोग यूहन्ना काएं आशें, और आपणें-आपणें पाप मानियौं यरदन नौई दी यूहन्ना कु बपतिस्मा नियौं। एजें कारण लोग तेसलें यूहन्ना बपतिस्मा देणें वालौं बोला थें। 6 यूहन्ना ऊंटा रें बाला रें चाणें औन्दी जुडके भिडा थौं, और कमरा दी भिडा थौं चामडा री गाची। यूहन्ना सिरफ सापा री मौउसी और जांगली मौं खा थौं। यूहन्ना रौं खाणों और भिडनौं पुराणें जमानें रें गुरु जिणों थौं। 7 यूहन्ना बोला थौं, “मू बासियें जुण आशणें वालौं आ, सेऊ एती बौडौं आ, हाऊं एस जोगी भी नाई कि धौनी झुकियौं तेसरें बुटा रें तौसमैं खोलू। 8 हाऊं दिआऊं तुमुलें पाणी कौरिऐ बपतिस्मा, पर सेऊ दिया तुमुलें परमेश्वरा री पवित्र आत्मा, ताकि सैं तुमु परमेश्वरा री बाटा दी अण्डावा।”

यीशु रौ बपतिस्मा और परीक्षा

(मती3:13; 4:11; लूका3:21,22; 4:1-13)

9 एकी दिने यीशु गलीला परदेशा रें नासरत गांवा कु आशियौं यरदन नौई काएं डैओ। तिणें यूहन्ना लोगू लें बपतिस्मा देंदें थौं लागौं औन्दी। यीशुएं भी यूहन्ना काएं डेइयौं बपतिस्मा निआँ। 10 जौणी यीशु पाणी मांझिआ कु खौडौं उठौं तिणी ई यीशुएं सौरग दुई भिलें चीरिंदें देखौं और आपू माथें परमेश्वरा री आत्मा कबुतरा रें रूपा दी उतरुदें देखी। 11 और सौरगा कु परमेश्वरा री हाक शुणुई कि, “तू मौरौं प्यारौं छोहरु ई। हाऊं ताऊं देखियौं भौरी खुश ऊ।” 12 खरकचार परमेश्वरा री आत्मैं यीशु सुनशान जागहा दी नियौं। 13 तिणें यीशु खतरनाक छोटै-छोटै जीव-जन्तु मांझिऐ चालीस दिना झाऊं रौओ। तिणें आशौं शैतान, जुण बुरी आत्माएं रौं परधान आ। शैतानें यीशु कें बूशें शुणाइयौं फसाउणों और परखुणों चाओं, पर यीशुएं तेसरी एक बूशें भी नाई मानी। तैबें सौरगा रें दूतें सौरगा कु आशियौं यीशु री सेवा कौरुदें लागौं।

यीशु रें सेवा रें कामा री शुरुआत

(मती4:12-17; लूका 4:14,15)

14 दख बोग्तें बासियें राजें हेरोदेस अंतिपासैं यूहन्ना पाकडियो जेला दी टालौं, तैबें यीशु गलील परदेशा दी आशियौं, परमेश्वरा रें खुशी रौ संदेश

शुणाउंदें लागौं। 15 यीशुएं बोलौं, “सेजौं बोग्त आशी गौं आ जेबी परमेश्वर आशियौं लोगू रें जीवा दी राज कौरा लौं। आबै इणों कौरौं, बुरी बाट छाडौं, आपणों मन बदलौं, और एस खुशी रें संदेशा माथें विश्वास कौरौं।”

झींवर औटाऊणें

(मती4:18-22; लूका5:1-11)

16 जेबी यीशु गलीला रें झीला रें डीका बाटियें थें डेउंदें लागौं औन्दी, तेबी यीशु कें शमौन और तेसरौं भाई अन्द्रियास दिशें। सैं झींवर थें। सैं थें झीला दी जाला टालदें लागें औन्दी। 17 और यीशुएं तिउंलें बोलौं; मूं पिछू आशौं; हाऊं तुमु आदमिउं पाकुडनैं वालें चाणाऊं।” 18 तैबें खरकचार तिउं दुई भाइउएं जाल छाडौं पोरु, आपू डेवें यीशु पीछु। 19 यीशु तिरुा कु दख दूर डैओ, तिणें दिशें यीशु कें जब्दी रें दुई छोहरु याकूब और यूहन्ना। सैं भी झींवर थें। सैं थें लागें औन्दी जाला गांठदें। 20 यीशुएं सैं खरकचार औटाए; तिउंए आपणों बाब छाडौं किशती दी मुंजुरदारु आइलें, और आपू डेवें यीशु पीछु।

बुरी आत्मा वालौं आदमी चांगों कौरणों

(लूका4:31-37)

21 तेत बासियें यीशु आपणें चलेऊ आइलें कफरनहूम गावां दी आशौं। तिणें आशियौं खरकचार एक धार्मिक खुंबली दी डैओ, आराम वालें दिना दी। तेत बासियें तिणें शिक्षा देंदें लागौं। 22 जेती भी लोग थें तिणें बोशें औन्दी, यीशु री शिक्षा शुणियौं सारें हैरान हुए। कैलैकि यीशु शिक्षा हका कोरिऐ दिया थौं। यीशु री शिक्षा यहूदी शास्त्री लोगू जिणी नाई थी। 23 तियां ताकें तियां धार्मिक खुंबली दी एक आदमी थौं, जासदी बुरी आत्मा थी लागी औन्दी। तेबी तिणें बुरी आत्मैं राडें मारियौं बोलौं, 24 “ओ, नासरता रें यीशु! हाऊं जाणा ऊ कि तू कूण ई। तू परमेश्वरा रौं पवित्र आदमी ई। तैरौं आमू आइलें का काम आ? का तू नाश कौरुदें ई आशौं औन्दी आ?” 25 यीशुएं तिणें बुरी आत्मा लें डांटियौं बोलौं, “तू चुटुक थाक! एस आदमी छाडियौं बाइरें निकूल।” 26 तिणें बुरी आत्मैं सेजें आदमी छाटौं-बिछौं, तेत बासियें तेस आदमी छाडियौं बाइरें निकली। 27 जेती भी तिणें लोग थें सैं हैरान हुए और आपू माजियें चौपडिंदें लागें कि “इयौं यीशु हका कोरिऐ किणी शिक्षा दिया? इदरा झाऊं कि बुरी आत्माएं भी एसरौं हुकम पोरु माना ई।” 28 यीशु रें बारें दी सारी खबर खरकचार गलील परदेशा दी आगी बाशियें फैली।

भौरी रोगिऊ ठीक कौरणें

(मती8:14-17; लूका4:38-41)

29 यीशु खरकचार धार्मिक खुंबली कु निकलियौं याकूब और यूहन्ना आइलें शमौन और अन्द्रियासा सैं घौरा दी डैओ। 30 तिणें शमौन री शाशु चाता ई बुखार कोरिऐ भौरी बिमार थी। तिउं घौरा रें लोगुएं खरकचार यीशु काएं बोलौं, “शमौना री शाशु बुखारा कोरिऐ भौरी बिमार आ।” 31 यीशु शमौना री शाशु काएं डैओ, तियांरौ हाथ पाकडौं और सैं खौडी उठाई। तियांरौ बुखार तेबी ठीक हुआ। तेत बासियें सैं तिउंरी सेवा कोरुदें लागी। 32 ब्यालकें, दिनें ओउडियौं, लोग बीमार और जासदी बुरी आत्मा थी लागी औन्दी यीशु काएं आपणें लागें। 33 गावां रें भौरी लोग शमौना रें दारा काएं भौरुएं। 34 यीशु भौरी लोग जासदी काई रौंगा री बीमारी थी लागी औन्दी चांगें कियें। और बुरी आत्मा जासदी लागी औन्दी थी तिउंकु सैं आत्माएं भी गाडी पोरु। यीशुएं बुरी आत्माएं लें बोलणें रौं कोई मौकौं ना देंओ। कैलैकि बुरी आत्माएं जाणा थी कि यीशु कुण आ।

एखुलै दी यीशु रै प्राथना कौरणी

(लूका 4:42-44)

35 तेत बासियै यीशु दोतके पौरै सुतियो उठौ। सौ बाइरै निकलियो एखुले जागह दी डेइयो तिए प्राथना कौरदै लागौ। 36 तैबै शमोन और तेसरै साथी यीशु लोडदै लागे, कि यीशु केशी डैओ औलौ। 37 तेत बासिये तिके यीशु मिलौ और सै यीशु कु बोलदै लागे कि सारै लोग ई तुमु लोडदै लागे औन्दै। 38 यीशुए तिके बोलौ, "ओरु आशौ! आमै नीजुका रै गांवा दी डेई। हाऊं दुनिया दी एथिलै ऊ आशौ औन्दौ कि लोग लै शिक्षा देई सकू।" 39 तेत बासियै यीशु गलील परदेशा री धार्मिक खुबली दी डेइओ खुशी रौ संदेश शुणाउंदै लागौ और जासदी बुरी आत्मा थी तिके बुरी आत्मा गाडदै लागौ।

कोदा वालौ आदमी ठीक कौरणी

(मती 8:1-4; लूका 5:12-16)

40 एकी दिने यीशु काए एक कोदी आशौ। सौ यीशु रै बांगणे बाँधियो औरज कौरदै लागौ, "तुमै मू चांगो कौरनै चाह लै ता हाऊं चांगो हुआ ऊ।" 41 यीशुए दया कौरियो आपणे हाथा बढ़ाइयो रौ छूओँ और तेसलै बोलौ, "हाऊं चाहा ऊ कि तू चांगो चाई हुआ।" 42 तेभी सेजो आदमी चांगो हुआ। 43 यीशुए तेसलै सख्ता ई कोरिे बोलौ, 44 "इयें बूश कासी काए ना बोलै। तू सीधौ याजका काए डेऊ। परमेश्वर आपणे सेवक मूसा रै जरीए जैजे नियम ई दैओ औन्दै, तिके अपणाइयो बली चडाऊ, ताकि याजक तैरे बारै दी लोगू काए बोला कि तू चांगो और शुद्ध हुई गोई।" 45 पर सेजो आदमी लोगू काए डेइओ इया बूशा फैलाउंदै लागो कि, "यीशुए हाऊं चांगो कियो ऊ।" एजे कारण यीशु के गांव-गांवा दी नाई डेउवौ। तैबै यीशु बंजर जबीना दी रोइदै लागौ। तेती माथे भी लोग गांव-गांवा कु यीशु काए तिए आशा थै।

अधरंगा वालौ आदमी चांगो कौरणी

(मती 9:1-8; लूका 5:17-26)

2 काई दिना बासियै यीशु कफरनहूम गावां दी वापिस आशौ। लोगुए शुणौ कि यीशु एकी घौरा दी आ। 2 तैबै तिए एतरै लोग भौरुए कि दारा काए भी जागहा नाई थी। यीशु तिके काए परमेश्वरा रै वचना शुणाउंदै लागौ औन्दौ थौ। 3 तैबै तिके चार आदमीउए चुंगियो एक इणो आदमी आपो जासके आपणे जिसमा रौ केजो भी अंग नाई हिलाइया थौ। 4 भौरी लोगू री भीडा ई तिके यीशु काए नाई पउंचुओ। एजी ताई तिके ऊपरै स्वाणे पारै चड़ियो तेस घौरा रै छापरा कु कुछ ज़ाण्डे गाड़ियो बिस्तरै रै चार कुणे दी लोउली बानियो सेजो बीमार आदमी यीशु काए धौनी उतारौ। 5 तैबै यीशु तिके चार आदमीउ रौ विश्वास देखियो बिमार आदमी लै बोलौ, "माऊं, तैरे पाप माफ हुई गोए ई।" 6 तैबै जो तिए यहूदी शास्त्री थै बोशै औन्दै, सै आपणे मौना दी गुणमुणांदै लागे कि, 7 "इयो यीशु परमेश्वरा री बुराई कौरा आ, पाप ता सिरफ परमेश्वर माफ कौरा आ सा।" 8 यीशु कु खरकचार ज़ाणुई ऐरौ कि इयै लोग आपणे-आपणे मौना दी मैरे बारे दी का ई लागे औन्दै। यीशुए तिके बोलौ, "तुमै आपणे मौना दी का ई लागे औन्दै गुणमुणांदै? 9 आसान का सा? बीमार आदमी लै इणो बोलणो कि, "तैरे पाप माफ हुई गोए" या इणो बोलणो कि, 'खौडौ उठ, आपणो बिस्तर चुंग और आण्डदै लाग्ग?' 10 पाप माफ कौरनौ और चांगो कौरनौ इयै दुइया काम सिरफ परमेश्वर ई कौरौ बौला आ। तुमु के देखाउणा लै कि पाप कौरने रौ हक मूके आ, ज़ुण परमेश्वरा री तौरफा कु भेजो औन्दौ ऊ, हाऊं एस आदमी ठीक कौराऊ।" तैबै यीशुए तेस बीमार आदमी देखियो बोलौ, 11 "हाऊं ताउलै बोलाऊ, खौडौ उठ, आपणो बिस्तर चुंग और घौरै डेऊ।" 12 तैबै सेजो आदमी खरकचार सारै लोगू रै सामनै उठौ और आपणो बिस्तर चुंगियो बाइरै डैओ। तिए सारै लोग इणै देखियो हैरान हुरे और इणै बोलियो परमेश्वरा री बौडाई कौरौ, कि "इणो आमुरे पैहलै केभी ना देखौ।"

लेवी औटाउणौ

(मती 9:9-13; लूका 5:27-32)

13 यीशु तेस घौरा कु गलील झीला रै डीका काए डैओ। तैबै लोगू री भिड यीशु काए डेई। यीशु लागौ तिए तिके शिक्षा दैदें। 14 तेत बासियै यीशु दुजी जागहा दी डैओ। तैबै यीशुए हलफी रौ छेहरु देखौ जासरो नाऊं लेवी थौ। सौ मामलै निणे वालेउ रै आडै माथे थौ बोशौ औन्दौ। यीशुए तेसलै बोलौ, 'मू पीछ आश।' तैबै सौ उठियो यीशु पीछ लागौ आण्डदै। 15 एकी दिने तिणी मामलै निणे वालै लेवीए यीशु आपणे घौरा दी रोटी खांदै ओटाओ। मामलै निणे वालै और पापी लोग भी बोशे रोटी खांदै, यीशु रै चलेउ आइलै। 16 कुछ यहूदी शास्त्री और फरीसी लोग ज़ुण आपलै धर्मी समझन तै, तिके देखौ कि यीशु पापी लोगू आइलै रोटी खांदै ओ लागौ औन्दौ। तैबै तिके यीशु रै चलेउ लै बोलौ, "यीशु कैलै खा सा इऊं पापी लोगू आइलै रोटी?" 17 यीशुए इणै शुणियो तिके बोलौ, "भौलै-चांगेउ लै डाक्टरा री ज़ुरत नाई औन्दौ, बीमारा लै हुआ सा। हाऊं धर्मी लोगू नाई बल्कि पापी लोगू औटाउंदै ऊ आशौ औन्दौ, ताकि सै परमेश्वरा री बाटा दी आशा।"

ब्रौता(उपवासा) रौ सवाल

(मती 9:14-17; लूका 5:33-39)

18 यहून्ना बपतिस्मा दैणे वालै रै चेलै और फरीसी थै ब्रौता कौरदै लागे औन्दै। (एजो तिके धर्मा रौ रिवाज थौ।) तैबै सै यीशु काए आशियो यीशु लै बोलदै लागे, "यहून्ना रै चेलै और फरीसी रै चेलै ता कौराई ब्रौता। पर तुमारै चेलै ब्रौता नाई कौरदै। इणो कैलै सा?" 19 यीशुए तिके बोलौ, "जेबी झाऊं लाडौ साथी दी हुआ, का बराती ब्रौता कौरदै लागे ई? जेबी झाऊं लाडौ बरातीउ रै साथी हुआ, सै खुश हुआ ई। तेबी तिके ब्रौता कौरने री का ज़ुरत हुआ? 20 पर सेजे दिन आशा ई, जेबी लाडौ तिके अलग कौराले, सेजे बोग्ता दी सै ब्रौत कौराई।" 21 यीशुए इणो भी बोलौ, "केजो भी आदमी नौए कापडै रौ टालकौ पुराणे जुडके दी ना लाइंदै। नाईम ता धोइंदै बारै सेजो नौए कापडै रौ टालकौ तेस पुराणे जुडकौ पोरु थोसियो जादडौ चीरा सा। 22 यीशुए तिके इणो अनेणो भी दैओ, "अंगूरा री सूर चाणना लै ताजे अंगूरा रौ रस दख बोग्ता बासियै फैलियो पुराणे चामडै रौ थौउलौ भी पोरु चीरा। जेथ कोरिे अंगूरा रौ रस और थौउलौ दुइया बर्बाद हुआ ई। एथिलै ताजे अंगूरा रौ रस नौए थौउलै दी भौराई।"

आरामा रै दिना रौ भी प्रभु

(मती 12:1-8; लूका 6:1-5)

23 इणो हुआ कि एकी दिने यीशु आपणे चलेऊ आइलै आरामा वालै दिना दी डोरखरेउ दी थौ लागौ औन्दौ डेउंदै। यीशु रै चलेऊ के थी भूख लागी औन्दौ। तेस डोरखरे दी थै गीऊं बोओँ औन्दै, सै चेलै लागे तिके गिऊं सै सीला चोड़ियो खांदै। 24 तैबै फरीसीउए यीशु लै बोलौ, "देखौ। जेजो काम आरामा रैदिना दी कौरनौ मना सा, सेजो काम तुमारै चेलै कैलै कौराई?" 25 यीशुए तिके बोलौ, "धर्म शास्त्रा दी तुमुए ज़ुरुर पौढौ औलौ कि जेबी राजो दाऊद और तेसरै साथी भूखे थै, तिके खाणा लै कुछ भी नाई थौ, तैबै दाऊदै का कियो? 26 आपणी ज़ुरता लै परमेश्वरा रै आराधना री जागहा दी अबियातार नांवा रौ प्रधान याजका काए डेइयो तिराकु दाऊदै परमेश्वरा काए चड़ाई औन्दौ भौगा री रोटी खाई, और आपणे साथीउ लै भी देई जो सिरफ याजक ई खा थै।" (दाऊदै एजो काम आरामा रै दिना दी कियो। तैबै भी दाऊद री बुराई कोइयेउए ना की, पर फरीसी लोग थै यीशु री बुराई कौरदै लागे औन्दै।) 27 यीशुए तिके इणो भी बोलौ, "परमेश्वर आरामा रौ दिन आपणी रै फाइदै लै चाणो आ, ना कि आदमी आरामा रै दिना रै नियम मानणा लै चाणो।" 28 यीशुए इणो भी बोलौ, "हाऊं, जो परमेश्वरा री तरफा कु भेजो औन्दौ ऊ, आरामा रै दिना रौ भी प्रभु ऊ।"

शुके औन्दै हाथा वालौ आदमी चांगो कौरणो

(मती12:9-14; लूका6:6-11)

3 एकी औजो आरामा रै दिना दी यीशु यहूदी लोगू री धार्मिक खुंबली दी डैओ। तिरे एक आदमी थौ जासरो हाथ बीमारी कोरिरे शुकी गो थौ। 2 तैबे कुछ फरीसी लोग यीशु माथे आरोप लाइणा लै तेसरी ताकी दी थै रौरै औन्दै कि का यीशु एस आदमी आराम वालै दिना दी ठीक कौरा या नाई कौरदो? (यहूदी लोगू रै धर्मा दी आराम वालै दिना दी केजो भी काम कौरनो मना थौ।) 3 यीशुए शुके औन्दै हाथ वालै आदमी लै बोलौ, “मांझाई आशियो खौडो ऊ।” 4 तैबे यीशुए लोगुकु पूछो, “का आरामा रै दिना दी भौलो कौरनो ठीक आ या बुरो कौरनो? प्राण बचाउणो या मारनो?” पर कोइयै जवाब ना दैओ। 5 यीशु दुखी हुओ कैलैकि तिउरै मन भौरी डीठ बौणी गोए थै। तैबे यीशुए रोशुइयो लोगू भिलै देखौ और तेस आदमी लै बोलौ, “आपणो हाथ आंगाऊं कर।” तिणियै हाथ आंगाऊं कौरौ, तैबे तेसरो हाथ चांगो हुओ। 6 तैबे फरीसी बाइरै डेइयो खरकचार हेरोदेस राजै रै गुटा आइलै यीशु रै विरोधा ई सलाह कौरदै लागौ कि किणै कोरिरे यीशु झांगुलै।

भीड़ा रौ यीशु पिछु हुणो

7 तैबे यीशु भीड़ा कु अलग हुणा लै आपणै चलेऊ आइलै गलील झीला काए डैओ, पर जो कुछ यीशु कौरदै थौ लागौ औन्दौ तेसरे बारे दी शुणियो एक भौरी बौडी भीड़ पीछु आशी। 8 तिणै भीड़ा दी गलील परदेश, यहूदा परदेश, यरुशलम शहर, इदमी देश और यरदन नौई पार भिला रै लोग इवरा झाऊं कि सूर और सैदा शहर रै नजदीका रै लोग भी आशै औन्दै थै। 9 यीशुए भौरी बीमार लोग चांगे कियै थै, तैबे बीमार लोग यीशु माथे थै लागै औन्दै पौडदै कि किणै कोरिरे यीशु छुइयो आमै ठीक हुलै। 10 भीड़ा रै कारण यीशुए आपणै चलेऊ लै बोलौ कि तुमै मूकालै एक छोटी किस्ती त्यार छाड़ऊ ताकि मू भीड़ ना दबावा। 11 बीमार लोगू री भीड़ा दी इणै भी लोग थै जो कि बुरी आत्मा रै वशा दी थै। जैबे केभी सै बुरी आत्माएं यीशु देखा थी, तैबे तिऊं आपणै वशा दी कौरै औन्दै लोग यीशु काए धौनी लोटला थी। तिऊं लोगू रै मुंआ कु सै बुरी आत्माएं राडै मारियो बोला थी कि, “तू परमेश्वरा रौ छोहरु ई।” 12 यीशुए तिऊं बुरी आत्मा लै सख्त हुकम दैओ, “तुमै मू ना देखाओ कि हाऊं कुण ऊ।”

बारह (प्रेरित) चलेऊ छोटणै

(मती10:1-4; लूका6:12-16)

13 यीशु तेत बासियै गलील झीला रै उतर दिशा री पहाडीउ दी चोडौ, और जास यीशु चाह थै सै आपू काए ओटाए, और सै सब कुछ छाड़ियो यीशु काए आशै। 14 यीशुए खास कामा लै बारह आदमी चेलै चाणै, ताकि सै यीशु रै साथ-साथाई रौआ और यीशु तिऊं भेजा, कि सै परमेश्वरा रौ संदेश शुणावा। 15 और सै लोगुकु बुरी आत्माएं गाडने रौ हक छाड़ा। 16 तिऊं बारह चलेऊ रै नाऊं एजै-एजै ई, शमोन जासरो नाऊं यीशुए पतरस छाड़ौ। 17 और जबदी रौ छोहरु याकूब और तेसरो छोटी भाई यहूना, जासरे बारे दी यीशुए इणो बोलौ कि जिणो सौरग खरखचार गुडा आ, तिणी रोशिया ई इयै। 18 और अन्द्रियास, फिलिप्पुस, बरतुलमै, मती, थोमा, हलफी रौ छोहरु याकूब, तद्दै, और दुजो शमोन, जुण रोमी सरकारा रौ बिरोधी थौ। 19 यीशुए करियोत गांवा रौ यहूदा भी चुनौ, जुणियै यीशु पकड़ाओ आ।

यीशु और बालजबूल

(मती12:22-32; लूका11:14-23; 12:10)

20 जैबे यीशु चलेऊ आइलै घौरा दी आशौ, जिरे यीशु रौआ थौ, तिरे भी एक भौरी भीड़ कौठी हुई गोई। यीशु कामा दी भौरी उलजी गोओ, इवरा झाऊं कि यीशु और तेसरे चलेऊ के रौटी खाणा रौ भोग भी नाई थौ। 21 जैबे यीशु रै टौबरुए इणो शुणो तैबे सै यीशु ओरु आपणा लै डेवै कैलैकि सै आपू मांझिरे बोलदै लागै कि यीशु रौ दिमाग ठिकाणै दी ना आसतौ। 22 जेजै यहूदी शास्त्री लोग यरुशलम शहरा कु थै आशै औन्दै, सै यीशु लै इणो लागै बोलदै

कि एस भीलै ता शैतान आ जासरे जरिरे यीशु बुरी आत्माएं गाडा सा। 23 यीशुए सै शास्त्री लोग आपू काए ओटाइयो अनेणै देइयो समझाए कि शैताना कैलै गाडा सा शैतान? 24 यीशुए तिउंलै बोलौ, “जेजै राजा दी आपू मांझिरे फुट पौडा ली ता सेजो राज नाई बौणी रौइंदौ। 25 जेजै घौरा दी आपू मांझिरे फुट पौडा ली ता सेजै घौरा रै लोग भी कौठै नाई रौइंदै। 26 एजै कारण शैतान भी आपणै राजा दी फुट टाला लौ ता तेसरो राज किणै कोरिरे बौणी रौआ? 27 केजो भी आदमी केजै ताकतबर आदमी रै घौरा दी घुसड़ियो तेसरो घौर तेभी झाऊं नाई लूटींदौ, जेबी झाऊं तेस ताकतबर आदमी बाना नाई लै। इणै कोरिरे तेस घौर लूटी बौला ई। 28 हाऊं तुमुलै सौचौ बौलाऊ कि लोगू रै सारै पाप, सारी बुराई भी माफ हुआ ई। 29 पर जो परमेश्वरा री आत्मा रै बारे दी बुरो बोलाई तेसलै केबी भी माफी ना मिलदी। और सौ सौदा लै आरोपी बौणा आ।” 30 यीशुए इणो तैबे बोलौ कैलै कि सै लोग बोला थै कि यीशु दी बुरी आत्मा सा।

यीशु री आमा और भाई

(मती12:46-50; लूका8:19-21)

31 तैबे यीशु री मां और भाई तिरे पौउंचै, सै थै बाइरै खौडै, तिउंए लोगूके बोलौ कि यीशु बाइरै ओटाओ। 32 यीशु काए थी भीतै भौरी भिड बोशी औन्दी। लोगुए यीशु लै बोलौ, “तुमारी मां और भाई तुमु बाइरै ओटावा ई।” 33 यीशुए तिउंलै बोलौ, “मेरी मां और भाई कुण ई?” 34 जेजै लोग यीशु काए थै बोशै औन्दै, यीशुए तिऊं भिलै देखियो बोलौ कि, “देखौ मेरी मां और भाई इयै ई। 35 जो परमेश्वरा री इच्छा दी चाला ई, सेई सी मेरी मां और भाई, बौइणी।”

बीजा बौइणै वालै रौ औनेणो

(मती13:1-9; लूका8:4-8)

4 तेत बासियै यीशु तौणै गलील झीला रै डीका काए शिक्षा दैदै लागौ। तिरे यीशु काए एती बौडी भीड़ कौठै हुई, कि यीशुए झीला दी एकी किस्ती दी पा पौडौ बोशणो। और लोगू री भीड़ बोशी झीला रै डीका काए। 2 यीशु तिऊं काए कहाणी शुणाइयो भौरी बूशे लागौ शिखाउंदै। यीशुए शिक्षा दैदी बारै तिउंलै बोलौ, 3 “इयै कहाणी शुणो। एक जिमदार बीजा बौइदै निकलौ। 4 बीजा बौइंदी बारै कुछ बीज छुटौ बाटा दी, सौ चुणो चड़कुरे। 5 कुछ बीज फोकुओ पथरिली जमीना दी जिरे सौ बीज जल्दी ता जौमो, 6 पर भौरी माटी ना मिलणै रै कारण जैबे ताती रुढ लागी तैबे सै आंगुरै शुके पोरु। 7 और कुछ बीज पौडौ झाड़िऊ मांझियै। जिणी सौ बीज बौइंदै लागौ मातौलै दबाओ झाड़िउए। एजै कारण सौ बीज नाई फौलौ। 8 पर कुछ बीज पौडौ आच्छे माटे माथे। सौ जौमो और जौमियो भौरी फौलौ। कुछ फौलौ तीस पाथे, कुच साठ पाथे, और कुछ शौ पाथे। 9 तैबे यीशुए तिउंलै बोलौ, “तुमै मेरी कहाणी रौ मतलब समझणो चाहा ई, ता तुमै ध्याना देइयो सुंचेऊ कि तुमै का शुणा ई।” 10 तेत बासियै जैबे सै भीड़ तिरे कहाणी शुणियो वापिस डेई गोई थी, तैबे यीशु रै बारह चेलै और कुछ औजो लोगुए यीशु काए आशियो पूछो, “इयै कहाणी शुणाउणै रौ मतलब का सा?” 11 तैबे यीशुए तिउंलै जवाब दैओ, “इबी झाऊं लोग नाई जाणा थै कि परमेश्वर आशियो लोगू रै जीवा दी राज कौरा आ। तुमुकै ता एस भेता रै बारे दी मुइयै सब कुछ आ बोलौ औन्दौ, पर जो लोग परमेश्वरा री बाटा दी ना आशै, इयै कहाणी तिऊं लोगू लै आ। 12 इयै बूशै सच्ची आ जो यशायाह गुरुए इणै लोगू लै सात शौ साल पहलै बोली आ कि, ‘जो लोगु देखा ताई रौंगे, पर सुंचदै नाई, और शुणा ताई रौंगे, पर समझुदै नाई, इणै लोग ना ता बदलिदै, सा ता इउंलै माफी मिलदी।’” 13 तौणै यीशुए तिउंलै बोलौ, “का तुमै इयै कहाणी रौ मतलब सा समझुंदै? तैबे तिऊं सारी कहाणी किणै कोरिरे समझा ई? 14 सौ बीजा बौइणै वालो जिमदार इणो आ, जिणो परमेश्वरा रौ वचन शुणाउणै वालो आ। 15 जो बीज बाटा दी पौडौ आ तेथरौ मतलब आ कि कुछ लोग परमेश्वरा रौ वचन ता शुणा ई, पर आपणै जीवा दी ना छाड़दै। सै तेस बाटा दी पौडै औन्दै बीजा बाशिये ई जो केभी भी ना फौलदै। जिणो चड़कु बीज चुणा आ, तिणो शैतान खरकचार आशियो तिउरै जीवा कु परमेश्वरा रौ वचन चोरा आ। 16 जो बीज पथरियाली जमीना दी पौडौ थौ तेथरौ मतलब इणो आ कि कुछ लोग

परमेश्वरा रौ वचन शुणियो खरकचार खुशी कोरिऐ माना ई। 17 पर जैबे विश्वासा रै कारण केजौ भी कष्ट या सताव आशा, तैबे फेटी फशटा ई। कैलैकि सै आपणै जीवा दी परमेश्वरा रौ वचन नाई बसालदै। 18 और जो बीज झाड़िऊ माझिये पौडौ थौ, सौ खौडी ना उखरांदौ। तेथरौ मतलब इणौ आ कि कुछ लोग ता परमेश्वरा रौ वचन शुणा ई। 19 बासिये दुनिया री चिन्ता दी, रुपाए पैसै, दुजी चीजेउ रै लालचाई फौसियो परमेश्वरा रै विश्वासा दी नाई बौद्धदै। 20 जो बीज आच्छी जमीना दी पौडौ थौ सौ भौरी फौला आ। तेथरौ मतलब इणौ आ कि कुछ लोग परमेश्वरा रौ वचन आच्छा कोरिये शुणा ई और तेस वचना माथे चाला भी और विश्वासा दी बौद्धा ई। इणै आदमी तेस बीजा बाशिये ई जो बीज तीस पाथे, साठ पाथे और शौ पाथे फौलौ आ।

दिये रौ औनेणौ

(लूका8:16-18)

21 तैबे यीशुए तिउंलै इणौ भी बोलौ, “का लम्प पलंगा थाल छाड़ना ले आणा ई या बाल्टी थाल? नाई, पर एथलै आणा ई कि घोरा भीतै ऊंची जागहा दी छाड़ियो लोगके प्याशौ लागी। 22 कैलैकि कोई भी चीज मेरी नौजरी कु छिपी औन्दी ना आसती, जो परगट ना करियाली, और ना ही कुछ छुपौदौ आसतौ, जो उजाले दी ना आणियालौ। 23 तुमै इयें बूशै समझणौ चाह ई, ता शुणौ, और सुंचौ, जो कुछ भी हाऊं बोलाऊ।” 24 यीशुए तौए तिउंलै बोलौ, “जेजे नापा कोरिऐ तुमै नापा लै, सेजे नापा कोरिऐ तुमुलै भी नापिया। जो कुछ हाऊं तुमुलै बोलाऊ भौरी ध्याना देइयौ शुणौ और सुंचौ कैलैकि जेती ध्याना देइयौ तुमै शुणियो सुंचा लै तेती ज़ादी तुमु दी समझ आशा आ। एती नाई बल्कि परमेश्वर तुमुले एथकु भी ज़ादी समझ दिया आ। 25 पर जो ध्याना कोरिऐ समझणौ नाई चाइंदै, जो कुछ तिउंए शुणौ थौ, तेस भी पोरु बिसरिया ई। जासके कुछ आसा आ, तेसके औजौ भी मिला, पर जासके ज़ादौ नाई आसतौ, तेसके जो थोड़ो-बौहट आसा आ, सौ भी नाई रौइंदौ कैलैकि सै समझंदै नाई।”

जौमणै वालै बीजा रौ औनेणौ

26 यीशुए तिउंलै बोलौ, “परमेश्वरा रौ राज इणौ आ जिणौ केजे जिमदारै ज़बीना दी बीज बौआ आ। 27 बीजा बौइयौ आपू आशौ घोरै, और कुछ दिना बीतिये डैओ सौ आपणै डोखरे दी। तिणिये का देखौ कि सौ बीज थौ जौमियो बौडौ हुओ औन्दी। तेसके पौतौ भी ना लागौ कि इयौ किणौ हुओ आ। 28 ज़बीन आपू थी लागी औन्दी फसल पैदौ कौरदै। पैहलै निकलै आंगुरै, तेत बासिये सीलै, तेत बासिये सीलेऊ माझिये त्यार गुलै। 29 जैबे फसल त्यार हुई तेभी तिणिये मुंजुरदारा भेजे कैलैकि फसल काटणै रौ बौग्त आशी गौ थौ।”

राई रै बीजा रौ औनेणौ

(मती13:31,32,34; लूका13:18,19)

30 यीशुए तिउंलै इणौ भी बोलौ, “हाऊं तुमु काए परमेश्वरा रै राजा रै बारै दी किणौ बोलु लै? केजे औनेणै देइयौ तेसरै बारै दी समझाऊ लै? 31 परमेश्वरा रौ राज राई रै दाणे जिणौ आ। राई रौ बीज देखणा लै ता भौरी छोटौ हुआ सा। 32 पर जेबी तेस बौआ ई, तैबे जौमियो सौ बीज एती बौडौ पौधौ बौणा कि चड़कु भी तेस थाल आशियो बसेरो कौरा ई?” 33 यीशु इणै औनेणौ देई-देइयौ परमेश्वरा रौ वचन समझावा थौ, जेती तिउं लोगू री समझ थी। 34 यीशु बिणा औनेणै देइयौ तिउं आइलै कुछ भी ना बोला थै, पर जेबी यीशु और चेलै एखुली दी थै तैबे यीशु तिउं काए सारी बूशेउ रौ मतलब बोला थौ।

बागुर शान्त कौरणौ

(मती8:23-27; लूका8:22-25)

35 सेजे दिना दी जेबी ब्याल हुई, तैबे यीशुए आपणै चलेऊ लै बोलौ, “आशौ आमै झीला पारभिलै डेई।” 36 लोगू री भीडा छाड़ियो चेलै यीशु आइलै एकी किस्ती दी डेवै। और तिउं आइलै औजौ भी काइयै किस्ती चाली। 37 तेभी खरकचार भौरी तेज बागुर लागौ, इदरा झाऊं कि पाणी रै

छालै कोरिऐ किस्ती भी पूरी भौरुई। 38 तियां ताकै यीशु किस्ती दी पिछली भिलै शिराणै माथे मूंडा छाड़ियो सुतदै थौ लागौ औन्दी। तैबे चलेऊए यीशु जगाओ और डौरी-डौरियो यीशु लै बोलौ, “ओ गुरु! का तुमु कै फिकर ना आसती कि आमै डुबदै ई लागै औन्दै?” 39 यीशु खौडौ हुओ और आपणै हुकमा देइयौ बागुर और पाणी रै छालै लै बोलौ, “पोरु घट!” इणै बोलवा बेर हुई बागुर और पाणी रै छालै तेभी बंद हुए। 40 तैबे यीशुए चलेऊ लै बोलौ, “तुमै कैलै डौरै ई? का तुमुकै आज्ञा झाऊं मू माथे विश्वास ना हुओ?” 41 सै चेलै भौरी डौरै और आपू माझिये बोलदै लागै, “इयौ कुण औलौ इणौ पा? पाणी, बागुर भी एसरौ हुकम माना ई।”

बुरी आत्मा वालौ आदमी चांगौ कौरणौ

(मती8:28-34; लूका8:26-39)

5 यीशु झीला पारभिलै देइयौ गिरासेनीउ रै इलाकै दी पौउंचौ। 2 जिणी यीशु किस्ती कु उतरौ, तिणी खरकचार एक आदमी, ज़ासदी बुरी आत्मा थी, सौ यीशु कु मिलौ। 3 सौ आदमी तिऐ रौआ थौ जिऐ मौरै औन्दै लोग दबावा ई। तेस कोइयौ शांगली दी भी ना बानी बोला थौ। 4 कैलैकि सौ बार-बार रशै और शांगली दी हुआ थौ बानो औन्दी, पर तिणिये सै शांगली भी पोरु चोडी रशेउ रै भी कौरा थौ टुकडै-टुकडै। तेस केजौ भी आदमी आपणै वशा दी ना कौरा बोला थौ। 5 सौ लगतार राची-दिनै जागहा दी और ढोके माथे देइयौ राडै मारा थौ, और पात्थरु कोरिऐ आपणै ज़िसमा री चौरचै कौरा थौ। 6 सौ आदमी यीशु देखियो दूरा कु यीशु काए दुडौ। सौ धौनी झुकियो यीशु री भक्ति कौरदै लागौ। 7 यीशुए तेस भीतै जो बुरी आत्मा थी, तियांलै बोलौ, “एस आदमी छाड़ियो बाइरै निकुल।” 8 बुरी आत्मै यीशु लै राडै मारियो बोलौ, “ओ परमेश्वरा रै छोहरु यीशु। मूकु का चाहा ई? हाऊं ताउंलै परमेश्वरा रै नावा कोरिऐ औरज कौरा ऊ कि तू मूलै दुःख ना दै।” 9 यीशुए तिऐ बुरी आत्मा कु पूछौ, “तेरो का नाऊं आ?” बुरी आत्मै बोलौ, “मेरो नाऊं आ सेना, कैलैकि आमै भौरी सी।” 10 तेस आदमी रै जरिऐ तिऐ बुरी आत्मै यीशु कै भौरी औरज कौरा कि, “आमू एस इलाकै कु बाइरै ना गाडै।” 11 तिऐ पहाडा माथे सुंगरु रौ गोल थौ चौरदै लागौ औन्दी। 12 तिऐ बुरी आत्मै यीशु कै औरज कोरिये बोलौ, “आमू इउं सुंगरु दी भेज, आमै इउं भीतै डेई।” 13 यीशुए तिउंलै हुकम दैओ। सै बुरी आत्माए तेस आदमी कु निकलियो तिउं सुंगरु भितै डेई। सुंगरु रौ गोल, जो दुई हज़ारा रै लगभग थौ, मातौलै दुडियो, पड झीला दी। तैबे मौरै तिऐ डुबियो। 14 तिउं सुंगरु चारनै वालै भागै पोरु, तिउंए शहरा, गांवा दी देइयो लोगके इयै खबर शुणाई। और जो कुछ हुओ थौ तेस देखणा लै लोग आशौ। 15 सै यीशु काए डेवै। तिउं कै तिऐ तेस आदमी ज़ासदी बुरी आत्मा री पूरी सेना थी भौरुई औन्दी, जुडकै भिडियो और दिमाग ठीक हुइयो बोशौ औन्दी दिशौ। तैबे सै लोग डोरी गोए। 16 इउं देखणा वालै लोगके सुंगरु और ज़ासदी सै बुरी आत्माए थी, तेसरौ पूरौ हाल तिउं दुजे लोगके शुणाओ। 17 तैबे तिउं लोगुए यीशु कै औरज कौरा और बोलौ, “छौटी। आमारै इलाकै कु पोरु डेऊ।” 18 जैबे यीशु किस्ती दी लागौ चड़दै, तैबे सौ, ज़ासदी पैहलै सै बुरी आत्मा थी, यीशु काए औरज कौरदै लागौ, “मू आपू आइलै दैओ रौइणौ।” 19 पर यीशुए सौ आपू आइलै ना दैओ आशणै, और यीशुए तेसलै बोलौ, “आपणै घोरै डेऊ और आपणै लोगके बोलै कि ताऊं माथे दया कौरियो प्रभुए ताउंलै किणै बौडै काम किए ई।” 20 यीशु रै बोलणै माथे सौ डैओ और दिकापुलिस परदेशा दी एजी बूशा रौ परचार लागौ कौरदै कि, “यीशुए मूलै किणै बौडै काम किए ई।” इणै शुणियो सारै लोग हैरान हुए।

याईरा री मौरि औन्दी छोटौ और एक रोगली छेवडी

(मती9:18-26; लूका 8:40-56)

21 जैबे यीशु तौए किस्ती दी झीला रै तेस पार डेवै, तैबे यीशु काए एक बौडी भीडे कौटै हुई झीला रै डीका दी। 22 तैबे धार्मिक खुंबली रौ एक मुखियो यीशु काए आशौ। तेसरौ नाऊं थौ याईरा। सौ यीशु देखियो यीशु री लातेऊ माथे पौडौ। 23 तिणिये यीशु कै औरज कौरा, और इणौ बोलौ, “मेरी छोटौ माई मौरनै वाली आ। तुमै मेरै घौरा कै आण्डियो मेरी माई माथे हाथ छाडौ, तैबे सै माई चागी हुआ आ, और सै मौरनै कु बौचा आ।” 24 तैबे यीशु तेस

आइलें डैऔं। एक भौरी भीड़ यीशु पीछे चाल पौड़ी, इदरा झाऊं कि लोग यीशु माथे पौड़दें थे लागे औन्दै।²⁵ तिरे एक छेउड़ी थी, तियां दी बारह साला ओलें लोऊ बौड़णै री बीमारी थी।²⁶ तियांए भौरी डाक्टर कु ईलाज कौराइयो भी दुःख उठाओ। आपणी सारी धन-जयदाद खर्च कौरियो भी तियांलें कुछ सुख ना मिलौ, पर तियां री बीमारी ओजौ भी बौड़दें लागी।²⁷ तियांए यीशु रें बारे दी शुणौ, सैं भीड़ा मांझिये यीशु पीछे आशी।²⁸ सैं बोला थी कि, “हाऊं यीशु रें जुड़कौ छूऊं लै ता हाऊं चांगी हुआ ऊ।”²⁹ तियांए यीशु रें जुड़कौ छूओ और तेभी तिरे छेउड़ी रें लोऊ बौड़णौ बंद हुआ। तियांके आपणै जिसमा दी चगरु ई ऐरो कि, हाऊं चांगी हुई गोई।”³⁰ यीशुए आपणै जीवा दी चगरु कि, “मूक शक्ति निकली आ।” यीशुए खरकचार भीड़ा दी पीछाऊं मुडियो पूछो, “मैरो जुड़कौ कुणिये छूओ?”³¹ यीशु रें चलेऊए यीशु लै बोलौ, “तुमै देखदे ई लागो औन्दै कि तुमु माथे भीड़ आ लागी औन्दी पौड़दें। तौरे भी पूछा ई तुमै इणौ कि, “हाऊं कुणिये छूओ?”³² तैबे यीशुए लोमू भिले देखियो सुंचो कि, “हाऊं कुणिये छूओ औलो?”³³ सैं छेउड़ी इणौ जाणियो कि तियां आइलें केती भौलो काम हुआ, डोरियो और कांबियो यीशु कारे आशी। सैं यीशु री लातेऊ माथे पौड़ी और तियांए यीशु कारे आपणै सारो हाल सचच-सचच बोलौ।³⁴ यीशुए तियांलें बोलौ, “माई, तू चांगी हुई गोई कैलैकि तांए मू माथे विश्वास छाड़ो। आरामा कोरिरे डेऊ, और आपणी दुःख पीड़ा कु बौची रौऊ।”³⁵ जैबे यीशु बोलदें थौ लागो औन्दै, तैबे धार्मिक खुबली रें याईर नांवा रें मुखिये रें घौरा कु लोगुए आशियो याईरा लें बोलौ, “तुमारी माई मोरी गोई। आबै गुरु लें कष्ट ना दैओ।”³⁶ जो बूश सैं लोग बोलदें थै लागो औन्दै, यीशुए तिरे बूशा री कौन्थशुणी की, और तेस याईरा लें बोलौ, “नाई डर! सिरफ विश्वास छाड़।”³⁷ यीशुए पतरस, याकूब, और याकूबा रें भाई यूहन्ना आपणै साथी दी नियै। तिणिये औजौ कोइयो ना नियौ।³⁸ यीशु धार्मिक खुबली रें मुखिये रें घौरा दी पौंचे। यीशुए लोग लेरदें, छाती पीटदें और राडें मारदें देखै।³⁹ यीशु घौरा भीतै डेवै और तिउंलें बोलौ, “तुमै कैलें ई लागे औन्दै हाले पाइदें और लेरदें? इयै माई मोरी नाई बल्कि सुती औन्दी आ।”⁴⁰ से लोग लागे यीशु रें मजाक उड़ाउदें। यीशुए सारै आदमी बाइरें गाडै। आपू डैओ तिरे माई रें मां-बाब और तिउं चिन चलेऊ आइलें भीतरै, जिरे सैं माई थी।⁴¹ यीशुए तिरे माई रें हाथ पाकड़ौ और तियांलें आपणी बोली दी बोलौ, “तलीता कूमी” जेथरौ मतलब इणौ आ, “ओ माई! हाऊं ताउंलें बोलाऊ, उठ।”⁴² माई खरकचार उठियो चालदें-फिरदें लागी। (सैं बारह साला री थी।) इणै देखियो लोग खरकचार भौरी हैरान हुए।⁴³ यीशुए तिउंके चितलाओ कि एज्जी बूशा रें कासी कै पौतो ना चाई लागो। तैबे यीशुए इणौ भी बोलौ, “इयै माई लें कुछ खाणा-पीणा लें दैओ।”

नासरता दी यीशु री बेइज्जती

(मती13:53-58; लूका4:16-30)

6 कफरनहूम गांवा कु निकलियो यीशु आपणै गांव नासरता दी आशौ। यीशु रें चले भी साथी दी डेवै।² जेबी आराम वालो दिन आशौ यीशुए धार्मिक खुबली दी शिक्षा देई। तेसरी शिक्षा शुणियो भौरी लोग हैरान हुए। तैबे सैं बोलदें लागे कि, “इणी शिक्षा केशकु शिखी औली इणिये? और इणी शक्ति वालें कामा कौरनै रें हक कुणिये दैओ आ एसकै? ³ एस ता आमै भौरी पैहलें ओलें जाणी। का यीशु मिस्त्री रें छोहरु ना आसतौ? का सौ मरियमा रौ छोहरु, याकूब, योसेस, यहूदा और शमौना रें बौड़ौ भाई ना आसतौ? यीशु री बौड़णी भी रौआ ई आमू मांझिरे। इयो सेजौ यीशु ना बा?” एजै कारण तिउं लोगके यीशु माथे शक हुआ तिउंए यीशु माथे विश्वास ना कियो।⁴ यीशुए तिउंलें बोलौ, “धार्मिक गुरु री इज्जत हुआ सारी जागहा दी। सिरफ आपणै देशा दी, आपणै गांवा दी और आपणै घौरा दी नाई औन्दी।”⁵ यीशुए तिरे कुछ बीमार लोगू माथे हाथा छाड़ियो सैं ता चांगे कियै। बाकी तिउंरै शका रें कारण यीशु शक्ति रें भौरी काम नाई कौरी बौली।⁶ यीशु कै तिउंरै शका देखियो भौरी दुःख और हैरानी हुई। यीशु शिक्षा दैदी बारै गांव-गांवा दी गुमदें थौ लागो औन्दै।

बारह (प्रेरित) चलेउ भेजणै

(मती10:5-15; लूका9:1-6)

7 यीशुए आपणै चुनै औन्दै बारह चेलें आपू कारे औटाए, और तिउं दुई-दुई कोरिरे अलग-अलग जागहा दी लागो भेजदें। यीशुए तिउंलें लोगुकु बुरी आत्माएँ गाडनै रें हक दैओ।⁸ यीशु चाह थौ कि चेलें आपणी जुरता रें बारै दी झौरी ना कौरा। एजै कारण आपणै चलेऊ लें हुकम दैओ, “बाटा लें हाथा दी डिंगो, लातु दी चैपलें रें इलावा कुछ भी ना निये ऊ, ना रोटी, ना बैग और ना जेबा दी पैसे।⁹ दुजौ कुरतौ भी ना नियौ, जो जुड़के तुमुए भिडौ औन्दै ई, सैं मोकते ई।”¹⁰ तौरे यीशुए तिउंलें इणौ भी बोलौ, “जेजै घौरा दी तुमु माना लें सेजै घौरा दी रौड़णौ, जेबी झाऊं तुमै सेजै गांवा दी ई।¹¹ केजै गांवा रें लोग तुमारी बूशे नाई शुणा लें, नाई माना लें, तैबे तिराकु निकलियो आपणी चैपली री धूड़ भी पोरु झाडै ऊ। इणै देखियो सैं समझा ई कि परमेश्वर तिउंलें जरुर सजा दिया आ। कैलैकि तिउंए परमेश्वरा री शिक्षा नाई शुणी।”¹² तेत बासिरे सैं बारह चेलें दुई-दुई कोरिरे अलग-अलग गांवा दी डेइयो शिक्षा दैदें लागे कि, “मन बौदलौ, पापा री बाट छाड़ौ, परमेश्वरा री बाटा दी आशौ।”¹³ तिउंए भौरी लोगुकु बुरी आत्माएँ गाडी। चलेऊए बीमार लोगू रें मूंडा माथे तेला लाइयो प्राथना कौरियो बीमार लोग ठीक कियै।

यूहन्ना बपतिस्मा देणै वालें रें खून

(मती14:1-12; लूका9:7-9)

14 यीशु रें नाऊं इबी चारो तरफाई फैली गौ थौ। यीशु रें बारै दी सारै लोगू री अलग-अलग राय थी। केजै बोला थै इणौ कि यीशु यूहन्ना बपतिस्मा देणै वालौ आ, जो मुदें मांझिआ कु ज्जीउंदौ हुई गौ आ। एजै कारण यीशु कै शक्ति वालें काम ई लागे औन्दै हुंदै।¹⁵ कुछ लोग बोला थै इणौ कि, “एऊ एलियाह सा।” और कुछ लोग बोला थै इणौ कि, इयो पुराणें जमानें जिणौ गुरु आ।”¹⁶ राजै हेरोदेस अंतिपासै भी इयै चर्चा शुणी। हेरोदेस राजौ लागो बोलदें कि, “यूहन्ना बपतिस्मा देणै वालौ ज़ासरौ मुइयें मूंड कटाओ थौ, सौ जिउंदौ हुई गौ आ।”¹⁷ राजै हेरोदेस अंतिपासै आपूलै एक राणी थी आणी औन्दी। पर सौ ताका थौ आपणै भाई फिलिप्पुस री छेउड़ी आपूलै आणनै ज़ासरौ नाऊं हेरोदियास थौ। तिणी राजै का कियो? ¹⁸ आपणी राणी गाडी पोरु, आपू आणी आपणै भाई री छेउड़ी आपूलै।¹⁹ तैबे यूहन्ना बपतिस्मा देणै वालौ राजै कारे डैओ और राजै लें बोलौ कि, “तुमुए गलत कौरी गौ आ कि आपणै भाई री छेउड़ी आपूलै आणी गोई। इयो एक भौरी बौड़ौ पाप आ।” राजै यूहन्ना री बूश मानी भी और तिणिये सुंचो भी कि इयै बूश बाकेई गलत आ। पर तेसकै थौ सैं आपणै भाई री छेउड़ी सुखी औन्दी। एजै कारण तिरे गाडनै भी नाई चाह थौ। राजै आपणै सिपाई यूहन्ना भिलें छाडै, तिउंए यूहन्ना पाकड़ियो आणौ तैबे टालो जेला दी। राजौ जाणा थौ कि यूहन्ना एक धौर्मी और पवित्र आदमी आ। राजौ यूहन्ना री रक्षा भी कौरा थौ, और यूहन्ना री बूशे बौड़ें मजै कौरिरे शुणा भी थौ, पर राजौ इयै बूशे शुणियो घबरा भी थौ।²⁰ सैं छेउड़ी हेरोदियास ताका थी यूहन्ना पोरु ज़गाउणें, पर इणौ नाई थी सैं कौरी बौला। कैलैकि सौ राजौ यूहन्ना कु भौरी डौरा थौ।²¹ एकी दिन का हुआ तेस राजै रौ जन्म दिन आशौ। तिणी राजै आपणै जन्म दिना लें परधान, नेते जेती भी आसा थै, सारै औटाए। और तिउंलें खाणें पिणें रौ इन्तज़ाम भी थौ कियो औन्दै।²² सैं लोग खाई-पीयो निपटै। तेत बासिये तिरे हेरोदियासा री माइये नाचणौ-गाणौ शुरु कियो। तिरे माई रें नाच-गाणें ए जेती भी मेहमान थै आशै औन्दै सित राजै भौरी खुश किये। तिणी राजै तिरे माई लें बोलौ, “माई, तैरे नाच-गाणें देखियो मैरो जौऊ भौरी खुश हुई गौ आ, तू इणौ बोल तैरे का चाई,²³ इदरा झाऊं कि तू मूकू मैरे राजा रौ आथौ हिस्सौ भी मांगा ली हाऊं तेस देणा लें भी त्यार ऊ।”²⁴ सैं माई डेई खरकचार आपणी आमा हेरोदियासा कारे बोलदें कि राजौ इणौ बोला, “तैरे का चाई?” तैबे हेरोदियासै यूहन्ना पोरु ज़गाउणें रौ मोको देखियो बोलौ, “इणौ बोल, यूहन्ना बपतिस्मा देणै वालें रौ मूंड दैओ काटियो।”²⁵ खरकचार सैं माई राजै कारे डेई और राजै लें बोलौ कि, “मूके यूहन्ना बपतिस्मा देणै वालें रौ मूंड दैओ काटियो।”²⁶ राजौ हुई गौ भौरी परेशान, “ओहो माई, तांए का मांगो इणौ पा?” पर आपणै बाइदें रें कारण राजौ नाई मुकरी बोलौ। कैलैकि राजौ आपणें मेहमानू रें सामनै

बेइज्जत नाई चाह थौ हुणौ। 27 राजै आपणें एक सिपाई लै बोलौ, “जेला दी डेऊ यूहन्ना रौ मूंड आण काटियो।” 28 सिपाई जेला दी डैओ, तिणियै यूहन्ना रौ मूंड एकी थाली दी काटियो आणौ, तैबै दैओ तिणें माई कै। माइयै दैओ आपणी अमा कै। 29 तैबै जो यूहन्ना रै चेलै थै, तिउंकै यूहन्ना रै बारै दी पौतौ लागौ, सै भौरी परेशान और दुःखी हुए। तिउंरै जेला दी डेइयौ यूहन्ना रौ मौडौ आणौ और यहूदी रीति-रिवाजा रै मुताबिक किरया-कर्म कियो।

चेलेउ री वापसी और एखुले दी रौईणौ

(मती14:13,14; लूका9:10)

30 तैबै यीशु रै बारह चेलै गांव-गांवा कु यीशु कारे आशै, जो यीशुए दुई-दुई कोरिरे भेजै थै। तिउंरै जो कियो और शिखाओ थौ, तेथरै बारै दी यीशु कारे बोलौ। 31 तिरे भौरी लोग थै आशद-डेउंदै लागै औन्दै। यीशु और तेसरै चलेऊ कै तिणें जागहा दी रोटी खाणै रौ मौकौ भी ना मिलौ थौ। यीशुए तिउं चलेऊ लै बोलौ, “तुमै मू आइलै एखुली जागहा दी चालौ, तेथी दखजेई आराम कौरौ।” 32 तैबै यीशु और चेलै किस्ती दी बोशियो एखुली जागहा दी डेवै।

पांज हजार पूरषा लै रोटी खिलाउणी

(मती14:15-21; लूका9:11-17; यूहन्ना6:1-14)

33 पर भौरी लोगुए यीशु डेउंदी बैरै देखै कि इयै केशी डियाई। साथा दी रवायी भी ऐरै कि इयै कुण ई। एजै कारण सै लोग यीशु और चलेऊ कु पैहलै तिणें जागहा दी पौउंचै। 34 जैबै यीशु किस्ती कु बाइरै उतरौ तैबै यीशुए तिणें जागहा दी भौरी बौडी भीड देखी आशी औन्दी, यीशु कै तिउं लोगू देखियो दया आशी, कैलैकि सै लोग इणै थै जिणी अण भेरालडु री भेरै हुआ ई। ज्ञाना कु भी खाली और खाणै घोट भी। 35 जैबै ब्याल हुई गोई तैबै यीशु रै चलेऊरे यीशु कारे आशियो बोलौ, “इयै जागहा भौरी सुनशान आ। आबै राच हुई लागी आ। 36 तुमै इउं लोग नीजुका री बस्ती और गांवा दी छाडौ ताकि इयै लोग पैसेऊ देइयौ रोटी खाई बौला।” 37 इणै शुणियो यीशुए तिउं चलेऊ लै बोलौ, “तुमै दैओ इउंलै खाणा लै।” तिउंरै बोलौ, “अगर आमुकै एती पैसे हुआ थै जेती एक आदमी छै: मीनै दी कमावा, तैबै भी इउंलै खाणौ नाई खिलाई बौला थै।” 38 यीशुए चलेऊ कु पूछौ, “तुमु कै केती रोटी ई?” चलेऊरे लोगुकु पौतौ कौरियो बोलौ, “पांज रोटी और दुई माछी ई।” 39 तैबै यीशुए सारै लोग अलग कौरियो लाइणी दी धौनी बोशालै शौ-शौ 40 और पचास-पचास री पांगती दी। 41 यीशुए सै पांज रोटी और दुई माछी आपणै हाथा दी पाकड़ी और सौरगा भिलै देखियो परमेश्वरा रौ धन्यावाद देइयौ आशीष मांगी। तेत बासियै यीशुए सै रोटी चोडियो आपणै चलेऊ कै थाकौ दैदै लागी। चेलै थाकै लोगुकै दैदै लागी। यीशुए सै दुई माछी भी लोगू मांझिरे बांटी। 42 सारै लोगुए पेटा भौरियो रोटी खाई। 43 तेती माथे भी रोटी और माछी रै बारह छाबडै बौचै। 44 तिउं लोगू मांझिरे सिर्फ मट्टू गिणियो 5000 लोग थै।

यीशु रौ पाणी माथी आण्डणौ

(मती14:22-23; यूहन्ना6:15-21)

45 तेत बासियै यीशुए खरकचार आपणै चलेउ लै बोलौ कि, “तुमै किस्ती दी चोडौ।” सै चेलै यीशुए बैतसैदा रै इलाकै दी आपू कु पैहलै भेजै। 46 यीशुए सै भीडा रै लोग छाडै पोरु और आपू डैओ प्राथना कौरना लै एक पहाडी माथे। 47 जैबै ब्याल हुई तेबी चलेऊ री किस्ती झीला रै मांजा-मांज थी। यीशु थौ तेबी एखोली झीला रै डीका दी। 48 यीशुए देखौ कि बागुर इउं री किस्ती चलाउणै ना दैदौ। चलेउ कै किस्ती चलाउणै री बौडी मुश्कल हुई गोई। सै चेलै गोए घबराई। दोतकै पौरै चिया कु पांजा बाजै दी यीशु झीला दी पाणी माथे आण्डियो चलेऊ कारे डैओ। यीशु ताका थौ तिउं कु झीला दी अगाडिरे डेउणौ। 49 जिणी चेलैउरे सौ पाणी माथे आण्डदै देखौ, सै चेलै घबराइयौ लागै राडै मारदै। तिउंरै सुंचौ कि भूत आशी गौ आ। 50 यीशुए तिउंलै तेभी बोलौ, “डौरौ नाई। हिम्मत छाडौ। हाऊ इदै।” 51 तैबै यीशु चलेऊ आइलै किस्ती दी चोडौ, सौ बागुर तेबी गोटौ। चेलै इणै देखियो भौरी हैरान हुए।

52 रोटी रौ हैरानी वालौ काम भी तिउंरै देखौ थौ। पर सै समझी ना बोलै कि यीशु दी केती शक्ति आ। तिउंरै मन भौरी डीठ बौणी गोए थै।

गन्नेसरता गाँवा दी रोगी ठीक कौरणै

(मती14:34-36)

53 तेत बासियै सै गन्नेसरत गांवा दी पौउंचै, किस्ती बानी तिउंरै डीका कारे। 54 जिणी सै किस्ती कु उतरै, तिदलै लोगुए यीशु खरकचार रवाओ। 55 तिदलै लोगुए दुडियो सारै बिस्तरै दी गिनियो आणै। 56 जिरे-जिरे यीशु गांवा दी या शहरा दी डिया थौ, तिरे लोग बीमार आदमी बजारा दी बोशाला थै। सै लोग यीशु कारे औरज कौरा थै कि, “आमू तुमारै जुडके रौ एक दूरौ दैओ एरी छूइणै।” जेती लोगुए भी यीशु छूओ सै ठीक हुए।

रीती रिवाजा रौ पालन कौरना रौ सवाल

(मती15:1-9)

7 तैबै फरीसी लोग और कुछ यहूदी शास्त्री लोग, जो यरुशलेम शहरा कु आशै थै, सै कौठै हुइयौ यीशु कारे आशै। 2 तिउंरै देखौ कि यीशु रै कुछ चेलै यहूदी रीति-रिवाजा रै मुताबिक बिणा हाथा धोइयौ ई लागौ औन्दै रोटी खांदै। 3 यहूदी लोग, खास कोरिरे फरीसी लोग, आपणै बजुरगा री रीति-रिवाजा माथे चाला थै। जेबी झाऊं आपणै रीति-रिवाजा रै मुताबिक आपणै हाथ नाई धोआ थै, तेभी झाऊं रोटी नाई खा थै। 4 और बजारा कु जो भी चीज आणा थै, आपणै धार्मिक नियमा रै मुताबिक बिणा धोए कुछ भी नाई खा थै। इणै काइयै रिवाज थै, जेथरौ सै पालन कौरा थै। जिणी कि लोटडी, घडे, तांबे रै ओखर आच्छे कोरिरे धोआ मांजा थै। 5 फरीसी और यहूदी शास्त्रीउरे यीशु कु पूछौ, “तैरै चेलै बजुरगा रै नियमा माथे कैलै ना चालदै? बल्कि आमारे नियमा रै मुताबिक अण हाथा धोइयौ रोटी खांदै ई लागौ औन्दै।” 6 यीशुए तिउंलै जवाब दैओ, “यशायाह गुरुए तुमु जिणै कपटी लोग रै बारै दी आशणै वालै बोगता री बूशै ठीका ई लिखी औन्दी, ‘इयै लोग मेरी इज्जत मुंआ कोरिरे ता कौरा ई पर जीवा कोरिरे ई मुकु भौरी दूर।’ 7 इयै मेरी तारिफ फजूल कौरा ई। और आदमी रै चाणै औन्दै नियमा माथे चाला ई।’ 8 परमेश्वरा रौ हुकम मानणै री बजाय तुमै आपणै बजुरगा री रीति-रिवाजा रौ पालन कौरा ई। 9 तुमै आपणै रीति-रिवाज मानणा लै परमेश्वरा रौ हुकम किणै आच्छे कोरिरे टाला ई। 10 परमेश्वरै आपणै सेवक मूसा रै जरिरे आमुलै हुकम दैओ कि, ‘तुमै आपणै मां-बापा री इज्जत कौरौ। जो आपणै मां-बापा लै बुरौ बोला लौ तेस लोग जरुर मारा ई।’ 11 पर तुमै एस हुकमा रौ बिल्कुल उल्टौ कौरा ई। अगर केजौ आदमीए आपणै मां-बापा री मजद कौरनी चाई, पर सौ आपणै मां-बापा लै बोला लौ इणौ कि, ‘जो कुछ मुइयै तुमुकै देणौ जा थौ कुछ ना देई बौलदौ।’ 12 तैबै तुमै सब बोलाई कि इयौ ठीक आ लागौ औन्दौ बोलदै। जो बिल्कुल गलत आ। 13 इणै कोरिरे तुमै आपणै चाणौ औन्दौ रीति-रिवाजा कोरिरे परमेश्वरा रौ हुकम चोडा ई। तुमै इणै-इणै भौरी काम कौरा ई।”

आदमिउ अशुद्ध कौरणै वाली बुशै

(मती15:10-20)

14 यीशुए तौरै सारै लोग आपू कारे ओटाइयौ बोलौ, “तुमै सारै मेरी बूशै शुणियो समझौ। 15 केजौ भी खाणौ जो आदमी खा आ, सौ खाणौ आदमी रौ मन गान्दौ नाई कौरदौ, पर जो आदमी रै जीवा कु बाइरै आशा सा, सौ आदमी रौ मन गान्दौ चाणा आ। 16 एजी बूश ध्यान कौरिरे शुणौ और सौमझौ।” 17 तैबै यीशु लोगू छाडियो तेस घौरा भीतै डैओ, जासदी सौ रौआ थौ। तैबै यीशु रै चलेऊरे एजे अनेणै रौ मतलब पूछौ। 18 यीशुए बोलौ, “का तुमै एती अनजाण ई? का तुमुए एती भी ना सौमझौ कि जेजौ भी खाणै री चीजे आदमी रै पेटा भीतै डिया ई, सेजी चीजे खाइयौ आदमी केभी भी गान्दौ ना बौणदौ? 19 कैलैकि सै खाणै री चीजे तेसरै मौना दी नाई बल्कि पेटा दी डिया ई, और खाइयौ निकला ई बाइरै।” (इणै समझाइयौ यीशुए बोलौ कि जेती भी खाणै री चीजे ई, सै परमेश्वरा री नौजरी दी शुद्ध ई।) 20 यीशुए तौरै बोलौ, “जो बुरी बूश आदमी रै मौना कु बाइरै आशा आ, सै बूश आदमी गान्दौ

चाणा आ।²¹ कैलैकि बुरै विचार लोगू भीता कु निकला ई। और सें केजी भी छोटुडी-छेउडी या मर्द आइलै गान्दे काम, चोरी, हत्या, दुजै री बोउटी या मर्द आइलै गान्दे काम,²² लालच, बुराई, धोखौ, केजी भी छोटुडी-छेउडी या मर्द लै लोभीणौ, जलन, पुराज, उंकार, औजौ भी काइयै बुरै काम कौरा ई।²³ इयै सारी गलत-गलत बूशै लोगू रै मौना कु निकला ई, और सें आदमी गान्दौ चाणा ई।”

सुरुफिनीकी ज़ाती री छेवड़ी रौ विश्वास (मती15:21-28)

²⁴ गलील परदेशा कु निकलियो यीशु आपणे चलेऊ आइलै और सैदा शहर रै परदेशा दी डैओ। यीशु तिए एकी घौरा दी डैओ। यीशु नाई चाह थौ, कि लोग तेस देखा। पर तिउं लोगुकु सौ चोरुई ना बोलौ।²⁵ तिए एकी छेउडीए यीशु रै बारै ई शुणौ। तियांरी माई दी थी बुरी आत्मा लागी औन्दी। सै यीशु री लातेऊ माथे पौडी, और यीशु के औरज कौरदै लागी।²⁶ सै फिनीकी परदेशा री यूनानी छेउडी थी। सै यीशु काए बार-बार औरज कौरियौ बोलदै लागी कि, “मेरी माई कु बुरी आत्मा पोरु गाडौ।”²⁷ यीशुए तियांलै अनेणै देइयौ तियांरै परखुणा लै बोलौ, “का एक बाब लोलडै री रोटी कुकरा के शोटा आ? लोलडेउ री रोटी कुकरु लै दैणी आच्छी नाई।”²⁸ तैबै तिए छेउडीए जवाब देइयौ बोलौ, “ओ प्रभु। पर छेहरु के रोटी खाइयौ जो चुर-चार धौनी पोरु छुटा आ तिउं टुकडै ता कुकरु खा ई। कुकरु तिउं खाइयौ आपणौ पेट भौरा ई।”²⁹ यीशुए तिए छेउडी रै इणै जवाब शुणियौ तियांलै बोलौ, “तैरौ विश्वास भौरा बौडौ आ। तू घौरै डेऊ। तेरी माई कु बुरी आत्मा निकली गोई।”³⁰ सै छेउडी घौरै डेई, तियांरे आपणी माई घौरा दी चुटुकचार देखी बिस्तरे दी लाम्बी पौडी औन्दी। और बुरी आत्मा भी थी तियांकु निकली औन्दी।

टौणै और तोतलौ आदमी ठीक कौरणौ

³¹ तेत बासिये यीशु सूर शहरा रै इलाके छाडियौ सैदा शहरा बाटिये दिकापुलिस परदेशा दी गलील झीला काए पौउंचै जिए दुजी ज़ाति रै लोग रौआ थै।³² तिल्लै लोगुए एक आदमी यीशु काए आपणौ जो ज़बाना रौ थौ लाटौ, और कौथु रौ थौ टौणौ। तिउं लोगुए यीशु के औरज की कि, “एस माथे आपणौ हाथ छाडौ एरी।”³³ यीशुए सौ लाटौ-टौणौ भीडा कु अलग नियौ और तेसरै कौथु दी आपणी अऊठी टाली और थूक लाइयौ तेसरी जीभ छूई।³⁴ यीशुए शौई छाडियौ सौरगा भिलै देखौ और तेसलै आपणी बोली दी बोलौ, “इफतह” जेथरौ मतलब आ, “पोरु खुला।”³⁵ तेसरै कौथु तेभी खुलै और तेसरी जीभ भी खुली पोरु। सौ साफ-साफ बोलदै लागौ।³⁶ यीशुए तिउं लोगू लै आच्छे कौरिरे समझाइयौ बोलौ, “तुमै इयै बूश कासी काए ना बोलेऊ।” जेती जादै यीशुए सै लोग समझाए, तेती जादै सै यीशु रै बारै दी परचार लागै कौरदै।³⁷ जेती भी लोग थै तिए, सै हैरान हुए और बोलदै लागै, “यीशुए जो भी कियो सारौ आच्छौ कियो। यीशु लाटेउ लै बोलणै री और टौणैउ लै शुणने री तागत दिया सा।”

चार हजार लोगु लै रोटी खिलाउणी (मती15:32-39)

8 सेजै बौते दी, दिकापुलिस परदेशा दी, जिए दुजी ज़ाति रै लोग रौआ थै, तौरै एक बौडी भिड कौठै हुई। तिउं लोगूके खाणा लै कुछ भी नाई थौ। यीशुए आपणै चलेऊ औटाइयौ बोलौ, “मूके इऊं लोगू माथे तरस आशदै लागौ औन्दै, कैलैकि इयै चिया दिना ओउलै ई मू आइलै। इऊं के खाणा लै नाई कुछ भी आसतौ।”³ इऊं हाऊं घौरै भूखे भेजू लै ता इऊंके डेउंदै-डेउंदै बाटा दी रिंगणौ लागी आ। कुछ लोग ता भौरा दूरा कु ई आशै औन्दै।⁴ चलेऊए पूछौ, “इयै सुनशान ज़ागहा दी रोटी रौ इन्तज़ाम किए कौरिरे हुआ सा?”⁵ यीशुए पूछौ, “तुमूके केती रोटी ई?” तिएरै बोलौ, “सात।”⁶ तैबै यीशुए तिउं लोगू लै धौनी बोशणा लै बोलौ। तैबै यीशुए सै सात रोटी आपणै हाथा दी पाकड़ी और परमेश्वरा रौ धन्यवाद दैओ। तेत बासिये यीशुए रोटी चोडियौ आपणै चलेऊ के थाकौ दैदै लागी। चेलै थाके लोगूके दैदै लागी।⁷ तिउंके कुछ माछी भी थी। माछी लै भी यीशुए परमेश्वरा

रौ धन्यवाद देइयौ आपणै चलेऊ लै बोलौ, “इऊं माछी लोगू लै बांटौ।”⁸ सारै लोगुए पेटा भौरियौ खाओ। तेती माथे भी तिउंके सात बौडै छाबडै रोटी रै बौचै।⁹ लगभग चार हजार लोग थै तिए बोशौ औन्दै। तेत बासिये यीशुए सै आपणै-आपणै घौरै भेजै।¹⁰ यीशु तिएरुआ कु आपणै चलेऊ आइलै खरकचार किस्ती दी बोशियौ दलमनूता रै इलाके दी डैओ।

फरीसिउ रै ज़रिए सौरगा रै निशाणा री माँग (मती16:1-4)

¹¹ तिए कुछ फरीसी लोग यीशु काए आशियौ बहंस कौरदै लागै। सै यीशु परखुणा लै कुछ हैरान वाले काम लागै मांगदै जो एक निशाणी बोणा की यीशु परमेश्वरा कु आ आशौ औन्दौ।¹² यीशुए शौई छाडियौ तिउंलै बोलौ कि, “एजे पोस्तै रै लोगू काए हाऊं केजी भी निशाणी ना देखाउंदौ।”¹³ तेत बासिये यीशु फरीसी छाडियौ आपणै चलेऊ आइलै किस्ती दी चोडियौ झीला रै दुजै धुरे दी डैओ।

फरीसिउ और हेरोदेसा रौ संजेडौ (मती16:5-12)

¹⁴ चेलै रोटी निणै बिसरुइ गौए थै। किस्ती दी तिउंके सिर्फ एका रोटी थी।¹⁵ यीशुए तिउंके चितलाओ, “शुणौ, फरीसी और राजे हेरोदेसा रै संजेडै कु बौचियौ रौएऊ।”¹⁶ पर चलेऊए यीशु रै बोलणै रौ मतलब ना सौमझौ, और सै आपू मांझिरे चौपडिंदै लागै कि, “आमुके रोटी नाई, तैबै बोलौ औलौ यीशुए इणौ।”¹⁷ तिएरै विचारा ज़ाणियौ यीशुए तिउंलै बोलौ, “तुमै आपू मांझिरे कैलै ई लागै औन्दै चौपडिंदै कि आमू के रोटी नाई? का तुमै नाई समुझदै? तुमु दी दिमाग ना आसतौ? ¹⁸ तुमु दी आखी ई, का तुमै देखी ना बौलदै? तुमुके कौथु ई, का तुमुके शुणिंदौ नाई? का तुमुके याद नाई आसतौ? ¹⁹ जेबी मुइयै पांज रोटी कौरियौ पांज हजार लोगू लै रोटी खिलाई, तेबी रोटी रै भौरै औन्दै केती छाबडै बौचै ई?” चलेऊए जवाब दैओ, “बारह छाबडै।”²⁰ यीशुए बोलौ, “जेबी मुइयै सात रोटी कौरिरे चार हजार लोगू लै रोटी खिलाई, तेबी केती छाबडै बौचै ई भौरै औन्दै?” तिएरै बोलौ, “सात।”²¹ तैबै यीशुए तिउंलै बोलौ, “का तुमै एती मुख ई? इबी झाऊं भी ना समुझदै? हाऊं रोटी रै बारै दी नाई बोला थौ पर हाऊं बोला थौ तुमुलै इणौ कु तुमै फरीसी लोगू और हेरोदेसा रै बुरै विचार और शिक्षा कु बौचियौ रौओ।”

बैतसैदा दी एक शेडौ ठीक कौरणौ

²² यीशु किस्ती कु उतरियौ आपणै चलेऊ आइलै बैतसैदा गांवा दी आशौ। तिए लोगुए एक आखीउ रौ शेडौ यीशु काए आपणौ। तिएरै यीशु काए औरज कौरि कि, “छौंटी, तू एस शेडौ आपणै हाथे छूउं एरी।”²³ यीशुए सौ शेडौ हाथा कु पाकडियौ गांवा कु बाइरै नियौ, तेसरी आखीउ दी थूक लाइयौ और तेस माथे हाथा छाडियौ बोलौ, “का ताउंके दिशदै लागौ औन्दौ?”²⁴ तिणिये ऊपरै देखियौ बोलौ कि, “मूके आदमी दिशदै ई लागै औन्दै। पर इयै आदमी इणै दिशा ई जिणै चालदै-फिरदै पेड़ ई।”²⁵ यीशुए दुबारौ तेसरी आखीउ माथे हाथ छाडौ। सौ शेडौ बौडे ध्याना कौरिरे देखौ और ठीक हुओ। तेसरी आखी आच्छे कौरिरे देखदै लागी।²⁶ यीशुए सौ आदमी इणै बालिये घौरै छाडौ कि, “तू गांवा दी ना डेवै।”

पतरसा रौ प्रभु यीशु 'मसीह' मानणौ (मती16:13-20; लूका9:18=21)

²⁷ तैबै यीशु और तेसरै चेलै गलीला परदेशा छाडियौ कैसरिया फिलिप्पी रै नीजुका रै गांवा भिलै डेउंदै लागै। बाटा दी यीशुए आपणै चलेऊ कु पूछौ, “लोग मेरै बारै दी का बोलाई कि हाऊं कुण ऊ?”²⁸ चलेऊए यीशु लै जवाब देइयौ बोलौ, “लोग तुमुलै यूहन्ना बपतिस्मौ दैणै वालौ, या एलियाह, या कोई पुराणौ गुरु ससझा ई, ज़ुण मौरियौ जीउंदै हुए ई।”²⁹ यीशुए बोलौ, “ओरी री बूशे छाडौ, तुमै आपणी बूश कौरौ। तुमै का समझा ई?” पतरसै जवाब दैओ, “तुमै आमारे मसीहा ई। ज़ुण परमेश्वर ई चुनौ औन्दै।”³⁰ यीशुए तिउंके चितलाओ, “तुमुए ठीक बोलौ आ पर तुमै एजी बूश लोगू काए ना बोलेऊ।”

आपणें मौरणें रै बारै दी यीशु रै बोलणों

(मती 16:21-23; लूका 9:22)

31 तैबे यीशु तिउंलें बोलवै लागों, “हाऊं परमेश्वरा री तरफा कु आशों औन्दौ ऊ, पर इणों जरूरी आ कि लोग मू भौरी सतावा। और इणों भी जरूरी आ कि यहूदी स्याणें लोग, बौड़ै याजक और यहूदी शास्त्री मेरी इज्जत ना कौरा। और सैं मू जरूर झांगा। तेत बासियै हाऊं चिजें दिनै ज़िउंदौ हुआ ऊ।”
32 एज़ी बूश यीशुए आपणें चलेऊ के साफ-साफ बोली। तैबे पतरसे यीशु एकी भिले नियों और तेसलें डांटियों बोलौ, “तांए इणों नाई जा थौ बोलणों।”
33 तैबे यीशुए पीछाऊं मुडियों आपणें चलेऊ भिले देखदी बारै पतरसा लें डांटियों बोलौ, “मूकाए कु दूर डेऊ कैलैकि शैतान ताऊं कु इणी बूशे आ बोलाउंदै लागों औन्दौ। तेरी सोच-विचार परमेश्वरा ज़िणी नाई आ, पर लोग ज़िणी आ।”

यीशु पिछु आपणें रौ मतलब

(मती 16:24-28; लूका 9:23-27)

34 यीशुए आपणें चेलें और दुजें लोग आपु कारे औटाइयों बोलौ, “जो भी मैरौ चेलौ बौणनौ चाह लौ, सौ आपणी इच्छा छाड़ा लौ, आपणों क्रूस चुंगा लौ, और मू पीछु आशा लौ। (मतलब कि निन्दा और दुःख सहन कौरा लौ, और आपणें प्राणा देणा लै भी त्यार रौआ।) तैबे पा बौणा सौ मैरौ चेलौ।
35 कैलैकि जो आपणों प्राण देणों नाई चाह लौ तेसलें परमेश्वरा आइलें सदा री ज़िन्दगी नाई मिलदी। पर जो मूकालें और मैरौ खुशी रौ संदेश शुणाउणे री बजाह कु आपणें प्राण देणा लै त्यार औलौ, तेसलें परमेश्वरा आइलें सदा री ज़िन्दगी मिला आ। 36 लोग पूरें संसारा री खुशी पाई बौला ई, पर एथरौ का फाइदौ आ आपणों प्राण खोआ लौ पोरु? 37 परमेश्वरा आइलें सदा री ज़िन्दगी पाईणा लै आमैं परमेश्वरा लै कुछ भी नाई देई बौलदैं। 38 मू और मेरी शिक्षा अपणाउणा लै जो आज शर्मिया लौ, ता जेबी हाऊं आपणें पवित्र सौरगा रै दूता आइलें आपणें बाबा री शाना देखाइयों आशु लै, तैबे तिउं हाऊं नाई अपणाउदौ।

9 यीशुए इणों भी बोलौ, “हाउं तुमुलें सौचौ बोलाऊ कि इदैं इउं खौडें लोग मांझिरे कु कुछ आदमी जरूर आपणी ज़िन्दगी दी देखा लै कि परमेश्वर शक्ति भौलौ राज कौरणा लै आशौ आ।”

यीशु रौ रूप बौदलिणों

(मती 17:1-13; लूका:28-36)

2 छौ: दिना बासिए यीशुए पतरस, याकुब और यहूना आपु आइलें नियें। तैबे सैं एक उंचे ढोकें माथे डेरें। तिरे एखुली दी तिउं चिन चलेऊ कारे यीशु चोमकौदौ दिशौ। 3 यीशु रै जुडकें इणें प्याशें ज़िणें और शेतें बौणें कि इयें धोतरा दी केजौ भी धोबी तिणें प्याशें ज़िणें और शेतें जुडकें नाई धोई बौलदौ। 4 तियां ताकें तिरे यहूदी लोग रै पुराणें जमानें रै दुई स्याणें भी हुए परगट, ज़ासरें नाउं मुसा और एलिय्याह थै। सैं दुई थें लागें औन्दै यीशु आइलें बुशें लाइदैं। 5 तैबे पतरसे यीशु लै बोलौ, “गुरुजी एउ केती आच्छौं आ कि आमैं इदैं ई, आमैं चीन ताम्बु लाई, एक तुमु कालें, एक एलिय्याह कालें, एक मुसा कालें।” 6 पतरसा के सोमझिदें नाई थौ लागों औन्दौ, “कि हाऊं का बोलु” कैलैकि सैं इणों देखीओ डौरी गौरे थै। 7 तैबे तिउं माथे एक बादल छाओ, तेस बादला मांझिरे कु परमेश्वरा री हाक शुणुई कि, “इयों मैरौ प्यारौ छोहरु आ। एसरी बुशें शुणौ।” 8 तैबे एकदम तिउं चलेउए चारो तौरफाई देखौ, ता यीशु रै सिवाए तिउं आइलें कोई नाई थौ। 9 जैबे सैं ढोकें कु तौलें थें लागें औन्दै आशदें, तेबी यीशुए आपणें चलेउलें हुकम दैओ कि, “जो तुमुरे देखौ आ, तेथरे बारै दी लोग कारे तेबी झाऊं कुछ ना बोलेऊ जेबी झाऊं हाऊं, जुण परमेश्वरा री तौरफा कु भेजौ औन्दौ ऊ, मौरियो ज़िउंदौ ना हुउलौ।” 10 तैबे चलेउए इयें बूश आपणें ज़िवा दी छाडी, और आपु मांझिरे चौपडिदें लागें कि मौरियो ज़िउंदौ हुणें रौ का मौतलब हौलौ। 11 तैबे तिउं यीशु कु पुछौ, “यहूदी रै शास्त्री लोग बोलाई कि एलिय्याह गुरु रौ, मसीह कु पैहलें आशणों जरूरी आ। इयों किणों आ? कैलैकि तुमैं ता आशी गौरे थें

पैहलें और आज आमुए एलिय्याह दुजी बारै आशदें देखौ।” 12 यीशुए ज़वाब दैओ, “इणों सौचौ आ कि एहिल्याह गुरु पैहलें आशौ आ और मसीहा लै बाट तैयार कौरा आ। हाऊं तुमुलें बोलाउ, यहूना बपतिस्मा देणें वालौ एहिल्याह गुरु री ज़ागह दी मुकु पैहलें आशी गौ आ। लोगुए आपणी मौरिओ कौरिरे सेउ सौताओ ज़िणों तेसरें बारै दी लिखौ औन्दौ थौ। 13 ऐबे तुमैं सुंचौ कि मैरें बारै दी भी, जुण परमेश्वरा री तौरफा कु आ भेजौ औन्दौ, धर्म शास्त्रा दी इणों लिखौ औन्दौ कि लोग मुलें भौरी दुःख दिया ई, नफरत कौराई, मुं नाई मानदैं।”

बुरी आत्मा वालौ छोहरु चांगों कौरणों

(मती 17:14-21; लूका 9:37-43)

14 जेबी यीशु और चिन चेलें बाकि चलेउ कारे पौउंचें, तैबे तिउं देखौ कि तिरे एक बौडी भीडें सैं बाकि चेलें घेरें औन्दै थें और यहूदी शास्त्री थें लागें औन्दै तिउं आइलें बहंस कौरदैं। 15 खरकचार सारें लोग यीशु देखिओ हैरान हुए। तैबे दुडिओ तिउं यीशु कारे आशिओ तेसरों स्वागत कियौ। 16 यीशुए तिउं कु पुछौ, “तुमैं मैरें चलेउ आइलें कैलें थें लागें औन्दै बहंस कौरदैं?”
17 तैबे भीडा मांझिरे कु एक आदमिरे ज़वाब दैओ, “गुरुजी! मुंइरे आपणों छोहरु थौ तुमु कारे ठीक कौरणा लै आणों औन्दौ पर तुमैं इदें नाई थें। मैरें छोहरु दी एक बुरी आत्मा सा जुणिए एउ ज़बाना रौ लाटौ चाणी गौ आ।
18 ज़िरे किरें एस बुरी आत्मा पाकड़ा सा, तिरे बुरी आत्मा एस धौनी लोटाळा। और एसरें मुआंदी निकला ई शेफे। आपु लागा दांडु कुट-कुटाउंदै। तैबे बौणा डोकडोकौ। मुंइरे तुमुरें चलेउ लें बोलौ, “एस माऊं कु बुरी आत्मा पोरु गाडौ” पर ईउंकें नाई गाडुई।” 19 इणों सब शुणिओ यीशुए ज़वाब दैओ, “का कौरलें। तुमकें मुं माथे इबी झाऊं निश्वास नाई आ? हाऊं केभी झाऊं रौआउ तुमु आइलें? तुमरौ एस अविश्वास किणें कौरिरे कौरु सहन? एस छोहरु मूकाए आणौ।” 20 तैबे लोगुए सेउ छोहरु यीशु कारे आणौ। जैबे बुरी आत्मै यीशु देखौ, खरकचार बुरी आत्मै छोहरु बांध रौंगा रौ मेकिओ धौनी लोटाळौ। तेसरें मूआकु शेफे निकली और सेउ माटें मांझी लागौ खोरोलिदैं।
21 यीशुए तेस छोहरु रै बाबा कु पुछौ, “एस री हालत केभी ओअलें इणी?” तिणीए बोलौ, “लोलडी ओअलें आ। 22 एती नाइं बल्कि बुरी आत्मा एस झांगणा लै केभी टाला आगी मांझिरे, केभी टाला पाणी मांझिरे। तुमैं कौरौ बौलाई ता दया कौरिरे आमारी मजद कौरौ एरी।” 23 यीशुए तेसलें बोलौ, ताइरे का बोलौ, “तुमैं कौरौ बौलाई ता? शुण! जुण मू माथे विश्वास कौरा आ तेसलें हाऊं सारौ-कुछ कौरा उ।” 24 खरकचार तेस छोहरु रै बाबें जौरें बोलौ, “मुकें दख जेई विश्वास आ। मैरौ विश्वास बौदाओ एरी।” 25 जैबे यीशुए देखौ कि भीड बौडदें सा लागी औन्दी तैबे यीशुए तिणें बुरी आत्मा लें डांटीओ बोलौ, ओ लाटौ-टौणौ कौरणें वाली आत्मा! हाऊं ताउंलें हुकम दियाउ, एस छोहरु भीतें कु पोरु निकला। ऐबे केभी ना आशें एस छोहरु दी।” 26 तैबे सैं बुरी आत्मा जौरें राडें मारियो छोहरु भीताकु निकली। सेउ छोहरु मौरौ औन्दौ ज़िणों बौणौ। कई लोग ता इणों लागें बोलदैं, “एउ गौ मौरौ।” 27 पर यीशुए तेस छोहरु रौ हाथ पाकड़ौ और सेउ खौडी उठाओ। सेउ छोहरु खौडी उठौ और बिल्कुल ठीक हुओ। 28 यीशु और तेसरें चेलें जेबी घौरा भीतें एखुलें दी थें, तैबे चलेउए यीशु कु पुछौ, “आमुकें सैं बुरी आत्मा कैलें ना गाडुई?” 29 यीशुए ज़वाब दैओ, “इणें रौंगा री बुरी आत्मा ब्रौता कौरौ और प्राथना कौरौ गाडिया सा। कैलैकि एजी आत्मा गाडनै रौ दुजौ तौरिकौ कुछ नाई।”

आपणें मौरणें रै बारै दी यीशु रै दूजी बारै बोलणों

(मती 17:22,23; लूका 9:43-45)

30 यीशु और तेसरें चेलें तिणें ज़ागह छाडिओ गलील परदेशा दी थें लागें औन्दै डेउदैं। यीशु नाई चाह थौ कि कासी के भी पौता लागे कि सैं किये ई डेउदैं लागें औन्दै, 31 कैलैकि सेउ एखुलें दी आपणें चलेउ लें शिक्षा देणौ चाह थौ। यीशुए चलेउ लें बोलौ, “हाऊं, जुण परमेश्वरा री तौरफा कु भेजौ औन्दौ ऊ, लोगु रै हाथे पाकड़ुवाइया ऊ, सैं मुं झांगा ई, पर मौरिओ हाऊं चिजे दीना दी तौइरे ज़िउंदौ हुआ उ।” 32 चेलें यीशु री एजी बूश सोमझुदें नाई थें लागें औन्दै। सैं यीशु कु एजै बारै दी पुछणा लै डौरा थै।

सौबी कु बौडौ कुण? (मती18:1-5; लूका9:46-48)

33 यीशु तौइंरे आपणें चलेउ आइलै कफरनहुम गांउ दी आशौ। घौरा भितें डेईओ यीशुए आपणें चलेउ कु पुछौ, “तुमैं बाटा दी केथरें बारें दी थें चौपड़िंदै लागें औन्दै?” 34 सें चेलें शौरमा रें मारें चुटुक थाकै। कैलैकि सें बाटा दी इणौ थें लागें औन्दै चौपड़िंदै, आमु बारह चलेउ मांझी कु सारेउ कु बौडौ कुण आ?” 35 तैबै यीशुए बोशौसैं सैं चेलें आपु काए औटाईओ बोलौ, “तुमु मांझीआ कु कुण चाह बौडौ बौणनौ, सेउ सारेउ कु छोटौ और सारेउ रौ सेवादार बौणालौ।” (सेजौ आदमी परमेश्वरा री नौजरी दी सारेउ कु बौडौ हुआ सा।) 36 तैबै तिउंरे एक माउं तिउं चलेउ काए आणौ। सेजौ माउं यीशुए आपणी उंगाली ऐ चुंगौ और चलेउ लै बोलौ, 37 “केजौ भी आदमी मैरें नाउं कौरी कास्स छोटौ माउं अपणावा लौ तैबै सौमझौ कि सेउ मुं आ लागौ औन्दौ अपणाऊं दै। जेजौ मुं अपनावा लौ, सेजौ आदमी परमेश्वर अपणावा सा, जणियै हाऊं भेजौ औन्दौ।”

जो बिरोधा दी नाई सेउ हका दी आ (लूका9:49-50)

38 तैबै युहन्ना नावां रें चलेए यीशु लै बोलौ, “गुरुजी, आमुए एक आदमी देखौ आ जुण तुमुरें नाऊं कौरी बुरी आत्मा थौ लागौ औन्दौ गाडुदै। आमुए कौरी तेसलै मना, कैलैकि सेउ तुमुरें चुनै औन्दै चलेउ मांझीआ रौ नाई थौ।” 39 यीशुए बोलौ, “तेस आदमी लै मना न कौरौ। कैलैकि कि जुण मैरें नाउं कौरीए हैरानी वाले काम कौरा आ, सेउ फेटी मुलें बुरौ नाई बोलदौ। 40 जुण आमुए विरोधा ई नाई आ सैं आमुए तौरफा ई। 41 इणौ सौच्चौ आ कि जेजौ आदमी तुमु लै मैरें चेलें जाणिओ एक ग्लास पाणी पिलावा लौ तैबै परमेश्वर तेसलै जुरुर इनाम दिया आ।”

तोकरा रौ कारण बौणनौ (मती18:6-9; लूका17:1,2)

42 यीशुए इणौ भी बोलौ, मू माथे विश्वास छाड़नै वालौ, चाऊ सेउ छेहरु औलौ, केजौ भी आदमी तेस पापा री बाटा दी निइयौं तेस विश्वासा दी डगमगावा लौ, ता परमेश्वर तेसलै जुरुर सौजा दिया आ। इणें आदमी लै परमेश्वरा री सौजा मिलणें कु आच्छौ थौ कि तेसरें गौलें दी घोरटा रौ जौंदर बानिओ तेस गैहरें ताला दी डुबावा। 43 तु आपणें हाथे इणौ काम कौरालौ, जो ताऊं पापा री बाटा दी निइयौं विश्वासा दी डगमगावा लौ, तैबै ताऊंलै आच्छौ आ कि तेस हाथ पोरु काटै। दुई हाथा कौरी नौरका दी डिया लौ, जियै आग केभी ना ईशदी, एथकु आच्छौ आ कि टुंडै रौइयौं तु सौरगा दी डेआ ई। 44 [जिए तिउंरौ किडौ नाई मौरदौ और आग नाई इशदी।] 45 तैरौ बांगणौ ताऊं बुरी बाटा दी नियां लौ ता तांउलै आच्छौ आ कि तु नौरका कु बौच्चियौ लौंगडौ रौइयौं सौरगा दी डेआ। 46 [जिए तिउंरौ किडौ नाई मौरदौ और आग नाई इशदी।*] 47 अगर तेरी आख इणौ देखा ली कि तु विश्वासा ई डगमगाईयौ पापा री बाटा दी डेई गौ, ता तिउं आख तु पोरु गाडै। नाई ता दुईआ आखी कौरी नौरका दी डिया ई, 48 जिए सौदा दुःख ई, जिए आदमी दी किडै पा लागी ई और तिदली आग केभी ना ईशदी। 49 कैलैकि जेजौ आदमी नौरका दी डिया सा, सेजौ आदमी सौदा तौडफा आ। 50 रोटी खांदी बारें लूण आच्छौ आ। अगर लूण मांझिरे दुजी चिजें मिलाईओ लूण रौ स्वाद पोरु खोआ लै ता तैबै तेस लूण केथ कौरिए कौराई लुणुओ? तुमैं लोग लुणा जिए ई। कैलैकि तुमैं मुं माथे विश्वास छाड़ा ई। तुमैं पापा री बाटा दी डेईयौ आपणें विश्वासा रौ स्वाद ना खोएउ। एकी-दुजे कु बौडै हुणें री ईच्छा छाड़ियौ एकी-दुजे आइलै मिली-जुलिओ रौओ।”

तलाका रें बारें दी यीशु री शिक्षा (मती19:1-12; लूका16:18)

10 तैबै यीशु कफरनहुम गांवा छाड़ियौं यहूदा परदेशा भिलें लागौ डेउंदै। तैबै यीशु और तेसरें चेलें यरदन नौई पारा रें परदेशा दी आशौ। तिरे

भी यीशु काए एक भौरी भीड कौठै हई। यीशु तिरे लोग लै शिक्षा देंदें लागौ, जिणौ कि सेउ सौदा कौरा थौ। 2 तैबै कुछ फरिसी लोग यीशु काए आशैं और तेस पोरुखूणा लै पुछदें लागें कि, “एक आदमी लै आपणी छेवडी रौ फैसलौ कौरणौ ठीक आ या नाई?” 3 यीशुए ज्वाब देंओ, “परमेश्वरें आपणें सेवक मुसा रें जौरिए केजौ हुकम आ देंओ औन्दौ?” 4 तिउं लोगुए बोलौ, “मुसा रें नियमा ई इणौ आ लिखौ औन्दौ, जुण आदमी आपणी छेवडी रौ फैसलौ कौरणौ चाहा सा, सेउ आदमी तिरे राजीनाउं देइयौं पोरु गाडी सौका आ।” 5 यीशुए तिउंलै बोलौ, “मुसैं एजौ हुकम तुमु पुराणें जमानें रें लोग लै एथलै लिखौ थौ कैलैकि लोग परमेश्वरा री इच्छा पूरी कौरणें कु पोरु मुकरा ई। 6 धर्म शास्त्रा दी इणौ आ लिखौ औन्दौ कि परमेश्वरें दुनिया चणनै री शुरुआता दी मौरद और छेउडी चणणें ई। 7 और इणौ भी लिखौ औन्दौ कि ‘मौरद आपणें माँ-बाबा छाड़ियौं आपणी छेउडी आइलै मिली रौआ आ। 8 और सैं एका जिस्म थाकाई बौणी।’ एजें कारणें सैं दुई नाई बौल्कि एक जिस्म बौणाई। 9 एथीलै परमेश्वर एक मौरद और छेउडी शादी दी जोडा आ तैबै आदमीउए सैं दुई नाई चाई अलग कौरणें। 10 जेबी यीशु आपणें चलेउ आइलै घौरा दी थें तैबै चेलें एजें बारें दी तौइंरे यीशु कु पुछदें लागें। 11 तैबै यीशुए तिउंलै बोलौ, “जुण आपणी छेउडी लै राजीनाऊं देईओ दुजी छेउडी आइलै शादी कौरा सा, सेऊ आपणी पैहली छेउडी रें विरोधा ई गान्दें काम कौरा आ। 12 और जेजी छेउडी आपणें बोउटै लै राजीनाउं देइयौं दुजे आदमी आइलै शादी कौरा सा, सैं छेउडी भी आपणें पैहलै बोउटै रें विरोधा इ गान्दें काम कौरा आ।”

छेहरु लै आशीवाद

(मती19:13-15; लूका18:15-17)

13 लोग यीशु काए लोलडै लागें आणदें ताकी यीशु तिउंलै छुईयौं आशीष दिआलौ। पर यीशु रें चलेउए सैं लोग डांटे। 14 इणें देखिओ यीशुए रोशुइयौं, आपणें चलेउलै बोलौ, “लोलडेऊ मू काए आशणें देंयो। इऊं ना रोकौ। कैलैकि इणें लोगु रें जीवा दी परमेश्वर राज कौरा आ जुण इऊं लोलडेउ बाशीए भोलौ आ। 15 हाऊं तुमुलै सौच्चौ बोलाऊ, जुण लोग परमेश्वरा रौ राज, इउं लोलडेउ बाशीए नाई अपणावा लौ, तेसरें जीवा दी परमेश्वर केभी भी राज नाई कौरी बोलदौ।” 16 इणें बोलियौं यीशुए सैं लोलडै आपणी उंगाली ऐ चुंगें और तिउं रें मुंडा माथे हाथा छाड़ियौं तिउंलै आशीष देई।

धनवान छेहरु और सदा री जिन्दगी

(मती19:16-30; लूका18:18-30)

17 जेबी यीशु आपणें चलेऊ आइलै बाटा दि थौ लागौ औन्दौ आण्डदें, तेबी एक आदमी दूडियौं यीशु काए आशौ, तिणियें यीशु रें बागणें बोधिओ तेसकु पुछौ, “ओ सारेउ कु भौले गुरु आ! मुलें इणौ बोलौ कि परमेश्वरा आइलै सौदा री जिन्दगी पाइणा लै मू का ज़ा सा कौरणौ।” 18 यीशुए तेसलै बोलौ, “तू मुलें सारेउ कु भौलौ कैलै बोला ई? एसरौ मतलब सुंच एरी। केजौ भी आदमी सारेउ कु भौलौ नाई आ सिर्फ परमेश्वर ई सारेउ कु भौलौ आ। 19 परमेश्वरा आइलै सौदा री जिन्दगी पाइणा लै परमेश्वरा रें हुकम, ताइए धौर्मशास्त्र पौडै हौणें, खून ना कौरणी, दुजे री छेउडी आइलै गान्दें काम ना कौरणी, चोरी ना कौरणी, झुठी गवाही ना देणी, धोखे-बाजी ना कौरणी, आपणें माँ-बाबा री ईज्जत कौरणी।’ एजें नियमा माथे चालणौ जुरुरी सा।” 20 तैबै तिणी आदमीए बोलौ, “गुरुजी इउं सारी बुशें ता हाऊं लोलडी ओउलें मानाउं। का मुइंरे औजौ जा कुछ कौरणौ?” 21 तैबै यीशुए तेस आदमी भिलें बौडै ध्याना कौरिए देखियौं तेस आइलै प्यार कियौं और बोलौ, “ताउंलै औजौ भी एक काम आ जो ताइंरे कौरणौ ज़ा सा। जो धन-जयदात ताउंकें आ, तिउं बेचियौं जो पैसैं बौणाई, तिउं पैसैं गरीबु कें बांट। तेथ बासिए आशें तू मुं पीछु। तैबै ताउंलै सौरगा दी औसली धन मिला आ।” 22 इणें शुणियौं सेउ आदमी जिउंशुओ। सेउ मू आँकड़ाइयौं पोरु डैओ। कैलैकि सेउ आदमी भौरी सेठ थौ। 23 यीशुए चारो तौरफा ई देखियौं आपणें चलेउ लै बोलौ, “सेठ आदमिउ कें आपणें जिवा दी परमेश्वरा रें राज कौरणें री ज़ाजत देणी केती मुश्किल आ।” 24 चेलें एजी बुशें शुणियौं हैरान हुए कैलैकि सारें लोग सुंचा थें कि परमेश्वरा री आशीषा कौरियौं सेठ बौणा ई। तैबै यीशुए

तिउलं तौइंरे बोलौ, “ओ मैरै लोलडेउओ, जुण पैसै माथे भरोसौ छाडा ई तेसलै आपणै जिवा दी परमेश्वरा रौ राज कौराउणौ भौरी मुश्किल हुआ आ। 25 जिणौ उंटा कै सिउणी रै शेडै बाटिरे निकुलनौ भौरी कठिन हुआ आ, तेथकु भी कठिन आ सेठ आदमिउ लै आपणै जिवा दी राज कौरणै देंगौ।” 26 इणै शुणियौ चेलै औजौ भी भौरी हैरान हुए। सै आपु मांझीरे पुछदै लागै, “जैबै सेठ आदमी ना बौची बौलदौ तैबै कुण बौचा सा?” 27 यीशुए सै बौडै ध्याना कौरी देखै और तिउलं बोलौ, “आदमिउ कै ता इणौ नाई औन्दौ पर परमेश्वरा कै हुआ सा। कैलैकि परमेश्वर सारौ कुछ कौरी बौला आ।” 28 पतरस यीशु लै बोलदै लागौ, “देख, आमै सारौ कुछ छाडियो ताऊं पीछु लागै औन्दै आपण्डै।” 29 यीशुए बोलौ, “हाऊं तुमुलै सौच्यौ बोलाउ कि जुणियै मैरौ चेलौ बौणना लै और खुशी रौ संदेश शुणाउणा लै आपणै घौर या आपणी भाई-बोईणी या आपणै माँ-बाब या आपणै छोटी-छोहरू या आपणी जमीन छाडा ई, 30 तेसरी जिन्दगी लै शौ गुणौ कौरियो मिला आ। तेसकै घौर और आपणै टोबरा जिणै लोग मिला ई। तेसकै डोखरै भी मिला ई। लोग तेस सौतावा ई पर सेउ मुं आइलै। सौदा री जिन्दगी जिवा सा जेबी हाऊं राजौ बौण लै। 31 भौरी लोग इणै ई जुण आपु लै बौडै बौणा ई। जेबी हाऊं राजौ बौणियो आशु लै तेबी सै लोग छोटै हुआई। जुण आपुलै छोटै सौमझा ई सै हुआई बौडै।

आपणै मौरणै रै बारै दी यीशु रै चीजी बारै बोलणौ

(मती20:17-19; लूका18:31-34)

32 तेथ बासिरे यीशु यरुश्लेमा शहरा भिलै बाटा दी लागौ आण्डदै। कुछ लोग भी लागै यीशु पीछु आण्डदै। यीशु रै चेलै हैरान थै कि यीशु लागौ औन्दौ यरुश्लेमा लै डेउंदै। कैलै कि तिरे इणै भी लोग थै जो यीशु रै विरोधी थै। जेजै लोग यीशु पीछु थै डेउंदै लागै औन्दै सै गौरे थै डौरी कि तिरे यीशु रौ का हाल औलौ। बाटा दी यीशुए सै बारह चुनै औन्दै चेलै अलग नियै। जो कुछ यीशु आइलै हौणै वालौ थौ तेथ रै बारै दी तौइंरे लागौ आपणै चलेउ कै बोलदै। 33 यीशुए बोलौ, “शुणौ आमै यरुश्लेमा लै ई डेउंदै लागै औन्दै। तिरे हाऊं, जुण परमेश्वरा री तौरफा कु ऊ भेजौ औन्दै, बौडै याजक और शास्त्रीउ रै हाथाई पकड़ाईया ऊ। सै मुलै मौउता री सौजा देइयौ मुं दुजी जातिऊ रै हाथा दी दिआई। 34 सै लोग मैरौ मजाक उडावा ई, मुंआ दी थुकाई, कोडै मारा ई। सै मुं पोरु झांगा ई, पर हाऊं चिजै दिने तौइंरे हुआ उ जिउंदौ।”

याकूब और युहन्ना री औरज

(मती20:20-28)

35 बाटा दी डेउंदै- डेउंदै जब्दी रै दुई छोहरू याकूब और युहन्ना (जो यीशु रै चुनै औन्दै बारह चलेउ मांझीआ कु थै) यीशु कारे आशौ। तिउरे यीशु लै बोलौ, “गुरुजी, जो आमै मांगी ई तुमै आमुलै पुरौ कौरैउ।” 36 यीशुए तिउलं बोलौ, “तुमै का चाहा ई?” 37 तिउरे बोलौ, “जेबी तुमै राजै बौणा लै तेबी आमै भी तुमु आइलै राज कौरणौ चाई। आमु मांझिये कु एक बोशालेउ सुल्टी भिलै और एक बोशालेउ उल्टी भिलै।” 38 तुमै नाई सौमुझदै कि तुमै का ई लागै औन्दै मांगदै। जेजौ दुःख मुइंरे झेलनौ आ का तुमै तेस झेली बौलाई? जिणौ एथ बासियै मुं झांगा ई का तुमै तिणौ मौरौ बौला ई?” 39 याकूबै और युहन्ना बोलौ ओ आमै कौरी बौली ई।” यीशुए बोलौ, “तुमै भी दुःख झेलियो मौराई। 40 पर मुंकारे उल्टी सुल्टी बिअै बोशणै वालौ सिरफ परमेश्वर चुना आ। एजौ नाई मैरौ काम।” 41 बासिरे जैबै बाकि दस चलेउ कै पौतौ लागौ एजी बुशै रौ, तैबै सै याकूब और युहन्ना लै भौरी रोशुए। 42 तैबै यीशुए सारै चलेउ लै आपु कारे ओटाईओ बोलौ, “तुमै जाणा ई कि केजै भी सौरकारा रै जुण बौडै नेतै ई सै आपणी मौरजी कौरिरे लोगु माथे राज कौरा ई। सै आपणौ हक देखाउणौ चाहा ई। 43 पर तुमु मांझीरे इणौ नाई चाई हुणौ। तुमु मांझिरे जुण सारेउकु बौडौ बौणनौ चाहा लौ तिणिए तुमु सारेउ री सेवादार चाई बौणनौ। 44 जेजौ परधान बौणनौ चाहा लौ, सेउ बौणालौ सारेउ रौ नुकुर। 45 कैलै कि हाऊं जुण परमेश्वरा री तौरफा कु आ भेजौ औन्दौ, दुजेउ कु आपणी सेवा कौराउदै नाई आशौ औन्दौ बौल्कि दुजेउ री सेवा कौरदै ऊ आशौ औन्दौ। इदरा झाऊं कि मुं पोरु झांगा ई। मैरी मौउता कु भौरी लोग आपणै पापा री सौजा कु बौची बौला ई।

शेडै बरतिमाई री आखी ठीक कौरणी

(मती20:29-34; लूका18:35-43)

46 तेथ बासिरे यीशु आपणै चलेउ आइलै यरिहो शहरा लै आशौ। जेबी सै तिरु निकुलदै थै लागै औन्दै तेबी यीशु आइलै बौडी भीड थी तैबै बाटा दी एक शेडौ भिखा मांगदै थौ बोशौ औन्दौ। तेसरौ नाउं थौ बरतिमाई, जासरौ मौतलब तिमाई नावां रै आदमी रौ छोहरू। 47 जैबै तिणिए शुणौ कि नासरता गावां रौ यीशु लागौ औन्दौ डेउंदै एजी बाटा दी, तैबै तिणिए हाकेउ मारिओ बोलौ, “ओ यीशु दाउदा रौ छोहरू मुं माथे दया कौर।” 48 ओरी लोगुए तेस शेडै लै बोलौ, “चुटुक थाक।” पर सेउ शेडौ लागौ औजौ जोरै-जोरै हाकेउ मारदै, ओ यीशु दाउदा रौ छोहरू मुं माथे दया कौर।” 49 तैबै यीशुए टेकीओ बोलौ, “एस शेडौ इदै ओटाओ।” लोगुए तेस शेडै लै बोलौ, “हिम्मत छाड, उठ! यीशु ताऊं ओटाउंदै लागौ औन्दौ।” 50 सेउ आपणै चादरु शोटियो ऊछलियो उठौ और यीशु कारे आशौ। 51 यीशुए तेसलै बोलौ, “का चाहा ई तु? ताउलै हाऊं का कौरु?” शेडै आदमीरे बोलौ, “गुरुजी, हाऊं देखणौ चाहा ऊ।” 52 यीशुए बोलौ, “डेउ! ताइंरे मुं माथे विश्वास कियो आ, एजी ताइंरे तु चांगो हुआ ई।” सेउ शेडौ तेबी देखदै लागौ। तेथ बासिरे सेउ बाटा दी यीशु पीछु लागौ आण्डदै।

यरुश्लेमा दी जीत आशणी

(मती21:1-11; लूका19:28-40; यूहन्ना12:12-19)

11 यीशु और तेसरै चेलै यरुश्लेमा शहरा कु दख पिछुडै जैतुन नावां री पहाडी दी पौउंचै। तिरे दुई गाऊं थै, जासरै नाउं बैतफगै और बैतनिय्याह थै। तैबै यीशुए आपणै चलेऊ मांझिरे कु दुई चेलै इणै बोलियो भेजै कि 2 “आपणै सामने वाले गाऊं दी डैयौ तिरे पौउचियौ तेभी तुमुकै खाम्बे दी एक गौधेटु मिला बानौ औन्दौ जास माथे ईभी झाऊं कोई ना बोशौ। तेस खोलिओ औरु आणेऊ। 3 अगर तुमु कु कुण पुछा लौ, ‘एस खोलियो केशी निआंई?’ तैबै तुमै बोलियो, ‘एसरी प्रभु कै जुरत आ। प्रभु एस गाधेटु ईभी भेजा औरु।” 4 तैबै सै चेलै डेई गौरे। डेऊंदै-डेऊंदै तिउरे एक घौरा रै दारा कारे एक गौधेटु देखौ बानौ औन्दौ। तैबै चेलै तेस गाधेटु कारे डेईओ तेस खोलदै लागै। 5 तिरे जेजै लोग थै सै चलेऊ लै बोलदै लागै कि, “तुमै का कौरा ई? एस गाधेटु कैलै खोलाई?” 6 यीशुए जिणौ तिउलं बोलौ थौ तिउरे तिणौ बोलौ तिउं आदमीऊ लै। इणौ शुणियो तिउं आदमिउ ए सेउ गौधेटु निणै दैयो। 7 चलेऊ ए सेउ गाधेटु यीशु कारे आणौ तेस माथे आपणै जुडकै बिछाए। तैबै यीशु तेस गौधेटु माथे बोशौ। 8 डेऊंदै-डेऊंदै भौरी लोगुए आपणै-आपणै शौल, चादरु, जुडकै बाटा दी बिछाए। कुछ लोगुए ता डोखरै दी डेईयो हौरी-हौरी डाली आणी काटियो, तैबै बिछाई यीशु रै स्वागता लै बाटा ई धोनी। (जिणौ खास आदमिऊ रै स्वागता लै यहूदी लोग कौराई।) 9 जो लोग यीशु आइलै ओगाडिरे-पिछाडिरे थै लागै औन्दै आण्डदै सै जै जै कार कौरदै लागै कि, “होशन्ना ! तुमै परमेश्वरा रै नाउं कौरिरे आशौ ई। तुमारी जै जै हो ! 10 जिणौ पुराणै जमानै दी दाऊद राजौ थौ, तुमै भी आमारे राजै ई। होशन्ना ! सौरगा दी परमेश्वरा री बौडाई हो !” 11 तैबै यीशु यरुश्लेमा शहरा दी पौउंचौ। तिरे सेऊ परमेश्वरा रै घौरा दी डैओ। तेबी ब्याल हुई गोई थी। तैबै यीशुए तिरे सारौ कुछ देखियो, आपणै चलेउ आइलै राच बिताऊंदै शहरा कु बाइरै बैतनिय्याह गाऊं दी आशौ।

बिणा फौला रौ फेडू रौ पेड

(मती21:18,19)

12 दुजे दिने यीशु और तेसरै चेलै बैतनिय्याह गावां कु यरुश्लेमा शहरा लै डेउंदै लागै। बाटा दी डेउंदै-डेउंदै लागी यीशु कै भूख। 13 दख दूर यीशुए एक फेडु रौ पेड देखौ जो हौरौ भौरौ थौ। यीशुए सुंचौ कि एस पेडा कु कुछ खाणा लै मिला लौ। जेबी यीशु तेस पेडा कारे डैओ, यीशु कै तेस पेडा दी पाचा-पाच मिलै। तेस पेडा दी फौल नाई थै कैलैकि सेउ बौग्त फौला रौ नाई थौ। 14 यीशुए तेस पेडा देखियो तेसलै बोलौ, “आजा कु पोरु तु केभी ना चांई फौलौ।” इरे बूश चलेउरे भी शुणी।

परमेश्वर रै घौरा कु सामाना बेचणै वालै गाड़नै
(मती21:12-17; लूका19:45-48; यूहन्ना2:13-22)

15 तैबे यीशु और तेसरै चेलै यरुश्लेम शहरा दी आशै। यीशु तिरे परमेश्वर री आराधना वालै घौरा ई डैओ। तिरे खौलै दी कुछ लोग समाना बेचदें थै लागै औन्दै। यीशु तिउं समाना बेचणै वालै लोग बाइरै गाड़दें लागै, जेजै लोग तिरे पैसेऊ री ओदली-बोदली कौरणै वालै थै, यीशुए तिउंरी रेडी पौल्टी। तिरे जैजै लोग भेटा चौड़ाउणा लै कबुतर और दुजी चीज बेचा थै यीशुए तिउंरै बोशणै रै पाटडै भी पोरु पौल्टै। 16 यीशुए केजौ भी आदमी समाना कौरौ खौलै री बाटा ई डेरुणै नाई दैओ। 17 तैबे यीशु शिक्षा देन्दै लागै कि, “धर्म शास्त्रा ई इणो आ लिखो औन्दो कि ‘मैरो घौर सारी ज्ञातिउ रै लोगु कालै प्राथना कौरणै रौ घौर आ। पर तुमुए ता जादें पैसेऊ लै समाना बेचियो एऊ लुटणै वालेऊ रौ आड्डौ चाणी ऐरो आ।” 18 इणै शुणियो बौडौ याजक, और यहूदी शास्त्री लोग यीशु झणणै रै बारे दी सुन्दे लागै। कैलैकि सै यीशु देखियो डौरा थै, कि सारै लोग यीशु री शिक्षा शुणियो हँरान थै। 19 ब्यालकै, न्यारै हुईओ, यीशु और तेसरै चेलै तेस शहरा छाडियो वापिस बैतनिय्याह गावां लै डेआ थै।

शुकै औन्दै फेडू रै पेडा कु शिक्षा
(मती21:20-22)

20 दुजै दिनै यीशु और तेसरै चेलै यरुश्लेम शहरा भिलै थै डेउदें लागै औन्दै। तिदें बाटा दी तिउंरे सेउ फेडू रौ पेड जौडी कु शुकौ औन्दो देखो, जासलै यीशुए फिटकार दैओ थौ। 21 पतरसा के याद आशौ कि यीशुए तेस पेस पेडा लै का बोलौ थौ। तैबे पतरसै यीशु लै बोलौ, “ओ गुरु देखा! एजौ फेडू रौ पेड, जासलै तुमुए फिटकार दैओ थौ, एउ शुकौ गो आ।” 22 यीशुए बोलौ, “तुमै हँरान कैलै हुआई? परमेश्वर माथे विश्वास कौरौ। 23 हाऊं तुमुलै सौँचौ बोलाउ कि जुण इयँ पहाडी लै बोला लौ कि, तु उठ, समुन्दरा दी डेउ। और सै शक ना कौरालै आपणै जिवा दी, पर आपु कौरालै इणो विश्वास कि जिणौ मुइरे बोलौ आ तिणौ हुआँ आ, तैबे परमेश्वर तेसलै तिणी ई कौरा आ। 24 कैलैकि हाऊं तुमुलै बोला ऊ कि जो कुछ तुमै प्राथना दी मांगा ई, विश्वास कौरौ कि सेउ तुमुलै मिली ऐरो आ तैबे परमेश्वर तुमुलै तिणी कौरा आ।” 25 यीशुए औजौ बोलौ कि, “जेबी तुमै प्राथना कौरणा लै त्यार हुआई, अगर तेबी तुमुकै याद आशा कि कुणियँ तुमुलै बुरौ कियो आ, तैबे पैहलै तेस माफ कौरौ ताकि परमेश्वर भी तुमारै पाप माफ कौरा। 26 अगर तुमै दुजैउरी गौलती माफ नाई कौरालै, तैबे परमेश्वर भी तुमारै पाप माफ नाई कौरदौ।

यीशु रै अधीकारा माथी सवाल
(मती21:23-27; लूका20:1-8)

27 तैबे यीशु यरुश्लेम शहरा दी आशीओ परमेश्वर री आराधना रै घौरा रै खौला ई डैओ। तिरे यहूदी शास्त्री, बौडै याजक और स्याणै लोग यीशु काए आशै। 28 सै यीशु कु एक स्वाल पुछदें लागै कि, “जो कुछ ताइरे ईज कियो आ, इणै कौरणै रौ हक ताउंकै कुणियँ दैओ आ?” 29 तैबे यीशुए तिउंलै बोलौ, “हाऊं भी तुमु कु एक स्वाल पुछाऊ, तुमै पैहलै तेस स्वाला रौ ज्वाब दैओ, तैबे हाऊं भी तुमुलै बोलाउ कि हाऊं जो कौराऊ कासरै हौका कौरिरे कौरा ऊ। 30 तुमै मुकै ज्वाब दैओ कि यहूना बपतिस्मौ दैणै वालौ कासरै बोलणै माथे बपतिस्मौ दिया थौ? परमेश्वर रै बोलणै माथे या लोगु रै बोलणै माथे दिया थौ?” 31 इणै शुणियो सै लोग आपु मांझी चौपडिंदें लागै, “आमै बोलुलै कि परमेश्वर रै बोलणै माथे, तैबे इणियँ बोलणौ आ इणौ कि तुमुए तेस माथे विश्वास कैलै ना कियो?” 32 अगर आमै बोलुलै कि लोगु रै बोलणै माथे, तैबे लोग रोशियँ ई कैलै कि ऐ लोग माना ई इणौ कि यहूना परमेश्वर री तौरफा कु आशौ औन्दो गुरु आ।” 33 तैबे तिउंरे यीशु लै ज्वाब दैओ, “आमै नाई ज्ञाणदें। आमुकै पौतौ नाई।” तैबे यीशुए तिउंलै बोलौ, हाऊं भी तुमुकै नाई बोलदौ कि जो हाऊं कौराऊ, तेस कासरै हौका कौरिरे कौराऊ।”

बुरै जिमीदार रौ औनेणौ
(मती21:33-46; लूका20:9-19)

12 तैबे यीशुए तिउं यहूदी शास्त्री, बौडै याजक और स्याणै लोगु लै बोलौ, “इयँ कहाणी शुणौ। एक आदमीए अंगुरा रौ बौगिचौ लाओ। तेस बौगिचै रै चारो तौरफा दी तारबाड लाओ। और तिरे बौगिचै दी एकी भिलै अंगुरा रै रस गाड़नै री जागह भी चाणी। और तिरे कामा कौरणै वालेउ के ठेकौ देईयो आपु कुछ बौगता लै दूर देशा लै डेइयो। 2 जेबी अंगुरा री फौसला रौ बौग आशौ, तैबे तिणिए आपणौ एक नुकुर इणै बोलियो भेजौ कि, ‘ठेकेदारु काए डेईयो अंगुरा री फौसला मांझिए कु मैरो हिस्सो आणै ओरु।’ 3 जेबी सेउ नुकुर ठेकेदारु काए आशौ तैबे तिउं ठेकेदारुए पिटौ और खाली हाथे वापिस भेजौ। 4 तैबे मालिके दुजौ नुकुर भेजौ पर तेस नुकुरा री तिउंरे बेईज्जती कौरियो तेसरौ मूंड भानौ। 5 तैबे मालिके औजौ एक नुकुर भेजौ, सेउ झणौ तिउं ठेकेदारुए जिउंदौ पोरु। तिणिए भौरी नुकुर भेजै पर तिउं मांझिए कु कुछ ई पिटै, कुछ ई झणै। 6 ऐबै रौआ मालिका के एका भेजणा लै, सेउ थौ तेसरौ छोहरु। मालिके आपणौ छोहरु भी भेजौ। तिणिए ज्ञाणौ कि, ‘सै ठेकेदारु मैरे छोहरु री इज्जत कौरा लै।’ 7 पर जेबी ठेकेदारुए सेउ छोहरु देखौ आशदें ता सै आपु मांझी चौपडिंदें लागै कि, ‘एउ ता बा इँ जमीना रौ मालिक। आशौ, आमै एस पोरु झणगी तैबे हुआ सा ऐ जमीन आमारी।’ 8 तिउंरे सेउ छोहरु पाकडौ और झणियो बौगिचै कु बाइरै शोटौ।” 9 तैबे यीशुए तिउं यहूदी नेतेउ कु पुछौ कि, “ऐबे सेउ मालिक का कौरा आ? सेउ मालिक बौगिचै दी आशियो तिउं ठेकेदारु झणगईयो बौगिचै रौ ठेकौ कास ओरी कै दिया सा। 10 का तुमुए धर्मशास्त्रा दी इणो नाई पौडौ कि, जो पात्थर घौर चाणनै वालै मिसत्रिउ ऐ बेकार ज्ञाणियो शोटी ऐरो थौ, सेजौ पात्थर घौरा री दवाली रै कुणै दी लागणै वालौ पात्थर बाणौ 11 एजौ काम परमेश्वर कियो आ, और आमारी नौजरी दी नोखौ आ।” 12 तैबे सै यहूदी नेतै यीशु पाकुडनौ चाह थै, कैलै कि सै सोमझी ऐरे थै कि यीशु आमारे बारे दी इयँ कहाणी शुणावा आ पर सै नेते लोग डौरा थै ओरी लोगु कु जो तिरे थै। तैबे सै यीशु छाडियो तिरु पोरु डेरे।

कैसरा लै मामलौ देणौ
(मती22:15-22; लूका20:20-26)

13 तैबे यहूदी नेतेउए कुछ फरीसी और कुछ हैरोदेसा रै राजै रै गुटा रै लोग यीशु काए भेजै। सै चाह थै कि यीशु गलत बुशै बोला ताकि सै एस पाकडा लै। 14 तैबे सै लोग यीशु काए आशै और यीशु लै बोलदें लागै, “ओ गुरु, आमै ज्ञाणी कि तुमै इमानदार ई, तुमै बिल्कुल परवाह नाई कौरदें कि लोग तुमारै बारे दी का सुंचा ई। तुमै छोटै-बोडै कासी री परवाह नाई कौरदें। तुमै ता सिरफ परमेश्वर रै बाटा री सौँची शिक्षा दिया ई। का आमुए रोमी राजै मामलौ देणौ चाई या नाई चाई दैणौ ? 15 रोमी राजै के मामलौ देणौ गलत आ या ठीक आ?” यीशुए ज्ञाणी ऐरो थौ कि, “इरे लोग मू फौसाऊणा लै लागै औन्दै पुछदें।” यीशुए बोलौ, “तुमै मू कैलै पौरखा ई? तुमै मूकाए एक सिक्को आणौ मुकै देखाओ।” 16 तिउंरे एक सिक्को आणियो यीशु के दैओ। तैबे यीशुए पुछौ, “एस सिक्के दी कासरौ नाउं और फोटु आ छौपौ औन्दै?” तिउंरे ज्वाब दैओ, “केसर राजै रौ।” 17 तैबे यीशुए तिउंलै बोलौ, “जो रोमी राजै रौ आ तेस रोमी राजै के दैयो और जो परमेश्वर रौ आ तेस परमेश्वर के दैयो।” यीशु री इणी बुशै शुणियो सै लोग हँरान हुए कैलै कि तिउं के यीशु नाई फौसाईया थौ।

दूजी बारै पैदौ हुणौ और शादी
(मती22:23-33; लूका20:27-40)

18 तैबे कुछ सदुकी लोग यीशु काए आशै। सदुकी लोग एक यहूदी धार्मिक गुटा रै लोग थै जो इणौ माना थै कि मौरणै बासिए जिन्दगी नाई आ। ऐ लोग एजी बशे कौरिरे यीशु फौसाउणौ चाहा थै। सै लोग यीशु कु एक सवाल पुछदें लागै, 19 “गुरुजी, परमेश्वर आपणै सेवक मुसा रै जौरिरे आमुलै हुकम दैओ कि, ‘अगर एक आदमी शादी कौरिओ बिण सन्तानै मौरा सा, तैबे तेसरै भाईरे तेसरी छेउडी आईलै शादी कौरणी जरुरी आ, ताकि तेस मौरै औन्दै भाई रौ

वंश बौणी रौआ।²⁰ ऐबै एकी बारै री बूश शुणौ। एकी घौरा दी सात भाई थै। सारेउ कु बौडै भाइए शदी कौरि, पर सेउ मौरौ पोरु। तेसरी औलाद नाई हुई।²¹ तैबै दुजै भाईए तिऐं छेउडी आइलै शदी कौरि ताकि तेस भाई री औलाद बौणी रौआ। पर सेउ भी मौरौ पोरु, तैबै तेसरी औलाद भी नाई हुई। तैबै विजै भाईए तिऐं छेउडी आइलै शदी कौरि, तैबै सेउ भी मौरौ तिणी पोरु।²² तैबै साता रै साता भाइए तिऐं छेउडी आइलै शदी कौरि, पर सै सारै बिण औलादी रै मौरै। तेथ बासिए सै छेउडी भी मौरि पोरु।²³ ऐबै तुमै बोलौ, अगर मौरणै बासिए जिन्दगी आ, तैबै तिऐं जिन्दगी दी सै छेउडी तिऊं साता भाइऊ मांझियै कु कासरी छेउडी हुआ सा? कैलैकि सै सारेउ री छेउडी थी?"²⁴ तैबै यीशुए तिउंलै बोलौ, "तुमै का ई लागै औन्दै बोलदै? तुमु दी औकल नाई आ? तुमै ना ता धर्मशास्त्रा री बुशै सौमुझदै और ना ता परमेशवर री शौक्ति मानदै। तुमारौ विश्वास गोलत आ।²⁵ जेबी लोग मौरै औन्दै मांझिए कु जिऊंदै हुआ लै, तेबी शदी-ब्याह नाई औन्दी, कैलैकि तेबी सै सौरगा रै स्वर्गदुता बाशी हुणै ई जो शदी नाई कौरदै।²⁶ और मौरणै बासिए जिऊंदै हुणै रै बारै दी तुमुए इणौ पौडौ आ कि परमेश्वरै एक झाडी भितै कु आपणै सेवक मुसा लै बोलौ आ कि, "हाऊं परमेश्वर ऊ। जास्स तुमारै बुजुर्ग इब्राहिम, इसहाक, याकूब भी माना ई।"²⁷ मौरै औन्दै लोग नाई बौलिके जिऊंदै लोग परमेश्वर माना ई। इब्राहिम, इसहाक और याकूब इबी झाऊं परमेश्वर माना ई ता सै जुरुर इबी झाऊं जिऊंदै ई। जैबै तुमै नाई मानदै कि मौरणै बासिए भी जिन्दगी आ, तैबै ता तुमै सौंझाई कु भौरी दूर ई।"

सौबी कु बौडी आज्ञा

(मती22:34-40; लूका10:25-28)

²⁸ एक यहूदी शास्त्री तिऊं लोगु री बुशै थौ लागौ औन्दौ शुणदै। तिणिए जाणौ कि यीशु किणै आच्छे दौंगा कौरिए सा स्वालु रै ज्वाबा दैदै लागौ औन्दौ। तैबै सेउ यीशु कु पुछदै लागौ कि, "आमुकै दैऔ औन्दै हुकमा मांझिए कु केजौ हुकम आ जो सारेउ कु जुरुरी जा मानणौ?"²⁹ यीशुए ज्वाब दैऔ कि, "सारेउ कु जुरुरी हुकम एजौ आ कि, ओ इस्राएल! आमुरो परमेश्वर प्रभु एका सा।³⁰ आपणै पूरै जिवा कौरिए परमेश्वरा कु प्यार कौर, और आपणै पूरै प्राण, पूरै दिमाग, सारी तागता कौरिए परमेश्वरा री सेवा कौर।³¹ दुजौ जुरुरी हुकम ऐ आ कि, 'जिणौ प्यार तु आपु आइलै कौरा ई तिणौ प्यार तुमै आपणै आस-पडोसा रै लोगु आइलै भी कौरौ।' ईउं दुई हुकमा कु बौडौ केजौ भी हुकम नाई आ।"³² तैबै तिणी यहूदी शास्त्री ऐ यीशु लै बोलौ, "गुरुजी, तुमुए बिल्कुल सौंझौ बोलौ आ कि परमेश्वर एका सा। तेस छाडियौ दुजौ कोई भी ईश्वर नाई आ।³³ आमुए परमेश्वरा कु आपणै सारै जिऊ, सारै दिमाग, और सारी तागता कौरि च़ाई प्यार कौरणौ, और आपु जिणौ आपणै आस-पडोसा रै लोगु आइलै भी च़ाई प्यार कौरणौ। भेटा च़ौडाउणै कु और बौली दैणै कु आच्छे आ इणौ कौरणौ।³⁴ जैबै यीशुए देखौ कि एउ आदमी सौमझदारी कौरि ज्वाब दिआ आ तैबै यीशुए बोलौ कि, "तू आपणै जिवा दी परमेश्वरा रौ राज कौराउणै कु दूर नाई आ।" तेथ बासिए यहूदी नेतेउ रै लोगु काए यीशु पौरखुणा लै केजै भी स्वाल पुछणै री हिम्मत नाई पौडी।

मसीह कासरौ छोहरु आ?

(मती22:41-46; लूका20:41-44)

³⁵ यीशुए परमेश्वरा रै घौरा दी, शिक्षा दैदी बारै बोलौ, "यहूदी शास्त्री लोग कैलै बोलाई कि परमेश्वरा रै भेजौ औन्दौ मसीह सिरफ दाउदा रौ छोहरु आ?³⁶ दाऊद राजै ता परमेश्वरा री आत्मा दी हुइऔ बोलौ थौ कि, 'परमेश्वरै मरै प्रभु कु बोलौ, 'मेरी सुल्टी भिलै बोश जेबी झाऊं हाऊं तैरै दुश्मन ना हौराई सौकु'।³⁷ जेबी दाऊद राजै मसीहा लै मरौ प्रभु कौरिए बोलौ थौ, तैबै मसीह ता दाऊदा राजै कु बौडौ आ।" तैबै तिऐं जो भौरी बौडी भीड थी, सै लोग यीशु री शिक्षा बौडी खुशी कौरिए थै लागै औन्दै शुणदै।

शास्त्रिउ कु बौचियौ रौएउ

(मती23:1-36; लूका20:45-47)

³⁸ लोगु लै शिक्षा दैदी बारै यीशुए बोलौ, "यहूदी शास्त्री लोगु रै विचारु कु और तिउरी शिक्षा कु बौचियौ रौएउ। सै आपणै लाम्बै कोटा भिडियौ घमण्डा कौरिए घुमणौ पसन्द कौरा ई। और सै चाहा ई कि लोग बजारु दी तिउरी इज्जत कौरा।³⁹ और सै धार्मिक खुम्बली दी सारेउ कु आगु बोशणौ चाहा ई। अगर तिऊं कुण आपणै घौरै औटावा लै, सै शास्त्री लोग तिऐं भी आच्छी ज़ागह दी बोशणै चाहा ई।⁴⁰ और ऐ शास्त्री लोग गरीब विधवा रौ सारौ कुछ लुटाई। तैबै सै लोगा कै देखालना लै लाम्बी-लाम्बी प्राथना कौरा ई। इणै लोगु लै परमेश्वर भौरी बौडी सौंजा दिआ आ।"

गरीब विधवा रौ दाण

(लूका 21:1-4)

⁴¹ यीशु परमेश्वरा री आराधना रै घौरा री कोठडी रै सामनै बोशियौ देखदै लागौ कि लोग परमेश्वरा लै भेटा दैदै ई लागै औन्दै। काईए सेठ लोग परमेश्वरा लै भौरी भेंट लागै दैदै।⁴² तैबै तिऐं एक गरीब विधवा आशी और तिऐं कोठडी दी दुई सिक्के टालै।⁴³ यीशुए इणै देखियौ आपणै चेलै आपु काए औटाईयौ तिउंलै बोलौ, "हाऊं तुमुलै सौंझौ बोलाऊ कि ईए विधवा छेउडिए इउं सारै सेठ लोगु मांझीआ कु जादौ दाण दैऔ आ।⁴⁴ सेठ लोगुए ता आपणै भौरी धना मांझीए कु कामती धन दैयौ आ परमेश्वरा लै पर इयै गरीब छेउडिए ता आपणी सारी कौमाई परमेश्वरा लै देई एरी आ। इयै आपु काले कुछ ना बौचाऔ।"

परमेश्वरा रै घौरा रै विनाशा री भविष्यवाणी

(मती24:1,2; लूका21:5,6)

13 जेबी यीशु परमेश्वरा री आराधना रै घौरा कु बाइरै निकुलदै थौ लागौ औन्दौ, तैबै यीशु रै एक चेलै यीशु लै बोलौ, "गुरुजी, देखौ एउ परमेश्वरा रौ घौर केती बौडिया सा। केती आच्छे और बौडै-बौडै पात्थर इ इदै लागै औन्दै।"² तैबै यीशुए तिउंलै बोलौ, "जो तुमै देखदै ई लागै औन्दै, जो तुमुकै आच्छे आ लागदै लागौ औन्दौ, इदै पात्थरा माथे पात्थर भी नाई बौचदै, जो दौबा लौ नाई।"

मुसीबत और कलेश

(मती24:3-14; लूका21:7-19)

³ तैबै यीशु नाला पारभिलै जैतून नांवा री पहाडी माथे बोशौ, जिदरा कु परमेश्वरा री आराधना रौ घौर नौजदीक दिशा थौ। तिऐं पतरस, याकूब, यहूना और अन्द्रियास यीशु आइलै थै। तैबै एखुलै दी चेलेउ ऐ यीशु कु पुछौ, "4 जेजी बुशै तुमुए परमेश्वरा रै घौरा रै बारै दी बोली ई, एजी बुशै केभी हुआ ई? आमै किणौ ज़ाणी कि ऐ हुणै वाली ई? का कोई निशाण आसती आ?"⁵ तैबै यीशु तिउंलै बोलदै लागौ, "बौचियौ रोएऊ, कुणियै तुमुलै धोखौ ना च़ाई दैयौ।⁶ कईयै झुठै आदमी आशिऔ बोलाई कि सै परमेश्वरा री तौरफा कु भेजै औन्दै मसीह ई, और भौरी लोग तिऊं पीछु डेउणै ई।⁷ जेबी तुमै शुणालै कि ज़ागह-ज़ागह दी लौड़ाई-झौगडै ई औन्दै लागै औन्दै तेभी तुमै घबराएऊ नाई। इऐ बूश हुणी ता जुरुरी आ। तैबै भी आखरी बौग्त नाई।⁸ एकी जाती रै लोग दुजी जाती रै लोगु रौ विरोध कौराई, एक देश दुजै देशा रौ विरोध कौरा आ। काई ज़ागह दी भुईंचाल हुणै ई और काई ज़ागह दी काल पौडनै ई। ऐ ता दुःख मुसिबता री शुरुआत आ। जिणौ एक छेउडी हौलखुदी बारै पैहलै कु बेदन झेला सा। बासियै तियारी बेदण बौडा सा।⁹ तुमै बौचियौ रौएऊ कैलैकि लोग तुमारै खिलाफा दी हुणैई। सै लोग तुमु पंचाइतु दी, कोर्ट दी पाकडियौ नियाई और तुमु धार्मिक खुबली दी पिटावा ई। मेरी वज़ाह कु बौडै-बौडै राज अधिकाारी काए तुमारी पुछलाछ कौरावा ई। तुमै तिऊं काए मरै बारै दी गवाही दिआ ई।¹⁰ दुनिया री हर जाती रै लोगु कै मरौ खुशी रौ संदेश शुणाउणौ जुरुरी आ। तेथ बासिए आखरी बौग्त आशा आ।¹¹ जेबी तुमु कोर्ट दी नियालै तेभी पैहलै कु सूंचणौ शुरु ना कौरैऊ कि तिऐं का बोलु

लैं। परमेश्वर तुमुलैं बोला आ कि जो तुमुए तिऐ बोलणों आ कैलें कि तेभी बोलणें वालें तुमै नाई, पर परमेश्वरा री पवित्र आत्मा तुमुकु बोलावा। 12 और जुण मूं माथें विश्वास कौराई, तिउरें भाई आपणें भाई लैं, बाब आपणें छेहरु लैं, लोलडै आपणें माँ-बाबा झांगणा लैं दुश्मनु कु पौकडावा ई। 13 और सारें लोग तुमु आईलें दुश्मनी छाडा ई कैलें कि तुमै मूं माथें विश्वास कौराई। पर जेजै आखरी झांऊ मूं माथें विश्वास कौरालैं, सै बौचाई।

बौडी मुसीबत और काल (मती24:15-28; लूका21:20-24)

14 इणों बौग्त आशणों आ जेबी एक भौरी बुरों आदमी आशियों एस परमेश्वरा री आराधना रौ घोर सारेऊ कु शुध्द जगह गान्दी कौरा आ। (पौढणें वालों सौमझालों) तेभी जेजै लोग यहूदा परदेशा दी औलें तिउरें बौचणा लैं पहाडी दी ज़ा डेरुणों। 15 तैबें जो लोग तौंगा दी औणें बोशैं औन्दै, तिउरें समाना आणना लैं भीतरें नाई डेरुणों, तिऐ रूकेउ नाई। 16 जुण तेभी डोखरेऊ, बौगिचेऊ दि औलें, सै आपणें शौल, झुडकें निणालें घोरें ना डेवेऊ। 17 सेजै दिना दी तिउं छेउडी लैं भौरी मुश्किल हुआ आ जो गौरकें ज़िवा री औली और ज़ासकें दूध पीणें वालें लोलडै औलें। 18 सेजै बौगता दी ईणी मुसिबतें हुणी जिणी दुनिया री शुरूआता कु आज़ा झाऊं कादी ना हुई, और ना ता एथ बासिऐ केभी हुणी। 19 तुमै प्राथना कौरदें थाकेऊ लागी कि तेबी शेलें रैं दिन ना चाई हुरे। नाई ता लोगु कें शेलें दी घोरा छाडियों डेरुणों भी मुश्किल हुआ। 20 परमेश्वरें आपणें चुनै औन्दै लोग, जो परमेश्वरा माथें विश्वास कौराई, तिउरें बारें दी सुँचियों सौ बौग्त कम कौरी ऐरों आ। नाई ता एक भी आदमी जिउदों ना रौडणों थौ। 21 जेबैं तुमै शुणालें कि, 'मसीह इदैं आ' या मसीह तिदैं आ' तैबैं तिउं बुशें माथें विश्वास ना कौरैऊ। 22 आखरी बौगता दी झुठें गुरु लोग और झुठें मसीह भी हुआ ई जो निशाण और हैराणी वालें काम देखाईयों लोग परमेश्वरा री बाटा कु टालनै री कोशिश कौराई। पर सै सफल नाई औन्दै। 23 तुमै सौम्भलियों रौएउ कैलेंकि मुइरें तुमुलैं सारी बुशें पैहलें बोली गोई जो हुणें वाली ई।

आदमी रें छेहरु रौ दूजी बारें आशणों (मती24:29-31; लूका21:25-28)

24 तिउं दुःख मुसिबता बासिऐ इणों हुआ जिणों भौरी बौग्त पैहलें गुरु लोगुए आशणें वालें बौगता रैं बारें दी बोलों थौ कि, सुरज कालौ पौडा आ, और जून भी राची प्याशों दैणों बंद कौरा आ। 25 और जेती भी सौरगा दी तारें दिशाई, और ऐ सारें छुटणें ई तोलें और सौरगा री बौडी शौकि हिलणी ई। 26 तैबैं हाऊं, जुण परमेश्वरा री तौरफा कु भेजौ औन्दौ ऊ, पुरी शौकि और शाना कौरिऐ बादला माथें आशा ऊ और सारें लोग मूं देखाई। 27 तैबैं हाऊं आपणें स्वर्गदूत भेजा ऊ, ताकि सै पुरी दुनिया रें कुणें-कुणें कु मरें चुनै औन्दै लोग कौटै कौरा, जो मूं माथें विश्वास कौराई।

फेडु रें पेडा रौ उदाहरण (मती24:32-35; लूका21:29-33)

28 फेडु रें पेडा कु कुछ औनेणों शिखों कि जेबी फेडु रें पेडा रें शाउंटें कौउलें हुआई और तेसदी पाच लागदें लाग़ा ई तेभी तुमुकें पौतों लाग़ा कि फौल दैणें रौ बौग्त आशी ऐरों आ। 29 तिणी जेबी तुमै देखा लैं कि एजी बुशें हुआ ई, तेभी ज़ाणेऊ कि मरौ दूजी बारें आशणें रौ बौग्त हुई ऐरों आ। 30 हाऊं तुमुलें सौच्चौ बोलाऊ, एजौ पौस्तौ खौत्म हुणें कु पैहलें एजी बूशें पुरी हुआ ई। 31 सौरग और पृथ्वी भी टौला ई, पर मेरी बूशें केभी ना टौलदी।

उज्जी रौएऊ (मती24:36-44)

32 मरें दूजी बारें आशणें रैं बौगता रैं बारें दी कोई ना ज़ाणदों, सिर्फ परमेश्वरा कें आ पौतौ। ना ता स्वर्गदूता कें, और ना ही मुकें आ पौतौ। 33 शुणों! तुमै उज्जी रौएउ कैलेंकि तुमै नाई ज़ाणदें कि सेजौ दिन केभी आशा आ। 34 जिणों एक बौडै घोरा रौ मालिक घोरा छाडियों परदेशा लैं डिया आ।

आपणों घोर संभाला आपणें नुकरू कें अलग-अलग काम दिआ आ। 35 एथीलैं उज्जी रौएऊ, कैलें कि तुमै नाई ज़ाणदें घोरा रौ मालिक केबी आशा सा, ब्याली या आधी राचीऐ या कुखडै बाशदी बारी या दोउती राची। 36 इणों ना चाई हूओ सेउ खरक चार आशियों तुमु सुतें औन्दै देखा। 37 और ज़ो हाऊं तुमुलें बोलाऊ, तेसी इ सौभी आइलें बोलाऊ : उज्जी रौएऊ!"

यीशु रें बिरोधा दी यीशु पकुडना लैं चाल (मती26:1-5; लूका22:1,2; यूहन्ना11:45-53)

14 दुई दिना बासिऐ फसह और बिण संजेडै री रोटी रौ साजौ हुणें वालो थो। यहूदी शास्त्री और बौडै याजक यीशु पौकडाईओ झांगणों च़ाह थै। 2 पर सै बोला थै कि एस साजै रैं दिना दी नाई पाकुडदैं। नाई ता भीडा रैं लोग हालौ मौचावा ई। एथकु सै लोग यीशु चलाकी कौरिऐ चोरुइयों एखुले दी पाकुडनै च़ाहा थै।

बैतनिय्याह दी यीशु रोटी खांदें (मती26:6-13; लू21:1-8)

3 यीशु बैतनिय्याह गांवा दी शामौना रें घोरा दी आशौ जुण पैहलें कोडी थो। जेबी सै रोटी खांदें थै बोशैं औन्दै तेभी तिऐ एक छेउडी आशी ज़ासरें हाथा दी ज़ौडी-बुटी री खुशबुदार तेला री शीशी थो। सेऊ तेल भौरी शुध्द और कीमती थो। तिऐ छेउडीऐ सै शीशी च़ोडी और सेऊ तेल यीशु रें मुंडा तौलें पेरौ। 4 तैबैं कईऐ लोग जो तिऐ बोशैं औन्दै थै सै आपु मांझिऐ रोशुईओ बोलदें लागें कि, "एऊ मेहंगो तेल बर्बाद कैलें कियौ औलो? 5 एस तेला री कीमत एती आ कि जेती एक आदमी एकी साला दी ध्याडी कौमावा आ। एस तेल बेचियौ पैसै गरीब लोगु दी बांटणे चाई थै।" सै लोग तिऐ छेउडी लैं धौमकी भी दैंदें लागें। 6 तैबैं यीशुऐ तिउं लोगु लैं बोलौ, "तुमै इयें छेउडी लैं कैलें रोशिआई? इयें तंग कैलें कौराई? इयें छेउडिऐ मरें भौलें लैं कियौ आ। 7 गरीब लोग ता तुमु आईलें सौदा साथा ई रौआई। तिउं आईलें जेबी भी भौलाई कौरणें च़ाह लैं कौरी बौला ई। पर हाऊं तुमु आईलें सौदा नाई रौईदौ। 8 इयें छेउडिऐ जो भौलाई कौरणी थी कौरी एरी आ। इयें छेउडिऐ मरें मुंडा दी खुशबुदार तेला पेरिओ मौरणें कु पैहलें मरें ज़िसम दबाऊणा लैं तैयार कौरी ऐरों आ। 9 हाऊं तुमुलें सौच्चौ बोलाऊ, पुरी दुनिया दी ज़िऐ-ज़िऐ परमेश्वरा रें खुशी री खौबर शुणावा लैं, तिऐ-तिऐ इयें छेउडी रैं कामा री बुशें भी हुआ ई।"

यहूदा रौ विश्वासघात (मती26:14-16; लूका22:3-6)

10 तैबैं करियोत गांवा रौ यहूदा, जुण यीशु रें बारह चुनै औन्दै च़ेलेऊ मांझिऐ कु एक थो, सेउ बौडै याजकु काऐ डैओ और बोलौ कि, हाऊं यीशु पौकडावा ऊ।" 11 इणें शुणिओ सै लोग भौरी खुश हुरे और यहूदा कें पैसेऊ दैणें रौ वाईदौ कियौ। तैबैं तहूदा यीशु पौकडाऊणा लैं मौकौ लौडदैं लागौ।

च़ेलेउ आइलें आखरी बार साजै री रोटी खाणी (मती26:17-25; लूका22:7-14, 21-23; यूहन्ना13:21-30)

12 तैबैं बिण संजेडै री रोटी रें साजै रौ पैहलौ दिन थो जेबी यहूदी लोगु रें हर टौबर फसह रें गाबडु री बौली च़ौडावा थै। तैबैं यीशु रें च़ेलेउऐ यीशु कु पुछौ कि, "गुरुजी, तुमै किरें च़ाहा ई कि आमैं तुमु कालें साजै री रोटी खाणें रौ इन्तज़ाम कौरलें?" 13 तैबैं यीशुऐ आपणें च़ेलेऊ मांझिआ कु दुई च़ेले भेजै और तिउलें बोलौ कि, "तुमै यरुश्मेमा शहरा दी डैओ। तिऐ तुमुकें एक आदमी मिला जुण काछा माथें पाणी री बोटलौऊ चुंगिओ आ डेउदें लागौ औन्दौ। तुमै तेस आदमी पीछु डेवेऊ। 14 जेजै घोरा दी सेऊ आदमी डैआ लौ, तुमै तेस घोरा रैं स्याणें लैं बोलेऊ कि गुरु इणों बोला आ, "मुंकालें तैयार कियौ औन्दौ कौमरौ केजौ आ? 15 तैबैं सेऊ घोरा रौ स्याणों तुमुकें तेस घोरा री माथली मंजली दी सौज़ाओ औन्दौ बौडौ कौमरों देखावा आ। तुमै तिऐ साजै री रोटी खाणें रौ इन्तज़ाम कौरैऊ।" 16 तैबैं च़ेले यरुश्मेमा शहरा दी डेवै। जिणों-जिणों यीशुऐ बोलौ थो तिणी तिउं आईलें हूओ। तैबैं तिउरें तिऐ साजै री रोटी रौ इन्तज़ाम कियौ। 17 ब्यालकें यीशु आपणें बारह चुनै औन्दै च़ेलेऊ

आईलै सेजें घौरा दी आशे ज़िरे साजें री रोटी खाणें रौ इन्तज़ाम थौ कियो औन्दौ। 18 जेबें सारें बोशियाँ रोटी खांदें लागें तैबें यीशुए बोलौ, “तुमै सारें ई इदें मुंआइलै रोटी खांदें लागें औन्दै। हाऊं तुमुलै सौच्चौ बोलाऊ कि तुमु मांझिरे कु एक आ जो मुं पौकड़ावा आ।” 19 इणै शुणियाँ सै सारें परेशान हुए और एक-एक कौरिरे सारें बोलदें लागें, “का हाऊं ता नाई?” 20 तैबें यीशुए बोलौ, “सेऊ तुमु बारह चुने औन्दै चलेउ मांझिरे आ, ज़ुण मुं आईलै बोशियाँ मैरें खोरु कु रोटी चोबियाँ आ खांदें लागें औन्दौ। 21 हाऊं, ज़ुण परमेश्वरा री तौरफा कु भेजौ औन्दौ ऊ, मैरें मौरणौ ता इणौ भी आ लिखौ औन्दौ। फिटकार तेस आदमी लै ज़ुण मुं पौकड़ावा आ। तेस आदमी लै तैबें आच्छौ थौ कि तेसरौ ज़न्मा ना हुआ थौ।”

प्रभू भोज

(मती26:26-30; लूका22:14-20; 1कुरुन्थियों11:23-25)

22 रोटी खांदी बारें यीशुए एक रोटी चूंगी और परमेश्वरा रौ धन्यवाद कौरिओ रोटी चोड़ी और आपणें चलेऊ लै देई और बोलौ, “ईयै रोटी मैरें ज़िसम सौमझिओ खाओ।” 23 तैबें यीशुए अंगुरा रै रौसा रौ खोरु चूंगौ और परमेश्वरा रौ धन्यवाद कौरिओ आपणें चलेउ लै दैओ और सै चेलै तेस खोरु कु बारी-बारिरे पिंदें लागै। 24 तैबें यीशुए बोलौ, “एस आंगुरा रौ रौस तुमै मैरें लोऊ सौमझौ जो भौरी लोगु तिउरै पापा री सौजा कु बोचाउणा लै बोइणें वालौ आ। मैरें मौरणें कु परमेश्वर लोगु आईलै एक नौउंओ रिशतै रौ वाईदौ पाक्कौ कौरा आ। 25 हाऊं तुमुलै सौच्चौ बोलाऊ कि एथ बासिरे हाऊं अंगुरा रौ रौस दुजी बारें नाई पिंदै तेबी झाऊं जेबी झाऊं राजौ बौणियाँ आशियाँ ना पिऊ।” 26 तैबें भजन गाईयौ सै घौरा कु बाईरें निकलियाँ जैतून पहाड़ी लै डेवै।

पतरसा री इनकार कौरनै री भविष्यवाणी

(मती26:31-35; लूका22:31-34; यूहन्ना13:36-38)

27 बाटा दी डेऊंदै-डेऊंदै यीशुए बोलौ, “धर्मशास्त्रा दी इणौ आ लिखौ औन्दौ कि, ‘हाऊं भेरालडु झांगा ऊ, तैबें भेरी ओरु-पोरु भागा ई।’ इणी मुं भी पौकड़ाउईयौ झांगा ई, तैबें तुमै सारें विश्वासा ई डौगमौगावा ई और मुं छाडियाँ भागा ई। 28 पर हाऊं जिउंदौ हुईओ तुमु कु आगाडिरे गलील परदेशा ई पौउंचाऊ। तिरे हाऊं तुमु कै मिला ऊ।” 29 पतरसै यीशु लै बोलौ, “चाऊ सारें विश्वासा दी डौगमौगाइओ भागा लै, तैबें भी हाऊं तुमु छाडियाँ ना डेउंदौ।” 30 इणै शुणियाँ यीशुए पतरसा लै बोलौ, “हाऊं ताउलै सौच्चौ बोलाऊ कि आज राची कुखडै रै दुई बारें बाशणें कु पैहलै तु चिया बारें आपणें मुंआ कु बोलाई कि तू मुं नाई ज़ाणदौ।” 31 तैबें पतरसै औजौ भी काठै कौरिरे बोलौ कि, “चाऊ मुं ताऊं आइलै मौरणौ भी जा लौ, तैबें भी हाऊं केभी ना बोलदौ कि हाऊं तुमु नाई ज़ाणदौ।” और सारें चेलै इणौ लागै बोलदें।

गतसमनी दी प्राथना

(मती26:36-46; लूका22:39-46)

32 तैबें सै एकी बौगीचै दी पौहुंचे जासरौ नाऊं गतसमनी थौ। तिरे यीशुए आपणें चलेऊ लै बोलौ, “तुमै इदें बोशी रौएऊ जेबी झाऊं हाऊं पार्थना कौरुलै।” 33 तैबें यीशुए तिऊं मांझिआ कु पतरस, याकूब और यूहन्ना आपू आइलै दौख आगुडै नियें। तेबी यीशु भौरी दुःखी थौ। 34 यीशुए तिऊं चिन चलेउ लै बोलौ कि, “हाऊं भौरी दुःखी ऊ, इदरा झाऊं कि मैरें प्राण डेऊणें वालै ई। तुमै इदें ऊज्जी रौएऊ।” 35 यीशु दौख आगुडै डेईयौ धौनी ज़बीना माथे मूंडा लाईयौ प्राथना कौरदें लागौ कि कौरी बोला ई ता एस दुःखा रौ बौग्त मू काए रौ पोरु टाल। 36 यीशुए बोलौ, “ओ बाब! तुमै ता सब कुछ कौरी बोलाई। एस दुःखा रौ बौग्त मूकाए रौ पोरु टाल। तैबें भी मेरी नाई बोल्लिके तेरी मौज्जी चाई पुरी हुई।” 37 तैबें यीशु आपणें चलेउ काए आशौ देखे ता सै थै सुतै औन्दै। यीशुए शामौन पतरसा लै बोलौ, “शामौन, तु सुतदें ई लागौ औन्दौ? का तू एकडी घौडी भी उज्जी नाई रौई बौलदौ? 38 तुमारौ जिऊ ता मैरें हुकमा मानणा लै तैयार आ, पर तुमारै जिवा री ईच्छा पूरी कौरणै री शक्ति तुमु दी नाई आ। ज़ागदें रौएऊ और प्राथना कौरैऊ ताकी तुमै

ईन्तियाना दी फेल ना हुआ।” 39 यीशु तीदरा कु डैओ और तिणी प्राथना कौरदें लागौ जिणी पैहलै की थी। 40 जेबी यीशु दुजी बारें आशौ तेबी भी सै चेलै सुतै औन्दै थै कैलै कि तिउंकें भौरी नीज थी लागी औन्दी। जैबें यीशु तिऊं उज्जियावा थौ ता सै शौरमा रै मारै यीशु लै कुछ ना बोली बोला थै। यीशु तौइरें प्राथना कौरदें डैयो। 41 तैबें चीजी बारें यीशु सुतै औन्दै चलेउ काए आशौ और तिउलै बोलौ, “का तुमै औजौ सुती गौए? बस। उठौ! देखौ! सौ बगत आशी ऐरौ आ जेबी हाऊं, ज़ुण परमेश्वरा री तौरफा कु भेजौ औन्दौ ऊ, पापी लोगु रै हाथा दी पकड़ाइणें वालौ ऊ। 42 उठौ आगाऊं आपडौ। देखौ मुं पकड़ाउणें वालौ आशी गौ आ।”

यीशु धोखे दी पाकुडनौ

(मती26:47-56; लूका22:47-53; यूःसा18:3-12)

43 यीशु इणौ बोलदें थौ लागौ औन्दौ कि खरकचार यहूदा, जो चुने औन्दै बारह चलेउ मांझिया कु एक थौ, तिरे आशौ। तेस आइलै एक भौरी भीड़ थी ज़ासकै तलवारें और डीगें थै। सै भीड़ बौडें याजक यहूदी शास्त्री और स्याणें लोगुए भेजी औन्दी थी, यीशु पाकुडणालै। 44 यहूदें पैहलै बोलौ औन्दौ थौ कि, “जासरें गौलै दी घीणा लाइयो खोबू देउ लै सौ इ आ यीशु। तेस पाकडेउ और सौभालियाँ निणैऊ।” 45 तैबें यहूदा खरकचार यीशु काए आशौ और बोलौ, “गुरी जी!” साथई तेसरें गौलै दी घीणा लाइयो खोबू दैओ। 46 तैबें तिऊं लोगुए आगुडै आशियाँ यीशु पाकडौ। 47 इणै देखियाँ एकी चेलै आपणी तलवार गाडियाँ परधान याजका रै नुकरा रौ कौथू पोरु पा काटौ। 48 यीशुए तिऊं लै बोलौ, का तुमै मूं डाकू समझियाँ तलवारी और डीगें कौरौ पाकुडदें आशै औन्दै? 49 “हाऊं ता रोज तुमु आइलै रौआ थौ और परमेश्वरा रै घौरा दी शिक्षा दिआ थौ। तेबी तुमै मूं आसानी कौरौ पाकडी बोला थै। पर इणौ सारौ एथिलै हुओ ताकी धर्मशास्त्रा दी लिखी औंदी आशणें वालै बौगता री बूश पूरी हुआ।” 50 तैबें सारें चेलै यीशु छाडियाँ पोरु भागै। 51 तैबें एक जवान आदमी आपणें नांगे जिस्मा दी एक चादरु कौशटियाँ यीशु पिछाडी- पिछाडिरे थौ डेउंदै लागौ औन्दौ। तिऊं लोगुए सेउ आदमी पाकडौ। 52 पर सौ आदमी आपणौ चादरु छाडियाँ तिदरु नांगी भागौ पोरु।

बौडी खुन्बली काए यीशु

(मती26:57-68; लूका22:54,55, 63-71; यूहन्ना18:13,14, 19-24)

53 ज़ुणी लोगुए यीशु पाकडौ थौ तिउरें यीशु परधान याजका रै घौरा दी नियाँ। तिरे सारें बौडें याजक, यहूदी लोग और स्याणें लोग कौठै थै हुए औन्दै। 54 पतरस यीशु पिछाडी- पिछाडिरे परधान याजका रै घौरा रै खौलै झाऊं डैओ। पतरस तिरे चोउकीदारु काए बोशियाँ आगी तापदें लागौ। 55 बौडै याजक और सारें यहूदी फैसलै कौरने वाली खुन्बली रै लोग चाहा थै कि कोई यीशु रै विरोधा दी गवाई दिआ जिणें कौरिरे यीशु लै मौरने री सज़ा मिला। 56 काफी लोग यीशु रै विरोधा दी गवाई दैन्दै लागै पर तिउरी बुशै आपू मांझिरे नाई मिला थी। 57 तैबें काई लोग खौडै हुईयो झूठी गवाई दैन्दै लागै कि, 58 आमुए शूणौ आ कि इयौ बोला, ‘हाऊं आदमी रै चाणौ औन्दौ परमेश्वरा रौ घौर दालियाँ चिआ दिना दी एक दजौ परमेश्वरा रौ घौर चाणाऊ जो आदमी रै हाथा कौरिरे नाई आ चाणौ औन्दौ।’” 59 तैबें एजी बूशा दी भी तिउरी गवाई एकी दूजै आइलै नाई मिला थी। 60 तैबें परधान याजक आपू खौडी उठियाँ तिऊं सारेउ रै सामनै यीशु कु पुछदें लागौ, “तू जवाब कैलै ना देन्दौ? इउं गवाइउ रौ ताउंकें कोई जवाब नाई आसतौ?” 61 पर यीशु चुटुक थाकौ। तिणिए कुछ भी जवाब ना दैओ। तैबें परधान याजक औजौ पूछौ, “का तू परमेश्वरा रौ छोहरु मसीहा ई?” 62 यीशुए बोलौ, “ओ। और तुमै देखाई कि हाऊं ज़ुण परमेश्वरा री तौरफा कु भेजौ औन्दौ ऊ, परमेश्वरा री सुल्टी भिलै बोशियाँ राज कौराउ, और बादलु दी स्वर्गा कु आशाऊ।” 63 इणै शुणियाँ परधान याजकें रोशुइयो आपणें जुडकै चीरियाँ बोलदें लागौ कि, आबे आमुकें कासी री गवाई री ज़ुरत नाई आसती 64 कैलै कि आमुए आपू शूणी गौ आ कि इयो परमेश्वरा री बुराई कौरा आ। आबे तुमै इणौ बोलौ कि तुमारौ फैसलो का सा?” सारें लोगुए बोलौ कि यीशु लै मौरने री सज़ा मिलणी चाई। 65 तैबें तिऊं मांझिआ कु कुछ लोग यीशु रै मुंआ दी थूकदें लागै। यीशु री आखी दी कापडौ बानियाँ सै लोग तेस पिटदें लागै और तेसरौ मज़ाक उड़ाइयो बोलदें लागै,

“अगर तू गुरु ई ता बोल, ताऊंदी कुणिए लाई आ?” और परधान याजका रै चोउकी दारुए भी यीशु दी थापै लाई।

पतरसा रै इन्कार

(मती26:69-75; लूका22:56-62; यूहन्ना18:15-18, 25-27)

66 जेबी यीशु री पूछताछ हुंदै लागी आँदी, तेबी पतरस तौल भिलै खोलै दी थी। तैबे परधान याजका री एक नुकराण तिए आशी। 67 तियांए पतरस आगी तापदै देखौ ता तियांए तेस भिलै बोडै ध्याना कौरिए देखियौ बोलौ, “तू भी ता नासरता रै यीशु आइलै साथा ई थी।” 68 तैबे पतरस बोलौ, “तू का बोलाई? हाऊं तेस नाई जाणदौ।” पतरस खोली काए आशौ और तेबी कुखडौ एकी बारै बाशौ। 69 तैबे तिए नुकराणिए तिए खौडै लोगु लै बोलौ कि, “इयौ आदमी यीशु रै साथी आ।” 70 तैबे पतरस दूजी बारै मुकरौ कि, “हाऊं तेस नाई जाणदौ।” दख बोग्ता बासिए तिए जो लोग थे तितरे पतरसा लै बोलौ, “तू ता बिल्कुल गलील परदेशा रै आदमी लागी। तू जरुर यीशु रै साथी मांझीया कु एक ई।” 71 तैबे पतरस कसमा खांदै लागौ, “हाऊं तेस आदमी बिल्कुल भी ना जाणदौ। अगर हाऊं झूठ बोललौ ता परमेश्वर मुलै सजा चाई देई।” 72 तेबी खरकचार कुखडौ दूजी बारै बाशौ। पतरसा कै आद आशी कि यीशुए तेसलै बोलौ थौ कि, “कुखडै रै दुई बारै बाशणै कु पैहलै तू चिआ बारै मुकरा ई कि तू मू नाई जाणदौ।” एजी बूश याद कोरियौ पतरस जोरै जोरै लेरदै लागौ।

पिलातुसा रै सामने यीशु

(मती27:1,2, 11-14; लूका23:1-5; यूहन्ना18:28-38)

15 दोउत राची यहूदी शास्त्री, बौडै याजक और स्याणै लोग, जो यहूदी फेसलै कोरनै वाली खुबली रै जोणै थे। तितरे आपु मांझीए चौपडुइयौ यीशु तिकरु बानियौ पिलातुसा काए नियौ। (पिलातुस यहूदा परदेशा दी रोमी सरकारा रै बौडै आफसर थौ।) 2 पिलातुसै यीशु कु पूछौ, “का तू यहूदी लोगु रै राजौ ई?” यीशु ए जवाब दैओ, “ओ! तुमै ता आपु ई बोलदै लागै औन्दै।” 3 तैबे बौडै याजक यीशु माथे भौरी कुछ गलत आरोप लाइदै लागै। 4 पिलातुसै यीशु कु ओजौ पूछौ, “का तू जवाब नाई दैन्दै? इयै लोग तैरै विरोधा ई भौरी कुछ ई बोलदै लागै औन्दै।” 5 तैबे भी यीशुए कुछ ना बोलौ। यीशु रै चुटक रौइणै कु पिलातुस भौरी हैरान हुआ।

मौरने री सौजा री आज्ञा

(मती27:15-26; लूका23:13-25; यूहन्ना18:39-19:16)

6 हर साल जेबे यहूदी लोग फसह रौ साजौ मनावे थे तैबे रोमी सरकारा री तौरफा कु यहूदी लोगु रै बोलणै माथे एक कैदी आज्ञाद हुआ थौ। 7 बरअब्बा नावां रौ एक आदमी जो कैदीऊ आइलै कैदा इ बन्द थौ, जुणिए झोगडै कोरदी बारी एकी रौ खून कियौ थौ। 8 तैबे सारी भीड़ पिलातुसा काए आगुडै डेइयौ पिलातुसा लै बोलदै लागै कि, “जिणौ तुमै हर साल कोरई। एजी बारै भी तिणौ कोरौ। आमूलै एक कैदी आज्ञाद कोरौ।” 9 पिलातुसै तितलै जवाब दैओ, “का तुमै चाहा ई कि हाऊं तुमुलै एस यहूदी रौ राजौ आज्ञाद कोरु?” 10 कैलै कि सेऊ ज्ञाणा कि बौडै याजक लोग यीशु री मीश कोरई और यीशु तैबे इ पकडाओ आ। 11 बौडै याजकु ए भीड़ा रै लोगु लै बोलौ कि यीशु नाई बल्कि बरअब्बा नावां रौ कैदी मांगौ। तैबे भीड़ा रै लोग मांगदै लागै कि बरअब्बा नावां रौ आदमी आज्ञाद कोरौ। सेजै बोग्तै रोमी सरकारा री जेला दी कुछ इणै कैदी भी थे जुणिए रोमी सरकारा रै बिरोधा ई आन्दोलन कोरियौ काई लोग ज्ञांगे ई। इउं मांझिए एक बरअब्बा नावां रौ कैदी भी थौ। 12 तैबे पिलातुसै पूछौ कि, “हाऊं यहूदी लोगु रै राजे रौ का कोरु?” 13 भीड़ा रै लोगुए जोरै बोलौ, तेस कूस माथे चडाओ। 14 पिलातुसै बोलौ, “कैलै? तिणिए का बूरौ कियौ आ?” पर से लोग ओजौ भी जोरै-जोरै बोलदै लागै कि, “एस कूस माथे चोडाओ।” 15 तैबे पिलातुसै भीड़ा रै लोग खुश कोरना लै बरअब्बा नावां रौ कैदी आज्ञाद कियौ। और यीशु रोमी सिपाइऊ कै कोडै मारना लै और कूस दी चडाउणा लै साम्बी ऐरौ आ।

सिपाइउ रै जोरिए यीशु री बेइज्जती

(मती27:27-31; यूहन्ना19:2,3)

16 रोमी सिपाइउ ए यीशु पिलातुसा रै महला री खोली भीतै निंओ। तिए तितरे सारै सिपाइ कौठै किये। 17 तैबे यीशु रौ मजाक उडाउणा लै यीशु कै एक बेंगनी रौंगा रौ चोगौ भिडाओ जिणौ राजे लोग भीड़ा थे। और तितरे यीशु रै मुंडा दी काँडेऊ रौ एक ताज बेलिओ लाओ। 18 तैबे सै लोग “यहूदीउ रै राजे री जै जै” बोलियौ यीशु रौ मजाक उडाऊंदै लागे। 19 सिपाइ घडी-घडिये यीशु मुंडा दी छिवांटी री लाईदै लागे। और यीशु माथे थूकदै भी लागे। और सै मजाका दी यीशु रै सामने धोनी झुकियो नमस्तै कोरदै लागे 20 जेबे तितरे आच्छा कोरिए मजाक ऊडाओ तैबे सिपाइउए सै बेंगनी रौंगा रै जुडकै उतारियौ तेसकै तेसी रै जुडकै भिडाए। तैबे यीशु कूस माथे चडाउणा लै तेस शहरा कु बाइरै निंओ।

यीशु कूस माथे चोडाऊणौ

(मती27:32-44; लूका23:26-43; यूहन्ना19:17-27)

21 यीशु कूस आपणै काछा माथे चुंगियो आणुडै थौ लागौ औन्दौ। तैबे बाटा दी सिपाइउए एक आदमी पाकडौ जबर जोस्ती तेसकु कूस चुंगाउणै भेजौ। सौ आदमी कुरेन नांवा रै देशा रौ रौइणै वालौ थौ। सौ गांवा कु आशदै थौ लागौ औन्दौ। तेस आदमी रौ नाऊं शमौन थौ जो सिकन्दर और रूफुस नावां रै दुई छोहरू रौ बाब थौ। 22 कूस माथे चडाऊणा लै एक जगाह थौ ज़ासरौ नाऊं गुलगुता थौ। गुलगुता रौ मतलब आ खोपडी जीणी जगाह। तितरे यीशु तिए आणौ। 23 कूस माथे चडाऊणा कु पैहलै बेदणी मिटाउणा लै तितरे अंगूरा रै रसा दी मुर नावां री जौडी-बूटी मिलाइयौ यीशु लै पिलाउणा री कोशिश की पर यीशुए नाई पियौ 24 तैबे यीशु कूस माथे छाडियौ तेसरै हाथा-बांगणउ दी प्रेगै ठासी और यीशु रै जुडकै रोमी सिपाइउए पौची टालियौ आपु मांझिए बाँटे। 25 दोउती लगभग नौ बाजे तितरे यीशु कूस माथे चडाओ। 26 कूस माथे एक तख्ती भी टांगी ज़ासदी यीशु लै लिखौ औन्दौ थौ कि, “यहूदी लोगु रौ राजौ।” 27 यीशु आइलै दुई डाकु भी थे जो अलग अलग कूस माथे थे चडाए औन्दै। एक थौ यीशु री सुल्टी भीलै और एक थौ उल्टी भीलै। 28 जिणौ धर्मशास्त्रा दी भौरी पैहलै यीशु रै बारै दी आशणै वाले बोग्ता री बूश कोरियौ लिखे थौ कि, “सौ कैदीऊ मांझिए गिणौ आ,” सेजौ वचन पूरौ हुआ आ। 29 तिए बाटा दी आशणै-डेउणै वाले लोग भी यीशु री बेइज्जती थे कोरदै लागै औन्दै। सै आपणै मुंडा हिलाई-हिलाईयौ थै बोलदै लागै औन्दै कि, “अरे, परमेश्वर रौ घोर ढालियौ चिजे दिना दी तेस चाणनै वालौ। 30 आबे कूस कु उतरियौ देखाऊ और आपु ता बच।” 31 यहूदी शास्त्री और बौडै याजक भी यीशु रौ मजाक उडाइयौ बोलदै लागै कि, “इणिए ता दूजे लोग बोचाए ई आबे आपु ना बोची बोलदौ। 32 इयौ आपूलै मसीह और इस्रायला रौ राजौ माना आ। अगर इयौ आमारै सामने कूस कु उतरा लौ ता आमै भी एस माथे विश्वास कोरी ई।” यीशु आइलै जो दुइया भीलै डाकु थै टांगै औन्दै सै भी यीशु रौ मजाक उडाऊंदै थे लागै औन्दै।

यीशु रै प्राण छाडनै

(मती27:45-56; लूका23:44-49; यूहन्ना19:28-30)

33 दुसै लगभग बारह बाजे सारै देशा दी ईनारौ हुआ और चिआ घांटे ज्ञाऊं ईनारौ थौ। 34 दुसकै चिआ बाजे यीशुए जोरै आपणी बोली दी बोलौ, “इलोई, इलोई लमा शबकनी” ज़ासरौ मतलब आ, “मैरै परमेश्वर! मैरै परमेश्वर! ताएँ हाऊं कैलै छाडी ऐरौ ऊ?” 35 तिए जो लोग खौडै थे, कुछ लोगुए इणै शुणियौ गलत समझियौ बोलौ, “शुण! इयौ एलियाह गुरु लै आ आटाइदै लागौ औन्दौ।” 36 एक आदमी फटा मारियौ एक स्याईचूश सिरकै दी भिजाइयौ एक लांबे डिगै दी बानियौ यीशु लै दैन्दै लागौ ताकी यीशु तेस चुशियौ पिया। तैबे कुणिए बोलौ, रुक! देखी ऐरी कि एलियाह गुरु एस कूस कु उतारदै आशा कि नाई। 37 यीशुए ओजौ राड मारी और तेबी प्राण छाडै। 38 तियां ताकै यरुश्लेम शहरा दी परमेश्वर रै घौरा भितै सारेउ कु शुद्ध जगाह दी सामने जो परदौ थौ, सौ माथा कु तौल ज्ञाऊं चेरुइयौ दुई भिलै हुआ। 39 यीशु काए जो

रोमी सिपाइउ रों आफसर थौ तीणिए देखौ कि, यीशु किणौ मोरो आ, तैबे तीणिए बोलौ, “सौन्नी ई, इयौ आदमी परमेश्वरा रों छोहरु थौ।” 40 काईरे छेउड़ी दूरा कु थी लागी ऐंटी देखदैं। इयै छेउड़ी गलील परदेशा कु थी यीशु आइलै यरुशेमा दी आशी औंटी, तिउं मांझिरे मगदल गांवा री एक मरियम थी और दूजी याकूब और योसेसा री आमा मरियम थी, और सलोमी नावां री एक छेउड़ी भी थी। 41 औंजौं भी मोकती छेउड़ी थी तिरे। जेबी यीशु गलील परदेशा दी थौ तेबी इयै सारी छेउड़ी तेस पिछु डेईयौं तेसरी सेवा कौरा थी।

यीशु ओडाची दी छाड़नौ

(मती27:57-61; लूका23:50-56; यूहन्ना19:38-42)

42 जैबे ब्याल हई ऐरी ता एथीलै कि तैयारी रों दीन थौ, जो सब्ता रें दिना कु एक दिन पैहलै हुआ थौ। 43 तेबी अरमतिया रें रौइणा वालौ यूसुफ आशौ जो बौड़ी खंबली रों जौणौ थौ और आपु भी परमेश्वरा री राज्या री बाट लोड़ा थौ तिणिए हिम्मत छाड़ियौं पिलातुसा कु यीशु रों मौड़ौ मांगौ। 44 पिलातुस हैरान हुआ कि यीशु एती शीग्री किणौ मोरो आ। तैबे तीणिए सौ आफसर औटाओ जुणिए यीशु कूसा माथे चड़ाओ थौ। पिलातुस आफसर कु पूछौ का यीशु मोरी गौ आ? 45 जेबी तीणी रोमी सिपाइउ रें आफसर बोलौ कि यीशु मोरी गौ आ तैबे पिलातुस यीशु रों मौड़ौ निणै दैओ। 46 तैबे युसुफे लाठे रों कापड़ौ खरीदियौं आणौ। और यीशु रों मौड़ौ कूसा कु धौनी गाड़ियौं तेस लाठे दी मेटौं और तैबे एक ओडाची दी छाड़ौं जो ढाकै दी काटियौं थी चाणी ऐंटी और सें ओडाची एक बौड़ै पात्थरा कौरिरे बंद कौरौ। 47 मगदल गांवा री मरियम, और योसेसा री आमा मरियम, दुइया देखदैं थी लागी औंटी कि यीशु रों मौड़ौ किरै छाड़ाई।

यीशु रों दूजी बारें जिउँदौं हुणौ

(मती28:1-8; लूका24:1-12; यूहन्ना20:1-10)

16 जैबे यहूदी लोगु रों आरामा रों दीन खत्म हई गौ थौ, तेबी मगदल गांवा री मरियम, सलोमी और याकूबा री आमा मरियम, इउं चिन छेउड़िये यीशु रें मौड़ै दी लाईणा लै खुशबुदार समान खरीदियौं आणौ। 2 दुजें दिन जौ हौफतै रों पैहलौं दीन थौ, तेबी दोउतौं चिलकी आरी इयै चिन छेउड़ी सेजी ओडाची भिलै चाल पौड़ी जिरे यीशु रों मौड़ौं थौ छाड़ौं औन्दौं। 3 सें आपु मांझिरे थी लागी औन्दी बोलदैं कि, “आमु कालै भितरें डेउणा लै तेस पात्थर कुण गाड़ा सा, जो ओडाची बंद कौरना लै आ लाओ औन्दौं। 4 जेबी तिउंरे तिरे पंउचियौं देखौ ता सौ बौड़ौं पात्थर थौ तिदरा कु पोरु पा घिसरौं औन्दौं। 5 सें छेउड़ी तिरे ओडाची भीतें डेई ता तिरे सुलटी भिलै थौ एक जवान आदमी शेतें जुड़कै भिडियौं बोशौं औन्दौं। सें छेउड़ी हैरान हई। 6 तीणिए तिउं छेउड़ी लै बोलौ, “हैरान ना हुआ। तुमै नासरता रों यीशु लोडदैं ई लागी औन्दी जो कूसा माथे थौ चड़ाओ औन्दौं। सौ जिउँदौं हई गौ आ। सौ इदें नाई आसतौं। देखौ, एजी जागाह दी थौ छाड़ौं औन्दौं। 7 तुमै आबे डैओ। यीशु रें चलेउ लै, और खास कौरिरे पतरसा लै बोलौ कि यीशु तुमकु ओगाड़िरे गलील परदेशा लै डिआ सा और तिरे तुमै तेस देखा ई,

जिणौं तिणिए बोलौ थौ। 8 सें छेउड़ी बाइरें आशियौं तिदरु भागी। सें कांबदें थी लागी औन्दी और डौरी औन्दी थी। तिउं छेउड़िये कासी कें ना बोलौ कैलै कि सें डौरी गोई थी।

मरियम मगदलीनी कै यीशु दिशणौ

(मती28:9-10; यूहन्ना20:11-18)

9 हौफतै रें पैहलै दिना दी दोउती जेबी यीशु जिउँदौं हुआ ता पैहलै मगदल गांवा री मरियमा कै दिशौ। जासकु यीशुए सात बुरी आत्माएँ गाड़ी थी। 10 तिदरौं डेइयौं तिरे इयै बुशे यीशु रें साथिउ कै बोली जो यीशु लै शोक कौरदैं और लेरदैं थे लागे औन्दैं। 11 जेबी तिउं चलेउरे शुणौं कि यीशु जिउँदौं हई गौ आ और मरियमा कै दिशौ आ तैबे तिउंके विश्वास ना हुआ।

दुई चलेउ कै यीशु दिशणौ

(लूका24:13-35)

12 तेत बासिरे यीशु दुई चलेउ कै भी दिशौ जो आपणै गांवा लै थे लागे औन्दैं डेउंदैं। 13 तिउंरे भी वापिस यरुशेमा दी डेइयौं ओरी चलेउ कै यीशु रें बारें दी बोलौ पर तिउं चलेउरे तैबे भी विश्वास नाई कियौं।

ग्यारह चलेउ कै यीशु दिशणौ

(मती28:16-20; लूका24:36-49; यूहन्ना20:19:23; प्रेरितौं1:6-8)

14 तेत बासिरे यीशु तिउं ग्यारह चलेउ कै भी दिशौ जेबी सें रोटी खान्दैं थै लागे औन्दैं। यीशुए सें चेलै डांटे कैलै कि तिउंरे मन डीठ बौणी गोए थै और जुणिए भी यीशु जिउँदैं हुणे बासिरे देखौ थौ, तिउंरी बुशेऊ माथे तिउं चलेउरे विश्वास नाई कौरौ। 15 तैबे यीशुए तिउंलै बोलौ, “तुमै सारी दुनिया दी डेइयौं सारें लोगु कें खुशी रों संदेश शुणाओ। 16 जो आदमी खुशी रें खौबरा माथे विश्वास कौरा लौ बपतिस्मा निआं लौ सौ बौचा आ। पर जो खुशी रें संदेशा माथे विश्वास नाई कौरालौ सौ परमेश्वरा री तौरफा कु सजा पा सा 17 विश्वास कौरनै वालेउ री पहचान इयै हुआ कि सें मैरें नावा कौरिरे बुरी आत्मा गाड़ा ई। 18 और नौई-नौई बोली बोलाई। और सें गौलती दी साप भी छूआं लै, या कोई बीश भी पिआ लै तैबे भी तिउंलै कुछ ना हुंदौं। और सें बीमार लोगु माथे हाथा छाड़ियौं ता सें बीमार लोग भी चांगे हुआ ई।”

यीशु रों सौरगा लै डेरुणौ

(लूका24:50-53; प्रेरितौं1:9-11)

19 इउं बुशु बोलियो परमेश्वरें प्रभु यीशु सौरगा लै उठाओ। सौरगा दी डेइयो प्रभु यीशु परमेश्वरा रें सुलटी भिलै बोशौं। 20 तेत बासीरे प्रभु यीशु रें चेलै तीदरु डेइयौं सारी जागाह दी खुशी रों संदेश शुणाउंदैं लागे। तैबे प्रभु यीशु तिउंरें जरिरे हैरानी वाले काम कौरदैं लागे जिणे कौरिरे लोगु कें पौतौं कि इयौं खुशी रों संदेश सच्चौ आ।

लूका

जानकारी

1 ओ थियुफिलस साहब, यीशु मसिरे जो कुछ काम आमु मांझीरे पुरी कियो आ, तिऊं बुशु रै बारै दी भौरी लोगुए लिखणे री कोशिश की आ। 2 इयै खुशी री खौबर^a लोगु झाऊं यीशु रै तिऊं पैहलै चलेऊ रै जरीए पौउंचौ आ जुणीए इयै बुशै आपणी आखी कौरीए पुरी औन्दै देखी थी और इयै खौबर आमुके तिऊंकु मिली आ जुण तेबी तिरे जीऊंदै मान थै। 3 तैबे मुइयै यीशु रै बारै दी जनमा कु सारी बुशै पौरखियौ इणौ फैसलौ कियो कि इयै एक-एक बूश सुंची सौमझीओ ताउलै लिखु। 4 ताकी ताउंके पौतौ लागी जेजी शिक्षा ताउलै मिली ऐंदि और जेजी तू सौची माना ई सै बूश ठीक और पाकी आ।

यूहन्ना पैदा हुणै री खौबर

5 सारी बुशु री शुरुआत यहूदी याजक जकर्याह नांवा रै आदमी कु हुई आ जुण यहूदिया रौ राजौ हैरोदेसा रै बौगता दी जीउंदौ थौ, जकर्याह याजक अबियाह नांवा रै याजकीयै गुटा रौ आदमी थौ और जकर्याह री छेउड़ी इलिशीबा थी हारुन नांवा रै याजक री खानदानी री। 6 जकर्याह और इलिशीबा परमेश्वर री नौजरीए धौर्मि थै, और सै दुइया परमेश्वर रै हुकम और विधी आछा कौरी माना थै। 7 पर इलिशीबा रै कोई भी सनतान नाई थी कैलैकि तियारी कूख बौन्द थी और सै दुइया बुड़े थै। 8 जकर्याह गुटा रै लोग जो याजक थै सै परमेश्वर रै घौरा दी याजका रौ काम कौरा थै कैलैकि तेबी तिउंरी बारी थी; 9 याजक री रीती रिवाजा कौरी जकर्याह नांवा री चिड्डी निकली कि सेउ प्रभु रै घौरा भीतै डेइयौ धूप जाला। 10 धूपा जालणा रै बौग्तै लोगु री भीड बाइरै प्राथना कौरदै थी लागी ऐन्दी। 11 सेजै बौग्तै जकर्याह कै परमेश्वर रौ एक दूत बेदी री सुलटी भीलै परगट हुइयौ दिशौ। 12 सेउ तेस दुता देखीयौ डौरौ और कांबदै लागौ। 13 पर तिणी दुतै तेसलै बोलौ, ओ जकर्याह, नाई डौर कैलैकि जो प्राथना तांए सनतान पाइणा लै की आ, सै प्राथना परमेश्वरै शुणी गोई आ, 'तेरी छेउड़ी इलिशीबा रौ एक मांऊ हुआ, तू तेसरो नाऊं यहना छाडै, 14 तेस पैदौ हुइयौ ताऊं लै और भौरी लोगु लै बौड़ी खुशी हुआ आ, 15 कैलैकि सेऊ प्रभु री नौजरी दी बौड़ौ हुआ; सेऊ केबी भी अगुरा रौ रस और सूर नाई पिंदौ; आपणी मां रै गर्भा कु ई सेऊ परमेश्वर री पवित्र आत्मा कौरी भरपूर हुआ सा। 16 जैबै सेऊ बौड़ौ हुआ लौ तैबै सेऊ आपणै सन्देशा कौरीए इस्त्राइलिक लोगु मांझीया कु भौरी लोगु आपणै प्रभु परमेश्वर भीलै आणा आ। 17 सेऊ परमेश्वर रै सेवक, एलियाह भविश्यवक्ता जिणौ आत्मिक और शक्तिशाली हुणौ आ। सेऊ प्रभु रै जनमा कु पैहलै आशा, ताकी प्रभु कालै आदमी त्यार कौरा। तैरौ छेहरु मां-बाबा रौ जीऊ आपणै लोलडेऊ भीलै फेरा, और तिउंलै आज्ञा मानणे री शिक्षा दिआ आ। 18 जकर्याह ए परमेश्वर रै दुता कु पुछौ, 'जो तांए बोलौ आ तेस हाऊं सौचौ किणै कौरी मानु। कैलैकि हाऊं ता गो ऊ बुड़ौ हुई और मेरी छेउड़ी भी गोई बुड़ी हुई। 19 तैबै परमेश्वर रै दुतै तेसलै जवाब दैओ मैरौ नाऊं जिब्राइल आ और हाऊं सौदा परमेश्वर काए खौड़ौ रौआ ऊ। और तेसरी मिठी बुशै शुणाऊ। तिणीए ई हाऊं एजी खौबरी कौरी ताऊं काए भेजौ ऊ। 20 और जो बूश मुइयै ताऊं आइलै बोली आ, तांए तेथ माथै विश्वास नाई कियो, आबै जेबी झाऊं तैरौ छेहरु नाई औआ लौ तेबी झाऊं तू लाटौ रौआ ई और कुछ भी बोली नाई बौलदौ कैलैकि जो बूश मुइयै ताऊं लै बोली आ, सै बूश आपणै ठीक बौकता दी पुरी हुआ आ। 21 तैबै लोग दारा काए जकर्याह बाइरै

पौखदै थै लागै औन्दै, सै परेशान थै हूए औन्दै कि जकर्याह कै परमेश्वर रै घौरा भीतै एती बौग्त कैलै लागौ औलौ? 22 जेबी जकर्याह भीतरा कु बाइरै आशौ ता तिऊं लोगु आइलै सेऊ कुछ भी ना बोली बौलौ। और सै सौमझी गौरे कि इणीए प्रभु रै घौरा भीतै कोई दर्शन देखौ। सेऊ तिऊं आइलै इशारै कौरी बुशै लाईदै लागौ कैलैकि सेऊ लाटौ बौणी गौ थौ। 23 जैबै जकर्याह री सेवा कौरनै री बारी पुरी हुई तैबै सेऊ आपणै घौरै डैओ। 24 तेथ बसीए तेसरी छेउड़ी इलिशीबा गौरकडी हुई और पाँजा मिहनै झाऊं तिउंए इए बुशै कासी आइलै ना बोली, 25 और सै आपणै जीवा दी सुचदै लागी कि परमेश्वर केती दयालु आ कि मु आइलै केती बौड़ौ काम कियो आ।

यीशु पैदा हुणै री खौबर

26 जैबै इलिशीबा रै छौऊओ मीहनौ हुओ, तैबै परमेश्वरै जिब्राइल नाँवा रौ दूत गलील परदेशा रै नासरत इलाके दी, 27 मरियमा काए भेजौ जुण बिण बयाही थी। और सै युसुफ नाँवा रै छेहरु लै थी लाई ऐन्दी। 28 परमेश्वर रौ दूत मरियमा काए पौगडौ हुओ और बोलदै लागौ, तेरी जै जैकार होb, ताऊं माथै परमेश्वर री दया हुई आ, और परमेश्वर ताऊं आइलै आ। 29 इऊं बुशै शुणीयौ मरियम डौरौ और हैरानी कौरीए सुचदै लागी कि एस जै-जैकारा री खौबरी रौ का मतलब औलौ? 30 परमेश्वर रै दुतै मरियमा लै बोलौ, "ओ मरियम डौर नाई कैलैकि परमेश्वर री दया ताऊं माथै हुई आ। 31 तू गौरकी हुआ ई, और ताऊंकु एक छेहरु हुआ, तू तेसरो नाऊं यीशु छाडै। 32 सेऊ सारेऊ कु बौड़ौ हुआ आ और तेसलै परमपरधान परमेश्वर रौ छेहरु बोलाई और प्रभु परमेश्वर तेसकै तेसरै पुरखा दाऊद राजै री राजगधी दिआ सा। 33 और सेऊ इस्त्राइली लोगु माथै सौदा राज कौरा आ। तेसरो राज केभी भी खातम नाई हुन्दौ। 34 मरियम परमेश्वर रै दुता लै बोलौ, 'इणौ किणै कौरी हुआ? हाऊं ता औजौ बिण बयाही छोटूड ऊ। 35 परमेश्वर रै दुतै तिआंलै जवाब दैओ, 'पवित्र आत्मा ताऊं दी आशा, और परमपरधान परमेश्वर जुण सारेऊ कु बौड़ौ आ तेसरी शक्ति ताऊं माथै आशा। जो छेहरु ताऊंकु हुणौ आ सेऊ पवित्र हुणौ, और तेसलै परमेश्वर रौ छेहरु बोलाई। 36 और देख तेरी रिश्तेदार इलिशीबा भी बुड़ौदी बारै गौरकी हुई आ। लोग तिआंलै बोला थै कि इआंरी आ कूख बन्द, पर तिआंरै आजकाले छौउओ मीहनौ आ। 37 कैलैकि परमेश्वर काले केजौ भी काम कठीण नाई आसतौ। 38 एजी बुशा माथै मरियमै बोलौ, 'देख, हाऊं ता परमेश्वर री दासी ऊ, जिणौ तांए बोलौ आ, तिणी चांई हुओ। तेथ बसीए परमेश्वर रौ दूत तियां काए कु डेई गौ।

मरियमा रौ इलिशीबा कु मिलदै डेउणौ

39 कुछ दिना बासीए मरियम त्यार हुइयौ डांडैउ माथै यहूदा परदेशा रै एक इलाके दी डेई। 40 जिणै जकर्याह रौआ थौ तेसरै काए डेइयौ मरियमै तेसरी छेउड़ी इलिशीबा कै डाल की। 41 जिणी ई इलिशीबै मरियमा री डाल शुणी, तिणी ई इलिशीबा रै पेटा दी माऊं हिलदै लागौ, और इलिशीबा परमेश्वर री पवित्र आत्मा कौरीए भौरुई। 42 तैबै तिआंए जौरै मरियमा लै बोलौ, 'तू सारी छेउड़ी मांझीआ कु परमेश्वर री नौजरी दी भौली ई, और तैरौ गर्भा रौ छेहरु भी भौलौ आ। 43 इयै केती बौड़ी इज्जता री बूश आ, कि मैरै प्रभु री माँ मु जिणी छेउड़ी कु मिलदै आशी आ। 44 जीणी ई तांए मुकै डाल की आ, तिणी ई मैरै पेटा दी माऊं खुशी कौरीए हिलदै लागौ। 45 भौली तू कैलैकि तांए विश्वास कियो आ, कि जो भी बूश परमेश्वर री तौरफा कु बोली आ सै बूश पुरी हुआ आ।

मरियमा रै स्तूती- भजन गाईणै

46 तैबै मरियमै बोलौ, 'मेरो आत्मा प्रभु री बोड़ाई कौरा आ, 47 आ..... हा..... मेरी आत्मा मेरै उधार कौरनै वालै परमेश्वरा री बोड़ाई कौरा आ। 48 कैलैकि परमेश्वरै आपणी दासी री गरीबी देखी आ एथीलै, "ओ परमेश्वर आज्ञा कु मुलै जुगा-जुगा झाऊं भौलौ बोलाई" 48 कैलैकि परमेश्वरै आपणी दासी री गरीबी देखी आ एथीलै, "ओ परमेश्वर आज्ञा कु मुलै जुगा-जुगा झाऊं भौलौ बोलाई" 49 तिणी परमेश्वरै जुण सारेउ कु शक्तिवालौ आ मुलै बौड़ै-बौड़ै काम किए ई। तेसरौ नाऊं पवित्र आ। 50 जुण परमेश्वरा रौ डौर माना ई तिऊं माथै परमेश्वरा री दया तिउरै सारी पिडी झाऊं रौआ आ। 51 परमेश्वरै आपणी बाई री एती शक्ति देखाई, जुण आपुलै बौड़ै बौणा थै सै किणै तिउर-बिउर किए ई। 52 तिणी परमेश्वरै राजै-महाराजै कु तिउरी राजगधी छुड़ाई आ, और गरीबु री छाडी इज्जत। 53 और भुखै लोगु लै खिलाई आच्छी-आच्छी रोटी, और सेठ गाड़ै खाली हाथै बाइरै। 54 परमेश्वरै आपणै इस्राइली लोगु री मजद की, और तिऊं आइलै कियो औन्दौ आपणौ वाइदौ नाई बिसुरदौ। 54 परमेश्वरै आपणै इस्राइली लोगु री मजद की, और तिऊं आइलै कियो औन्दौ आपणौ वाइदौ नाई बिसुरदौ। 55 तिणीए आमारै पुरखा अब्राहम और तिउरै वंशा (पिडी) आइलै वायदौ कियो कि परमेश्वरा री दया तिऊं माथै सौदा बौणी रौआ। 56 मरियम कम से कम चिया मीहनै झाऊं इलिशीबा आइलै रौई, और तेथ बसीए डेई वापिस आपणै घोरै।

यूहन्ना बपतिस्मा देणै वालौ पैदौ हुणौ

57 तैबै इलिशीबा रै औलखीणा रै दीन पुरै हुए और तिआंरौ एक माऊं हुओ। 58 और इयै खौबर खरकचार तिआरै आस-पडोसा दी और सारै रिशतेदार मांझीए फोइली गोई, कि प्रभुए तिआं माथै बौडी दया की आ। तैबै सौभीए तिआं आइलै खुशी मौनाई। 59 जैबै सेऊं माऊं आठा दिना रौ हुओ तेबी सारै रिशतेदार और गोष्टण तेस माऊं रौ खतना कौरना लै कौठै हुए, सै तेस माऊं रौ नाऊं तेसरै बाब जकर्याह जिणौ छाड़दै लागै, 60 पर तेस माऊं री आमै तेसरौ नाऊं छाड़ना लै मना की, और बोलौ, "एसरौ नाऊं यहना जा छाड़नौ" 59 जैबै सेऊं माऊं आठा दिना रौ हुओ तेबी सारै रिशतेदार और गोष्टण तेस माऊं रौ खतना कौरना लै कौठै हुए, सै तेस माऊं रौ नाऊं तेसरै बाब जकर्याह जिणौ छाड़दै लागै, 60 पर तेस माऊं री आमै तेसरौ नाऊं छाड़ना लै मना की, और बोलौ, "एसरौ नाऊं यहना जा छाड़नौ" 60 पर तेस माऊं री आमै तेसरौ नाऊं छाड़ना लै मना की, और बोलौ, "एसरौ नाऊं यहना जा छाड़नौ" 61 इणै शुणीयो सारै लोगुए हैरानी कौरिए पुछौ, "कैलै?" तैरै टौबरा दी ता एजै नावां रौ कोई नाई? 62 तैबै रिशतेदारुए तेस माऊं रै बाबा कु साना कौरियो पुछौ। 63 तिणी जकर्याह ऐ लिखणा लै तौखती मांगी और तिवरा ई लिखौ कि एसरौ नाऊं यहना सा। इणै शुणीयो सारै हैरान हुए। 64 तैबै जकर्याह रौ मुंह खुलौ और बेजौ बौणौ। और परमेश्वरा री बोड़ाई कौरदै लागौ। 65 तेसरै आस-पडोसा दी रौइणै वालै सारै डौरी गोए, और इयै बुशै यहुदा परदेशा रै सारै पहाडी मुलखा दी फोइली गोई। 65 तेसरै आस-पडोसा दी रौइणै वालै सारै डौरी गोए, और इयै बुशै यहुदा परदेशा रै सारै पहाडी मुलखा दी फोइली गोई। 66 सारै शुणनै वालै आपणै जीवा दी सुंचदै लागै कि एऊ छोहरु किणौ औलौ इणौ पा? कैलैकि प्रभु री शक्ति एस माऊं आइलै थी।

जकरयाह रै स्तूती- भजन गाईणै

67 तैबै माऊं रै बाब जकरयाह माथै परमेश्वरा री पवित्र आत्मा आशी और सेऊं भविष्यवाणी कौरदै लागौ। 68 इस्राइला रै प्रभु परमेश्वरा री बोड़ाई चांई हुई, कैलैकि तिणीए लोगु माथै तौइए दया कौरियो तिउरौ छुटकारौ कियो आ। 69 और आपणै दास दाऊदा रै वंशा कु आमुकालै एक पापा कु छुटकारौ देणैवालौ भेजौ। 70 जिणौ तिणीए पुराणै बागता रै गुरु रै जरीए बोलौ थौ, 71 कि आबै आमै आपणै सारै दुश्मना रै हाथा कु बौची ई 72 परमेश्वरै आपणौ पवित्र वायदौ जो आमारै पुरखा आइलै कियो थौ तेस वाइदौ याद छाडीयो आपणै लोगु माथै दया की। 73 और सै कसम जो परमेश्वरै अब्राहमा आइलै खाई थी

74 कि परमेश्वर आमु आमारै दुश्मना रै हाथा कु छुड़ावा ताकी आमै आपणै दुश्मना कु निडर हुइयो परमेश्वरा री सेवा, 75 तिउरै सामनै पवित्र और नियम धोर्मा कौरि सारी उमरीए कौरि सौका। 76 और ओ छोहरु ताउलै लोग परमपरधान शक्तिवालै परमेश्वरा री तौरफा कु भेजौ औन्दौ गुरु बोला ई, कैलैकि तू प्रभु कालै बाट त्यार कौराई। 77 तू तिऊं लोगु कै शिखावा ई कि पापा री माफी पाइयो, छुटकारौ किणौ मिला आ। 78 इयो सब परमेश्वरा री बौडी दया कौरिए हुआ, जेथ कौरिए परमेश्वरा री तौरफा कु आमुलै नौई जीन्दगी मिला सा। 79 न्यारै और मौरनै रै डौरा री छांई दी रौइणै वालेऊ लै पयाशौ दिआ, और आमारै कदम आच्छी बाटा दी सीधै हंडावा। 80 तैबै सेऊं माऊं बौड़दै लागौ और आत्मा दी मजबूत औन्दै लागौ, और इस्राइली लोगु मांझीए सेऊं परगत हुन्दै झाऊं सेऊं शुनशान जागहा दी रौ।

यीशु रौ जौनम

(मती 1:18-25)

2 सेजै दिनु दी ओगस्तुस नावां रै बौड़ै राजै हुकम दैओ कि सारै रोमी राजा रै लोग आपणै-आपणै नाऊं दर्ज कौरौ। 2 इए पैहली नाऊं लिखाई थी, और इए तेबी हुई जेबी क्विरिनियुस नावां रौ आदमी सीरिया देशा रौ आफसर थौ। 3 तैबै सारै लोग आपणै नाऊं लिखाउंदै आपणै-आपणै इलाकै दी डेवै। 4 युसुफ भी जुण गलील परदेशा रै नासरत गावां रौ थौ, आपणै नावां लिखाउंदै यहुदा परदेशा दी दाऊदा रै गाऊं बैतलैहमा दी डैओ। कैलैकि सेऊं दाऊदा री खानदानी रौ थौ। 5 सेऊं आपणी मंगेतर मरियमा आइलै जुण गौरकडी थी तिऐ नाऊं लिखाउंदै डैओ। 6 तिउरै तिऐ रौइणा रै बौकता दी मरियमा रै, औलखिणा रै दीन पुरै हुए। 6 तिउरै तिऐ रौइणा रै बौकता दी मरियमा रै, औलखिणा रै दीन पुरै हुए। 7 मरियमा रै तिऐ पैहलौ जाओ हुओ और तिआंए सेऊं जुडकै दी मेटाइयो खौरली दी छाड़ौ, कैलैकि तिउंकै सराएँ दी रौइणा लै जागहा नाई थी।

सौरगा रै दतु रै जरिए भेरालडु लै खौबर

8 सेजै इलाकै दी काई भेरालडु थै जुण राची, थाचा दी रौइयो आपणै शाला री चौकीदारी कौरा थै। भेरालडु आपणी भेरीऊ जागद 9 सेजी राची परमेश्वरा रौ एक दूत तिऊं कारे आशौ और तिऊं भेरालडु रै चारौ तौरफा दी प्याशौ जौमकौ। तैबै तेस देखीयो सै भौरी डौरी गोए 10 तिणी दूतै तिउलै बोलौ, "डौरौ नाई" कैलैकि हाऊं तुमुकै आज बौडी खुशी री खौबर शुणावा ऊ जो सारै लोगु लै आ। 11 आज दाऊदा रै इलाकै दी तुमारौ उद्धार कौरनै वालौ पैदौ हुई गौ आ जो प्रभु मसिह आ। 12 और तेसरौ पौतौ तुमु लै इणौ सा, कि तुमुकै एक माऊं खौरली दी जुडकै दी मेटाओ औन्दौ मिला सा। 13 तैबै तिऐ परमेश्वरा रै दूता आइलै परमेश्वरा रै भौरी दूत परमेश्वरा री बोड़ाई कौरदै और इणै बोलदै दिशै, 14 "सौरगा दी परमेश्वरा री बोड़ाई चांई हुई। और धौतरी माथै तिऊं लोगु लै शान्ती चांई मिली ज्रासकु परमेश्वर खुश हुआ आ-" 15 जेबी परमेश्वरा रै दूत तिऊं कारे कु सौरगा लै डेवै तैबै भेरालडु आपु मांझीए बोलदै लागै कि, आशौ आमै बैतलैहमा लै डेई ई जो बूश प्रभुए आमु आइलै बोली आ तिऐं आमै देखी ई। 16 तैबै सै तिवरु फेटी डै, तिउंए तिऐ मरियम, युसुफ और खौरली भीतै सेऊं माऊं देखौ। 17 इणै देखीयो तिऊं भेरालडुए सै बूश जो एस माऊं रै बारै दी पैहलै शुणी थी सै सारेउ कै बोली। 17 तैबै सै तिवरु फेटी डै, तिउंए तिऐ मरियम, युसुफ और खौरली भीतै सेऊं माऊं देखौ। 17 इणै देखीयो तिऊं भेरालडुए सै बूश जो एस माऊं रै बारै दी पैहलै शुणी थी सै सारेउ कै बोली। 18 भेरालडु री इऊं बुशै शुणीयो सारै लोग हैरान हुए जो तिऐ थै। 19 पर मरियम इए सारी बुशै शुणीयो आपणै जिवा दी छाडी और सुंचदै लागी। 20 भेरालडु लै, जिणौ परमेश्वरा रै दूतै बोलौ औन्दौ थौ तिणौ सारौ शुणीयो और देखीयो परमेश्वरा री बोड़ाई और स्तूती कौरि-कौरियो तिवरु वापिस डेवै।

यीशु रौ नाऊं छाड़नौ

21 आठा दिना बासीए जैबै तेस माऊं रौ खतना हुओ। तैबै तेसरौ नाऊं यीशु छाड़ौ जो परमेश्वरा रै दूतै तेसरै गर्भा दी आशणै कु पैहलै बोलौ थौ।

18 यहूना भौरी शिक्षा देई-देइयौ लोग के खुशी रो सन्देश शुणावा थौ। 19 और यहूने हेरोदेस जुण इस्राएल देशा रै चोथे हिस्से रौ आफसर थौ सेऊ भी डांटौ कैलैकि हेरोदेसे आपणै भाई फिलीपुसा री छेउडी आइलै बुरै काम किये थै। 20 पर हेरोदेसे तिऊं सौंभी बुरै कामा कु भी एजौ बुरौ काम कियौ कि तिणीए यहूना जेला दी पाओ।

यीशु रौ बपतिस्मौ

(मती3:13:1-17; मरकुस1:9-11)

21 जेला दी डेउणें कु पैहलै, एकी दिन जेबी यहूना बपतिस्मा देन्दै थौ लागौ औन्दौ। तेबी यीशुए भी बपतिस्मौ निओ। बपतिस्मा नी ई ओ, जेबी यीशु प्राथना कौरदें थौ लागौ औन्दौ तेबी सौरग खुलौ। 22 और परमेश्वरा री आत्मा कबुतरा रै रुपा दी यीशु माथे आशी, और सौरगा कु परमेश्वरा री हाक शुणुई कि, “तू मैरौ गौरतौ छोहरू ई हाऊं ताऊं कु भौरी खुश ऊ।”

यीशु रौ वंश

(मती1:1-17)

23 जेबी यीशुए शिक्षा देणी शुरू की, तेबी यीशु री उमर तकरीबन तीस साल थी। जिणौ लोग जाणा थै कि युसुफ ता एली रौ छहरू थौ, 24 और एली थौ मत्ताता रौ, और मत्तात थौ लेवी रौ, लेवी थौ मलकी रौ, मलकी थौ यन्ना रौ, यन्ना थौ युसुफा रौ, 25 युसुफ थौ, मतित्याह रौ, मतित्याह थौ आमोसा रौ, आमोस नहुमा रौ, नहुम थौ असल्व्याह रौ, और सेऊ थौ नोगहा रौ, 26 नोगहा थौ माता रौ, मात थौ मतित्याह रौ, सेऊ थौ शिमी रौ, शिमी थौ योसेखा रौ, योसेख थौ योदाहा रौ, 27 योदाह थौ यहूना रौ, यहूना थौ रेसा रौ, रेसा थौ जरुब्बाबिला रौ, सेऊ थौ शलतिएला रौ, शालतिएल थौ नेरी रौ, 28 नेरी थौ मलकी रौ, मलकी थौ अद्दी रौ, अद्दी थौ कोसामा रौ, कोसाम थौ इलमोदामा रौ, इलमोदाम थौ एरा रौ, 29 और एर थौ यहोशुआ रौ, यहोशुआ थौ इलजारा रौ इलजारा थौ योरीमा रौ, योरीम थौ मत्ताता रौ, मत्तात थौ लेवी रौ, 30 लेवी थौ शमौना रौ, शमौन थौ यहूदा रौ, यहूदा थौ युसुफा रौ, युसुफ थौ योनाना रौ, योनान थौ इलियाकीमा रौ, 31 इलियाकीम थौ मेलिया रौ, मेलिया थौ मिन्नाह रौ, मिन्नाह थौ मत्ताता रौ, मत्तात थौ नाताना रौ, नातान थौ दाऊदा रौ, 32 और दाऊद थौ यिशै रौ, यिशै थौ ओबेदा रौ, ओबेद थौ बोअज़ा रौ, बोअज़ थौ सलमोना रौ, सलमोन थौ नहशोना रौ, 33 नहशोन थौ अम्मीनादाब रौ, सेऊ थौ आदमीना रौ, आदमीन थौ अरनी रौ, अरनी थौ हिस्त्रोना रौ, हिस्त्रोन थौ फिरिसा रौ, फिरिस थौ यहूदाह रौ, 34 और यहूदाह थौ याकूबा रौ, याकूब थौ इसहाका रौ, इसहाक थौ अब्राहमा रौ, अब्राहम थौ तिरहा रौ, तिरह थौ नाहोरा रौ, 35 सेऊ थौ सरुगा रौ, सरुग थौ रऊ रौ, रऊ थौ फिलिगा रौ, फिलिग थौ एबीरा रौ, एबीर थौ शिलहा रौ, 36 शिलह थौ केनाना रौ केनान थौ अरफक्षदा रौ, सेऊ थौ शेमा रौ, शेम थौ नूह रौ नूह थौ लिमिका रौ, 37 लिमिक थौ मथूशिलह रौ, सेऊ थौ हनोक रौ, हनोक थौ यिरिदा रौ यिरिद थौ महललेला रौ महललेल थौ केनाना रौ, 38 और केनान थौ यनोशा रौ, यनोश थौ शेता रौ, शेत थौ आदमा रौ, और आदम थौ परमेश्वरा रौ छोहरू।

यीशु रौ इन्तीहान

(मती4:1-11; मरकुस1:12-13)

4 तैबे यीशु परमेश्वरा री आत्मा कौरीए भौरुइयौ यरदन नौई काए कु वापिस डैओ और चालिस दिना झाऊं पवित्र आत्मा रै जरिये सुनसान जगह दी आंडदे लागौ, तिरे शैतान यीशु पौरखदे लागौ। 2 तिऊं चालिस दिना दी यीशुए कुछ ना खाओ पिओ, जैबे से दीन पुरे हुए तैबे यीशु के भूख लागी। 3 तैबे शैताने यीशु लै बोलौ, “आगर तू परमेश्वरा रौ छोहरू ई ता एस पात्थरा लै बोल कि रोटी बौण।” 4 यीशुए शैताना लै जवाब दैओ, “पवित्र शास्त्रा दी इणौ लिखौ औन्दौ कि आदमी सिर्फ रोटी ई कौरीए जीउंदौ नाई रोउंदौ, 5 तैबे शैताने यीशु उंची जागह दी निओ और तिणीए यीशुके एकी गौडीए दुनीया रै सारै मुलुख देखालै। 6 और यीशु लै बोलौ, ‘हाऊं दुनीया रै सारै हक और महिमा ताऊं कै दियाऊ, कैलैकि इयौ सारौ मुकै आ सौंभालौ औन्दौ,

हाऊं जासकै चाह ऊ तेसकै दिआऊ। 7 अगर तू मुके झुकीयौ ढाल कौरालौ ता एऊ सब कुछ तैरौ हुआ सा। 8 यीशुए तेसलै जवाब दैओ, “कि पवित्र शास्त्रा दी इणौ आ लिखौ औन्दौ, कि “तू आपणै परमेश्वरा काए झुकीयौ ढाल कौर और सिर्फ तेसी री भौंकी कौर। 9 तैबे शैताने यीशु यरुशेमा दी निओ और तिरे परमेश्वरा रै घौरा रै छापरा माथे खौडौ कियौ और तेसलै (यीशु) लै बोलौ अगर तू परमेश्वरा रौ छोहरू ई ता इदरू तौलै फाल दै। 10 कैलैकि पवित्र शास्त्रा दी इणौ आ लिखौ औन्दौ तैरे बारै दी “कि परमेश्वर आपणै दूता लै हुकम दिया कि सै ताऊं बौचावा। 10 कैलैकि पवित्र शास्त्रा दी इणौ आ लिखौ औन्दौ तैरे बारै दी “कि परमेश्वर आपणै दूता लै हुकम दिया कि सै ताऊं बौचावा। 11 सै ताऊं हाथा-हाथा दी नीया ई ताकी तैरे बांगणे दी पात्थरा कु ठोकर ना लागी। 12 यीशुए तेसलै जवाब दैओ। “पवित्र शास्त्रा दी इणौ भी आ लिखौ औन्दौ कि, “तू आपणौ परमेश्वर ना पौरखे। 13 जैबे शैताने यीशु री परिक्षा कौरी एरी तैबे सेऊ कुछ बौगता लै यीशु काए कु पोरु डैओ।

यीशु री सेवा रै कामा री शुरुआत

(मती4:12-17; मरकुस1:14-15)

14 तैबे पवित्र आत्मा री शक्ति कौरी भौरुइयौ यीशु गलीला लै वापिस डैओ। और यीशु रै बारै दी बुशै आस-पडोसा रै देशा दी फौडली गोई। 15 और यीशु यहूदीऊ रै आराधना कौरने री जागहा दी शिक्षा दैदे लागौ। और सारै लोग यीशु री बौडाई कौरा थै।

नासरता दी यीशु री बेइज्जती

(मती13:53-58; मरकुस6:1-6)

16 जैबे यीशु नासरत गावां दी आशौ जिरे सेऊ धाचौ-पालौ थौ। सेऊ रोज के जिणौ आरामा रै दिना दी धार्मिक खुम्बली दी डैओ तिरे धर्म शास्त्र पौडना लै खौडी हुओ। 17 और यीशु के पौडना लै यशायाह गुरु री किताब देई, और यीशुए सै किताब खोली और तिररू पौडदें लागौ जिरे इणौ थौ लिखौ औन्दौ, 17 और यीशु के पौडना लै यशायाह गुरु री किताब देई, और यीशुए सै किताब खोली और तिररू पौडदें लागौ जिरे इणौ थौ लिखौ औन्दौ, 18 “प्रभू री आत्मा मुं माथे आ, कैलैकि तिणीए हाऊं गरीब लै खुशखबरी शुणाउणा लै चुनौ ऊ। और हाऊं एथीलै भेजो ऊ कि, गुलामु लै छुटकारे रौ और शेडेऊ लै देखणे री खुशखबरी शुणाऊ, और दुखी लाचार लोगु तिऊं कु बौचाऊ जुण तिऊं माथे जुलम कौरा आ। 19 कैलैकि परमेश्वरा री तौरफा कु आमू माथे दया कौरने रौ बौग आशी गौ आ। 20 तैबे यीशुए सै किताब बन्द कौरीयो तिररु नुकरा के देई, और आपु बोशौ धौनी। तैबे जो लोग शुणदें थै लागे औन्दे सै लोग यीशु भीलै बौडे चाहा कौरीए देखदें लागे। 21 तैबे यीशु तिउंलै बोलदें लागौ, आज ही तुमारै सामने एऊ लिखौ औन्दौ (वचन) पुरौ हुओ। 22 जो भी लोग तिरे मौजूद थै सै सारै खुश हुए और यीशु रै मुआं कु दया वाली बूशै शुणीयो हैरान हुए, कि एऊ सब किणौ हुई सौका? सै आपु मांझीए चौपडीदें लागे “का एऊ युसुफा रौ छोहरू नाई?” 23 यीशुए तिउंलै बोलौ, “शायद तुमै मुं माथे इणी कहावत जरुरी बोला ई कि, “ले डाक्टरा आपणौ इलाज ता कौर और जिणै ताएँ कफरनहुमा गावां दी चमतकार किये ई तिणै चमतकार इदें आपणै गावां दी भी कौर? 24 पर सौचुचाई इरे आ कि केजै भी गुरु लै आपणै गावां या इलाके दी इज्जत मान नाई मिलदी। 25 यीशुए औजौ बोलौ, हाऊं ताउंलै सच्चौ बोलाऊ कि, एलियाह रै बौगता दी जेबी साडै चिया साला झाऊं शुको पौडौ और सारै देशा दी बौडौ काल पौडौ, तेबी इस्राएल देशा दी भौरी इणी विधवा छेउडी थी।” 26 पर परमेश्वरै एलियाह भविष्यवक्ता तिऊं कासी काए ना भेजौ, पर सेऊ सैदा शहरा रै सारपत गावां दी एकी विधवा काए भेजौ जो यहूदी नाई थी। 27 या एलिशा गुरु रै बारै दी विचार कौरौ जुणीए नामान कोडी ठीक कियौ आ जो सिरीया देशा रौ थौ। जैबे कि सेजै बोकता दी इस्राएला दी भौरी कोडी थै, जासकै तेबी चांगे हुणे री भौरी जरुरत थी। 28 धार्मिक खुम्बली दी जो लोग इऊं बूशु शुणदें थै लागे औन्दे सै भौरी रोशुए। 29 और तिउंले खौडी उठीओ यीशु घेरौ और शहरा कु बाइरै गाडौ, जेजी पहाडी माथे तिउंरौ शहर थो बौसौ औन्दौ, और सेऊ तिरे पहाडी रै टिरा माथे निओ ताकी तेस तिररू तौलै पा। 30 पर यीशु तिऊं मांझीआ कु निकलीओ पोरु डैओ।

बुरी आत्मा वालों आदमी चांगों कौरणों

(मरकुस1:21-28)

31 तैबे यीशु गलील परदेशा रै कफरनहुम इलाकै दी डैओँ और तिरे हर आराम वाले दिना दी लोगु लै शिक्षा दिआ थौ। 32 तिदै भी लोग यीशु री शिक्षा शुणीओँ हैरान हुऐ कैलैकि यीशु वचन हका कौरीऐ बोला थौ। 33 एकी दिनेँ यीशु धार्मिक खुम्बली दी थौ, तिऐ एक इणों आदमी थौ जासदी बुरी आत्मा थी, सेऊ यीशु लै जोरै हाका मारीयों बोलदै लागौ। 34 "ओ यीशु आमुकै ताऊँ कु का काम आ? का तू आमु नाश कौरदे ई आशौँ औन्दौ? हाऊँ ताऊँ जाणाऊँ कि तू कुण ई, तू परमेश्वरा री तौरफा कु भेजौँ औन्दौ पवित्र आदमी ई। 35 यीशुऐ तेसलै डाँटीयों ज़वाब दैओँ, "चुटुक थाक" और एस आदमी कु बाइरै निकुल" तैबे तिऐ बुरी आत्मै सेऊ आदमी माँझीऐ धौनी बिछाँडों बिणा नुकसान कौरीयों तेसकु बाइरै निकली। 36 तैबे सै हैरान हुऐ और आपु माँझीऐ चौपडुईयों बोलदै लागै, एस आदमी रै हुक्मा दी का शक्ती और हक आ; "कि बुरी आत्मा भी एसरी शुणीओँ पोरु भागा ई" 37 यीशु री बूशै आगी बाशीऐ सारै मुलखा दी फैली गोई।

पतरसा री शाशु और ओरी लोगु चांगों कौरणों

(मती8:14-17; मरकुस1:29-34)

38 सेजै दिना दी यीशु धार्मिक खुम्बली कु निकलिओँ शिमोन रै घोरै डैओँ। तिऐ शिमोन री शाशु बुखारा कौरैऐ भौरी बिमार थी, सौंभी यीशु कु औरज कौरदे लागै कि इऐँ ठीक कौरौ। 39 यीशु ऐ तियां कारे खौड़ी हुईयोँ तिआरै बुखार डाँटै और तिआरै बुखार ठीक हुऐ। सै खरकचार खौड़ी हुई और तिउंरी सेवा कौरदै लागी। 40 दूस ओडदै- ओडदै तेस गावां दी जासरै कारे लोगु दी काई रौंगा री बिमारी थी लागी औन्दौ तिऊँ सब यीशु कारे आणा थै। यीशुऐ सारै बिमार लोगु माथे हाथ छाडै और सारै चांगों किरै। 41 भौरी लोगु दी बुरी आत्माएँ थी, सारी बुरी आत्माएँ यीशु री आज्ञा शुणीयोँ बाइरै निकला थी और हाकै मारीयोँ बोला थी कि तू परमेश्वरा रौँ छोहरु ई। "कैलैकि सै बुरी आत्माएँ जाणा थी कि यीशु ही मसीहा सा।

आराधनालय दी प्रचार कौरणों

(मरकुस1:35-39)

42 दुजी दोअती यीशु शहरा कु निकलीओँ सुनसान ज़ागहा दी डैओँ, और सारी भीड़ यीशु लोडदै-लोडदै यीशु कारे आशीओँ तेस रोकदै लागी कि आमु छाडीयोँ नाई डेऊ, 43 पर तिणीऐ बोलौ मुँ ओरी लोगु माँझीऐ भी परमेश्वरा रै राजा रौँ खुशी रौँ सन्देश शुणाउणों ज़रूरी आ कैलैकि हाऊँ एधीले ऊ भेजौँ औन्दौ। 44 और यीशु गलील परदेशा दी धार्मिक खुम्बलीउ दी खुशी रौँ सन्देश दैदै लागौ।

पैहलै चलेऊँ औटाऊँ

(मती4:18-22; मरकुस1:16-20)

5 एकी दिनेँ यीशु गन्नेसरत नावां रै समुन्दरा रै डीका कारे खौडौँ थौ। तिऐ यीशु रै वचना शुणदै एतरी भीड़ कौठै हुई कि यीशु माथे थी पौडदै लागी ऐन्दी, तैबे इणों हुओँ, 2 यीशुऐ समुन्दरा रै डीका दी दुई किशती देखी, और झीवर थै किशती कु उतरी ओँ ज़ाला धोउंदै लागै औन्दै। 3 यीशु तिऊँ किशती माँझीया कु एकी किशती दी च़ौडौँ, जो शिमोन नावां रै आदमी री थी। तैबे यीशुऐ शिमोन ले बोलौ इऐँ किशती डीका कारे कु थोडौँ पौलडे नीऊ, तैबे यीशु किशती दी बोशीयोँ लोगुलै शिक्षा दैदै लागौ। 4 ज़ेबे यीशु शिक्षा देइयोँ फारीक हुओँ तैबे शिमोन ले बोलौ इऐँ किशती समुन्दरा रै बिचा दी नीऊ, और माछीऊँ पाकुडना लै आपणौँ ज़ाल समुन्दरा दी पा। 5 शिमोनै यीशु लै बोलौ, "ओ गुरु आमुऐ पुरी राचीऐ माच़्छी पाकुडना लै भौरी मैहनत की आ पर कुछ ना पौडौ, तैबे भी हाऊँ तुमारै बोलनै माथे ज़ाल पा ऊ।" 6 ज़ेबे तिउंऐ ज़ाल पाओँ तैबे तिउंऐ ज़ाला दी भौरी माच़्छी फौसी इदरा ज़ाऊँ कि तिउंऐ ज़ाल भी च़ीरीन्दै लागै। 7 तैबे तिउंऐ आपणै साथीऊँ लै जो दुजी किशती दी थै, साना कौरी बोलौ ओरु आशौँ आमारी मजद कौरौ, तैबे सै

तिऊँ कारे आशौँ और तिउंऐ दुईया कीशती दी एतरी माच़्छी भौरी कि तिउंरी कीशती भी डुबदै लागी। 8 इणै देखीयोँ शिमोन पतरसै यीशु रै बांगणै माथे पौडौओँ यीशु लै बोलौ, "ओ प्रभु, मुकारे कु पोरु डैओँ कैलैकि हाऊँ पापी आदमी ऊ। 9 कैलैकि एतरी माच़्छीऊँ पाकडीयोँ शिमोन और तेसरै साथीऊँ के भौरी हैरानी हुई। 10 तिणी ई जबदी रै छौंहरु याकूब और यहुना कै भी हैरानी हुई जो शिमोन रै साथी थै। तैबे यीशुऐ शिमोन लै बोलौ, "नाई डौर आज्ञा कु तू आदमीऊँ मुकारे आणा ई 10 तिणी ई जबदी रै छौंहरु याकूब और यहुना कै भी हैरानी हुई जो शिमोन रै साथी थै। तैबे यीशुऐ शिमोन लै बोलौ, "नाई डौर आज्ञा कु तू आदमीऊँ मुकारे आणा ई 11 तिउंऐ आपणी-आपणी किशती डीका कारे आणी और सब कुछ छाडीयोँ यीशु पीछु डेवै।

कोडा वालों आदमी ठीक कौरणों

(मती8:1-4; मरकुस1:40-45)

12 एकी इलाकै दी यीशु कै एक कोडी आदमी मिलौँ और सेऊ धौनी झुकीयोँ यीशु कै औरज कौरदै लागौ कि, "ओ प्रभु अगर तू चाह लौ ता मु चांगों कौरी बोला ई" 13 यीशुऐ तेस कोडी माथे हाथ छाडौँ और बोलौ, "हाऊँ चाह ऊ कि तू चांगों हु ऊ।" और तेबी तेसरौँ कोड ठीक हुओँ। 14 तैबे यीशुऐ सेऊ चितलाओँ, "कि जो कुछ ताऊँ आइलै हुओँ आ तेस कासी आईलै ना बोलै" पर डेऊ याजका कारे देखालीऊँ और परमेश्वरा रै आपणै सेवक मुसा रै ज़रीऐ ज़ेजै नियम ई दैओँ औन्दै तिऊँ अपनाईयोँ बौली च़ौडाऊँ ताकी सै तैरै बारै दी लोगु कारे बोला कि तू चांगों हुई गो ई 15 पर यीशु री खौबर सारै मुलखा दी फैली गोई, भौरी लोग तेसरी शिक्षा शुणदै और आपणी बिमारी कु चांगों हुणा लै यीशु कारे कौठै हुन्दे लागै। 16 पर यीशु एखुली सुनसान ज़ागहा दी डेइयोँ प्राथना कौरा थौ।

अधरौंगा वालों आदमी चांगों कौरणों

(मती9:1-8; मरकुस2:1-12)

17 एक दिनेँ इणों हुओँ कि यीशु एकी घौरा दी शिक्षा दैदै थौ लागौ औन्दौ तिऐ फरिसी और तिउंरै नियमा रै गुरु थै बोशै औन्दै, जो गलील और यहूदिया परदेशा रै हरेक गाऊँ और यरुश्लेमा कु थै आशै औन्दै, और चांगों कौरना लै प्रभु री शक्ती यीशु आइलै थी। 18 सेजै बौगै तिऐ कुछ लोगुऐ एक इणों आदमी बिस्तरै दी आणौँ जासकै आपणै जिस्मा रौँ केजो भी अंग नाई हिलाइया थौ, यीशु कारे पऊँचाऊणा लै तिउंऐ भीड़ा माँझीऐ काफी कोशीश की ताकी यीशु तेस बिमार आदमी ठीक कौरा। 18 सेजै बौगै तिऐ कुछ लोगुऐ एक इणों आदमी बिस्तरै दी आणौँ जासकै आपणै जिस्मा रौँ केजो भी अंग नाई हिलाइया थौ, यीशु कारे पऊँचाऊणा लै तिउंऐ भीड़ा माँझीऐ काफी कोशीश की ताकी यीशु तेस बिमार आदमी ठीक कौरा। 19 पर भीड़ा रै कारण सै यीशु कारे नाई पौऊँची बौलै तैबे सै तेस घौरा रै छापरा माथे डेवे और छापरा कु कुछ जाण्टै गाडीयोँ चारपाई रै चारा कुणै दी लोऊली बानीयोँ सेऊ बिमार आदमी यीशु कारे धौनी उतारौ। बिमार आदमी धौनी यीशु कारे उतारौ छापरा बाटीऐ 20 इणै कौरी यीशुऐ तिउंरै विश्वासा देखीयोँ तेस बिमार आदमी लै बोलौ, "ओ छोहरु तैरै पाप माफ हुई गौऐ ई" 21 तैबे शास्त्री और फरिसी आपु माँझीऐ गुणमुणांदै लागै, "एऊ कुण आ इणौँ पा जुण परमेश्वरा री बुराई कौरा सा? पाप ता सिर्फ परमेश्वर ही माफ कौरा। 22 यीशुऐ तिउंरी मोना री बुशै ज़ाणी गोई, तैबे यीशुऐ तिउंलै बोलौ तुमै इणौँ कैलै सुचाई कि हाऊँ परमेश्वरा री बैइजती कौरदेउ लागौ औन्दौ। 23 आसान का सा? बिमार आदमी लै इणौँ बोलनौँ कि 'तैरै पाप माफ हुई गौऐ' या इणौँ बोलनौँ कि 'खाडी ऊठ आपणौँ बिस्तर चुंग और आंडदे लाग?' 24 तुमकै देखाणलै कि "आदमी रै छोहरु" कै धौतरी माथे पाप माफ कौरनै रौँ भी हक आ तैबे यीशुऐ तेस बिमार आदमी भीलै देखीयोँ बोलौ हाऊँ ताउंलै बोलाऊँ, खौडी उठ, आपणौँ बिस्तर चुंग और आपणै घोरै डेऊ। तू ठीक हुई गो ई। 25 सेऊ आदमी खरकचार तिऊँकारे कु उठीयोँ खौडौँ हुओँ, और जेथ माथे सेऊ आणौँ थौ तेस बिस्तर चुंगीयोँ परमेश्वरा री बौडाई कौरी-कौरीयोँ तिदरु आपणै घोरै डैओँ। 26 इणै देखीयोँ सारै लोग हैरान हुऐ और परमेश्वरा री बौडाई कौरदै लागै, और डौरीयोँ बोलदै लागै आज्ञा आमुऐ नोखी बुश देखी आ।

लेवी औटाउणो

(मती9:9-13;मरकुस2:13-17)

27 तेथ बासिए जैबे यीशु तेस इलाके कु बाइरै डैओ। तेबे यीशुए लेवी नावां रौ एक मामलै निणै वालो, आडै माथे बोशौ औन्दौ देखौ। और यीशुए तेसलै बोलौ, "मु पिछु आश।" 28 तैबे सेऊ तेबी आपणौ सब कुछ छाडीयो यीशु पिछु आंडदै लागौ। 29 तैबे तीणी लैवी ए यीशु आपणै घोरै निओँ और बौडी धाम देई, तिरे मामलै निणै वालै और भौरी लोग तिउं आइलै रोटी खादै बोशी गोए। 30 इणै देखीयो फरीसी और तिउरै शास्त्री यीशु और तेसरै चलेऊ लै बोलदै लागै कि, "तुमै मामलै निणै वालै और पापी लोग आइलै रोटी कैले खा पिआ ई?" 31 यीशुए तिउंलै जवाब दैओ कि डाक्टरा री जरूरत भलै-चांगे आदमी लै नाई पर बिमार आदमी लै औआ सा। 32 हांऊ धर्मी आदमी नाई पर पापी आदमी रै मन बदलना लै ऊ आशौ औन्दौ।

ब्रौता(उपवासा) रौ सवाल

(मती9:14-17; मरकुस2:18-22)

33 फरिसी और शास्त्रीयु ए यीशु लै बोलौ, "युहन्ना रै चेलै ता नियमा कौरिए घौडी-घौडी ब्रौत छाडा और प्राथना कौरा ई, और तिणी ई फरिसी रै चेलै भी कौरा ई, पर तैरै चेलै ता सौदा खा पिया ई।" 34 यीशुए तिउं कु पुछौ, "जेबी झाऊं लाडौ तिउं आइलै साथा दी हुआ का तेबी बराती ब्रौत छाडाई? 35 पर सेजै दिन भी आशा ई जेबी लाडौ तिउं कु अलग कौरालै सेजै बौगता दी सै ब्रौत कौराई। 36 यीशुए तिउंलै एक औनेणो भी दैओ, "केजौ भी आदमी नोएँ जुडकै रौ टालकौ पुराणै जुडकै दी नाई लाइंदौ। नाई ता धोइदीं बारै सेऊ नोएँ जुडकै रौ टालकौ तेस पुराणौ जुडकौ पोरु थोसियो जादडौ चीरा सा। और सेऊ टालकौ पुराणै जुडकै आइलै मेल भी ना खान्दौ। 37 कोई भी आदमी अगुरा री सुर चाणना लै ताजे अगुरा रौ रस पुराणै चामडै री थोउली दी नाई छाडदौ। नाई ता अगुरा रौ रस दख बौगता बासीए फैलीयो तेस पुराणै चामडै रौ थोउलौ भी पोरु चीरा, जेथ कौराए अगुरा रौ रस और थोउलौ दुइया बरबाद हुआ ई। 38 एथीलै लोग ताजे अगुरा रौ रस नोएँ थोउलै दी भराई। 39 एथीलै लोग ताजे अगुरा रौ रस नोएँ थोउलै दी भराई। 39 केजौ भी आदमी पुराणौ अगुरा रौ रस पीई औ आच्छौ दाखरस नाई चाहांदौ कैलैकि सेऊ बोला, कि पुराणौ ई भौरी आच्छौ आ।

आरामा रै दिना रौ प्रभु

(मती12:1-8; मरकुस2:23-28)

6 तैबे आराम वालै दिना दी यीशु आपणै चलेऊ आइलै डोखरेऊ बाटीए थौ लागौ औन्दौ डेऊंदै, तेसरै चेलै लागै डोखरे कु गिऊंआ रै सिलै चोडीयो और हाथा दी मांडियो खान्दै। 2 तैबे फरीसीऊ मांझीए कु कुछ लोगुए तिउंलै बोलौ, जेजौ काम आरामा रै दिनां दी नाई जान्दौ कौरनौ, सेजौ काम तुमै कैलै कौराई? 3 यीशुए तिउंलै जवाब दैओ का तुमुए धर्म शास्त्रा दी नाई पौडौ? जेबी राजौ दाऊद और तेसरै साथी भुखेँ थे, तिउंके खणालै कुछ भी नाई थौ, तैबे राजे दाऊद कै कियो? 4 सेऊ परमेश्वरा रै घौरा दी डैओँ और तिरे परमेश्वरा लै चडाई औन्दौ भोगा री रोटी खाई और आपणै साथीऊ लै भी देई, जो सिर्फ याजक ही खा थे। 5 यीशुए तिउंलै इणौ भी बोलौ, "हाऊं जुण "आदमी रो छोहरु" आरामा रै दिना रौ भी प्रभु ऊ।"

शुकै औन्दै हाथा वालो आदमी चांगो कौरणो

(मती12:9-14;मरकुस3:1-6)

6 एकी औजो आरामा रै दिना दी यीशु धर्मिक खुम्बली दी डेइयो शिक्षा दैन्दै लागौ, तिरे एक आदमी थो जासरौ सुलटौ हाथ बिमारी कौरौ शुकौ औन्दौ थौ। 7 तैबे कुछ फरीसी और शास्त्री लोग यीशु माथे आरोप लाइणा लै तेसरी ताकी दी थे रौए औन्दै, कि का यीशु एस आदमी आराम वालै दिना दी चांगो कौरा की नाई कौरदौ? 8 पर यीशु तिउरै मौना रै विचार जाणा थौ एजी तांइयै यीशुए तेस शुकै औन्दै हाथ वालै आदमी लै बोलौ, "उठ मांझाई आशियो खाडौ ऊ।" तैबे सेऊ आदमी उठीओ खौडौ हुआ। 9 यीशुए लोगु कु

पुछौ, "आरामा रै दिना दी का नियम ठीक आ, भौलौ कौरनौ, या बुरौ कौरनौ? प्राण बचाउणो या झांगणो। 9 यीशुए लोगु कु पुछौ, "आरामा रै दिना दी का नियम ठीक आ, भौलौ कौरनौ, या बुरौ कौरनौ? प्राण बचाउणो या झांगणो। 10 तैबे यीशुए फिदीयालै देखीयो तेस शुकै औन्दै हाथा वालै आदमी लै बोलौ, "आपणौ हाथ आंगाऊं करा।" तिणीए हाथ आंगाऊं कियो, तैबे तेसरौ हाथ तेबी ठीक हुआ। 11 तैबे तिउरै भौरी रोश आशे और सै आपु माझिरे गुणमुणादै लागै कि आमै एस यीशु आइलै का कौरलै?

बारहा चलेऊ रौ(प्रेरित) छौटिणो

(मती10:1-4;मरकुस3:13-19)

12 सेजै दिना दी यीशु पहाडी माथे प्राथना कौरदै डैओँ और परमेश्वरा कु प्राथना कौरदै-कौरदै सारी राच बिताई। 13 जेबी दुसौ हुआ तैबे यीशुए आपणै चेलै औटाए और तिउं माझिरे कु १२ चेलै छौटै और यीशुए तिउंलै प्रेरित बोलौ। 14 और सै चेलै एजैई: शिमौन जासरौ नाऊं यीशुए पतरस छाडौ, पतरसा रौ भाई अन्द्रियास और याकुब, यहुन्ना और फिलिपुस और बरतुलमै। 15 मति, थोमा, और हलफई रौ छौहरु याकुब शिमौन जासलै जेलोतेस बोला थै। 16 और याकुबा रौ छौहरु यहुदा और यहुदा इस्करियोती जुणिरे यीशु बासिए पकडवाओ आ।

शिखाउणो और चांगो कौरणो

(मती4:23-25)

17 तैबे यीशु आपणै चलेऊ आइलै पहाडी कु तौलै उतरौ सीधी जगाह दी खौडौ हुआ और तिरे तेसरै चलेऊ री बौडी भीड कोठै हुई, और सारे यहुदिया यरुश्लेम, सूर, सैदा इलाके रै लोग जुण-जुण समुन्द्रा रै नजदीक रौआ थै सै भी तिरे आशे। 18 जो शिक्षा शुणदै और आपणी बीमारी कु चांगे हुणा लै यीशु काए आशा थै, और यीशु, बुरी आत्मा कौरौ परेशान लोगु भी ठीक कौरा थौ। 19 सारे लोग यीशु छुडणौ चाह थै कैलैकि यीशु कु चांगे कौरनै री शक्ती निकला थी और सब चांगे हुआ थै

आशीष और दुखी री बूश

(मती5:1-12)

20 तैबे तिणीए आपणै चलेऊ भीलै देखीयो बोलौ, "आशीष वालै ई सै लोग जो निऊले ई; कैलैकि परमेश्वरा रौ राज तुमारौ आ। 21 आशीष वाले ई सै लोग, जो आबे बुखे ई; कैलैकि तिउंलै रौजीयो मिला सा और सै जुण आबे लेरा ई सै हसा ई। 22 आशीष वाले ई तुमै, जुण आदमी रै छोहरु रै कारण दुख उठाऊवा ई, और लोग तुमु आइलै दुश्मनी छाडाई और तुमु पोरु गाडाई, तुमारी बेइजती कौराई, और तुमारौ नाऊं बुरौ समझियो काटाई। 23 सेजै दिने तुमै खुश हुइयो नाचणो, कैलैकि देखौ तुमुलै सौरगा दी बौडौ इनाम आ, तिउरै बाप-दादैं भी, भविश्यवाणी कौरनै वालै गुरु आइलै तिणो कौरा थै। 24 यीशुए तौएँ बोलौ, "आज जुण तुमै सेठ ई; तुमुलै दुखा रै दिन आशणै ई कैलैकि तुमारौ सुख शान्ती इयै दुनिया तेबी झाऊं आ जेबी झाऊं तुमारी जिन्दगी आ। 25 आज जो तुमै रौजे औन्दै ई; तुमुलै भोखे रौइणा रै दीन आशणै ई। आज जो तुमै नीफिक्री कौरौ हौसाई; तुमारी ए खुशी, दुःखा दी बदलिया ई। 26 आज जो आदमी तुमारी बौडाई कौराई, सै तुमुलै दुःख मानावा ई, कैलैकि तिउरै नान-बुड भी झुटै गुरु आइलै इणौ कौरा थै

दुशमणु आइलै प्यार

(मती5:38-48;7:12)

27 हाऊं तुमु शुणने वालेऊं लै बोला ऊ कि आपणै दुश्मना आइलै प्यार कौरौ। और जुण तुमारौ बुरौ कौरा आ तेसरौ भौलो कौरौ। 28 जुण तुमु लै श्राप दिआ लौ तेसलै आशीष दैओँ, जुण कौरा लौ तुमारी बेइजती तेसलै कौरौ प्राथना। 29 जुण तुमारै एकी खोखोटे दी थापे ला लौ तेस बिलै दुजौ गौलौण्टौ भी मुडाओँ और जुण तुमारी धोती छुडावा लौ तेसके आपणौ कुरतौ भी दैओँ। 30 जुण तुमु कु कुछ मागां लौ तेसके दैओँ और जुण ताऊंकु निआं लौ तेसकु तिरे चीज वापिस ना मांगे। 31 जिणौ तुमै लोगु कु चाह ई कि लोग

तुम आइलै कौरा, तुमै भी तिऊं आइलै तिणौ कौरौ।³² अगर तुमै आपु आइलै प्यार कौरनै वालेऊं आइलै प्यार कौरा ई तै का बड़ी बात आ। (कैलैकि पापी भी, आपु आइलै प्यार कौरनै वालेऊं आइलै प्यार कौरा ई।³³ अगर तुमै तिऊं आइलै भलाई कौरालै जो तुम आइलै भलाई कौराई, तै का बड़ी बात आ, कैलैकि पापी लोग भी इणौ कौराई।³⁴ अगर तुमै तिऊंके उदार दिआई जासकु वापिस मिलनै री आश छाड़ाई, तै का बौड़ी बात आ, कैलैकि पापी लोग भी पापी लोगु कै उदार दिआइ और बासिए मांगाई तेती वापिस।³⁵ तुमै आपणै दुश्मना आइलै प्रेम छाड़ाओ और भलाई कौरौ, और बासिए वापिस ना मांगणै री आश छाड़ाओ उदार दैओ, तैबे तुम लै सौरगा दी बोड़ौ इनाम मिला सा। और तुमै परमपरधान परमेश्वर रै छोरु बौणा ई। कैलैकि सेऊ आदमी, तिऊं लोगु लै जो धन्यवाद नाई कौराई, और बुरे लोगु लै, भी भौलौ आ।³⁶ जिणौ तुमारौ बाब परमेश्वर दया कौरनै वालौ आ तिणी तुमै भी दयालु बौणौ।

दोष न लाओ

(मती7:1-4)

³⁷ कासी दी भी झुठे आरोप नाई लाओ तैबे तुम दी भी झुठे आरोप नाई लागदै, कासी भी बुरे नाई चाणौ, तैबे तुम भी कोई गलत नाई चाणदौ, माफ कौरौ तैबे तुम लै माफी मिला।³⁸ दैओ ता तुम लै भी दिआई, लोग पुरौ पाथौ चेसी-चेसीयौ और हिलाई-हिलाईयौ और ढाली-ढालीयौ तुमारी ऊगाली दी पा ई, कैलैकि जेजे पाथे कौरिये तुमै नापा लै सैजे पाथे कौरिये तुमलै भी नापा ई।³⁹ तैबे यीशुए तिउंले अनेणै देइयौ बोलौ का एक शेडौ दुजे शैडे कै बाट देखाली बौला सा? का इणै कौरौ सै दुइया खाली दी ना पौडदै? ⁴⁰ चेलौ केबी भी आपणै गुरु कु बौडौ नाई औन्दौ पर जुणी चेलै पुरौ कौरौ औलौ शिखौ औन्दौ, सेऊ आपणै गुरु जिणौ औआ सा।⁴¹ तू आपणै भाई री आखी दी सांगर कैलै देखाई का ताउके आपणी आखी रौ डिगचौ नाई चोगरी दौ? ⁴² जैबे ताउके आपणी आखी रौ डिगचौ नाई दीशदौ तैबे तू आपणै भाई लै किणौ बोली सका ई कि "भाई टेक हाऊं तेरी आखी रौ सांगर गाड़ाऊ? ओ कौपटी पैहलै आपणी आखी रौ डिगचौ गाड़, तैबे तू आपणै भाई री आखी कु तेस सांगर आच्छै कौरौ गाडी सौका ई।

जिणौ पेड़ तिणौ फौल

(मती7:16-20;12:33-35)

⁴³ कैलैकि कैजौ भी आच्छौ पेड़ इणौ नाई आ जेथकु निकामौ फल निकला और ना ई आ निकामौ पेड़ इणौ, जेथकु आच्छे फल निकला।⁴⁴ हर पेड़ तेसरै फला कौरौ रवाइया आ; कैलैकि लोग झाड़ी मांझीआ कु फेडु नाई चोड़दै, और ना (कुईणी) झांगड़ा कु अंगूर चोड़दै।⁴⁵ भौलौ आदमी आपणै भौलै जीवा कु भौली बूशे ला सा, और बुरौ आदमी ला सा आपणै बुरे जीवा कु बुरी बूशे; जो तुमारै जीवा दी औलौ, सेऊ निकला मुआं कौरौ बाइरै।

घोर चाणनै वालै दुई आदमी

(मती7:24-27)

⁴⁶ "जैबे तुमै मैरौ बोलौ नाई शुणदै, तैबे तुमै मुलै, "ओ प्रभु-ओ प्रभु कैलै बोलाई? ⁴⁷ जुण-कुण मुकारे आशा और मेरी बूशेऊ शूणा और माना, हाऊं तुम लै बोलाऊ कि सेऊ कास जिणौ आ; ⁴⁸ सेऊ तेस आदमी जिणौ आ जुणीए घौरा चाणदी बारै जबीन डुंगी खोदीयौ पाकी जागहा दी पौई बोशाली आ, और जेबी नौ आशी बौरुईयौ और तेथारौ छालौ तेस घौरा दी लागौ पर सेऊ घोर हिलौ भी नाई कैलैकि सेऊ घोर पाकी जागहा दी थौ बौणौ औन्दौ। ⁴⁹ जुण वचन शुणीयौ नाई मानदौ सेऊ तेस आदमी जिणौ आ जुणीए बालु माथे बिण पौई ऐ घोर चाणौ और जेबी नौ आशी भौरुईयौ सेऊ घोर खरकचार सिकी गौ आ और सिकी ओ तेसरौ सत्यानाष हुई गौ आ"

एकी सुबेदारा रौ विश्वास

(मती8:5-13)

7 जैबे यीशुए लोगु कै सारी बुशै शुणाई गोई, तैबे यीशु कफरनहूम गांवा दी आशौ।² तिरे रोमी सिपाइऊ रै आफसरा रौ एक नुकुर, जो तेसरौ भौरी गौरतौ नुकुर थौ सेऊ नुकुर एती बीमार थौ कि मौरनै वालौ थौ।³ तीणी फौजिए यीशु रै बारै दी शुणौ तैबे तिणीए यहूदी लोगु रै कई स्याणै औरज कोरना लै यीशु कारे भेजे ताकी यीशु आशियौ मैरौ नुकुर चांगौ कौरा।⁴ सै स्याणै यीशु कारे आशै और बोडी औरज कौरियो यीशु लै बोलदै लागै कि, "सेऊ इणे लायक आसती आ कि तू तेस माथे दया कौरा कौरा।"⁵ कैलैकि सेऊ फौजी आमारे लोगु आइलै प्यार कौरा सा और तिणीए इ आमु कालै धार्मिक खुम्बली रौ घोर चाणौ आ।⁶ तैबे यीशु तिऊं आइलै तेस फौजी रै घौरा लै चाल पौडौ पर जेबी यीशु तेसरै घौरा रै नजदीक पौऊचौ, तैबे तीणी फौजिए आपणै कुछ दोस्त यीशु कारे इणै समझाइयौ भेजे कि, "ओ प्रभु ऐती कौष्ट ना कौरौ (इदै आशणै रौ) कैलैकि हाऊं इणै लायक नाई आसतौ कि तुमे मैरे घौरा कै आशा।⁷ एथीलै मुइयें आपुलै इणै लायक ना समझौ कि तुम कारे आशु, पर तीदरा कु वचन बोल, तैबे मैरौ नुकुर चांगौ हुआ सा।⁸ हाऊं भी एक फौजी ऊ मुके हक आ और कई सिपाही मैरे हाथा दी आ, जेबी हाऊं एकीलै बोलाऊ आश तैबे सेऊ आशा सा, और दुजे लै बोलुलै डेऊ तैबे डेवा सा, अगर आपणै कास नुकुरा लै बोलु लै कि इणौ कौर, तैबे सेऊ तीणी कौरा सा।⁹ इणै शुणीयौ यीशु कै हैरानी हुई तैबे यीशुए पिछाऊं फिरीयौ तिऊं लोगु लै बोलौ जो तेस पिछु थे आशदै लागे औन्दै, "हाऊं तुम लै बोलाऊ कि मुइयें इस्त्राएल देशा रै लोगु दी भी इणौ विश्वास नाई देखौ।"¹⁰ तैबे सै लोग जो फौजीए यीशु कारे थे भेजे औन्दै सै वापिस घौरै डै और तिउंरे सेऊ बिमार नुकुर चांगौ हुआ औन्दौ देखौ।

विधवा रै छोरु लै जीवनदान

¹¹ तेथ बासीए यीशु आपणै चलेऊ आइलै नाइना रै गावां-शहरा दी डैओ तेस आइलै लोगु री बोडी भीड भी थी डेऊंदै लागी ऐन्दी।¹² 2 जैबे सै तेस गावां री खोली कारे पौऊचै, तैबे तिउंरे देखौ की लोग एक मौडौ निंदे थे लागे औन्दै बाइरै। जो आपणी मां रौ एकलौतौ छोरु थौ, और तेसरी मां विधवा थी। और साथा दी गावां रै भौरी लोग थे।¹³ जैबे प्रभुए सै विधवा देखी ता तेसरै तियां माथे बोडी दया आशी और तियां लै बोलौ, "नाई लेर।"¹⁴ तैबे यीशुए नजदीक डेईयौ सै खाट छुई, तैबे खाट चुंगणै वालै रुके। तैबे यीशुए बोलौ, "हाऊं ताऊं लै बोलाऊ ओ जवान छोरु उठा।"¹⁵ तैबे सेऊ मौडौ जीऊंदौ हुआ, उठीयौ बोशौ और बुशे लाइदै लागौ तैबे सेऊ छोरु, यीशुए तेसरी आमा कै सौम्भालौ।¹⁶ इणै देखीयौ सारे लोग भौरी डौरै और परमेश्वर री बौड़ाई कौरियो बोलदै लागे, "कि आमु मांझीए एक बौडौ गुरु पैदौ हुई गौ आ, और आज परमेश्वर आपु आमु मांझीयै पौगडौ हुआ आ।

यहना बौपतिस्मौ दैणै वालै रौ सौवाल

(मती 11:2-19)

¹⁷ सै बुशे यहूदीया और आस-पडोसा रै सारे परदेशा दी फौइली गोई।¹⁸ यीशुए जो कुछ कियो थौ तेथरै बारै दी यहना रै चलेउरे यहना कारे बोलौ।¹⁹ तैबे यहनै आपणै दुई चेलै यीशु कारे इणै पुछणा लै भेजे की, "का आशणै वालौ मसीहा तु ई आ, या आमै कास ओरी पौखुले?"²⁰ यहना रै दुई चेलै यीशु कारे आशीयौ बोलदै लागे, "यहना बतिसमा दैणै वालै, आमै ताऊं कारे इणौ पुछणा लै भेजे ई, कि का आशणै वालौ मसीहा तु ई आ?" "या आमै कास ओरी पौखुले?"²¹ सेजे बौगैतै यीशुए भौरी बिमार और दुखी लोग चांगे किये ई, और कई आदमी बुरी आत्मा कु आज्ञाद किये ई, और भौरी शेडैवे कै आखी देई।²² तैबे यीशुए यहना रै चलेऊ लै बोलौ, " जो कुछ तुमुए देखौ और शुणौ आ डेईयौ तेस यहना कै बोलौ, कि शेडै देखाई, लौंगडै ई आंडा, कोडी हुआई ठीक, टौणै ई शुणा, मौरै औन्दै हुआई जीऊंदै, और गरीब आदमीऊ लै शुणावा खुशी रौ संदेश।²³ और आशीश वाले ई सै लोग, जुण मु माथे शक नाई कौरदै कि हाऊं मसीहा आसती ऊ कि नाई।²⁴ जेबी यहना

रें चले यीशु कारे कु डेवें तैबे यीशु यहना रें बारे दी लोगु आइलें बोलदें लागौ, "तुमै सुनसान जागहा दी का देखदें थें डैऔं औन्दै? का बागुरा कौरी हिलणें वाले शाऊंटें देखदें? 25 तैबे तुमै का देखदें थें डैऔं औन्दै? "चोगे-बागे भिडें औन्दै आदमी देखदें डेवें थें? नाई कैलैकि जो आदमी चोगे-बागे बीडाई सें ठाटा कौरी आपणें मैहला दी रौआई। 26 तैबे तुमै का देखदें थें डैऔं औन्दै, कास गुरु देखदें? ओ, हाऊं तुमु लै बोलाऊ सेऊ भविष्यवक्ता कु भी बोडौं आ। 27 यहना ही सा सेऊ दूत जासरें बारे दी धर्मशास्त्रा दी इणौ लिखौ औन्दै; "कि देख हाऊं आपणौ दूत ताऊंकु औगाडीए भेझाऊं, सेऊ ताऊंकु औगाडीए डेइयौं ताऊं कालें तेरी बाट तैयार कौरा। 28 तैबे यीशुए तौंए बोलौ, "हाऊं तुमुलै बोला ऊ की इबी झाऊं कोई भी इणौ आदमी पैदो नाई हुओ जो यहना कु बोडौं आ। पर परमेश्वरा रें राजा दी जुण छोटे कु छोटौं आ सेऊ यहना कु भी बोडौं गुरु आ," 29 तैबे सारें लोगुए और मामलें निणें वालेऊए जुणीए यहना कु बसीस्मौ निओं थौं तिउंए इणें शुणीयो मानी एरौं कि परमेश्वर धर्मी आ। 30 पर फरीसीऊ और कानुना रें धर्म शास्त्रीऊए परमेश्वरा रौं सुंचौं औन्दौं नाई मानौ, कैलैकि तिउंए यहना रें बहिस्मा निणा लें मना की थी। 31 यीशुए तौंए बोलौ, "हाऊं एजें जुगा रें लोगु रें बारे दी तुमु कारे किणौ बोलु, और एजें जुगा रें लोगु रौं अनैणौ कास आइलें देऊ। 32 कैलैकि सैं इणें छोहरु जीणे ई, जुण बजारा दी डेइयौं खेल खेलाई और सैं आपणें दोस्तु कु शिकायत कौरा ई कि, "आमुए तुमु लै शादी रें गेत गाए ई पर तुमै ता नाचै नाई, और आमुए दुःखा रें गाअणें गाए पर तुमै ना लेरें। 33 बसीस्मा दैणें वाले यहनै सौदा ब्रौत छाडे ई। और कादी अंगुरा रौं रस नाई पिओं, और तिणीए पर तुमै बोलाई इणौ कि तेसदी आ बुरी आत्मा। 34 हाऊं आदमी रौं छोहरु, खा पिआ ऊ, पर तुमै बोलाई इणौ कि हाऊं पेटु और सूरी पिणें वालोऊ, मामलें निणें वालेऊ और पापी लोगु रौं गोश्टण ऊ 35 पर जुण परमेश्वरा री शिक्षा मानीओ चाला ई तिउंरी जीन्दगी कु परमेश्वरा रौं ज्ञान सौच्यौं साबीत हुआ आ।

फरिसी रें घौराई पापी छेउडी लै माफी

36 तैबे एकी फरीसी आदमीए यीशु कु औरज की, कि मैरें घौरें आशीयौं मु आइलें रोटी खाओं, तैबे यीशु फरीसी आदमी रें घौरा कै डेइयौं तेस आइलें रोटी खान्दें बोशौं। 37 तेस इलाकें री एक पापीण छेउडी, इणें शुणीयो कि यीशु फरीसी रें घौरा दी आ रोटी खान्दें बोशौं औन्दौं, तिउं छेउडीए यीशु कारे एकी शंखमोरा री शीशी दी खुशबुदार तेल आपणें, 38 और यीशु री लाता कारे आशीयो लेरदें लागी और यीशु रें बांगणें आपणें आशु कौरीए भिजाए और आपणें बाला कौरीए गुशें, और यीशु रें बांगणें दी खोबु देईयो तेस खुशबुदार तेल मांडदें लागी। 39 इणें देखीयो सेऊ फरीसी जुणीए यीशु थौं ओटाओ औन्दौं, आपणें मौना दी सुंचदें लागौ कि, "अगर यीशु भविष्यवक्ता हुआ थौं" तैबे एककें पौतौं लागी थौं की जो छेउडी एस छुईदें आ लागी ऐन्दी सैं कुण और कीणी छेउडी आ, कैलैकि इयें छेउडी ता पापीण आ। 40 यीशुए तेसलै बोलौ, "ओ शमौन मुए ताउंलें कुछ बोलनौं आ।" शमौनै बोलौ "ओ गुरु बोलौ" 40 यीशुए तेसलै बोलौ, "ओ शमौन मुए ताउंलें कुछ बोलनौं आ।" शमौनै बोलौ "ओ गुरु बोलौ" 41 एकी सेठा रें दुई कर्जदार थें एकी कै थौं पांज शौं दिनार, दुजे कै थौं पचास दिनारा रौं कौर्ज। 42 जैबे तिउं कर्जदारा कै वापिस दैणा लें कुछ ना रौं तैबे तिणी सेठें तिउं दुईया रौं कौर्ज माफ किओं, आबे इऊं दुई माझीआ कु सेठा आइलें कुण छाड़ा जादौं प्यार?" 43 शमौनै जवाब दैओं, "मेरी सौमझीए सेऊ जासरौं जादौं कौर्ज माफ हुआ आ" यीशुए तेसलै बोलौ ताएँ ठीक सुंचौं आ। 44 तैबे तिउं छेउडी भीलें फीरीओ यीशुए शमौना लै बोलौ, "का तू इरे छेउडी देखाई?" हाऊं तैरें घौरा कै आशौं ताएँ मैरें लाता धोइणा लै पाणी नाई दैओं पर इरें छेउडीए मेरी लातें आपणें आशु कौरीए धोई और बाला कौरीए ई गुशी। 45 ताएँ मुंदी खोबु नाई दैओं पर जेबी कु हाऊं आशोऊ तेबी ओउलें इयें छेउडी मैरें बांगणें दी खोबु दैन्दें लागी औन्दी। 46 ताएँ मैरें मुंडा दी तेल नाई मांडौं पर इरें छेउडीए मैरें बांगणें दी खुशबुदार मैहगौं तेल मांडौं आ। 47 एथीलै हाऊं ताउंलें बोलाऊ की इयारें पाप जो भौरी थें आबे माफ हुई गौरे कैलैकि इयारें भौरी प्यार कियो आ पर जासरें थोडें पाप माफ हुए सेऊ थोडौं प्यार कौरा आ। 48 यीशुए तिउं छेउडी लै

बोलौ, "तैरें पाप माफ हुई गौरे।" 48 यीशुए तिउं छेउडी लै बोलौ, "तैरें पाप माफ हुई गौरे।" 49 तैबे जो लोग तेस आइलें रोटी खान्दें थें बोशौं औन्दें सैं आपणें-आपणें मौना दी सुंचदें लागौ, "इयो कुण आ जो पाप भी माफ कौरा आ?" 50 पर यीशुए तिउं छेउडी लै बोलौ, "तैरें विश्वास कौरीए तू बोची गोई आ शान्ती कौरीए डेऊ।"

यीशु री शिखणें वाली

8 तेथ बासिरे यीशु इलाकें-इलाकें और गांवा-गांवा दी डेइयौं परचार कौरदें-कौरदें परमेश्वरा रें राजा रौं सन्देश शुणावा थौं, और तेसरें बारहा चेलै भी तेस आइलें थें। 2 कुछ छेऊंकी भी यीशु आइलै थी जुण पेहलै यीशुए बुरी आत्मा और बिमारी कु चांगी की गोई थी। सैं छेऊंकी एजी थी, मरियम जासलें मगदलीनी बौला थें जासकु यीशुए सात बुरी आत्माएँ गाडी थी। 3 और हेरौंदेस राजें रें भन्डारी खुजा री बोऊटी योअन्ना और सुसन्नाह नांवा री छेउडी और भौरी ओर छेउडी। सैं आपणें धन जयदाद कौरीयें तिउंरी सेवा कौरा थी।

बीज बोईणें वाले रौं औनैणौ

(मती 13:1-9; मरकुस 4:1-9)

4 जैबे बोडी भीड़ कौठें हुई और इलाकें-इलाकें रें लोग यीशु कारे आशें, तैबे तिणीए अनैणें देइयो तिउंलें बोलौं; 5 एक बीजा बोईणें वालौ बीजा बोईन्दें निकलौं बीज बोईणें वालौ बोईन्दी बारें कुछ बीज पौडौं बाटा दी, सेऊ बीज फेंचुओ और चिडु-चिटकोरुए चुणौं। 6 और कुछ बीज पौडौं पथरियाली जबीना दी सेऊ बीज जमौं पर बिण पाणिणें शुको पोरु। 7 कुछ बीज पौडौं कौडियाली झाडीऊ मांझिरे, सेऊं बोडिदें-बोडिदें दाबुओ पोरु झाडीऊ थाल। 7 कुछ बीज पौडौं कौडियाली झाडीऊ मांझिरे, सेऊं बोडिदें-बोडिदें दाबुओ पोरु झाडीऊ थाल। 8 कुछ बीज पौडौं आच्छी जबीना दी, और सेऊ जमियो शौं गुणौं फलौं।" इणें बोलीयो यीशुए तौंए जोरें बोलौं, "तुमै मेरें अनैणौ रें मतलब समझणौं चाहा ई, ता तुमै ध्याना देइयो सुचेऊ कि तुमै का शुणा ई।"

औनैणें रौं मतलब

(मती 13:10-17; मरकुस 4:10-12)

9 यीशु रें चलेउंए यीशु कु पुछौ, "एस अनैणें रौं मतलब का सा?" 10 तैबे यीशुए तिउंलें जवाब दैओं, "इबी झाऊं लोग नाई जाणा थें कि परमेश्वर आशीयो लोगु रें जीबा दी राज कौरा आ। तुमु कै ता एस भेता रें बारे दी मुइयें सब कुछ आ बोलौं औन्दौं, पर जो लोग परमेश्वरा री बाटा दी ना आशें, एऊ अनैणौ तिउं लोगु लै आ। इणें लोग देखा ताई रौंगें, पर सुंचदें नाई, और शुणा ताई रौंगें पर समझदें नाई।

बीज बोईणें वाले औनैणें रौं मतलब

(मती 13:18-23; मरकुस 4:13-20)

11 कहाणी रौं मतलब इणौं आ, "कि बीज परमेश्वरा रौं वचन आ। 12 जो बीज बाटा दी पौडौं तेथरौं मतलब आ कि कुछ लोग परमेश्वरा रौं वचन ताई शुणा पर आपणें जीवा दी ना छाडदें, तैबे शैतान तिउंरें जीवा कु खरकचार आशीओ परमेश्वरा रौं वचन चोरा, ताकी लोग विश्वास कौरीओ मुक्ति ना पा। 13 जो बीज पथरियाली जबीना दि पौडौं तेथरौं मतलब आ इणौं, कि लोग खरकचार खुशी कौरियें वचन माना ई पर जैबे विश्वासा रें कारण केजौं भी कष्ट या सताव आशा, तैबे सैं फेटी फशटा ई कैलैकि सैं परमेश्वरा रौं वचन आपणें जीवा दी नाई बसालदें। 14 और जो बीज झाडिऊ मांझिरे पौडौं थौं सेऊ खोडी ना उखरांदौं। तेथरौं मतलब इणौं आ। कि कुछ लोग परमेश्वरा रौं वचन शुणा ई। बासियें दुनिया री चिन्ता दी, रुपाए-पैसैं, जीन्दगी रें सुखा दी फसियो परमेश्वरा रें विश्वासा दी नाई बौददें। 15 जो बीज आछी जबीना दी पौडौं थौं, सौं भौरी फौला। तेथरौं मतलब इणौं आ कि कुछ लोग परमेश्वरा रौं वचन आच्छे कौरियें शुणाई और तेस वचन माथें चाला ई और विश्वासा दी बौडाई इणें आदमी तेस बीजा बाशिरे ई जो बीज शौं पाथें फौला आ।

लौम्पा रौ औनैणौ

(मरकुस4:21-25)

16 कोई भी आदमी लम्प जालियो ओखरा थाल नाई छाड़दौ और न पलंगा थाल छाड़दौ, पर तेस घौरा दी ऊंची जागहा दी छाड़ाई ताकि भीतरै आशणै वालै लोग लैप्याशौ लाग्गा। 17 कैलैकि कोई भी चीज मेरी नौजरी कु छिपी औन्दी ना आसती, जो परगट ना करियाली, और ना ही कुछ छुपौदौ आसदौ, जो ऊजाले दी ना आणियालौ। 17 कैलैकि कोई भी चीज मेरी नौजरी कु छिपी औन्दी ना आसती, जो परगट ना करियाली, और ना ही कुछ छुपौदौ आसदौ, जो ऊजाले दी ना आणियालौ। 18 एथिले होशियार रोएऊ कि तुमे किणौ शुणाई? कैलै की ज्ञासकै आसा तेसलै औजौ मीला, और ज्ञासकै कुछा नाई तेसकु सेऊं भी पोरु नीआई आ ज्ञास सेऊं आपणौ सौमझा।

यीशु री माँ और भाई

(मती12:46-50;मरकुस3:31-35)

19 यीशु री मां और भाई यीशु काए आशौ, पर भिड हुणा रै कारण सै यीशु काए नाई डेई बौलै। 20 तेस आइलै कुणि एकियै बोलौ, "तेरी मां और तेरी भाई बाइरै खौडौ ई, सै ताऊं कु मिलनौ चाहा ई। 21 यीशुए तिऊं लै जवाब देयौ, "मेरी मां और भाई इए सब लोग ई जो परमेश्वरा रौ संदेश शुणाई और तेथ माथै चालाई।

भूँचाल शान्त कौरणौ

(मती8:23-27;मरकुस4:35-41)

22 तैबै एकी दिनै यीशु और तेसरै चेलै किशती दी चौडै और यीशुए तिउंलै बोलौ, "चालौ आमै झिला पारभिलै डेई।" तैबै तिउंलै किशती खुंटीकु खोली गोई। 23 और किशती चालदौ लागी, पर यीशु गौ सुती, और तेबी झीला दी तेज बागुर लागी, इद्रा ज्ञाऊं कि किशती दी पाणी बौरिदौ लागौ सै सारै मुसिबता दी थै। 24 तैबै तिऊं चलेउए नजदीक डेइयौ यीशु उजीआओ और बोलौ "गुरु-गुरु" आमै नाश ई औन्दै लागौ औन्दै।" तैबै यीशु उठौ और तेज बागुर और पाणी रौ छालौ डांटौ, तैबै सै पाणी रै छाले और तेज बागुर शान्त हुई और शाई पौडी गोई। 25 तैबै यीशुए तिऊं चलेऊ लै बोलौ, "तुमारौ विश्वास किये थौ?" तैबै सै डौरी गोए हैरान हुइयौ आपु माझीए चौपडिदौ लागै, "इयौ कुण औलौ इणौ पा कि पाणी और बागुरा लै हुकम दिआ ऐ एसरी बुश मानाई?

बुरी आत्मा वालौ आदमी चांगौ कौरणौ

(मती8:28-34;मरकुस5:1-20)

26 तैबै सै गिरासेनिऊ रै इलाकै दी पौउंचै जो झिला पारभिलै गलील इलाकै रै सामनै आ। 27 जीणी यीशु झीला रै डिका काए किशती कु उतरौ तिणी सेजै इलाकै रौ एक आदमी यीशु कु मिलौ, ज्ञासदी बुरी आत्माए थी, सेऊं आदमी भौरी दिना ओलै ना ता ज़ुडकै भीडा थौ और ना ता घौरा कै रौआ थौ पर तिरे रौआ थौ जीए मौरै औन्दै लोगु दाबा ई। 28 सेऊं आदमी यीशु देखीओ राडै मारदौ लागौ और यीशु काए धौनी पौडीयौ हाकै देइयौ बोलदौ लागौ, "ओ परमपरधान परमेश्वरा रै छोहरु यीशु तू मुकु का चाहा ई?" हाऊं ताऊंकु औरज कौराऊं कि तू मुलै दुख नाई दै।" 29 कैलैकि यीशुए तिऊं बुरी आत्माए लै तेस आदमी कु बाइरै निकुलनै रौ हुकम देई गौ थौ। और सै बुरी आत्माए तेस आदमी दी घौडी-घौडीए आशा थी लोग तेस आदमी शांगली और रशेद दी बाना थै तीउं भी सेउ पोरु चोड़ा थौ और सै बुरी आत्माए तेस सुनसान जागहा दी निया थी। 30 यीशुए तिरे बुरी आत्मा कु पुछौ कि तैरौ का नाऊं?" बुरी आत्मै बोलौ मेरौ नाऊं आ "सेना।" कैलैकि तेसदी भौरी बुरी आत्मा थी लागी ऐन्दी। 31 तिऊं बुरी आत्मै यीशु कु औरज की, कि आमु नौरका री खाली दी ना पाओ। 32 तिरे पाहाड़ा माथै सुगरु रौ गोल थौ चौरदे लागौ औन्दौ तिरे बुरी आत्मै यीशु कु औरज की कि आमु इऊं सुगरु दी भेज तैबै यीशुए तिउंलै हुकम दैओ। 33 तैबै सै बुरी आत्माए तेस

आदमी कु निकली औ तिऊं सुगरु भिलै डेई। तैबै सुगरु रौ गोल मातोलै दुडियो झिला दी पौडै और दुबियो मौरै। 34 तिऊं सुगरु चारणै वालै इणै देखीओ तदरु पोरु भागै और इलाकै, गांवा दी डेइयौ लोगु कै इरे खबर शुणाई। 35 जो तिरे हुओ थौ तेस देखणालै लोग आशौ और यीशु काए आशीओ, ज्ञास आदमी कु बुरी आत्माए निकली थी सेऊं आदमी तिउंलै तीशु रै बांगणै काए झुडकै भीडीओ और शान्त बोशौ औन्दौ देखौ, इणै देखीयौ सै लोग डौरी गोए। 36 और जुणीए भी सेऊं आदमी ठीक हुन्दै देखौ थौ तिउंलै तिऊं ओरी लोगु कै बोलौ की सेऊं बुरी आत्मा कु बिमार आदमी किणै कौरीए ठीक हुओ आ। 37 तैबै गिरासेनिउ इलाकै रै नजदिका रै सारै लोगुए यीशु कु औरज की छौंअटी आमरै इलाकै कु पोरु डेऊं। कैलैकि सै भौरी डौरी गोए थै तैबै यीशु किशती दी चौडीओ तदरु डेउंदै लागौ। 38 ज्ञास आदमी कु बुरी आत्माए निकली थी सेऊं यीशु कु औरज कौरदौ लागौ कि मू आपु आइलै दैओ रौइणै पर यीशु सेऊं वापिस भजौ और तेसलै बोलौ, 39 कि आपणै घोरै डेऊं और लोगु काए बोल कि परमेश्वरै ताऊं माथै दया कौरीओ किणै बौडै-बौडै काम किये ई, सेऊं आदमी तदरु डेइयौ सारै इलाकै दी बोलदौ लागौ कि यीशुए मु आइलै किणै बौडै-बौडै काम किये ई।

याईरा री मौरौ औन्दी छोटी और एक रोगली छेवडी

(मती9:18-26;मरकुस5:21-43)

40 जैबै यीशु वापिस आशौ तैबै लोग खुशी कौरीयै यीशु कु मिलै कैलैकि सै लोग यीशु पौखदै थै लागै औन्दै। 41 तैबै धार्मिक खुम्बली रौ एक मुख्यौ यीशु काए आशौ तेसरौ नाऊं याईर थौ, सेऊं यीशु री लातेऊ माथै पौडीयौ यीशु कु औरज कौरदौ लागौ कि छौंअटी मेरै घोरै चालौ। 42 कैलैकि तेसरी एका माई थी बारहा बौरशा री, सै माई मोरनै वाली थी, जैबै यीशु डेऊंदै लागौ तैबै लोगु री बोडी भीड यीशु आइलै थी डेऊंदै लागी ऐन्दी। 43 तैबै एक छेउडी ज्ञासदी बारहा बौरशा ओऊलै लोऊ बोइणै री बिमारी थी, तिआए आपणै इलाजा कौरना लै आपणी सारी कौमाई खौर्च की गोई थी, पर तैबै भी तिआंलै किये भी चंगाई नाई मिलौ। 44 सै छेउडी भीडा माजीए कु यीशु पिछु आशी और तिआए यीशु रै चोलै रौ धुरौ छुओँ और तेबी तिआरौ लोऊ बौइणौ बन्द हुओ। 45 तैबै यीशुए बोलौ, "हाऊं कुणीए छुओऊं?" जैबै सारै लोग मुकुरदौ लागै तैबै पतरस और तेसरै साथीऊए यीशु लै बोलौ, "गुरु जी" तुम माथै एतरी भीड आ पौडदौ लागी ऐन्दी। तैबै आमै किणै कौरी बोली बौली, कि तुमै कुणीए छुएँ ई 46 पर यीशु ए बोलौ, "कुणीए हाऊं छुओँ ऊ कैलैकि मुकै चौरुओँ आ, कि मुकु शक्ती निकली आ।" 47 जैबै तिरे छेउडीए देखौ कि यीशु कै पौतौ लागी गौ आ तैबै सै कांबी-कांबीओ यीशु काए आशी और यीशु री लातेऊ माथै पौडीयौ सारेऊ लोगु काए बोलदौ लागी कि मुइयै केजै कारण यीशु छुओँ आ और आबै हाऊं एक दम किणी चांगी हुई गो ई। 48 यीशुए तिआंलै बोलौ, "धीआ, तैरै विश्वासा कौरीए तू ठीक हुई ई शान्ती कौरीयै डेऊ।" 49 जैबै यीशु बुशै लाईदौ थौ लागौ औन्दौ तेबी याईरा रै घौरा कु कुछ लोग आशीयौ याईरा लै बोलदौ लागै, "कि तेरी माई मौरौ गोई आ आबै गुरु लै कौष्ट नाई दै।" 49 जैबै यीशु बुशै लाईदौ थौ लागौ औन्दौ तेबी याईरा रै घौरा कु कुछ लोग आशीयौ याईरा लै बोलदौ लागै, "कि तेरी माई मौरौ गोई आ आबै गुरु लै कौष्ट नाई दै।" 50 यीशु ए इणै शुणीयो याईरा लै बोलौ, "डौर नाई सिरफ विश्वास छाड़ तैबै तेरी माई पोरु बौवा आ।" 51 याईरा रै घौरा कै पौउंचीयो यीशु ए पतरस, यहुना, याकूब और तिरे माई रै मा-बाबा छाडीयो कोई भी भीतरै तिरे माई काए नाई दै आशणै। 52 तिरे सारै लोग छाती पिटीयो लेरदौ थै लागै औन्दै तिरे माई लै" पर यीशुए तिउंलै बोलौ लेरौ नाई कैलैकि इयै माई मौरौ नाई भी नाई सुती ऐन्दी आ। 53 लोग इणै जाणीयो कि माई मौरौ गोई आ यीशु रौ मजाक उड़ाऊंदै लागै। 54 तैबै यीशुए तिरे माई रौ हाथ पाकडौ और तियां लै हाका देइयौ बोलौ, "ओ माई उठ" 55 तैबै सै माई जीऊंदी हुई गोई, और सै खरकचार उठीयो बोशी। तैबै यीशुए तिरे माई रै मां-बाबा लै बोलौ कि इएँ माई लै कुछ खाणा लै दैओ। 55 तैबै सै माई जीऊंदी हुई गोई, और सै खरकचार उठीयो बोशी। तैबै यीशुए तिरे माई रै मां-बाबा लै बोलौ कि इएँ माई लै कुछ खाणा लै दैओ। 56 माई रै मां-बाब हैरान हुए पर यीशुए तिउंके चितलाओ कि जो इदौ हुओ आ कासी कै ना बोलेऊ।

बाहरा चेलै भेजणै
(मती10:5-15;मरकुस6:7-13)

9 एकी दिनै यीशुए आपणै चुनै औन्दै बाहरा चेलै आपु कारे औटाए, तिउंकै बुरी आत्माएँ गाडने और बिमारीऊ चांगी कौरने री शक्ती और हक दैओ। 2 तैबै यीशुए सै, परमेश्वर रै राजा रौ परचार कौरना लै, और बिमार लोगु चांगै कौरना लै भेजै। 3 यीशु चाहा थौ कि चेलै आपणी जुरता रै बारै दी चिन्ता ना कौरा। एजै कारण चलेऊ लै यीशुए बोलौ, "बाटा लै आपुकु कुछ ना निएऊ, ना डिंगौ, ना बैग, ना रोटी और ना पैसै, ना दुई-दुई कुरतै। 4 जेजै घोरा दी तुमँ डिआ लै सेजै घोरा दी रौइणौ, जेबी झाऊं तुमँ सेजै गांवा दी ई। 5 जो लोग तुमु नाई माना लै तैबै तिराकु निकलियो आपणी चैपली री धूड भी पोरु झाडै ऊ। इणै देखियो सै समझा ई कि परमेश्वर तिउंलै जरुर सजा दिया आ।" कैलैकि तिउंए परमेश्वर री शिक्षा नाई शुणी। 6 तेथ बासिऐ सै बारह चेलै अलग-अलग गांवा दी डेइयो खुशी रौ सन्देश शुणावा थै और हर जगाह दी लोगु चांगै कौरदै लागै।

हेरोदेसा री परेशानी
(मती14:1-12;मरकुस6:14-29)

7 इणै शुणीयो हॅरोदेस जो सेजै देशा रै चोथे हिसै रौ आफसर थौ, घौबराई गौ कैलैकि कुछ लोग बोला थै कि यहना जीउंदौ हुई गौ आ। 8 और कुछ लोग बोला थै इणौ कि एलियाह भविष्यवक्ता परगट हुई गौ आ, और कुछ बोला थै कि पुराणै जमानै रै भविष्यवक्ता माझीया कु कुण जीउंदौ हुई गौ आ। 9 पर हॅरोदेसै बोलौ, कि यहना रौ ता मुइयै मूड कोटाओ आ, आबै इयो कुण आ जासरे बारै दी हाऊं इणी बुशै शुणाऊ?" तैबै हॅरोदेस यीशु देखणौ चाहा थौ।

पाँज हजार पूरषा लै रोटी खिलाउणी
(मती14:13-21;मरकुस6:30-44;युहन्ना6:1-14)

10 तैबै भेजै औन्दै चलेऊ ए वापिस अशीयो जो कुछ तिउंए कियो थौ यीशु कारे बोलौ, और यीशु ए सै अलग कौरीयो बैतसैदा इलाकै दी निरे। 11 इणै देखियो भीड़ यीशु पिछु चाल पौडी और यीशु खुशी कौरि तिउं लोगु कु मिलौ और तिउं आइलै परमेश्वर रै राजा री बुशै लाइदै लागौ, तैबै जुण ठीक हुणौ चाहा थै यीशुए सै चांगै किरै। 12 जैबै ब्याल हुई गोइ तैबै सै बारह रै बारह यीशु कारे आशीओ बोलौ कि "इरे जगाह सुनसान आ तुमँ इऊं लोगु नीजुका रै बस्ती और गांवा दी छाडौ ताकी इरे लोग आपुकाले रौइणै रौ और खाणै रौ इन्तजाम कौरा। 13 यीशुए चलेऊ लै बोलौ "तुमँ दैओ इऊं लै खाणा लै तिउंए बोलौ आमुकै पाँज रोटी और दुई माछी छाडीओ कुछ ना आसतौ पर अगर आमै इऊं सौभी लोगु लै नाज खरीदिओ आपुले तैबै हुई सौका, भीड़ा रै लोगु माझिए कम से कम पाँज हजार ता मर्द थै। 14 तैबै यीशुए आपणै चलेउलै बोलौ, "इऊं लोगु धोनी बोशालौ पचास पचास री पांगती दी।" 15 चलेउए तिणी कियो और सारै लोग बोशाली गौरे। 16 तैबै यीशुए सै पाँज रोटी और दुई माछी आपणै हाथा दी की और सौरगा बिलै देखीओ परमेश्वर रौ धन्यवाद देइयो आशीष मांगी और रोटी चेलैऊ कै देई और चेलै लागै लोगु कै बांटदै। 17 तैबै सारै लोगुए पेटा भोरीओ रोटी खाई। तेती माथे भी चलेउए बौचै औन्दै रोटी और माछी रै बारह छाबडै बौरै।

पतरसा रौ यीशु "मसीह" मानणौ
(मती16:13-20;मरकुस8:27-30)

18 एकी दिनै यीशु भीड़ा रै लोगु छाडीयो एखुलै दी प्राथना कौरदै डैओ, और यीशु रै चेलै भी थै यीशु आइलै तैबै यीशुए चलेऊ कु पुछौ, "लोग मैरै बारै दी का बोलाई कि हाऊं कुण ऊ?" 19 तिउंए जवाब दैओ, "कुछ बोलाई इणौ कि यहना बसिस्मा दैणै वालौ जीउंदौ हुई गौ आ, और कुछ बोलाई एलियाह भविष्यवक्ता, और कुछ बोलाई इणौ कि पुराणै जमानै रै भविष्यवक्ता माझीए कु एक भविष्यवक्ता जीउंदौ हुई गौ आ।" 20 यीशुए तिउंकु पुछौ, "तुमँ का सौमझा ई मूं (मैरै बारे दी)?" पतरसै जवाब दैओ,

"तुमँ परमेश्वर री तौरफा कु भेजै औन्दै मसीहा ई। 21 तैबै यीशुए तिउंकै चितलाओ कि, एथरै बारे दी कासी आइलै ना बोलेऊ।

आपणी मौता रै बारै दी यीशु री भविष्यवाणी
(मती16:21-23;मरकुस8:31-33)

22 और यीशुए तौएँ बोलौ, "कैलैकि, आदमी रै छोहरुए भौरी दुख उठाउणे ई; यहुदी स्याणै लोग, बौडै याजक, और शास्त्री मूं नाई मानदै, मेरी इज्जत नाई कौरदै। और मूं पोरु झांगाई पर हाऊं चिजै दिने ज़ीउंदौ हुआऊ।

यीशु पीछु आण्डणै रौ मतलब
(मती16:24-28;मरकुस8:34—9:1)

23 तैबै यीशुए सारै लोगु लै बोलौ, "अगर कुण मूं पिछु हाण्डणौ चाहा, (मैरौ चेलौ बौणनौ चाहा लौ) सेऊ आपणी इच्छा पोरु छाडा लौ" और आपणौ क्रूस चुंगीयो हर रोज मूं पिछु हाण्डा लौ। 24 कैलैकि जुण-कुण आपणौ प्राण दैणै नाई चाहा लौ तेसलै परमेश्वर आइलै सदा री जीन्दगी नाई मिलदी, पर जो मुकाले तयार औलौ तेसलै परमेश्वर आइलै सदा री जीन्दगी मिला आ। 25 लोग पुरै संसार पाई बला ई, पर एथरौ का फाइदौ आ आपणौ प्राण खोआ लै पोरु? 26 जो मेरी ताई और मेरी शिक्षा री ताई शर्मिया लौ, ता जेबी हाऊं आदमी रौ छोहरु आपणी, बाबा री और, पवित्र दूतु री शाना देखाईओ आशु लै, तैबै हाऊं भी शर्मिया ऊ। 27 पर, "हाऊं तुमु लै सच्यौ बोलाऊ कि इदै इऊं खौडै लोगु माझिए कु कुछ आदमी जरुर आपणी जिन्दगी दी देखा लै कि परमेश्वर शक्ति भौलौ राज कौरना लै आशौ आ।

यीशु रौ रूप बौदलियो
(मती17:1-8;मरकुस9:2-8)

28 इऊं बुशैऊ कु आठा दिना बसीयै यीशुए पतरस, यहना और याकूब आपु आइलै निअँओ प्राथना कौरना लै एकी धारा माथे डैओ। 29 जैबै यीशु प्राथना कौरदै लागौ, तैबै प्राथना कौरदै-कौरदै यीशु रै मुआँ रौ रूप बौदलुई गौ, और यीशु रै जुडकै उजलै हुईयो चमकदै लागौ। 30 और तिआ ताकै तिरे यहुदी लोगु रै पुराणै जमानै रै दुई स्याणै भी परगट हूरे जासरे नाऊं मुसा और एलियाह थै, सै दुई थै लागै औन्दै यीशु आइलै बुशै लाईदै। 31 सै शाना कौरियै दिशै, और यीशु रै मौरनै री बुशै लाईदै थै लागै औन्दै जो यरुशेमा दी हुणै वालौ थौ यीशु आइलै। 32 पर पतरस और तेसरै साथी थै गहरी निजा दी सुतै औन्दै, जैबै सै चले आच्छे कौरिऐ थौरकै तैबै तिउंए यीशु री शान और सै दुई आदमी देखे जुण यीशु आइलै खौडै थै। 33 जैबै सै दुई भविष्यवक्ता यीशु कारे कु डेऊंदे लागे, तैबै पतरसै यीशु लै बोलौ, "ओ गुरुजी, आमारो इदै रौउणौ भौलौ आ, आबै आमै इदै चिन बेदी चाणी, एक ताऊं कालै, एक मुसा कालै और एक एलियाह कालै।" सेऊ नाई ज़ाणा थौ कि हाऊं का बोलदै ऊ लागौ औन्दौ, 33 जैबै सै दुई भविष्यवक्ता यीशु कारे कु डेऊंदे लागे, तैबै पतरसै यीशु लै बोलौ, "ओ गुरुजी, आमारो इदै रौउणौ भौलौ आ, आबै आमै इदै चिन बेदी चाणी, एक ताऊं कालै, एक मुसा कालै और एक एलियाह कालै।" सेऊ नाई ज़ाणा थौ कि हाऊं का बोलदै ऊ लागौ औन्दौ 34 जेबी सेऊ बोलदै थौ लागौ औन्दौ, तेबी ई सौरगा दी बादल कौठै हूरे और सै बादला दी घेरुई गौरे तैबै सै चेलै डौरी गौरे। 35 तैबै बादला माजिये कु एक हाक शुणुई कि, "एऊ मैरौ प्यारा छोहरु आ, और मैरौ चुनौ औन्दौ आ एसरी शुणौ। 36 जिणी तिउं चलेऊ कै इयै आवाज शुणुई तेत बासीऐ तिउंए यीशु एखुली देखौ, तैबै सै चेलै चुटुकचार थाकै और जो कुछ तिउंए तिरे देखौ थौ सै बूश तिउंए सेजै दिना दी कासी आइलै ना लाई।

बुरी आत्मा वालौ छोहरु चांगौ कौरणौ
(मती17:14-18;मरकुस9:14-27)

37 दुजै दिने जैबै यीशु और तेसरै चेलै पहाडी माथा कु तौलै आशै तैबै भौरी लोगु री भीड़ यीशु कु मिली। 38 तियेँ भीड़ा माझिए कु एक आदमी राडै मारीयो थौ बोलदै लागौ औन्दौ कि, "ओ गुरु हाऊं ताऊं कु औरज कौराऊ कि मैरै छोहरु माथे दया कर कैलैकि सेऊ मैरौ एकलौतौ छोहरु आ। 39 एक

बुरी आत्मा तेस छोहरु पाकड़ा सा और सेऊ छोहरु किचराली मारा आ, सै बुरी आत्मा तेस इणो मेका सा कि तेसरै मुआं दी शेफै पा आशा ई बासिरे तेस मेकीयो और फेंचीयो बौड़ी मुश्कला कौरीयै पोरु छाड़ा सा। 40 मुइयै तैरै चलेऊ कु औरज की थी कि इयै बुरी आत्मा पोरु गाड़ौ, पर सै नाई गाड़ी बौलै। 41 तैबै यीशुए बोलौ, "का कौरुलै, तुमुकै मूं माथै इबी झाऊं विश्वास नाई आसतौ? तुमारौ जीऊ ता भौरी काठौ आ, हाऊं केबी झाऊं रौआऊ तुमु आइलै और केबी झाऊं सहन कौराऊ? आपणौ छोहरु इदै आण। 42 जेबी सेऊ आदमी आपणै छोहरु आणीयो आशदै लागौ, तेबी ई बुरी आत्मै सेऊ छोहरु धौनी लोटाळौ और मेकौ पर यीशुए सै बुरी आत्मा डांटी और छोहरु तेबी चांगौ कौरीयो तेसरै बाबा कै सौंभालौ। बिमार माऊं चांगौ कियो

आपणै मौरणै रै बारै दी यीशु री भविष्यवाणी

(मती 17:22-23; मरकुस 9:30-32)

43 तैबै सारै लोग परमेश्वरा रै एजै बौड़ै शक्ति वालै कामा देखीयो हैरान हूए, जैबै सारै लोग यीशु रै कामा देखीयो हैरान थै, तैबै यीशुए आपणै चलेऊ लै बोलौ, 44 तुमै इऊं बुशैऊ दी कौन्थु लाओ केलैकि आदमी रौ छोहरु लोगु रै हाथा दी पौकड़ाइणै वालौ आ। 45 पर चेलै एजी बूश नाई सौमझा थै, और इयै बुशै तिऊंकु चोरुई औन्दी थी ताकी सै ना सौमझा, और चेलै इऊं बुशु रै बारै दी यीशु कु पुछणा लै डौरा थै।

सारेउकु बौड़ौ कुण?

(मती 18:1-5; मरकुस 9:33-37)

46 तैबै यीशु मसीह रै चेलै आपु मांझीए बोलीदै लागै कि आमु मांझीयै बौड़ौ कुण आ? 47 यीशुए तिऊरै मौना रै विचार सौमझी गौए, यीशुए एक छोहरु आणीयो आपु काए खौड़ौ कियो। 47 यीशुए तिऊरै मौना रै विचार सौमझी गौए, यीशुए एक छोहरु आणीयो आपु काए खौड़ौ कियो। 48 और चलेऊ लै बोलौ, "जो एस जीणो छोहरु मैरै नावां कौरी अपणावा ई सै मूं अपणावा ई, और जुण कुण मूं आपणावा ई सै मैरौ बाब जुणीयै हाऊं भेजोऊ तेस आपणावा ई; केलैकि तुमु मांझीए जुण सारेऊ कु छोटौ बौणा लौ सेऊ बौड़ौ हुआ सा।

जो बिरोधा दी नाई सेउ हका दी आ

(मरकुस 9:38-40)

49 तैबै यहना नावां रै चेलैए यीशु लै बोलौ, "ओ गुरुजी, आमुए एक आदमी देखौ आ जुण तुमारै नावां कौरीयै बुरी आत्मा गाड़दै थौ लागौ औन्दी। आमुए कौरी तेसलै मना। केलैकि सेऊ तुमारै चुनै औन्दी चलेऊ मांझीए कु नाई थौ। 50 यीशुए तेसलै बोलौ, "तेस आदमी लै मना नाई कौरौ केलैकि जुण आमारै विरोधा ई नाई आसतौ सेऊ आमारै हका दी आ। 51 जैबै यीशु रै सौरगा लै डेरुणै रै दीन नजदीक आशदै लागै, तैबै यीशुए यरुश्लैमा लै डेरुणै रौ विचार पाकौ की गौ आ। 52 डेरुणै कु पैहलै यीशुए सामरी इलाकै दी जो गाऊं थै तिऊं गावां दी आपणै दूत भेजै कि सै यीशु कालै जागहा तयार कौरा। 53 पर तिऊं गावां रै लोगुए सै वापिस भेजै। केलैकि यीशु यरुश्लैमा लै थौ डेरुणै लागौ औन्दी। 54 जैबै तेसरै चेलै याकुबै और यहनै इणौ शुणौ, तैबै तिउंए यीशु लै बोलौ, "ओ प्रभु" आमुलै आज्ञा दै कि आमै सौरगा कु आग बरसाइयो इऊं लोगु पोरु जाली। 55 पर यीशु तिऊं भिलै मुड़ै और सै डांटे और बोलौ, "तुमै नाई जाणदै कि तुमै किणी आत्मा रै सा। केलैकि आदमी रौ छोहरु लोगु रै प्राण नाश कौरदै नाई बल्की बचाउणा लै आ आशौ औन्दी। 56 तैबै सै तिररु दुजै गावां बाटीए निकली गौए।

यीशु रौ चेलौ बौणनै रौ मतलब

(मती 8:19-22)

57 जैबै सै बाटा दी डेरुणै थै लागै औन्दी, तैबै कुणीए यीशुलै बोलौ, "तुमै चाऊ जीए भी डेवा लै हाऊं तुमु पिछु आशाऊ। 58 पर यीशुए तेसलै जवाब दैओ, "शालटा, रै ता रौइणा लै डौरै हुआई और चिडु-चिटकरै रै रौइणा लै कोलै हुआई, पर आदमी रै छोहरु कै मुंडा छाड़ने री भी जागहा नाई आ।

59 यीशुए दुजै आदमी लै बोलौ, "आश मैरौ चेलौ बण, सेऊ आदमी राजी हुआ, पर सेऊ बोलदै लागौ, "प्रभु मूं पैहलै डेरुणै दै कि आपणौ बाब कौबरी दी दाबु।" 59 यीशुए दुजै आदमी लै बोलौ, "आश मैरौ चेलौ बण, सेऊ आदमी राजी हुआ, पर सेऊ बोलदै लागौ, "प्रभु मूं पैहलै डेरुणै दै कि आपणौ बाब कौबरी दी दाबु।" 60 यीशुए तेसलै बोलौ, "जुण आत्मा कु मौरै औन्दी ई तिऊं आपणै मुदँ दाबणै दैओ। तैरौ काम एजौ कि तू परमेश्वरा रै राजा रौ खुशी रौ संदेश शुणाऊ। 61 एकी आदमी ए तौंए बोलौ, "ओ प्रभु हाऊं ताऊं पिछु आशाऊ पर पैहलै मूं डेरुणै दै कि आपणै टौबरा कु इजाजत निऊं लौ। 62 यीशुए तेसलै बोलौ, "जो आदमी बाइंटी बारै हौला री आड़ी माथै हाथ छाड़ीयो पिछाऊं देखा सेऊ परमेश्वरा रै राजा रै लायक नाई आसतौ।

सौत्तर चेलै भेजणै

10 इऊं बूशेऊ बासिरे प्रभु सत्तर चेलै तौंए छोटै और जेजै-जेजै शहर और जागहा दी सेऊ डेरुणै वालौ थौ तिरे-तिरे यीशुए आपु कु पैहलै दुई-दुई चेलै भेजै। 2 यीशुए तिउंलै बोलौ, "पावी ऐन्दी फसल ता भौरी सी, पर तिरे फसली मेटणे वालै ज़ीमदार भौरी कम ई। एथीलै डोखरै रै मालीका कु औरज कौरौ कि आपणै डोखरै दी पावी ऐन्दी फसली लौऊणा लै ज़ीमदार भेज। 3 आबै डैओ; और याद छाड़ौ कि हाऊं तुमु शालटेऊ (भेड़ीया) माझीए भेरी बाशिरे भेजाऊं। 4 तुमै डेरुणै बारै आपकै ना बटुए, ना झोले, इदरा झाऊं कि दुजी जोड़ी बूट भी ना निरेऊ, और बाटा दी कासी काए टेकियो ढाल भी ना कौरैऊ। 5 और जेजै घौरा दी तुमै डिआ लै, पैहलै बोलेऊ कि एस घौरा दी शान्ति मिला। 6 और अगर शान्ति लायक आदमी तेस घौरा दी औलै ता तिउंलै आशीष मिला सा, अगर सै इणै लायक नाई ता सै आशीष और शान्ति वापिस तुमुकै आशा सा। 7 जेजै घौरा दी तुमै डिआलै, सेजै घौरा दी रौएऊ, और जो कुछ मिला लौ सेजौ खाए पिएऊ, केलैकि मजदुरा लै तेसरी मजदुरी मिलणी चांई, घौरा-घौरा कै नाई रिटणौ। 8 जेजै इलाकै दी तुमु खुशी कौरी माना लै और जो कुछ सै तुमुलै खाणा लै दिआ लै तेस खुशी कौरीए खाएऊ। 9 तिदलै बिमार लोगु तुमै चांगै कौरैऊ, और तिउंलै बोलेऊ कि परमेश्वरा रौ राज तुमारै नजदीक पौऊंकी गौ आ। 10 पर जेजै इलाकै दी तुमु नाई माना लै ता तुमै तेस इलाकै री सडकी दी डेरुणै बोलेऊ, 11 तुमारै इलाकै री धूड़ भी जो आमारै बांगणे दी लागी ऐन्दी, इयै धूड़ आमै तुमु काए झाड़ी आ, तैबै भी तुमै इणौ जाणौ कि, "परमेश्वरा रौ राज तुमारै नजदीक पौऊंकी गौ आ। 12 हाऊं तुमु आइलै बोला ऊ कि, "फैसलै रै दिनै तेस इलाकै री हालत सदोम शहरा कु भी बुरी हुणी आ।

बिण विश्वासा वालै इलाकै धिकारनै

(मती 11:20-24)

13 तैबै यीशुए दुई शहर खुराजीन और बैतसैदा लै दुखा कौरीयै बोलौ, हारे खुराजीन और बैतसैदा: जो शक्ती वालै काम मुइयै तुमु मांझीए किएई अगर तिऊं काम हाऊं बुरै इलाकै सूर और सैदा दी कौरा थौ ता सै तिउंरै बौणै औन्दी बोरी रै जुडकै भीडीयो और आपणै जीवा दी छारा मांडीयो केबकै आपणौ मन पापा कु बौदला थै। 14 पर फैसलै रै दिना दी तुमारी हालत तिऊं सूर-सैदा इलाकै कु भी ज़ादी बुरी हुणी आ। 15 ओ कफरनहुमा रै लोगुओ, का तुमु सौरगा झाऊं ऊंचौ कौरा ई? तुमु ता तौलै उतारा ई पैताला लै। 15 ओ कफरनहुमा रै लोगुओ, का तुमु सौरगा झाऊं ऊंचौ कौरा ई? तुमु ता तौलै उतारा ई पैताला लै। 16 तैबै यीशुए आपणै बारहा चलेऊलै बोलौ, "जो लोग तुमारी शुणाई सै मेरी शुणाई, और जो तुमारौ संदेश नाई मानदै, सै मूं नाई मानदै, और जो मेरी बूश नाई मानदै सै तेस भी ना मानदै जुणीए हाऊं भेजो ऊ।

सौत्तर चलेऊ रौ वापिस आशणौ

17 तैबै सै सत्तर चेलै यीशु काए खुशी कौरीए वापिस आशै, और सै बोलदै लागै, "ओ प्रभु तुमारै नावां कौरीए बुरी आत्मा भी आमारै बौशा दी आ। 18 यीशुए बोलौ, "मुइयै शैतान बिजली बाशिरे सौरगा कु तौलै पौडदै देखौ

आ।" 19 देखो मुझें तुमके साप और बिच्छू लाता थाले जांगणा, और शैताना री सारी ताकती माथे हक आ देओ औन्दौ, और केजी भी चिजा कु तुमु लै कोई भी नुकसान नाई औन्दौ। 20 तैबे भी तुमै खुश नाई हुएऊ कि आत्मा तुमारै बशा दी आ, "पर एथलै खुश हुएऊ कि तुमारै नाऊ सौरगा दी ई लीखे औन्दौ।"

यीशु रौ खुश हुणौ

(मती 11:25-27; 13:16-17)

21 और सेजै बौमते यीशुए पवित्र आत्मा दी खुशी कौरिये भोरुइयो बोलौ, "ओ मैरौ बाब" सौरग और धौतरी रै प्रभु, हाऊं तैरौ धन्यवाद कौरा ऊ कि ताएँ इये बुशै ज्ञानी और समझदारु कु चोरी छाड़ी और लोलडेऊ माथे परगट की, कैलैकि, "ओ बाब ताउंकै इणौ ई आच्छौ लाग। 22 तैबे यीशुए आपणै चलेऊ लै बोलौ, "मैरै बाबे मुके सब कुछ सौभाली गौ आ; कोई ना ज्ञानदौ कि छोहरु कुण आ, सिर्फ बाब ज्ञाणा सा, और बाब कुण आ इणौ भी कोई ना ज्ञानदौ सिर्फ छोहरु या ज्ञास माथे छोहरु तेस परगट कौरनै चाह लौ। 23 तैबे यीशुए आपणै चलेऊ भीलै मुडीयो एखुले दी बोलौ, भौली सै आखी जो इणौ देखदे ई लागी औन्दौ। 24 कैलैकि हाऊं तुमुलै बोला ऊ कि भौरी गुरुए, और राजेऊ ए चाओ कि सै तिरेँ बूश देखा और शुणा, जो बुशै तुमुए हाऊं कौरदै देखौ और बोलदै शुणौ ऊ, पर सै इऊं बुशै ना देखी बोलै और ना शुणी बोलै।

दयालु सामरी रौ औनेणौ

25 तैबे एक शास्त्री उठौ और इणै बोलीओ यीशु री परिक्षा कौरदै लागौ, कि सौदा री जिन्दगी पाईणा लै मुझें का जा सा कौरनौ? 26 यीशुए तेसलै जवाब देओ, "धर्म शास्त्रा दी का सा लिखौ औन्दौ, और ताएँ किणौ पौडौ आ? 27 तिणी आदमी ए जवाब देओ, इणौ आ लिखौ औन्दौ कि, "तू आपणै जिव आ कौरिये, आपणै पुरै प्राणा कौरिये, सारी ताकती कौरिये और पुरै दिमागा कौरिये परमेश्वरा आइलै प्रेम कर, "और जिणौ प्रेम तू आपु आइलै कौरा ई तिणौ प्रेम तू आपणै आस-पडोसा रै लोगु आइलै भी कर। 28 यीशु ए शास्त्री लै बोलौ, "तू ठीक बोला ई, इणौ ई कर तैबे तु जिउंदौ रौआई।" 29 पर तिणी शास्त्री ए आपुलै धर्मौ सौमझीओ यीशु कु पुछौ कि, मैरौ पडोसी कुण आ? 30 यीशुए तेसलै जवाब देओ, "एक आदमी यरुशेमा कु यरीहो गावां लै थो लागौ औन्दौ डेऊंदै, बाटा दी सेऊ चोर डाकुए घेरौ और तेसरै जुडके चिरै और सेऊ पिटीओ अदमौरौ कियौ, और आपु भागै तिरु पोरु। 31 तैबे इणौ हुओ कि सेजी बाटा दी एक याजक आशौ तिणीए सेऊ अदमौरौ आदमी देखौ और तेसकु बारुइयो तिरु पोरु डैओ। 32 इणी एक लेवी ज्ञाती रौ आदमी भी तेशी आलै आशौ और सेऊ भी तेसकु बारुइयो तिरु पोरु डैओ। 33 तैबे सामरी ज्ञाती रौ आदमी तेशी आलै आशौ और तिणीए सेऊ अदमौरौ आदमी देखौ और तेस माथे दया की। 34 सेऊ तेस अदमौरौ आदमी काए आशौ और तेसरै जखमा दी तेल और दवाई लाईयो पट्टी बानी और आपणै गादहै माथे बोशालीयो आपु आइलै एकी सरायें दी निओ तिरे तेसरी सेवा की। 35 दुजे दिनै तिणी सामरी आदमीए सरायें रै मालिका के दुई चान्दी रै रुपाई दे, और बोलौ एसरी सेवा कौरै जो कुछ तैरौ औजौ लाग लौ तेस हाऊं वापसी दी आशीयो ताऊं के दिआऊ। 36 तेथ बासीए यीशुए तेस शास्त्री लै बोलौ, "आबे तेरी सौमझी दी तेस अदमौरै आदमी जुण डाकुए पिटी, तेसरौ पडोसी कुण बौणौ तिऊं चिआ माझीया कु जुण तेशी आलै बाटा दी आशे ई? 37 तिणी शास्त्रीए जवाब देओ, "सेऊ आदमी जुणीए तेस अदमौरै आदमी माथे दया की आ।" "यीशुए बोलौ डेऊ तू भी इणौ कर।"

मार्था और मरियमा घौरा के यीशु

38 जैबे यीशु और तेसरै चले डेऊंदै थै लागे औन्दे तैबे यीशु एकी गावां दी डैओ, तिरे मारथा नावां री एकी छेउडीए यीशु आपणै घौरै निओ। 39 तिआंरी एक बौइण थी ज्ञासरौ नाऊं मरियम थी, मरियम यीशु री लाता काए बोशीयो यीशु रै वचन शुणा थी। 40 पर मारथा भौरी काम कौरदै-कौरदै निराश हुई गोई थी तैबे मारथा तिऊं काए आशीओ बोलदै लागी, "ओ प्रभु का ताउंकै फिकर

नाई आसती कि मेरी बौइणीए हाऊं कामा कौरना लै एखुली छाड़ी गो ऊ? आबे इआंले बोल कि मेरी मजद कर 41 यीशुए तिआंले जवाब देओ, "मारथा ओ मारथा तू भौरी बुशा लै फिकर कैलै कौरा ई और तू घबरा कैलै ई? 42 पर एक बूश जुरुरी आ कि मरियम सै आच्छी जागहा चुनी गो ई जो तिआंकु कादी ना छुड़ाईदी।"

चलेऊ के प्राथना कौरनी शिखाऊणी

(मती 6:9-13)

11 एकी जागहा दी यीशु प्राथना कौरदै थौ लागौ औन्दौ, जैबे यीशु प्राथना कौरियो उठौ, तैबे यीशु रै चलेऊ मांजीया कु एकी चले यीशु लै बोलौ, "ओ प्रभु जिणौ यहुनै आपणै चलेऊ के प्राथना कौरनी शिखाई आ, तिणी तुमै भी आमुकै प्राथना कौरनी शिखाओ। 2 यीशुए आपणै चलेउलै बोलौ, "जेबी तुमै प्राथना कौरा, लै ता इणी कौरनी, "ओ आमारे बाब: तैरौ नाऊं पवित्र मानणौ चाई; तैरौ राज चाई आशौ। 3 आमूलै हर दिना री रौटी रोज दै। 4 और आमारे पाप माफ कर; कैलैकि आमै भी आपणै दुश्मन माफ कौरा ई; और आमु परखे नाई।

प्राथना रै बारे दी यीशु री शिक्षा

(मती 7:7-11)

5 तैबे यीशुए आपणै चलेऊलै बोलौ, "तुमु माझीए इणौ कुण आ ज्ञासरौ एक गोश्टण आधी राचीए तेस काए आशियो तेसलै बौला लौ, "ओ गोश्टण मुके चिन रौटी दै एरी। 6 कैलैकि मैरै काए एक गोश्टण दुरा कु आशौ औन्दौ और मुके तेसलै देणा लै कुछ ना आसतौ। 7 और तेसरौ गोश्टण भितरा कु बोला लौ इणौ कि, मु आधी राचीए तंग ना कौर कैलैकि आबे दार बंद हुई गोरै और मैरै लोलडे ई मुकाए सुतै औन्दै हाऊं ताऊंकै उठीयो रौटी नाई देई बौलदौ?" 8 तैबे यीशुए बोलौ, "हाऊं तुमु लै बोलाऊ अगर तेसरौ गोश्टण हुईयो भी तेसके रौटी नाई दिआ लौ, तैबे भी तेसरै लाज शरम छाडीओ मागणै रै कारण, तेसके जेती जरूरत आ तेती तेसके उठीओ दिआ आ। 9 और हाऊं तुमुके बोलाऊ, "कि मांगा लै ता तुमुके दिआई, लोडा लै ता तुमुके मिला, खटखटावा लै ता खुला। 10 कैलैकि जुण मांगा तेसलै मिला, और जुण लोडा लौ तेसके मिला, और जुण खटखटावा लौ तेसलै दार खुला सा। 11 तुमु माझीए इणौ बाब कुण हुआ आ, कि जेबी तेसरौ छोहरु रौटी मांगा लौ, ता तेसलै पात्थर दिआ लौ, या माछी मांगालौ, ता तेसलै माछी रै बौदलै साप दिआ? 12 या आंडौ मांगा लौ ता तेसलै बीचू दिआ? 13 जैबे तुमै बुरै हुईयो आपणै लोलडेऊ के आच्छी चीजै देणौ जाणाई, तैबे सौरगा दी रौइणै वालौ सारेऊ रौ बाब आपणै मांगणै वालै लोलडेऊ के पवित्र आत्मा कैलै ना दैन्दौ।"

यीशु और बालजबूल

(मती 12:22-30; मरकुस 3:20-27)

14 तैबे यीशुए एकी आदमी कु लाटी, बुरी आत्मा गाडी। जैबे बुरी आत्मा तेस आदमी कु निकली, तैबे सेऊ आदमी बुशै लाइंदे लागौ। इणै देखीयो लोग हैरान हुए। 15 तिऊं लोगु मांझीया कु कुछ लोगुए बोलौ, "एऊ यीशु ता बालजबूल शैताना रै जरीयै बुरी आत्माए गाडा सा।" 16 और कुछ लोगुए यीशु परखुणा लै यीशु कु सौरगा रौ एक निशाण मांगौ। 17 पर यीशुए तिउरै मना री बूश ज्ञाणीयो तिउलै बोलौ, "जेजै इलाके दी आपु माझीयै फूट पौडा ली सेऊ इलाका पोरु उझडा सा; और जेजै परिवारा दी फूट औली सेऊ घोर नाश हुआ सा। 18 अगर शैतान आपणौ विरोधी या दुश्मन औलौ ता तेसरौ राज किणै कौरिये बौणी रौआ सा? कैलैकि तुमै मैरै बारे दी ता बोला ई इणौ कि एऊ शैताना रै जरीयै बुरी आत्मा गाडा सा। 19 अगर हाऊं शैताना रै जरीयै बुरी आत्मा गाडा ऊ ता, तुमारी सन्तान कासरै जरीयै बुरी आत्मा गाडा ई? आबे सै ई तुमारै फंसलो कौरा ई। 20 अगर हाऊं परमेश्वरा री शक्ति कौरिये बुरी आत्मा गाडा ऊ ता परमेश्वरा रौ राज तुमारै बिचा दी आशी गौ आ। 21 अगर एक ताकती वालौ आदमी आपु के हथीयार छाडीयो आपणै घौरा री चोउकीदारी कौरा लौ ता तेसरी धन-जयदाद कोई ना नीं बौलदौ। 22 पर जैबे

तेसकु भी ज़ादौ ताकती वालौ आदमी तेस हराइयौ जीता सा, तैबै सेऊ तेसरें तिऊं हथीयार जेथरें ज़रीयें सेऊ रखवाली कौरा थौ तिऊं छुड़ावा सा और तेसरी धन-जयदाद नीं ओ बांटा सा।²³ तौएँ यीशुए बोलौ, "जुण मैरें साथा दी नाई, सँ मैरें विरोधा ई और जुण मूं आइलै कौठै नाई कौरदै सँ डाला ई।

आधै सुधारा कु मुश्किल (मती12:43-45)

²⁴ जैबै आदमी कु बुरी आत्मा निकला सा तैबै सँ बुरी आत्मा आपु काले खाली ज़ागहा दी आराम वाली ज़ागहा लोड़ा आ, और जैबै बुरी आत्मा कै किए भी ज़ागहा नाई मिलदी, तैबै सँ बोला सा हाऊं आबै आपणें सेजै घौरा दी डिआऊ ज़िदरु हाऊं निकली ऊ।²⁵ जैबै सँ बुरी आत्मा वापिस लिए आशा ज़िदरु सँ निकली थी तिए तिआंकें सँ ज़ागहा साफ-सुथरी और सज़ी औन्दी मिला सा।²⁶ और सँ बुरी आत्मा डेइयौ आपु आइलै औजौ सात बुरी आत्माएँ आणा सा, जो तियांकु भी बुरी हुआ ई। इणें कौरीयें सँ सारी बुरी आत्माएँ तेस शरीरा दी डेइयौ वास कौरा ई तेस आदमी री हालत जासदी सँ बुरी आत्माएँ हुआई पैहलै कु भी जादी बुरी बौणा सा।

भौलौ कुण आ?

²⁷ जेबी यीशु बुशै लाइंदे थौ लागौ औन्दी तेबी ई भीड़ा मांझीए कु एकी छेउडी ऐ जोरें हाक देइयौ बोलौ, "भौलौ सेऊ गर्भ जेथदी तू रौ थौ, और भौलै ई सँ बुबु जेथकु तारें दूध पियौ थौ।"²⁸ यीशुए बोलौ, "ओ बा पर भौलै ता सँ ई, जुण परमेश्वरा रें वचन शुणा और माना ई।"

सौरगा रें निशाणा री मांग (मती12:38-42)

²⁹ जैबै भौरी भीड़ कौठै हुन्दै लागी तैबै यीशु बोलदै लागौ, "एजै पोस्तै रें लोग बुरै ई, जुण निशाणी मांगां ई, पर योना भविष्यवक्ता री निशाणी छाडीयो हाऊं केज़ी भी निशाणी नाई देखलदौ।³⁰ ज़िणौ योना भविष्यवक्ता निनवें इलाकें रें लोगु लें निशाण बौणौ आ, तिणी आदमी रौ छोहरु भी एजै पोस्तै रें लोगु लें निशाण बौणा आ।³¹ दक्षिण तौरफा री राणी परमेश्वरा रें फैसलें रें दिना दी एजै पोस्तै रें लोगु आइलै उठीयो तिऊं माथै इलज़ाम ला सा, कैलैकि इयें राणी सुलेमान ज्ञानी रें ज्ञान शुणना लै धौतरी रें धुरै कु आशी थी, सुलेमान राजे काए। और देखौ इदैं ता सुलेमान ज्ञानी कु भी बौड़ौ ज्ञानी आ।³² और निनवे देशा रें लोग भी एजै पोस्तै रें लोगु आइलै उठीयो परमेश्वरा रें फैसलें रें दिना दी तिऊं माथै इलज़ाम ला ई, कैलैकि तिउंरें योना भविष्यवक्ता रौ परचार शुणीयो आपणौ मन पापा कु बौदलौ आ और इदैं ता योना भविष्यवक्ता रौ भी भविष्यवक्ता आ।

शरीर और प्याशौ (मती5:15; 6:22,23)

³³ यीशुए तौएँ बोलौ, "कोई भी आदमी लम्प ज़ालीयो नीऊठी ज़ागहा दी नाई छाड़दौ, पर लम्प ऊंची ज़ागहा दी छाड़ाई ताकी बितरें आशणें वालेऊ के प्याशौ लागा।³⁴ तुमारें शरीरा रौ लम्प तुमारी आख आ, अगर तेरी आख साफ-सुथरी आ तैबै तैरौ शरीर भी साफ-सुथरौ रौआ, अगर तेरी आख शेड़ी/बुरी आ तैबै तैरौ पुरौ शरीर भी इनारे दी आ।³⁵ आबै चोकसीए रौएऊ ताकी जो प्याशौ तुमुदी आ सेऊ इशौ ना चाई।³⁶ अगर तैरौ सारौ शरीर प्याशलौ आ और कोई भी शरीरा रौ अंग इनारे दी नाई आ तैबै सब कुछ प्याशलौ रौआ आ, ज़िणौ कि लम्पा ज़ालीयो प्याशौ हुआ सा।

शास्त्रिउ और फरीसिउ री बुराई रें बारें दी रोशिणौ (मती23:1-36; मरकुस12:38-40))

³⁷ जेबी यीशु बुशै लाइंदे थौ लागौ औन्दी, तैबै एकी फरिसी ए सेऊ आपणें घौरें रोटी खान्दै औटाओ। तैबै यीशु तेसरें काए भितरें डैओ और रोटी खान्दै बोशौ।³⁸ तेस फरिसी कै इणें देखीयो हैरानी हुई कि यीशु बिणा धोइयो रोटी खान्दै बोशी गौ आ।³⁹ प्रभुए तेसलै बोलौ, "ओ फरिसी तुमै जौगटी, थाली

बाइठी माजणा लै बौड़ौ ख्याल छाड़ाई, पर तुमु बितै ता इबी भी मौल आ, तुमुदी ता इबी भी लालच और बुराई भोरुई एन्दी।⁴⁰ ओ मुख लोगुओ, "का परमेश्वरें भीतरी और बाइरी दुई भीलै ना चाणै? ⁴¹ जो कुछ तुमारें कमाओ औन्दी आ, तेस तुमै गरीबु माझीए बांटौ, तैबै तुमै आच्छा कौरीयें शुद्ध हुआई।⁴² "पर ओ फरिसीओ, तुमुलै ता ऐ केती बुरी बूश आ। तुमै ता आपणी छोटी कु छोटी कमाई रौ और पदीनै, सुदाब और सारी साल-फसली रौ दसवौ हिस्सो दिआई, पर फैसलै और परमेश्वरा रौ प्यार टाला ई पोरु। तुमु चाई थौ इणौ कौरनौ, दक्षांस भी चाई थौ दैणौ और परमेश्वरा री बुशै भी थै माना।⁴³ ओ फरिसीयो तुमुलै ता ऐ केती बुरी बूश आ, कि तुमै ता धर्मिक खुम्बली दी भी ऊंची ज़ागहा लोड़ा ई बोशणा लै, और इणौ भी ज़ाणा ई कि बज़ारा दी और बाटा-घाटा दी आशणें वाले आदमी आपुकें ढाल कौरा।⁴⁴ तुमुलै एजी भी केती बुरी बूश आ, कि तुमै तिऊं चोरुई एन्दी कबरा बाशीयें ई जेथ माथे लोग आंडा ई और तिउंके इणौ पौतौ ना लागदौ कि इऊं भितै केती शौड़ी एन्दी चिजे ई।"⁴⁵ तैबै कानुना रें एकी ज्ञानीए यीशु लै बोलौ, ओ गुरु जो कुछ बुशै तुमुए इबी झाऊं बोली ई तिऊं बुशु कौरी तुमुए आमारी बेइज्जती की आ।⁴⁶ यीशुए बोलौ, "ओ कानुना रें ज्ञानीओ तुमुलै एजी भी केती बुरी बूश आ। जो चीज चुंगणा लै गौरकी आ तिरे चीज तुमै ओरी कु चुंगवा ई पर आपु नाई तुमै तिरे चीज औउठी कौरीए भी छुईदैं।⁴⁷ तुमुलै एजी केती बुरी बूश आ, कैलैकि तुमै पुराणें गुरु (नबीऊ) काले कबर चाणा ई जुण तुमारें नाना-बुडुए जांगे ई।⁴⁸ और तुमै गवाई आ, आपणें नाना बुडु रें काम ज़ाणा ई कैलैकि तिउंरें सँ पुराणें जमानें रें गुरु जांगेई, तुमै तिउंरी कबरें चाणाई।⁴⁹ परमेश्वरें री बुद्धी ऐ तुमुलै इणौ बोलौ आ, हाऊं तिऊं काए भविष्यवक्ता और भेजै औन्दी चेलै भेजाऊ और सँ तिऊं माझीए कु कास जांगा ई और कास आइलै कौराई बुरौ।⁵⁰ दुनिया दी जेती भी पैहलै औउलै भविष्यवक्ता जांगे ई, तिऊं रें ज़िमैबार एजै जुगा रें लोग हुणेई।⁵¹ हाबिल नावां रें धर्मी आदमी कु, जकर्याह नावां रें पुराणें याजका झाऊं, जुण परमेश्वरा रें घौरा दी बेदी और पवित्र ज़ागहा रें बिचा दी झांगे थौ: तेथरें ज़िमबार एजै जुगा रें लोग हुणेई।⁵² कानुना रें ज्ञानीउ लै ऐ केती बुरी बूश हूणी आ कैलैकि तुमुए ज्ञाना री तालटी आपुकें नीं गो ई आ, ना ता तुमै आपु परमेश्वरा रें राजा दी डेऊंदै और ना दुजेऊ दैदैं डेऊणै।⁵³ यीशु ए जैबै आपणी बुशै बोली एरी, तैबै शास्त्री और फरीसी तेस आइलै दुश्मनी छाड़दै लागे। और से यीशु कु भौरी सवाल-जवाब कौरदै लागे।⁵⁴ और एजी कोशीशा दी थाकै लागी कि यीशु रें मुआ कु कोई इणी बूश निकला जेजी बुशैऊ कौरी यीशु गलत साबित हुआ।

बूरै और पाखण्डी लोगु कु चितलाउणें (मती10:26;27)

12 सेजै बौग्तें तिरे कई हजार लोग कौठै हुई गौए और लोगु री भीड़ एती बौड़ी गई कि, एकी दुजै माथे लागे लोटदै। यीशु सौभी कु पैहलै आपणें चलेऊ भिले मुडीयो बोलदै लागौ, फरिसी रें संजेडे कु बौचीयो रौएऊ।² सेऊ बौग्त आशदै लागौ औन्दी, जेबी सारी बुशै परगट हुआई। और जो कुछ गुप्त आ सेऊ सामने आशणौ आ।³ जो बुशै तुमुए पिठी पिछु बोली आ सँ बुशै छापरा माथे खोड़ी हुईयो हाके मारीयो बोलाई, ताकी सारे लोग तिऊं बुशै शुणी बौला।

कास कु डौरी लै (मती10:28-31)

⁴ यीशुए आपणें चलेऊलै बोलौ, मैरें प्यारें गोश्टणो, तुमै तिऊं कु ना डौरौ जो सिफ तुमारौ शरीर जांगी बौलाई तेथकु ज़ादौ सँ कुछ नाई कौरी बौलदै।⁵ पर हाऊं तुमुलै बोलाऊ, कि कासकु डौरनौ चाई, परमेश्वरा कु डौरौ जासकें लोगु जांगणें और नरका दी पाइणें री ताकट आ।⁶ का पांज चोड़की दुई रूपाए दी ना बिकदी? तैबै भी परमेश्वर तिऊं मांझीआ कु एक भी ना बिसुरदौ।⁷ और तुमारें मुंडा रें बाल भी गौणें औन्दी ई, तुमै डौरौ नाई कैलैकि तुमै परमेश्वरा लै तिऊं चोड़की रें बालरा कु भी जादै किमती ई।

यीशु मानणौ या नाई मानणौ
(मती10:32,33; 12,32; 10:19,20)

8 हाऊं तुमुलै बोलाऊ, कि जुण-कुण मूं लोगु माझीए माना लौ, ता हाऊं आदमी रौ छोहरु तेस आदमी परमेश्वर रै दूता रै सामनै माना ऊ। 9 पर अगर कुण, लोगु काए मैरौ इन्कार कौरा लौ, ता हाऊं तेस आदमी रौ परमेश्वर रै दूता रै सामनै इन्कार कौरा ऊ। 10 जुण कुण आदमी रै छोहरु रै खिलापा दी बोला लौ तेस लै ता माफी मिला सा। पर जुण कुण पवित्र आत्मा री बेइज्जती कौरा लौ तेस लै केबी भी माफी नाई मिलदी। 11 जेबे तुमु धार्मिक खुम्बली दी राज चलाऊणै वाले, बाकी अधीकारी लोगु काए तुमारौ मुकदमौ चलावा लै ता तुमुए फिकर नाई कौरनी, कि आपु बौचणा लै आमु का और किणौ जा बोलनौ? 12 कैलैकि जेबे तुमै तिरे खोडै औलै, सेजे बोग्ते पवित्र आत्मा तुमु कु शिखावा कि तुमु का जवाब जा देंगौ।

एक सेठ मूर्खा रौ औनैणौ

13 तैबे भीडा मांझिए कु एकी आदमिए यीशु लै बोलौ, ओ गुरु, मैरै भाई ले बोल एरी कि आमै आपणै बाबा री जयदाद बांटी। 14 यीशुए तेसलै बोलौ, "ओ छोहरु, हाऊं कुण औआ ऊ तुमारौ फैसलौ कौरनै वालौ और तुमारी जयदाद बांटेणै वालौ?" 15 यीशुए तिउंलै तौएँ बोलौ, "चोकस रौ और सारै लोभ लालचा कु आपु बौची थाकौ; कैलैकि कासी री भी जीन्दगी धन-जयदादा कौरिये नाई कार्टीदी।" 16 यीशुए तिउंलै लै एक अनैणौ दैओ, एकी सेठा री जमीना दी भौरी नाज हुओ। 17 तैबे सेऊ सेठ आपणै मना दी विचार कौरदै लागौ कि आबे हाऊं किणौ कौरलौ कैलैकि मुकै इयै फौसली छाडना लै जगहा नाई आसती। 18 तैबे तिणी सेठे सुंचौ कि हाऊं इणौ कौरा ऊ इऊं छोटै कुठार ढालीयौ बौडै चाणा ऊ, और इयै फसल तेथ भितै छाडाऊ। 19 तैबे हाऊं आपणै प्राणा लै बोला ऊ, "ओ मैरै प्राण ताऊं काले भौरी साला लै धन-जयदाद और नाज कौठै कियौ औन्दौ, खाऊ-पिऊ और मौज कर। 20 पर परमेश्वर तेस सेठा लै बोलौ, आज ई राचीए तैरौ प्राण ताऊंकु पोरु निर्ईआ ई, तैबे जो कुछ तैरै कौठै कौरियौ आ छाडौ औन्दौ सेऊ कासरौ हुआ आ?" 21 तिणौ सेऊ आदमी भी आ जुण आपुकाले जयदाद कौठै कौरा सा, सेऊ आदमी परमेश्वर री नौजरी ऐ सेठ नाई आसतौ।

परमेश्वर माथी भरोसौ छाडौ
(मती6:25-34)

22 तैबे यीशुए आपणै चलेऊ लै बोलौ, "आबे हाऊं तुमु लै बोला ऊ आपणै प्राणा री फिकर नाई कौरौ कि, आमै का खाऊ लै; और ना आपणै शरीरा री फिकर कौरौ कि आमै का भिडु लै। 23 कैलैकि रोटी कु प्राण और जुडके कु शरीर बौडौ किमती आ। 24 कौणै माथे ध्यान दैओ; सै ना बौइंदे, ना लौइंदे, और ना तिउरै कुठार औन्दै, और ना तिउरै खातै औन्दै, तैबे भी परमेश्वर तिउं धाचा सा। पर तुमारी किम्मत ता चौडकिऊ कु भी काफी जादी आ। 25 तुमु मांझीए इणौ कुण आ, जो फिकर कौरियौ आपणी उमर थोडी भी बडाई बौला आ। 26 अगर तुमै छोटै कु छोटौ काम नाई कौरौ बौलदै तैबे बौडी बुशैऊ लै फिकर कैलै कौराई? 27 जागली फुला दी ध्यान दैओ कि सै किणै बौडा ई सै ना ता मेहनत कौरदै और ना आपुकाले जुडके चाणदै तैबे भी केती बांठणे ई पर हाऊं तुमु लै बोलाऊ कि सुलेमान राजे भी आपणी सुखी जीन्दगी दी इऊं फुलु जिणै बांठणे जुडके नाई भीडै। 28 अगर परमेश्वर इयै धौतरी दी घास जमावा सा जो घास आज औआ और बासीए जला पोरु तैबे; ओ अविश्वासी लोगुओ तुमुकै सेऊ परमेश्वर जुडके कैलै ना भिडाऊंदौ। 29 और ना तुमै एजी बुशैऊ री फिकर कौरौ कि आमै का खाऊ लै और का पिऊ लै और ना शक कौरौ। 30 कैलैकि पुरी दुनिया रै लोग इऊं सारी जिजा लै फिकर कौरदै थाका ई लागी पर तुमारौ बाब परमेश्वर जाणा सा कि तुमुकै इऊं जिजा री जरुरत आ। 31 पर हाऊं तुमुलै बोलाऊ कि परमेश्वर रौ राज लोडौ तैबे सारी जिजे तुमुकै मिला सा।

सौरगा रौ धन
(मती6:19-21)

32 ओ छोटी खुम्बली रै लोगुओ, "डौरौ नाई कैलैकि तुमारौ बाब परमेश्वर के इणौ आछौ लागी कि सेऊ तुमारै जिवा दी राज कौरा। 33 आपणी जयदाद बेचीयौ गरीबु लै दाण दैओ और आपुकाले इणै बटुए चाणौ जो केबी नां चिरींदे और आपु काले सौरगा दी इणी धन-जयदाद सांजौ जो कादी ना घौटदी जिरे ना ता चोर चोरदौ और ना किडौ लागदौ। 34 कैलैकि जिजे तुमारौ धन औलौ तिरे तुमारौ ज़ीऊ भी लागी।

उजी रौएऊ

35 कौमरा कौशीयौ और दिये जालीयौ सदा तैयार थाकौ (परमेश्वर रै कामा लै)। 36 तिउं आदमीऊ बाशीयै बौणौ, जुण आपणै मालिक रौ इन्तजार थाका ई कौरदै लागी कि मैरौ मालिक शादी ब्याह कु वापिस केबडी आशा। और जिणी सेऊ मालिक दार खटखटावा लौ और सेऊ तेसलै खरकदार दार उगाडा और तेसरै स्वागत कौरना लै तैयार रौआ। 37 और जो तेस पौखदे ई लागे औन्दै, और सेजे बोग्ता लै तैयार ई, हाऊं तुमु लै सोचौ बोलाऊ सेऊ मालिक तेस आपणौ नुकुर धौनी बोशाला आ, रोटी खान्दै। और आपणी कमर कौशीयौ आपु तेस दासा री सेवा कौरा आ। 38 अगर सेऊ मालिक राचके दुजे या चिजे पौहरे दी आशीयौ आपणौ दास उजी देखा लौ ता सेऊ भौलौ आ। 39 और एजी बुशु माथे ध्यान दैओ कि, अगर घौरा रौ मालिक जाणा लौ कि चोर केजे बोग्ते आशा आ, तैबे सेऊ मालिक तेस चोर भितरै आशणे नाई देंदौ। 40 तुमुए हर बोग्ते तैयार रौइणौ चाई, कैलैकि आदमी रौ छोहरु तेबी आशा सा जेबी तुमै सुंचा भी नाई लै।

विश्वासा वालौ या बिण विश्वासा वालौ सेवक
(मती24:45-51)

41 पतरसै यीशु कु पुछौ, "ओ प्रभु का एऊ अनैणौ आमुलै आ या सारेऊ लै आ?" 42 प्रभुए तेसलै जवाब दैओ, "हाऊं केजे भी विश्वास वाले, और बुद्धी वाले लोगु रै बारे दी ऊ बोलदै लागौ औन्दौ, जासके तिउंरौ मालिक आपणै घर-परिवारा री देखबाल कौरना री और रोटी देंगै री जिमैबारी दिआ लौ। 43 अगर सेऊ मालिक आशियौ देखाळौ कि तेसरै दासै आछा कौरिए जिमैबारी सौम्भाली आ ता सेऊ भौलौ आ। 44 हाऊं तुमुलै सचच बोलाऊ कि, मालिक आपणै तेस दासा के आपणी सारी धन-जयदादा सौम्भालनै रौ हक दिआ सा। 45 अगर सेऊ दास सुंचा लौ मैरौ मालिक ता कुछ दिना झाऊं वापिस ना आशदौ और दुजे नुकरा लै दुःख देंगौ शुरु कौरा लौ, और आपुलै खाणै पिणै रौ इन्तजाम कौरा लौ और सूर पिआ लौ। 46 ता तेसरौ मालिक बिण बोली तेबी आशा जेबी तेसरै सुंचौ औन्दौ भी ना औलौ, और सेऊ मालिक तेस नुकरा लै सजा दिआ और अविश्वासिऊ मंझीए भेजा। 47 तेस नुकरा लै काठी सजा दिआई, कैलैकि जेबे सेऊ आपणै मालिका री ईच्छा जाणा थौ, तैबे भी तीणिए आपणी जिमैबारी पूरी नाई की। 48 पर सै लोग, जुण नाई जाणा थै अगर सै गलत काम कौरा ई, तिउंलै थोडी सजा मिला आ। जासके जादौ दैओ औन्दौ तेसकु जादौ हिसाब मांगा ई और जासके जादौ सम्भालौ औन्दौ तेसकु भी तेती हिसाब मांगा ई जेती तेसके सम्भालौ औन्दौ आ।

यीशु रै आशणै रौ नतीजौ
(मती10:34-36)

49 हाऊं धौतरी माथे आगी लाइंदे ऊ आशौ औन्दौ, और हाऊं चहा ऊ कि मैरौ एऊ काम इबी लै पुरौ चांई थौ हुओ। 50 पर मुइयें ता तौएँ एक बसिस्मा निणौ आ, और जेबी झाऊं मुइयें सेऊ निओँ नाई तेबी झाऊं हाऊं परेशान रौआ ऊ। 51 तुमै का सुंचा ई कि हाऊं धौतरी दी मेल मिलाप कौरदै ऊ आशौ औन्दौ? हाऊं तुमुलै बोलाऊ कि, नाई बल्कि अलग कौरदै ऊ अशौ औन्दौ। 52 कैलैकि इबी कु एकी घौरा दी पांज आदमी आपु मांझीए बिरोध छाडाई, चीन दुई आइलै और दुई चीआ आइलै। 53 बाब छोहरु आइलै,

छोहरू बाबा आइलै बिरोध छाड़ा, मां छोटी आइलै, और छोटी मां आइलै, शाशु बोऊ आइलै और बोऊ शाशु आइलै बिरोध छाड़ाई।

बौगता रौ (लक्षण) असर

54 यीशुए भीड़ा रै लोगु आइलै भी बोलौ, "जेबे तुमै बादल तिते उड़दै देखा ई जेजी भिलै सुरज छिपा सा, तैबे तुमै खरकचार बोला ई कि पाणी-बागुर लागणै वालौ आ और तिणौ हुआ सा। 55 और जेबी सुलटी भिलै बागुर फिरदै देखा लै ता तुमै फेटी बोलाई कि आबै गर्मी पौड़ाई तैबे तिणौ हुआ सा। 56 ओ कपटी लोगुओ तुमै धौतरी और सौरगा रै भेद जाणा ई पर एजे जुगा रै बारे दी भेद कैलै ना जाणदै।

आपणै बिरोधिऊ आइलै सूलौ

(मती5:25-26)

57 तुमै आपु ऊ एजी बुशु रौ फैसलौ कैलै ना निंदै कि किणौ कौरनो ठीक आ। 58 अगर तुमु कोर्टा लै निन्दै औलै लागै औन्दै और बाटा दी तुमुकै तुमारो बिरोधी मिला लौ जुणीए तुमु माथे केस कियो थौ, तैबे तिणै आपु माझीए सुलौ कौरौ, नाई ता तुमु लै सजा भी हुई सका और तुमु कास अधीकारी कै सम्भाला और सेऊ पा तुमु जेला दी। 59 अगर इणौ हुई जा लौ, ता तुमै आज्ञाद नाई हुई बौलदै जेबी झाऊं तुमै एक-एक पाई रौ हिसाब ना दिआलै।

मन फिराओ या नाश हुआ

13 सेजे बौगते कुछ लोगुए यीशु कै एजी खौबर शुणाई कि जेबी गलील परदेशा रै कुछ लोग यरुश्लेमा दी परमेश्वरा रै घौरा दी बोली चड़ावा थै, तेबी पिलातुसै सै पोरु झाँगाए। 2 इणै शुणीयो यीशुए बोलौ, "का तुमै जाणाई कि इयै गलीली लोग, ओरी गलीली लोगु कु जादैं पापी थै? का एजी तांइए तिऊं माथे एजी मुसीबत आशी आ? 3 हाऊं तुमु लै बोला ऊ, इणौ नाई भी नाई, पर, अगर तुमै आपणौ जीऊ ना बौदला लै ता तुमै सारै भी इणै कौरियै नाष हुआई।" 4 या तुमै तिऊं ठाहरा आदमीऊ रै बारै दी का सौमझा ई जास माथे शिलोहा रौ गुम्मत ढौलौ थौ और सै सारै दाबुइयो मौरि गौए; का सै यरुश्लेमा दी रौइणै वालेऊ माझीया कु जादैं पापी थै? 5 हाऊं तुमुलै बोलाऊ कि, इणौ नाई भी नाई, पर, अगर तुमै आपणौ जीऊ ना बौदला लै ता तुमै सारै भी इणै कौरियै नाष हुआई।"

बिणा फौला रौ फेडू रै पेड़ा रौ औनैणौ

6 तैबे यीशुए तिउंलै एजौ औनैणौ भी दैओ; "एकी आदमी रै अंगूरा रै बगीचा दी फेडू रौ पेड़ थौ लागौ औन्दौ और सेऊ आदमी तेस फेडू रै पेड़ा दी फौला लोड़दै लागौ, पर तेसकै फल नाई मिलै। 7 तैबे तिणीए बगीचा रै चोअकीदारा कै बोलौ, "देख चीआ साला ओउलै एस फेडू रै पेड़ा दी हाऊं फौला लोड़दै आशाऊ पर फल नाई मिलदै एस पोरु काट, एसरै फालतू आ जबीन घेरी ऐन्दी। 8 चोकीदारै बोलौ, "ओ मालिक! ऐजी सालै भी एस रौअणै दै कि हाऊं एथरै चारौ तौरफा दी खोदियो खाद पा आ ऊ। 9 अगर अगली बारै फौला लौ ता ठीक आ नाई ता काटाऊ एस पोरु।

आरामा रै दिना दी कुबड़ी छेवड़ी ठीक कौरणी

10 आरामा वालै दिना दी यीशु धार्मिक खुम्बली दी परचारा कौरदै थौ लागौ औन्दौ। 11 तिणै एक छेवड़ी थी जासदी कमजोर कौरनै वाली बुरी आत्मा थी लागी ऐन्दी, और सै ठाहरा बौरशा ओउलै कुबड़ी थी, तीआके सिधौ नाई हुइया थौ। 12 जेबे यीशुए सै देखी, "तिआलै औटाइयो बोलौ, 'ओ बौइण तू आपणी बीमारी कू ठीक हुई गोई आ।' 13 इणै बोलीयो यीशुए तिआ माथे हाथ छाड़ौ सै खरकचार सीधी हुई गोई और परमेश्वरा री बौड़ाई कौरदै लागी 14 एथीलै कि यीशुए सै ब्रौता रै दीना दी ठीक की थी, धर्मिक खुम्बली रौ मुख्यो यीशु लै रोशुओ और लोगु आइलै बोलदै लागौ, "छौं दीन ई जेजे दिना दी काम चाई कौरनौ और सेजे दिना दी आशीयो ठीक भी हुआ, पर ब्रौता रै दिना दी इणौ नाई चाई कौरणौ। 15 इणै शुणीयो प्रभुए जवाब दैओ, "ओ

कपटीयो का तुमै आपणै बौलदा या गादैं ब्रौता रै दिना दी खुंटे कु खोलियो पाणी पिआउणा लै नाई नींदै? 16 का ठीक नाई थौ कि इयै बौइण जुण अब्राहमा रै वंशा री छोदूड आ, जुण शैताना रै अताराह बौरशा ओ लै बीमार थी की ऐन्दी, ब्रौता रै दिना दी इयै बीमारी कू ठीक हुई आ? 17 जेबे यीशुए ऐजी बुशै बोली, ता तेसरै सारै विरोधी रै शर्म पौड़ी और सारी भीड़ तिऊं हैरनी वालै कामा कु जो यीशु कौरा थौ खुश हुए।

राई रै बीजा रौ औनैणौ

(मती13:31,32, मरकुस4:30-32)

18 तैबे यीशुए तौए बोलौ, "परमेश्वरा रौ राज़ कास जिणौ आ? हाऊं परमेश्वरा रै राज़ा री बराबरी कास आइलै कौरु? 19 परमेश्वरा रौ राज़ एक राई रै गुलै जिणौ आ; बौइयो सेऊ बौड़ा सा और पेड़ बौणा आ, और चड़कु आशियो तेसरी डाली दी वास कौराई।"

संजेड़ा रौ औनैणौ

(मती13:33)

20 यीशुए तौए बोलौ, "परमेश्वरारै राज़ा री बराबरी कास आइलै कौरु? 21 परमेश्वरारौ राज़ एक संजेड़े जिणौ आ, जो एकी छेउडी ऐ चिन पाथे पिठै मांझीए मुछौ आ, और देखदै-देखदै सारौ पिठौ ओसरी गौ आ।"

साँगड़ौ दार

(मती7:13,14, 21-23)

22 यीशु इलाकै-इलाकै और गाँवा-गाँवा बाटीए परचार कौरदै-कौरदै यरुश्लेमा लै थौ डेउंदै लागौ औन्दौ। 23 तैबे बाटा दी एकी आदमी ऐ यीशु कु पुछौ, "ओ प्रभु का मुक्ति पाइणै वालै भौरी कम ई? तिणीए जवाब दैओ, 24 "घाटै दारा बाटीयै डेउणे री कोशिश कौरौ कैलैकि हाऊं तुमुलै बोलाऊ कि भौरी लोग सांगड़ै दारा बाटीए डेऊणे री कोशिश कौरा ई पर डेई नाई बौलदै 25 जेबे घौरा रौ मालिक उठीयो दार उडी एरा लौ और तुमै बाइरी बिलै दार खटखटाइयो बोलदै लागलै, "ओ प्रभु आमु लै दार खोल और सेऊ मालिक जवाब दिआ लौ कि, "हाऊं तुमु नाई जाणदौ कि तुमै किदले ई? 26 तैबे तुमै बोलदै लागलै कि, "आमुए ताऊं काए खाओ-पिओ और ताएँ आमरै बजारा दी परचार कियो।" 27 पर सेऊ बोला लौ कि, "हाऊं तुमु लै बोलाऊ कि हाऊं तुमु नाई जाणदौ कि तुमै किदले ई? ओ बुरै काम कौरनै वालै लोगुओ तुमै सारै मुकाए कु दूर डैओ। 28 तिणै लेरनौ और दाँद चाकणौ औणौ आ। तुमै तिणै अब्राहम, इसहाक, याकूब और सारै पुराणै भविष्यवक्ता परमेश्वरा रै राज़ा दी देखालै और आपु दिशा लै बाइरी गाड़ै औन्दै। 29 पूर्व, पश्चिम, और उत्तर, दक्षिणा कु लोग आशीओ परमेश्वरा रै राज़ा दी रोटी खान्दै ओआई, 30 और देखौ "कुछ पिछाडके ई सै औगाडीए हुआई और जो पैहले ई सै पिछाडीए हुआई।"

हेरोदेसा री दुशमणी

31 तेबी कुछ फरिसीऊए आशीयो यीशु लै बोलौ, "इदरा कु पोरु भाग कैलैकि हेरोदेस ताऊं झागणौ चाहा सा।" 32 यीशुए तिउंलै बोलौ, "डैओ तेस शालटे लै बोलौ, "कि हाऊं आज और कालै बुरी आत्मा गाड़ाऊ और बिमार आदमी चांगे कौराऊ और चिजै दिने आपणौ काम पुरौ कौराऊ। 33 तैबे भी आज, कालै और पौरशी हांडणौ ज़रुरी आ, कैलैकि इणौ नाई हुन्दौ कि कोई भी भविष्यवक्ता यरुश्लेमा कु बाइरै झांगा।

यरुश्लेमा लै लेरणौ

(मती23:37-39)

34 "ओ यरुश्लेमा! ओ यरुश्लेमा! तू एक इणौ इलाकौ ई कि तांए भौरी भविष्यवक्ता झांगे ई, और जो लोग परमेश्वरा रौ खुशी रौ सन्देश शुणावा ई सै तांइए ढोलीयाए ई! मुइंए कई बारै सुंचौ कि जिणी कुखड़ी आपणै टैणु आपणै पांखे थाले चौरा तिणी ई मुइयै भी तैरै छोहरू कोठै कौरनै चारे, पर तांए हाऊं इणौ नाई दैओ कौरनै। 35 और आबै देखौ तुमारौ घौर तुमुलै शुनौ

छाड़ा, और हाऊं तुमुले बोलाऊ: जेबी झाऊं तुमै नाई बोलाए कि, "भौलौ सेऊ जुण परमेश्वर रै नांवा कौरी आशा सा, और तेबी झाऊं मुं तुमै केबी ना देखाए।"

फरीसी रै घौरा दी यीशु

14 तैबै यीशु ब्रौता रै दिना दी फरिसीऊ रै मुख्ये मांझीया कु कास एकी रै काए रोटी खान्दैं डैऔं और से यीशु ताकी दी थै। 2 तिरे तेसरै मुआ काए एक इणौ आदमी थौं जासदी पुरे शरीरा दी दुखणै थै लागै औन्दै और दुखणैऊ कु पाणी चुडा थौं। 3 इणै देखीयौं यीशुए कानुना रै गुरु और फरिसीऊ कु पुछौं, "का ब्रौता रै दिना दी चांगौ कौरनौ ठीक आ या नाई?" 4 पर से चुटुकचार थाकै। तैबै तिणीए सेऊ आदमी जासदी दुखणे री बिमारी थी लागी ऐन्दी छुईयौं चांगो कियो और डेउणै दैऔं। 5 और तिउलै बोलौ, "तुमु मांझीए इणौ कुण आ, जासरो छेहरु या बोलद आरामा रै दिने कुरे दी पौडा लौ ता का सेऊ तेस फेटी बाइरै नाई गाड़ा लौ?" 6 सै इऊं बुशु रौ कोई भी जवाब नाई देई बोलै।

नीउलौ और पाउणै री इज्जती रै बारै दी

7 जैबै यीशुए देखौ कि ओटाए औन्दै पाऊणै बोशणा लै किणी आच्छी-आच्छी जागहा छांटाई। तैबै यीशुए एक अनैणै देईयौं तिउलै बोलौ, 8 जैबै ताऊं कुण शादी-ब्याह दी ओटावा लौ ता आच्छी जागहा दी नाई बोशणौ, केशी इणौ ना चाई हुअौ कि तिणी आदमीए ताऊंकु भी बौडौ आदमी औलौ ओटाओ औन्दौ। 9 और जुणीए ताउलै और तेसलै नीऊंदौ औलौ दैऔ औन्दौ और सेऊ आशीयौं ताउलै बोला लौ, "एस काले जागहा दै तैबै तारें बेशर्म हुईयौं सौभी कु बेकार जागहा दी जा बोशणौ 10 पर जैबै ताऊं ओटावा लै ता सौभीकु निउठी जागहा दी बोशणी। ताकी जैबै सेऊ जुणीए तू ओटाओ औन्दौ ई आशा लौ, ता ताउलै बोला, "ओ गोश्टण, आच्छी जागहा दी बोश, तैबै ताऊं आइलै बोशणे वालेऊ मांझीए तेरी बौडाई हुआ सा। 11 कैलैकि जुण आपुले बौडौ बोणा आ तेस छोटौ चाणाई, और जुण कुण आपुलै छोटौ बोणा लौ तेस चाणा ई बौडौ।" 12 तैबै यीशुए तेसलै बोलौ जुणीए यीशु ओटाओ औन्दौ थौं, "जेबी तू दुसकी या ब्यालकी रोटी दिया लौ ता आपणै भाई, गोश्टण या पडोसिऊ और सेठ आदमीऊ ना ओटाए, कैलैकि सै भी ताऊं ओटावा ई और तैरो बौदलौ वापिस कौरा ई। 13 पर जेबी तू रोटी दिया लौ ता गरीब, लौंगडै, टुंड़ै और शेडै लोग ओटाए। 14 तैबै तू भौलौ हुआई, कैलैकि तिउके वापिस देणा लै कुछ ना आसतौ, पर जेबी धर्म लोग जीउदैं औआ लै तेभी ताउलै एथरौ इनाम मिला।

बौडी दुपारी (भोज) रौ औनेणौ

(मती 22:1-10)

15 यीशु आइलै जो लोग रोटी खान्दैं थै बोशै औन्दै ईऊं बुशै शुणीयो एकी आदमीए बोलौ, "भौलौ सेऊ जुण परमेश्वर रै राजा दी रोटी खा सा। 16 यीशुए तेसलै जवाब दैऔं, "एकी आदमीए बौडी धाम देई और भौरी लोग थै ओटाए औन्दै। 17 जैबै धाम तैयार हुई गोई, ता तिणीए आपणै नुकरा लै बोलौ, जासलै निऊंदौ आ दैऔं औन्दौ तिऊं ओटाऊ कि धाम तैयार हुई गोई आ।" 18 पर सै सारै माफी मांगदैं लागै। पैहलै आदमीए तेसलै बोलौ, मैरे डोखरौ किमतिरे निंओ औन्दौं, और जरुरी आ कि तेस डोखरौ देखु हाऊं ताऊं कु औरज कौरा ऊ कि मुं माफ कौरै। 19 दुजै आदमीए बोलौ, "मुइयै पांज जोड़ी बौलद खरीदैं औन्दै, हाऊं डिआऊ तिऊं परखदैं, हाऊं ताऊंकु औरज कौराऊ कि मुं माफ कौरै।" 20 औजौ एकीए बोलौ, "मुइयै नौई-नौई शादी कौरी ऐन्दी मुकै नाई आशीदौ।" 21 तिणी नुकरै आपणै मालिका काए आशीयो इयै सारी बुशै शुणाई, तैबै घौरा रै मालिके रोशुईयौं आपणै नुकरा लै बोलौ, एस इलाके रै बजारा और गलीऊ दी फेटी डैईयो, गरीब, टुण्डै, लौंगडै और शेडै इदैं आण। 22 नुकरै तौणै बोलौ, 'ओ मालिका जिणौ तारें बोलौ आ तिणी ई कौरी गौ आ तौणै भी जागहा आसती आ।' 23 मालिके आपणै नुकरा लै बोलौ, 'सौडकी और डोखरेऊ दी डैऔं और लोग जौबरै आपणौ ताकी

मैरो घौर पुशै भौरीया।' 24 कैलैकि हाऊं तुमु लै बोलाऊ कि, जुण लोग मैरे औटाएन्दै थै तिऊं मांझीआ कु कोई भी मेरी इयै धाम नाई चाखी बोलदौ।'

चलेऊ चाणनै री कीमत

(मती 10:37,38)

25 जैबै यीशु आइलै बौडी भीड थी डेऊंदै लागी ऐन्दी तैबै तिणीए पिछाऊं मुडीयौं तिउलै बोलौ, 26 "अगर कुण मुकाए आशालौ, सेऊ आपणै माँ-बाब, छेउडी, छेहरु और भाई बौईणी इदरा झाऊं कि आपणै प्राणा कु भी जादौ मुं आइलै प्यार कौरा। नाई ता सेऊ मैरो चेलौ नाई बोणी बौलदौ। 27 और जुण-कुण आपणो कूस नाई उठाऊवालौ, और मूं पिछु नाई आशा लौ सेऊ भी मैरो चेलौ नाई बोणी बौलदौ। 28 तूमु मांझीए इणौ कुण आ जुण बडौ घौर चाणनौ चाह लौ और बोशीयौं पैहलै कीमत नाई जोडा लौ कि मुकै एती बजट आसती की नाई? 29 कियै इणौ ना चाई हुअौ कि पौई पाईयौं उपरै ना चाणुओ नाई, और लोग इणै देखीयौं तेसरौ मजाक उड़ाऊंदै लागा, 30 कि एऊ आदमी चाणदैं लागौ पर उपरै ना चाणी बोलौ। 31 या इणौ कुण राजौ आ जो दुजै राजे आइलै लौडदैं डिआ लौ और पैहलै विचार नाई लौ कौरा कि, बिश हजार मुं आइलै लौडा ई का मैरे दस हजार कौरीयै तिऊंरौ मुकाबलौ कौरुई जा सा? या नाई कौरिदौ? 32 नाई ता तेस राजे काए आपणै दूता भेजीयो तेस आइलै तिटै डैईयो सुलौ कौरनौ चाह सा। 33 इणै कौरीयै तुमु मांझीए कु, जुण-कुण आपणो सब कुछ ना छाड़ा लौ सेऊ मैरो चेलौ नाई बोणी बौलदौ।

बिण स्वादा रौ लूण

(मती 5:13; मरकुस 9:50)

34 लूण ता आच्छौ आ पर अगर लुणा रौ स्वाद बिगडी जा लौ, ता तेस केजी चिजा कौरी लुणुओ चाणा ई? 35 सेऊ ना ता जबीना दी खादी रै कामा दी आशदौ, तेस ता लोग बाइरै शोटा ई। जासरे शुणना रै कौन्थु औलै सै आच्छा कौरीयै शुणा लै।

औची औन्दी भेरी रौ औनेणौ

(मती 18:12-14)

15 सारै मामलै निणै वालै और पापी लोग यीशु काए आशा थै तेसरौ बुशै शुणदैं। 2 पर फरिसी और यहूदी शास्त्रीऊ आपु मांझीए गुणमुणांदै लागै, "कि एऊ ता पापी लोग आइलै मिला और रोटी भी खा सा। 3 तैबै यीशुए तिउलै एजौ औनेणौ दैओ: 4 तुमु मांझीए इणौ कुण आ जासरी शौ भेरी ओली और तिऊं मांझीया कु एक औचा ली पोरु, तैबै तिऊं बाकी बोची ऐन्दी (नडीनवे) भेरी तिरे सुनसान दी छाडीयो तिरे औची ऐन्दी नडानानवे भेरी तेबी झाऊं ना लोडा जेबी झाऊं सै ओरु ना मिला? 5 और जेबी सै औची ऐन्दी भेर ओरु मिला आ तैबै सेऊ भेरालडु तिरे भेर खुशी कौरीए आपणै काछा माथै चुंगा सा। 6 और घौरा कै आशीयौं आपणै दोस्त और पडोसिऊ ओटाइयो तिउलै बोला मुं आइलै खुशी मनाओ, कैलैकि मेरी औची ऐन्दी भेर मिली गोई आ। 7 हाऊं तुमु लै बोलाऊ इणी ई सौरगा दी भी तिऊं बाकी धौर्मी छाडीयो जासकै पापा कु मन बदुलनै री जरुरत नाई आसती, पर मन बदुलनै वालै एक पापी लै इणी खुशी हुणी आ।

औचै औन्दै सिक्के रौ औनेणौ

8 या कुण छेउडी इणी आ जासकै चांदी रै दस डौलर औलै, और तिऊं मांझीया कु एक औचा लौ पोरु, और सै छेउडी तेस डौलर लौम्पा जालीयो और घौरा दी ऐंजियो और लोडीओ जेबी झाऊं सेऊ मिला नाई लौ का तेबी झाऊं तेस नाई लोडदी? 9 और जेबी सेऊ डौलर मिला लौ तैबै सै छेउडी आपणी सहेलीऊ और आपणी पडोसीऊ ओटाइओ तिऊं लै बोला आ! मुं आइलै खुशी मनाओ, कैलैकि मैरो औचौ औन्दौ डौलर मिली गौ आ।" 10 हाऊं तुमु लै बोला ऊ कि इणी ई खुशी एक पापी रै मन बदुलनै कु पमेश्वर रै दूता रै सामनै हुआ सा।

औचौ औन्दौ छोहरू

11 यीशुए तौएँ बोलौ, "एकी आदमी रे दुई छोहरू थे। 12 तिऊं माझीए कु छोट्टे छोहरू ऐ आपणें बाबा ले बोलौ, ओ बाब जमीन-जयदादा दी जो मैरी हिस्सा आ, तेस मुकै दैओ' तैबे तेसरे बाबे तिउंके जमीन-जयदादा बांटी। 13 कुछ दिना बासिए तिणी छोट्टे छोहरूए आपणी सारी धन-जयदादा कौटै की और दर देशा लै डैओ। तिरे तिणीए आपणी जयदादा बुरे कामा दी खर्च की। 14 जेबी तिणीए आपणी सारी धन-जयदादा खर्च की एरी। तेबी तेस देशा दी बौडौ काल पौडौ और सेऊ छोहरू कंगाल बोणौ। 15 तैबे सेऊ सेजे इलाके रे एकी जीमीदारा रे कारे डैओ, तिरे तिणी जीमीदारै सेऊ आपणें डोखरे दी सुंगरु चारदें लाओ। 16 सेऊ चाह थौ की जेजे चापण इयें सुंगरु खा ई, सेजे चापणा खाइयौ आपणें पेट भौरु, और तेसले कोइयौ कुछा ना दिया थै। 17 जैबे सेऊ छोहरू होशी दी आशौ। तैबे बोलदें लागौ, 'कि मैरे बाबा रे केती मझदुर ई जो पेटा भौरीयौ रोटी खा ई, और हाऊं इदें बुखौ मौरदें लागौ औन्दौ। 18 आबे हाऊं उठीओ आपणें बाबा कारे डिआऊ, और बोलाऊ, 'ओ बाब मुइयें सौरगा रे खिलाप और तुमारी नौजरीए पाप कियो आ, 19 आबे हाऊं इणें जोगी नाई रे कि तुमे मुलें छोहरू बोला, मूं तुमै आपुकारे एक नुकरा बाशीये छाड़ौ। 20 तैबे सेऊ उठीयो आपणें बाबा भीलें चाल पौडौ सेऊ औजौ आपणें घौरा कु दरख दुइडै थौ कि तेसरे बाबे सेऊ आपणें छोहरू दुरा कु देखौ और तेसरी आखी भौरुई। तेस कारे फेट मारीयो डैओ, तेसदी घीण लाई और सेऊ खोबिआओ। 21 तिणी छोहरू ऐ आपणें बाबा ले बोलौ, 'ओ बाब, मुइयें सौरगा रे खिलाप और तुमारी नौजरीए पाप कियो आ, आबे हाऊं इणें जोगी नाई रे कि तुमे मुलें आपणें छोहरू बोला। 22 पर तेसरे बाबे आपणें नुकरु लै बोलौ फेटी आछे-आछे जुडके आपणें और एसके भिड़ाओ और एसरे हाथा दी कांगणी और लाता दी बूट लाओ। 23 और धाचै औन्दे पशु माझीया कु एक काटौ ताकी आमै खाईओ खुशी मौनाई लै। 24 कैलैकि मैरौ एऊ छोहरू मौरौ गौ थौ। आबे जीऊंदौ हुई गौ आ, औचौ गौ थौ आबे मिली गौ आ। तैबे से खुशी मनाऊंदै लागौ। 25 पर तेसरौ जेठौ छोहरू थौ डोखरे दी, जेबी सेऊ वापिस आपणें घौरा रे नजदीक पौऊंचौ, ता तेसके गाइणौ बजाउणौ और नाचणौ शुणौओ। 26 तैबे तिणीए एक नुकुर औटाइयौ तेसकु पुछौ, "भीते का सा औन्दे लागौ औन्दौ? 27 तिणी नुकुरे तेसले बोलौ, 'तेरौ भाईटु आशी गौ आ।' और तेरे बाबे तेसरे आशणें री खुशी दी बौडी धाम आ देई ऐन्दी, कैलैकि तेरौ भाई भोलौ-चांगौ वापिस आशौ आ। 28 इणें शुणौयो तेसरे भौरी रोश आशै, और सेऊ भितरे डेउणौ नाई चाहा थौ, तैबे तेसरौ बाब बाइरे आशीयो तेस मौनाऊंदै लागौ। 29 तिणीए आपणें बाबा ले जवाब देइयो बोलौ, 'देखौ हाऊं एती बौरशा ओउलें तुमारी सेवा कौरदें ऊ लागौ औन्दौ, मुइरे केबी भी तुमारी बूश नाई टाली। तैबे भी तुमुए मुलें केबी एक बाकरी रौ चेलटु भी ना दैओ, कि हाऊं आपणें गोश्टणु आइलें खुशी मौनाऊ। 30 पर जेबी तुमारौ इयो छोहरू जुणीयें तुमारी जयदादा गान्दें कामा दी खर्च की, वापिस आशौ आ ता तेसले तुमुए धाचौ औन्दौ पशु पा कौटाओ आ। 31 तेसरें बाबे तेसले बोलौ, 'छोहरू आ तू ता सोदा मू ई आइलें ई, जो कुछ मैरौ आ, सेऊ सारौ तेरौ आ। 32 पर आबे चाई आमुए खुशी मौनाऊणी कैलैकि एऊ तेरौ भाई मौरौ गौ थौ आबे जीऊंदौ हुई गौ आ, औचौ गौ थौ आबे मिली गौ आ।

चलाक भोण्डारी

16 तैबे यीशुए आपणें चलेऊ लै भी बोलौ, "एकी सेठा रौ एक खजान्ची थौ, और लोग तेस सेठा कारे तेस खजान्ची माथे इल्जाम लाइदें लागें कि इयो खजान्ची तेरी सारी धन जयदादा उडाऊंदें आ लागौ औन्दौ। 2 तैबे सेठे सेऊ खजान्ची आपुकारे औटाओ और बोलौ तेरे बारें दी हाऊं का बूश ऊ शुणदें लागौ औन्दौ? तू आबे आपणें खजान्ची वालौ हिसाब किताब दे ओरु कैलैकि तू आबे खजान्ची रे लायक नाई रौ। 3 तैबे सेऊ खजान्ची आपणें जीवा दी सुचदें लागौ, कि आबे हाऊं का कौरु लै, कैलैकि आबे मैरौ बाबु ता मूं खजान्ची रे कामा कु पोरु गाड़दें लागौ औन्दौ, बांजर मुकै खोदिंदौ नाई और भीखा मांगणा री लाग्गा मुकै शौरम। 4 इणें सुंचीयो तिणी आपणें

जीवा दी बीचार कियो कि, आबे मेरी सौमझी दी आशी गौ आ कि मुइरे का जा कौरनौ, ताकी जेबी मूं मेरौ मालिक खजान्ची रे कामा कु पोरु गाड़ लौ, तेबी लोग मूं आपणें घौरें निआं। 5 तैबे तिणी खजान्चीए आपणें मालिका रे सारे कर्जदार एक-एक कौरिए आपु कारे औटाए और पैहलें कर्जदारा कु पुछौ, "ताऊं माथे मैरे मालिका रौ केती कौर्जा आ? 6 तिणीए बोलौ शौ मण तेल खजान्चीए बोलौ की आपणौ बौई-खातौ कर और फेटी पचास लिख। 7 तैबे पुछौ तिणीए दुजे कु, 'ताऊं माथे केती कौर्जा आ? तिणीए बोलौ, 'शौ मण गीऊं' तैबे खजान्चीए बोलौ आपणौ बौई खातौ कर और आस्सी लिख। 8 तैबे यीशुए बोलौ, "तिणी सेठे तेस चलाक खजान्ची री तारीफ की, कि तांरे केती चालाकी कौरिए काम कियो आ, कैलैकि ऐजे संसारा रे लोग आपणें साथा रे लोगु आइलें रिति-रिवाजा और चाल-चालना दी धोर्मी लोगु कु भौरी चलाक ई। 9 और हाऊं तुमुलें बोलाऊ, "कि एस संसारा रे धन-जयदादा कौरिए आपु काले इणें गोश्टण चाणौ, ताकी जेबी तुमुके से धन-जयदादा पोरु सौबडा ली तेबी से गोश्टण तुमु केबी ना सौम्बुडने वाली जागहा दी निआं। 10 जुण छोटी-छोटी बशेऊ दी सौच्यौ रौआ सा सेऊ बौडी-बौडी बुशेऊ दी भी सौच्यौ रौआ, और जुण छोटी-छोटी बशेऊ दी बेईमान औआ सा, सेऊ बौडी-बौडी बुशेऊ दी भी बेईमान औआ। 11 एथीलें जैबे तुमै संसारा रे धन-जयदादा दी सौच्यौ नाई रौआ लै ता तुमुके आत्मिक (सौरगा रौ) धन-जयदादा कुण दिया सा? 12 और जैबे तुमै बिगानें धन-जयदादा दी सौच्यौ विश्वास वाले नाई रौआ लै ता, तैबे जो तुमुके आपणौ आ तेस तुमु के कुण दिया सा? 13 "कोई भी नुकुर दुई मालिका री सेवा नाई कौरौ बोलदौ, कैलैकि सेऊ या कौरा एकी आइलें नफरत और दुजे आइलें कौरा प्रेम या, एकी आइलें रौआ मिली झुलीओ दुजे आइलें छाड़ा रागा; तुमै परमेश्वर और दुनिया री धन-जयदादा, दुइया री सेवा नाई कौरौ सौकदें।"

यीशु रे कुछ उपदेश

(मती11:12,13; 5:31,32; मरकुस10:11,12)

14 फरीसि लोग जुण लालची थे सै इऊं बुशेऊ शुणीयो यीशु रौ मजाक उडाऊंदें लागे। 15 यीशुए तिउलें बोलौ, "तुमै ता इणें लोग ई जो लोग माझीए आपु लै धर्मी बोणाई, पर परमेश्वर तुमारे जीऊ जाणा सा। कैलैकि जो चीज लोगु री नौजरीयें आच्छी आ, सै चीज परमेश्वर री नौजरीयें बुरी आ।" 16 यीशुए बोलौ, नियम और भविष्यदवक्ता ता यहूना रे बौगता झाऊं थे तेथ बासीए ता परमेश्वर रे राजा री खौबर आ शुणाउणें लाई ऐन्दी। और हर आदमी परमेश्वर री बाटा दी पुरी ताकती कौरिए आ आशदें लागौ औन्दौ। 17 सौरग और धौतरी टौली सौका ई पर परमेश्वर रे चाणें औन्दे धौर्म-नियमा रौ एक भी बिन्दु नाई टौली सौकदें। 18 जुण आदमी आपणी बोकटी गाडीयो दुजी शादी कौरालौ सेऊ गलत काम कौरा आ, और जुण आदमी दुजे री गाडी ऐन्दी छेउडी आइलें शादी कौरालौ सेऊ भी कौरा गलत काम।

सेठ आदमी और गरीब लाजर

19 एक आदमी थौ जुण मैहंगे-मैहंगे और मखमला रे जुडके बीडा थौ, और रोज सुखी और खुश रौआ थौ। 20 और लाजर नावां रौ थौ एक गरीब जासरें पुरे जीस्मा दी दुखणें थे, लोग तेस रोज चुंगीयो सेठा री खोली कारे छाड़ा थै। 21 कैलैकि सेऊ चाहा थौ कि सेठा री फोकुई ऐन्दी जुटी रोटी खाईयो आपणौ पेट भौरु। तिरे कुकुर भी आशीयो तेसरें दुखणें चाटा थै। 22 इणौ हुओ कि एकी दिने सेऊ गरीब आदमी मौरौ, और परमेश्वर रे दुतुए सेऊ चुंगीयो अब्राहमा री उगाली दी छाड़ौ। तैबे सेऊ सेठ आदमी भी मौरौ और लोगुए सेऊ दाबौ। 23 और सेऊ डैओ नौरका दी तिरे सेऊ भौरी दु:खा दी थौ तौडपदें लागौ औन्दौ जैबे तिणीए आपणी नौजर उपरें लाई तैबे तिणीए दुरा कु सेऊ लाजर अब्राहमा री उगाली देखौ। 24 तैबे तिणीए आके मारीयो बोलौ, 'ओ बाब अब्राहम मूं माथे दया कौरौ एस लाजर मुकारे भेजौ ताकी एऊ आपणी औऊंटी री मुडकी पाणी दी बीजाइयो मेरी जीभ शेलावा, कैलैकि हाऊं इयें नौरका री आगी दी तडपदेऊ लागौ औन्दौ। 25 पर अब्राहमै बोलौ, "ओ छोहरू याद कर कि तांरे ता आपणी जीन्दगी दी आच्छी-आच्छी चिजेऊ कौरिए आराम कियो। और इणी लाजरें भी गौरे दु:ख झेली। आबे

एऊ इदै सुख शान्ति दी, और तू ई तड़पदै लागो औन्दो। 26 इऊं सारी बुशें छाडीयो आमारे और तैरे बिचा दी एक बौड़ी खाल आ ताकी जो इदर ताऊं काए आशणो चाहा लो सेऊ नई आशी बौला, और ना ताऊं काए कु इदै अमु काए आशी बौला। 27 तिणीए बोलौ, "ओ बाब इणो कर हाऊं ताऊं कु औरज कौरा ऊ कि तू एस लाजर मैरे बाबा रै घोरै भेज। 28 कैलैकि मैरे पाज भाई ई, और एउ लाजर तिऊं काए इऊं बुशु री गवाही दिआ, इणो नई चाँई हुओ कि सँ भी इदै नौरका दी आशा। 29 अब्राहमै तेसलै बोलौ, "तिउंकै ता मुसा और भविष्यदवक्ताओं री किताबे ई, तिउंरे चाँई तेथरी शुणनी।" 30 तिणीए बोलौ, "ओ बाब अब्राहम इणो नई भी नई, अगर तिऊं काए कुण मौरै औन्दे माझीया कु जीऊंदे हुईयो डिआलौ तैबे बौदला ई सँ पापा कु आपणो जीऊ। 31 अब्राहमै तेसलै बोलौ, "जैबै सँ मुसा और भविष्यदवक्ताओं री बूश नई शुणदैं, तैबे सँ तेसरी भी नई शुणदौ जुण तिऊं काए मौरै औन्दे माझीया कु जीऊंदे हुईयो डिआ लौ।"

ठोकरा सँ कारण बौणनौ (मती18:6,7,21,22; मरकुस9:42)

17 तैबे यीशुए आपणै चलेऊ लै बोलौ, "आदमीऊ कै पाप कौरना लै परीखा ता आशा ई, पर फिटकार तिऊं आदमीऊलै ज़ासरै कारण इयै परीखा आशा ई। 2 जुण इऊं छोटैऊ माझीया कु कास एक भी जौबरीयै परीखा दी पा लौ, तेसलै ता आच्छेइ इणो हुआ थौ कि तेस आदमी रै गौलै दी घोरटा सँ जौन्दर बानियो समुन्दरा दी पा। 3 हाऊं तुमु खबरदार कौराऊ; अगर कुण विश्वासी भाई तैरे विरोधा दी बुरो कौरालौ, तेस डांटीओ सौमझाओ। अगर सेऊ पछता लौ ता तेस माफ कौरौ। 4 अगर सेऊ दिना दी साता बारे भी तैरे विरोधा ई बुरो कौरा, और आशीयो बोला कि हाऊं पछताऊ मुं माफ कर, ता तू तेस माफ कौर।

विश्वास

5 तैबे भेजे औन्दे चलेऊए प्रभु लै बोलौ, आमारा विश्वास बौडाऊ। 6 यीशुए तिउंलै ज़वाब दैओ, "अगर तुमारा विश्वास राई रै गुलै जेती भी औआ थो, ता तुमै एस किमु रै पेडा लै बोलालै, कि तू जौड़ी कु पोडुइयो समुन्दरा दी लाग। ता सेऊ तुमारी बूश माना थौ।"

एकी सेवका सँ काम

7 जैबे कुण नुकर डोखरै बाइयो या भेरी चारीयो आशा सा, "का तेसरो मालिक तेसलै इणो बोला कि फेटी आश रोटी खा? 8 का सेऊ इणो ना बोलदौ, "पैहलै मुलै रोटी चाण, जेबी झाऊं हाऊं खाई-पी औ फारीक ना औलौ, तेबी झाऊं भेरी सेवा कर तेथ बासीए खायै तू। 9 आपणी आज्ञा पुरी कौरना लै सेऊ मालिक आपणै तेस नुकरा लै शाबाशी केभी ना दैन्दौ। 10 इणै ऐ कौरिऐ जेबे तुमै भेरी आज्ञा मानालै, ता तुमुए भी इणो बोलनौ आ कि आमै तारीफा रै जोगी नई आसतै। आमै ता नुकर ई जुण आपणो फरज पुरो कौरदे ई लागै औन्दै।

कोढा रै दस रोगी चांगे कौरणे

11 यीशु आपणै चलेऊ आइलै यरुश्लेमा लै चाल पौडौ, तैबे सँ सामरीया और गलील इलाके बाटीये लागे डेउंदै। 12 ज़ीणी सँ एकी गाँवा दी डेवै तिरे दख दुडडै तिउंकै दस कोडी मिले। 13 तिउंरे जौरै आकै मारीयो बोलौ, "ओ यीशु ओ मालिक अमु माथे दया कौर। 14 यीशुए तिऊं भीलै देखीयो बोलौ, "डैओ आपणै याजकु कै देखालीयो। खरकचर डेउंदै-डेउंदै तिउंरौ कोड ठीक हुई गो आ। 15 तिऊं माझीये जैबे एकी ऐ देखौ कि हाऊं चांगो हुई गो, ऊ ता सेऊ वापिस यीशु काए आशौ और जौरै-जौरै बोलदैं लागो, "हाऊं ठीक हुई गो ऊ परमेश्वर री बौडाई चाँई हुई।" 16 सेऊ यीशु रै बांगणै माथे पौडीयो यीशु सँ धन्यवाद कौरदै लागो सेऊ आदमी एक सामरी थौ। 16 सेऊ यीशु रै बांगणै माथे पौडीयो यीशु सँ धन्यवाद कौरदै लागो सेऊ आदमी एक सामरी थौ। 17 यीशुए तेसकु पुछौ, "का मुंइरे दस आदमी ठीक नई कियै, तैबे नौ आदमी कियै?" 18 का परमेश्वर री बौडाई कौरदै एका परदेसी वापस

आशौ आ? 19 यीशुए तेस आदमी लै बोलौ, "आबै उठ, और डेऊ तैरौ जो विश्वास आ तिणीए तू चांगो कियो ई।

परमेश्वर रै राज्य सँ आशणो (मती24:23-28, 37-41)

20 जैबे फरीसि लोगुए यीशु कु पुछौ, 'परमेश्वर सँ राज केबी आशा आ?' तैबे यीशुए तिउंलै ज़वाब दैओ, "परमेश्वर सँ राज दिशणै रै रुपा दी नई आशदो, 21 और ना लोग इणो बोलदैं कि देखौ परमेश्वर सँ राज इदै आ या तिरे आ, देखौ परमेश्वर सँ राज ता तुमु माझीये आ।" 22 तैबे यीशुए चलेऊ लै बोलौ, "इणै दीन आशणे ई जेथदी तुमै आदमी रै छेहर माझीया कु एक दीन देखणो चाहा लै पर नई देखी बोलदैं। 23 लोग तुमु लै बोलालै, देखौ आदमी सँ छेहर तिरे आ या इदै आ। पर तुमुए डेऊणो नई और ना तिऊं पिछु हुणौ। 24 कैलैकि जिणी, बीजली सौरगा रै एकी धुरे कु दुजे धुरा झाऊं चोमका आ, तिणी आदमी सँ छेहर भी आपणै दिना दी परगट हुआ सा। 25 पर एथकु पैहलै आदमी रै छेहर ऐ भौरी दुःख जा ई उठाउणै। और एस जुगा रै लोग तेस बिगानो सौमझा ई। 26 जिणो पैहलै जमाने रै नूह गुरु रै बौगता दी हुओ आ, तिणी आदमी रै छेहर रै बौगता दी भी हुओ सा। 27 जेबी झाऊं नूह समुन्दरी जहाजा दी ना डैओ, सेजै दिना झाऊं लोग खा-पिआ थै और तिऊं माझीए शादी-ब्याह हुआ थै। तैबे इणो पाणी लागो कि सब कुछ खातम हुआ। 28 और जिणो लूत नावां रै आदमी रै बौगता दी हुओ थौ कि लोग थै खाद-पिदैं और लेन-देन कौरदैं, पेड़-पौधे लाईदैं, और घोर बार चाणदैं लागै औन्दै। 29 पर जेजे दिनै लूत सदोम इलाके कु निकलौ सेजे दिनै सौरगा कु आग और दारु बौरसै और सारै खातम कियै। 30 आदमी सँ छेहर परगट हुणै रै दिना दी भी इणो हुणो आ। 31 सेजे दिनै जुण छापरा माथे औलौ और तेसरो सामान औलौ घौरा बितै, तैबे सेऊ तेस समाना निंदै नई आशा, तिणी जुण डोखरै दी औलौ सेऊ भी वापिस घोरै नई आशा। 32 लुता री छेउडी याद छाडौ। 33 जुण-कुण आपणै प्राण बौचाउणै चाहा लौ सेऊ तेस खातम कौरा, और जुण कौरा तेस खातम सेऊ आ बौचावा। 34 हाऊं तुमुलै बोलाऊ, "सेजी राचीए दुई आदमी एकी चारपाई माथे औलै सुतै औन्दै तिऊं माझीए कु एक निणो और दुजो छाडनौ तिरे। 35 दुई छेउडी जांजे पिशदैं औली तिऊं माझीए कु एक निणो दुजी छाडनी तिरे। 36 दुई जौणे डोखरे दी औलै एक निणो एक छाडनौ तिरे। 37 इणै शुणीयो तिउंरे यीशु कु पुछौ, "ओ प्रभुआ एजी बुशें किये औणी आ?" यीशुए तिउंलै बोलौ, "जिणो गोरुड कौठै हुणै कु ठेऊ लागे कि इदरा बाटीयें कुछ मौरै औन्दौ आ, तिणी जेबी आमै भी इणी बुशें शुणलै या देखुलै तैबे अमुकै भी ठेऊ लागे कि सेऊ बौग नज़दीक आ।

अधोर्मी फैसलै कौरणे वालो और बिधवा सँ औणैणो

18 तैबे यीशुए एथरै बारे दी औणैणो दैओ कि अमु रोज़ प्राथना कौरनी और हिम्मत चाँई छाडनी। 2 एकी इलाके दी एक फैसलौ कौरनै वालो रौआ थौ, जुण ना परमेश्वर कु डौरा थौ और ना कासी आदमी री परवाह कौरा थौ। 3 सेजे इलाके दी एक विधवा भी रौआ थी जो तेस फैसलै कौरनै वाले काए घौडी-घौडीए आशीयो बोला थी, मैरो फैसलौ कर और मूं मैरे दुश्मना कु बौचाऊ। 4 काफी बौगता झाऊं ता तिणीए तिआंरी कौन्थशुणी की पर आखरी दी तिणीए आपणै जीवा दी विचार कियौ कि ना ता हाऊं परमेश्वर कु डौरदौ और ना कासी आदमी री परवाह कौरदौ। 5 तैबे भी इयै विधवा मुं रोज़ आशीयो तंग कौरा, आबे मुं इयै विधवा सँ फैसलौ कौरनौ जा। केशी इणो ना चाई हुओ कि इयै घौडी-घौडीए आशीयो मुं भौरी परेशान कौरा। 6 प्रभुए बोलौ, "शुणो, एऊ बुरो फैसलै कौरनै वालो का बोलौ आ? 7 तैबे का परमेश्वर आपणै चुनै औन्दै लोगु सँ फैसलौ नई कौरा लौ? जुण राच दिन तेसरी प्राथना कोराई? का परमेश्वर आपणै लोगु लै बेर पा? 8 हाऊं तुमु लै बोलाऊ परमेश्वर आपणै लोगु सँ फैसलौ फेटी कौरा। तैबे भी जेबी आदमी सँ छेहर आशा लौ, "का तेबी सेऊ घौतरी माथे लोगु दी विश्वास पा लौ?"

फरीसी और मामलै निणे वालै रौ औनेणौ

9 जुण आपु लै धर्मौ बोणा थै और दुजै लोगु सौमझा थै बेकार तितल्लै यीशुए एजौ औनेणौ दैऔ कि, 10 दुई आदमी परमेश्वरा रै घोरुा दी प्राथना कौरदें डै, एक थौ फरीसी दुजौ थौ मामलै निणे वालौ, 11 फरीसी आपणै मौना दी इणी प्राथना कौरदें लागौ कि, 'ओ परमेश्वर, हाऊं तरौ धन्यवाद कौराऊ कि हाऊं दुजै लोगु जिणौ डाकु, ठगणै वालौ और गान्दै काम कौरनै वालौ नाई आसतौ, और ना एस मामलै निणे वालै जिणौ आसतौ जो इदैं आ। 12 हाऊं हफते दी दुई बारै ब्रौत छाड़ाऊ, और हाऊं आपणी सारी कमाई रौ दसवौ हिस्सौ भी दिआ ऊ। 13 पर मामलै निणे वालै दूर खौडी हुइयो सौरगा भीलै देखणौ भी ना चाओ, और आपणै हिकडै पिटी-पिटीओ बोलदें लागौ, 'ओ प्रभु' मुं पापी माथे दया कर। 14 तैबै यीशुए बोलौ, "हाऊं तुमुलै बोलाऊ, कि सेऊ फरीसी नाई बल्की एऊ मामलै निणे वालौ आदमी परमेश्वरा री नौजरी दी धर्मौ बौणीयो आपणै घोरै डैओ आ, कैलैकि जुण आपुलै बोडौ बौणा लौ सेऊ छोटौ बौणनौ आ। और जुण बौणा लौ आपु लै छोटौ सेऊ बौणनौ आ बोडौ।

छोहरु लै आशीवाद

(मती19:13-15; मरकुस10:13-16)

15 तैबै लोग आपणै लोलडेऊ भी यीशु काए लागै आणदें ताकी यीशु तिऊं माथे हाथ छाड़ा, पर चेलै लागै तिऊं धौमकाऊंदै। 16 यीशुए लोलडै आपु काए ओटाए और बोलौ, "लोलडेऊ मुं काए आशणै दैओ" इऊं नाई रोकौ कैलैकि परमेश्वरा रौ राज इणेऊ जिणौ आ। 17 हाऊं तुमु लै सौच्यौ बोलाऊ जुण परमेश्वरा रौ राज इऊं लोलडेऊ जिणौ नाई माना लौ सेऊ परमेश्वरा रै राजा दी केबी भी नाई डेई बोलदौ।

सेठ आदमी और सदा री जिन्दगी

(मती19:16-30; मरकुस10:17-31)

18 तैबै यहदीऊ रै एक मुख्यै यीशु कु पुछौ, 'ओ महान गुरु' सौदा री जीन्दगी पाइणा लै हाऊं का कौरु?" 19 यीशुए तेसलै बोलौ, "तू मुलै सारेऊ कु महान गुरु कैलै बोला ई?" कोई भी आचछौ नाई आसतौ परमेश्वरा रै सिवाए। 20 तू आज्ञाएँ ता जाणदौ औलौ, 'गान्दै काम ना कौरनी, खून ना कौरनौ, चोरी ना कौरनी, ना झुठी गवाही दैणी, और आपणै मां-बाबा री इज्जत कौरनी। 21 तिणी मुख्यै बोलौ, इऊं आज्ञाएँ ता हाऊं लोलडी औउलै मानाऊ। 22 इणै शुणीयो यीशुए तेसलै बोलौ, "ताऊंदी औजौ भी एकी बुशा री कामी आ।" आपणी सारी जयदाद बेचीयो गरीबु लै बांट, ताउल्लै मिला सौरगा दी धन-जयदाद, और आपु आंड मुं आइलै। 23 इणै शुणीयो सेऊ मुख्यौ भौरी दुःखी हुओ कैलैकि सेऊ भौरी सेठ थौ। 24 यीशुए सेऊ सेठ दुःखी देखीयो आपणै चलेऊ लै बोलौ, 'सेठा रौ परमेश्वरा रै राजा दी डेउणौ भौरी कठीन आ। 25 सेठ आदमी रै परमेश्वरा रै राजा दी डेउणौ कु उंटा रै सिउणौ रै शेडै बाटीयै डेउणौ आसान आ। 26 इणै शुणीयो लोगुए बोलौ, तैबै कासरौ उद्धार हुई बोलै सा? 27 यीशुए बोलौ, "जो आदमी रै बोलै नाई औन्दौ सेऊ परमेश्वरा रै बोलै औआ सा। 28 पतरसै बोलौ, "देखौ आमै ता आपणौ घोर-बार छाडीयो ताऊं पिछु चाल पौडै ई। 29 यीशुए बोलौ, "हाऊं तुमुलै सौच्यौ बोलाऊ इणौ कोई ना आसतौ जुणीए परमेश्वरा रै राजा री ताइए, आपणौ घोर, छेउडी, भाई और माम-बाब या लोलडे छेडै औलै, 30 और तेसलै इयैँ जीन्दगी दी कई गुणौ ज्ञादौ और आशणै वालै जुगा दी सौदा री जीन्दगी ना मिला।

आपनै मौरणै रै बारै दी यीशु रै चीजी बारै बोलणौ

(मती20:17-19; मरकुस1 ओ:32-34)

31 तैबै यीशुए आपणै बारहा चेलै आपुकाए औटाए और तितल्लै बोलौ, "देखौ आमै यरुश्लेमा ले ई लागै औन्दै डेउन्दै, जो-जो बुशै आदमी रै छोहरु रै बारै दी पुराणै गुरुए लिखी सै सारी पुरी हुणी आ। 32 कैलैकि तेस दुजी जाती रै लोगु रै हाथा दी दिआई, सै तेसरो मजाक उड़ावा ई। सै तेसरी बेइज्जती कौरा ई और तेस माथे थुका ई। 33 और तेसदी कोडै ला ई, तेस पोरु झांगा ई

पर सेऊ चिजें दिनै जीऊंदौ हुआ सा।" 34 पर तिऊं चलेउए यीशु री केजी भी बुश नाई सौमझी और इयैँ बुश तितुंकु चोरुई थाकी, जो बोलौ थौ सेऊ तितुरी सौमझी दी ना आशौ।

शेडै भिखारी आखी रौ दण

(मती20:-29;34; मरकुस10:46-52)

35 जेबे यीशु यरीहो इलाके रै नजदीक पौउंचौ, तिरे बाटा दी एकी भीलै बोशीयो एक शेडौ भीखा मांगदें थौ लागौ औन्दौ। 36 तिणी शेडै भीडा री आवाज शुणीयो पुछौ, 'एउ का औन्दै लागौ औन्दौ? 37 भीडा रै लोगुए बोलौ, नासरत गावां री यीशु आ इदरा बाटीयै डेउन्दै लागौ औन्दौ। 38 इणै शुणीयो सेऊ शेडौ भीखारी चिलांदे लागौ 'ओ यीशु दाऊदा रौ छोहरु मू माथे दया कर। 39 जो लोग औंगाडीए थै लागै औन्दै डेउन्दै तिउंरे तेसलै डांटीयो बोलौ, "चुटुक थाक" पर सेऊ तौरें भी जोरै-जोरै लागौ चिलांदै, "ओ दाऊदा रौ छोहरु मू माथे दया कर।" 40 जेबै यीशुए तेसरी हाक शुणी, ता यीशु खौडी टेकौ और आज्ञा देई कि "एस मु काए आणौ" जेबै सेऊ शेडौ भीखारी यीशु रै नजदीक आशौ ता यीशुए तेसकु पुछौ, 41 "तू का चाहा ई? हाऊं ताउल्लै का कौरु? तैबै तिणीए बोलौ, "ओ प्रभु हाऊं चाहा ऊ की हाऊं देखदें लागु।" 42 यीशुए बोलौ, "ठीक आ तू देखी बोलै ई" तैरै विश्वासै तू ठीक कियो ई।" 43 तेबी ई सेऊ शेडौ भीखारी देखदें लागौ, और परमेश्वरा री बोडाई कौरीयो यीशु पिछु आपण्डदें लागौ। जुणीए भी एजौ चमतकार देखौ सै सारै परमेश्वरा री महिमा कौरदें लागै।

मामलै निणे वालौ जक्कई

19 यीशु यरीहो इलाके बाटीयै थौ डेउंदै लागौ औन्दौ। 2 तिरे जक्कई नावा रौ एक आदमी थौ जुण मामलै निणे वालेऊ रौ मुख्यो थौ और सेऊ बोडौ सेठ थौ। 3 सेऊ यीशु देखणे री कोशिश थौ लागौ औन्दौ कौरदें कि सेऊ कुण आ पर भीडा रै कारण सेऊ यीशु नाई देखी बोलौ कैलैकि सेऊ कौदा रौ छोटौ थौ। 4 तैबै यीशु देखणा लै सेऊ भीडा कु औगाडीयै फटा मारीयो डैओ और एक गुलरा (फेडु) रै पेडा दी चोडौ कैलैकि यीशु सेजी बाटा दी डेउणै वालौ थौ। 5 जेबै यीशु तेस पेडा काए पौउंचौ, तैबे उपरै देखीयो तेस जक्कई लै बोलौ, "ओ जक्कई फेटी धौनी उत्तुर कैलैकि आज मुइयै तैरै घोरुा के रौइणौ आ।" 6 जक्कई फेटी उत्तरौ, और यीशु खुशी कोरीयै आपणै घोरै नियौ। 7 इणै देखीयो सारै लोग आपु मांझीयै गुणमुणांइयो बोलदें लागै, 'यीशु ता पापी आदमी रै काए पा डेई गो आ।' 8 जक्कई खौडौ उठौ और यीशु लै बोलदें लागौ, 'ओ प्रभु हाऊं आपणी आधी जयदाद गरीबु लै दिआऊ और अगर मुइयै कासी कु भी दोखै देइयो ज्ञादौ मामलौ निओ आ तेसकै हाऊं चार गुणौ वापिस दिआऊ।' 9 यीशुए तेसलै बोलौ, "आज एस घोरुा दी मुक्ती हुई आ कैलैकि एऊ आदमी भी अब्राहमा रै वंशा रौ आ। 10 हाऊं आदमी रौ छोहरु इणै लोगु जो परमेश्वरा कु दूर पापा दी ई डुबै औन्दै तिऊं लोडदें और बोचाउदें ऊ आशौ औन्दौ।

दस मूहरी (तोडैऊ) रौ औनेणौ

(मती25:14-30)

11 जेबै लोग इऊं बुशु शुणदें थै लागै औन्दै तैबै यीशुए एक औनेणै देइयो बोलौ, कैलैकि सेऊ यरुश्लेमा रै नजदीक थौ, और लोग सौमझा थै कि परमेश्वरा रौ राज शिरी परगट हुणौ आ। 12 एथीलै यीशुए बोलौ, 'एक सेठ आदमी दूर देशा लै डैओ ताकी सेऊ राजे रौ हक पाइयो वापिस आशा। 13 तैबै तिणीयै आपणै नुकरा मांझीया कु दस नुकुर औटाए, और तितुंके दस शर्फी मुहरै देइयो तितुंलै बोलौ, मैरै आशणै ज्ञाऊ एथरौ लेण-देण कौरैऊ। 14 और तेस सेठा रै इलाकै रै लोग तेस आइलै दुश्मनी छाड़ा थै, तैबै तितुंरे तेस सेठा पिछु आपणौ दूत खौबरी कौरौ भेजौ कि आमै नाई चांअदें कि एऊ आदमी आमू माथे राज कौरा। 15 जेबै सेऊ आपणै राजा रौ हक पाइयो वापिस आशौ तैबै तिणीए आपणै नुकुर औटाए ज्ञासकै तिणीए सर्फी मुहरै थै देई ऐन्दी, ताकी सेऊ तितुंकु लेण-देणा रै बारै दी पौतौ कौरा कि तितुंरे काका कौमाओ आ? 16 तैबै पैहलै नुकरै बोलौ, 'मालिक तेरी देई ऐन्दी शर्फी

मुहरी माथे मुझ्ये दस ओजो कौमाई। 17 तिणी सेठे तेस नुकरा ले बोलौ, 'ओ मैरे सौभी कु आचुछे नुकर शबाश' तू भौरी थोड़े दी भी विश्वास वालौ निकलो ई आबे तू दस इलाके माथे राज कर। 18 तैबे दुजे नुकरे भी आशीयो बोलौ, मुझ्ये तेरी शर्फी मुहरी कौरी पांज ओजो कौमाई। 19 तिणी सेठे तेसले भी बोलौ "शबाश" तू भी पांज इलाके माथे राज कर। 20 चिजे नुकरे भी आशीयो बोलौ, ओ मालिक तेरी देई ऐन्दी मुहर (चांदी रो रुपई) इदै आ, जो मैरे चादरु र धुरे दी थी बानियो छडी ऐन्दी। 21 हाऊं ताऊं भौरी डौरा थौ कैलैकि तू काठौ आदमी ई जिए तेरौ नाई आ तिवरु भी तू निआई जो तू नाई बौंइतै तेस भी तू लौआ ई। 22 सेठे तेसले बोलौ, ओ दुष्ट नुकर हाऊं तैरे मुओ कौरीए ताऊं आरोपी चाणाऊ, जैबे तू जाणा थौ कि हाऊं काठौ आदमी ऊ जो मैरौ नाई आ तेस हाऊं चुंगाऊ और जो हाऊं नाई बौंइतै तेस हाऊं लौआऊ। 23 तैबे तारे मेरी शर्फी मुहरे ब्याजा माथे कैले ना देई ताकी जेबी हाऊं आशा थौ ता तेबी सित ब्याजे निआं थौ। 24 तिणी सेठे तिउंले बोलौ जो तिरे खोड़े थे, इयें सर्फी महरें एस्क ओर छुड़ाओ और तेसके दैओ जासके दस शर्फी मुहरे ई। 25 तिउंए तेस सेठा ले बोलौ, ओ मालिक तेसके ता ई आसती दस शर्फी मुहरे। 26 हाऊं तुमु ले बोलाऊ, जासके आसती आ और सेऊ ठीक डोंगा रो बौरता लौ तेसके ओजौ मिला। जुण ठीक डोंगा रो ना बौरता लौ तेसके सेऊ भी ओरु निईआ सा जो तेसके ओलौ। 27 पर मैरे तिउं दुश्मन जो नाई चाहा थे कि हाऊं तिउं माथे राज कौर, तिउं इदै मुकारे आणीयो पोरु झांगौ।

यरुशेमा दी जीत आशणी

(मती21:1-11; मरकुस11:1-11; यूहन्ना12:12-19)

28 इऊं बुशे बोलीयो यीशु यरुशेमा ले तिउं सौभीऊ कु ओगाडीये आण्डदै लागौ। 29 जैबे सै जेतून नावां री पहाडी कारे पौउचै तिरे बेतफगे और बेतनियाह नावां रै दुई गाऊं थे। तैबे यीशुए चेलेऊ मांझीया कु दुई चेले इणै बोलीयो भेजे कि, 30 आपणे सामने वालें गावां दी डैओ, तिरे पौउचीयो तुमुके एक गदेटु मिला खुंटी दी बानौ ओन्दी। जास माथे इबी झाऊं कोई ना बोशौ, तेस खोलीयो ओरु आणेऊ। 31 अगर तुमु कु कुण पुछा लौ कि एस कैले खोला ई? तैबे तुमै बोलेऊ प्रभु के एसरी जुरुरत आ। 32 जो चेलै यीशुए भेजे ओन्दै थे तिउंए तिरे डेइयो तिणौ देखौ जिणौ यीशुए तिउंले बोलौ थौ। 33 जैबे सै चेले गदेटु खोलदें लागे तैबे तेसरे मालिकुए तिउं ले बोलौ, एस गदेटु कैले खोलाई? 34 तिउंए बोलौ प्रभु के एसरी जुरुरत आ। 35 तैबे चेलेउरे सेऊ गदेटु खोलियो यीशु कारे आपणै और तेस माथे आपणै जुडके पाईयो यीशु तेस माथे बोशालौ। 36 जैबे यीशु आण्डदै लागौ तैबे लोग आपणै जुडके बाटा दी बिछाऊंदें लागे, यीशु रै स्वागता ले। यीशु रै स्वागत 37 जैबे यीशु जेतून पहाडी री उतराई दी पौउंचौ, तैबे चेलेऊ री सारी भीड यीशु रै सारे शक्ति वालें कामा देखियो खुश हुरे और परमेश्वरा री बोडाई कौरदें लागे। 38 "भौलौ सेऊ राजां जुण प्रभु रै नावा दी आशा आ, सौरगा दी शान्ती और परमेश्वरा री बोडाई हो। 39 तैबे भीडा मांझीया कु कुछ फरीसि लोगुए यीशु ले बोलौ ओ गुरु आपणै चेलेऊ धौमकाऊ कि चुटुक थाका। 40 यीशुए जवाब दैओ, "हाऊं तुमुले बोलाऊ अगर इयें चुटुक थाका ले तैबे ढोल चिलांदें लाग्गा।

यरुशेमा ले लेरणौ

41 जैबे यीशु यरुशेमा रै नजदीक पौउंचौ तैबे यीशु यरुशेमा शहरा देखियो लेरौ। 42 ओर बोलौ, केती भौलौ ओआ थौ कि तू, ओ तू ई, आज के दिना री शक्ति री बुशें जाणा थौ। पर आबे इयें बुशें तेरी नौजरी कु चोरुई गोई। 43 कैलैकि ताऊं माथे इणै दीन आशणे ई कि तैरे दुश्मन कोठे हईयो ताऊं चारो तौरफा कु घेरीयो दबाउवा ई। 44 ताऊं और तैरे लोलडें जो ताऊं भीते ई माटे दी मिलावा ई ताऊं दी पात्थरा माथे पात्थर भी ना छाड़ने, कैलैकि तारे सेजौ मोकौ नाई सौमझौ जेबी ताऊं माथे दया हई थी।

परमेश्वरा रै घौरा कु सामाना बेचणे वालें गाडने

(मती21:12-17; मरकुस11:15-19; यूहन्ना2:13-22)

45 तैबे यीशु परमेश्वरा रै घौरा दी डैओ और समान बेचणे वालें बाइरे भगारे। यीशु परमेश्वरा रै घौरा दी 46 और बोलौ, "धर्मशास्त्रा दी इणौ आ लिखौ ओन्दी कि मैरौ घौर प्राथना कौरने रौ घौर आ। पर तुमुए ता एऊ लुटणे वालेऊ रौ आडुँ चाणी गो आ।" 47 यीशु रोज परमेश्वरा रै घौरा दी लोगु ले शिक्षा दिआ थौ। पर बौड़े याजक यहुदी शास्त्री और लोगु रै बौड़े नेतै यीशु झांगणे रौ मोकौ लोडा थे। 48 पर तिउंके यीशु झांगणे रौ कोई मोकौ ना मिलौ कैलैकि सारे लोग यीशु री बुशें बौड़े ध्याना कौरी शुणा थे।

यीशु रै अधिकारा माथी सवाल

(मती21:23-27; मरकुस11:27-33)

20 एकी दिने इणौ हुआ कि जेबी यीशु परमेश्वरा रै घौरा दी लोगु ले शिक्षा देंदें और खुशी रो सन्देश शुणाऊंदें थौ लागौ ओन्दी, ता बौड़े याजक, यहुदी शास्त्री, और स्याणै लोग यीशु कारे आशें, 2 और बोलदें लागे, "आमुके बोल, तू इणै काम केजे हक्का कौरीये कौरा ई? और सेऊ कुण आ जुणीए ताऊंके एऊ हक्क दैओ आ?" 3 यीशुए बोलौ, "हाऊं भी तुमु कु एक सवाल पुछा ऊ, तुमै भी तेथरौ जवाब दैओ, 4 यहुन्ना रो बसीसमा सौरगा री तौरफा कु थौ या आदमी री तौरफा कु थौ? 5 तैबे सै आपु मांझीये चौपडींदें लागे, "अगर आमै बोलुले परमेश्वरा री तौरफा कु दिआ थौ, तैबे इणीए बोलनौ आ इणौ कि, तुमुए तेस माथे विश्वास कैले ना कियो?" 6 अगर बोलुलै आमै आदमी री तौरफा कु तैबे ई लोग आमु डोलीयावा, कैलैकि इयें जाणा ई कि यहुन्ना भविष्यदवक्ता थौ। 7 तैबे तिउंए यीशुले जवाब दैओ, 'आमै नाई जाणदें कि सेऊ कासरी तौरफा कु थौ। 8 यीशुए तिउंले बोलौ, "हाऊं भी तुमु के नाई बोलदो कि हाऊं एजौ काम केजे हक्का कौरीये कौरा ऊ।

बुरै जिमीदार रौ ओनेणौ

(मती21:33-46; मरकुस12:1-12)

9 तैबे यीशुए लोगु के एक ओनेणौ दैओ, "कि एकी आदमीए अंगुरा रौ बांगीचो लाओ, और तेथरौ ठेकौ जिमदारु के देइये आपु डैओ भौरी दिना ले परदेशा ले। 10 जैबे अंगुर चोड़ने रौ बाँत आशौ ता तिणी मालिके आपणौ एक नुकर जीमदारु कारे आपणै हिस्से मांगदें भेजौ, पर तिउं जीमदारुए सेऊ नुकर पिटौ और तिवरु खाली हाथ भेजौ। 11 तैबे तिणी मालिके तौरे एक नुकर भेजौ, पर तिउं जीमदारुए सेऊ भी पिटौ और तेसरी बेइज्जती कौरीयो सेऊ भी खाली हाथ वापिस भेजौ। 12 तैबे भेजौ तिणीए चिजौ नुकर, तैबे तिउंए सेऊ भी पिटीयो घायल कियो और तिवरु पोरु गाडौ। 13 तैबे तिणी बगीचें रै मालिके आपणै जीवा दी सुंचौ, 'आबे हाऊं का कौरुले? आबे हाऊं आपणौ गौरतौ छेहरु भेजाऊ, हुई सौका कि सै तेसरी इज्जत कौरा। 14 पर जेबी तिउं जिमदारुए सेऊ मालिका रौ छेहरु देखौ ता सै आपु मांझीये चौपडींदें लागे, कि एऊ ता एस बांगीचें रौ हकदार आ। आशौ आमै एस पोरु झांगी ई, ताकी एऊ बांगीचौ आमरौ हुआ। 15 तैबे तिउं जिमदारुए सेऊ मालिका रौ छेहरु बांगीचें कु बाइरे गाडीयो पोरु झांगौ। आबे सेऊ मालिके तिउं जिमदारु आइलें का कौरा? 16 आशीयो तिउं जिमदारु पोरु झांगा और अंगुरा रौ बांगीचौ ओरी लोगु के सौंभाला। इणै शुणीयो लोगुए बोलौ, परमेश्वर कौरा, कि इणौ केबी ना चाई हुआ।" 17 यीशुए तिउं लोगु भिले देखियो बोलौ, "तैबे एऊ का सा लिखौ ओन्दी, "कि जेजौ पात्थर घौरा चाणने वालें मिस्त्रीउरे बेकार जाणीयो पोरु शोटी गो थौ, सेजौ पात्थर कुणे दी लागणे वालौ बाणौ। 18 जुण-कुण तेस पात्थर माथे लोटालौ सेऊ चूर-चूर हुआ, और जास माथे पौड़ालौ सेऊ पात्थर सेऊ पिशीया पोरु पा

कैसर ले मामलौ देणौ

(मती22:15-22; मरकुस12:13-17)

19 यहुदी शास्त्रीउरे और धर्म गुरुए जिणी ई एउ ओनेणौ शुणौ, ता तिउंए यीशु पाकुड़नौ चाओ कैलैकि सै सौमझी गौरे थे कि एऊ ओनेणौ आमु ले

बोलौं आ, पर सै लोग कु डौरा थै। 20 और सै एजै मौके देखदे लागे कि, केबडी एऊ इणी बूश बोला, कि जेजी बुशा दी एस फसाइयौ पाकडीलै। इणें कामा लै तिउंरे आपणें दुई गुस आदमी भेजै तिउंरै भेषा दी। 21 तिउंरे यीशु कु पुछौ, 'ओ गुरु आमै ज्ञानी कि तू बिल्कुल ठीक बोला ई और शिखावा ई, और कासी रौ पक्ष भी नाई कौरदौ। तुमै सौचूचाई कौरीयै परमेश्वरा री बाट देखालाई। 22 तुमै इणौ बोलौं, का कैसर राजे लै मामलें दैणै रौ हक आमुकै आसती कि नाई? 23 यीशुए तिउंरी चालाकी सौमझी गो ई, और तिउंलें बोलौं, 24 "मुकै एक सिक्का देखाळौं और बोलौं, एस सिक्के दी कासरौं नाऊं और फोटु आ छापौं औन्दौ? तिउंरे बोलौं रोमी बाँडे राजे रौ।" 25 यीशुए बोलौं, "तैबै ठीक आ" जो कैसर राजे रौ आ तेस कैसर राजे कै दैओ, पर जो परमेश्वरा रौ आ तेस सिर्फ परमेश्वरा लै दैओ।" 26 सै लोग रै सामनै एजी बुशा दी यीशु पाकडी ना बौला, और तेसरें जवाबा शुणीयौं चुटुकवार थाके।

दूजी बारें पैदौ हुणौ और शादी
(मती 22:23-33; मरकुस 12:18-27)

27 तैबै सदुकी लोग जो इणौ मानाई कि जुण मौरा ई सै जीऊंदै नाई हुन्दै, तिउं मांझीयै कु कुछ आदमीऊ ऐ यीशु कारे आशीयौं पुछौ, 28 "ओ गुरु, मुसा गुरुए आमुलें इणौ लिखौं आ, कि अगर कासरौं भाई, शादी-शुदा औइयौं बिण ओलादीए मौरा लौ, ता तेसरौं भाई तेसरी छेउडी आइलें शादी कौरालौ, और आपणें भाई कालें वंश पैदौं कौरा। 29 सात भाई थै, पैहलौं भाई शादी कौरीयौं बिणा ओलादीयै मौरी गो आ, 30 तैबै दुजे भाईए तियां विधवा आइलें शादी की पर सेऊ भी बिणा ओलादीए मौरी गो, 31 तैबै एक- एक कौरीयै सारै भाईऊए तिंरे विधवा आइलें शादी की और सारै बिणा ओलादीए मौरी गोए। 32 और बासीयै सं विधवा भी मौरी पोरु? 33 आबै आमु आइलें इणौ बोलौं, 'जेबे सै सारै जीऊंदै औलें ता, तियां ले कासरी छेउडी बोला ई? कैलैकि तिउं साता भाईऊ ऐ तियां आइलें शादी की थी?" 34 यीशुए तिउंलें जवाब दैओ, "शादी ता इयें धौतरी माथे आदमीऊ लै औआई। 35 पर आशणें वालें बोग्तै, इणौं कुछ ना हुन्दौं। कैलैकि जो मौरी औन्दै मांझीया कु जीऊंदै हुणें लायक लोग ई; सेजै जुगा दी तिंरे ना ता आदमी शादी कौरदें और ना छेउडी शादी लै दैदें। 36 और सै तेथ बासीए केबी ना मौरदें। कैलैकि सै परमेश्वरा रै दुता बाशीयै हुणे ई। जीऊंदै हुइयौं तिउंलें परमेश्वरा री सन्तान बोलाई। 37 पर मौरी औन्दै जीऊंदै हुआई कि नाई, एथरें बारें दी शुणौ; मुसा गुरुए भी ऐ बुशें साबित की आ, जैबै तिणीए तिउं झाडी रै बारें दी लिखौं जो तिणीए परमेश्वरा री बौरसाई ऐन्दी आगी कौरी जौलदें देखी आ। और मुसा गुरु अब्राहमा रौ परमेश्वर, इसाहक और याकुबा रौ परमेश्वर कौरीयै औटावा थौं, जो कई साल पैहलें मौरी गोए थै। 38 और सेऊ जीऊंदै रौ परमेश्वर आ, मौरी औन्देऊ रौ नाई भी नाई। परमेश्वरा कालें सै सारै जीऊंदे ई। 39 तिंरे मौजूद यहूदी शास्त्रीऊ मांझीया कु काइएउए बोलौं, "गुरुजी तुमुए ठीक बोलौं।" 40 तेथ बासीयै कासी री भी प्रभु यीशु कु केज्री बूश पूछणे री हिम्मत नाई रौई।

मसीह कासरौं छोहरु आ?
(मती 22:41-46; मरकुस 12:35-36)

41 तैबै यीशुए तिउंकु पुछौं, "मसीही लै दाऊदा री सन्तान कैलें बोलाई?" 42 कैलैकि दाऊदें आपु भजन सहिता री किताबी दी बोलौं आ, "प्रभुए मैरें प्रभु लै बोलौं।" 43 मेरी सुलटी भीलें बोश, जेबी झाऊं हाऊं तैरें दुश्मनु तेरी लाता थालें ना कौरौ।" 44 दाऊद ता तेसलें प्रभु बोला आ; तैबै मसीह दाऊदा री सन्तान किणौ हुई सौका?

शास्त्रिउ कु बौचियौं रोएउ
(मती 23:1-36; मरकुस 12:38-40)

45 जेबी सारै लोग बुशें शुणदें थै लागे औन्दै, तेबी यीशुए आपणें चलेऊ लै बोलौं, 46 "इऊं यहूदी शास्त्रीउ कु बौचियौं रोएऊ।" जासकै लाम्बै-लाम्बै जुड़कै भीडीयौं घुमणौं आचूछौं लागा सा। जेबी सै बजारा दी घुमा ई तिउंकें आचूछौं लागा कि लोग तिउंके झुकियौं ढाल कौरा। धार्मिक खुम्बली और जियै धाम दिआई तिंरे भी सै चाहा ई कि आमु आचूछी और पहली जागहा

दी बोशाला तिंरे तिउंकें आचूछौं लागा आ। 47 पर सै विधवा छेउडी रै धोर-बार लुटा ई और देखाउणा लै सै काफी बौकता झाऊं प्राथना कौराई; इणें लोग भौरी बाँडी सौजा पा ई।

गरीब विधवा रौ दान
(मरकुस 12:41-44)

21 जेजै बोग्तै यीशु परमेश्वरा रें घौरा दी थौं, तेबी तिणीए सेठ आदमी पेटी दी आपणी भंटा पाइदें देखौं। 2 और तिणीए विधवा भी तिंरे भंटा री पेटी दी दुई दामडी पाइदें देखी। 3 तैबै यीशुए बोलौं, "हाऊं तुमुलें सौचूचौं बोलाऊ कि इयें गरीब विधवें सौभी कु जादी भंटा देई आ। 4 कैलैकि इऊं सौभीयै ता आपणी भौरी कौमाई कु सिर्फ थोडी भंटा परमेश्वरा लै देई। पर इयें गरीब विधवें आपणी जिन्दगी री सारी कमाई भंटा दी पाई आ।

परमेश्वरा रै घौरा रै विनाशा री भविष्यवाणी
(मती 24:1,2; मरकुस 13:1,2)

5 जेबै कुछ चेलें परमेश्वरा रें घौरा रें बारें दी बुशें लाईदें थै लागे औन्दै, कि एऊ घौर बांठणें पात्थरा कौरीयै और भंटा री देई ऐन्दी जिजा कौरीयै किणौ बांठणौं आ चाणौं औन्दौं। तैबै यीशुए बोलौं, 6 "इणें दीन आशणें ई जेजै दिना दी जो तुमै देखदे ई लागे औन्दै, इऊं मांझीया कु पात्थरा माथे पात्थर भी ना रौउणें। सब कुछ ढालीयौं नाष कौराई।

मुसीबत और क्लेश
(मती 24:3-14; मरकुस 13:3-13)

7 तैबै तिउं चलेउए यीशु कु पुछौं, "ओ गुरु" इणौं केबी हुणौं आ? और इऊं बुशें पुरी औन्दी बारे का निशाण औआई? 8 यीशुए बोलौं, 'बौचियौं रोएऊ तुमै कासी कु ठौगाइएऊ नाई। कैलैकि कई लोग मैरें नावां कौरीयै आशीयौं बोलाई कि हाऊं मसिहा ऊ सेजौं बोग्त आशी गो आ। तैबै तुमै तिउं पिछु ना डेवेऊ। 9 जेबी तुमै शुणालें कि जागहा-जागहा दी लडाई-झौगडें ई हुन्दै लागौ औन्दै तेबी तुमै घाँबराएऊ नाई। कैलैकि इयें बुशें पैहलें हुणी जुरुरी ई। तैबै भी सेजौं बोग्त आखरी नाई हुन्दौं। 10 तैबै यीशुए बोलौं, "एकी जाती रें लोग दुजी जाती रें लोग रौ विरोध कौराई। एक देश दुजे देश रौ विरोध कौरा। 11 भौरी जागहा दी बाँडे-बाँडे भुईचल हुणेई और जागहा-जागहा दी काल पौडने ई और बाँडी बिमारी हुणी। सौरगा दी डराऊंदी बुशें और बाँडे-बाँडे निशाण परगट हुणे ई। 12 पर इऊं सब बुशें हुणे कु पैहलें सै मैरें नावां रें कारण तुमु पाकडा ई और तंग कौरीयौं धार्मिक खुम्बली दी निआं ई और जेला दी पा ई, और राजेऊ और जजा कारे निआंई। 13 एऊ तुमुकें मैरें बारें दी गवाही दैणै रौ मौकौ औआ सा। 14 और तुमै जवाब दैणा लै पैहलें कु अपने जीवा दी तयारी नाई कौरनी और ना फीकर कौरनी, 15 कैलैकि, हाऊं तुमुलें इणी बुद्धी दिआऊ और तुमारें मुआं कु इणी बूश बोलावा ऊ कि तुमारें कोई भी दुश्मन तुमारौं सामनौं नाई कौरी बौलदौं, 16 इदरा झाऊं कि तुमारें मां-बाब, भाई-भौगीयाल, और रिश्तेदार तुमारें गोश्टण भी तुमु पौकडावा ई और कई ता झंगवा भी ई। 17 मैरें नावां रें कारण सारें लोग तुमु आइलें दुश्मनी छाडाई। 18 तैबै भी तुमारें मुंडा रौ एक भी बाल बांगो नाई औन्दौं। 19 और आपणी सौबरी कौरीयै तुमै आपणें प्राण बचाई छाडा ई।

यरुश्लेमा री बिनाशा री भविष्यवाणी
(मती 24:15-21; मरकुस 13:14-19)

20 जेबै तुमै यरुश्लेम भौरी लोग मांझीयै घेरु औन्दै देखालें तैबै तुमै सौमझेऊ कि तेसरें नाष हुणें रौ बोग्त आशणें वालौ आ। 21 तैबै जेजै लोग यहूदी परदेशा दी औलें तिउंरें बौचणा लै पहाडी दी जा डेऊणौं, और जुण औलें यरुश्लेम शहरा बित्तें तिउंरें निकलेऊ बाइरें, और जुण औलें गांवा दी तिउंरें ना डेवेऊ शहरा लें। 22 कैलैकि एजै दीन बदला निणा रें दीन हुणे ई। ताकी सै बुशें जो धर्म शास्त्रा दी लिखी ऐन्दी, सै सारी पुरी हुआ ई। 23 सेजै दिना दी तिउं छेउडीऊ लै फिटकार जुण गौरकें जीवा री औली और जासकें दुधा पिणें वालें लोलडें औलें। कैलैकि सारी धौतरी माथे भौरी दुःख हुणौं और

इऊं लोगु माथे परमेश्वरा रै भौरी रोश आशणे ई। ²⁴ तिऊं तलवारी कौरीए झांगाई और सब देशा रै लोगु मांझीयै कैदी बाशी बानीयौ आणाई जेबी झाऊं दुजी जाती रौ बौग्त पुरौ ना हुआ लौ तेबी झाऊं यरुश्मेम दुजी जाती रै लोगु थालीए दबाउआ ई।

आदमी रै छोहरु रौ दूजी बारै आशणों

(मती24:29-31; मरकुस13:24-27)

²⁵ सूरज जून और तारेऊ दी निशाण दिशाई और धौतरी दी सारै लोगु माथे मुसीबत आशणी आ। कैलैकि सै समुन्दरा रै छालै और शोरा कौरीए डोराई। ²⁶ दुनीया दी आशणे वाली मुसीबत पोखदै-पोखदै लोगु रै जीऊ घोबरा ई। कैलैकि सौरगा री सारी शक्ती हिलाईआ ई। ²⁷ तैबै लोग मूं जुण परमेश्वरा री तौरफा कु भेजौ ओन्दो ऊ पुरी शक्ति और बौडे शाना कौरीयै बादला माथे आशदै देखा ई। ²⁸ जैबै इणो हुन्दै लागा लौ तैबै तुमै खौडै हुईयौ सौरगा भीलै देखेऊ कैलैकि तेबी तुमारौ छुटकारौ हुणौ आ।

फेडु रै पेड़ा रौ उदाहरण

(मती24:32-35; मरकुस13:28-31)

²⁹ यीशुए तिउंके एक औनैणे देईयौ बोलौ, "फेडु रौ पेड़ और सारै पेड़ देखौ, ³⁰ यीशुए तिउंके एक औनैणे देईयौ बोलौ, "फेडु रौ पेड़ और सारै पेड़ देखौ, ³¹ जैबै तिऊंदी मिण्डु निकलाई तैबै तुमुकै तिऊं देखीयौ पौतौ लागा कि आबै गौरमी आशणै वाली आ।" ³² तिणी जेबी तुमै इऊं मुसीबता री बुशै औन्दै देखा लै तैबै तुमै सोमझेऊ कि परमेश्वरा रौ राज आशणै वालौ आ। ³³ हाऊं तुमुलै सौच्यौ बोलाऊ कि जेबी झाऊं ऐ सारी बुशै पुरी ना औली, "तेबी झाऊं एजी पिडी रौ नाष नाई औन्दौ।

उजी रौएऊ

(मती24:36-44; मरकुस13:32-37)

³⁴ सौरग और धौतरी टौली सौका ई पर मेरी बुशै केबी ना टौलदी। ³⁵ कैलैकि सेजौ दीन धौतरी माथे सब रौइणै वालेऊ मांझीयै इणै कौरी खरकचार आशणौ आ। ³⁶ शुणौ ऊजी रौ और हर बौग्तै रोज प्राथना कौरदै थाकौ लागी ताकी तुमै इऊं सारी मुसीबता कु बौचणै और आदमी रै छोहरु रै सामनै खौडी औणै जोगी बाणा। ³⁷ यीशु हर दिना दी परमेश्वरा रै घौरा दी शिक्षा दिआ थौ और राची लै डिआ थौ जैतूना री पहाडी दी रौइंदै। ³⁸ और दोउत राची सारै लोग उठीयौ यीशु री शिक्षा शुणदै परमेश्वरा रै घौरा दी यीशु काए आशा थै।

यीशु रै बिरोधा दी यीशु पकुड़ना लै चाल

(मती26:1-5; मरकुस14:1,2; यूहन्ना11:45-53)

22 बिण संजेडे री रोटी रौ साजौ, जेथरी शुरुआत फसह रै साजै कु औआ थी, सेऊ साजौ नौजदीक आशी गौ आ। ² सेजे बौग्तै मुख्य याजक लोग और यहूदी शास्त्री यीशु पाकुड़नै और झांगणै रौ मौकौ लोडदै थै लागै औन्दै, पर सै लोगु कु डौरा थै।

यहूदा रौ विश्वासघात

³ तैबै शैतान यहूदा भीतै आशौ, जासलै इस्करियोती बोला थै और सेऊ यीशु रै बारह चेलेऊ मांझीयै कु एक थौ। ⁴ सेऊ महायाजकु और परमेश्वरा रै घौरा रै चोकीदार रै मुख्य काए डैओ। ताकी यीशु पाकुड़नै रै तरीका रै बारे दी चौपड़ा। ⁵ वे भौरी खुश हुए, और तेसलै इनाम देंगै रौ वाइदौ भी कियो। ⁶ यहूदा सेजी बुशा लै तैयार हुई गौ, और तेमी कु सेऊ यीशु पकड़ाउणा री ताकी दी रौ, कि जेबी यीशु काए भौरी भीड ना औली, सेजे बौग्तै सेऊ, यीशु पौकड़ाई बोलौ।

चेलेउ आइलै आखरी बार साजै री रोटी खाणी

(मती26:17-25; मरकुस14:12-21; यूहन्ना13:21-30)

⁷ तैबै बिणा संजेडे री रोटी रौ साजै रौ दीन आशौ जेबी यहूदी लोगु रै हर टबर फसह रै गाबडु री बली चड़ावा थै। ⁸ यीशुए पतरस और यहूना इणै बोलीयौ भेजे कि, "डैओ आमारै फसह री रोटी खाणै रौ इन्तजाम कौरौ।" ⁹ चेलेउए यीशु कु पुछौ, "गुरु जी तुमै किये चाहा ई कि आमै साजै री रोटी रौ इन्तजाम कौरौ?" ¹⁰ यीशुए तिउंलै बोलौ, "देखौ शहरा दी पौउंचीयौ तुमुकै एक आदमी मिला काछा माथे पाणी री बोटलोई कौरौ डेउंदै लागौ औन्दौ, जेजे घौरा दी सेऊ डिआ लौ, तुमै भी तेस पिछु सेजे घौरा दी डेवेऊ।" ¹¹ और तेस घौरा रै स्याणै लै बोलेऊ; गुरु ताउंलै इणौ बोला कि मुकालै तैयार कियो औन्दौ कौमरौ केजौ आ? जिणै हाऊं आपणै चेलेऊ आइलै फसह री रोटी खाऊ।" ¹² तैबै सेऊ तुमुकै माथली मंजली दी सजाओ औन्दौ कौमरौ देखाला, तिरे तुमै फसह री रोटी रौ इन्तजाम कौरैऊ। ¹³ तैबै जिणौ यीशुए तिउंलै बोलौ थौ, तिऊं चेलेउए तिरे डेईयौ तिणौ देखौ, और तिउंए तिरे फसह री रोटी तैयार की।

प्रभू भोज

(मती26:26-30; मरकुस14:22-26 1 कुरुन्थियों11:23-25)

¹⁴ जेबी रोटी खाणै रौ बौग्त आशौ ता यीशु आपणै बारह चेलेऊ आइले रोटी खान्दै बोशौ। यीशु चेलेउ आइलै आखरी बारै रोटी खा आ ¹⁵ तैबै यीशुए तिउंलै बोलौ, "मेरी बौडी इच्छा थी कि हाऊं दुःख भोगणे कु पैहलै तुमु आइलै बोशीयौ एजे फसह रोटी खाऊ।" ¹⁶ कैलैकि हाऊं तुमुलै बोलाऊ, "कि जेबी झाऊं इयै बुशै परमेश्वरा रै राजा दी पुरी नाई औआली, तेबी झाऊं हाऊं इयै फसह री रोटी केबी ना खान्दौ।" ¹⁷ तैबै यीशुए अंगुरा रै रसा रौ खोरु चुंगौ और परमेश्वरा रौ धन्यवाद की इयौ, आपणै चेलेऊ लै देइयो बोलौ एस आपु मांझीयै बांटौ। ¹⁸ कैलैकि हाऊं तुमु लै बोलाऊ कि जेबी झाऊं परमेश्वरा रौ राज नाई आशा लौ तेबी झाऊं हाऊं अंगुरा रौ रस केबी ना पिन्दौ। ¹⁹ तैबै यीशुए रोटी चुंगी और परमेश्वरा रौ धन्यवाद कौरौयौ चोडी और इणै बोलीयौ आपणै चेलेऊ के देई कि इयौ मँरौ जीसम आ जो तुमुलै दैओ औन्दौ, मुं याद कौरना लै इणौ कौरैऊ।" ²⁰ इणै कौरौयै रोटी खाइयौ यीशुए अंगुरा रै रसा रौ खोरु भी इणै बोलीयौ दैओ, "एस अंगुरा रौ रस तुमै मँरौ लोऊ सौमझौ जो भौरी लोगु तिउंरै पापा कु बौचरुणा लै बौइणै वालौ आ। मँरै मौरनै कु परमेश्वर लोगु आइलै एक नौए रिशतै रौ वादौ पाकौ कौरा आ। ²¹ ंपर देखौ मुं पौकड़ाउणै वालौ इदै आ आमु आइलै रोटी खान्दै लागौ औन्दौ। ²² कैलैकि हाऊं जुण परमेश्वरा री तौरफा कु भेजौ औन्दौ ऊ मँरौ मौरनौ ता इणी भी आ, जिणौ धर्मशास्त्रा दी आ लिखौ औन्दौ। पर फिटकार आ तेस आदमी लै जुण मुं पकड़ावा आ। ²³ तैबै सै चेले आपु मांझीयै एकी दुजे कु पुछदै लागै कि आमुं मांझीयै कुण औलौ जुण इणै काम कौरा?

बौडौ कुण आ? एथ माथी वाद-विवाद कौरणौ

²⁴ तैबै तिऊंरौ झौगडौ भी हुओ कि आमु मांझीयै कु बौडौ कुण आ? ²⁵ यीशुए तिउंलै बोलौ, "दुजी जाती रौ राजे आपणै लोगु माथे राज कौराई, और तिऊं माथे हक छड़ाई, और सै तिउंलै फाइदै वालौ बोलाई।" ²⁶ पर तुमै इणौ ना बोलेऊ, जुण तुमु मांझीयै बौडौ आ तिणीयै छोटो बौणनी, और जुण आ परधान तिणीए बौणनी सेवा कौरनै वालौ। ²⁷ कैलैकि बौडौ कुण आ सेऊ जुण रोटी खान्दै आ बोशौ औन्दौ या सेऊ जुण तिउंरी सेवा कौरदै आ लागौ औन्दौ? का सेऊ नाई जुण रोटी खान्दै आ बोशौ औन्दौ? और हाऊं तुमु मांझीयै सेवा कौरनै वाले जीणो ऊ। ²⁸ और तुमै भी मुं आइलै परखणै रै बौग्तै दी सदा रोए ई। ²⁹ जिणौ मँरै बाबै परमेश्वर मुकालै राज दैओ औन्दौ तिणी हाऊं भी तुमु कालै राज दिआऊ। ³⁰ ताकी तुमै मँरै राजा दी मुं आइलै बोशीयौ खा पिआलै और राजगादी माथे बोशीयौ इस्त्रायला रै बारह गोत्रा रै लोगु रौ फैसलौ कौरा।

पतरसा रै मुकुरना री भविष्यवाणी
(मती26:31-35; मरकुस14:27-31 यूहन्ना13:36-38)

31 प्रभुए बोलौ, 'शमोन! ओ शमोन, "देख शैतानै तुमै गीऊं बाशी छांटणा लै मुकु मांगी गोरै। 32 पर मुइयें तैरें बारे दी परमेश्वरा कु औरज कौरी एरी आ ताकी तैरों विश्वास न खत्म ना हुआ। और जेबी तू पौरखणें बासिये, वापिस आशा लौ तेबी आपणै भाईऊ भी विश्वासा दी मजबूत कौरा। 33 शमोनै यीशुलै बोलौ, "प्रभु हाऊं ताऊं आइलै ज़ेला ई डेऊणा लै और मौरना लै भी तैयार ऊ। 34 यीशुए शमौना लै बोलौ, "हाऊं ताऊं लै बोलाऊ कि आज राची कुखड़े रै बाशणे कु पहेले आपणें मुंआ कु चिआ बारे बोला ई कि तू मुं नाई ज्ञाणदौ।

बटुओ, झोली, और तलवार

35 तैबे यीशुए आपणें चेलेऊ कु पुछा, "जेबी मुइयें तुमै बिण बटुए, बिण झोलै, और बिण बटुए भेजें थै का तुमुलै केजी जिजा री कामी हुई आ?" चेलेउए बोलौ! केजी जिजा री नाई।" 36 यीशुए तिउंलें बोलौ, "पर आबे ज़ासकें बटुवो ओलौ सेऊ आपकें निआलो, झोलौ भी निओ, और ज़ासकें तलवार नाई ओली सेऊ आपणें जुडकें बेचीयो खरीदा लौ। 37 कैलैकि हाऊं तुमुलै बोलाऊ, 'जो धर्मशास्त्रा दी आ लिखौ ओन्दौ कि सेऊ बुरे आदमीऊ आइलै गिणुओ ओन्दौ सेऊ मुलै पुरो हुणौ ज़रुरी आ, कैलैकि मैरें बारे दी लिखी ऐन्दी बुशें पुरी ओणें वाली आ। 38 चेलेउए बोलौ, "देख इदैं दुई तलवारी ई, यीशुए बोलौ मोकती ई।"

जैतून री टीरा माथी यीशु री प्राथना
(मती26:36-46; मरकुस14:32-42)

39 तैबे यीशु तेस कम्मरें कु निकलीयो रोज कै ज़िणौ जैतून नावां री पहाड़ी माथे डैओ, और तेसरें चेलें भी तेस आइलै चाल पौड़ें। 40 तिऐ पौउंचीयो यीशुए आपणें चेलेऊ लै बोलौ, "प्राथना कौरदै थाकौ लागी ताकी तुमै मुसीबता दी ना पौड़ा।" 41 सेऊ चेलेऊ कु थोडो दूर डैओ और धौनी घुंडें माथे टेकियो प्राथना कौरदै लागौ, 42 "ओ बाब, अगर तू चाह ई ता, मुकाए कु एस दुःखा रौ खोरु पोरु निऊं। तैबे भी मेरी नाई तुमारी मर्जी पुरी चाई हुई। 43 तैबे सोरगा कु एक दूत परगट हुओ, और तिणीए यीशुलै शक्ती देई। 44 यीशु भौरी दुःखी हुइयो प्राथना कौरदै लागौ, यीशु रै जीवा रौ दुःख एती बौडी गौ कि तेसरों पसिनौ मानौ लोऊ रें टिपु बौणीयो जौबिना माथे पौड़दै लागौ। 45 तैबे यीशु प्राथना कौरीयो उठौ और आपणें चेलेऊ काए आशौ पर निराशा रें कारण यीशुए सें चेलें सुतें ओन्दै देखें। 46 यीशुए तिउंलें बोलौ, "तुमै कैलें ई सुतदै लागें ओन्दै? "उठौ और प्राथना कौरौ" नाई ता मुसीबता ई पौड़ा ई।"

यीशु धोखे दी पाकुडनौ
(मती26:47-56; मरकुस14:43-50; यूहन्ना18:3-12)

47 जेबी यीशु प्राथना रें बारे दी थौ बोलदै लागौ ओन्दौ, तेबी लोगु री बौडी भीड तिऐ पौउंची गो ई। तिऊं बारहा चेलेऊ मांझीया कु एक चेलौ ज़ासरो नाऊं यहूदा थौ, तिऐं भिडा कु ओगाडी-ओगाडीयें थौ आण्डदै लागौ ओन्दौ। यहूदा यीशु खोबीयाऊंदै यीशु काए आशौ। 48 यीशुए तेसलें बोलौ, "ओ यहूदा का तू खोबु देइयो आदमी रौ छोहरु पौकड़ावा ई?" 49 यीशु रै साथीरु ऐ जैबे देखौ कि का हुणें वालौ आ, यीशु लै बोलौ "का आमै तलवार चलाउले? 50 तिऊं मांझीयें कु एकीए बौड़ें याजका रें नुकरा दी तलवारी री लाई और तेसरों सुलटौ कौन्थु काटौ।" 51 तेथ माथें यीशुए बोलौ, "बस आबे नाई कौरौ इणौ।" और यीशुए तेस नुकरा रौ कौन्थु छुँओ और चांगो कियो। 52 तैबे यीशुए परधान याजकु और परमेश्वरा रें घौरा रें चोउकीदारु रें मुख्ये और स्याणेऊ लै बोलौ, ज़ुण यीशु पाकुडदै थै आशें ओन्दै," का तुमैं डाकु सौमझीयो तलवारी और डिगें कौरीए ई मुं पाकुडदै आशें ओन्दै? 53 जेबी हाऊं परमेश्वरा रें घौरा दी हर दिना दी तुमु आइलै थौ तेबी ता तुमुए हाऊं पाकुडौ नाई; पर एजौ तुमारौ बौगत आ, और नयारें रौ हक आ।"

पतरसा रौ इन्कार
(मती26:57-68; मरकुस14:53,54,66-72; यूहन्ना18:13,14, 19-24)

54 तैबे तिउंरें यीशु पाकड़ीयो बौड़ें याजका रें घौरें निओ। और पतरस यीशु पिछु दूर-दूर थौ आण्डदै लागौ ओन्दौ। 55 चोकीदारु याजका रें गौडा दी आग जाली और फिदीआलें बोशी गोरै, पतरस भी तिऊं मांझीए आशीयो बोशी गौ। 56 एकी नुकराणीए आगी रें प्याशे दी पतरस देखौ और तेसलें बोलौ, "एऊ भी ता यीशु आइलै साथे ई थौ।" 57 पर पतरसे तिआं लै इणें बोलीयो इन्कार कियो, "ओ बौइण हाऊं ता एस नाई ज्ञाणदौ।" 58 थोडे बौगता बासीये तौरें एकी आदमीए पतरसा देखीयो बोलौ, "तू भी ता तिऊं मांझीया कु ई; पतरसे बोलौ, "ओ भाई, हाऊं नाई ऊ।" 59 करीब एकी घन्टै बासीये तौरें एक आदमी काठै कौरीये बोलदै लागौ, "एऊ भी ज़रुर यीशु आइलै थौ, कैलैकि एऊ गलीली आ।" 60 पतरसे बोलौ, "ओ भाई, हाऊं नाई ज्ञाणदौ कि तु का ई बोलदै लागौ ओन्दौ।" और सेऊ बोलदै ई थौ लागौ ओन्दौ कि तेबी कुखड़ो बाशौ। 61 तैबे प्रभु यीशुए पतरसा भीलै मुडीयो देखौ और पतरसा कें सें बुशें याद आशी गो ई, जो यीशुए पतरसा लै बोली थी कि, "आज कुखड़े री बाचा देणें कु पहेले चिया बारें तू मैरौ इन्कार कौरा ई।" 62 सेऊ बाइरें देइयो डीकरी-डीकरीयो लेरदै लागौ।

यीशु री बेइज्जती
(मती26:67,68; मरकुस14:65)

63 आबे ज़ुणी चोकीदारुए यीशु पाकड़ौ ओन्दौ थौ, सैं यीशु री मज़ाका उडाइयो यीशु पिटदै लागै। 64 और यीशु री आखी माथे हाथा लाइयो पुछदै लागें कि, "भविष्यवाणी कौरीयो बोल कि ताऊंकी कुणीए लाई आ।" 65 और तिउंरें यीशु री भौरी बेइज्जती की और यीशु रें विरोधा ई भौरी बुशें बोली।

बौडी खुम्बली रें सामने यीशु
(मती26:59-66; मरकुस14:55-64; यूहन्ना18:19-24)

66 जैबे दुजौ दीन हुओ तैबे लोगु रें स्याणें, परधान याजक और यहूदी शास्त्री कौठें हुए और यीशु आपणी खुम्बली दी आणीयो तेसकु पुछदै लागै, 67 "अगर तु मसीहा ई ता आमु आइलै बोल।" यीशुए तिउंलें बोलौ, "अगर हाऊं तुमु आइलै बोललै ता तुमैं विश्वास नाई कौरदै; 68 और अगर पुछलै, ता तुमुए जवाब ना देंगौ। 69 पर इबी कु आदमी रौ छोहरु जो सौभी कु शक्ती वालौ आ, परमेश्वरा री सुलटौ भीलें बोशी थाका सा। 70 एजी बुशा माथे सारेऊ ऐ बोलौ, "तैबे का तु परमेश्वरा रौ छोहरु ई?" यीशुए तिउंलें बोलौ, "तुमैं ठीक ई बोलाई कैलैकि हाऊं परमेश्वरा रौ छोहरु ऊ।" 71 तैबे तिउंरें बोलौ, "आमुके आबे तौरें गवाही री ज़रुरत नाई आसती कैलैकि आमुए आपु ई एसरें मुआ कु बोलदै शुणी गौ आ।"

पिलातुसा रें सामने यीशु
(मती27:1,2, 11-14; मरकुस15:1-5; यूहन्ना18:28-38)

23 तैबे सारी खुम्बलीउए उठीयो यीशु पिलातुसा काए नीओ जो रोमी सरकारा रौ हाकीम थौ। 2 सैं तेभी यीशु माथे इलजाम लाइदै लागै, कि "एउ आदमी आमारे लोगु बहकाऊंदै लागौ ओन्दौ। और रोमी कैसरा कें मामलें दैणा लै मना कौरा और आपुलें मसीहा, राजौ बोला। 3 पिलातुसे यीशु कु पुछौ, "का तु यहूदी लोगु रौ राजौ ई?" यीशुए तेसलें जवाब देंओ, "तू आपु ई बोलदै लागौ ओन्दौ।" 4 तैबे पिलातुसे परधान याजकु और लोगु लै बोलौ, "मुके एस आदमी दी केजी भी गौलती नाई दिशदी।" 5 पर सैं खुम्बली रें लोग सौखती कौरी बोलदै लागै, "एऊ गलील परदेशा कु इदैं झाऊं और सारें यहूदिया देशा दी परचार कौरीयो लोगु बहकाऊंदै लागौ ओन्दौ।" 6 इणें शुणियो पिलातुसे पुछौ, "का एऊ आदमी गलीली आ?" 7 इणें ज़ाणियो कि एऊ हेरोदेसा रें परदेशा रौ आ तैबे सेऊ हेरोदेसा काए भेजी ऐरो आ, कैलैकि हेरोदेस सेजें बौगते यरुश्लेमा दी थौ।

हेरोदेसा रै सामने यीशु

8 हेरोदेस यीशु देखीयो भोरी खुश हुआ, कैलैकि तिणीए यीशु रै बारे दी शुणौ थौ सेऊ तेस और तेसरें चमत्कार देखणे चाह थौ। 9 हेरोदेस यीशु कु भोरी सवाल पुछदै थौ लागौ औन्दौ, पर यीशुए तेसलै कुछ भी जवाब नाई दैऔ 10 परधान याजक औरशास्त्री खौडै हुइयो यीशु माथे तौना मोना कौरीए झुठै आरोप थै लाईदै लागै औन्दै। 11 तैबै हेरोदेस आपणै सिपाईउ आइलै यीशु री बेइज्जती की और मजाक उड़ाओ, और चोगै-बोगै भिडाइयो पिलातुसा काए बापिस भेजौ 12 हेरोदेस और पिलातुस जो पैहलै एकी दुजै रै दुश्मन थै, सेजै दिने सै गोश्टण बौणी गोए।

पिलातुसा रै जरीए यीशु लै मौरनै री सौजा

(मती27:15-26; मरकुस15:6-15; यूहन्ना18:39-19:16)

13 पिलातुस परधान याजक, धोर्मा रै गुरु और सारै लोग आपु काए औटाए और तिउलै बोलौ, 14 "तुमुए एऊ आदमी बहकाऊणै वालौ चाणियो मुकाए आणौ आ, और देखौ, मुइए तुमुकाए एउ पुछौ और पोरखौ, पर जेजी बुशा रौ तुमै एस माथे आरोप ला ई सेजी बुशै रै बारे दी मुइए कुछ भी ना देखौ; 15 और ना हेरोदेसै कैलैकि तिणीए एऊ यीशु मुकाए वापिस भेजी गौ आ, और देखौ इणीए कुछ भी नाई कियो कि हाऊ एसलै मौरनै री सौजा देऊ। 16 एथीलै हाऊ एस पिटाइयो पोरु छाडाऊ। 17 (पिलातुस साजै रै बौगै तिउंकालै एक कैदी छाडना लै मजबूर थौ और तादु बाटै साजौ नजदीक थौ)h 18 तैबै सारै मिलियो जोरै-जोरै बोलदै लागै, "एसरौ काम खात्म कौरौ आमु कालै बरअब्बा नांवा रौ कैदी छाडौ।" 19 बरअब्बा यरुश्लेम शहरा दी लोगु पिटाऊणै और खुना रै केसा दी कैदा दी थौ पाओ औन्दौ। 20 पर पिलातुस यीशु छाडना री ताइए भीडा रै लोग तोएँ समझाए, 21 पर भीडा रै लोग चिन्नां दे थाके लागी और बोलदै लागै कि, "यीशु कूसा माथे चौडाओ कूसा माथे।" 22 पिलातुसै चीजी बारे तोएँ बोलौ। "कैलै इणीए का बुराई की आ? मुइयें ज्ञाणणै री आज्ञा लायक केजी भी बुश एसदी नाई देखी। एथीलै हाऊ एस पिटाइयो पोरु छाडाऊ।" 23 पर सै जोरै-जोरै चिन्नाइयो पिछे पौडी गोए कि एऊ कूसा माथे चाई चौडाउओ। और तिउं रौ चिन्नाणौ पिलातुसा माथे भारी पौडी गौ आ। 24 और पिलातुसै आज्ञा देई, जिणौ भीड लागी एन्दी बोलदै तिणौ कौरौ। 25 तिणीए सेऊ आदमी जो खून और आदमी पिटाउणा रै केसा दी जेलाइ थौ पाओ औन्दौ और जो भीडा रै लोगुए मांगौ, सेऊ छाडी गौ, और यीशु भीडा रै लोगु कै देई ऐरौ जिणौ सै चाह थै।

यीशु रौ कूसा माथे चौडाऊणौ

(मती27:32-44; मरकुस15:21-32; यूहन्ना19:17-27)

26 जेबै सै यीशु निंदै थै लागै औन्दै, तैबै तिउं भिडा रै लोगुए एक शमोन नांवा रौ आदमी पाकडौ जुण कुरैन देशा रौ रौइणै वालौ थौ, तेसकु कूस चुंगाओ और बोलौ यीशु पिछु आंड। 27 लोगु री बौडी भीड यीशु पिछु हुई गो ई और तिउं मांझीयै भोरी छेउडी भी थी, जुण यीशु लै हिकडै पिटी-पिटीयो लेरा थी। 28 यीशुए तिउं छेउडी भीलै मुडीयो बोलौ, "ओ यरुश्लेमा री छोटीयो, मुलै नाई लेरौ, पर आपणेऊ लै और आपणै छोहरु लै लेरौ। 29 कैलैकि देखौ, सै दीन आशणै वाले ई जेजे दिना दी लोग बोला लै, भौली सै मां ज़ासरै लोलडै ना हुरे, और सेऊ गौरब ज़ासकु छोहरु ना हुरे, और सै चुपली जुणीयै दूध नाई पयाओ।" 30 सेजे बौगै "सै धारा टिरा लै बोला लै आमु माथे दौलौ, और टिबु लै बोलालै आमु चोराओ।" 31 कैलैकि जेबै सै हौरै पेडा आइलै इणौ कौराई ता शुके पेडा आइलै का कुछ ना कौरालै?" 32 यीशु आइलै ज्ञाणणा लै दुई आदमी ओर भी निएँ जो भोरी गुनाही थै। 33 जेबै सै सेजी जागहा दी पौउचै जेजी जागहा लै खोपडी री जागहा बोला थै, तिरे यीशु और सै बुरै आदमी, एक यीशु री सुलटी भिलै और दुजौ उलटी भिलै कूसा माथे चौडाई गोए। यीशु कूसा माथे 34 तैबै यीशुए बोलौ, "ओ बाब इऊं माफ कर, कैलैकि इयै नाई ज़ाणदै कि इयै का ई लागै औन्दै कौरदै।" और तिउंए पर्ची पाइयो यीशु रै जुडके बांटी गोए। 35 लोग खौडै-खौडै देखदै थै लागै औन्दै, और धर्मा रै गुरु भी मजाक कौरीयो बोला थै; इणीए दुजै बौचाए

ई, अगर एऊ परमेश्वरा रौ मसिहा, और चुनौ औन्दौ आ, ता आपु ता बौचीयो देख। 36 और सिपाईऊ ऐ भी नजदीक डेइयो यीशु रौ मजाक उड़ाओ और पिणा लै कौडुए अंगुरा रौ रस दैओ, और जोरै ओटाइयो बोला थै, 37 "अगर तू यहुदिया रौ राजा ई, ता आपु ता बौच।" 38 और यीशु रै मुंडा माथे कूसा दी एक तोकती भी थी लाई ऐन्दी, जेथदी इणौ थौ लिखौ औन्दौ, "एऊ यहुदिकु रौ राजा आ।"

मन बदलनै वालौ कुकर्मा

39 जुण दुई कैदी यीशु री उलटी और सुलटी भिलै थै कूसा माथे चौडाए औन्दै, तिउं मांझीए कु एकीए यीशु री बेइज्जती कौरीयो बोलौ, 'का तू मसिहा नाई ई? आपु भी बौच और आमु भी बौचाऊ। 40 एजी बुशा माथे दुजै कैदीयै तेसलै डांटीयो बोलौ, का तू परमेश्वरा कु भी ना डौरदै? तु भी ता सेजी सजा भुगतदै ता ई लागौ औन्दौ। 41 और आमै ता कानुना कौरीए सौजा पाइदै लागै औन्दै, आमुलै ता आपणै बुरै कामा री सजा मिलदै लागी ऐन्दी, पर इणीए ता केजौ भी बुरौ काम नाई कियो। 42 तैबै तिणीए यीशु लै बोलौ, "ओ यीशु जी, जेबी तू आपणै राजा दी आशा लौ ता मैरौ ध्यान भी छाडै।" 43 यीशुए तेसलै बोलौ, "हाऊं ताउलै सौच्यौ बोलाऊ, कि आज ई तू मुं आइलै सौरगा। दी ओआई।"

यीशु रै प्राण छाडनै

(मती27:45-56; मरकुस15:33-41; यूहन्ना19:28-30)

44 दुसकौ बौग हुई गौ आ। बारह बाजै कु चिआ बाजै झाऊं सारै देशा दी निआरौ पौडी रौ। 45 सुरजा रौ प्याशौ भी बन्द हुआ, और परमेश्वरा रै घौरा रौ पौरदै बीचा कु चिरुईयो दुई भिलै हुआ। 46 तैबै यीशुए जोरै बोलौ, "ओ बाब, हाऊं आपणी आत्मा तैरै हाथा दी सौमभाला ऊ।" एती बोलीयो यीशुए आपणै प्राण छाडै। 47 जेबै रोमी सिपाईउ रौ आफसर इणौ सारौ देखदै थौ लागौ औन्दौ तैबै तिणीए परमेश्वरा री बौडाई कौरीयो बोलौ, "सौच्यी एऊ आदमी धर्मा थौ। 48 भीडा रै सारै लोग जो यीशु री कूसा री सौजा देखदै थै आशै औन्दै सै भोरी दुःखी हुईयो और आपणै हिकडै पिटियो आपणै घौरै डेई गौ ऐ। 49 पर यीशु रै ज़ाणनै वाले ज़ास आइलै गलील इलाके री छेउडी भी थी आशी एन्दी, सै दूर खौडी हुईओ इणौ सारौ कुछ थी देखदै लागी एन्दी।

यीशु ओडाची दी छाडनौ

(मती27:57-61; मरकुस15:42-47; यूहन्ना19:38-42)

50 तिरे एक युसुफ नांवां रौ आदमी थौ, सेऊ यहूदी फैसलै कौरनै वाली खुम्बली रौ एक नेतौ थौ, सेउ आच्छौ और धर्मा थौ। 51 सेऊ तिउंरी सलाह और इणै कामा से राजी नाई थौ। सेऊ यहुदिया रै इलाके अरिमतिया रौ रौइणै वालौ थौ, और सेऊ परमेश्वरा रै राजा आशणै री आशी दी थौ। 52 सेऊ पिलातुसा काए डैओ और क्रिया कर्म कौरना लै यीशु रौ मौडौ मांगौ; 53 और युसुफे यीशु रौ मौडौ, कूसा कु उतारीयो मखमला री चादरी दी मेटौ और एकी ओडाची दी छाडौ जो डोकै दी थी खोदीयो चाणी ऐन्दी तेथदी पैहलै कोई भी नाई थौ छाडौ औन्दौ। 54 एजौ बौग तैयारी रै आधे दिना बासीयै रौ थौ और आरामा रौ दीन शुरु हुणै वालौ थौ। 55 तिउं छेउडीऊरै जो यीशु रै पिछाडी-पिछाडीयै आशी थी तिउंए सै ओडाची देखी और इणौ भी देखौ कि एऊ मौडौ किणै तरिके कौरीए छाडौ औन्दौ। 56 तैबै सै छेउडी आपणै घौरै डेई और यीशु रै मौडै दी लाइणा लै खुशबुदार चिजै और मैहगै वालौ तेल कियो। पर जेबै तिउंके यीशु रै मौडै दी लाइणा लै सारी चिजै तैयार हुई, तेथ बासीयै आरामा रौ दीन शुरु हुई गौ आ। और तिउंए परमेश्वरा री आज्ञा कौरीए पुरै दिना दी आराम कियो।

यीशु रौ दूजी बारै जिउंदौ हुणौ

(मती28:1-10; मरकुस16:1-8; यूहन्ना20:1-10)

24 पर सप्ताह रै पैहलै दिने दोउत राची सै छेउडी जुणीयै खुशबुदार चिजै और मैहगै तेल तैयार कियो थौ, तिउं चिजु कौरीयै ओडाची काए आशी। 2 तिउंए सेऊ पात्थर, जो ओडाची रै दारा दी थौ लाओ औन्दौ

एकी भिले घिसरौं औन्दौं देखौं। ओडाची रौं पात्थर घिसरौं औन्दौं 3 तैबे सै बितरै डेई पर तिरंये यीशु रौं मौडौं तिरै नाई देखौं। 4 सै छेउडी हैरान हुई गो ई, और सुंचदै लागी कि यीशु आइलै का हुआ औलौं? तैबे खरकचार दुई आदमी चोमकिले जुड़के भीडीयो आशै और तिरं काये खौडै हुऐ। 5 सै छेउडी डौरी गोई और मुंडा झुकाई खौडी रौई। तिरं दुई आदमीऊरे तिरंले बोलौं, "जो जीउंदौं आ, तेस तुमै मौरै औन्दै मांझीरे कैलै लोडाई?" 6 यीशु इदै नाई आ पर जीउंदौं हुई गो आ। का तुमुकै याद नाई आसती कि यीशुए तुमु आइलै गलील इलाके दी का बोलौं आ? 7 कि आदमी रौं छोहरु पापी रै हाथे सौंभाणनौं जरुरी आ और क्रुसा माथे चोडाइयो ज्ञाणणौं और चिजै दिनें जीउंदौं हुणौं आ। 8 तैबे तिरं छेउडीऊर कै याद आशी कि यीशुए एजी बुशै जरुर बोली थी। 9 और सै ओडाची काये कु वापिस आशी, सै बुशै तिरंये ग्यारह चलेऊ और ओरी सभौउके शुणाई। 10 जुणीयै इयै बुशे चलेऊ आइलै लाई सै मरियम मगदलीनी, योअना और याकुबा री आमा मरियम और तिरंये साथा री ओर छेउडी भी थी। 11 पर चलेऊ के इयै बुशै काहणी जीणी लागी कैलैकि तिरंके तिरं छेउडीऊर री बुशु माथे विश्वास नाई हुआ। 12 तैबे पतरस उठौ और फेटा मारीयो ओडाची काये पौउंचौं और झुकीयो भितरै जाचदै लागौं। तिरै तेसके सिर्फ सेऊ कापडौं दिशौं जेथदी यीशु रौं मौडौं थो मेटाऔं औन्दौं, तैबे सेऊ हैरान हुइयो वापिस आशौं। 13 सेजै दिनें यीशु मानणै वालै दुई आदमी इम्माउस नावां रै एकी गावां दी थै लागै औन्दै डेउन्दै, जो यरुशेमा कु सात मील दूर थो। 14 बाटा दी सै आपु मांझीरे एजी बुशै थै लाइदै लागै औन्दै जो इबी झाऊं यीशु आइलै हुआ थो।

इम्माउसा री बाटा दी यीशु चलेऊ आइलै

(मरकुस16:12, 13)

15 जैबे सै आपु मांझीरे बुशै-धाशै और स्वाल-जवाब थै कौरदै लागै औन्दै तेभी खरकचार आपु यीशु तिरं काये परगट हुआ और तिरं आइलै साथा ई आण्डदै लागौं। 16 तिरं आदमीऊर कै यीशु नाई प्राणुऔं कैलैकि परमेश्वरै सेऊ प्राणने नां दैऔं। 17 यीशुए तिरं कु पुछौं तिणी का बूश आ इयै इणी पा जो तुमै आण्डदै-आण्डदै आपु मांझीरे ई लागै औन्दै लाइदै। सै उदासी कौरी खौडै रौई गौरे। 18 तैबे तिरं मांझीया कु एकी ऐ बोलौं, जासरौं नाऊं क्लियोपास थो, "का तु यरुशेमा शहरा दी एखुली आदमी ई जो इबी झाऊं इणौ नाई ज्ञाणदौं कि यरुशेमा शहरा दी का हुआ?" 19 यीशुए तिरंकु पुछौं, "केजी बुशै?" तैबे तिरंये बोलौं, "सै बुशै जो यीशु नासरी रै बारै दी हुई आ सेऊ एक भविष्यवक्ता थो, जुणीए नोखे चमतकार कियै थै। सेऊ परमेश्वर और सारै लोग रै सामने परचार कौरा थो। 20 पर आमारे मुख्य याजकुए और धर्मा रै गुरुए यीशु लै मौरने री सजा देइयो क्रुसा माथे चड़ाओ। 21 पर आमुरे सुंचौं थो एऊ सेऊ मसीहा आ जुण इन्साएल देशा लै छुटकारौ दिया आ। इऊं बुशै बितीऔं आज चिजौं दीन आ। 22 आज दोउती जैबे आमु मांझीया कु कुछ छेउडी तिरै डेई जीयै यीशु रौं मौडौं थो छाडौं औन्दौं, तिरंए एक इणी नोखी बूश शुणाई जेथ कौरीयै आमे हैरान ई। 23 सै बोलाई यीशु रौं मौडौं तिरै नाई आसतौं, और तिरंये परमेश्वरा रै दूत देखे जुणीयै तिरं आइलै बोलौं कि यीशु जीउंदौं हुई गो आ। 24 आमारे साथी भी कुछ ओडाची काये डै जिणौं तिरं छेउडीउरे बोलौं थो तिरंये तिरै तिणौं देखौं यीशु नाई थो तिरै। 25 यीशुए तिरंलै बोलौं, "तुमै केती मुख लो ग ई! पवित्र आत्मा कौरीयै गुरुए जो कुछ लिखौं औन्दौं आ तेथ माथे तुमुलै विश्वास कौरनौं केती काठौं लागौं? 26 का तिरं गुरुए एजी बुशा रै बारै दी नाई बोलौं, कि एजी बुशै औणै कु पैहलै कि आपणै हक्का री राजगादी माथे सौरगा दी डिआ, ऐ सारी बुशै सहन जा कौरनी जेथरै बारै दी तुमै चोपडीदै ई लागै औन्दै। 27 तैबे यीशुए, मुसा और सारै गुरुए जो बुशै पवित्र शास्त्रा दी यीशु रै बारै दी लिखी ऐन्दी सै बुशै तिरंके एक-एकी कौरीयै सारी सौमझाई। 28 तेतीयै सै इम्माउस गावां काये पौउंचै

और तिरंरौं सफर खत्म हुआ। यीशुए इणौं देखाओ कि सेऊ ओगाडी-ओगाडीयै लागौं औन्दौं डेउदै। 29 पर तिरं दुई आदमीऊर ऐ यीशु काठै कौरी औरज की, "कि आमु आइलै रौऊ, कैलैकि ब्याल हुई गोई और दीन ओउडी गौं आ, तैबे यीशु तिरं आइलै रौइणा लै भितरै डेई गो आ।" 30 तैबे यीशु तिरं आइलै रोटी खान्दै बोशी गौं आ, तैबे यीशुए रोटी हाथा दी की और परमेश्वरा रौं धन्यवाद कियो, और चोडीयो तिरंके देई। 31 खरकचार तिरंरी आखी खुली गो ई और तिरंये यीशु प्राणी गौं और यीशु तेबी छुपी गौं। 32 सै दुई आदमी आपु मांझीयै बोलदै लागै, "जेबी एऊ आमु आइलै थो बाटा दी बुशै लाइदै लागौं औन्दौं और धर्मशास्त्रा रौं मतलब थो समझाऊंदै लागौं औन्दौं का आमारे जीवा दी आग जेई ना लागी?" 33 और सै तेबी उठीयो यरुशेमा लै आशीयो तिरंये सै ग्यारह चले और बाकी आदमी काठै देखे। 34 जैबे सै तिरै पौउंचै, ता तिरंये सारेऊ लै बोलौं, कि प्रभु यीशु मसीह सौचकी जीउंदौं हुई गो आ और पतरसा के दीशो आ। 35 तैबे तिरंये बाटा री सारी बुशै तिरं आइलै लाई और इणौं भी बोलौं कि यीशु आमुरे रोटी चोडदी बारै प्राणौं आ।

यीशु रौं चलेऊ के दिशणौं

(मती28:16-20; मरकुस16:14-18; यूहन्ना20:19-23; प्रेरितौं1:6-8)

36 और जैबे सै बुशै लाइदै थै लागै औन्दै कि यीशु तेभी खरकचार परगट हुआ यीशुए बोलौं, "तुमुलै शान्ती चाई मिली।" यीशु चलेऊ के मिला आ 37 पर सै सारै डौरी गौरे, तिरंये ज्ञाणौं भूत आशी गौं आ। 38 यीशुए पुछौं, "तुमै कैलै घौबरा ई? आपणे जीवा दी शक कैलै कौरा ई?" 39 मरै हाथ बांगणे देखौं! तैबे तुमुकै पौतौं लागी कि हाऊं सेजौं यीशु ऊ। छुईयो देखौं कि हाऊं भूत नाई आसतौं कैलैकि भूता दी मांस और हाडके नाई औन्दै जिणौं तुमै मूं देखदै ई लागै औन्दै मुंदी ता शरीर आ। 40 इणै बोलदै-बोलदै यीशुए आपणे हाथ तिरं भिले बोडाए और देखालै। और बांगणे भी देखालै। 41 सै ग्यारह चले और बाकी जो यीशु माथे विश्वास कौरा थै सै हैरानी और खुशी कौरीयै मस्त हुई गौरे एजै कारणे की तिरंके विश्वास नाई थो औन्दै लागौं औन्दौं। ता यीशुए पुछौं, "का तुमुकै कुछ खाणा लै आसती आ?" 42 तिरंये यीशु लै बुजी ऐन्दी माछी रौं कापटु दैऔं, 43 यीशुए सेऊ माछी रौं कापटु पाकडौं और चलेऊ काये खाओ। 44 तैबे तौरै यीशुए बोलौं, "जेबी हाऊं तुमु आइलै साथा दी थो तेबी मुइयै तुमु आइलै बोलौं थो कि, मुसा और पुराणै गुरु री किताबीऊ और भजन सहिता दी जो कुछ मरै बारै दी लिखौं औन्दौं आ सै सारी बुशै पुरी हुणी आ। 45 तैबे यीशुए तिरंरी समझ खोली एरी आ ताकी सै पवित्र शास्त्रा री सारी बुशै समझा। 46 यीशुए तौरै बोलौं, "इणौं भौरी पैहलै थो लिखौं औन्दौं कि मसिह दुःख उठावा और मौरा और चिजै दिनें जीऊंदौं हुआ आ।" 47 और यीशु रै नावां कौरी यरुशेमा रै शहरा कु शुरु हुइयो सारै देशा दी मन बदुलनै और पापा कु माफी पाइणा रौं सन्देश शुणावा ई। 48 तुमै इऊं सारी बुशा री गवाही आ। 49 और देखौं, जेथरौं वाइदौं मरै बाबै कियो आ, आबै हाऊं तुमु माथे पवित्र आत्मा उतारा ऊ और जेबी झाऊं तुमै सौरगा कु शक्ती नाई पा लै तेबी झाऊं तुमै एजै इलाके दी रौएऊ।

यीशु रौं सौरगा लै डेऊणौं

(मरकुस16:19, 20; प्रेरितौं1:9-11)

50 यीशुए सै बेतनियाह लै नीं गौरे, और आपणै हाथ उठाईयो चलेऊ लै आशिष देई। 51 तिरंलै आशीश दैदी बारै यीशु आपणै चलेऊ कु अलग हुआ और देखण-देखदु सौरगा लै उठाई गौरे। 52 चलेऊ ऐ प्रभु यीशु री आराधना की और भौरी खुश हुइयो यरुशेमा लै वापिस आशै। 53 और सै परमेश्वरा रै घौरा दी डेइयो लगातार आराधना कौरा थै।

यूहन्ना

वचन शरीर बौणों

1 सौबी कु पैहलै वचन थौ, और वचन परमेश्वरा आइलै थौ, और वचन परमेश्वर थौ। 2 एउ ऊ पैहलै परमेश्वरा आइलै थौ। 3 सारौ कुछ तेसी कु पैदौ हुओ, जो कुछ हुओ आ तिउं मांझीआ कु केजी भी चिजै तेसरै बगैर नाई हुई। 4 तेसदी प्राण थै और सै प्राण आदमीउ रौ प्याशौ थौ। 5 प्याशौ न्यारै दी चौमका आ, और न्यारै सेऊ नाई अपणाओ। 6 एक आदमी परमेश्वरा री तौरफा कु आशौ ज़ासरौ नाऊं यहुन्ना थौ। 7 सेऊ एथीलै आशौ कि प्याशौ री गवाही दिआ, ताकी सारै तेसकु विश्वास कौरा। 8 आपु ता सेउ प्याशौ नाई थौ, पर सेउ सेजै प्याशौ री गवाही देन्दै आशौ थौ। 9 सौचौ प्याशौ जुण हर एक आदमी प्याशालौ कौरा सा, धौतरी माथै आशणै वालौ थौ 10 सेउ दुनीयां दी थौ, पुरी दुनीयां तेसी कु हुई, और संसारै सेउ नाई परणाओ। 11 सेउ आपणै घोरै आशौ और तेसरै घौरा वालेऊरै सेउ नाई अपणाओ। 12 पर जुणीए सेउ अपणाओ, तिणीए तिउंके परमेश्वरा री सन्तान हुणै रौ हक दैओ, तिउंके भी जुण तेसरै नावां माथै विश्वास छाड़ा ई। 13 सै ना ता खुना कु, ना शरीरा री मर्जी कु, ना आदमी री मर्जी कु, पर परमेश्वरा कु पैदै हुए ई। 14 और वचन देहधारी हुओ; और दया और सौचाई कु भरपूर हुईओ आमु मांझीए वास कियौ, और आमुए तेसरी इणी बौड़ाई देखी, जिणी बाबा रै एकलौते री बौड़ाई। 15 यहुन्ना तेसरै बारै दी गवाही देई, और हाका देईओ बोलौ, “एउ सेजौ आ, ज़ासरै बारै दी मुइए बोलौ की जुण मुं बासिए आशा आ, सेउ मुं कु भी बौड़ौ आ, कैलैकि सेउ मुं कु पैहलै थौ। 16 कैलैकि तेसरी भरपुरी कु आमु सौभी लै दया माथै बौड़ी दया मिली। 17 एथीलै कि कानून ता मुसा रै देई ऐन्दी, पर बौड़ी दया और सौचाई ता यीशु मसीह कु पौऊंची। 18 परमेश्वर कोइए केभी नाई देखौ, एकलौतौ छोहर जुण बाबा री उंगाली दी आ, तिणीए सेउ पौगड़ौ कियौ।

यूहन्ना बपतिस्मा देणै वालै री गवाही
(मती3:1-12; मरकुस1:1-8; लूका3:1-18)

19 यहुन्ना री गवाही एजी आ, कि जेबी यहुदिकुरे यरुशलेमा कु याजक और लेवी तेसकु इणौ पुछणा लै भेजै, “कि तु कुण ई?” 20 तैबै तिणियै इणौ मानी गौ, और मुकरौ नाई पर मानी गौ कि “हाऊं मसीह नाई ऊ।” 21 तैबै तिउंए तेस कु पुछौ, “तैबै तू कुण ई? का तू एलिय्याह ई?” तिणीए बोलौ, “हाऊं नाई ऊ।” “तैबै का तू सेजौ भविष्यवक्ता ई?” तिणीए ज़वाब दैओ, “नाई।” 22 तैबै तिउंए तेसकु पुछौ, “तैबै तू कुण ई? ताकी आमैं आपणै भेजणै वालेऊ कै ज़वाब देऊ। तु आपणै बारै दी का बोलाई?” 23 तिणियै बोलौ, “जिणौ यशायाह भविष्यवक्तै बोलौ: ‘हाऊं ज़ांगला दी एक औटाईणै वालै री बाच ऊ कि तुमै प्रभु री बाट सीधी कौरौ।’” 24 सै फरीसीऊ री तरफा कु थै भेजै औन्दै। 25 तिउंए तेसकु एजौ सवाल पुछौ, “अगर तू मसीह नाई ई, और ना एलिय्याह आसतौ, ना सेजौ भविष्यवक्ता, तैबै बपतिस्मा कैलै दिआई?” 26 यहुन्ना तिउंलै ज़वाब दैओ, “हाऊं ता पाणी कौरी बपतिस्मा दिआऊ पर तुमुमांझीए एक आदमी खौड़ौ आ ज़ास तुमै नाई जानदैं। 27 जुण मुं बासीए आशणै वालौ आ, ज़ासरै बुटा रै हाऊं तसमै खोलनै रै लाईक भी नाई।” 28 एजी बुशै यरदना कु पार बैतनिय्याह दी हुई, जीए यहुन्ना बसिस्मा दिया थौ।

परमेश्वरा रौ गाबडु

29 दुजै दिने तिणियै यीशु आपु बिलै आशदें देखियौ बोलौ, “देखौ, एऊ परमेश्वरा रौ चेलटु आ जुण दुनिया रै पाप उठाईयौ निया सा। 30 एऊ से सेसेऊ आ, ज़ासरै बारै दी मुइए बोलौ थौ, ‘कि एक मोरद मुं पिछु आशा आ जुण मुकु भी बोड़ौ सा, कैलैकि सेऊ मुकु भी पैहलै थौ।’ 31 हाऊं ता तेस पराणा भी नाई थौ, पर एथीलै हाऊं पाणी कौरी बपतिस्मा दैदें लागौ औन्दौ कि सेऊ इस्राएला माथै पौगड़ौ हुआ।” 32 और यहुन्ना एजी गवाही देई: “कि मुइए आत्मा कबुतरा जीणी सौरगा कु उतुरदें देखी आ, और सै तेस माथै रुकी गई। 33 हाऊं ता तेस नाई पराणा थौ, पर जुणीए हाऊं पाणी कौरी बपतिस्मा दैदें भेजौ ऊ, तिणीए मुलै बोलौ, ‘ज़ास माथै तू आत्मा उतुरदें और रुकदें देखा लौ, सेऊ पवित्र आत्मा कौरी बपतिस्मा देणै वालौ आ।’ 34 और मुइए देखौ, और गवाही देई कि एऊ परमेश्वरा रौ छौहरु आ।”

यीशु रै पैहलै चेलै

35 दुजै दिने तौंए यहुन्ना और तेसरै चलेऊ मांझीया कु दुई जौणै खौड़ै थै हुए औन्दै, 36 और तिणीए यीशु जुण डेऊंदै थौ लागौ औन्दौ, देखीओ बोलौ, “देखौ, एऊ परमेश्वरा रौ चेलटु आ।” 37 तैबै सै दुई चेलै तेसरी इणी बुशै शुणीयो यीशु पिछु चाल पौड़ै। 38 यीशुए सै मुडिओ पीछाडिरे आशदें देखे और तिउंलै बोलौ, “तुमै कास लोडदें ई लागे औन्दै?” तिउंए तेसलै बोलौ, “ओ गुरु, तु किये रौआई?” 39 यीशुए तिउंलै बोलौ, “चालौ, पोरु देखौ।” तैबै तिउंए डेइयौ तेसरी रौइणै री ज़ागाह देखी, और सेजै दिने तेसीई आइलै रौए। कैलैकि ब्यालकै लगभग चार बाजी गौए थै। 40 तिउं दुई मांझीया कु, जुण यहुन्ना री बुशै शुणीयो यीशु पीछु आशै थै, एक शमौन पतरसा रौ भाई अन्द्रियास थौ। 41 तिणए पैहलै आपणै सगै भाई शमौना कु मिलीयो तेसलै बोलौ, “आमुकै ख्रिस्ट, या मसीह, मिली गौ आ।” 42 तिणियै सेऊ यीशु काए नियो। यीशुए तेस देखीओ बोलौ, “तू यहुन्ना रौ छोहरु ई: ताउंलै कैफा या पतरस बोला ई।

फिलिप्पुस और नतनएला रौ औटाउणौ

43 दुजै दिने यीशुए गलीला लै डेऊणौ चाओ। सेऊ फिलिप्पुसा कु मिलौ और बोलौ, “मुं पीछु चाल।” 44 फिलिप्पुस, अन्द्रियास और पतरसा रै इलाकै बैतसैदा रौ रौइणै वालौ थौ। 45 फिलिप्पुस नतनएला कु मिलौ और तेसलै बोलौ, “ज़ासरै बारै दी मुसा गुरुए पवित्र शास्त्रा दी और भविष्यवक्तुरे बोलौ आ, सेऊ आमुकै मिली गौ आ; सेऊ युसुफा रौ छोहरु, यीशु नासरी आ।” 46 नतनएलै तेसलै बोलौ, “का कोई आछी चीज भी नासरता कु निकला आ?” फिलिप्पुस तेसलै बोलौ, “चालियो देख।” 47 यीशुए नतनएल आपु भीलै आशदें देखिओ, तेसरै बारै दी बोलौ, “देखौ, एऊ पाकौ इस्राइली आ: एसदी कोई कपट नाई।” 48 नतनएलै तेसलै बोलौ, “तू मुं किणै कौरीए ज़ाणाई?” यीशुए तेसलै ज़वाब दैओ, “एथकु पैहलै कि फिलिप्पुसे तु औटाओ, जेबी तू अंजीरा (फेडु)रै पेड़ा थाले थौ, तेभी मुइए तु देखौ ई।” 49 नतनएलै तेसलै ज़वाब दैओ, “ओ गुरु, तू परमेश्वरा रौ छोहरु ई; तू इस्राइला रौ महाराजौ ई।” 50 यीशुए तेसलै ज़वाब दैओ, “मुइए जो कुछ ताऊंले बोलौ कि मुइए तू अंजीरा (फेडु) रै पेड़ा थालिरे देखोई, का तू तैबै कौराई विश्वास? तु एथकु भी बौड़ै--बौड़ै काम देखाई।” 51 यीशुए तौंए बोलौ,

“हाऊं तुमुलै सौच्यौ—सौच्यौ बोलाऊ कि तुमै सौरग खुलौ औन्दौ, और परमेश्वर रै दूत आदमी रै छौहरु माथे ऊरुतरदै और ऊपरै डेरुंदै देखाई।”

गलीला रै काना दी पैहलौ हैरानी वालौ काम

2 तैबे चिजै दिने गलीला रै काना दी कासरी शादी थी और यीशु री आमा भी तीयै थी। 2 यीशु और तेसरै चेलै भी तीरै शादी दी थै औटाए औन्दै। 3 जेबी दाखरस कम हुआ, तैबै यीशु री आमै तेसलै बोलौ, “तिउंकै दाखरस नाई रौ।” 4 यीशुए तीआलै बोलौ, “ओ छेउडी जात, मुकै ताऊंकु का काम? इबी मैरौ बौग नाई आशौ।” 5 तेसरी आमै नुकरु लै बोलौ, “जो कुछ सेऊ तुमुलै बोलालौ तिणी कौरैऊ।” 6 तीयै यहूदिकु रै शुध कौरणै रै रीवाजा रै अनुसार माटै (पात्थरा)रै छौ घोंडै थै छाडै औन्दै, जेथदी दुई चीन मण आशा थौ। 7 यीशुए तिउंलै बोलौ, “घोंडै दी पाणी भौरौ।” तिउए सै घोंडै टिब-टिबै भौरौ गोरै। 8 तैबै यीशुए तिउंलै बोलौ, “आबै गाडीयौ रोटी चाणनै वालै परधाना कारे निऑ।” और तिउंए तिणौ कियौ, 9 जेबी रोटी चाणनै वालै परधानै सेऊ पाणी चाखौ, जो दाखरस बाणी गौ थौ, और तेसकै पाँतौ नाई थौ, कि सेऊ किदरु आशौ आ, (पर जेजे नुकरै पाणी गाडौ थौ, सेऊ ज्ञाणा थौ) तैबै रोटी चाणनै वालै परधानै लाडौ औटाईयौ तेस लै बोलौ, 10 “हर आदमी पैहलै आछौ दाखरस दिया आ और जैबै लोग पिईयौ झूमदै लागई, तैबै दौख हौलकु दिआई, पर तांईए आ आछौ दाखरस इबी झाऊं छाडौ औन्दौ।” 11 यीशुए गलीला रै काना दी आपणौ एजौ पैहलौ चमत्कार देखाईयौ आपणी बौडाई पौगडी कौरी ई और तेसरै चलेउए तेस माथे विश्वास कियौ। 12 तेथ बासीए यीशु और तेसरी आमा, तेसरौ भाई और तेसरै चेलै कफरनहूमा लै डेवै और तीए कुछ दिना झाऊं रौरै।

परमेश्वर रै घौरा कु सामाना बेचणै वालै गाडनै (मती21:12, 13; मरकुस11:15-17; लूका19:45, 46)

13 यहूदीऊरै फसह रै साजै रौ दीन नजदीक आशणै वालौ थौ और यीशु यरुशलेमा लै डैओ। 14 और तिणीए परमेश्वर रै घौरा दी बौलद और भेरी और कबूतर बेचणै वालै और खरीददार बोशै औन्दै देखै। 15 तैबै तिणीए लोउली रौ (कोडौ) चाणीयौ सारै भेरी और बौलद परमेश्वर रै घौरा कु गाडी गोरै, और खरीददार रै पैसै फोकी गोरै, और ठेलै उलटाई गोरै। 16 और कबूतर बेचणै वालेऊ लै बोलौ, “इऊं इदरा कु निऑ। मेरे बाबा रौ घौर व्यपारा रौ घौर नाई चाणौ।” 17 तेसरै चलेऊ कैं आद आशौ कि लिखौ औन्दौ आ, “तैरे गौरा री धुन मुं खा सा।” 18 एथ माथे यहूदिकु तेसलै बोलौ, “तू जो एस कौराई ता आ आमुकै कैंजौ निशाण देखालाई?” 19 यीशुए तिउंलै जवाब दैओ, “एस परमेश्वर रौ घौर पौरु ढालौ, और हाऊं एस चिन दिना दी खौडौ कौराऊ।” 20 यहूदिकु बोलौ, “एस परमेश्वर रै घौरा चाणना लै दुई बीए छौ साल लागै ई, और का तु एस चिया दिना दी खौडौ कौराई?” 21 पर तिणीए आपणै शरीरा रै बारै दी बोलौ थौ जो परमेश्वर रौ घौर आ। 22 जेबी सेऊ मौरै औन्दै मांझिया कु ज़ीऊंदौ हुओ तेसरै चलेउ कैं आद आशौ कि तिणीए एऊ बोलौ थौ; और तिउंए पवित्र शास्त्र और सेजौ वचन जो यीशुए बोलौ थौ, मानी गोरै।

यीशु आदमिउ रै मन ज्ञाणा सा

23 जेबी सेऊ यरुशलेमा दी फसह रै बौगतै साजै दी थौ, तेबी भौरी आदमिउए सै चिन्ह जो सेऊ देखाला थौ देखीयौ तेसरै नावां माथे विश्वास कियौ। 24 पर यीशु आपु तिउंरै भरोसै माथे नाई रौ, कैलैकि सेऊ सब कुछ ज्ञाणा थौ; 25 तेसकै जरुरत नाई थी कि आदमी रै बारै दी कोई गवाही दिया, कैलैकि आपु ज्ञाणा थौ कि आदमी रै मौना दी का सा?

यीशु और नीकुदेमुस

3 फरीसिया दी नीकुदेमुस नावां रौ एक आदमी थौ, जुण यहूदिकु रौ सरदार थौ। 2 तिणीए रावी यीशु कारे आशीओ तेसलै बोलौ, “ओ गुरु, आमै ज्ञाणी कि तु परमेश्वर री तौरफा कु आशौ औन्दौ गुरु ई, कैलैकि कोई ईऊं चिन्ह जेजे तु देखाला ई, अगर परमेश्वर तेस आइलै नाई औआ थौ, ता नाई देखाली बौलदौ।” 3 यीशुए तेसलै जवाब दैओ, “हाऊं तुमुलै सौच्यौ-2

बोलाऊ, अगर कुण दुजी बारै पैदौ नाई हुआ लौ ता परमेश्वर रौ राज नाई देखी बौलदौ।” 4 नीकुदेमुसै तेसलै बोलौ, “आदमी जेबी बुद्धौ औई जा आ, तैबै सेऊ किणै कौरिणै जन्म नी सौका? का सेऊ आपणी आमा रै गौर्भा दी दुजी बारै डेईयो जन्म नी बौला आ?” 5 यीशुए जवाब दैओ, “हाऊं तुमुलै सौच्यौ-सौच्यौ बोलाऊ, जेबी झाऊं केजौ भी आदमी पाणी और आत्मा कु पैदौ नाई हुआ लौ सेऊ परमेश्वर रै राज्य दी नाई डेई बौलदौ। 6 कैलैकि जुण शरीरा कु आ जन्मौ औन्दौ; सेऊ शरीर आ, और जुण आ आत्मा कु जन्मौ औन्दौ; सेऊ आ आत्मा। 7 हैरान ना हुए कि मुइंरे ताउंलै बोलौ आ, ‘ताइंरे दुजी बारै जन्म निणौ जरुरी आ।’ 8 बागुर जेजी भिलै बौइणौ चाह सा, सेजी भिलै बौआ सा और तु बागुरा री हाक शुणाई, पर नाई ज्ञाणदौ कि सै किदरौ बौआ और केशी डिया? जुण भी आत्मा कु जन्मौ औन्दौ आ, सेऊ इणी ई आ।” 9 नीकुदेमुसै तेसलै जवाब दैओ, “एजी बुशै किणै कौरिणै हुआ ई?” 10 इणै शुणीओ यीशुए तेसलै बोलौ, “तु इस्राइलिकु रौ गुरु हुईओ भी ईऊं बुशै नाई सौमुझदौ? 11 हाऊं ताउंलै सौच्यौ-सौच्यौ बोलाऊ कि आमै जो कुछ ज्ञाणी ई, तेसी बोली ई, और जो आमुए देखौ औन्दौ आ, तेसी री गवाही देई ई, और तुमै आमारी गवाही नाई मानदौ। 12 जेबी मुइंरे तुमु लै धौतरी री बुशै बोली, और तुमै विश्वास नाई कौरदै, अगर हाऊं तुमकै सौरगा री बुशै बोलु लै, ता तैबै तुमै किणै कौरिणै कौराई विश्वास? 13 और कोई सौरगा दी नाई चोडौ, सिर्फ सेऊ जुण सौरगा कु उतरौ, मतलब आदमी रौ छेहरु जुण सौरगा दी आ। 14 और जेजी रीति कौरौ मुसै जांगला दी साप ऊंचै माथे चोडाओ, सेजी रीति कौरौ जरुरी आ की आदमी रौ छेहरु भी ऊंचै माथे चोडाऊणौ चाई। 15 ताकी जुण तेस माथे विश्वास कौरा लौ सेउ सौदा री जिन्दगी पा। 16 कैलैकि परमेश्वरै दुनियां आइलै इणौ प्यार छाडौ कि तिणीए आपणौ एकलौतौ छेहरु दैओ, ताकि जुण-कुण भी तेस माथे विश्वास कौरा लौ सेऊ नाश नाई औआ, पर सदा री जिन्दगी पा। 17 परमेश्वरै आपणौ छेहरु दुनियां दी एजी ताइंरे नाई भेजौ, कि दुनियां माथे सजा रौ हुकम दिआ, पर एजौ ताइंरे कि दुनियां तेसरै ज़ोरिणै छुटकारौ पा। 18 जुण तेस माथे विश्वास कौरा आ, तेस माथे सौजा रौ हुकम नाई औन्दौ, पर जुण विश्वास नाई कौरदौ, सेऊ आरोपी बाणी जा; एथीलै की तिणीए परमेश्वर रै एकलौतै छेहरु रै नावां माथे विश्वास नाई कियौ। 19 और सौजा री आज्ञा रौ कारण एऊ आ की प्याशौ दुनियां दी आशौ आ, और आदमीऊरे न्यारौ प्याशै कु प्यारौ ज्ञाणौ कैलैकि तिउंरै काम बुरै थै। 20 कैलैकि जुण बुराई कौरा सा, सेऊ प्याशै कु नफरत छाडा सा, और प्याशै रै नजदीक नाई आशदौ, इणौ ना चाई हुओ कि तेसरै कामा माथे आरोप लाग। 21 पर जुण सौचाई माथे आण्डा सा, सेऊ प्याशै रै नजदीक आशा आ ताकी तेसरै काम पौगडै औआ, कि सै परमेश्वर री तौरफा कु ई किरै औन्दै।”

यीशु रै बारै दी यूहन्ना री गवाही

22 तेथ बासीए यीशु और तेसरै चेलै यहूदिया देशा दी आशै; और सेऊ तिउं आइलै रौईयो बपतिस्मा दैन्दै लागौ। 23 यूहन्ना भी शालेमा रै नजदीक एनेना दी बपतिस्मा दिआ थौ, कैलैकि तिरे भौरी पाणी थौ, और लोग आशीओ बपतिस्मा नीयां थै- 24 यूहन्ना तेबी झाऊं जेला दी नाई पाओ थौ 25 तिरे यूहन्ना रै चलेऊ रौ कास यहूदी आइलै शुद्धी रै बारै दी बुशै-दाशै हुई। 26 और तिउंरे यूहन्ना कारे आशीओ तेसलै बोलौ, “ओ गुरु, जेजौ आदमी यरदना नौई पार भिला रौ ताऊं आइलै थौ, और जासरी ताइंरे गवाही देई आ; देख, सेऊ बपतिस्मा दिआ सा, और सारै तेस कारे आशा ई।” 27 यूहन्नै जवाब दैओ, जेबी झाऊं आदमी लै सौरगा कु नाई दिआ लै, तेबी झाऊं सेऊ कुछ नाई पाई बौलदौ। 28 तुमै ता आपु मेरे गवाह ई, कि मुइंरे बोलौ, ‘हाऊं मसीह नाई, पर तेसकु औगाडिरे ऊ भेजौ औन्दौ।’ 29 ज़ासरी लाडी आ, सेऊ ई लाडौ आ; पर लाडै रौ गोष्टण जुण खौडौ तेसरी शुणा, लाडै री बुशेऊ शुणीयो भौरी खुश हुआ; एबै मेरी बौडी खुशी पुरी हुई आ। 30 जरुरी आ कि सेऊ बौडा, और हाऊं घौटू। 31 “जो माथा कु आशा सा, सेऊ सारेऊ कु आछौ आ; जो आशा सा धौतरी कु सेऊ आ धौतरी रौ; और धौतरी री ई बुशै बोला सा: जो सौरगा कु आशा आ सेऊ सारेऊ कु माथे आ। 32 जो कुछ तिणीए देखौ, और शुणौ आ, तेथी री गवाही दिआ आ; और कोई तेसरी

गवाही नाई मानदौ।³³ जुणिए तेसरी गवाही मानी गोई तिणीए ऐजी बुशु माथे मोहर लाई गोई कि परमेश्वर सौंचौ आ।³⁴ कैलैकि ज़ो परमेश्वर आ भेजौ औन्दौ, सेऊ परमेश्वर री बुशे बोला सा; कैलैकि सेऊ आत्मा नापी-नापीऔ नाई देन्दौ।³⁵ बाब छोहरु कु प्यार छाड़ा आ, और तिणीए सारी चीजे तेसरै हाथा दी देई गोई आ।³⁶ जो छोहरु माथे विश्वास कौरा सा, सौदा री जिन्दगी तेसरी आ; पर जुण छोहरु री नाई मानदौ, सेऊ जिन्दगी नाई देखी बोलदौ, पर परमेश्वर रै रोष तेस माथे रौआ ई।”

यीशु और सामरी जाती री छेवडी

4 तैबे जेबी प्रभु के पोतौ लागौ कि फरीसिऊ ऐ शुणी गौ कि यीशु यूहन्ना कु जादै चेलै चाणा और बपतिस्मा दिआ आ।² पर यीशु आपु नाई तेसरै चेलै बपतिस्मा दिआ थै।³ तैबे सेऊ यहूदिया छाडीऔ दुजी बारै गलीला लै डैऔ, ⁴ और तिऊं सामरिया बाटिए डेरुणौ ज़रुरी थौ। ⁵ एथीलै सेऊ सूखार नावां रै सामरिया इलाके झाऊं आशौ, जो सेजी ज़बीना काए आ जो याकूब आपणै छोहरु युसुफा कालै देई थै; ⁶ याकूबा रौ कुऔं भी तीए थौ। और यीशु बाटाई आंडियौ खोडौ औन्दौ तेस कुए काए ईणी बोशी गौ। ऐजी बुश दिना रै छौउए घाण्टे रै करीब हुई। ⁷ तेतीए एक सामरी छेउडी पाणी भौरद आशी। यीशुए तियांलै बोलौ, “मुलै पाणी पिलाऊ।” ⁸ कैलैकि तेसरै चेलै इलाके दी खाणे-पिणे री चीजे खरीदद थै डैऔ औन्दै। ⁹ तिऐ सामरी छेउडी ऐ यीशु लै बोलौ, “तू यहूदी हुईयो मुं सामरी छेउडी कु पाणी कैलै मांगी?” (कैलैकी यहूदी सामरिऊ आइलै केजी भी बुशा रौ बरताव नाई छाड़ा थै।) ¹⁰ यीशुए ज़वाब दैऔ, “अगर तु परमेश्वर रै वरदान जाणा थै, और इणौ भी जाणा थै कि सेऊ कुण आ जो ताउंलै बोला सा, ‘मुलै पाणी पिलाऊ’ ता तु तेसकु मांगा थै, और सेऊ ताउंलै जिन्दगी रौ पाणी दिआ थौ।” ¹¹ छेउडीए तेसलै बोलौ, “ओ प्रभु, ताऊं कै पाणी भौरना लै ता कुछ आसतौ भी नाई, और कुंओ डुंगौ आ; तैबे सेऊ जिन्दगी रौ पाणी ताऊं कै किदरा कु आशौ आ? ¹² का तू आमारे बाबा याकूबा कु बौडौ ई, जुणीए आमुलै एऊ कुंओ; और आपु ही आपणी सन्तान, और आपणै धौण-चाणा आइलै एथी कु पियो?” ¹³ यीशुए तियांलै ज़वाब दैऔ, “जुण-कुण एजौ पाणी पिया आ सेऊ औजौ चिशौ हुआ आ, ¹⁴ पर जुण-कुण तेस पाणी कु पिया लौ जो हाऊं तेसलै देउलै, सेऊ तैबे केबी भी चिशौ नाई रौआलौ; (जेबी झाऊं दुनिया रौआली) पर जो पाणी हाऊं तेसलै देउलै, सेऊ तेसदी एक सोतौ बाणा आ जो सौदा री जिन्दगी झाऊं बौडै रौआ आ।” ¹⁵ छेउडी ऐ तेसलै बोलौ, “ओ प्रभु, तेस पाणी मुलै दै ताकी हाऊं चिशौ नाई रौऊ और ना पाणी भौरना लै ऐती दूर आशु।” ¹⁶ यीशुए तियां लै बोलौ, “डेऊ, ‘आपणौ बोउटौ ईदौ ओटाऊ।’ ¹⁷ छेउडी ऐ ज़वाब दैऔ, “कि हाऊं बिण बोउटै री ऊ।” यीशुए तियांलै बोलौ, “तू ठीक बोलाई, ‘हाऊं बिण बोउटै री ऊ।’ ¹⁸ कैलैकि तांइए पांज बोउटै चाणी गौए ई, और ज़ास काए तु ईबी ई सेऊ भी तैरौ बोउटौ नाई आ एऊ तांइए सौंचौ ही बोलौ आ।” ¹⁹ छेउडी ऐ यीशु लै बोलौ, “ओ प्रभु, मुकै लागा की तू हुणै वाली बुशे जाणनै वालौ ई। ²⁰ आमुरै नाना बुद्धे ऐजे धारा माथे आराधना की आ, और तुमे बोलाई की सेजी ज़गाह जिऐ आराधना कौरनी चांई येरुशलैमा दी आ।” ²¹ यीशुए तियांलै बोलौ, “ओ बौइण, मेरी बुशु रौ विश्वास कर कि सेऊ बोग्त आशणै वालौ आ कि तुमै ना ता इयै धारा माथे बाबा री आराधना कौरालै ना येरुशलैमा ई। ²² तुमै ज़ास नाई जाणदै, तेसरी आराधना कौराई और आमै ज़ास जाणी ई तेसी री आराधना कौराई; कैलैकि उद्धार यहूदीऊ मांझिया कु आ। ²³ पर सेऊ बौक्त आशा सा, और ईबी भी आ, जेथदी सौंचे भोग्त बाबा री आराधना आत्मा और सचाई कौराई, कैलैकि बाब आपुलै इणै ही आराधना कौरनै वालै लोडा आ। ²⁴ परमेश्वर आत्मा आ और ज़रुरी सा कि तेसरी आराधना कौरनै वालै आत्मा और सौचाई कौराई आराधना कौरा।” ²⁵ छेउडीए तेसलै बोलौ, “हाऊं जाणाऊ कि मसीह ज़ासलै ख्रिस्ट बोलाई, आशणै वालौ आ; जेभी सेऊ आशालौ ता आमुकै सारी बुशे बौला आ।” ²⁶ यीशुए तियांलै बोलौ, “हाऊं जो ताऊं आइलै बोलदेऊ लागौ औन्दौ, सेऊ ऊ।”

चलेऊ री वापसी

²⁷ तेतिरे तेसरै चेलै आशी गौए, और हैरान हुऐ कि यीशु छेउडी आइलै बूशे लाइंदे लागौ औन्दौ; तैबे भी कोइए ना पूछे, “तू का चा ई?” या “तियां आइलै बूशे कैलै ला ई?” ²⁸ तैबे तिऐ छेउडीए आपणौ पाणी रौ घोडौ तिऐ छाडियो इलाके लै डेई गोई, और लोगु आइलै बोलदौ लागी, ²⁹ “आशौ, एक आदमी देखौ, जुणीए सब कुछ ज़ो मुइए कियो आ मुलै बोली गौ आ। किऐ एऊ ता मसीह नाई?” ³⁰ और सै गावां कु निकलीयो तेस काए आशदै लागै। ³¹ एथरै बिचा दी तेसरै चेलैऊ ऐ यीशु कु इणी औरज कौरा, “ओ गुरु, कुछ खा ऐरी।” ³² पर तिणीए तिऊं लै बोलौ, “मुं काए खाणा लै इणी रोटी आ ज़ास तुमै नाई जाणदै।” ³³ तैबे चलेऊ ऐ आपु मांझिए बोलौ, “का कुणीए यीशु लै कुछ खाणा लै आणौ आ?” ³⁴ यीशुए तिउंलै बोलौ, “मेरी रोटी ऐजी आ कि आपणै भेजणै वालै री मौरजी रै अनुसार चालू और तेसरौ काम पूरौ कौरु। ³⁵ का तुमै इणौ नाई बोलदै, ‘लौइणा लै इभी चार मिहनै ई पौडै औन्दै?’ देखौ, हाऊं तुमुलै बोलाऊ, आपणी आखी खोलियो डोखरै दी नोदर लाओ कि सै लौइणा लै आशी गौए। ³⁶ लौइणै वालौ मजदुरी पा आ और सौदा री जिन्दगी लै नाज कौठै कौरा आ, ताकी बौइणै वालौ और लौइणै वालौ दूइया मिलियो खुशी मनाव। ³⁷ कैलैकि इदौ एजी काहवत ठीक बोशा आ: ‘बौइणै वालौ ओर आ, और लौइणै वालौ ओर।’ ³⁸ मुईए तुमे एस डोखरै लौइणा लै भेजे ज़ासदी तुमुए मैहनत नाई की: दुजेऊ ऐ मैहनत की और तुमै तिउंरी मैहनता रै फला दी साजी हुऐ।”

सामरिउ रै लोगु रौ विश्वास कौरणौ

³⁹ तेस इलाके रै भौरा सामरिउए तिऐं छेउडी री बुशे शुणीयो यीशु माथे विश्वास कियो; कैलैकि तिआए एजी गवाही देई थै: ‘तिणीए सब कुछ ज़ो मुईए कियो आ, मुलै बोलौ आ।’ ⁴⁰ एथीलै जेबी सै सामरी तेस काए आशै, तैबे तेसकु औरज कौरद लागै कि आमारे काए रौ ओ। तैबे यीशु तिऐ दुई दिना झाऊं रौ। ⁴¹ तेसरै वचना रै कारण तौइए भी भौरा लोगुए विश्वास कियो ⁴² और तिऐं छेउडी लै बोलौ, “ऐबे आमै तैरै बोलणा माथे विश्वास नाई कौरद; कैलैकि आमंए आपु ही शुणी गौ आ, और जाणी गौ आ कि एऊ सौंचै दुनिया रौ छुटकारौ कौरणै वालौ आ।” ⁴³ तैबे तिऊं दुई दिना बासिए सेऊ तिदरा कु निकलियो गलीला लै डैऔ, ⁴⁴ कैलैकि यीशुए आपु ई गवाही देई कि भविष्यवक्ता लै आपणै दैशा दी आदर-इज्जत नाई मिलदी ⁴⁵ जेबी सेऊ गलीला दी आशौ, ता गलीली खुशी कौरिए तेसकु मिलै; कैलैकि जेती काम तिणीए येरुशलैमा दी साजा रै बोग्ता दी किऐ थै, तिउंरै सै काम सब देखै थै, कैलैकि सै भी साजा दी थै डै औन्दै।

राजा आइलै कामा कौरणै वालै रौ छोहरु चांगौ कौरणौ

⁴⁶ तैबे सेऊ तौइए गलीला रै काना गावां दी आशौ, जिऐ तिणीए पाणी अंगुरा रौ रौसा दी बौदलौ थौ। तिऐ राजे रौ एक नुकुर थौ ज़ासरौ छोहरु कफरनहूमा दी बीमार थौ। ⁴⁷ सेऊ इणौ शुणियो कि यीशु यहूदिया कु गलीला दी आशी गौ आ, तेस काए डैऔ और तेसकु औरज कौरद लागौ कि चाल मैरौ छोहरु ठीक कर: कैलैकि सेऊ मौरनै वालौ थौ। ⁴⁸ यीशुए तेसलै बोलौ, “जेबी झाऊं तुमै चिन्ह और नोखै काम नाई देखालै तेबी झाऊं तुमै केबी भी विश्वास नाई कौरालै।” ⁴⁹ राजा रै नुकुरे तेसलै बोलौ, “ओ प्रभु, मैरै छोहरु रै मौरणा कु पैहलै चाल।” ⁵⁰ यीशुए तेसलै बोलौ “डेऊ, तैरौ छोहरु जीऊंदौ आ।” तिणी आदमीए यीशु री बोली औन्दौ बूश मानी एरी और डेई गौ। ⁵¹ सेऊ बाटाई थौ कि तेसरै साथी तेसकु आशियो मिलै और बोलदै लागै, “तैरौ छोहरु जीऊंदौ आ।” ⁵² तिणीए तिऊंकु पूछे, सेऊ “कैजै बोग्तै आच्छौ हुंदै लागौ?” तिउंरै तेसलै बोलौ, “हीज सालवे घाण्टे ऐ तेसरौ बुखार उतरी गौ।” ⁵³ तैबे तिणीए जाणी गौ कि एऊ सेजी घौडिरे ठीक हुआ जेजी घौडिरे यीशुए मुलै बोलौ, “तैरौ छोहरु जीऊंदौ आ,” और तिणीए और तेसरै सारै घौरा वालेउए सारेउए विश्वास कियो। ⁵⁴ एऊ दूजौ चमत्कार थौ जो यीशुए यहूदिया कु गलीला दी आशियो देखालौ।

अठारस बौर्षा रौ रोगी चांगो कौरणो

5 इऊं बुशु बासीए यहूदिया रौ एक साज्राँ हुओँ, और यीशु यरुशलमा लै डैओ। 2 यरुशलमा दी भेरी रे बौडै-दारा कारे एक कुण्ड/कुओँ आ जेथले इब्रानी भाषा दी बैतहसदा बोलाई; तेसरै पांज ओसारै/धुरे ई। 3 इऊं धुरे/डिका दी भौरी बिमार, आखी रे शेडै, लोंगडै और शूके औन्दै शरीरा रे (पाणी हिलणै री आशा दी तिरे रौआ थै।) 4 (कैलैकि ठीक बोग्ता दी परमेश्वरा रे दूत कुण्डा दी उतरियो पाणी हिलावा थै। पाणी हिलदी बारै जुण-कुण पैहलै कुंए दी उतरा थौ सेऊ ठीक हुआ थौ चाउ तेसदी केजी भी बिमारी कैलै ना औली।) 5 तिरे एक आदमी थौ, जो एक बिरे ठाहरा साला ओउलै बिमारी दी थौ पौडौ औन्दौ। 6 यीशुए सेऊ पौडौ औन्दौ देखियो और इणो जाणियो कि सेउ भौरी दिना ओउलै आ ऐजी हालता दी पौडौ औन्दौ, तिणीए पूछौ, “का तू ठीक हुणो चाह ई?” 7 तिणी बिमार आदमिरे तेसलै जवाब दैओ, “ओ प्रभु, मु कारे कोई भी आदमी नाई कि जेबी परमेश्वरा रे दूत पाणी हिलावा ई, ता मु कुरे दी उतरा; पर मैरे पहुंचणे कु दूजो मुकु पैहलै उतरा आ।” 8 यीशुए तेसलै बोलौ, “उठ, आपणो बिस्तरौ चुंग और आण्ड-फिर।” 9 सेउ आदमी खरकचर ठीक हुई गौ, और आपणे बिस्तरै चुंगीयो आण्ड-फिरदे लागी गौ। 10 सेऊ आरामा रौ दिन थौ। एथीलै यहूदी तेसलै जो ठीक हुओँ थौ, बोलदै लागे, “आज ता आरमा रौ दिन आ, ताउलै बिस्तरौ उठाऊणो ठीक नाई।” 11 तिणीए तिउलै जवाब दैओ, “जुणिए हाऊं ठीक कियो ऊ, तिणीए मुंलै बोलौ, “आपणो बिस्तरौ चुंग, और आण्ड-फिर।” 12 तिउरे तेसकु पूछौ, “सेऊ कुण आदमी आ, जुणिए ताउलै बोलौ, ‘बिस्तर चुंग, और आण्ड-फिर?’” 13 पर जुण ठीक हुई गौ थौ सेउ भी नाई जाणा थौ कि सेउ कुण आ?, कैलैकि सेजी ज़ागाहा दी भीड़ हुणै रे कारण यीशु तिवरु भागी गौ थौ। 14 इऊं बुशु बासीए सेऊ यीशु कु परमेश्वरा रे घौरा दी मिलौ। यीशुए तेसलै बोलौ, “देख, तू ठीक हुई गौ ई: दूजी बारै पाप ना कौरै, इणो ना चाई हुओँ कि इणै कौरी ताउलै कोई बौडी मुसीबत आशा।” 15 तीणी आदमीए डेईयो यहूदिऊ लै बोली गौ कि जुणिए हाऊं ठीक कियोऊ सेऊ यीशु आ। 16 एथ कौरी यहूदी यीशु सताऊदै लागे, कैलैकि सेऊ इणै काम साज्रा रे दिना दी कौरा थौ। 17 एथी माथे यीशुए तिउलै बोलौ, “मैरौ बाब इबी ज़ाऊं काम कौरा आ, और हाऊं भी काम कौराऊ।” 18 एजै मतलबै यहूदी यीशु ज़ांगणा री भौरी कोशीश कौरदै लागे, कैलैकि तिणीए साजरे रे दिना रौ रीवाज चोडौ, और परमेश्वरा लै आपणो बाब बोलियो आपूलै परमेश्वरा रे बराबर माना थौ।

छोहरु रौ हक

19 एथ माथे यीशुए तिउलै बोलौ, “हाऊं तुमुलै सौच्चौ-सौच्चौ बोलाऊ, छोहरु आपू ई कुछ नाई कौरदौ, सिर्फ सेउ जुण बाब कौरदै देखा आ; कैलैकि जो-जो काम बाब कौरा आ तिउं काम छोहरु भी तिणै कौरिरे कौरा सा। 20 पर बाब छोहरु आईलै प्यार छाड़ा सा और जो-जो काम सेऊ आपु कौरा आ, तिउं सारै काम तेसके देखाला आ; और सेउ ऐथकु भी बौडै काम तेसके देखाला, ताकी तुमै हैरान हुआ। 21 जिणो बाब मौरै औन्दै उठावा और जिउंदे कौरा, तिणी ई छोहरु भी जास चाहा लौ तिउं जिउंदौ कौरा आ। 22 बाब कासी रौ फैसलौ नाई कौरदौ, पर फैसलै रौ सारौ काम छोहरु कै सौभाली गौ आ, 23 कि सारै लोग जिणो बाबा री इज्जत कौराई, तिणी ई छोहरु री भी इज्जत कौरा। जो छोहरु री इज्जत नाई कौरदौ, सेऊ बाबा री जुणीए सेऊ भेजौ औन्दौ आ, इज्जत नाई कौरदौ। 24 हाऊं तुमुलै सौच्चौ बोलाऊ, जुण मैरौ वचन शुणियो मैरे भेजणै वालै माथे विश्वास कौरा आ; सौदा री जिन्दगी तेसरी आ। तेस माथे सौज्रा रौ हुकम नाई औन्दौ। पर सेऊ मौरनै कु पार हुईयो जिन्दगी दी पहुंची गौ आ। 25 “हाऊं तुमुलै सौच्चौ-सौच्चौ बोलाऊ सेऊ बौक्त आशा सा, और आबै आ, जेथदी मौरै औन्दै परमेश्वरा रे छोहरु री आवाज शुणालै, और जुण शुणालै से जिवा लै। 26 कैलैकि जेजी रीति कौरी बाब आपुदी जिन्दगी छाड़ा सा, तिणी रीति कौरी तिणीए आपणै छोहरु कै भी ऐऊ हक दैओ आ कि आपुदी जिन्दगी छाड़ा; 27 और तेसके फैसलै कौरनै रौ हक भी दैओ औन्दौ आ, एथिलै कि सेऊ आदमी रौ छोहरु आ। 28 इणै कौरी हैरान नाई हुओँ; कैलैकि सेजो बौक्त आशा आ कि जेती

कौब्रा दी ई सै तेसरी आवाज शुणियो निकलियो आशा ई। 29 जुणिए भौलाई आ कौरी ऐन्दी सै जिन्दगी दी दूजी बारै जिउणा लै उठाई, और जुणिए आ बुराई कौरी ऐन्दी सै सजा लै दूजी बारै जिउंदै हुआ ई।

यीशु रे बारै दी गवाही

30 हाऊं आपु कौरी कुछ नाई कौरी बोलदौ; जिणो शुणा ऊ, तिणो फैसलौ कौराऊ, और मैरौ फैसलौ सौच्चौ आ, कैलैकि हाऊं आपणी मौरजी कौरी नाई पर आपणै भेजणै वालै री मौरजी चाहा ऊ। 31 अगर हाऊं आपू ई आपणी गवाही देऊ, ता मेरी गवाही सौच्चौ नाई। 32 एक ओर आ जुण मेरी गवाही दिआ सा, और हाऊं जाणाऊ कि जुण मेरी गवाही दिआ आ, सै सौच्चौ आ। 33 तुमुंए यहूना कु पुछवाओ और तिणीए सौच्चौ री गवाही देई आ। 34 पर हाऊं आपणै बारै दी आदमी री गवाही नाई चांहदौ; तैबै भी हाऊं इऊं बुशै ऐथलै बोलाऊ कि तुमुलै छुटकारौ मिला। 35 सेऊ ता ज़ौलदौ और चमकुदौ दिवौ थौ, और तुमुलै कुछ बोग्ता ज़ाऊं तेसरै प्याशै दी मोगन हुणो आच्छौ लागौ। 36 पर जो मुके गवाही आ सै यहूना री गवाही कु बौडी आ; कैलैकि जो काम बाबै मुके पूरौ कौरना लै आ दैओ औन्दौ या सेजौ काम जो हाऊं कौरा ऊ, सै मैरे गवाह ई कि बाबा रे हाऊं भेजौ औन्दौ ऊ। 37 और बाब जुणिए हाऊं भेजौ औन्दौ ऊ, तिणीए मेरी गवाही देई आ, तुमुए ना केबी तेसरी हाक शुणी, ना तेसरौ रूप देखो; 38 और तेसरौ वचन मौना दी टेकाली नाई छाड़दै, कैलैकि जुणीए सेऊ भेजौ तुमै तेसरौ विश्वास नाई कौरदौ। 39 तुमै पवित्रशास्त्रा दी लोडाई, कैलैकि सौमझा ई कि तेथदी सौदा री जिन्दगी तुमुलै मिला आ; और एऊ सेऊ आ जो मेरी गवाही दिया आ; 40 तैबै भी तुमै जिन्दगी पाइणा लै मुं कारे आशणौ नाई चांहदौ। 41 हाऊं आदमिऊ कु इज्जत नाई चांहदौ। 42 पर हाऊं तुमु जाणाऊ कि तुमुदी परमेश्वरा रौ प्रेम नाई। 43 हाऊं आपणै बाबा रे नावा कौरीए ऊ आशौ औन्दौ, और तुमै मुं नाई मानदै; अगर दूजो कोई आपणै ही नावा कौरी आशा, ता तेस तुमै मानाई। 44 तुमु जो एकी दूजे कु इज्जत चाहा ई और से इज्जत जो सिर्फ परमेश्वरा री तौरफा कु आ, नाई चांहदै, किणै कौरिरे विश्वास कौराई? 45 इणो नाई जाणो कि हाऊं बाबा कारे तुमुदी आरोप ला ऊ; तुमुदी आरोप लाइणै वालौ ता मूसा आ, जास माथे तुमारै भरोसो आ छाड़ा औन्दौ। 46 कैलैकि अगर तुमै मूसा रौ विश्वास कौरा थै, ता मैरौ भी विश्वास कौरा थै, एथिलै कि तिणीए मैरे बारै दी लिखौ औन्दौ आ। 47 पर अगर तुमै तेसरी लिखी ऐन्दी बुशु माथे विश्वास नाई कौरदै, ता मेरी बुशु माथे किणो विश्वास कौराई?”

पांज हजार पूरषा लै रोटी खिलाउणी

(मती14:13-21; मरकुस6:30-44; लूका9:10-17)

6 इऊं बुशु बासीए यीशु गलीला री झीला मतलब कि तिबिरियासा री झीला कु पारभिलै डैओ। 2 और एक बौडी भीड़ तेस पिछू हुई गोई कैलैकि जो चमत्कार सेऊ बिमारु माथे देखाला थौ सै तिउं देखा थै। 3 तैबै यीशु पाहाड़ा दी चोडियो आपणै चैलेऊ आईलै तिरे बोशी गौ। 4 यहूदिऊ रे फसहा रौ साजो नजदीक थौ। 5 जेबी यीशुए आपणी आखी उठाइयो एक बौडी भीड़ आपू कारे आशदै देखी, ता फिलिप्पुसा लै बोलौ, “आमै ईउलै खाणा लै रोटी किदरा कु खरिदियो आणी लै?” 6 तिणीए एजी बूश तेस पौरखुणा लै बोली, कैलैकि सेऊ आपू ही जाणा थौ कि सेऊ का कौरा। 7 फिलिप्पुसै तेसलै जवाब दैओ, “दूई शौ दीनारा री रोटी भी ईउलै पूरी नाई औन्दी कि ईऊं मांझीया कु हर एकी लै थोड़ी-थोड़ी मिला।” 8 तिउं चैलेऊ मांझीया कु शमोन पतरसा रौ भाई अन्द्रियासै तेसलै बोलौ, 9 “इदै एक छोहरु आ जासके जौआ री पांज रोटी और दूई माछी आ; पर एती लोग लै सै का सा?” 10 यीशुए बोलौ, “लोगु बोशालौ।” सेजी ज़ागाहा दी भौरी घास थौ: तैबै लोग बोशी गौए, जास मांझीए मौरद तकरीबन पांज हजार थै। 11 तैबै यीशुए रोटी कौरौ, और धन्यावाद कौरियो बोशणै वालेऊ लै बाँटी गोई; और तिणी ई माछी मांझीया कु जेती सै चाहा थै बाँटी गोई। 12 जेबी सै खाईयो निपटी गौए ता तिणीए आपणै चैलेऊ लै बोलौ, “बौचै औन्दै गासडू कौठै कौरौ कि कुछ डोकै, ना पाईयो।” 13 तैबै तिउरे कौठै किरै, और जौआ री पांज रोटी रे टुकडै कु जो खाणावालेउ कु बौचै औन्दै थै, बारह छाबडै भौरै।

14 तैबे जो चमत्कार तिणीए कौरीओ देखालो तेस देखियो सै लोग बोलदै लागै, "सेऊ भविष्यवक्ता जो दुनिया दी आशणै वालो थौ पाक्को ऐऊ आ।" 15 यीशुए इणो जाणियो कि इए मुं राजो चाणना लै पाकुड़नो चाहा ई, तैबे पाहाड़ी माथे ऐखुली डेई गौ।

यीशु सै पाणी माथी आण्डणो (मती 14:22-23; मरकुस 6:45-52)

16 जेबी राच हुई, ता तेसरै चेलै झीला रै डिका कारे डेवै, 17 और किशती दी चौड़ियो झीला दी पारै कफरनहूमा लै डेऊंदै लागै। सेजे बोगतै राच हुई गोई थी, और यीशु इभी झाऊं तिऊ कारे नाई आशौ थौ। 18 तेज बागुरा कौरीए झीला दी पाणी रै छाले उपरै उठदै लागौ। 19 जेबी सै सुलै-सुलै चीन-चार मील दूर निकली गोए, ता तिउंरै यीशु पाणी दी आण्डदै और किशती रै नजदीक आशदै देखौ, और डौरी गोए। 20 पर तिणीए तिउंलै बोलौ, "हाऊं ऊ; डौरौ नाई।" 21 तैबे सै तेस किशती दी चड़ाऊणा लै तैयार हुई गोए और तेबी सै किशती सेजी जागहा दी पहुंची जिरे सै डेऊंदै थै लागै ओन्दै।

लोगु रौ यीशु लोड़नौ

22 दूजे दिने तिणै भीड़ा रै लोगुए, जो झीला रै पारभिलै खौड़ी थी, इणो देखौ कि इदै एकी छाड़ियो कोई भी दूजी किशती नाई थी; और यीशु आपणै चैलेऊ आईलै तिणै किशती दी नाई चौड़ो थौ, पर सिर्फ तेसरै चैले ही डेवै। 23 तैबे ओर किशती तिबिरियासा कु तिणै जागहा रै नजदीक आशी, जिरे तिउंरै प्रभु रौ धन्यावाद कौरनै बासीए रोटी खाई थी। 24 एथीलै जेबी भीडे देखौ कि इदै ना ता यीशु आसतौ और ना ता तेसरै चेलै, तैबे सै भी किशती दी चौड़ियो यीशु लोड़दै-लोड़दै कफरनहूमा दी पहुंचै।

यीशु जिन्दगी री रोटी

25 झीला पारभिलै जेबी सै तेसकु मिलै ता बोलौ, "ओ गुरु, तू इदै केबी आशौ ई?" 26 यीशुए तिउंलै जवाब दैओ, "हाऊं तुमु लै सौचौ-सौचौ बोलाऊ, तुमै मुं ऐथलै नाई लोड़दै कि तुमुए चमत्कार देखौ पर ऐथलै कि तुमै रोटी खाईयो डौटी गोए। 27 नाश हुणै वाली रोटी लै तुमै मेहनत नाई कौरौ, पर तिऊं रोटी लै जो सौदा लै रौआ ई, जो आदमी रौ छोहरू तुमुलै दिया; कैलैकि बाबै मतलब परमेश्वरै तेसदी छाप आ लाई ऐन्दी।" 28 तिउंरै तेसलै बोलौ, "परमेश्वरा रै कामा कौरना लै आमै का कौरिलै?" 29 यीशुए तिउंलै जवाब दैओ, "परमेश्वरा रौ काम ऐऊ आ कि तुमै, जुणिए सेऊ भेजौ ओन्दौ आ, तेस माथे विश्वास कौरौ।" 30 तैबे तिउंरै तेसलै बोलौ, "तैबे तू केजौ चिन्ह देखाला ई कि आमै तेस देखीयो तैरौ विश्वास कौरु? तू केजौ काम देखाला ई? 31 आमारै नाना-बुद्धे जांगला दी मन्ना (सौरगा री रोटी) खाओ; जिणो लिखौ ओन्दौ आ, 'तिणीए तिउंलै खाणा लै सौरगा कु रोटी देई।' 32 यीशुए तिउंलै बोलौ, "हाऊं तुमुलै सौचौ-सौचौ बोलाऊ कि मूसै तुमुलै सै रोटी सौरगा कु नाई देई, पर मैरौ बाब तुमुलै सौचौ रोटी सौरगा कु दिया आ। 33 कैलैकि परमेश्वरा री रोटी से ई आ जो सौरगा कु उतरियो धौतरी लै जिन्दगी दिया आ।" 34 तैबे तिउंरै तेसलै बोलौ, "ओ प्रभु, ऐजी रोटी आमंलै सौदा देई लाए।" 35 यीशुए तिउंलै बोलौ, "जिन्दगी री रोटी हाऊं ऊ: जुण मुं कारे आशा आ सेऊ केबी भी भूखौ नाई रौइदौ, और जुण मुं माथे विश्वास कौरा आ सेऊ केबी भी चीशौ नाई रौइदौ। 36 पर मुएँ तुमुलै बोलौ थौ कि तुमुए हाऊं देखी भी गो ऊ तैबे भी विश्वास नाई कौरदै। 37 जो कुछ बाब मुलै दिया आ सेऊ सब मुं कारे आशा, और जुण भी मुं कारे आशालो तेस हाऊं केबी नाई गाड़दौ। 38 कैलैकि हाऊं आपणो मौरजी नाई पर आपणै भेजणै वालै री मौरजी पूरी कौरना लै सौरगा कु उतरौ ऊ; 39 और मैरै भेजणै वालै री मौरजी ऐजी आ कि जो कुछ तिणीए मुकै दैओ आ, तेथ मांझिया हाऊं कुछ ना खोऊ, पर तेस आखरी दिना दी तौणै जिउंदौ कौरु। 40 कैलैकि मैरै बाबा री मौरजी इणी आ कि जुण-कुण छोहरू देखा लौ और तेस माथे विश्वास कौरा, सेऊ सौदा री जिन्दगी पा; और हाऊं तेस आखरी दिने तौणै जिउंदौ कौरु।" 41 एथीलै यहूदी तेसलै घुणमुणां दे लागै, कैलैकि तिणीए बोलौ थौ, "जो रोटी सौरगा कु उतरौ आ, सै रोटी हाऊं ऊ।" 42 और तिउंरै बोलौ,

"का ऐऊ यूसुफा रौ छोहरू यीशु नाई, जासरै मां-बाब आमै जाणी ई? ता एऊ किणौ बोला कि हाऊं सौरगा कु उतरौ ऊ?" 43 यीशुए तिउंलै जवाब दैओ, "आपू मांझी नाई घुणमुणाओ। 44 कोई मुं कारे नाई आशी बौलदौ जेबी झाऊं बाब, जुणिए हाऊं भेजौ ओन्दौ ऊ, तेस झिडा नाई लौ; और हाऊं तेस आखरी दिने तौणै जिउंदौ कौराऊ। 45 भविष्यवक्ता रै लेखा दी इणो आ लिखौ ओन्दौ: 'सै सारै परमेश्वरा री तौरफा कु शिखाए ओन्दै औलै।' जुण-कुणिए बाबा कु शुणौ और शिखौ आ, सेउ मुं कारे आशा आ। 46 इणो नाई कि कुणीए बाब देखौ; पर जो परमेश्वरा री तौरफा कु आ, सिर्फ तिणीए ई बाब देखौ आ। 47 हाऊं तुमुलै सौचौ-सौचौ बोलाऊ कि जुण-कुण विश्वास कौरा सा, सौदा री जिन्दगी तेसी री आ। 48 जिन्दगी री रोटी हाऊं ऊ। 49 तुमुरै नाना-बुद्धे जांगला दी मन्ना खाओ और मौरौ गोए। 50 इए सेजी रोटी आ जो सौरगा कु उतरौ आ ताकी आदमी तिऊं मांझिया कु खा और नाई मौरा। 51 जिन्दगी री रोटी जो सौरगा कु उतरौ, हाऊं ऊ। अगर कोई इणै रोटी कु खा लौ, ता सौदा लै जिउंदौ रौआ; और जो रोटी हाऊं दुनिया री जिन्दगी लै दियाऊ, सै मैरौ मांस आ।" 52 ऐथ माथे यहूदी इणै बोलियो आपू मांझी लोड़दै लागै, "ऐऊ आदमी किणै कौरी आमूलै आपणो मांस खाणा लै देई बौला आ?" 53 यीशुए तिउंलै बोलौ, "हाऊं तुमुलै सौचौ-सौचौ बोलाऊ कि जेबी झाऊं तुमै आदमी रै छोहरू रौ मांस नाई खा लै, और तेसरौ लोऊ नाई पीआ लै, तुमुदी जिन्दगी नाई। 54 जो मैरौ मांस और मैरौ लोऊ पिया आ, सौदा री जिन्दगी तेसी री आ; और हाऊं आखरी दिना दी तौणै तेस जिउंदौ कौराऊ।" 55 कैलैकि मैरौ मांस सौचौ ई खाणै री चीज आ, और मैरौ लोऊ सौचौ ई पिणै री चीज आ। 56 जुण मैरौ मांस खा और मैरौ लोऊ पिया आ सेउ मुंदी पाकौ बौणी रौआ आ, और हाऊं तेस दी। 57 जिणो जिउंदै बाबै हाऊं भेजौ, और हाऊं बाबा रै कारण जिउंदौ ऊ, तिणी ई सेउ भी जो मुं खा लौ मैरै कारण जिउंदौ रौआ आ। 58 जो रोटी सौरगा कु उतरौ आ ऐजी आ, तिणै रोटी जिणी नाई जो नाना-बुद्धे खाई और मौरौ गोए; जुण-कुण ऐजी रोटी खा लौ, सेउ सौदा जिउंदौ रौआ।" 59 ऐजी बूश तिणीए कफरनहूमा रै एकी धार्मिक खुम्बली दी शिक्षा दैदी बारै बोली।

सदा री जिन्दगी रै वचन

60 तेसरै चैलेऊ मांझिया कु भौरी आदमीउए इणो शुणियो बोलौ, "ऐजी काठी बूश आ; इणो कुण शुणी बौला आ?" 61 यीशुए आपणै मौना दी इणो जाणियो कि मैरै चेलै आपू मांझीए ऐजी बूश माथे घुणमुणा ई, तिऊं कु पूछौ, "का ऐजी बूश कु तुमुदी ठोकर लागा आ? 62 अगर तुमै आदमी रौ छोहरू जिरे सेऊ पैहलै थौ, तिरे उपरै डेऊंदै देखाले, ता का औलौ? 63 आत्मा ता जिन्दगी देणै वाली आ, शरीरा कु कुछ फाइदौ नाई आ; जो बूश मुं तुमुलै बोली आ सै आत्मा आ, और जिन्दगी भी आ। 64 पर तुमु मांझिया कु कुछ इणै जो विश्वास नाई कौरदै।" कैलैकि यीशु पैहलै कु जाणा थौ कि जो विश्वास नाई कौरदै, सै कुण ई; और कुण मुं पकड़ावा ई। 65 और तिणीए बोलौ, "एथीलै मुएँ तुमुलै बोलौ थौ कि जेबी झाऊं कास लै बाबा री तौरफा कु ऐऊ वरदान नाई मिला लौ तेबी झाऊं सेउ मुं कारे नाई आशी बौलदौ।"

पतरसा रौ विश्वास

66 ऐथ माथे तेसरै चैलेऊ मांझिया कु भौरी वापिस डेई गोए और तेथ बासिए तेस आईलै नाई डेवे। 67 तैबे यीशुए तिऊं बारह चैलेऊ लै बोलौ, "का तुमै भी डेऊणौ चाहा ई?" 68 शमोन पतरसै तेसलै जवाब दैओ, "ओ प्रभु, आमै कास कारे डेई? सौदा री जिन्दगी री बुशे ता ताउंकै ई; 69 और आमुं विश्वास कियो और जाणी गोए कि परमेश्वरा रौ पवित्र आदमी तू ई।" 70 यीशुए तिउंलै जवाब दैओ, "का मुइरे तुमै बारह चेलै नाई छाँटे? तैबे भी तुमु मांझिया कु एक आदमी शैतान आ।" 71 ऐजी बूश तिणीए शमोन इस्करियोती रै छोहरू यहूदा रै बारै दी बोलौ थौ, कैलैकि एऊ ई थौ जुण बारह चैलेऊ मांझिया कु एक थौ, तेस पकड़ाउणै वालौ।

यीशु और तेसरै भाई

7 ईऊं बुशु बासिरे यीशु गलील इलाके दी घुमदै थाकौ लागी; कैलैकि यहूदी तेस झांगणें री कोशिश थें कौरदै लागे औन्दै, एथीलै सेऊ यहूदीऊरें इलाके दी घुमणो नाई चा थौ। 2 यहूदीऊरें घौरा रौ साजौ नजदीक थौ। 3 एथीलै तेसरै भाईउरे तेसलै बोलौ, “इदरा कु यहूदिया लै डेरु, कि जो काम तू कौराई तिऊं तैरें चेलै तिरै भी देखा। 4 कैलैकि इणौ कोइयौ ना औलौ जुण मशहूर हुणौ चाहा और चोरुइयौ काम कौरा। अगर तू एजौ काम कौराई, ता आपु इएँ दुनिया दी परगट औऊ।” 5 कैलैकि तेसरै भाई भी तेस माथे विश्वास नाई कौरा थै। 6 तैबै यीशुए तितलै बोलौ, “मैरौ बौक्त इबी झाऊं नाई आशौ, पर तुमुलै सारौ बौक्त आ। 7 दुनिया तुमु कु दुश्मनी नाई कौरौ सौकदौ, पर दुनिया मुकु दुश्मनी कौरा आ कैलैकि हाऊं तेसरै विरोधाई इएँ गवाही दिआ ऊ कि तेसरै काम बुरै ई। 8 तुमै साजै दी डैऔ; हाऊं इबी ऐजै साजै दी नाई डेऊंदौ, कैलैकि इबी झाऊं मैरौ बौक्त पुरौ नाई हुओ।” 9 सेऊ तिऊंकु ऐजी बुशै बोलियौ गलीला दी ई रौई गा।

गरीबू रें घौरा दी साजै मांझी यीशु

10 पर जेबी तेसरै भाई साजै दी डेई गौरे ता यीशु आपु भी, पौगडै दी नाई पर मानौ चोरुइयौ डैऔ। 11 यहूदी साजै दी तेस इणै बोलिऔ लोडदै लागे, “सेऊ किरै आ?” 12 और लोगु मांझीए तेसरै बारै दी चोरी-चोरीऔ भौरी का बुशै हुई: कुछ बोला थै, “सेऊ भौलौ आदमी आ।” और कुछ बोला थै, “नाई, सेऊ लोगु बिश्वाशा आ।” 13 तैबै भी यहूदीऊरें डौरै कोई भी आदमी तेसरै बारै दी खुलियौ नाई बोला थै।

साजै मांझी यीशु रौ उपदेश

14 जेबी साजै रें आथे दूस बीती गौरे; ता यीशु परमेश्वरा रें घौरा दी डेईयौ शिक्षा देन्दै लागौ। 15 तैबै यहूदीऊरें हैरान हुइयौ बोलौ, “एसकै बिण पौडी विद्या किणी आशी गोई?” 16 यीशुए तितलै जवाब दैऔ, “मैरी शिक्षा मैरी नाई, पर मैरै भेजणें वालै री आ। 17 अगर कोई तेसरी इच्छा दी आडणौ चाहा, ता सेऊ इएँ शिक्षा रें बारै दी ज्ञाणा लौ कि इएँ परमेश्वरा री तौरफा कु आ या हाऊं आपणी तौरफा कु बोलाऊ। 18 जो आपणी तौरफा कु कुछ बोला आ, सेऊ आपणी ही बौडाई चाहा सा; पर जो आपणें भेजणेंवालै री बौडाई चाहा सा सेऊ ई सौचौ आ, और तेसदी कोई बुरी बूश नाई। 19 का मूसै तुमुलै नियम नाई दैऔ? तैबै भी तुमु मांझीया कु कोई नियमा दी नाई हाडदौ। तुमै मुं कैलै झांगणौ चाहा ई?” 20 लोगुए जवाब दैऔ, “तुमु दी बुरी आत्मा आ! तुमु कुण झांगणौ चाहा सा?” 21 यीशुए तितलै जवाब दैऔ, “मुइंरे एक काम किऔ, और तुमै सारै हैरान हुआ ई। 22 ऐजै कारणे मूसै तुमुलै खतनौ कौरनै री आज्ञा देई आ (इणौ नाई सेऊ मूसा री तौरफा कु आ पर नाना-बुडु कु चाली ऐन्दी आ), और तुमै साजै रें दिनै आदमी रौ खतनौ कौराई। 23 जेबी साजै रें दिना दी आदमी रौ खतनौ कौराई ताकि मूसा रें नियमा री आज्ञा टौली ना चाई, ता तुमै मुं माथे ऐजी ताइएँ रोश कैलै गाडाई कि मुइंरें साजै रें दिना दी एक आदमी आच्छा कौराई चांगौ किऔ। 24 मुंह देखीयौ फेसलौ नाई कौरौ, पर ठीक-ठीक फेसलौ कौरौ।”

का यीशु ही मसीह आ?

25 तैबै कुछ यरुशलैमा दी रौइणें वालै बोलदै लागे, “का एऊ सेऊ नाई जास झांगणें री कोशिश कौरदै ई लागे औन्दै?” 26 पर देखौ, “एऊ ता खुलम-खुलौ बुशै ला सा और कोई भी तेसलै कुछ नाई बोलदै। का मुखेऊरें सौचौ-सौचौ ज्ञाणी ऐरौ आ कि एऊ ई मसीह आ? 27 एस ता आमै ज्ञाणी ई कि एऊ किदलौ आ; पर जेबी मसीह आशालौ ता कोई नाई ज्ञाणालौ कि सेऊ किदलौ आ।” 28 तैबै यीशुए परमेश्वरा रें घौरा दी शिक्षा देन्दी बारै औटाइयौ बोलौ, “तुमै मुं ज्ञाणाई, और इणौ भी ज्ञाणाई कि हाऊं किदलौ ऊ। हाऊं ता आपु नाई आशौ, पर मैरौ भेजणें वालौ सौचौ आ, तेस तुमै नाई ज्ञाणदै। 29 हाऊं तेस ज्ञाणाऊ कैलैकि हाऊं तेसरी तौरफा कु और तिणीए हाऊं भेजौ ऊ।” 30 एजी बुशा माथे तितरें सेऊ पाकुडनौ चाओ, तैबै भी कोइए तेसदी

हाथ नाई लाओ कैलैकि तेसरौ बौक्त इबी झाऊं नाई आशौ थौ। 31 तैबै भी भीड़ा रें भौरी लोगुए तेस माथे विश्वास कियौ, और बोलदै लागे, “मसीह जेबी आशालौ ता का एथ कु भी बौडै चमतकार देखालाई जिणै इणीए देखालै ई?”

यीशु पाकुडनै रौ कोशिश

32 फरीसिउरे लोगु कु यीशु रें बारै दी एजी बुशै चोरी-चोरीऔ लाइंदै शुणी; और परधान याजकु और फरीसिउरे तेस पाकुडना लै सिपाई भेजै। 33 एथ माथे यीशुए बोलौ, “हाऊं थोडै बौगता झाऊं तौरें तुमु आईलै ऊ, तैबै आपणें भेजणें वालै काए डेआऊ। 34 तुमै मुं लोडाई, पर नाई मिलु लौ; और जिणै हाऊं ऊ, तिरै तुमै नाई आशी बोलदै।” 35 एथ माथे यहूदी आपु मांझीए बोलदै लागे, “एऊ किरै डिआ कि एऊ आमुकें नाई मिलालौ? का एऊ तिऊं काए डिआ जो यूनानिया दी तितर बितर हुइयौ रौआई, और यूनानिऊ मांझीए भी परचार कौरा? 36 एजी का बूश आ जो इणीए बोली, कि ‘तुमै मुं लोडाई, पर नाई मिलु लौ; और जिणै हाऊं ऊ, तिरै तुमै नाई आशी बोलदै?’”

जिन्दगी रें पाणी री नौ (नदी)

37 साजै रें आखरी दिनै, जो बौडौ दिन आ, यीशु खौडौ हुओ और औटाइयौ बोलौ, “अगर कोई चिशौ आ ता मुं काए आशा और पिया। 38 जुण मुं माथे विश्वास कौरालौ, जिणौ पवित्रशास्त्रा दी आशौ आ, ‘तेसरै जिवा भिता कु जिन्दगी रें पाणी री नौई बौइयौ निकला।’” 39 तिणीए एऊ वचन तिरें आत्मा रें बारै दी बोलौ, जो तेस माथे विश्वास कौरनै वालै थै; कैलैकि आत्मा इभी झाऊं नाई उतरौ थौ, कैलैकि यीशु इभी झाऊं आपणी महीमा दी नाई आशौ थौ। 40 तैबै भीड़ा मांझिया कु कुणिये ऐजी बुशै शुणियौ बोलौ, “सौचौ ई एऊ सेऊ भविष्यवक्ता आ।” 41 दुजै आदमिउरे बोलौ, “एऊ मसीह आ।” पर केजेउरे बोलौ, “कैलै? का मसीह गलीला कु आशा आ? 42 का पवित्रशास्त्र दी इणौ नाई आशौ कि मसीह दाऊद रें वंशा कु और बैतलहम गावां कु आशा जिणै दाऊद रौआ थौ?” 43 तैबै तेसरै कारणे लोगु मांझीए फूट पौडी। 44 तिऊं मांझीए कुछ तेस पाकुडनौ चाहा थै, पर कोइए तेस माए हाथ नाई पाओ।

यहूदी अगुएउ रौ अविश्वास

45 तैबै सिपाही परधान याजक और फरीसिऊ काए आशै; तितरें तेसलै बोलौ, “तुमुए सेऊ कैलै नाई आणौ?” 46 सिपाहीउरे जवाब दैऔ, “केजै आदमिरे केबी भी इणी बुशै नाई लाई।” 47 फरीसिउरे तितलै जवाब दैऔ, “का तुमै भी बोलाउई गौरे? 48 का सरदारु या फरीसिऊ मांझीया कु कोइए भी तेस माथे विश्वास कियौ आ? 49 पर इएँ लोग जो कानून नाई जाणदै, शापित ई।” 50 नीकुदेमूसै, जो पैहलै तेस काए आशौ थौ और तिऊं मांझिया कु एक थौ, तिणीए बोलौ, 51 “का आमरौ नियम केजै आदमी लै, जेबी झाऊं पैहलै तेसरी शुणीयौ सौमझा नाई लै कि सेऊ का कौरा आ, आरोपी चाणाई?” 52 तितरें तेसलै जवाब दैऔ, “का तू भी गलीला कु ई? लोड और देख कि गलीला कु कोई भविष्यवक्ता परगट ता ना हुओ।” 53 तैबै सौबी आपणें-आपणें घौरै डेई गौरे।

गाँदे कामा कौरणें वाली लै माफी

8 पर यीशु जैतूना री धारा दी डैऔ। 2 दोउती सेऊ तौरें परमेश्वरा रें घौरा दी आशौ; सारै लोग तेस काए आशै और सेऊ तिऊं लै शिक्षा देंदै लागौ। 3 तैबै शास्त्री और फरीसीए एक छेउडी आणी जो गाँदे काम कौरदी बारै पाकुडुई गोई थी, और सै मांझादी खौडी कौरियौ यीशु लै बोलौ, 4 “ओ गुरु, ए छेउडी गाँदे कामा कौरदी बारै पाकुडुई आ। 5 कानूना दी मूसै आमूलै हुकम दैऔ आ कि इणी छेउडी ढोला कौरौ ढोलीयाऊणी; आबे तू इएँ छेउडी रें बारै दी का बोलाई?” 6 तितरें तेस अजमाऊणा लै एजी बूश बोली ताकी तेस माथे गौलती लाइणा लै केजी बूश पाकड़ा। पर यीशु उटै पौडियौ औउठी कौरौ जबीना दी लिखदै लागौ। 7 जैबे सै काठै-काठै पूछदै लागे, ता यीशुए सीधो हुईयौ बोलौ, “तुमु मांझिया कु जुण पापी नाई आ, सेऊ पैहलै ईयां दी ढोला री ला लौ।” 8 और तैबै उटै पौडीयौ जबीना दी लिखदै लागौ।

9 पर सैं इणौ शुणियो बौडै कु छोटै झाऊं, एक-एक कौरीए निकली गौए, और यीशु ऐखुली रौई गौ। 10 यीशुए सीधौ हुईयो तियांलै बोलौ, “ओ बौईण, सैं किये डेवै ई? का कोइए ताऊं माथे सौजा रौ हुकम नाई दैऔ?” 11 तिआएँ बोलौ, “ओ प्रभु, कोइए नाई।” यीशुए बोलौ, “हाऊं भी ताऊं माथे सौजा रौ हुकम नाई दैन्दौ; डेरु, और दुजी बारै केभी भी पाप नाई कौरणौ।”

यीशु दुनिया रौ प्याशौ

12 यीशुए तौंइए लोगू लै बोलौ, “दुनिया रौ प्याशौ हाऊं ऊ; जुण मूं पिछू आशालौ सेऊ न्यारै दी नाई ओआलौ, पर जिन्दगी रौ प्याशौ पा लौ।” 13 फरीसिउए तेसलै बोलौ, “तू आपणी गवाही आपू दिया ई, तेरी गवाही ठीक नाई।” 14 यीशुए तिउंलै जवाब दैऔ, “अगर हाऊं आपणी गवाही आपू ई दिआऊ, तैबे भी मेरी गवाही ठीक आ, कैलैकि हाऊं जाणाऊ कि हाऊं किदरा कु ऊ आशौ औन्दौ और केशी डिआऊ? पर तुमै नाई जाणदैं कि हाऊं किदरा कु आशौ औन्दौ या केशी डिआऊ। 15 तुमै शरीरा रैं अनुसार फैसलौ कौराई; हाऊं कासी रौ फैसलौ नाई कौरदौ। 16 और अगर हाऊं फैसलौ कौरलौ भी, ता मैरौ फैसलौ सौचौ आ; कैलैकि हाऊं ऐखुली नाई, पर हाऊं ऊ, और बाब आ जुणिए हाऊं भेजौ औन्दौ ऊ। 17 तुमारे नियमा दी भी लिखौ औन्दौ आ कि दुई जौणा री गवाही मिलियो ठीक हुआ आ; 18 एक ता हाऊं आपणी गवाही आपू ई दिआऊ और दुजी बाब मेरी गवाही दिआ सा जुणिए हाऊं भेजौ औन्दौ ऊ।” 19 तिउंए तेसलै बोलौ, “तैरौ बाब किये आ?” यीशुए जवाब दैऔ, “ना ता तुमै मूं जाणदैं और ना मैरौ बाब, अगर मूं जाणाई ता मैरौ बाब भी जाणाई।” 20 एजी बुशै तिणीए परमेश्वरा रैं घौरा दी शिक्षा दैदी बारै नाजा रैं गुदामा दी बोली ई, और कोइए सेऊ नाई पाकडौ, कैलैकि तेसरौ बौक्त इबी झाऊं नाई आशौ थौ।

आपणै बारै दी यीशु रैं बोलणौ

21 तिणीए तैबे तिउंलै बोलौ, “हाऊं डिआऊ, और तुमै मूं लोडाई और आपणै पापा दी मौराई; जिणै हाऊं डिआऊ तिणै तुमै नाई आशी बोलदैं।” 22 एथ माथे यहूदिये बोलौ, “का एऊ आपू ई झागिया मौरा; जिणौ एऊ बोला आ, जिणै हाऊं डिआऊ तिणै तुमै नाई आशी बोलदैं?” 23 यीशुए तिउंलै बोलौ, “तुमै धौनी रैं ई और हाऊं माथलौ ऊ; तुमै दुनिया रैं ई पर हाऊं दुनिया रौ नाई। 24 एथिलै मूंइए तुमुलै बोलौ कि तुमै आपणै पापा दी मौरालै, कैलैकि अगर तुमै विश्वास नाई कौरालै कि हाऊं सेऊ ऊ, ता आपणै पापा दी मौरालै।” 25 तिउंए तेसलै बोलौ, “तू कुण आ?” यीशुए तिउंलै बोलौ, “सेऊ ऊ जो तुमुकै पैहलै ओउलै ऊ बोलदैं लागौ औन्दौ। 26 तुमारे बारै दी मूंइए भौरी कुछ बोलणौ और फैसलौ कौरनौ आ; पर मैरौ भेजणै वालौ सौचौ आ, जो मूंइए तेसकु शुणौ आ तेसी ई दुनिया कै बोलाऊ।” 27 सैं इणौ नाई सौमझै कि एऊ आमू कै बाबा रैं बारै दी बोलदैं लागौ औन्दौ। 28 तैबे यीशुए बोलौ, “जेबी तुमै आदमी रौ छेहरु ऊंचै माथे चड़ावालै, ता जाणालै कि हाऊं सेऊ ऊ; हाऊं आपू ई कुछ नाई कौरदौ पर जिणौ मैरे बाबे मुंके शिखाओ तिणी ई एजी बुशै बोलाऊ। 29 मैरौ भेजणै वालौ मूं आइलै आ; तिणीए हाऊं ऐखुली नाई छाडौ कैलैकि हाऊं सौदा सेजौ काम कौराऊ जेथ कौरी सेऊ खुश हुआ आ।” 30 सेऊ एजी बुशै बोलदैं ई थौ लागौ औन्दौ थौ कि भौरी आदमिये तेस माथे विश्वास किओ।

सच्चाई तुमु आज्ञाद कौरा सा

31 तैबे यीशुए तिउं यहूदिये लै बोलौ जुणिए तेस माथे विश्वास किओ थौ, “अगर तुमै मैरे वचना दी बोणी रौआलै, ता सौचौ मैरे चेलै बोणाई। 32 तुमै सौचाई जाणालै, और सौचाई तुमु आज्ञाद कौरा आ।” 33 तिउंए तेसलै जवाब दैऔ, “आमै ता अब्राहमा रैं वंशा कु ई, और केबी भी कासी रैं नुकुर नाई हुए। तैबे तू किणौ बोलाई कि तुमै आज्ञाद हुआई?” 34 यीशुए तिउंलै जवाब दैऔ, “हाऊं तुमुलै सौचौ-सौचौ बोलाऊ कि जुण-कुण पाप कौरा सेऊ पापा रौ नुकुर ओआ। 35 नुकुर सौदा घौरा दी नाई रौइदौ; छेहरु सौदा रौआ आ। 36 एथिलै अगर छेहरु तुमु आज्ञाद कौरालौ, ता सौचौ तुमै आज्ञाद हुआई। 37 हाऊं जाणाऊ कि तुमै अब्राहमा रैं वंशा कु ई; तैबे भी मैरौ वचन तुमुरै

जिवा दी जागहा नाई पाइंदौ, एथिलै तुमै मूं झांगणौ चाहा ई। 38 हाऊं तेसी ई बोलाऊ, जो आपणै बाबा रैं काए देखौ आ; और तुमै तेसी ई कौराई जो तुमुए आपणै बाबा कु शुणौ आ।” 39 तिउंए तेसलै जवाब दैऔ, “आमारौ बाब ता अब्राहम आ।” यीशुए तिउंलै बोलौ, “अगर तुमै अब्राहमा री सन्तान ओलै, ता अब्राहमा जिणौ काम कौरा थै। 40 पर आबै तुमै मूं जिणौ आदमी झांगणौ चाहा ई, जुणीए तुमुलै सेजौ सौचाई रौ वचन बोलौ जो परमेश्वरा कु शुणौ; इणौ ता अब्राहमै नाई किओ थौ। 41 तुमै आपणै बाबा जिणौ काम कौराई।” तिउंए तेसलै बोलौ, “आमै गांदे कामा कु पैदें नाई हुए, आमारौ एक बाबा आ मतलब कि परमेश्वर।” 42 यीशुए तिउंलै बोलौ, “अगर परमेश्वर तुमारौ बाब हुआ थौ, ता तुमै मूं आइलै प्यार कौरा थै; कैलैकि हाऊं परमेश्वरा री तौरफा कु आशौ औन्दौ ऊ। हाऊं आपू कु नाई आशौ, पर तिणीए हाऊं भेजौ। 43 तुमै मेरी बुशै कैलै नाई समुझदैं? एथिलै कि तुमै मैरौ वचन नाई शुणी बोलदैं। 44 तुमै आपणै बाब शैताना कु ई और आपणै बाबा री मौरजी पूरी कौरणी चाहा ई। सेऊ ता पैहलै कु खुनी आ और सेऊ सौचाई माथे नाई टेकौ, कैलैकि सौचाई तेसदी आसती नाई। जेबी सेऊ झूठ बोला आ, ता सेऊ आपणै स्वभाव कु बोला आ; कैलैकि सेऊ झूठौ आ और झूठा रौ बाब आ। 45 पर हाऊं जो सौचौ बोलाऊ, एथिलै तुमै मैरौ विश्वास नाई कौरदैं। 46 तुमु मांझीआ कु कुण मूं पापी मानाई? अगर हाऊं सौचौ बोलाऊ, ता तुमै मैरौ विश्वास नाई कौरदैं? 47 जो परमेश्वरा कु हुआ सा, सेऊ परमेश्वरा री बुशै शुणा सा; और तुमै एथिलै नाई शुणदैं कि परमेश्वरा री तौरफा कु नाई आ।”

यीशु और अब्राहम

48 इणौ शुणौ यहूदिये तेसलै बोलौ, “का आमै ठीक नाई बोलदैं कि तू सामरी ई, और ताऊंदी बुरी आत्मा आ?” 49 यीशुए जवाब दैऔ, “मुंदि बुरी आत्मा नाई आ; पर हाऊं आपणै बाबा री इज्जत कौराऊ और तुमै मेरी बेइज्जती कौराई। 50 पर हाऊं आपणी पतिष्ठा नाई चांहादौ; ओ एक आसती आ जुण चाहा सा और फैसलौ कौरा सा। 51 हाऊं तुमुलै सौचौ-सौचौ बोलाऊ कि अगर केजौ आदमी मैरे वचना माथे चाला लौ ता सेऊ केबी भी ना मौरदौ। 52 यहूदिये तेसलै बोलौ, “आबे आमुरे जाणी गौ कि ताऊंदी बुरी आत्मा सा। अब्राहम मौरौ गौ आ, और भविष्यवक्ता भी गौए मौरौ, और तू बोलाई ‘अगर कोई मैरे वचना माथे चालालौ ता सेऊ केबी भी मौरनै रौ स्वाद नाई चाखालौ।’ 53 आमारौ बाब अब्राहम ता गौ मौरौ। का तू तेस कु बौडौ ई? और भविष्यवक्ता भी गौए मौरौ। तू आपुलै का सौमझाई?” 54 यीशुए जवाब दैऔ, “अगर हाऊं आपणी महिमा कौरलौ, ता मेरी महिमा कुछ नाई पर मेरी महिमा कौरणै वालौ मैरौ बाब आ, जासलै तुमै बोलाई कि सेऊ तुमारौ परमेश्वर आ। 55 तुमुए ता सेऊ नाई जाणौ; पर हाऊं तेस जाणा ऊ। अगर हाऊं बोले कि हाऊं तेस नाई जाणदौ तैबे हाऊं तुमु जिणौ झूठौ बोणाऊ, पर हाऊं तेस जाणाऊ और तेसरै वचना माथे चालाऊ। 56 तुमारौ बाब अब्राहम मैरे दिना देखणे री आशी दी भौरी मोगन थौ; और तिणीए देखौ और खुश हुआ।” 57 यहूदिये तेसलै बोलौ, “इबी झाऊं ता तू पचास साला रौ भी नाई, तैबे भी तांइए अब्राहम देखौ आ?” 58 यीशुए तिउंलै बोलौ, “हाऊं तुमुलै सौचौ-सौचौ बोलाऊ, कि हाऊं अब्राहमा रैं पैदें हुणै कु पैहले ऊ।” 59 तैबे तिउंए तेसदी लाइणा लै पात्थर चुंगै, पर यीशु चारुइयो परमेश्वरा रैं घौरा कु निकली गौ।

जन्मा रैं शेडै रौ औनेणौ

9 डेउंदी बारै तिणीए एक आदमी देखौ जुण जन्मा कु शेडौ थौ। 2 तेसरै चलेउए तेसकु पूछौ, “ओ प्रभु, कुणिए पाप किओ थौ कि एऊ शेडौ पैदौ हुआ, इणी आदमिये या एसरै मां-बाबे?” 3 यीशुए जवाब दैऔ, “ना ता इणिए पाप किओ थौ, ना ता एसरै मां-बाबे; पर एऊ एथिलै हुआ कि परमेश्वरा रैं काम एसदी परगट हुआ।” 4 जुणिए हाऊं भेजौ औन्दौ ऊ, आमै तेसरै काम दिन ई दिना दी कौरणै जरुरी ई; सैं राच आशणै वाली आ जेथदी कोई काम नाई कौरौ बोलदैं। 5 जेबी झाऊं हाऊं दुनिया दी ऊ तेबी झाऊं हाऊं दुनिया रौ प्याशौ ऊ।” 6 इणौ बोलिओ तिणीए जेबीना दी थूकौ। और तेस थूका कौरौ माटौ सीनौ किओ, और सेऊ माटौ तेस शेडै री आखी दी लाइओ,

7 तेसलै बोलौ, "डेऊ, शीलोह रै कुंरे दी आखी धोऊ" (शीलोह रौ मतलब आ "भेजौ औन्दौ" आ)। तिणीए डेइऔ आखी धोई, और देखदै हुइयौ वापीस आशौ। 8 तैबै पड़ोसी और जुणिए सेऊ भीखा मांगदै देखौ थौ, बोलदै लागै, "का एऊ सेऊ नाई, जुण बोशौऔ भीख मांगा थौ?" 9 कुछ लोगुए बोलौ, "एऊ सेऊ ऊ आ; दूजेउए बोलौ, "नाई, पर तेसी जिणौ कुण ओर आ।" तिणीए बोलौ, हाऊं सेऊ ऊ।" 10 तैबै सै तेसकु पुछदै लागै, "तेरी आखी किणै कौरी खुली ई?" 11 तिणीए जवाब दैऔ, "यीशु नावां रै एकी आदमिरे माटौ सीनौ किऔ, और मेरी आखी दी लाइऔ बोलौ, 'शीलोह रै कुंरे दी डेइऔ धोऊ,' तैबै हाऊं डैऔ और आखी धोई और देखदै लागौ।" 12 तिउंरे तेसकु पूछौ, "सेऊ किये आ?" तिणीए बोलौ, हाऊं नाई जाणदौ।"

फरीसिउ रै जरिए चंगाई रै बारै दी खोज खोबर

13 लोगुए सेऊ जुण पैहलै शेडौ थौ फरीसिऊ कारे नीं गौ। 14 जेजै दिनें यीशुए माटौ सीनौ कौरियो तेसरी आखी खोली थी, सेऊ साजै रौ दिन थौ। 15 तैबै फरीसिउए भी तेसकु पूछौ कि तेरी आखी किणै कौरी खुली ई। तिणीए तिउंलै बोलौ, "तिणीए मेरी आखी दी माटौ लाओ, तैबै मुंइरे आखी धोई ई, आबै देखाऊ ऊ।" 16 एथ माथै कुछ फरीसी लोग बोलदै लागै, "एऊ आदमी परमेश्वर री तौरफा कू नाई, कैलैकि सेऊ साजै रौ दिन नाई मानदौ।" दूजेउए बोलौ, "पापी आदमी इणै निशाण किणै कौरिरे देखाली बौला आ?" और तिउं मांझीरे फूट पौड़ी गोई। 17 तिउंरे तेस शेडै आदमी लै तौइएँ बोलौ, "तिणीए तेरी आखी खोली गोई। तू तेसरै बारै दी का बोलाई?" तिणीए बोलौ, "सेऊ भविष्यक्ता आ।" 18 पर यहूदिऊ कै विश्वास नाई हुओ कि सेऊ शेडौ थौ और आबै देखा आ, जेबी झाऊं तिउंरे तेसरै, जासरी आखी खुली गोई थी, मां-बाप औटाइऔ 19 तिउंकू पूछौ, "का एऊ तुमरौ छोरु आ, जासलै तुमै बोलाई कि शेडौ पैदौ हुओ थौ? तैबै आबै एऊ किणौ देखी बौला आ?" 20 तेसरै मां-बाबै जवाब दैऔ, "आमै ता जाणी कि एऊ आमुरौ छोरु आ, और शेडौ पैदौ हुओ थौ; 21 पर आमै इणौ नाई जाणदै कि आबै एऊ किणै कौरीरे देखा आ, और ना इणौ जाणदै कि कुणिए एसरी आखी खोली ई। एऊ स्याणौ आ; एसी कु पूछौ; एऊ आपणै बारै दी आपू बोला आ।" 22 एजी बुशै तेसरै मां-बाबै एथीलै बोली कैलैकि सै यहूदिउ कु डौरा थै, कैलैकि यहूदी कौट्टै हुई गौए थै कि अगर कोई बोला कि एऊ मसीह आ, ता धार्मिक खुम्बली कु पोरु गाडी ई। 23 एथीलै तेसरै मां-बाबै बोलौ, "एऊ बौडौ आ, एसी कु पूछौ।" 24 तैबै तिउंरे तेस आदमी कु जो शेडौ थौ, दूजी बारै औटाइऔ तेसलै बोलौ, "परमेश्वर री बोडाई कौर। आमै ता जाणी कि सेऊ आदमी पापी आ।" 25 तिणीए जवाब दैऔ, "हाऊं नाई जाणदौ कि सेऊ पापी आ कि नाई; हाऊं एक ही बूश जाणाऊ कि हाऊं शेडौ थौ और आबै देखाऊ।" 26 तिउंरे तेसलै तौइएँ बोलौ, "तिणीए ताऊं आइलै का किओ? और किणै कौरी तेरी आखी खोली?" 27 तिणीए तिउंलै बोलौ, "मुंइरे ता तुमुलै बोली गौ आ, और तुमुए नाई शुणौ; आबै दूजी बारै कैलै शुणनौ चाहा इ? का तुमै भी तेसरै चेलै हुणौ चाहा इ?" 28 तैबै सै तेस लै बुरौ-भौलौ बोलिऔ बोलदै लागै, "तू ई तेसरौ चेलौ, आमै ता मूसा रै चेलै ई। 29 आमै जाणी कि परमेश्वर मूसा आइलै बुशै लाई; पर एस आदमी नाई जाणदै कि एउ किदलौ आ।" 30 तिणीए तिउं लै जवाब दैऔ, "एजी ता हैरानी री बूश आ कि तुमै नाई जाणदै कि सेऊ किदलौ आ, तैबै भी तिणीए मेरी आखी खोली गोई। 31 आमै जाणी कि परमेश्वर पापीऊ री नाई शुणदौ, पर अगर कोई परमेश्वर रौ भोगत आ और तेसरी मौरजी माथै हाण्डा आ, ता सेउ तेसरी शुणा आ। 32 इएँ दुनिया दी पहला ओउलै केबी भी शुणा लै नाई आशौ कि कुणिए पैदाइशी कु शेडै री आखी खोली ई। 33 अगर एऊ आदमी परमेश्वर री तौरफा कु नाई औलौ, ता कुछ भी नाई कौरी बौला थौ।" 34 तिउंरे तेसलै जवाब दैऔ, "तू ता बिल्कुल ई पापा दी पैदौ हुओ ई, तू आमूलै का शिखावा इ?" और तिउंरे सेउ बाइरै गाडी गौ।

आत्मा कु शेडौ

35 यीशुए शुणौ कि तिउंरे सेऊ बाइरै गाडी गौ आ, और जेबी सेऊ मिलौ ता तेसलै बोलौ, "का तू परमेश्वर रै छोरु माथै विश्वास कौरा ई?" 36 तिणीए

जवाब दैऔ, "ओ प्रभु, सेऊ कुण आ, कि हाऊं तेस माथै विश्वास कौरु?" 37 यीशुए तेसलै बोलौ, "ताइएँ सेऊ देखौ भी आ, और जुण ताऊं आइलै बुशै लाइँ आ लागौ औन्दौ सेऊ आ।" 38 तिणीए बोलौ, "ओ प्रभु, हाऊं विश्वास कौरा ऊ।" और तेसलै ढाल की ई। 39 तैबै यीशुए बोलौ, "हाऊं एस संसारा दी फैसलौ कौरदै ऊ आशौ औन्दौ ताकी जुण नाई देखदै सै देखा और जुण देखा आ सै शेडै औआ।" 40 जुण फरीसी तेस आइलै थै तिउंरे एजी बुशै शुणियो तेसलै बोलौ, "का आमै भी शेडै ई?" 41 यीशुए तिउंलै बोलौ, "अगर तुमै शेडै औलै ता पापी नाई उआ थै पर आबै बोलाई कि आमै देखी ई, एथीलै तुमारै पाप बौणी रौआ ई।

भेरालडु और भेरी रौ औनैणौ

10 "हाऊं तुमुलै सौचौ-सौचौ बोलाऊ कि जुण-कुण दारा बाटिरे भेरी रै बाडै दी नाई आशा लौ, पर औरकेशि यालै आशा लौ, सेऊ चोर और डाकू आ। 2 पर जुण दारा बाटिरे भीतरै आशा ता सेऊ भेरी रौ भेरालडु आ। 3 तेसलै दारा खोलणै वालै दार खोला ई, और भेरी तेसरी बाघ शुणाई ई, और सेऊ आपणी भेरीउ लै नावां कौरीरे औटाया और बाइरै निया आ। 4 जेबी सेउ आपणी सारी भेरी बाइरै चौराउणा लै गाडा सा, ता तिउंकू औगाडी-औगाडीए आण्डा सा, और भेरी तेस आइलै पिछाडी-पिछाडी हुआई, कैलैकि सै भेरी तेसरी बाघ पराणा ई। 5 पर सै बिगानै पीछु नाई डेउंदी, और तेसकु ओरु-पोरु भागाई, कैलैकि सै ओरी री बाघ नाई पराणदी।" 6 यीशुए तिउंलै एऊ औनैणौ दैऔ आ, पर सै नाई सौमझै कि एजी का बुशै ई जो आमुं आइलै बोला आ।

यीशु आच्छौ भेरालडु

7 तैबै यीशुए तिउंलै तौइएँ बोलौ, "हाऊं तुमु आइलै सौचौ-सौचौ बोलाऊ, भेरी रौ दार हाऊं ऊ। 8 जेती मुकु पैहलै आशे ई सै सारै चोर और डाकू ई, पर भेरीउए तिउंरी नाई शुणी। 9 दार हाऊं ऊ; अगर कुण मुं आइलै भितरै आशा लौ, ता छुटकारौ पा लौ, और भितरै-बाइरै आशदै डेउंदै थाका लौ तेसलै घास मिला। 10 चोर केजै दुजै कामा लै नाई पर सिर्फ चोरी कौरदै और झांगदै और नाश कौरदै आशा आ; हाऊं ऐथलै आशौ ऊ कि सौबी लै जिन्दगी मिला, और भौरी मिला। 11 आच्छौ भेरालडु हाऊं ऊ; आच्छौ भेरालडु भेरीऊ लै आपणी जान दिआ आ। 12 जो नुकुर औआ सेऊ ना ता भेरालडु आ और ना भेरी रौ मालिक आ, शालटौ आशदै देखिऔ भेरी छाडिऔ भागा आ; और शालटौ तिउं भेरी पाकडा और तितर-बितर कौरा आ। 13 सेऊ एथीलै भागा आ कि सेऊ नुकुर आ, और तेसकै भेरी री फिकर नाई आसती। 14 आच्छौ भेरालडु हाऊं ऊ; हाऊं आपणी भेरी जाणाऊ, और मेरी भेरी मुं जाणा ई। 15 जिणौ बाब मुं जाणा आ और हाऊं बाब जाणाऊ और हाऊं आपणी भेरी लै आपणी जान दिआऊ। 16 मेरी तौइएँ भी भेरी ई, जो एस बाडै री नाई ई। मुं सै भी आपणी जरुरी ई। सै मेरी बाघ शुणाली, तैबै एका शाल और एका भेरालडु हुआ। 17 बाब एथीलै मुं आइलै प्यार छाडा आ कैलैकि हाऊं आपणै प्राण दिआऊ कि तेस तौइएँ वापिस नीऊं। 18 कोई तेस प्राण मुकु नाई छुडाउंदौ, पर हाऊं आपू ई दिआऊ, मुकै तेस प्राण देणै रौ भी हक आ और, तेस नीणा रौ भी हक आ: एजौ हुकम मैरै बाबा कु आ मुलै मिलौ औन्दौ।" 19 इऊं बुशु कौरीए यहूदिउ दी आपु मांझिरे फूट पौड़ी गोई। 20 तिउं मांझिउ कु भौरी जौणै बोलदै लागै, "तेसदी बुरी आत्मा आ, और सेऊ पागल आ; तेसरी कैलै शुणाई?" 21 ओरी लोगुए बोलौ, "एजी बुशै इणै आदमी री नाई जासदी बुरी आत्मा आ। का बुरी आत्मा शेडै री आखी खोली बौला आ?"

यहूदिउ रौ अविश्वास

22 यरुश्लेमा दी स्थापना रौ साजौ हुओ; और हिऊंदा रौ मौसम थौ। 23 यीशु परमेश्वर रै घौरा दी सुलैमाना री ओसारै तौंगा दी घूमदै थौ लागौ औन्दौ। 24 तैबै यहूदिउए सेऊ आशियो घेरौ और पूछौ, "तू आमरौ जिऊ केबी झाऊं शौखा दी छाडाई? अगर तू मसीह ता आमुं आइलै साफ-साफ बोल।" 25 यीशुए तिउंलै जवाब दैऔ, "मुंइरे तुमुलै बोली गौ पर तुमै विश्वास ई

ना कौरदै। जो काम हाऊं आपणें बाबा रें नावां कौरीए कौराऊ सं काम ई मैरें गवाह ई, 26 पर तुमै एथीलें विश्वास नाई कौरदै कैलैकि तुमै मेरी भेरी मांझिया कु नाई आसती। 27 मेरी भेरी मेरी हाक शुणा ई; हाऊं तिऊं जाणाऊं, और सं मु पीछु-पीछु आण्डा ई; 28 और हाऊं तिउंलें सौदा री जिन्दगी दिआऊ। सं केबी भी नाश नाई औआ ली, और कोई तिऊं मैरें हाथा कु नाई छुडाउंदौ। 29 मैरों बाब, जुणिए सं मुंके देई ऐन्दी ई, सारेऊ कु बौडौ आ और कोई तिऊं बाबा रें हाथा कु नाई छुडाई बौलदौ। 30 हाऊं और मैरों बाब एका ई।” 31 यहूदिये तेसदी पात्थरें लाइणा लें तौइंरे पात्थर चुंगे। 32 एथ माथे यीशुए तिउंलें बोलौ, “मुंइरे तुमु के बाबा री तौरफा कु भौरी भौलें काम देखालें ई; तिऊं मांझिया कु केजें कामा लें तुमै मुंदी पात्थरें लाआ ई?” 33 यहूदिये तेसलें जवाब दैऔ, “भौलें कामा लें आमै ताऊंदी पात्थरें नाई लाइदै पर परमेश्वर री बुराई कौरना लें; और एथलें कि तू आदमी हुईयो आपू ई परमेश्वर बोगाई।” 34 यीशुए तिउंलें जवाब दैऔ, “का तुमारे कानूना दी नाई आ लिखौ औन्दौ, मुंइरे बोलौ, तुमै ईश्वर ई? 35 अगर तिणीए तिउंलें ईश्वर बोलौं जास काए परमेश्वर री वचन पौउंचौ (और पवित्र शास्त्रा री बूश गौलत नाई हुई बौलदी), 36 ता जुण बाबे पवित्र चाणीयो दुनिया दी भेजौ आ, तुमै तेसलें बोलाई, ‘तू बुराई कौरा ई,’ एथीलें कि मुंइरे बोलौ, ‘हाऊं परमेश्वर री छेहरु ऊ?’ 37 अगर हाऊं बाबा री काम नाई कौरदौ, ता मैरों विश्वास नाई कौरौ। 38 पर अगर हाऊं कौरा ऊ, ता चारु मैरों विश्वास नाई भी कौरौ; पर तिऊं कामा री ता विश्वास कौरौ, ताकी तुमै जाणा और सौमझा कि बाब मुंदी आ और हाऊं बाबा दी।” 39 तैबे तिउंरे तौइंरे तेस पाकुडनै री कोशिश की पर सेऊ तिउंरें हाथा कु निकली गौ। 40 तैबे सेऊ यरदना कु पार सेजी जागहा दी डेई गौ, जिरे यहूना पैहलें बपतिस्मा दिआ थौ, और तिरे रें औ। 41 भौरी लोग तेस काए आशियो बोला थें, “यहूने ता कोई चिन्ह नाई देखाए, पर जो कुछ यहूने एसरें बारा दी बोलौ थौ, सेऊ सारौ सौचौ थौ।” 42 और तिरे भौरी लोगुए यीशु माथे विश्वास कियो।

लाजरा रौ मौरणौ

11 मरियम और तियांरी बौईण मारथा रें गाऊं बैतनिय्याह रौ लाजर नावां रौ एक आदमी बिमार थौ। 2 इरे सेजी मरियम थी जुणीए प्रभु तौलें तेल पाईयो तेसरें बांगणें आपणें बाला कौरी गुशें थें, ईयांरौ भाई लाजर बिमार थौ। 3 तैबे तियांरी बौईणीए तेस औटाउणा लें आदमी भेजौओ बोलौ, “ओ प्रभु, देख, जास आइलें तु प्यार छाडाई, सेऊ बिमार आ।” 4 इणें शुणीओ यीशुए बोलौ, “एजी बिमारी मौरनै री नाई; पर परमेश्वर री बौडाई लें आ, कि तेथ कौरी परमेश्वर रें छेहरु री बौडाई औआ।” 5 यीशु ता मारथा और तियांरी बौईण और लाजरा कु प्यार कौरा थौ। 6 तैबे भी जेबी तिणीए शुणौ कि सेऊ बिमार आ, ता जेजी जागहा दी सेऊ थौ, तिरे दुई दिन औजौ रूकी गौ। 7 तेत बासीए तिणीए आपणें चेलेऊ लें बोलौ, “चालौ, आमै तौइंरे यहूदिया लें डेई।” 8 चेलेऊए यीशु लें बोलौ, “ओ रब्बी, इबी ता यहूदी ताऊं ढौलीयाउणौ चाहा थें, आबे का तू औजौ भी तिरे डिआ ई?” 9 यीशुए जवाब दैऔ, “का दिना रें बारह घंटे नाई औन्दै? अगर कुण दुसैं हाण्डा लौ, ता ठोकर नाई लागदी, कैलैकि सेऊ इरें धौतरी रौ प्याशौ देखा आ। 10 पर अगर कुण राची हाण्डा लौ ता ठोकर लागा आ, कैलैकि तेथदी प्याशौ नाई आ।” 11 एजी बुशें बोलणें बासीए तिणीए तिउंलें बोलौ, “आमारौ गोष्टण लाजर सुती गौ आ, पर हाऊं तेस उजीयाउंदै डिआ आ।” 12 तैबे चेलेऊए यीशुलें बोलौ, “ओ प्रभु, अगर सेऊ सुती गौ आ, ता चांगौ औआ सा।” 13 यीशुए ता तेसरें मौरनै रें बारें दी बोलौ थौ, पर सं सौमझें कि सेऊ निजा दी सुतणें रें बारें दी बोलौ। 14 तैबे यीशुए तिउंके साफ-साफ बोलौ गौ, “लाजर मौरौ गौ आ; 15 और हाऊं तुमुरें कारण खुश ऊ कि हाऊं तिरे नाई थौ जेथकु तुमै विश्वास कौरा। पर आबे चालौ, आमै तेस काए डेई।” 16 तैबे थोमै जासलें दिद्मुस भी बोला थें, आपणें साथी चेलेऊलें बोलौ, “चालौ, आमै भी एस आइलें मौरदै डेई।”

यीशु रौ दूजी बारें जिऊंणौ और जिन्दगी

17 तिरे पौउंचिओ यीशु कै पौतौ लागौ कि लाजर ओडाची दी छाडीओ चार दिन हुई गौए ई। 18 बैतनिय्याह यरुश्लेमा कु कोई दुई मील दूर थौ। 19 भौरी यहूदी लोग मारथा और मरियमा काए तिउंरें भाई रौ पसताओ दैदें थें आशें औन्दै। 20 जेबी मारथें यीशु रें आशणें री खौबर शुणी ता सं तेस मिलदै डेई, पर मरियम रौई घौरा कै बोशी। 21 मारथें यीशु लें बोलौ, “ओ प्रभु, अगर तू इदै औआ थौ, ता मैरौ भाई नाई मौरा थौ। 22 और इबी भी हाऊं जाणाऊ कि जो कुछ तु परमेश्वर कु मांगा लौ, परमेश्वर ताउंलें दिआ आ।” 23 यीशुए तिआं लें बोलौ, “तैरौ भाई तौइंरे जिउंदौ औआ आ।” 24 मारथें यीशु लें बोलौ, “हाऊं जाणाऊ कि आखरी दिना दी मौरनै बासिए जिउणें रें बौगै सेऊ जिउंदौ औआ।” 25 यीशुए तियांलें बोलौ, “मौरणें बासिए रौ जिउणौ और जिन्दगी हाऊं ऊ। जुण मू माथे विश्वास छाडा आ, अगर सेऊ मौरा भी लौ, तैबे भी जिउंदौ औआ, 26 जुण जिउंदे ई और मुं माथे विश्वास छाडा ई, सं केबी भी ना मौरदै। का तू एजी बुशा माथे विश्वास कौरा ई?” 27 तिआंए यीशुलें बोलौ, “ओ प्रभु, हाऊं विश्वास कौराऊ कि परमेश्वर रौ छेहरु मसीहा आ जुण धौतरी माथे आशणें आलौ थौ सेऊ तू ई।

यीशु लेरौ

28 इणें बोलीओ सं डेई गोई, और आपणी बौईण मरियम औटाइओ चुटुकचार बोलौ, “गुरु इदरी आ और ताऊं औटावा आ।” 29 इणें शुणीओ सं फेटी उठीयो तेस काए आशी। 30 यीशु इबी झाऊं गावां दी नाई पौऊंचौ थौ पर सेजी जागाह दी थौ जिरे मारथा तेस कु मिली थी। 31 तैबे जो यहूदी तिआं आइलें घौरा दी थें और तियांलें पसताओ दैदें थें आशें औन्दै, जेबी तिउंरे देखौ कि मरियम फेटी उठीयो बाइरे डेई गोई ता इणें सौमझिओ कि सं औडाची दी लेरदै डिआ सा, ता तिआं पीछु डेई गौए। 32 जेबी मरियम तिरे पौउंची जिरे यीशु थौ ता तेस देखीओ ई तेसरें बांगणें माथे पौडी और बोलौ, “ओ प्रभु, अगर तू इदै औआ थौ, ता मैरौ भाई नाई मौरा थौ।” 33 जेबी यीशुए सं और तिआं आइलें आशें औन्दै यहूदी लोग, लेरदै देखें, ता सेऊ आत्मा दी उदास और भौरी दुखी हुआ, 34 और बोलौ, “तुमुए सेऊ किए आ छाडौ औन्दौ?” तिउंरे तेसलें बोलौ, “ओ प्रभु, हाण्डियो देख।” 35 यीशु लेरौ। 36 तैबे यहूदी बोलदै लागें, “देखौ, एऊ तेस आइलें केती प्यार कौरा थौ।” 37 पर तिऊं मांझिए कई लोगुए बोलौ, “का एऊ जुणिए शेडें री आखी खोली, इणौ भी नाई कौरी बोलौ कि एऊ आदमी नाई मौरा?”

लाजर जिउंदौ कौरणौ

38 यीशु तौइंरें जिवा कु भौरी दुखी हुईयो औडाची काए आशौ। सेऊ एक ढवार थौ और तेस माथे एक पात्थर थौ छाडौ औन्दौ। 39 यीशुए बोलौ, “एस पात्थर पोरु कौरौ।” तेस मौरें औन्दै री बौईण मारथें तेसलें बोलौ, “ओ प्रभु, एथकु ता आबे बास आशा आ, कैलैकि एस मौरौओ आबे चार दिन हुई गौए ई।” 40 यीशुए तिआंलें बोलौ, “का मुंइरे ताउंलें नाई बोलौ थौ कि अगर तू विश्वास कौराली, ता परमेश्वर री बौडाई देखाली।” 41 तैबे तिउंरे सेऊ पात्थर तिदरा कु पोरु कियो। यीशुए आखी उठाइयो बोलौ, “ओ बाब, हाऊं तैरौ धन्यावाद कौराऊ कि ताइरे मेरी शुणी गोई आ। 42 हाऊं जाणा थौ कि तू सौदा मेरी शुणा ई, पर जो भीड ओरु-पोरु खौडी आ, तिउंरी बजह कु मुंइरे इणौ बोलौ आ, जेथ कौरी इरे विश्वास कौरा कि ताइरे हाऊं भेजौ ऊ।” 43 इणौ बोलीओ यीशुए जौरें हाका देइयो बोलौ, “ओ लाजर, निकलियो आश।” 44 जुण मौरौ गौ थौ, सेऊ कफना कौरी हाथा लाता कु बानुओ औन्दौ निकलियो आशौ, और तेसरौ मू थौ कापडे दी मेटुओ औन्दौ। यीशुए तिउंलें बोलौ, एस पोरु खोलौ और डेउणें दैओ।”

यीशु रें बिरोधा दी यीशु पकुडना लें चाल

(मती26:1-5; मरकुस14:1, 2; लूका22:1, 2)

45 तैबे जुण यहूदआ मरियमा काए थें आशें औन्दै और जुणीए तेसरौ एजौ काम देखौ थौ, तिऊं मांझिया कु भौरी लोगुए तेस माथे विश्वास कियो। 46 पर

सौदा रो ज़िन्दगी आ। एथीलै हाऊं जो कुछ बोलाऊ, तेस तिणी बोलाऊ ज़िणौ बाब मुलै बोला आ।”

यीशु रै आपणै चलेउ रै बाँगणै धोड़णै

13 फसला रै साज्रे कु पेहले, जेभी यीशुए ज़ाणी गौ कि मेरो बौग्त आशी गौ आ कि धौतरी छाडीओ बाबा कारे डेउ, ता आपणै लोगु कु जुण धौतरी दी थै ज़िणौ प्यार सेऊ छाड़ा थौ, सौदा झाऊं तिणौ औ प्यार कौरा। 2 जेभी शैताने शमोना रै छोहरु यहूदा इस्करियोती रै ज़िवा दी इणी बूश पाई गोई कि तेस पकड़ावा, ता रोटी खाणै रै बौगता ई 3 “यीशुए, इणौ ज़ाणीओ कि बाबे सब कुछ मैरै हाथा दी कौरी गौ आ, और हाऊं परमेश्वरा रै कारे कु आशौ औन्दौ, और परमेश्वरा रै कारे डिआ ऊ, 4 यीशु रोटी छाडीओ उठौ और आपणै उपरा रै जुडके पोरु खोलै, और आपणी कौमरा दी गाची बानीओ। 5 ओखरा दी पाणी भौरीओ चलेऊ रै बागणै धोउंदै और जेजी गाची तेसरी कौमरा दी थी बानी ऐन्दी तेथ कौरी गुशदै लागौ। 6 जेभी सेऊ शमोन पतरसा कारे आशौ, तैबे पतरसे तेसलै बोलौ, “ओ प्रभु, का तू मैरै बागणै धोआ ई?” 7 यीशुए तेसलै ज़वाब दैओ, “जो हाऊं कौराऊ, तु तेस इबी नाई ज़ाणदौ, पर एथ बासीए सौमझा ई।” 8 पतरसे तेसलै बोलौ, “तू मैरै बागणै केभी ना धोआलो!” इणै शूणीओ यीशुए तेसलै बोलौ, “अगर हाऊं ताऊं नाई धोऊ लै, ता मुं आइलै तैरो कुछ भी रिशतौ नाई।” 9 शमोन पतरसे बोलौ, “ओ प्रभु, ता मैरै बागणै नाई, पर हाथ और मूड भी धोऊ।” 10 यीशुए तेसलै बोलौ, “जो धोउई गौ आ तेस बागणै रै सिवाए ओर कुछ धौधोउणै री ज़ुरत नाई, पर सेऊ बिलकुल शुद्ध आ, और तुमै शुद्ध ई पर सौभी रै सौभी नाई।” 11 सेऊ ता आपणै पकड़ाउणै वालौ ज़ाणा थै एथीलै तिणीए बोलौ, “कि तुमै सौभी रै सौभी शुद्ध नाई।” 12 जेभी तिणीए तिरु रै बागणै धोई गोए, और आपणै जुडके भीडिओ बोशी गौ, ता तिरुलै बोलदै लागौ, “का तुमै सौमझे ई कि मुंइरे तुमु आइलै का किओ? 13 तुमै मुलै गुरु और प्रभु बोलाई, और ठीक ई बोलाई, कैलैकि हाऊं सेऊ ऊ। 14 अगर मुंइरे प्रभु और गुरु हुइओ तुमारै बागणै धोए ई, ता तुमुए भी एकी दुजै रै बागणै धोउणै चांई। 15 कैलैकि मुंइरे तुमुलै नमनौ देखादी गौ आ कि ज़िणौ मुंइरे तुमु आइलै किओ आ, तुमुए भी तिणी ई कौरनौ। 16 हाऊं तुमुलै सौचौ-सौचौ बोलाऊ, नुकर आपणै मालिका कु बौडौ नाई आ, और ना भेजौ औन्दौ आपणै भेजणै वाले कु। 17 तुमै एजी बुशै ज़ाणा ई और अगर तिरु माना भी लै, ता तुमै आशिष वाले ई। 18 हाऊं तुमु सौभी रै बारे दी नाई बोलदौ; जुण मुंइरे चुनी गोए, तिरु हाऊं ज़ाणा ऊ; पर एऊ एथलै आ कि पवित्रशास्त्रा रो वचन पुरो हुआ, ‘जुण मेरी रोटी खा आ, तिणीए मुं माथे बागणौ चुगौ आ।’ 19 आबै हाऊं एथरे हुणे कु पेहलै तुमुलै बोलाऊ ताकी जेभी इणौ हुआ लौ ता तुमै विश्वास कौरा कि हाऊं सेऊ ऊ। 20 हाऊं तुमुलै सौचौ-सौचौ बोलाऊ कि जुण मैरै भेजे औन्दै आपणावा, सेऊ मूं आपणावा; और जुण मूं आपणावा सेऊ मैरै भेजणै वालौ अपणावा।”

विश्वासघाता री तौरफा दी इशारौ

(मती26:20-25; मरकुस14:17-21; लूका22:21-23)

21 एजी बुशै बोलीओ यीशु आत्मा दी बेचैन हुओ और एजी गवाही देई, “हाऊं तुमुके सौचौ-सौचौ बोलाऊ कि तुमुं मांझिआ कु एक मूं पकड़ावा सा।” 22 चेलै डौरी-डौरीयौ कि एऊ कासरै बारे दी बोला आ, एकी दुजै भिलै देखदै लागै। 23 तेसरै चेलै माझीआ कु एक जासकु यीशु प्यार कौरा थौ, यीशु री छाती भिलै झुकियौ थौ बोशौ औन्दौ। 24 शमोन पतरसे तेस भिलै इशारै कौरीओ तेसकु पुछौ, “बोल ता, एऊ कासरै बारे दी बोला आ?” 25 तैबे तिणीए तिणी ई यीशु री छाती भिलै झुकीओ तेस कु पुछौ, “ओ प्रभु, सेऊ कुण आ?” 26 यीशुए ज़वाब दैओ, “जास लै हाऊं एजी रोटी रौ गासडु चोबीओ देऊ लै सेऊ आ।” और तिणीए गासडु चोबीओ शमोन इस्करियोती रै छोहरु यहूदा लै दैओ। 27 गासडु पाकडुदै ई, शैतान तेसदी बौसी गौ। तैबे यीशुए तेसलै बोलौ, “जो तु कौराई, शिगरी कौर।” 28 पर बोशै औन्दै मांझिआ कु कोइरे ना ज़ाणौ कि तिणीए एजी बूश तेसलै कैलै बोली आ। 29 यहूदा कै पैसेऊ री थोउली रौआ थी, कुणी-कुणीए सौमझौ कि यीशु तेसके बोलदै लागौ औन्दौ कि जो कुछ आमुके साज्रे ले चांई तेस खरीदीओ आण, या इणौ

कि कुछ गरीबा लै दै। 30 और सेऊ गासडु निंइओ तेभी बाइरै डैओ; और एऊ राचकौ बौग्त थौ।

नौई आज्ञा

31 जेभी सेऊ बाइरै डैओ ता यीशुए बोलौ, “आबे आदमी रै छोहरु री बौड़ाई हुई आ, और परमेश्वरा री बौड़ाई तेसी दी हुई आ; 32 अगर तेसी दी परमेश्वरा री बौड़ाई हुई आ, ता परमेश्वर भी आपु तेसरी बौड़ाई कौरा आ, और फेटी कौरा। 33 छोहरुओ, हाऊं थोडै बौगता झाऊं तुमु कारे ऊ। तैबे तुमै मुं लोड़ाई, और ज़िणौ मुंइरे यहूदीऊ लै बोलौ, ‘जिंए हाऊं डिआऊ तिरे तुमै नाई आशी बौलदै, तिणी ई, हाऊं आबै तुमुलै भी बोलाऊ।’ 34 हाऊं तुमुलै एक नौओ हुकम दिआऊ, कि एकी दुजै कु प्यार कौरौ। ज़िणौ मुंइरे तुमु आइलै प्यार किओ आ, तिणी ई तुमै भी एकी दुजै कु प्यार कौरौ। 35 अगर तुमै आपु मांझिरे प्यार छाड़ा लै, ता इणै कौरीए सारै ज़ाणालै कि तुमै मैरै ई।”

पतरसा रै मुकुरना रौ इशारौ

(मती26:31-35; मरकुस14:27-31; लूका22:31-34)

36 शमोन पतरसे तेसलै बोलौ, “ओ प्रभु, तु केशी डिआई?” यीशुए तेसलै ज़वाब दैओ, “जिंए हाऊं डिआऊ तिरे तू इबी नाई आशी बौलदै; पर एथ बासीए तू मूं पिछु आशाई।” 37 पतरसे तेसलै बोलौ, “ओ प्रभु, इबी हाऊं ताऊं पिछु कैलै ना आशी सौकदौ? हाऊं ता ताउलै आपणै प्राण भी पोरु दिआऊ।” 38 यीशुए ज़वाब दैओ, “का तू मुलै आपणै प्राण दिआ ई? हाऊं ताऊं लै सौचौ-सौचौ बोलाऊ कि जेभी झाऊं तू चिआ बारै मैरौ इन्कार नाई कौरालौ तेभी झाऊं कुखडौ नाई बाशदौ।

परमेश्वरा झाऊं पऊंछणा री बाट

14 “तुमारौ ज़िऊ घबराओ ना चांई; परमेश्वरा माथे विश्वास छाडौ और मुं माथे भी विश्वास छाडौ। 2 मैरै बाबा रै घौरा दी, रौइणा लै भौरी जागाह सा, अगर नाई औआ थी ता हाऊं तुमुलै बौला थौ; कैलैकि हाऊं तुमुलै जागाह त्यार कौरदै डेआऊ। 3 जेभी हाऊं डेईओ तुमु कालै जागाह त्यार कौरलै, ता हाऊं तौइरे आशियौ तुमु आपुकारे निआऊ ताकी जिंए हाऊं रौउलै तिरे तुमै भी रौआ। 4 जिंए हाऊं डिआ ऊ तुमै तिवली बाट ज़ाणा ई।” 5 थोमै तेसलै बोलौ, “ओ प्रभु, आमै नाई ज़ाणदै तुमै केशी डिआई; ता बाट किणौ ज़ाणी?” 6 यीशुए तेसलै बोलौ, “बाट, सौचूचाई और ज़िन्दगी हाऊं ऊ; मैरै बिना कोई बाबा कारे नाई डेई बौलदौ। 7 अगर तुमुए हाऊं ज़ाणौ थौ, ता मैरौ बाब भी ज़ाणा थै। और आबै तेस ज़ाणाई, और सेउ देखी भी गौ आ।” 8 फिलिप्पुसे तेसलै बोलौ, “ओ प्रभु, बाब आमुं के देखाळ, एती ई आमुं लै भौरी आ।” 9 यीशुए तेसलै बोलौ, “ओ फिलिप्पुस, हाऊं एती दिना ओउलै तुमु आइले ऊ, और का तू मुं नाई ज़ाणदौ? जुणीए हाऊं देखो ऊ तिणीए बाब देखौ आ। तू कैलै बोलाई कि बाब आमुंके देखाळ? 10 का तू विश्वास नाई कौरदौ कि हाऊं बाबा दी ऊ और बाब मुंदी आ? ऐजी बुशै जो हाऊं तुमुलै बोलाऊ, आपणी तौरफा कु नाई बोलदौ, पर बाब मुंदी रौईओ आपणै काम कौरा आ। 11 मैरौ विश्वास कौरौ की हाऊं बाबा दी ऊ, और बाब मुंदी आ; नाई ता कामा री वज़ाह कु मैरौ विश्वास कौरौ। 12 “हाऊं तुमुलै सौचौ-सौचौ बोलाऊ कि जुण मुं माथे विश्वास छाड़ाई, एजौ काम जेजौ हाऊं कौराऊ से भी कौरा ई, पर एथकु भी बौडै काम कौरा ई, कैलैकि हाऊं बाबा कारे डिआऊ। 13 जो कुछ तुमै मैरै नावां कौरी मांगाई, तेस हाऊं कौराऊ, कि छोहरु री तौरफा कु बाबा री बौड़ाई हुआ। 14 अगर तुमै मुकु मैरै नावां कौरी कुछ मांगालै, ता हाऊं तेस कौराऊ।

पवित्र आत्मा रौ वाइदौ

15 “अगर तुमै मुकु प्यार कौराई, ता मेरी आज्ञा मानाई। 16 हाऊं बाबा कु औरज कौराऊ, और सेउ तुमुलै एक औजौ मज़द कौरणै वालौ दिया आ ताकी सेऊ सौदा तुमु आइलै रौआ। 17 मतलब सौचाई री आत्मा, जास संसार नाई आपणाउंदौ, कैलैकि सेऊ ना ता तेस देखदौ और ना तेस

जाणदो; तुमै तेस जाणाई, कैलैकि सेऊ तुमु आइलै रौआ आ, और सेऊ तुमु दी औआ। 18 “हाऊं तुमु अनाथ नाई छाड़दो; हाऊं तुमु कारे आशा ऊ। 19 और थौडो बोग्त रौइ गो आ कि संसार मुं नाई देखावो, पर तुमै मूं देखावो; एथीलै कि हाऊं जिउंदो ऊ, तुमै भी जिउंदे रौआई। 20 सेजै दिने तुमै जाणालै कि हाऊं आपणे बाबा दी ऊ, और तुमै मुं दी ई, और हाऊं तुमु दी। 21 जास के मैरो हुकम आ और से तिकं माना ई, से मुं आइलै प्यार छाड़ाई; और जुण मूं आइलै प्यार छाड़ाई तिकं आइलै मैरो बाब प्यार छाड़ा, और हाऊं तेस आइलै प्यार छाड़ाऊ और आपु तेस माथे परगट औआ ऊ।” 22 तिणी ई यहूदे जुण इस्करियोती नाई थौ, तेसकु पुछो, “ओ प्रभु, का हुआ कि तू आपु आमूं माथे परगट कौरणो चाह ई और धौतरी माथे नाई?” 23 यीशुए तेसलै जवाब दैओ, “अगर कुण मुं प्यार कौरा लौ ता सेऊ मैरो वचन माना आ, और मैरो बाब तेसकु प्यार कौरा, और आमै तेस कारे आशी ई, और तेस आइलै रौआई। 24 जुण मुं आइलै प्यार नाई छाड़ालो, सेऊ मैरो वचन नाई मानदो; और जेजो वचन तुमै शुणाई सेऊ मैरो नाई पर बाबा रौ आ, जुणीए हाऊं भेजो ऊ। 25 “एजी बुशै मुंइरे तुमु आइलै रौइओ तुमुके बोली इ। 26 पर मजदगार मतलब पवित्र आत्मा जास बाब मैरे नावां कौरी भेजा आ, सेऊ तुमुके सारी बुशै शिखावा, और जो कुछ मुंइरे तुमुलै बोलौ आ, सेऊ सब तुमुके याद कौरावा आ। 27 हाऊं तुमुलै शान्ति दिआऊ, आपणी शान्ति तुमुलै दिआऊ; जिणो संसार दिया सा, हाऊं तुमुलै तिणो नाई देंदो: तुमारो जिऊ घौबराओ नां चाई और नां चाई डौरौ। 28 तुमुए शुणो कि मुंइरे तुमुलै बोलौ, “हाऊं डिआऊ, और तुमुकारे तौइरे आशाऊ।” अगर तुमै मुं प्यार कौरा थै, ता एजी बुशा कु खुश औआ थै कि हाऊं बाबा कारे डेआऊ, कैलैकि बाब मुं कु बोडौ आ। 29 और मुंइरे आबे एस हुणे कु पैहलै तुमुके बोली गो कि जेबी सेऊ हुआ, ता तुमै विश्वास कौरौ। 30 हाऊं आबे कु तुमु आइलै औजो भौरी बुशै नाई लाइंदो, कैलैकि इरे धौतरी रौ मुख्या आशा आ। मुं माथे तेसरौ कोई हक नाई; 31 पर एऊ एथीलै हुआ आ ताकी संसार जाणा कि हाऊं बाबा आइलै प्यार छाड़ाऊ, और जिणो बाबे मुंलै हुकम दैओ आ हाऊं तिणी ई कौराऊ। उठो, इदरा कु डेई ई।

यीशु सौचची अंगूरा री लाऊ

15 सौचची बेल हाऊं ऊ, और मैरो बाब किसान आ। 2 जेजी डाली मुं दी आ और नाई फौलदी, तिरे सेऊ पोरु काटा सा; और जो फौल दिआ, तिरे सेऊ छांटा सा ताकी से औजो फौला। 3 तुमै ता तेस वचना रे कारण जेजो मुंइरे तुमुके बोलौ आ चोखे ई। 4 तुमै मुं दी बोणी रौ और हाऊं तुमुदी। जिणी डाली अगर बेला दी बोणी नाई रौआ ली ता से आपु कु नाई फौली सौकदी, तिणी ई तुमै अगर मुं दी बोणी ना रौआ लै ता नाई फौली सौकदी। 5 हाऊं बेल ऊ : तुमै ई डाली। जुण मुं दी बोणी रौआ लौ और हाऊं तेसदी, ता सेऊ भौरी फौल फौला आ, कैलैकि तुमै मुकु अलग हुइओ कुछ भी ना कौरी सौकदी। 6 अगर कुण मुं दी बोणी नाई रौआलो, ता तेस तिरे डाली बाशीए पोरु शोटाई, और से पोरु शुका आ; और लोग तिकं कौडै कौरिओ आगी दी जालाई, और से पोरु जौलाई। 7 अगर तुमै मुं दी बोणी रौआलै और मैरो वचन तुमुदी बोणी रौआलो, ता जो तुमै मांगणो चाह लै सेजो तुमुलै हुआ सा। 8 मैरे बाबा री बोडाई इणे कौरिरे हुआ आ कि तुमै भौरी फौला, तैबे ए तुमै मैरे चेलै बोणा ई। 9 जिणो बाबे मुं आइलै प्यार छाड़ो, तिणी ई मुंइरे तुमु आइलै प्यार छाड़ो आ; मैरे प्यारा दी बोणी रौ। 10 अगर तुमै मैरो हुकम माना लै, ता मैरे प्यारा दी बोणी रौआ लै; जिणो मुंइरे आपणे बाबा रौ हुकम मानौ आ, और तेसरै प्यारा दी बोणी रौआ ऊ। 11 मुंइरे तुमुके एजी बुशै एथलै बोली ई कि एरी खुशी तुमुदी बोणी रौआ, और तुमुरी खुशी पुरी हुआ। 12 मैरो हुकम एजो आ, कि जिणो मुंइरे तुमु आइलै प्यार किओ आ, तिणी तुमै भी एकी दुजे आइलै प्यार कौरौ। 13 एथकु बोडौ प्यार कासी रौ नाई कि आपणे गोश्टणा री ताई आपणे प्राण दिआ। 14 जेजी आज्ञा हाऊं तुमुलै दिआऊ, अगर तिरे मानालै ता तुमै मैरे दोस्त ई। 15 आबे हाऊं तुमुलै दास नाई बोलदो, कैलैकि दास नाई जाणदो कि मालिक का कौरा सा; पर मुंइरे तुमुलै गोश्टण बोलौ आ, कैलैकि जेजी बुशै मुंइरे आपणे बाबा कु शुणी, से सारी तुमुके बोली गोई आ। 16 तुमुए हाऊं नाई चुनौ पर मुंइरे तुमै चुनै ई और तुमै

मुंइरे छांटेई कि डेइओ फल आणा और तुमारो फल बोणी रौआ, कि तुमै मैरे नावां कौरिरे बाबा कु जो भी मांगा ले सेऊ तुमुलै दिआ। 17 एजी बुशु री आज्ञा हाऊं तुमुलै एथीलै दिआऊ कि तुमै एकी दुजे कु प्यार कौरा।

दूनिया आइलै दुशमनी

18 “अगर दुनियां तुमु कु नफरत कौरा आ, ता तुमै जाणा ई कि तिणीए तुमु कु पैहलै मुं आइलै नफरत की आ। 19 अगर तुमै संसारा रे हुआ थै, ता संसार आपणेऊ कु प्यार कौरा थौ; पर एजी वजह कु कि तुमै संसारा रे नाई, बल्कि मुंइरे तुमै दुनियां कु छांटी गोए ई, एथीलै संसार तुमु कु नफरत कौरा। 20 जेजी बुशै मुंइरे तुमुके बोली थी, कि नुकुर आपणे स्वामी कु बोडौ नाई औन्दौ, तिकं याद छाड़ौ। अगर तिउरे हाऊं सताओ ऊ, ता तुमु भी सौतावा ई; अगर तिउरे मेरी बुशै नाई मानी, ता से तुमुरी भी नाई मानदौ। 21 पर एस सब कुछ से मैरे नावा री वजह कु तुमु आइलै कौराई कैलैकि से मैरो भेजणे वालो नाई जाणदौ। 22 अगर हाऊं नाई आशा थौ और तिकं आइलै बुशै नाई लाआ थौ, ता से पापी नाई बोणा थै; पर आबे तिउरै तिउरै पापा लै कोई बाह्नो नाई। 23 जुण मुकु नफरत कौरा लौ, सेऊ मैरे बाबा कु भी नफरत कौरा सा। 24 अगर हाऊं तिकं मांझिरे सेजै काम नाई कौरा थौ जेजे कोई ओरी ए नाई किरै, ता से पापी नाई बोणा थै; पर आबे ता तिउरे हाऊं और मैरो बाबा दुइया देखी गोए ई और दुइया कु नफरत कौरा ई। 25 एऊ एथीलै हुआ कि सेऊ वचन पुरौ हुआ, जो तिउरे कानुना दी थौ लिखौ औन्दौ, ‘तिउरे मुकु फुकीई नफरत की ई। 26 पर जेबै सेऊ मजदगार आशा लौ, जास हाऊं तुमु कारे बाबा री तौरफा कु भेजाऊ, मतलब सौचाई री आत्मा जो बाबा री तौरफा कु निकला सा, ता सेऊ मेरी गवाही दिआ सा; 27 और तुमै भी मैरे गवाह ई कैलैकि पैहलै कु तुमै भी मुं आइलै साथाई रौरे ई।

16 एजी बुशै हाऊं तुमुके एथीलै बोलाऊ ताकी तुमै ठोकर ना खा लै। 2 से तुमु धार्मिक खुम्बली कु पोरु गाडाई, और सेजो बोग्त आशा की जुण-कुण तुमु पोरु झांगा लौ और से सौमझा लै कि हाऊं परमेश्वरा री सेवा कौरा ऊ। 3 इणो से एथीलै कौराई कि तिउरे ना बाब जाणो और ना मुं जाणदे। 4 पर एजी बुशै मुंइरे तुमुलै एथीलै बोली, कि जेबी इकरौ बोग्त आशा लौ ता तुमुके याद आशा की मुंइरे तुमु के पैहलै बोली गो थौ। “मुंइरे पैहले कु तुमुके एजी बुशै एजी ताईए नाई बोली कैलैकि हाऊं तुमारै साथा दी थौ।

पवित्र आत्मा रे काम

5 पर आबे हाऊं आपणे भेजणे वालै कारे डिआऊ; और तुमु मांझीआ कु कोई भी मुकु नाई पुछदो, ‘तु केशी डिआई?’ 6 पर मुंइरे तुमुके एजी बुशै बोली आ, एथिलै तुमारो जीऊ दुखा कौरिरे भौरुई गो आ। 7 तैबे हाऊं तुमुके सौचो बोलाऊ कि मैरो डेऊणो तुमुलै आच्छौ सा, कैलैकि अगर हाऊं नाई डेऊलै, सेऊ मजदगार तुमु कारे नाई आशदो; पर अगर हाऊं डेऊ लै, ता तेस तुमु कारे छाड़ाऊ। 8 सेऊ आशीओ दुनियां रे पाप और धर्म और फैसलै रे बारे दी कायल कौरा सा। 9 पापा रे बारे दी एथलै कैलैकि से मुं माथे विश्वास नाई कौरदौ। 10 और धर्मा रे बारे दी एथलै कि हाऊं बाबा कारे डिआऊ, और तुमै मुं तैबे नाई देखदौ; 11 फैसलै रे बारे दी एथलै कि दुनियां रौ मुख्य आरोपी चाणी गो आ। 12 “मुंइरे तुमु आइलै औजो भी भौरी बुशै बोलणी ई, पर तुमै तिकं सैहन नाई कौरौ बोलदौ। 13 पर जेबी से मतलब सौचाई री आत्मा आशाली, ता तुमुके सब सौचाई री बाट बोला आ, कैलैकि सेऊ आपणी तौरफा कु नाई बोलदौ पर जो कुछ शुणालो सेजो बोला आ, और हुणे वाली बुशै तुमुके बोला आ। 14 सेऊ मेरी बोडाई कौरा आ, कैलैकि सेऊ मेरी बुशु मांझीआ कु तुमुलै बोला आ। 15 जो कुछ बाबा रौ आ, सेऊ सब मैरो आ; एथीलै मुंइरे तुमुलै बोलौ की सेऊ मेरी बुशा मांझीआ कु तुमुलै बोला आ।

दुःख सुखा दी बौदलिया

16 “थोडै बोग्ता दी तुमै मुं नाई देखावै, और तैबे थोडै बोग्ता दी मुं देखावै।” 17 तैबे तेसरै कुछ चलेऊए आपु मांझीए बोलौ, “एउ का सा जो एऊ आमुलै बोला आ, ‘थोडै बोग्ता दी तुमै मुं नाई देखावै, और तैबे थोडै बोग्ता दी मुं देखावै?’ और एऊ ‘एथीलै कि हाऊं बाबा कारे डिआ ऊ?’” 18 तैबे तिउरे

बोलो, "एऊ 'थोड़ो बौग्त' जो एऊ बोला आ, का बुश आ? आमै नाई जाणदे की एऊ का बौला आ?" 19 यीशुए इणो ज़ाणीओ कि इरे मुकु पुछणो चाह ई, तिणीए बोलो, "का तुमै आपु माझिरे मेरी इऊं बुशु रै बारे दी पछ्ताछ कौरा ई, 'थोड़ो बौगता दी तुमै मुं नाई देखालै, और तैबै थोड़ो बौगता दी मुं देखालै?' 20 हाऊं तुमुलै सौचो-सौचो बोलाऊ कि तुमै लेरा लै और दुखी ओआलै, पर संसार खुशी मौनावा लौ; तुमुलै शोक ओआलौ, पर तुमुरौ शोक खुशी दी बौदलीआ। 21 ओलखीणै रै बौग्तै छेउडी लै शोक ओआ, कैलैकि तियांरौ दुखी रौ बौग्त आशी गौ आ, पर जेबी सै लोलडौ पैदौ हुआ, ता एज्जी खुशी दी की संसारा दी एक आदमी पैदौ हुआ आ, तेस दुखा री बौग्त तौंइरे याद नाई कौरदी। 22 तिणी ई तुमुलै भी इबी शोक आ, पर हाऊं तुमुकै तौंइरे मिलुलै और तुमुरौ ज़िऊ खुशी कौरौ भौरु लै; और तुमारी खुशी कोई तुमुकु नाई छुड़ाउदौ। 23 सेज्जे दिने तुमै मुं कु कुछ ना पुछालै। हाऊं तुमुलै सौचो-सौचो बोलाऊ, अगर बाबा कु कुछ मागा लै, ता सेऊ मेरे नावां कौरौ तुमुलै दिया आ। 24 इबी झाऊं तुमुए मेरे नावां कौरौ कुछ ना मांगो; मांगालै, ता पा लै ताकी तुमुरी खुशी पुरी ओआ।

दुनिया माथी ज़ीत

25 "मुंइरे एज्जी बुशै तुमुलै अनैणै देईयो बोली ई, पर सेज्जौ बौग्त आशा आ कि हाऊं तुमुलै तैबै अनैणै देईओ नाई बोलुलै, पर खुलीओ तुमुलै बाबा रै बारे दी बोलाऊ। 26 सेज्जे दिना दी तुमै मेरे नावां कौरौए मागाई; और हाऊं तुमुकै इणो नाई बोलदौ कि हाऊं तुमुलै बाबा कु प्राथना कौराऊ; 27 कैलैकि बाब ता आपु तुमु कु प्यार कौरा, कैलैकि तुमुए मुं आइलै प्यार कौरौ आ और इणो भी विश्वास कौरौ कि हाऊं बाबा री तौरफा कु आशौ ओन्दौ। 28 हाऊं बाबा री तौरफा कु दुनियां दी आशौ ओन्दौ; हाऊं तैबै दुनियां छाडीयो बाबा काए डिआऊ।" 29 तेसरै चलेउए बोलौ, कि देख आबै तु खुलीओ बोलाई, और केजौ भी अनैणो नाई बोलदौ। 30 आबै आमै ज़ाणी गौरै कि तू सब कुछ जाणाई, और एथरी ज़ुरत नाई कि कोई भी ताऊं कु कुछ पुछा; एथकु आमै विश्वास कौरौ कि तु परमेश्वर री तौरफा कु ई आशौ ओन्दौ। 31 इणो शुणीओ यीशुए तिउंलै बोलौ, "का तुमै आबै विश्वास कौराई? 32 देखौ सेज्जौ बौग्त आशा आ पर आशी गौ कि तुमै सारे फोलुइयो आपणी-आपणी बाट निंआई, और मुं एखुली छाड़ाई; तैबै भी हाऊं एखुली नाई कैलैकि बाब मुं आइलै साथी दी आ। 33 मुंइरे तुमुकै एज्जी बुशै एथलै बोली कि तुमुलै मुकु शान्ति मिला। संसारा दी तुमुकै दुख हूआ, पर तुमै काठौ ज़िऊ छाडौ, मुंइरे संसार ज़िती गौ आ।

यीशु प्राथना बौडै याजका ज़ीणी : सौरगा लै

17 यीशुए एज्जी बुशै बोली और आपणी आखी सौरगा भिलै लाइओ बोलौ, "ओ बाब, सेज्जौ बौग्त आशी गौ आ; आपणै छोहरु री बौडाई कौर की छोहरु भी तेरी बौडाई कौरा, 2 कैलैकि ताइंरे तेसकै सौभी आदमी माथे हक दैओ, कि जो ताइंरे तेसकै दैओ आ तिऊं सौभी लै सेऊ सौदा री ज़िन्दगी दिया। 3 और सौदा री ज़िन्दगी इरे आ की सै ताऊं एक ई सौचो पमरेश्वर और यीशु मसीह, जो ताइंरे भेजौ ओन्दौ आ, जाणा। 4 जो काम ताइंरे मुकै कौरना लै दैओ थौ, तेस पुरौ कौरौओ मुंइरे धौतरी माथे तेरी बौडाई की आ। 5 आबै ओ बाब, तू आपू आइलै मेरी बौडाई तिरे बौडाई आइलै कौर जो संसारा रै चाणनै कु पैहलै, मेरी ताऊं आइलै थी।

आपणै चलेउ लै

6 "मुंइरे तैरौ नाऊं तिऊं आदमीउ माथे परगट किओ आ जो ताइंरे संसारा माझिरे कु सै मुकै ई दैओ ओन्दै, और सै तैरे थै और ताइंरे सै मुकै दै, और तिउंरे तैरौ वचन मानी गौ आ। 7 आबै तिउंरे ज़ाणी गौ कि जो कुछ ताइंरे मुकै दैओ आ, सेऊ सब तेरी तौरफा कु आ; 8 कैलैकि जो वचन ताइंरे मुकै दे ई; मुंइरे सै तिऊं काए पौउंचाई गौरै; और तिउंरे सै अपणाए, और सौच-सौच ज़ाणी गौरै की हाऊं तेरी तौरफा कु ऊ, और विश्वास कौरौ गौ कि तांरे ई हाऊं भेजौ ऊ। 9 हाऊं तिउंलै प्राथना कौराऊ; दुनियां लै प्राथना नाई कौरदौ पर तिउंलै ज़ुण ताइंरे मुकै ई दैओ ओन्दै, कैलैकि सै तैरे ई; 10 और

जो कुछ मेरौ आ सेऊ सारौ तैरौ आ और जो तैरौ आ सेऊ मेरौ आ, और इऊं कु मेरी बौडाई परगट हुई आ। 11 हाऊं आबै दुनियां दी नाई रौउंदौ, पर ए दुनियां दी रौआई, और हाऊं ताऊं काए आशाऊं। ओ पवित्र बाब, आपणे तेस नावां कौरौए जो ताइंरे मुकै दैओ आ, तिऊं री रक्षा कर कि सै आमू ज़िणे एक हुआ। 12 जेभी हाऊं तिउंरै साथी थौ, ता मुंइरे तैरे तेस नावां कौरौए, जो ताइंरे मुकै दैओ तिउंरी रक्षा की। मुंइरे तिउंरी देख बाल की, और नाशा रै छोहरु छाडीओ तिऊं माझिरे कु कोई नाश नाई हुओ, एथीलै पवित्रशास्त्रा दी जो बोलौ ओन्दौ आ सेऊ पुरौ हुआ। 13 आबै हाऊं ताऊं काए आशाऊं, और इऊं बुशै दुनियां दी बोलाऊ, कि सै मेरी खुशी आपुदी पुरी कौरा। 14 मुंइरे तैरौ वचन तिउंके पौउंचाई गौ आ; और संसारै तिऊं कु नफरत की, कैलैकि ज़िणो हाऊं संसारा रौ नाई, तिणी ई सै भी संसारा रै नाई। 15 हाऊं इणी प्राथना नाई कौरदौ कि तु तिऊं दुनियां कु ऊठाऊ; पर इणी कि तु तिऊं बुराई कु बौचाई छाडै। 16 ज़िणो हाऊं दुनियां रौ नाई, तिणी सै भी दुनियां रै नाई। 17 सौचाई कौरौए तिऊं पवित्र कर: तैरौ वचन सौचौ आ। 18 ज़िणो ताइंरे हाऊं संसारा दी भेजौ ऊ, तिणी मुंइरे भी सै संसारा दी भेजै ई; 19 और तिउंलै हाऊं आपु भी पवित्र हुआऊ, ताकी सै भी सौचाई कौरौए पवित्र हुआ।

सौबी विश्वासिउ लै

20 "हाऊं सिर्फ इऊंलै औरज नाई कौरदौ, पर तिउंलै भी ज़ुण तिउंरे वचना कौरौ मुं माथे विश्वास छाडा लौ, 21 कि सै सारै एक हुआ लै; ज़िणो ओ बाब तू मुंदी ई, और हाऊं ताऊंदी, तिणी ई सै भी आमू दी हुआ, जेथ कौरौ संसार विश्वास कौरा की ताइंरे ई हाऊं भेजो ऊ। 22 सै बौडाई जो ताइंरे मुकै देई मुंइरे तिउंके देई आ, कि सै तिणी ई एक हुआ ज़िणो की आमै एक ई, 23 हाऊं तिऊंदी और तू मुंदी ई कि सै पवित्र हुईयो एक हुआलै, और संसार जाणा लौ कि तांरे ई हाऊं भेजो ऊ, और ज़िणो ताइंरे मुं आइलै प्यार किओ तिणी ई तिऊं आइलै प्यार किओ आ। 24 ओ बाब, हाऊं चाहा ऊ कि जो ताइंरे मुकै दे ई, ज़िरे हाऊं ऊ तिरे सै भी मुं आइलै ओआ, कि सै मेरी तिरे बौडाई देखा जो ताइंरे मुकै देई आ, कैलैकि ताइंरे धौतरी चाणनै कु पैहलै मुं आइलै प्यार कियो। 25 ओ धार्मिक बाब, संसारै हाऊं नाई जाणौ, पर मुंइरे तू ज़ाणौ; और इऊंरे भी ज़ाणौ कि तांरे ई हाऊं भेजो ऊ। 26 मुंइरे तैरौ नाऊं तिउंके बोलौ और बोलदौ थाका ऊ लागी की जो प्यार तैरौ मुं आइलै थौ सेऊ तिऊंदी रौआ, और हाऊं तिऊंदी रौऊ।"

यीशु रौ पकडाइणो

(मती 26:47-56; मरकुस 14:43-50; लूका 22:47-53)

18 यीशुए एज्जी बुशै बोलिओ आपणै चलेऊ आइलै किद्रोन नाला कु पारभिलै डैओ। तिरे एक डोखरौ थौ, जेथदी सेऊ और तेसरै चले डेवै। 2 तेस पकडाउणै वालौ यहूदा भी सेजी जागा ज़ाणा थौ, कैलैकि यीशु आपणै चलेऊ आइलै तिरे डेउदं थाका थौ लागी। 3 तैबै यहूदा, फौजरी री एक टोली और परधान याजकू और फरीसिउ री तौरफा कु प्यादौ आणियो, दिवै और ज़ोकटी और हथियार आणियो तिरे आशौ। 4 तैबै यीशु, तिऊं सारी बुशै जो तेस माथे आशणै वाली थी ज़ाणियो, निकलौ और तिउंलै बोलौ, "कास लोडाई?" 5 तिउंरे तेसलै ज़वाब दैओ, "यीशु नासरी।" यीशुए तिउंलै बोलौ, हाऊं ऊ, "तेस पकडाउणै वालौ यहूदा भी तिऊं आइलै खोडौ थौ। 6 तेसरै इणो बोलदै ही, "हाऊं ऊ," सै पिछाऊ हुइओ ज़बीना माथे लोटी गौरै। 7 तैबै तिणीए तौंइरे तिऊं कु पूछो, "तुमै कास लोडाई?" तिउंरे बोलौ, "यीशु नासरी।" 8 यीशुए ज़वाब दैओ, "मुंइरे ता तुमु लै बोली गौ आ कि हाऊं ऊ, अगर मुं लोडाई ता इऊं डेउणै दैओ।" 9 एऊ एथलै हुओ कि सेऊ वचन पुरौ हुआ जो तिणीए बोलौ थौ: "जो ताइंरे मुकै दे ई तिऊं माझिआ कु मुंइरे एक भी ना ओचाए।" 10 तैबै शमोन पतरसै तलवार, जो तेसकै थी, गाडी और महायाजकू रै दासा दी लाइओ तेसरौ सुलटौ कौन्थू काटी गौ। तेस दासा रौ नाऊं मलखुस थौ। 11 तैबै यीशुए पतरसा लै बोलौ, "आपणी तलवार म्याणा दी छाड। जो खोरु बाबे मुलै दैओ आ, का हाऊं तेस नाई पीऊ?"

हन्नाह रै सामने यीशु

12 तैबे फौजीउए और तिऊं रे सुबेदारै और यहूदिऊ रै प्यादेउए यीशु पाकड़ियो बानो, 13 पैहले सेउ हन्ना कारे निओ, कैलैके सेऊ सेजी बोरषा रे महायाजक काइफा रौ शेऊरौ थौ। 14 एऊ सेजौ काइफा थौ, जुणीए यहूदिऊ लै एजी सलाह देई थी कि आमु रै लोगु लै एकी आदमी रौ मौरणौ आछौ आ।*

पतरसा रौ इन्कार

(मती26:69-70; मरकुस14:66-68; लूका22:-57)

15 शमौन पतरस और एक दूजौ चेलौ यीशु पिछाडी चाल पौडै। एऊ चेलौ महायाजक रौ जाणौ-पहचाणौ थौ, सेऊ यीशु रै साथई महायाजका रै तौंगा दी डैओ। 16 पर पतरस बाइरी भिलै दारा कारे खौडौ रौ। तैबे सेऊ दूजौ चेलौ जो महायाजक रौ जाण-पहचाणा रौ थौ, बाइरै निकलौ और जो छेउडी दारा कारे औआ थी छाडी ऐन्दी तिआंलै बोलियो पतरस भितरै आणौ। 17 तिऐं दासी ऐ जो दारा कारे थी, पतरसा लै बोलौ, "किरे तु भी एस आदमी रै चेलै मांझिया कु ता नाई?" तिणीए बोलौ, "हाऊं नाई ऊ।" 18 नुकर और प्यादे शेलै री वजह कु गाठै फुकरौआ आगी तापदैं थै लागै औन्दै, और पतरस भी तिऊं आइलै खौडौ हुइयो आगी तापदैं थौ लागौ औन्दौ।

महायाजक रै जरिरे यीशु कु पूछताछ

(मती26:59-66; मरकुस14:55-64; लूका22:66-71)

19 तैबे महाजक यीशु कु तेसरै चलेऊ रै बारै दी और तेसरी शिक्षा रै बारै दी पूछदैं लागौ। 20 यीशुए तेसलै जवाब दैओ, "मुंइरे दूनिया आइलै खोलियो बुशे लाई ई; मुंइरे धार्मिक खुम्बली और परमेश्वर रै घौरा दी, जिरे सारै यहूदी कौठै हुआ थै, सौदा शिक्षा देई और चोरीए कुछ भी नाई बोलौ। 21 तू मुकु कैलै पुछाई? शुणनै वालेउ कु पुछ कि मुंइरे तिउंकै का बोलौ। देख, से जाणाई की मुंइरे का-का बोलौ।" 22 जेबी तिणीए इणौ बोलौ, "तैबे प्यादे मांझिया कु एकीए जो तिरे खौडौ थौ, यीशु दी थापे लाइयो बोलौ, "का तू महा याजक लै इणै कौरीए जवाब दिया ई?" 23 यीशुए तेसलै जवाब दैओ, "अगर मुंइरे बुरौ बोलौ, ता तियां बुराई री गवाही दै; पर अगर भौलौ बोलौ आ, ता मुं कैलै पिटा ई?" 24 हन्नै सेउ बानौ औन्दौ काइफा महायाजका कारे भेजी गौ।

पतरसा रौ दूजी बारै इन्कार कौरणौ

(मती26:71-75; मरकुस14:69-72; लूका22:58-62)

25 शमौन पतरस खौडी हुइयो आगी तापदैं थौ लागौ औन्दौ। तैबे तिउंरे तेसलै बोलौ, "किरे तू भी ऐसरै चेलै मांझिया कु ता नाई?" तिणीए मुकरियो बोलौ, "हाऊं नाई ऊ।" 26 परधान याजक रै नुकरा मांझिया कु एक, जो तेसरै टौबरा मांझिऊ कु थौ ज़ासरौ कौन्थू पतरसै काटौ थौ, बोलौ, "का मुंइरे तू तेस आइलै तौंगा दी नाई देखौ थौ?" 27 पतरस तौइरे मुकरौ, और खरकचार कुरखडौ बाशौ।

पिलातुसा रै सामने यीशु

(मती27:1,2; 11-14; 15:1-5; लूका23:1-5)

28 तैबे तिउंरे यीशु काइफा कारे कु पिलातुसा रै महला दी नीई गौ, और दोतकौ बौग्त थौ, पर से आपू महला भीतै नाई डै ताकी बिटालिया नाई पर फसह री रोटी खाई बोला। 29 तैबे पिलातुस बाइरै निकलौ और तिऊं कारे आशीयो बोलौ, "तुमै एस आदमी माथे केजी बुशा रौ आरोप ला ई?" 30 तिउंरे तेसलै जवाब दैओ, "अगर एऊ बुरै कामा कौरनै वालौ नाई औआ थौ ता आमै एस तैरै हाथा दी नाई दिया थै।" 31 पिलातुसै तिउंलै बोलौ, "तुमै ई नियौ एस आपणै कानुना कौरी ऐसरौ फसलौ कौरौ।" यहूदिउए तेसलै बोलौ, "आमुके हक नाई की आमै कास रौ प्राण नीऊं लै।" 32 एऊ एथलै हुओ की यीशु री सेजी बूश पूरी हुआ जो तिणीए इणै, इशारे दैदी बारै बोली थी की तेसरी मौत किणी हुआ। 33 तैबे पिलातुस तौइरे महला दी भीतरै डैओ, और यीशु भीतरै ओटाइयो तेसकु पूछौ, "का तू यहूदिऊ रौ राजौ ई?" 34 यीशुए

तेसलै जवाब दैओ, "का तू एजी बूश आपणी तौरफा कु बोलाई या दूजेउए मैरै बारै दी ताउंकै इणौ बोलौ आ?" 35 पिलातुसै जवाब दैओ, "का हाऊं यहूदी ऊ? तेरी ही जाति और परधान याजकुरे तू मैरै हाथा दी दैओ ई। ताइरे का किओ आ?" 36 यीशुए जवाब दैओ, "मैरौ राज इणै दुनिया रौ नाई; अगर मैरौ राज इणै दुनिया रौ औआ थौ, ता मैरै सेवक पिटिया थै कि मूं यहूदिऊ रै हाथा दी नाई दिया थै : पर मैरौ राज इदलौ नाई।" 37 पिलातुसै तेसलै बोलौ, "तैबे का तू राजौ ई?" यीशुए जवाब दैओ, "तू बोलाई की हाऊं राजौ ऊ। मुंइरे एजी ताइरे जन्म निओ और एथीलै दुनिया दी आशो ऊ कि सौचाई री गवाही देऊ। जुण-कुण सौचाई रौ आ, सेउ मेरी बाच शुणा आ।" 38 पिलातुसै तेसलै बोलौ, "सौचाई का सा?" इणौ बोलियो सेउ तैबे यहूदिऊ कारे डैओ और तिउंलै बोलौ, "मुकै ता एसदी कुछ भी बुराई नाई दिशदी।

मौरनै री सौजा री आज्ञा

(मती27:15-31; मरकुस15:6-20; लूका23:13-25)

39 पर तुमारौ एजौ रिवाज आ कि फसह दी तुमुलै एक कैदी आज्ञाद कौरु। तैबे का तुमै चाहा ई कि हाऊं तुमुलै यहूदिया रौ राजौ छाडू?" 40 तैबे तिउंरे तौइरे हाके देख्यो बोलौ, "एस नाई, पर आमु लै बरअब्बा छाड।" और बरअब्बा एक डाकु थौ।

19 एथ माथे पिलातुसै यीशु डीगै कौरी पिटाओ। 2 सिपाइउरे कांडेउ रौ ताज बेलियो तेसरै मुंडा माथे छाडौ, और तेसकै बैंगनी रौंगा रै जुडकै भिडाए, 3 और तेस कारे आशी-आशियो बोलदैं लागै, "ओ यहूदिउ रै राजे आ, ढाल!" और तेसदी थापे भी लाई। 4 तैबे पिलातुसै तौइरे बाइरै निकलियो लोगु लै बोलौ, "देखौ, हाऊं एस तुमु कारे तौइरे बाइरै आणा ऊ; ताकी तुमै जाणा लै कि मुकै एसदी कुछ भी गौलती नाई दिशदी।" 5 तैबे यीशु कांडे रौ ताज और बैंगनी जुडकै भिडाइयो बाइरै गाडौ; और पिलातुसै तिउंलै बोलौ, "देखौ, एस आदमी!" 6 जेबी परधान याजक और चोउकीदारुए सेउ देखौ, ता हाका देख्यो बोलौ, "एस कूसा माथे चौडाऊ, कूसा माथे!" पिलातुसै तिउंलै बोलौ, "तुमै ई एस निओ और कूसा माथे चडाओ, कैलैकि मुकै एसदी कोई भी गौलती नाई दिशदी।" 7 यहूदिउए तेसलै जवाब दैओ, "आमारौ भी कानून आ और तेस कानूना कौरी एऊ ज़ांगणै रै लायक आ, कैलैकि एउ आपूलै परमेश्वर रौ छोहरु आ बौणौ औन्दौ।" 8 जेबी पिलातुसै एजी बूश शुणी ता औजौ भी डौरी गौ, 9 और तैबे महला दी भितै डैओ और यीशु लै बोलौ, "तू किदलौ ई?" पर यीशुए तेसलै कुछ भी जवाब नाई दैओ। 10 एथ माथे पिलातुसै तेसलै बोलौ, "मुं आइलै कैलै ना बोलदौ? का तू नाई जाणदौ की ताऊं आज्ञाद कौरनै रौ हक मुकै आ, और ताऊं कूसा माथे चडाउणा रौ हौक भी मुकै आ।" 11 यीशुए जवाब दैओ, "अगर ताउंलै माथा कु नाई औआ थौ दैओ औन्दौ, ता तैरौ मुं माथे कुछ हक नाई औआ थौ; एथीलै जुणिरे हाऊं तरै हाथा दी पकडाओ ऊ तेसरौ पाप जादौ आ।" 12 एथ माथे पिलातुसै सेऊ छाडनौ चाओ, पर यहूदिउए हाका देख्यो बोलौ, "अगर तु एस छाडाई ता तेरी भक्ति कैसरा भिलै नाई आ। जुण भी आपूलै राजौ बोणा सा सेऊ कैसरा रौ मुकाबलौ कौरा सा।" 13 एजी बुशे शुणिओ पिलातुसै यीशु बाइरै आणौ और तिऐं जगाह दी एक गद्दी थी जेथलै इब्रानी बोली दी 'गब्बता' बोला थै, और फसलै शुणाउणै वाली गद्दी माथे बोशौ। 14 एऊ फसह री त्यारी रौ दीन थौ, और छौउरे घान्टे रै तकरीबन थौ। तैबे तिणीए यहूदिऊ लै बोलौ, "देखौ तुम्हारौ राजौ!" 15 पर तिउंरे हाके देखै, "निऊं! निऊं! एस कूसा माथे चौडाऊ!" पिलातुसै तिउंलै बोलौ, "का हाऊं तुम्हारौ राजौ कूसा माथे चौडाऊ?" परधान याजकुरे जवाब दैओ, "कैसरा छाडीओ आमारौ कोई भी राजौ नाई।" 16 तैबे तिणीए सेऊ तिउंरै हाथाई देई गौ ताकी तेस कूसा माथे चौडावा लै।

यीशु कूसा माथे चौडाऊणौ

(मती27:32-44; मरकुस15:21-32; लूका23:26-43)

17 तैबे तिउंरे यीशु नीं ऐरौ, और सेऊ आपणौ कूस चुंगीओ तिऐं जगाह कु बाइरै डैओ, 'जेथलै खोपडी री जगाह' बोला ई और इब्रानी बोली दी 'गुलगुता'। 18 तिऐं तिउंरे सेऊ और तेस आइलै तौइरे दुई आदमी कूसा माथे चौडाए, एक ओर भिलै और एक पौर, और मांझा दी यीशु। 19 पिलातुसै एक

तौत्की लिखियो कूसा दी लाई गोई, तौत्की दी इणो थो लिखौ औन्दौ, “यीशु नासरी, यहूदिउ रौ राजौ।” 20 इऐ तौत्की भौरी यहूदीउऐ पौडी, कैलैकि सेज्जी जागाह जिऐ यीशु कूसा माथे चौडाओ थो इलाकै कारे थी; और तौत्की दी इब्रानी और लतीनी और यूनानी दी थो लिखौ औन्दौ। 21 तैबै यहूदिउ रै परधान याजकुरे पिलातुसा लै बोलौ, “यहूदिउ रौ राजौ नाई लिखौ पर इणो कि ‘तिणीऐ बोलौ, हाऊं यहूदिउ रौ राजौ ऊ।’” 22 पिलातुसै जवाब दैओ, “मुइऐ जौ लिखी गौ, सेऊ लिखी गौ।” 23 जेबी सिपाइउऐ यीशु कूसा माथे चौडाई गौ थो, ता तेसरे जुडकै निईओ चारा भिलै किये, हर सिपाइऊ लै एक हिस्सौ, और कुरतौ भी निओ, पर कुरतौ बिण सिओ माथा कु तौल झाऊं बुणौ औन्दौ थो। 24 एस कुरता लै तिउंऐ आपू मांझीऐ बोलौ, “आमै एस नाई चिरदै, पर एथ माथे पौची पाई की एऊ कासरी ओलौ।” एऊ एथीलै हुओ कि पवित्रशास्त्रा दी जौ लिखौ औन्दौ थो सेऊ पुरौ हुआ, “तिउंऐ मेरे जुडकै आपू मांझीऐ बांटी ऐरे और मेरे जुडकै माथे पौची पाई।” 25 तैबै सिपाइउऐ इणी ई कियौ। यीशु रै कूसा कारे तेसरी आमा और तेसरी आमा री बौइण, क्वापासा री छेउडी मरियम, और मरियम मगदलीनी खोडी थी। 26 जेबी यीशुऐ आपणी आमा, और सेऊ चेलौ जास आइलै सेऊ प्यार कौरा थो आपू कारे खौडै देखै ता आपणी आमा लै बोलौ, “ओ छेउडी जात, देख, एऊ तैरौ छोहरू आ।” 27 तैबै तिणीऐ चेलै लै बोलौ, “इऐ तेरी आमा आ।” और सेजै बौगता कु तिणी चेलैऐ सै यीशु आमा आपणै घोरै नीई गोई।

यीशु री मौउत

(मती27:45-56; मरकुस15:33-41; लूका23:44-49)

28 एथ बासिए यीशुऐ इणै जाणिओ कि आबै सब-कुछ पूरौ हुई गौ आ, एथीलै कि पवित्रशास्त्रा दी जौ बोलौ आ सेऊ पूरौ हुआ, और बोलौ, “हाऊं चिशो ऊ।” 29 तिऐ सिरकै कौरीऐ भौरौ औन्दौ एक ओखर थो छाडौ औन्दौ, और तिउंऐ लांबे डिगै दी स्याइचूश लाओ और सिरकै दी भिजाओ और यीशु रै मुंआ दी लाओ। 30 जेबी यीशुऐ सेऊ सिरको चुशौ, और बोलौ, “पुरौ हुओ; और मूढ उटै पाईयौ प्राण छाडै।

बौडछै कौरी छोपणौ

31 एथीलै कि सेऊ त्यारी रौ दिन थो, यहूदिउऐ पिलातुसा कु औरज कौरी कि इऊं री टांगे पोरू चाई चोडनी और कूसा कु उतारने चाई ताकी इऐ ब्रोता रै दिना दी कूसा माथे ना रौआ, कैलैकि ब्रोता रौ दिन सारेऊ कु बौडौ दिन थो। 32 और तिऊं सिपाइउऐ आशीओ तिऊ आदमी मांझिया कु पैहलै री टांगे चोडी और तैबै दुजै री भी, जौ यीशु आइलै थै कूसा माथे चौडाऐ औन्दै; 33 पर जेबी यीशु कारे आशियौ देखौ की एऊ मारी गौ आ, ता तेसरी टांगे नाई चोडी। 34 पर सिपाइऊ मांझिआ कु एकीऐ बरछै कौरीऐ तेसरी शाफडी छोपी, और तेसकु खरकचार लोहु और पाणी निकलौ। 35 जुणिऐ इणौ देखौ, तिणीऐ गवाही देई, और तेसरी गवाही सौची आ; और सेऊ जाणा आ कि सेऊ सौचौ बोला आ कि तुमै भी विश्वास कौरौ। 36 एजी बुशै एथीलै हुई की पवित्रशास्त्रा दी जौ बोलौ औन्दौ आ सेऊ पूरौ हुओ आ, “तेसरे कोई हाडकै नाई चोडा लै।” 37 तैबै एक ओरी जागाह दी इणौ आ लिखौ औन्दौ, “जुण तिउंऐ छोपौ आ, तेस माथे सै नौजर छाडा लै।”

यीशु रौ मौडौ ओडाची दी छाडणौ

(मती27:57-61; मरकुस15:42-47; लूका23:44-49)

38 एजी बुशु बासिए अरिमतिया रै यूसुफै जौ यीशु रौ चेलौ थो, पर यहूदिउ रै डौरा कु एजी बुशु चोरी छाडा थो, पिलातुसा कु औरज कौरी की का हाऊं यीशु रौ मौडौ नीऊ लै। पिलातुसै तेसरी औरज शुणी और यूसुफै आशियौ यीशु रौ मौडौ निओ। 39 नीकुदेमुस भी, जौ पैहलै यीशु कारे राची डैओ थो, पचास सेरा रै लगभग मिलाओ औन्दौ खुशबुदार चिजै और महंगे वालौ तेल आपणौ। 40 तैबै तिउंऐ यीशु रौ मौडौ निओ, और यहूदिउ रै दाबणा रै रिवाजा कौरीऐ सेऊ खुशबुदार चिजै कौरीऐ टाला दी मेटौ। 41 सेजी जागाह दी जिऐ यीशु कूसा माथे चौडाओ थो, एक बगीचौ थो, और तेस बौगीचै दी एक नौई ओडाची थी जासदी केबी भी कोई नाई छाडौ थो। 42 एथीलै यहूदिउ रै त्यारी

रै दिना रै वजाह कु तिउंऐ यीशु तेथी दी छाडौ, कैलैकि सै ओडाची नजदीक थी।

खाली ओडाची

(मती28:1-8; लूका24:1-12; मरकुस16:1-8)

20 सप्ताह रै पैहलै दिने मरियम मगदलीनी दोउत राची न्यारै दी ओडाची कारे आशी, और पात्थर ओडाची कु घिसरौ औन्दौ देखौ। 2 तैबै तिउंऐ फेट मारी और शमोन पतरस और तेस दुजै चेलै कारे जास आइलै यीशु प्यार कौरा थो, आशीओ बोलौ, “तिउंऐ ओडाची भितै कु प्रभु गाडीओ नीई गौ आ, और आमै नाई जाणदै कि सेऊ किये छाडी गौ आ।” 3 तैबै पतरस और सेऊ दुजौ चेलौ निकलीओ ओडाची भिलै चाल पौडै। 4 सै दुइआ साथा-साथाई फेटै देन्दै थै लागै औन्दै, पर दुजौ चेलौ पतरसा कु ओगाडिऐ डेइओ ओडाची कारे पैहलै पौउंचौ; 5 और उटौ पौडीयौ जुडकै धौनी पौडै औन्दै देखै, पर सेऊ भीतरै नाई डैओ। 6 तैबै शमोन पतरस जौ तेस पिछु थो आशदै लागौ औन्दौ पौउंचौ, और ओडाची दी भीतरै डैओ और जुडकै पौडै औन्दै देखै। 7 और सेऊ कापडौ जौ तेसरे मुंढा दी थो बानौ औन्दौ, जुडकै आइलै पौडौ औन्दौ नाई, पर ओलग एकी जागाह दी मेटियौ छाडौ औन्दौ देखौ 8 तैबै दुजौ चेलौ भी जौ ओडाची कारे पैहलै पौउंचौ थो भीतरै डैओ और देखिओ विश्वास कियो। 9 सै ता इबी झाऊं पवित्रशास्त्रा री तिऐं बूश नाई सौमझै थै कि सेऊ मौरै औन्दै मांझिआ कु जिउंदौ हुआ आ। 10 तैबै सै चेलै आपणै घोरै डेई गौऐ।

मरियम मगदलीनी कै यीशु दिशणौ

(मती28:9-10; मरकुस16:9-11)

11 पर मरियम लेरियौ ओडाची कारे बाईरै खौडी रौई, और लेरदै-लेरदै ओडाची भिलै उटै पौडियो। 12 दुई सौरगा रै दूत चौमकीलै जुडकै भीडीओ एक शिराणै कारे और दुजौ बांगणै कारे बोशै औन्दै देखै, जिऐ यीशु रौ मौडौ थो छाडौ औन्दौ। 13 तिउंऐ तियांलै बोलौ, “ओ बौइण, तू कैलै लेराई?” मरियमै तिउंलै बोलौ, “तिउंऐ मेरौ प्रभु चुंगीओ नीं गौ आ और हाऊं नाई जाणदी कि सेऊ किये छाडौ औन्दौ।” 14 इणौ बोलियो सै पिछाऊं फीरी और यीशु खौडौ हुओ औन्दौ देखौ, पर नाई पराणुओ कि एऊ यीशु आ। 15 यीशुऐ तियांलै बोलौ, “ओ छेउडी जात, तू कैलै लेराई? कास लौडाई?” तिआंऐ सेवक समझीओ तेसलै बोलौ, “ओ महाराज, अगर ताइऐ सेऊ नीई गौ आ ता मुकै बोल कि सेऊ किये छाडौ आ, और हाऊं तेस निआऊं।” 16 यीशुऐ तियांलै बोलौ, “मरियम!” तियांऐ पिछाऊं फिरीओ तेसलै इब्रानी बोली दी बोलौ, “रब्बूनी!” मतलब कि ‘ओ गुरु’। 17 यीशुऐ तियांलै बोलौ, “मुं नाई छूं, कैलैकि हाऊं इबी झाऊं बाबा कारे उपरै नाई डैओ, पर मेरे भाइऊ कारे डेइओ तिउंलै बोल, कि हाऊं आपणौ बाब और तुमारौ बाब, और आपणै परमेश्वर और तुमारै परमेश्वरा कारे उपरै डिआऊं।” 18 मरियम मगदलीनी ऐ डेइओ चेलैऊ कै बोलौ, “मुइऐ प्रभु देखौ, और तिणीऐ मुंलै एजी बुशै बोली।”

चेलैउ कारे परगट हुणौ

(मती28:16-20; मरकुस16:14-18; लूका24:36-39)

19 सेजै दिने जौ सप्ताह रौ पैहलौ दिन थो, ब्यालकै बौगै जेबी तिदलै दार जिऐ चेलै थै, यहूदिउ रै डौरा कु बन्द थै, तैबै यीशु आशौ और तिऊं मांझिऐ खौडौ हुइओ तिउंलै बोलौ, “तुमुलै शान्ति मिला।” 20 और इणै बोलिओ तिणीऐ आपणौ हाथ और आपणी कूख तिउंके देखलौ। तैबै चेलै प्रभु देखिओ खुश हुऐ। 21 यीशुऐ तौइऐ तिउंलै बोलौ, “तुमुलै शान्ति मिला; जिणौ बाबै हाऊं भेजौ ऊ, तिणीई हाऊं भी तुमु भेजाऊं।” 22 इणौ बोलिओ तिणीऐ तिऊं माथे फूकरौ और तिउंलै बोलौ, “पवित्र आत्मा निओ।” 23 जासरे पाप तुमै माफ कौरा, सै तिउंलै माफ की ई गौऐ ई; जासरे तुमै छाडौ, सै छाडे गौऐ आ।”

थोमा काए परगट हुणौ

24 पर बाराह मांझिआ कु एक, मतलब कि थोमा ज़ासलै दिदुमुस बोलाई, जेबी यीशु आशौ ता तेस आइलै नाई थौ। 25 जेबी ओर चेलै तेसलै बोलदै लागै, “आमुए प्रभु देखौ आ,” तैबै तिणीए बोलौ, “जेबी झाऊं हाऊं तेसरै हाथा दी परगा रै छेद नाई देखुलौ, और तेसरै छेदा दी आपणी हाथा री औंउंटी नाई पाऊलौ, तेबी झाऊं हाऊं विश्वास नाई कौरदौ।” 26 आठा दिना बासिऐ तेसरै चेलै तौंइऐ घौरा भीतै थै, और थोमा तिऊं आइलै थौ; और दार बौन्द थै, तैबै यीशु आशौ और तिऊं मांझिऐ खौडौ हुईओ बोलौ, “तुमलै शान्ति मिला।” 27 तैबै तिणीऐ थोमा लै बोलौ, “आपणी ओंउठी इदै आणीओ मैरै हाथ देख और आपणै हाथा री ओंउंटी मैरै हाथा रै छेदा दी पा, और अविश्वासी नाई पर विश्वासी बौण।” 28 इणै शुणीओ थोमै जवाब दैओ, “ओ मैरै प्रभु, ओ मैरै परमेश्वर!” 29 यीशुऐ तेसलै बोलौ, “ताइऐ हाऊं देखो ऊ, का एथीलै विश्वास कियौ आ? भौलै ई सै आदमी जुणीऐ बिण देखै विश्वास कियौ।”

इयँ किताबी रौ मतलब

30 यीशुऐ ओर भी भौरी चिन्ह चलेऊ कें देखाळे ई, जो ईयां किताबी दी नाई लिखौ औन्दौ; 31 पर इऐ एथीलै आ लिखी ऐन्दी, कि तुमै विश्वास कौरा कि यीशु ही परमेश्वर रौ छेहरु मसीह आ, और विश्वास कौरियौ तेसरै नावां दी सौदा री जिन्दगी पाओ।

तिबिरियास झिला रै ढिका काए चलेऊ काए परगट हुणौ

21 इऊं बुशु बासिऐ यीशु आपु तिबिरियास झिला रै ढिका दी चलेऊ माथै परगट हुओ: 2 शमौन पतरस, और थोमा ज़ासलै दिदुमुस बोलाई, और गलीला रै काना गांवा रौ नतनएल, और जबदी रै छेहरु, और तेसरै चलेऊ मांझिआ कु दुई लोग औजौ कौडै थै। 3 शमौन पतरसै तिउंलै बोलौ, “हाऊं माछी पाकुडवै डिआऊ।” तिउंऐ तेसलै बोलौ, “आमै भी ताऊं आइलै आशी ई।” तैबै सै निकलियौ किशती दी चौडै, पर सेजी राची तिउंके कुछ ना पाकडुओ। 4 दोउत राची ई यीशु ढिका काए आशियौ खौडौ हुओ; तैबै भी चलेऊऐ नाई पराणौ की एऊ यीशु आ। 5 तैबै यीशुऐ तिउंलै बोलौ, “ओ लोलडेउओ, का तुमुकै कुछ माछी आसती आ?” तिउंऐ जवाब दैओ, “नाई।” 6 तिणीऐ तिउंलै बोलौ, “किशती रै सुलटी भिलै ज़ाल पा लै ता तुमुकै मिला ई।” तैबै तिउंऐ ज़ाल पाओ, और सै भौरी माछी मिलणै री वज़ाह कु ज़ाल झिडी नाई बोलै। 7 तैबै तिणी चेलै ऐ ज़ास आइलै यीशु प्यार कौरा थौ, पतरसा लै बोलौ, “एऊ ता प्रभु आ!” शमौन पतरसै इणौ शुणीओ कि एऊ प्रभु आ, पिठी दी गाची बानियौ कौशी, कैलैकि सेऊ नांगौ थौ, और झिला दी डैओ। 8 पर दुजै चेलै किशती दी माछी कौरौ भौरुऐ औन्दौ ज़ाल झिडी-झिडीओ आशै, कैलैकि सै ढिका कु जादै दुर नाई थै, बल्की लगभग दुई शौ हाथ दुर थै। 9 जेबी सै ढिका दी आशै, ता तिउंऐ गाठे री आग और तेथदी माछी छाडी, ऐन्दी और रोटी देखी। 10 यीशुऐ तिउंलै बोलौ, “जो माछी तुमुऐ इबी पाकडी ई, तिऊं माझीऊ कु कुछ आणौ।” 11 तैबै शमौन पतरसै किशती

दी डेइओ एक शौ तरेपन बौडी माछीउ कौरौ भौरुओ औन्दौ ज़ाल ढिका दी झिडी, और एती माछीउ कौरौए भी ज़ाल नाई चिरुओ। 12 यीशुऐ तिउंलै बोलौ, “आशौ, रोटी खाओ।” चेलै मांझिआ कु कासी री हिम्मत नाई पौडी की तेसकु पुछा, कि “तू कुण ई?” कैलैकि सै ज़ाणा थै की एऊ प्रभु ई आ। 13 यीशुऐ आशीओ रोटी चुगी और तिउंलै देई, और तिणी ई माछी भी देई। 14 इओ चिजी बारै आ कि यीशु मौरै औन्दै मांझीआ कु जिउंदौ हुईयो चलेऊ कें दिशौ।

यीशु और पतरस

15 रोटी खाइओ यीशुऐ शमौन पतरसा लै बोलौ, “ओ शमौन, यूहना रै छेहरु, का तू इऊं कु बौडियौ मुकु प्यार कौरा ई?” तिणीऐ तेसलै बोलौ, “ओ, प्रभु; तू ता ज़ाणा ई कि हाऊं ताऊं आइलै प्यार कौरा ऊ।” तिणीऐ तेसलै बोलौ, “मैरै गाबडु चार।” 16 तिणीऐ तौंइऐ दुजी बारै तेसलै बोलौ, “ओ शमौन, यूहना रै छेहरु आ, का तू मुकु प्यार कौरा ई?” तिणीऐ तेसलै बोलौ, “ओ, प्रभु; तू ज़ाणा ई कि हाऊं ताऊं आइलै प्यार कौरा ऊ।” तिणीऐ तेसलै बोलौ, “मेरी भेरी ज़ाणा।” 17 यीशुऐ चिजी बारै तेसलै बोलौ, “ओ शमौन, यूहना रै छेहरु, का तू मुकु प्यार कौरा ई?” पतरस नराज़ हुओ कि तिणीऐ चिजी बारै तेसलै इणौ बोलौ, “का तू मुकु प्यार कौरा ई?” और तेसलै बोलौ, “ओ प्रभु, तू ता सब कुछ ज़ाणा ई; तू इणौ भी ज़ाणा ई कि हाऊं ताऊं कु प्यार कौराऊ।” यीशुऐ तेसलै बोलौ, “मेरी भेरी चार। 18 हाऊं ताउंलै सौचौ-सौचौ बोलाऊ, “जेबी तू जवान थौ ता आपणी कौमर बानीओ जिऐ चाह थौ तिऐ डिआ थौ; पर जेबी तू बुडौ ओआ लौ ता आपणै हाथ फौइलावा ई, और दुजै तेरी कौमर बनीयो जिऐ तू नाई चाह लौ तिऐ ताऊं नियां ई।” 19 तिणीयीशुऐ एजी बुशैऊ कौरौऐ इशारौ दैओ कि पतरस किणी मौता कौरौऐ परमेश्वर री बौडइ कौरा और तैबै तिणीऐ तेसलै बोलौ, “मुं पीछु चाल।”

यीशु और तेसरौ प्यारौ चेलौ

20 पतरसै मुडीओ सेऊ चेलौ पिछाडीऐ आशदै देखौ, जासकु यीशु प्यार कौरा थौ, और जुणीऐ रोटी खाणै रै भगता दी यीशु री छाती भिलै झुकीओ पुछौ थौ, “ओ प्रभु, ताऊं पकडाउणे वालौ कूण आ?” 21 तेस देखीओ पतरसै यीशु लै बोलौ, “ओ प्रभु, एसरौ का हाल ओआ लौ?” 22 यीशुऐ तेसलै बोलौ, अगर हाऊं चाऊ लै कि सेऊ मैरै आशणै झाऊं रुकी रौआ, ता ताउंलै एथकु का? तू मुं पिछु चाल।” 23 एथीलै भाईऊ मांझिऐ एजी बुशै फौइली गोई कि सेऊ चेलौ नाई मौरदौ; पर यीशुऐ तेसकै इणौ नाई बोलौ थौ कि सेऊ नाई मौरदौ, पर इणौ बोलौ थौ कि, “अगर हाऊं चाऊलै कि सेऊ मैरै आशणै झाऊं रुकी रौआ, ता ताउंलै एथकु का?”

इयँ किताबी रै बारै दी

24 एऊ सेजौ चेलौ आ जो एजी बुशु री गवाही दिआ और जुणीऐ एजी बुशै लिखी ऐन्दी ई, और आमै ज़ाणी ई कि तेसरी गवाही सौची आ। 25 औजौ भी भौरी काम ई, जो यीशुऐ किए ई; अगर तिऊं एक एक कौरौऐ लिखा थै, ता हाऊं सौमझा ऊ कि जो किताबै लिखा थै सै संसारा दी नाई ओका थी।

प्रेरितु रै काम

जानकारी

1 ओ थियुफिलुस, मुंझे पैहली किताब तिऊं सारी बुशु रै बारे दी लिखी जो यीशु शुरू कु कौरा और शिखावा थो, 2 सेजै दिना झाऊं यीशुए तिऊं चुनै औन्दै चलेऊ लै आज्ञा देई, जेबी झाऊं सेऊ सौरगा लै ना डैओ। 3 यीशुए दुःख उठाउणै बासीए भौरी पाके सबूता कौरी देखाळौ कि हाऊं जीउदो हुओ ऊ, और चालिस दिना झाऊं तिऊंके दिशदै थाकौ लागी, और परमेश्वरा रै राजा री बुशै थाकौ तिऊंके शुणाउंदै लागी। 4 और तिऊंकु मीलीयौ तिऊंलै आज्ञा देई, "यरुश्लेम नाई छाड़ेऊ, पर बाबा रै तेस वादै पुरै हुणै रौ इन्तजार कौरेऊ, जेथरै बारे दी तुमुए मुकु पैहलै शुणी गौ आ। 5 कैलैकि यहुनै ता तुमुलै पाणी रौ बसिस्मा दैओ पर कुछ दिना बासियै तुमै पवित्र आत्मा कौरी बसिस्मा पा आ ई।

यीशु रौ सौरगा लै डेऊणौ

6 तैबै चलेउए कौठै हुइयौ यीशु कु पुछौ, "का तू तेभी ई इस्राइला रौ राज वापिस कौरा ई?" 7 यीशुए तिऊंलै बोलौ, "सेजै बोग्ता और काला रै बारे दी ज्ञाणनौ तुमारौ काम नाई आ जो बाबै आपणै आधीकारा दी छाड़ौ औन्दै। 8 पर जेभी पवित्र आत्मा तुमु माथै आशा लौ तेभी तुमै शक्ति पाआ ई; यरुशलेम, सारै यहूदिया और सामरिया और दुनिया रै कुणै-कुणै झाऊं मेरै शाजत हुणे ई।" 9 इणै बोलियो सेऊ तिऊं रै देखदै-देखदै सौरगा लै डैओ, और बादलै सेऊ तिऊंरी आखी कु पोरु छिपाओ। 10 तेसरै डेउंदी बारे जेभी सै सौरगा भिलै थै लागै औन्दै देखदै, ता देखौ दुई आदमी शंते जुड़के भिडीयो तिऊंकाए अशियो खौडै हुए, 11 और तिऊंलै बोलौ, "ओ गलीली आदमीउओ, तुमै कैलै ई खौडै हुइयो सौरगा भिलै देखदै लागै औन्दै? एऊ यीशु, जो तुमारै सामनै सौरगा लै डैओ आ, जिणौ तुमुए सेऊ सौरगा भिलै डेऊदै देखौ आ, तिणी सेऊ तौएँ आशा आ।"

मत्तियाह लै यहूदा री जगाह मिलणी

12 तैबै सै जैतून नावां री पहाडी कु यरुश्लेमा लै आशै, जो यरुश्लेमा रै नजदीक एक अरामा रै दिना जेती दूर आ। 13 जेबी सै तिरे पौउंचै ता तिरे माथलै कौमरै दी डै, जिरे पतरस, यहूना, याकूब, आन्द्रियास और फिलिप्पुस, थोमा, बरतुल्लै, मत्ती, हलफई रौ छोहरु याकूब, शमौन, जेलोतेस और याकूबा रौ छोहरु यहूदा रौआ थै। 14 इरे सारै और कई छेउडी और यीशु री मां मरियम तेसरै भाईऊ आइलै एक मन हुइयो प्राथना कौरदै थै लागै औन्दै। 15 सेजै बोग्ता दी पतरस भाईऊ मांझीए जो करीब एक शौ बीश आदमी थै, खौडै हुइयो बोलदै लागौ। 16 "ओ भाईओ, जुरुरी थौ कि पवित्र शास्त्रा दी लिखौ औन्दौ पुरौ हुआ जो पवित्र आत्मै दाऊदा रै मुआं कु यहूदा रै बारे दी पैहलै कु थौ बोलौ औन्दौ, जूण यीशु पाकुड़नै वालेऊ रौ परधान थौ। 17 कैलैकि सेऊ ता आमु आइलै गिणुओ, और एजी सेवा दी भी थौ साथा दी। 18 (तेसरी बुरी कमाई कौरी एक डोखरौ खरीदौ, और तेसरो मूंड धौनी लागौ तेसरो पेट फाटौ और तेसरै सारै आंज निकलै। 19 एजी बूश यरुश्लेमा दी रौइणै वालै सारै लोगु के पौतौ लागी, इदरा झाऊं कि तेस डोखरै रौ नाऊं तिऊंरी बोली दी 'हकलदमा' जेथरौ मतलब 'खुना रौ डोखरौ' पौडी गौ।) 20 भजन संहिता री किताबी दी लिखौ औन्दौ 'तेसरो घोर उझड़ो चाई, और तेथदी कोई ना बौसा,' और 'तेसरी जागहा दी कोई ओर ना चाई बोशौ।' 21 एथीलै जेती दीना झाऊं प्रभु यीशु आमु आइलै आशा आण्डा थौ--मतलब

यहूना रै बसिस्मा कु आमारे सामनै सौरगा लै डेउणै झाऊं—जो लोग इबी झाऊं आमु आइलै रौए ई, 22 भौलौ आ कि तिऊं माझीया कु एक आदमी आमु आइलै यीशु रै जीउदै हुणै रौ शाजत बौणा।" 23 तैबै तिऊंए दुई लोग खौडै किये, एक युसुफ जासलै बर-सबा भी बोला थै जासरौ खानदानी नाऊं यूसतुस आ, और दुजौ मत्तियाह, 24 और इणी प्राथना की, "ओ प्रभु तू जो सारेऊ रै जीवा री ज्ञाणा ई, इणौ परगट कर कि इऊं दुई मांझीया कु ताएँ कुण आ चुनौ औन्दौ, 25 कि सेऊ इयें सेवा और चले री ज्ञागहा सांभाला, जास छाडीयो यहूदा आपणी ज्ञागहा लै डैओ।" 26 तैबै तिऊंए तिऊं दुई रै नावां री चिडी टाली, और चिडी मत्तियाह रै नावां री निकली। और सेऊ तिऊं ग्यारह चलेऊ आइलै गिणुओ।

पवित्र आत्मा रौ उत्तरनौ

2 जेभी पिन्तेकुस्ता रौ दीन आशौ, ता सै सारै एकी ज्ञागहा दी कौडै थै। 2 एकदम सौरगा कु तेज बागुरा जिणौ चगराअ हुओ, और तेथ कौरी सारौ घोर जिरे सै बोशै औन्दै थै, हीली गौ। 3 और तिऊंके आगी बाशीए जीबे फाटदै दिशी और सै तिऊं मांझीए सारेऊ माथै बौसी। 4 सै सारै पवित्र आत्मा कौरी भोरुए, और जिणौ पवित्र आत्मै तिऊंके बोलनै री शक्ति देई, सै अलग-अलग बोली बोलदै लागै। 5 धौतरी माथा री हर एक जाती मांझीया कु यहूदी भोग्त, यरुश्लेमा दी थै रौउंदै लागै औन्दै। 6 जेबी इरे हाक हुई ता भीड़ कौठै हुई गोई और लोग घबराई गोए, कैलैकि हरेक आदमी के शुणीया थौ कि इयै मेरी ई बोली दी बोलदै लागै औन्दै। 7 सै सारै हैरान हुए और हैरानी कौरी बोलदै लागै, "देखौ, इयै जो बोलदै ई लागै औन्दै का इयै सब गलीला रै नाई? 8 तैबै कैलै शुणीया आमुके अपणी-अपणी जन्मभुमी री बोली? 9 आमै जो पारथी, मेदी, एलानी और मेसोपोटामिया, यहूदिया, कप्पदूकिया, पुनतुस और आसिया, 10 और फ्रुगिया पंफूलिया, मिस्र और लीबिया देश जो कुरेना रै आस-पास ई, इऊं सभो देशा रै रौइणै वालै और रोमी वासी, 11 यहूदी और यहूदी जाती मानणे वालै, क्रेती और अरबी भी ई, पर आपणी-आपणी बोली दी तिऊंकु परमेश्वरा रै बोडै-बोडै कामा री बुशै शुणी ई।" 12 सै सारै हैरान हुए और घबराइयो एकी दुजे कु बोलदै लागै, "इयो का हुन्दै लागौ औन्दौ?" 13 पर ओरीउए मजाक कौरीयो बोलौ, "इयै ता नौई सुरी रै नशे दी मगन ई।"

पतरसा रौ भाषण

14 तैबै पतरस तिऊं ग्याराह आइलै खौडै हुओ और हाके मरीयो बोलदै लागौ, "ओ यहूदिया और यरुशलेमा रै सारै रौइणै वालेउओ, इणौ ज्ञाणौ। और काना लाईयो मेरी बुशै शुणौ। 15 जिणौ कि तुमै ज्ञाणदेई लागै औन्दै, इरे लोग नौशै दी नाई ई, कैलैकी इबी ता दोतकौ भोग्त आ। 16 पर इरे सेजी बूश आ, जो योएल गुरु ए बोली थी; 17 परमेश्वर बोला, कि आखरी दिना दी इणौ हुणौ कि हाऊं आपणी आत्मा सारै लोगु के दिआ ऊ और तुमारै छोहरु और छोदुडी भविष्यवाणी कौराई, और तुमारै जवान देखाई दर्शन, और तुमारै स्याणै देखाई सुइणै। 18 बल्की हाऊं आपणै नुकुर और आपणी नुकराणी माथै भी, सेजै दिनु दी आपणी आत्मा मांझीए कु आत्मा दियाऊ, और सै भविष्यवाणी कौराई। 19 और हाऊं माथै सौरगा दी नोखै काम और धौतरी माथै निशाण, मतलब खून, आग और धुएँ रै बादल देखाऊआ ऊ। 20 प्रभु रै बौडै और भयानक दिना रै आशणै कु पैहलै सुरज इनारौ और जून खुना जिणी हुणी आ। 21 और जूण कुण प्रभु रौ नाऊं निआं लौ सेऊ छुटकारौ पा आ।" 22 ओ इस्राएलियो, इऊं बुशै शुणौ: यीशु नासरी एक आदमी थौ जासरौ

परमेश्वरा री तौरफा कु हुणै रौ सबूत तिऊं शक्तिवालै काम, हैरानी वालै कामा और निशाणा कु परगट ई। 23 सेजौ यीशु जुण परमेश्वरा री मौरजी और पुराणै ज्ञाना कौरीए पाकडुआँ, तुमुए बुरै लोगु रै हाथा कौरी कुसा माथै चौड़ाइयो पोरु झांगौ। 24 पर सेऊ परमेश्वरै मौता रै बन्धना कु छुड़ाइयो जीउंदौ कियो; कैलैकि एऊ हुणौ मुश्किल थौ कि सेऊ तेथरै वशा दी रौआ। 25 कैलैकि दाऊद एथरै बारै दी बोला कि, 'हाऊं प्रभु रोज आपुकारे थाका थौ देखदै लागी कैलैकि सेऊ मेरी सुलटी भिलै आ, ताकी हाऊं लोटु नाई। 26 एथीलै मैरौ जीऊ खुश हुआँ, और मेरी जीभ मगन हुई; बल्कि मैरौ शरीर भी आशी दी रौआ। 27 कैलैकि तू मैरै प्राण पौइताला दी नाई छाड़दौ; और ना आपणौ पवित्र जौणौ शौडनै दैन्दौ। 28 ताणै मुकै जीन्दगी री बाट देखाली आ; तू मूं दर्शन देखालीओ खुशी कौरी भौरा ई। 29 "ओ भाईउओ, हाऊं आमारै स्याणै दाऊद रै बारै दी तुमुकै हिम्मती कौरीए बोली सौका ऊ कि सेऊ ता मौरौ गौ और दबाओ भी आ और तेसरी कब्र आज झाऊं इदै आमु माझीए ज़िउंदमान आ। 30 सेऊ भविष्यवक्ता थौ, सेऊ जाणा थौ कि परमेश्वरै मुं आइलै कसम खाई आ कि हाऊं तैरै वंशा कु एक आदमी तेरी राजगादी माथै बोशाला ऊ; 31 तिणीए हुणै वाली बुशै पैहलै कु देखीयो मसीहा रै जीऊंदै हुणै रै बारै दी भविष्यवाणी की, कि ना ता तेसरै प्राण पौइताला दी छाड़ै और ना तेसरौ शरीर शौडौ। 32 एजौ यीशु परमेश्वरै जीउंदौ कियो, जेथरै आमै सारै शाजत ई। 33 इणै कौरी परमेश्वरा रै सुलटै हाथा कु सारेऊ कु आचूँइ इनाम पाइयो, और बाबा कु सै पवित्र आत्मा पाइयो जेथरौ परमेश्वरै वादौ कियो थौ, तिणीए सेऊ देई गौ जो तुमै देखा और शुणा ई। 34 कैलैकि दाऊद ता सौरगा दी नाई चौडौ; पर सेऊ आपु बोला आ, 'प्रभुए मैरै प्रभु कै बोलौ, मेरी सुलटी भिलै बोश, 35 जेबी झाऊं हाऊं तैरै दुश्मुनु तैरै सामनै धौनी ना कौरु लै।' 36 और आबे इस्त्राइला रै सारै लोगु कै पौतो लागा लौ कि परमेश्वरै एजौ यीशु जेजौ यीशु तुमुए कुसा माथै चड़ाओ, प्रभु भी और मसीहा भी चाणौ।" 37 तैबे एजी बूश शुणनै वालेऊ रै जीवा दी चुबी गोई, तैबे सै पतरस और ओरी चलेऊ कु पुछदै लागै, "ओ भाईओ, आमै का कौरुलै?" 38 पतरसै तिउंलै बोलौ, "ज़िऊ बौदलौ, और तुमु मांझीया कु हरेक आपणै-अपणै पापा री माफी पाइणा लै यीशु मसीह रै नावां दी बसिस्मौं निओँ; तैबे तुमै पवित्र आत्मा रौ दान पा ई। 39 कैलैकि एऊ वादौ तुमु, तुमारी सन्ताना, और तिऊं सारै दूर-दूरा रै लोगु लै भी आ जास प्रभु आमारौ परमेश्वर आपु कारे ओटावा।" 40 पतरसै भौरौ और बुशु कौरी भी गवाही देई-देईयो समझाओ कि तुमै आपु इऊं दारखी जाती कु बौचौ। 41 जुणीए भी तेसरै वचन अपणाए तिउंए बसिस्मौं निओँ; और सेजै दिनै चिन हजार आदमीऊ रै लगभग तिऊं आइलै मिली गौए। 42 और सै चलेऊ कु शिक्षा पाइणा लै, संगती छाड़ना लै, रोटी चोड़दै, और प्राथना कौरनै दी मगन हुई गौए।

विश्वासिउ री संगती

43 सारै लोग घौबराई गौए, और भौरौ नोखै काम और निशाण चलेऊ कौरी परगट हुआ थै। 44 सारै विश्वासी कौठै रौआ थै, और तिउंरी सारी चिजै साजै री हुआ थी। 45 सै आपणी-आपणी जयदाद और समाना बेची-बेचीयो जीणी जासकै जुरत हुआ थी बांटीओ कौरा थै। 46 सै रोज एक मन हुइयो परमेश्वरा रै घौरा दी कौठै हुआ थै, घौरा-घौरा के रोटी चोड़ीओ खुशी कौरीए निउलै हुइओ रोटी खा थै, 47 और परमेश्वरा री बड़ाई कौरा थै, सारै लोग तिऊंकु खुश थै: और जुण छुटकारौ पा थौ, तिऊं प्रभु रोज तिऊं मांझीए मिलावा थौ।

लौंगडै भिखारी रौ चांगो हुणौ

3 पतरस और यहुन्ना दिना रै चिजै पौहरै प्राथना कौरना लै परमेश्वरा रै घौरा लै थै लागै औन्दै डेउंदै। 2 और लोग थै लागै औन्दै एक जन्मा कु लौंगडौ आदमी निन्दै, जास सै रोज परमेश्वरा रै घौरा रै दारा कारे जासलै 'बडीया' दार बोला ई, बोशाला थै ताकी सेऊ परमेश्वरा रै घौरा दी डेउणै वाले लोगु कु भीख मांगा। 3 जेबै तिणीए पतरस और यहुन्ना परमेश्वरा रै घौरा दी डेउंदै देखै, ता तिणीए तिऊंकु भीख मांगी। 4 पतरसै यहुन्ना आइलै तेस भिलै बौडै धयाना कौरीए देखीयो बोलौ, "हामु भिलै देख;" 5 और सेऊ तिऊंकु

कुछ मिलणे री आश छाडीयो तिऊं भिलै देखदै लागौ। 6 तैबै पतरसै बोलौ, "सुनौ-चांटी ता मुकै आसतौ नाई, पर जो मुकै आसा तेस हाऊं ताउंकै दिआऊ; यीशु मसीह नासरी रै नावां कौरी हांड-फिर।" 7 और तिणीए तेसरौ सुलटौ हाथ पाकडीओ सेऊ उठाओ; और तेभी ई तेसरी टांगा और घुंडेऊ दी ताकत आशी गोई 8 सेऊ उछलीओ खौडौ हुआँ और हांडदै-फिरदै लागौ; हांडीयो, उछलीयो और परमेश्वरा री बौडाई कौरदै-कौरदै तिऊं आइलै परमेश्वरा रै घौरा दी डैओ। 9 सारै लोगुए सेऊ हांडदै-फिरदै और परमेश्वरा री बौडाई कौरदै देखीयो, 10 सेऊ पराणी गौ कि एऊ सेऊ ऊ आ जुण परमेश्वरा रै घौरा रै बडीया दारा कारे बोशीयो भीख मांगा थौ; और एजी बुशा कु जो तेस आइलै हुई थी सै भौरौ हैरान हुए।

परमेश्वरा रै घौरा दी पतरसा रौ उपदेश

11 जेबी तिणीए पतरस और यहुन्ना थै पाकडै औन्दै ता सारै लोग भौरौ हैरानी कौरीए तेस सुलेमाना रै (ओसारै) दी, तिऊं कारे फेटी मारीयो आशै। 12 इणै देखीओ पतरसै लोगु लै बोलौ, "ओ इस्त्राइली लोगु ओ, तुमै एस आदमी देखीयो हैरान कैलै हुआ ई, और हामु भिलै इणौ पा कैलै देखा ई कि जाण ता हामुए आपणी शक्ति कौरीए एऊ आदमी हांडणै-फिरनै लायक कियो। 13 आब्राहम, इसाहक और याकुबा रौ परमेश्वर, और आमारै नाना बुद्ध रै परमेश्वरै आपणै सेवक यीशु री बौडाई की, जुण तुमुए पोकडाओ थौ, और जेबी पिलातुसै तेस पोरु छाड़नै रौ विचार कियो, तेबी तुमुए तेसरै सामनै तेसरौ इनकार कियो। 14 तुमुए तेस पवित्र और धौमी रौ इनकार कियो, और औरज कौरी की एक खुनी आदमी तुमुलै आज्ञाद कौरा; 15 और तुमुए जीन्दगी चाणनै वालौ झांगौ पोरु, जुण परमेश्वरै मौरै औन्दै मांझीया कु जीउंदौ कियो आ; और एजी बुशा रै शाजत आमै ई। 16 और तेसी रै नावै, सेजै विश्वासा कौरी जो तेसरै नावां माथै आ, एउ आदमी जास तुमै देखदै ई लागै औन्दै और जाणा भी ई ताकत देई आ। और एजै विश्वासै जो तेस माथै आ, एऊ आदमी तुमु सारेऊ रै मुआं कारे बिलकुल भौलौ-चांगौ की गौ आ। 17 "आबै ओ भाईओ, हाऊं जाणा ऊ कि एउ काम तुमुए गलती कौरी कियो, और तिणी तुमारै गुरुएउए भी कियो। 18 पर जेजी बुशै परमेश्वरै सारै भविष्यवक्ता रै जरीए पैहले बोली गोई थी, कि सेऊ मसीह दुःख उठावा, सै सारी बुशै तिणीए इणी पुरी की। 19 एथीलै, मन बौदलौ और वापस आशौ कि तुमारै पाप पोरु मिटाइआ, जेथ कौरी प्रभु रै सामनै शान्ती रै दिन आशा, 20 और सेऊ यीशु भेजा जो तुमुकालै पैहलै कु मसीही आ चाणौ औन्दौ। 21 जरुरी आ कि सेऊ सौरगा दी तेभी झाऊं रौआ जेभी झाऊं कि सेऊ सारी बुशु रौ सुधार ना कौरा लौ जेथरी बुशै पुराणै बोग्ता ओउलै परमेश्वरै आपणै भविष्यवक्ता रै मुआ कौरी बोली आ। 22 जिणौ कि मुसा गुरुए बोलौ, "प्रभु परमेश्वर तुमारै भाईऊ मांझीआ कु तुमु कालै मूं जिणौ एक भविष्यवक्ता खौडौ कौरा, जो कुछ सेऊ तुमु लै बोला लौ, तेसरी शुणेऊ। 23 पर हरेक आदमी जो तेस भविष्यवक्ता री नाई शुणा लौ, लोगु मांझीया कु तेस पोरु झांगा ई। 24 शमुएला कु, बासीए रै भविष्यवक्ता झाऊं जुणीयो भी भविष्यवाणी की आ तिऊं सारेऊए एजै दिना रौ खबर देई आ। 25 तुमै भविष्यवक्ताओँ री सन्तान और सेजै वादै रै हकदार ई, जो परमेश्वरै तुमारै नाना-बुडु आइलै कियो आ, जेभी तिणीए आब्राहमा लै बोलौ, 'तैरै वंशा रै जरीए धौतरी रै सारै लोगु लै आशीष मिला आ। 26 परमेश्वरै आपणौ सेवक उठाइयो पैहलै तुमु कारे भेजौ, ताकी तुमु सारेऊ लै बुराई कु मोडीयो आशीष दिया।

बौडी खुम्बली कारे पतरस और यहुन्ना

4 जेबी सै लोगु आइलै इणौ बोलदै थै लागै औन्दै, ता याजक और परमेश्वरा रै घौरा रै मुख्यै, और सद्की तिऊं कारे आशै। 2 और तिउंलै भौरौ रोशुए कि सै लोगु कै शिखावा थै और यीशु रै बारै दी औनेणौ देई-देइयो मौरै हौन्देउ रै जीउंदै हुणै रै बारै दी परचार कौरा थै। 3 तिउंए सै चेलै पाकडीओ दुजै दिना झाऊं जेला दी बन्द किए कैलैकि ब्याल हुई गो ई थी। 4 पर वचन शुणनै वालेऊ मांझीया कु भौरौ लोगुए विश्वास कियो, और तिऊं री गिनती पांज हजार आदमीऊरै लगभग हुई गोई। 5 दुजै दिन इणौ हुआँ कि तिऊं रै मुख्यै, नेतै और शास्त्री, 6 बौडै याजक, हन्ना और कैफा, यहुन्ना और

सिकन्दर, जेती भी बौड़े याजका रै घौरा रै थे, सारै यरुशेमा दी कौड़े हुए। 7 तैबै तिउंरे सै चेलै मांझा दी खौड़े किये और तिउंरु पुछदै लागै कि, “तुमुए इयै काम कासरी शक्ति और कासरै नावां कौरी कियो आ?” 8 तैबै पतरसै पवित्र आत्मा कु भौरुइयो तिउंलै बोलौ, 9 “ओ लोगु रै नेतै और मुख्यै लोगुओ, एस कमजोर आदमी आइलै जो भलाई हुई आ, अगर एथरै बारै दी आज हामु कु पुछा ई कि एउ चांगो किये कौरी हुआ आ। 10 ता तुमु सारै और सारै इस्राइली लोगु के आज पौतौ चाई लागौ कि यीशु मसीह नासरी रै नावां कौरी—जो तुमुए क्रुसा माथे चड़ाओ, और जो परमेश्वरै मौरै औन्दै मांझीए कु जीउंदौ कियो—तेसी रै नावां कौरी एउ आदमी तुमु मांझीए भौलौ-चांगौ खौड़ौ आ। 11 एउ सेजौ पात्थर आ जो तुमु मिस्त्रीए बेकार सौमझौ पर सेऊ कुणै रौ बड़ीया पात्थर बाणौ। 12 कास दुजै रै नावां कौरी छुटकारौ नाई आसतौ; कैलैकि सौरगा थालै लोगु मांझीए कोई दुजौ नाऊ नाई आ दैओ औन्दौ, जासरै नावां कौरी आमै छुटकारौ पाई सका।” 13 जेभी तिउंरे पतरस और यहुन्ना री हिम्मत देखी, और इणौ ज्ञाणौ कि इयै अनपड़ और सिधे-साधे आदमी ई, ता सै हैरान हुए; और सै पराणी गौए कि इयै यीशु आइलै रोए ई। 14 तेस आदमी, जुण चांगो हुआ थौ, तिउं आइलै खौड़े देखीयो सै तिउरै विरोधा दी कुछ ना बोली बोलै। 15 पर तिउंलै खुम्बली कु बाइरै डेउणै रै हुकम देइयो सै आपु मांझीए चौपड़िदै लागै, 16 “आमै इऊ आदमीऊ आइलै का कौरुलै? कैलैकि यरुशेमा दी रौइणै वालै सारै ज्ञाणाई, कि इऊं रै जरीए एक बौड़ौ चमत्कार हुआ आ; और आमै तेथरौ इनकार भी नाई कौरी सकदै। 17 पर आमै इऊ धमकाई की इयै यीशु नावां री बुशै कास ओरी आइलै नाई ला, जेथ कौरी इयै बुश लोगु मांझीयै जादी ना फौइला।” 18 तैबै तिउंरे पतरस और यहुन्ना ओटाए और तिउंलै हुकम देइयो बोलौ, “यीशु रै नावां कौरी कुछ ना बोलेऊ और ना कुछ शिखाए ऊ।” 19 पर पतरस और यहुन्ना तिउंलै जवाब दैओ, “तुमै फैसलौ कौरौ; का एउ परमेश्वरा री नौजरीए भौलौ आ कि आमै परमेश्वरा री बुशा कु बौड़ीयो तुमारी बुशै मानु लै। 20 कैलैकि कि इणौ ता आमुकै हुणौ नाई कि जो आमुए देखौ और शुणौ आ, तेस नाई बोलुलै।” 21 तैबै तिउंरे सै ओजौ धौमकाइयो पोरु छाडै, कैलैकि लोगु रै कारण तिउंलै सजा दैणै रौ तिउंके कौई मौकौ ना मिलौ, कैलैकि जो चमत्कार हुआ थौ तेथरै कारण लोग परमेश्वरा री बौड़ाई कोरदै थै लागै औन्दै। 22 जास माथे एउ चंगाई रौ चमत्कार हुआ थौ तेसरी उमर चालिसा कु जादी थी।

विश्वासिउ री प्राथना

23 सै तिरु छुटीओ आपणै साथीऊ काए डेवे, और जो कुछ परधान याजकुए और स्याणेऊए तिउंलै बोलौ थौ, सेऊ तिउंकाए शुणाओ। 24 इणै शुणीयो तिउंरे एक मन हुइयो जेरै हाका देइयो परमेश्वरा लै बोलौ, “ओ मालिक (प्रभु) ताएँ सौरग, धौतरी, समुन्दर और जो कुछ एथदी आ चाणौ आ। 25 ताएँ ई पवित्र आत्मा कौरीए आपणै सेवक आमारै बाब दाऊदा रै मुओ कौरी बोलौ, “दुजी जातीऊ रै लोग कैलै रोशुए ई? और देशा-देशा रै लोग बुरी बुशै कैलै सुंचा ई? 26 प्रभु और तेसरै मसिहा रै विरोधा ई, धौतरी रै राजे खौड़े हुए, और हाकीम साथी ई कौड़े हुए गौए। 27 कैलैकि सोचुची ई तैरै सेवक यीशु रै विरोधा ई, जासरौ ताएँ आभीषेक कियो, हैरोदेस और पुन्तियुस पिलातुस भी ओरी जातिऊ और इस्राइली लोगु आइलै एस इलाके दी कौड़े हुए, 28 कि जो कुछ पैहलै कु तेरी शक्ति और मर्जी कु थौ तेसी कौरा। 29 आबे ओ प्रभु, तिउंरी धमकी देख; और आपणै चलेऊ के इणौ बौर दै कि तैरौ वचन बड़ी हिम्मती कौरी शुणावा। 30 चांगै कौरना लै तु आपणौ हाथ बौड़ाऊ, कि नोखे और हैरानी वालै काम तैरै पवित्र सेवक यीशु रै नावां कौरी हुआ।” 31 जेभी तिउंरे प्राथना कौरी एरी, ता सै जागहा जीए सै कौड़े थै हिली गोई, और सै सारै पवित्र आत्मा कौरी भरपूर हुई गौए, और परमेश्वरा रौ वचन हिम्मती कौरी थाके शुणाउंदै लागी।

विश्वासिउ रौ मिली झूलियो रौईणौ

32 विश्वास कौरने वालेऊ री खुम्बली एक जिऊ एक मना री थी, इदरा झाऊं कि कोई भी आपणी जयदादा लै आपणी नाई बोला थौ, पर सब कुछ

साझै रौ थौ। 33 चेलै बोड़ी शक्ति कौरी प्रभु रै जीउंदै हुणे री गवाही दैदै थाके लागी और तिउं सारेऊ माथे बड़ी दया थी। 34 तिउं मांझिया कु कोई भी गरीब नाई थौ; कैलैकि जासके जमीन या घौर थै, सै तिउं बेचीयो तेथरै रुपाए पैसै आणा थै, और तिउं चलेऊ रै बांगणै माथे छाड़ा थै; 35 और जिणी जासके जुरत हुआ थी, तीणी ई एकी दुजै के बांटा थै। 36 युसुफ नावां रौ एक आदमी जो साइप्रसा रै एक लेवी जाती रौ थौ, जासरौ नाऊ चलेऊ ए बरनबास (मतलब शान्ती रौ छोहरु) छाडौ थौ। 37 तेसरी कुछ जमीन थी, जो तिणीए बेची, और तेथरै रुपाए आणीयो चलेऊ रै बांगणै माथे छाडै।

हनन्याह और सफीरा

5 हनन्याह नावां रै एक आदमी और तेसरी छेउडी सफीरै कुछ जमीन बेची, 2 तेथरी कमाई कु कुछ पैसै छाडै आपुकै; बाकी पैसै आणीयो छाडै चलेऊ रै बांगणेऊ माथे, और एजी बुश तेसरी छेउडी सफीरा भी ज्ञाणा थी। 3 पतरसै बोलौ, “ओ हनन्याह! शैतानै तैरै जीवा दी इणी बुश कैलै टाली कि तू पवित्र आत्मा कु झूठ बोला, जमीना री कमाई कु कुछ आपुकै छाडा? 4 जेबी सै जमीन ताउंके थी तेबी का तेरी नाई थी? और जेबी ताएँ बेची आ तेबी का तैरै वशा दी नाई थी? ताएँ इयै बुश आपणै जीवा दी कैलै सुंची आ? ताएँ आदमी कु नाई, पर परमेश्वरा कु झूठ बोला आ।” 5 इणी बुशै शुणीओ हनन्याह धोनी लोटौ और प्राण छाडै, और सारै शुणनै वालै भौरी डोरी गौए। 6 तैबै जवान आदमीऊरे तेस काले खाट चाणी और सेऊ बाइरै नीईओ दाबौ। 7 तेथरै चिन घाण्टे बासीए तेसरी छेउडी सफीरा भी, जासके पौतौ नाई थौ कि इदै का हुआ थौ, भितरै आशी। 8 तैबै पतरसै तिआंलै बोलौ, “मुके बोल का तुमुए जमीन एती पैसेऊ लै बेची थी? तिआंए बोलौ, “ओ एती लै बेची आ।” 9 तैबै पतरसै तिआंलै बोलौ, “इरे का बुश आ की तुमु दुइयै प्रभु री आत्मा कु झूठ बोलणे री ठाणी एंटी? देख, तैरै बोउटै दाबणै वालै दारा काए इ, और ताऊं भी बाइरै निआं ई।” 10 तैबै सै फेटी पतरसा रै बांगणै माथे पौडी, और प्राण छाडै; और जवान आदमीऊरे भितरै आशीओ सै मौरि ऐन्दी देखी, और बाइरै नीई ओ तिआंरै बोउटै काए दाबी। 11 सारी कलिसिया और इऊं बुशै शुणनै वालै सारै लोग भौरी डौरै।

निशाण और नोखे काम

12 चलेऊ रै हाथा कु लोगु मांझीए भौरी नोखे-नोखे काम थै लागै औन्दै हुन्दै; और सै सारै एक मन हुइयो सुलेमाना रै ओसारै दी कौड़े हुआ थै। 13 पर ओरी मांझीआ कु कासी के भी तिउं आइलै कौड़े हुणै, मिलणै री हिम्मत नाई हुई तैबै भी लोग तिउंरी बौड़ाई कौरा थै। 14 प्रभु माथे विश्वास कौरनै वालै भौरी आदमी और छेउडी री भीड रोज प्रभु री कलिसिया दी मिला थी। 15 इदरा झाऊं कि लोग, बिमार लोगु सौड़की दी आणीओ चारपाई और बिस्तरै माथे छाडा थै ताकी जेबी पतरस आशा, ता तेसरी छाई तिउं माथे पौडा। 16 यरुशेमा रै नजदीका रै इलाके कु भी भौरी लोग बिमार और बुरी आत्मा रै सताए ओन्दै लोगु आणा थै, और सै सारै बिमार चांगै हुआ थै।

प्रेरित कैदा लै निणै

17 तैबै बौड़ौ याजक और तेसरै साथी जुण सुदूकिकु रै गुटा रै थै, सै रोशुइयो, नफरता कौरी उटै, 18 तिउंरे चेलै पाकडीयो जेला दी पाए। 19 पर राची प्रभु रै एकी दूतै जेला रै दार खोलिओ सै बाइरै गाडै और तिउंलै बोलौ, 20 “डैओ, परमेश्वरा रै घौरा दी खौड़े हुइओ इयै जीन्दगी री सारी बुशै लोगु के शुणाओ।” 21 सै इणै शुणीओ दोअती परमेश्वरा रै घौरा दी डेइयो परचार कोरदै लागै। तैबै बौड़ै याजक और तिउंरै साथीऊ ए खुम्बली और इस्राइला रै सारै स्याणै कौड़े किये, और हुकम दैओ, कि तिउं चले जेला कु बाइरै आणौ। 22 जेबी तिउं आणदै डेवै ता सै तिरे जेला दी नाई मिलै, तैबै वापिस आशीओ तिउंरे इरे खौबर शुणाई, 23 “आमुए ता जेला रै दार आच्छा कौरी बन्द, और जोअकीदार बाइरै दारा काए खौड़े देखे ई; पर जेबी दार खोलौ, ता भीतै कोई ना मिलौ।” 24 जेबी सिपाइऊ रै आफसरै और परधान याजकु ए इरे बुशै शुणी, ता भौरी सुंचदै लागै कि आबे का हुआ लौ! 25 तेबीयालै एकीए आशीयो तिउंलै बोलौ, “देखौ, जेजै तुमुए जेला दी थै बन्द किये औन्दै, सै

22 मुसा के मिस्र जाती री सारी विधया पौदाई और सेऊ बुशु और कामा दी शक्तिशाली थौ। 23 जेबी सेऊ चालिस साला रौ हुओ तैबे तेसरै जीवा दी आशी कि हाऊं आपणै इस्राइली भाईऊ कु मितु। 24 मुसै एक आपणी जाती भाई माथे जुलम हुन्दै देखौ ता सेऊ बोचाओ और मिस्र जाती रौ आदमी झांगीओ तेसरौ बौदलो निओ। 25 तिणीए सुंछौ कि तेसरै भाई सौमझा लै कि परमेश्वर तेस कौरी तिउरौ छुटकारौ कौरा आ, पर तिउंरे तिणौ नाई सौमझौ। 26 दुजै दिनै जेभी सै आपु माझीए लौडदै थै लागै औन्दै, ता मुसै तिरे आशीओ तिउंलै सौमझीओ बोलौ, कि तुमै ता आपु माझीए भाई-भाई ई तैबे कैलै लौडा ई? 27 पर जुण सेऊ आपणै पड़ोसी आइलै थौ लागौ औन्दौ लौडदै तिणीए तेसदी धाकै देइओ बोलौ, 'ताउंके कुणीए दैओ आ आमु माथे फँसलै कौरनै रौ हक? 28 का जिणौ ताएँ ईज मिस्र जाती रौ आदमी झांगौ आ तिणी मुं भी झांगणौ चाह ई? 29 इणै शुणीओ मुसा तिरु भागौ और मिधान देशा दी परदेशी हुइओ रौइदै लागौ, तिरे तेसरै दुई छोहरु भी पैदै हुरै। 30 'जेबै चालीस साल बिती गोरै, तैबे परमेश्वर रौ दुतै मुसा कै सित्रै नावां री पहाड़ी रै जांगला दी जलदी जाड़ी री आगी दी दर्शन दैओ। 31 मुसा एस दर्शन देखीओ हैरान हुओ, जेबै सेऊ देखणा लै नजदीक डैओ ता परमेश्वर री हाक शुणुई, 32 हाऊं तैरे नान-बुदु, आब्राहम, इसहाक, और याकुबा रौ परमेश्वर ऊ, 'इणै शुणीओ मुसा काबदै लागौ इवरा झाऊं कि तेसकै देखणै री हिम्मत भी नाई पौडी। 33 तैबै परमेश्वरै तेसलै बोलौ, 'आपणै बांगणे कु बूट गाड पोरु, कैलैकि जेजी जागहा दी तू ई सै पवित्र जागहा सा। 34 मुइए आपणै लोगु री जो मिस्र देशा दी ई, हालत देखी आ; और तिउंरी लेरनै री हाकै शुणी आ; एथीलै हाऊं तिऊं छुड़ाउंदै आशो ऊ। आबै आश हाऊं ताऊं मिस्रा लै भेजाऊ।' 35 'जेजौ मुसा तिउंरे इणै बोलीयो पोरु गाड़ौ थौ, कि ताउंके आमु माथे फँसलै कौरनै रौ हक कुणीए दैओ आ?' सेऊ परमेश्वरै हक और छुड़ाउणे वालौ चाणीओ तेस परमेश्वर रौ दुता रै जरीए भेजौ जुणीए तेसकै झाड़ी दी दर्शन दैओ थौ। 36 तिणी आदमी मुसै, सै मिस्रा कु गाड़ीओ लाल समुन्दर और जांगला दी चालीस साला झाऊं हैरानी वालै कामा देखालीओ आपणै। 37 एक सेजौ मुसा आ जुणीए इस्राइलीऊ लै बोलौ, 'परमेश्वर तुमु कालै तुमारै भाईऊ माझीया कु मू जिणौ गुरु (नबी) खौडौ कौरा आ। 38 एक सेऊ आ जुण जांगला दी खुम्बली माझीए तेस परमेश्वर रौ दुता आइलै थौ जुणीए सित्रै पहाड़ी माथे तेस आइलै बुशै लाई आ, और आमारे नान-बुदु आइलै थौ, तेसी कै जीऊंदै वचन मिले ई ताकी आमु झाऊं पौउंचावा। 39 पर आमारे नान-बुदुए तेसरी नाई मानी, बल्कि तेस छाड़ीओ आपणै जीऊ मिस्रा भिलै मोड़ै, 40 और हारुना लै बोलौ, 'आमु कालै एक इणौ देऊ चाण जो आमुकु ओगाड़ी-ओगाड़ी हांडा, कैलैकि एक मुसा जुणीए आमै मिस्रा कु छुड़ाइयो आपणै ई, आमै नाई जाणदै कि तेसलै का हुओ?' 41 सेजै बौगता दी तिउंरे एक बाशटु री मरत चाणी और तेथ कारे बली चड़ाई, और आपणै हाथा रै कामा दी मगन हुरै। 42 तैबै परमेश्वरै आपणौ मूह तिऊंके पोरु मोड़ौ और सै छाड़ी गोरै कि सै सौरगा रै ग्रह री पुजा कौरा, जिणौ भविष्यवक्ता री किताबी दी आ लिखौ ओन्दौ, 'ओ इस्राइला रै घोर, का तुमै जांगला दी चालीस साला झाऊं पशुबली और नाज्ज री बलीमुइलै छोड़वा थै? 43 तुमै मोलेका रै ताम्बु और रिफान देवा रै तारै भी आपुकै निरँ थै, मतलब सै मुर्ती जो तुमुए पुजणा लै चाणी थी। आबै हाऊं तुमु बेबीलोना पारभिलै निर्इओ बसावा ऊ।' 44 गवाही रौ ताम्बु जांगला दी आमारे नान-बुदु माझीए थौ, जिणौ कि मुसा आइलै बुशै लाइणै वालै थौ बोलौ औन्दौ, कि तेस तिणी चाणै जिणौ ताएँ देखौ आ।' 45 सेजौ ताम्बु आमारे नान-बुदुए आणीओ यहोशु आइलै इदै आणौ आ; जेजै बौगता दी तिउंरे तिऊं ओरी जातिऊ माथे कौबजौ कियोँ जो परमेश्वरै आमारे नान-बुदु कारे कु पोरु गाड़ी गोरै, और सेऊ ताम्बु दाउदा रै बौगता झाऊं रौ आ। 46 तेस माथे परमेश्वरै बौड़ी दया कि आ; तैबै तिणीए औरज की कि सेऊ याकुबा रै परमेश्वर कालै रौइणा लै जागह चाणा। 47 पर सुलेमानै तेस कालै घोर चाणौ 48 पर परमेश्वर हाथा कौरी चाणै औन्दै घौरा दी नाई रोइंदौ, जिणौ भविष्यवक्तै बोलौ, 49 'प्रभु बोला आ कि, सौरग मरै बोशणे री जागह आ और धौतरि मरै बांगणै छाड़ने री पिडी आ मुं कालै तुमै किणौ घोर चाणा ई? और मरै आराम कौरनै री किणी जागहा औली? 50 का इए सारी चिजै मरै हाथा री नाई चाणी ऐन्दी?' 51 ओ डीठ लोगुओ, तुमारै जीऊ और कौन्थु बिण खतना किरै औन्दे ई। तुमै सदा पवित्र आत्मा रौ विरोध कौरा ई। जिणौ तुमारै नान-

बुड़े कौरा थै, तिणी तुमै भी कौरा ई। 52 तुमारै नान-बुदुए भविष्यवक्ता माझीया कु केजेँ ना सतारे? तिउंरे सै भी पोरु झांगेँ जुणीए तेस धौमी रै आशणै रै बारे दी पैहले कु खौबर देई थी, ज़ास पाकुडनै वालै और झांगणे वालै आबै तुमै बौणी गोरै। 53 तुमुए परमेश्वर रौ दुता री बोली ऐन्दी बुशै ता शुणी पर सै मान नाई।

स्तिफनुस ढोलियाउणौ

54 इऊं बुशु शुणीओ सै जौली गोरै, और तेसलै दांद पिशदै लागै। 55 पर तिणीए पवित्र आत्मा कु भोरुइओ सौरगा भिले देखौ और परमेश्वर री बौडाई और यीशु परमेश्वर री सुलटी भिले खौडौ हुओ औन्दौ देखीओ, 56 बोलौ, 'देखौ हाऊं सौरग खुलौ औन्दौ, और आदमी रौ छोहरु परमेश्वर री सुलटी भिले खौडौ हुओ औन्दौ देखा ऊ।' 57 तैबै तिउंरे जोरै हाका देइओ कोन्थु बन्द किरै, और कौडै तेस भिले लपकै; 58 और सेऊ धाकै मारीओ इलाकै कु बाइरै निर्इओ तेस माथे पात्थर लाइदै लागै। गवाही दैणै वालेऊए आपणै जुडकै खोलीओ शाउला नावां रै नौजवाना कारे छाड़ै। 59 सै स्तिफनुसा दी पात्थर लाइदै थकै लागी, और सेऊ इणै बोलिओ प्राथना कौरदै थकौ लागी कि, 'ओ प्रभु यीशु, मेरी आत्मा आपणाऊ।' 60 तैबै घुण्डै माथे टेकीओ जोरै बोलदै लागौ, 'ओ प्रभु, इरे पाप इऊं माथे नाई लारे।' और इणै बोलीओ सेऊ सुती गौ, (मौरी गौ) शाउल भी झांगणे दी शामिल थौ।

कलिसिया लै दुख देणौ

8 सेजै दिनै यरुशेमा री कलिसिया दी भौरी सताव शुरु हुओ, चलेऊ छाड़ीओ ओर सारै यहुदिया और सामरिया देशा दी बिखरी गोरै। 2 कुछ भौगतुए (चलेऊए) स्तिफनुसा रौ मौडौ कब्र दी छाड़ौ और तेसलै भौरी लेरै। 3 शाउल कलिसिया नाष कौरदै थौ लागौ औन्दौ; और घौरा-घौरा दी डेइओ छेउडी और मौरदु घीशी-घीशीओ जेला दी थौ लागौ ओन्दौ पाइडदै।

सामरिया दी फिलिप्पुसा रौ प्रचार

4 जो बिखरै औन्दै लोग थै सै खुशखबरी शुणावा थै; 5 और फिलिप्पुस सामरिया इलाकै दी डेइओ लोगु के मसिहा रौ परचार कौरदै लागौ। 6 जो बुशै फिलिप्पुसै बोली लोगुए सै शुणीयो और हैरानी वालै कामा देखीओ जो सेऊ देखावा थै एक मन हुइओ तेथदी ध्यान लाओ। 7 कैलैकि भौरी लोगु कु बुरी आत्मा राडै मारीओ बाइरै थी लागी ऐन्दी निकुलदै, और भौरी लकवै रै बिमार और लंगडै भी च़ागै हुरै; 8 और तेस इलाकै दी भौडी खुशी छाई गोई।

जादू कौरणै वालौ शमौन

9 एथकु पैहलै सेजै इलाकै दी शमौन नावां रौ एक आदमी थौ, जुण जादु-टोणै कौरीए सामरिया रै लोगु हैरान कौरा थौ और आपु लै सारेऊ कु बौडी आदमी बोला थौ। 10 छोटै कुबौडै झाऊं सारै तेसरौ आदर कौरा थै, 'कि एक आदमी परमेश्वर री सै बौडी शक्ति आ।' 11 तिणीए भौरी बौगता ओअलै आपणै जादु-टोणे रै कामा कौरीए सै लोग हैरान थै किरै औन्दै, एथीलै सै लोग तेस भौरी बौडौ माना थै। 12 पर जेबी तिउंरे फिलिप्पुसा री बुशु माथे विश्वास किओ जुण परमेश्वर रै राज और यीशु रै बारे दी खुश खबरी शुणावा थौ। ता सारै लोग छेउडी का मौरद बसिस्मा निंदै लागै। 13 तैबै शमौनै आपु भी विश्वास किओ और बसिस्मा निर्इओ फिलिप्पुसा आइलै रौइदै लागौ। सेऊ नोखै-नोखै और बौडै-बौडै शक्तिवालै कामा देखीओ हैरान हुआ थौ।

सामरिया दी पतरस और यूहन्ना

14 जेबै चलेऊए जुण यरुशेमा दी थै शुणौ कि, सामरिया रै लोगुए परमेश्वर रौ वचन मानी गौ आ तैबै तिउंरे पतरस और यूहन्ना तिऊं कारे भेजै। 15 तिउंरे सामरिया दी डेइओ तिउंलै प्राथना कौरै कि सै पवित्र आत्मा पा लै। 16 कैलैकि पवित्र आत्मा इबी झाऊं तिऊं कासी माथे नाई उतरौ थौ; तिउंरे ता सिरफ यीशु रै नावां रौ बसिस्मा थौ निओ औन्दौ। 17 तैबै पतरस और यूहन्ना तिऊं माथे हाथ छाड़ै और तिऊंके पवित्र आत्मा पाओ। 18 तैबै

शमोनै देखो कि चलेऊ रै हाथा छाडीयौ पवित्र आत्मा मिला सा, ता तिऊं काए पैसै निर्झौ बोलौ, ¹⁹ “एजौ हक मुके भी दैऔ कि हाऊं जास माथे भी हाथ छाडू लै ता तेसलै पवित्र आत्मा मिला।” ²⁰ पतरसै तेसलै बोलौ, “तैरै रुपाए-पैसै ताऊं आइलै चाई खातम हुए, कैलैकि ताएँ परमेश्वर रौ वरदान पैसेऊ कौरी खरीदनै रै बारै दी सुंचौ आ। ²¹ एजी बुशा दी ना तैरौ भाग, ना कोई हिस्सा आ; कैलैकि तैरौ जीऊ परमेश्वर री नौजरीए साफ नाई आसतौ। ²² एथीलै आबै आपणी इएँ बुराई कु मन बदुल, और प्रभु कु प्रार्थना कौर, हुई सौका कि तैरै जीवा री बुराई लै माफी मिला। ²³ कैलैकि हाऊं देखाऊ कि तू पित जिणै कौडवाहटा दी और बुराई रै जाला दी फौसौ औन्दौ।” ²⁴ शमोनै बोलौ, “तुमै मुलै प्रार्थना कौरौ कि जो बुशै तुमुए मुलै बोली आ, तिऊं मांझीआ कु कोई भी मुसीबत मुं माथे ना आशा।” ²⁵ तैबै पतरस और यहुआ गवाही देइओ और परमेश्वर रै वचन शुणाइओ यरुश्मेमा लै वापस आशै। और सामरिया रै कई इलाकै दी खुश खबरी शुणाई।

फिलिप्पुस और कूश देशा रौ अधिकारी

²⁶ तैबै परमेश्वर रै एकी दुतै फिलिप्पुसा लै बोलौ, “उठ और दक्षीण दिशा री भीलै सेजी बाटा दी डेऊ, जो बाट यरुश्मेमा कु गाजा लै डिआ।” सै शुनशान बाट आ। ²⁷ फिलिप्पुस उठीओ चाल पौडौ, और देखौ कूश देशा रौ एक आदमी थौ आशद लागै औन्दौ सेऊ खोजौ थौ और सेजे देशा री राणी कन्दाकै रौ मन्त्री और खजांची थौ। सेऊ परमेश्वर री आराधना कौरना लै यरुश्मेमा लै थौ आशौ औन्दौ। ²⁸ सेऊ वापस डेउंदी बारै आपणै रौथा माथे बोशीओ, यशायाह गुरु री किताबी पौडदैं थौ लागौ औन्दौ। ²⁹ तैबै आत्मै फिलिप्पुसा लै बोलौ, “नजदीक डेइओ एस रौथा आइलै हाण्ड।” ³⁰ फिलिप्पुस तेस भिलै फेटी मारीओ डैओ और सेऊ यशायाह गुरु री किताबी पौडदैं शुणौ, और तेसकु पुछौ कि, “जो तू पौडदैं लागौ औन्दौ का तू तेस सौमझा भी ई?” ³¹ तिणीए फिलिप्पुसा लै बोलौ, “जेबी झाऊं कुण मूं समझावा नाई लौ तेबी झाऊं हाऊं किणौ सौमझा ऊ?” “तिणीए फिलिप्पुसा कु औरज कौरौ कि मुं काए आशीओ बोश” ³² पवित्र शास्त्रा रौ जो पाठ सेऊ पौडदैं थौ लागौ औन्दौ सेऊ एजौ थौ: “सेऊ भेरी बाशीए बली हुणा लै निओ, और जिणौ चेलटु ऊन लौइणै वालेऊ काए चुटकचार थाका आ, तिणी ई, तिणीए भी आपणो मुंह नाई खोलौ। ³³ तेसरै निउलै दी तेसरौ फेसलौ नाई हुओ। तेसरै बौगता रै लोगु रै बारै दी कुण बोला आ? कैलैकि धौतरी माथा कु ता तेसरै प्राण नीई गौए थे।” ³⁴ एथ माथे खोजैए फिलिप्पुसा कु बोलौ, “हाऊं ताऊं कु औरज कौरा ऊ, इणौ बोल कि भविष्यवक्ता इणौ कासरै बारै दी बोला आ? आपणै या कास ओरी रै बारै दी?” ³⁵ तैबै फिलिप्पुस आपणो मुंह खोलौ और एसी पवित्र शास्त्रा कु शुरु कौरौओ तेसकै यीशु रै बारै दी खुश खबरी शुणाई। ³⁶ बाटा दी हांडदैं-हांडदैं सै एकी जागह दी पौंऊचै जीए पाणी थौ। तैबै खोजैए बोलौ, “देख इदै पाणी आ आबै, आबै मुंलै बसीस्मा निंगा लै का कामी आ?” ³⁷ फिलिप्पुस बोलौ, “अगर तू पुरै जीवा कौरौ विश्वास कौरा ई ता नीई सौका ई।” तिणीए बोलौ, “हाऊं विश्वास कौराऊ कि यीशु मसीह परमेश्वर रौ छेहरु आ।” ³⁸ तैबै तिणीए रथ रोकणै रौ हुकम दैओ, और फिलिप्पुस और खोजा दुईया पाणी दी डेवै तैबै तिणीए खोजा लै बसीस्मा दैओ। ³⁹ जेबी सै पाणी कु बाइरै आशै, ता परमेश्वर री आत्मै फिलिप्पुस तिवरु चुंगीओ निओ, और खोजैए सेऊ तौएँ नाई देखौ। खोजौ खुशी मौनाईओ आपणी बाटा दी डैओ। ⁴⁰ फिलिप्पुस पौंऊचौ आशदोश इलाकै दी पा। और जेबी झाऊं कैसरिया इलाकै दी ना पौंऊचौ तेबी झाऊं सेऊ इलाकै-इलाकै दी यीशु री खुशखबरी शुणाउंदैं थाकौ लागी।

शाऊला रौ जीऊ बौदलिणौ

⁹ शाऊल जुण इबी झाऊं प्रभु रै चलेऊ धमकाउंदैं और तिऊं झांगणै री कोशीशा दी थौ लागौ औन्दौ, सेऊ बौडै याजका काए डैओ, ² और तेसकु दमिशक इलाकै दी धार्मिक खुम्बली रै नाऊं पौतै (तिऊं सताउणै) रै हका री चिड्डी मांगी, ताकी अगर तेसकै तिणै कुण एजै पंथा धर्मा (यीशु पिछु हांडणै वालौ) रौ मिला लौ ता सेऊ चाऊ छेउडि औलौ चाऊ मौरद तिऊं बानीओ यरुश्मेमा दी आणा। ³ पर जेबी हांडदैं-हांडदैं सेऊ दमिशक इलाकै रै

नजदीक पौंऊचौ ता एकदम सौरगा कु तेस फिदीआअलै तेज प्याशौ चौमकौ, ⁴ ता सेऊ धौनी माटै माथे पौडौ और एक हाक शुणुई, “ओ शाऊल, ओ शाऊल तू मूं कैलै सतावा ई?” ⁵ शाऊलै पुछौ, “ओ प्रभु तू कुण ई?” तिणीए बोलौ, “हाऊं यीशु ऊ, जास तू सतावा ई।” ⁶ पर आबै तू उठीओ इलाकै दी डेऊ, और जो ताएँ कौरनो आ तेस ताउकै बोलाऊ।” ⁷ जो आदमी तेस आइलै थै सै हारन (सुन) खौडै रौए; कैलैकि तिउएँ हाक ता शुणी, पर देखौ नाई कोई। ⁸ शाऊल माटै माथे कु उठौ, पर जेबी तिणीए आखी खोली ता तेसकै कुछा ना दिशौ, तैबै तिउएँ सेऊ हाथा पाकडीओ दमिशका लै निओ। ⁹ तेसकै चिया दिना झाऊं कुछ ना दिशौ। ना तिणीए कुछ खाओ-पिओ। ¹⁰ दमिशक इलाकै दी हनन्याह नावां रौ एक चलौ थौ, प्रभुए तेसकै दर्शन देइओ बोलौ, “ओ हनन्याह!” तिणीए बोलौ, “ओ प्रभु।” ¹¹ तैबै प्रभुए तेसलै बोलौ, “उठीओ तिणै गली दी डेऊ जेथलै “सिधी” बोलाई। तिणै यहुदा रै घौरा दी शाऊल नावां रै बारै दी पुछ जो तरसुसा रौ रौइणै वालौ आ; कैलैकि देख, सेऊ प्रार्थना कौरदैं आ लागौ औन्दौ। ¹² तिणीए दर्शन देखौ आ कि, हनन्याह नावां रौ एक आदमी भितरै आशौ और तेस माथे हाथ छाडौ, ताकी सेऊ तौएँ देखदैं लागौ।” ¹³ हनन्याह जवाब दैओ, “ओ प्रभु मुंडेरे एस आदमी रै बारै दी भौरी लोगु कु शुणौ आ, कि इणीए यरुश्मेमा दी तैरै पवित्र लोगु माथे भौरी जुलम किणै ई; ¹⁴ और इदरा लै भी एसकै परधान याजकु कु हक आ मिलौ औन्दौ, कि जुण तैरौ नाऊं निआं लौ, तेस बानीयो यरुश्मेमा लै निआं।” ¹⁵ पर प्रभुए तेसलै बोलौ, “तू डेऊ; कैलैकि सेऊ ता मुड्रे ओरी जातीऊ, राजेऊ, और इस्त्राइलीऊ काए मैरौ नाऊं पौंगडौ कौरना लै एक जरीओ आ छांटौ औन्दौ।” ¹⁶ और हाऊं तेसलै बोलाऊ कि मैरे नावां लै तिणीए किणै-किणै दुख जा ई उठाउणै।” ¹⁷ तैबै हनन्याह उठौ ओर तेस घौरा दी डैओ। तिणै तिणीए शाऊला माथे आपणै हाथ छाडै और बोलौ, ‘ओ भाई शाऊल, प्रभु मतलब यीशु, जो सेजी बाटा दी जेथदी तू आशो ई, ताउकै दिशौ थौ, तिणीए ई हाऊं भेजो ऊ, कि तु देखदैं लागौ और पवित्र आत्मा कौरौए भौरीआ।’ ¹⁸ और फेटी शाऊला री आखी कु छिलकै जेई उतरै और सेऊ देखदैं लागौ, और उठीओ तेभी बसीस्मा निओ। ¹⁹ तैबै रोटी खाइओ ताकत पाई। और सेऊ कई दिना झाऊं तिऊं चलेऊ आइलै रौ ओ, जो दमिशक इलाकै दी रौआ थै।

दमिशका दी शाऊला रौ परचार

²⁰ शाऊल तेभी ई धार्मिक खुम्बली दी डेइओ यीशु रौ परचार कौरदैं लागौ कि, एऊ परमेश्वर रौ छेहरु आ। ²¹ सारै शुणनै वालै हारन हुइओ बोलदैं लागै, “का एऊ सेऊ नाई जुण यरुश्मेमा दी यीशु रै नाऊं निणे वालेऊ, झांगा थौ; और इदै भी थौ एथीलै आशौ औन्दौ कि तिऊं बानीओ परधान याजका काए निओ?” ²² पर शाऊल औजौ भी शक्ती वालौ बौणौ, और एजी बुशा रौ सबूत देई-देईओ कि यीशु ई मसिह आ, दमिशक इलाकै रै यहुदिकु रै मुंह बौन्द किणै। ²³ जैबै भौरी दिन बिती गौए, तैबै यहुदी मिलीओ शाऊला झांगणै रै बारै दी चौपडींदैं लागौ। ²⁴ पर तिऊंरौ चौपडीणौ शाऊला कैं पौतौ लागौ। कि सै तेस झांगणा लै राच दिन बाटा दी जागदैं औआ ई लागै औन्दै। ²⁵ पर एकी राचीए तेसरै चलेउए सेऊ छाबडैं दी बोशालीओ लोली दी लटकाइओ दवाली बाटीए इलाकै कु बाइरै गाडौ।

यरुश्मेमा दी शाऊल

²⁶ यरुश्मेमा दी पौंऊचौओ शाऊलै चलेऊ आइलै मिलणे री कोशिश की। पर सै सारै तेसकु डौरा थै; तिऊंकै विश्वास नाई औआ थौ, कि एऊ भी यीशु रौ चेलौ बोणी गौ आ। ²⁷ पर बरनबासै सेऊ आपु आइलै चलेऊ काए निओ, और तिउलै बोलौ कि शाऊलै किणै कौरौ बाटा दी प्रभु देखौ और प्रभुए एस आइलै बुशै लाई आ; तैबै दमिशक इलाकै दी किणी हिम्मती कौरौए यीशु रै नावां रौ परचार किओ आ। ²⁸ शाऊल तिऊं आइलै यरुश्मेमा दी आजादी कौरौए आशदैं-हांडदैं लागौ। ²⁹ और निडर हुइओ प्रभु रै नांवा रो परचार कौरा थौ; युनानी बोली बोलणै वालै यहुदीऊ आइलै बुशै और वाद-विवाद कौरा थौ; पर सै कौरा थै तेस झांगणै री कोशीशा। ³⁰ पर जेभी भाईऊ कैं पौतौ लागौ, ता तिउएँ सेऊ कैसरिया दी आणौ और तिवरु भेजौ तरसुसा लै।

31 तैबे पुरे यहूदा परदेश, गलील परदेश और सामरीया री कलिसिया के चैन मिलौ और सै भौरी बौडवै लागी। सै प्रभु रै डौरा दी और पवित्र आत्मा री शान्ती दी हांडवै और बौडवै लागी।

लुद्धा और याफा दी पतरस

32 तैबे इणो हुओ कि पतरस हर जगह दी परचार कौरदैं-कौरदैं तिऊं पवित्र लोगु कारे भी पौऊंचौ जुण लुद्धा इलाकै दी रौआ थै। 33 तिरे पतरसा के एनियास नांवा रौ बिमार आदमी भी मिलौ जेथदी लकवै री बिमारी थी और आठ साला ओउलै बिस्तरै दी थौ पौडौ ओन्दौ। 34 पतरस तैसलै बोलौ, "ओ एनियास! यीशु मसीह ताऊं चांगौ कौरा आ। 'उठ आपणौ बिस्तर चुंगीओ ठीक कौर।' तैबे सेऊ फेटी खौडौ हुओ। 35 लुद्धा और शारोना रै सारै रौइणै वालै तेस देखीओ प्रभु भिलै फिरै। 36 याफा इलाकै दी तबीता मतलब दोरकास नांवा री एक विश्वासी रौआ थी। सै भौरी भौलै-भौलै काम कौरा और गरीबु लै दान दिआ थी। 37 सेजै बौगता दी सै बिमार हुई और पोरु मौरि। तिउं सै धोआइओ माथलै कौरै छाडी। 38 एथीलै कि लुद्धा इलाकौ याफा रै नजदीक थौ चेलेउरे शुणो कि पतरस तिरे आ, दुई आदमी छाडीओ तेसकु औरज की, "कि आमु कारे आशणा लै बेर नाई पा।" 39 तैबे पतरस उठीओ तिऊं आइलै चाल पौडौ, जेभी सेऊ पौऊंचौ ता तिउं सेऊ तिरे माथलै कौरै दी निओ। तैबे विधवा छेउडी लेरीओ पतरसा कारे आशीओ खौडी होई और जो जुडके दोरकास तैसलै आइलै रौइओ चाणे थै, तिऊं देखाउंदै लागी। 40 तैबे पतरस सारै तदरु बाइरै गाडै, और घुंडे टेकीओ प्राथना कौरि, और मोंडै भीले देखीओ बोलौ, "ओ तबीता उठ।" तैबे तिआं आपणी आखी खोली; और पतरसा देखीओ उठीओ बोशी। 41 पतरस हाथा पकडीओ सै उठाई, और पवित्र लोग और विधवा छेउडीऊ औटाइओ तिउंके जीऊंदी साँभाली। 42 इरे बूश सारै याफा इलाकै दी फौइली गोई; और भौरी लोगुरे प्रभु माथे विश्वास किओ। 43 और पतरस याफा इलाकै दी चामडै रै कामा कौरनै वाले शमौना रै घौरा दी भौरी दिना ज्ञाऊं रै ओ।

कुरनेलियुसा रौ पतरस औटाऊणौ

10 कैसरिया इलाकै दी कुरनेलियुस नावां रौ एक आदमी थौ, जुण इतालियानी नावां रै गुटा रौ आफसर थौ। 2 सेऊ भगत थौ और आपणै सारै टौबरा आइलै परमेश्वरा कु डौरा थौ, और गरीब लोगु लै दान दिआ थौ, और रोज परमेश्वरा कु प्राथना कौरा थौ। 3 तिणीए दुसकै चिजै पैहरै दी एक साफ दर्शन देखौ कि परमेश्वरा रौ एक दूत तेस कारे भितै आशीओ तैसलै बोलौ, "ओ कुरनेलियुस।" 4 कुरनेलियुस सेऊ बौडै ध्याना कौरि देखौ और डौरीओ बोलौ, "ओ प्रभु का बोला ई?" दूत तैसलै बोलौ, "तेरी प्राथना और तैरै दैओ औन्दौ दान याद कौरना लै परमेश्वरा कारे पौउंची गोए; 5 आबै याफा इलाकै दी आदमी भेजीओ, शमौन ज़ासलै पतरस भी बोला ई आपु कारे औटाऊ। 6 सेऊ चामडै चाणनै वालै शमौना, रै कारे आ रौ औन्दौ ज़ासरौ घौर समुन्दरा रै डिका कारे आ।" 7 तैबे सेऊ दूत जुणीए इरे बुशै बोली थी तदरु डैओ तैबे कुरनेलियुस आपणै दुई नुकुरु माझीआ कु एक भगत सिपाई आपु कारे औटाओ, 8 और तेस कारे सारी बुशै बोलीओ सेऊ याफा इलाकै लै भेजीओ।

पतरसा रौ दर्शन

9 दुजै दिनै जेभी सै हांडवै-हांडवै इलाकै दी पौऊंचणै वालै थै ता, दुसकै पैहरा दी पतरस प्राथना कौरदैं छापरा माथे डैओ। 10 तेसकै भूख लागी और सेऊ कुछ खाणौ चाअ थौ, पर तेभी ता तिरे खाणे री त्यारी कौरदैं पा थै लागे औन्दै तेसरै थी भौरी भूख लागी ऐन्दी; 11 तैबे तिणीए देखौ कि सौरग खुली गो; और एक चादर जीणी चीज चारीआ कुणै कु लटकाइयो तौलै आशदैं लागी ऐन्दी। 12 जेथदी धौतरी माथा रै सारै पशु और जीव-जन्तु, और उडनै वालै पक्षी थै। 13 तेसकै एक इणी हाक शुणुई कि, "ओ पतरस उठ, ज्ञांग और खा।" 14 पर पतरस बोलौ, "नाई प्रभु बिलकुल नाई, कैलैकि मुंइरे इबी ज्ञाऊं कोई भी गान्दी और अशुद्ध चीज नाई खाई।" 15 तैबे दुजी बारै तेसकै हाक शुणुई कि, "जो कुछ परमेश्वरै शुद्ध चाणौ आ तेसलै तू अशुद्ध नाई बोल।"

16 चिआ बारै इणो हुओ; तैबे सै चादर तदरु तेबी सौरगा भिलै वापिस डेई। 17 जेभी पतरस आपणै जीवा दी एजी बुशै सुंचदैं थौ लागौ औन्दौ, कि जो दर्शन मुंइरे देखौ आ सेऊ का औलौ?, ता तेभी सै आदमी जो कुरनेलियुस थै भेजै औन्दै, शमौना रै घौरा लोडीओ दारा कारे खौडै हुए, 18 और हाका देइओ पुछदैं लागे कि, "का शमौन ज़ासलै पतरस बोला ई इदैं आ पाउणौ?" 19 पतरस ता तेस दर्शणा रै बारै दी थौ सुंचदैं लागौ औन्दौ, तेभी परमेश्वरा री आत्मै तैसलै बोलौ, "देख चिन आदमी ताऊं लोडदैं ई लागे औन्दै। 20 आबै उठीओ तौलै डेऊ, और निडर हुइओ तिऊं आइलै डेऊ कैलैकि मुंइरे ई सै भेजै औन्दै।" 21 तैबे पतरस तैसलै तिऊं कारे देइओ बोलौ, "देखौ ज़ास लोडवै तुमै लागे औन्दै ई, सेऊ हाऊं ऊ। तुमै कैलै ई आशै औन्दै?" 22 तिउंए बोलौ, "कुरनेलियुस आफसर जुण धौमी और परमेश्वरा कु डौरनै वालौ, और ज़ासरौ नाऊं सारी यहूदी ज़ाती दी आ, तिणीए परमेश्वरा रै दूता री बुशै शुणी कि तुमु आपणै घौरा के औटाइओ तुमु कु परमेश्वरा रै वचन शुणा।" 23 तैबे तिणीए सै भितरै औटाए और तिउंरी सेवा की, दुजै दिनै पतरस तिऊं आइलै चाल पौडौ, और याफा इलाकै रै कुछ लोग भी तेस आइलै डेवे।

कुरनेलियुसा रै घौरा दी पतरस

24 दुजै दिनै सै कैसरिया दी पौऊंचै, और कुरनेलियुस आपणै रिश्तेदार, और खानदानी रै लोगु ज़ागदैं थौ लागौ औन्दौ। 25 जेबै पतरस भितरै आशौ ता, कुरनेलियुस तेसकु मिलौ और तेसरै बांगणे माथे पौडीओ तैसकै ढाल की; 26 पर पतरस सेऊ खौडौ चुंगीओ तैसलै बोलौ, "खौडौ ऊ हाऊं भी ता ताऊं जीणी आदमी ऊ।" 27 और तेस आइलै बुशै लाइदैं-लाइदैं भीतरै डैओ, और भौरी लोगु कौटै देखीओ, 28 तिउंलै बोलौ, "तुमै ज़ाणा ई की दुजी ज़ाती दी मिलणौ और तिऊं रै कारे डेउणौ यहूदीऊ लै बुरौ आ, पर परमेश्वरै मुकै बोलौ आ, कि केजै भी आदमी लै गान्दी या अशुद्ध नाई बोलु। 29 एथीलै हाऊं जेबी तुमुए औटाओ ऊ तेबी ई बिण बोलै आशो ऊ। आबै हाऊं पुछाऊ कि तुमुए हाऊं केजै कामा लै औटाओ ऊ?" 30 कुरनेलियुस बोलौ, "एजै बौगता दी चार दिन पैहलै हाऊं आपणै घौरा दी प्राथना कौरदैं थौ लागौ औन्दौ; ता देखौ एक आदमी चमकिलै जुडके भीडीओ, मुकारे आशीओ खौडौ हुओ 31 और बोलदैं लागौ कि, 'ओ कुरनेलियुस तेरी प्राथना शुणी गोई आ, और तेरी भेंट परमेश्वरा कारे याद किरै ई।' 32 एथीलै याफा इलाकै दी कुछ आदमी भेजीओ शमौन ज़ासलै पतरस बोला ई ओरु औटाऊ। सेऊ समुन्दरा रै डिका कारे शमौना रै घौरा दी आ रौओ औन्दौ, जुण चामडै रौ काम कौरा आ।" 33 तैबे मुंइरे तेबी ई ताऊं कारे आदमी भेजै ई और ताएँ आच्छौ किओ कि तु आशो ई। आबै आमै सारै इदैं परमेश्वरा कारे ई, जो कुछ परमेश्वरै ताऊंके बोलौ आ तेस शुणु।"

पतरसा रौ उपदेश

34 तैबे पतरस बोलौ, "आबै मुकै पौतो लागी गो आ कि परमेश्वर कासी भी ऊंच- नीच नाई मानदौ। 35 बल्कि हर ज़ाती कु जुण आदमी परमेश्वरा कु डौरा और भौलै काम कौरा, सेऊ तेसकै आच्छौ लागी। 36 जेजौ वचन परमेश्वरै इस्त्राइलीऊ के दैओ आ, जेबी तिणीए यीशु मसिह रै ज़रीए (जुण सारेऊ रौ प्रभु आ) शान्ती री खुश-खबरी शुणाई, 37 सेजौ वचन तुमै ज़ाणा ई, जो यहूना बनिस्मा रै परचारा बासीए गलीला कु शुरु हुइओ सारै यहूदीया दी फेली गो आ। 38 परमेश्वरै किणै कौरीए यीशु मसिह पवित्र आत्मा और शक्ति कौरीए भौरौ आ; सेऊ भौलाई कौरा थौ और बिमार लोगु शैताना रै हाथा कु बोचावा थौ, कैलैकि परमेश्वर तेस आइलै थौ। 39 आमै तिऊं सारै कामा रै शाजत ई; जो यीशुए यहूदीया रै देश और सारै यरुशेमा दी किरै ई, पर लोगुरे सेऊ क्रुसा माथे टागीओ पोरु ज्ञांगो आ। 40 सेऊ परमेश्वरै चिजै दिनै जीऊंदौ किओ, और पौगडौ भी किओ आ। 41 सारेऊ लोगु मांझीए नाई बल्कि तिऊं मांझीए जुण परमेश्वरै पैहलै कु थै छांटै औन्दै, मतलब आमु मांझीए जुणीए तेसरै जीऊंदै हुणै बासीए तेस आइलै रोटी खाई-पीई आ। 42 और तिणीए आमु लै हुकम दैओ कि लोगु लै परचार कौरौ और गवाही दैओ, कि यीशु ही प्रभु आ जो परमेश्वरै मौरै औन्दै और जीऊंदै ऊ रौ फैसलै कौरनै वालौ चाणौ

आ। 43 तेसरी गवाही सारै पुराणै गुरु दिआ ई, कि जुण भी तेस माथे विश्वास कौरा लौ तेसलै यीशु रै नावां कौरी पापा री माफी मिला आ।”

दूजी ज़ाती माथौ पवित्र आत्मा उतुरनौ

44 पतरस इणी बुशै बोलदें थौ लागौ औन्दौ कि पवित्र आत्मा सारै शुणनै वालेऊ माथे आशौ। 45 और जेती खतना किए औन्दै विश्वासी लोग तेस आइलै थै आशै औन्दै सै सारै हैरान हुए कि दुजी ज़ाती रै लोगु माथे भी पवित्र आत्मा रौ दान मिली गौ आ। 46 कैलैकी तिउंरे सै ओरी-ओरी बोली बोलदें और परमेश्वर री बौड़ाई कौरदें शुणै। 47 एथ माथे पतरसै बोलौ, “का कुण पाणी रोकी सौका आ कि तिउंलै बसिस्मा ना मिला जासकै आमु जिणौ पवित्र आत्मा मिलौ आ?” 48 और तिणीए हुकम दैओ कि तुमै यीशु मसिह रै नावां कौरी बसिस्मा निओ। तैबै तिउंरे तेसकु औरज कौरी कि आमु आइलै कुछ दिना झाऊं औजौ रौऊ।

पतरसा रौ आपणै कामा रे बारै दी साफ बोलणौ

11 तैबै चलेउरे और भाईउरे शुणौ जुण यहुदिया दी थै, कि दुजी ज़ाती रै लोगुए भी परमेश्वर रौ वचन मानी गौ आ। 2 और पतरस जेबी यरुश्लेमा दी आशौ, ता (यहुदी) खतना किए औन्दै लोग तेसकु सवाल-जवाब कौरदें लागे, 3 कि “ताएँ दुजी ज़ाती रै लोगु आइलै जुण बिणा खतना किए औन्दै ई कैलै खाओ-पिओ।” 4 तैबै पतरसै तिउंकै सारी बुशै शुरु कु शुणाई : 5 कि हाऊं याफा इलाकै दी प्राथना कौरदें थौ लागौ औन्दौ, और मुइए गेलियोँ एक दर्शन देखौ कि एक बौड़ी चादर ज़ीणी चारीया कुणै कु लौटकियोँ सौरगा कु उतरीयोँ धौनी मुकारे आशी। 6 जैबै मुइए देखौ ता तिरे चादरी दी सारै जानवर और किडै-मकौडै, और चिडै-चितकौरु थै; 7 और मुइए एक हाक भी शुणी, ‘ओ पतरस उठ, झांग और खा।’ 8 मुइए बोलौ, ‘नाई प्रभु, नाई; कैलैके कोई भी अशुद्ध और गान्दी चीज इबी झाऊं नाई खाई।’ 9 दुजी बारै सौरगा को हाक शुणुई कि, ‘जो चीज परमेश्वरै शुद्ध चाणी आ तैथलै तू अशुद्ध कैलै बोला ई।’ 10 चिआ बारै इणी हुओ; तैबै सब कुछ इणी सौरगा लै वापिस डैओ। 11 और देखौ, चिन आदमी तेभी मुकारे आशै जो कैसरिया कु मुकारे थै भेजे औन्दै। 12 तैबै आत्मै मुलै तिउं आइलै निडर हुइओ डेउणा लै बोलौ, और सै छौ भाई भी मुं आइलै चाल पौडै; और आमै तेस आदमी रै कारे डेवे। 13 तिणीए आमु लै बोलौ, कि एक दूत मुकारे आशौ और तिणीए मुलै बोलौ, कि ‘याफा लै आपणै आदमी भेजीयोँ शमौन जासलै पतरस बोला ई तेस इदें आपणै घोरै औटाऊ। 14 सेऊ ताउंकै इणी बुशै बोला आ, जेथ कौरी तू और तैरौ सारौ घोर छुटकारौ पा आ।’ 15 जेभी हाऊं तिउं आइलै बुशै लाइदें लागौ, ता पवित्र आत्मा तिउं माथे इणौ आशौ जिणौ शुरु दी आमु माथे आशौ आ। 16 तैबै मुकै परमेश्वर री एजी बूश याद आशी; जो तिणीए बोली थी, कि, ‘यहुन्ने ता पाणी रौ बसिस्मौ दैओ पर तुमुलै पवित्र आत्मा रौ बसिस्मौ मिला आ।’ 17 जैबै परमेश्वरै तिउंलै भी सेजौ दान दैओ आ जो आमुकै प्रभु यीशु मसिह माथे विश्वास कौरीयोँ मिलौ थौ; ता हाऊं कुण थौ जुण परमेश्वर रोकी सका थौ?” 18 इणौ शुणीयोँ सै चुटुक थाके, और परमेश्वर री बौड़ाई कौरदें लागै, “तैबै ता परमेश्वरै दुजी ज़ातिऊं कै भी जिन्दगी लै जिऊ बौदुलनै रौ दान दैओ आ।”

अन्ताकिया री कलिसिया

19 जो लोग तेस सताव री वज़ाह कु जो स्तिफनुसा रै कारण पौडै थै, वारै-पारै बिखरी गौए थै, सै घुमी-घुमीयोँ (परचार कौरदें-कौरदें) फीनीकै, साइप्रस और अन्ताकिया रै इलाकै दी पौउंरै; पर सै यहुदीऊ रै अलावा ओरी कासी कै वचन नाई शुणावा थै। 20 पर तिउं मांझीए कुछ साइप्रसा रै और कुछ कुरेनी थै, जुण अन्ताकिया दी आशीयोँ युनानीऊ कै भी प्रभु रौ वचना शुणाउंदें लागै। 21 प्रभु रौ हाथ तिउं माथे थौ, भौरी लोग विश्वास कौरीयोँ प्रभु भिलै मुडै। 22 जैबै तिउंरे बारै दी यरुश्लेमा री कलीसिया दी पौतौ लागौ, ता तिउंरे बरनबास अन्ताकिया लै भेजौ। 23 बरनबास तिरे पौउंचीओँ, और परमेश्वर री बौड़ी दया देखीयोँ खुश हुओ, और तिउंरै विश्वास बौड़ाउणा लै बोलौ, ‘कि तना-मना कौरी प्रभु कु चिपकै रौ ओ।’ 24 बरनबास एक भौलौ

आदमी थौ, सेऊ पवित्र आत्मा और विश्वासा कौरी भरपूर थौ; ओर भौरी लोगुए प्रभु यीशु माथे विश्वास कियोँ। 25 तैबै बरनबास शाउला लोडदें तरसुसा लै चाल पौडौ। 26 जैबै सेऊ तेसकु मिलौ ता तिणीए सेऊ आपु आइलै अन्ताकिया लै आणौ; तैबै सै एकी साला झाऊं कलीसिया रै लोगु आइलै मिलदें और भौरी लोगु लै खुश-खबरी शुणाउंदें थाकै लागी; और चेलै सौबी कु पैहलै अन्ताकिया दी “मसीह” बौणै। 27 सेजै बौणै कई भविष्यवक्ता यरुश्लेमा कु अन्ताकिया दी आशै। 28 तिउं मांझीया कु अगबुस नावां एकी भविष्यकै खौड़ी हुइयोँ पवित्र आत्मा रै जरीए बोलौ, “कि सारी धौतरी दी काल पौडा। और सेऊ काल क्लौदियुस राजै रै बोग्ता दी पौडौ। 29 तैबै चलेऊरे फैसलौ कियोँ कि आमै अपणी-अपणी कमाई कु कौठै कौरीयोँ यहुदीया दी रौइणै वालै भाईऊ लै कुछ मजद भेजु लै। 30 तिउंरे तिणी कियोँ; बरनबास और शाउला रै हाथा दी यहुदी स्याणेऊ लै कुछ मजद भेजी।

पतरस कैदा कु आजाद

12 सेजै बौणै हैरोदेस राजै कलीसिया रै कई लोगु सताउणा लै जेला दी पाए ई। 2 तिणीए यहुन्ना रौ भाई याकुब तलवारी कौरी झंगाओँ आ। 3 जैबै तिणीए देखौ कि यहुदी लोग एसकु खुश हुआई तैबै तिणीए पतरस भी। सेजौ बौणत अण संजड़े री रोटी रै दीन थै। 4 तिणीए सेऊ पाकडीयोँ जेला दी पाओँ, और चार-चार सिपाई चार पहरा दी चोअकीदारी दी छाडै; एथिलै ताकी फसह बासिए तेस लोगु कारे आणा। 5 पतरस जेला दी बन्द थौ; पर सारी कलीसिया तेसलै जीवा लाइयोँ प्राथना कौरदें थी लागी ऐन्दी। 6 जेभी हैरोदेस तेस लोगु कारे आणनै वालौ थौ, सेजी राची पतरस दुई जंजीरा दी बानौ औन्दौ दुई सिपाइऊ रै बिचा दी थौ सुतौ औन्दौ; और सिपाई दारा कारे चोअकीदारी कौरदें थै लागै औन्दै। 7 तैबै परमेश्वर रौ एक दूत तेस कारे आशीयोँ खौडी हुओ, तिरे जेला री कोठरी दी प्याशौ चोमकौ, और परमेश्वर रै दूत पतरसा री पाशुडी दी लाइयोँ सेऊ उज्जीयाओँ और बोलौ, “उठ फेटी कौर।” तैबै तेसरै हाथा कु जंजीरै खुलीयोँ धौनी छुटी। 8 तैबै दूत तेसलै बोलौ कि, “घाची बान, और आपणै बूट ला।” पतरसै तिणी कियोँ। तौएँ तेसलै बोलौ, “आपणै जुडकै भीडीयोँ मू पिछु हांड।” 9 सेऊ तिनकर निकलीयोँ तेस पिछु चाल पौडौ; पर इणौ नाई जाणा थौ कि जो कुछ परमेश्वर रौ दूत कौरदें आ लागौ औन्दौ सेऊ सच्च आ, पर सेऊ सौमझौ कि हाऊं सुइणै देखदें लागौ औन्दौ। 10 तैबै सै पैहलै और दुजे पैहरे कु निकलीओँ तेस लोए रै बौडै दारा कारे पौउंरै। जो इलाकै री तौरफा दी आ। सेऊ बौडी दार तिउंकाले आपु खुली गौ, और सै तिनकर निकलीयोँ एकी गली दी डै और तेबी ई परमेश्वर रौ दूत तेस छाडीयोँ तिनकर पोरु डैओ। 11 तैबै पतरसा कै होश आशी और तिणीए बोलौ “आबे मुइए सच्च जाणी गौ कि परमेश्वरै आपणौ दूत भेजीयोँ हाऊं हैरोदेसा रै हाथा कु छुडाई ऐरौ ऊ, और यहुदीऊ री सारी सोचा माथे पाणी फेरी गौ आ।” 12 इणौ जाणीयोँ पतरस यहुन्ना (जासलै मरकुस भी बोला थै) री आमा मरियमा रै कारे आशौ तिरे भौरी लोग कौडै हुइयोँ प्राथना कौरदें थै लागै औन्दै। 13 जैबै तिणीए बौडै दारा री खीडकी खटखाई, ता रुदे नावां री छेउडी देखदें आशी। 14 तिआइए पतरसा री वाच रवाई ओर खुशी कौरीए दार नाई खोलौ, पर फेट मारीयोँ भितरै डेई और बोलौ, कि पतरस दारा कारे खौडौ आ। 15 तिउंरे तिआंलै बोलौ, “तू पागल हुई गोई” पर तिआंए हिम्मती कौरी बोलौ कि सौचकी बूश आ। तैबै तिउंरे बोलौ, “पतरसा रौ दूत औणौ आ।” 16 पर पतरस खटखाउंदें थाकौ लागी : तैबै तिउंरे खिडकी खोली और पतरसा देखीयोँ हैरान हुए। 17 तैबै तिणीए साना कौरी तिउंलै बोलौ चुटुक थाकौ; और बोलौ कि परमेश्वरै किणै कौरी सेऊ जेला कु बाइरै गाडौ आ। तौएँ बोलौ, “याकुब और भाईऊ कै इएँ बूश बोलेऊ।” आपु डैओ तिनकर निकलीओँ दुजी ज़ागाहा लै। 18 दोअती सिपाइऊ मांझीए खलबली मची गोई कि पतरसा रौ का हुओ। 19 जैबै हैरोदेस पतरस लोडौ ता तेसकै सेऊ नाई मिलौ, तैबै हैरोदेस चोअकीदार री ज़ांच कौरी और हुकम दैओ कि तिउं पोरु झांगौ : हैरोदेस यहुदीया छाडियोँ कैसरिया दी डेइयोँ रौइंदें लागौ।

हेरोदेसा री मौउत

20 हेरोदेस सूर और सैदा रै इलाकै रै लोग कु खुश नाई थौ। एथीलै सै कौडै हुइयो तेस काए आशै, और बलास्तुस जुण राजे री खास आदमी थो तेस मनाइयो मेल-मिलाप कौरनौ चाओ, कैलैकि राजे रै देशा दी तिउरै देशा री पालन-पोषण हुआ थौ। 21 और चुने औन्दै दिना दी हेरोदेस राजे रै जुडकै भीड़ियो राजगाधी माथे बोशौ और तिउलै भाषण देंदै लागौ। 22 तैबे लोग हाकै मारीयो बोलदै लागै, "इए ता आदमी री नाई, बल्की ईश्वरा री बुशै ई।" 23 तेभी ई परमेश्वरा रै एकी दूतै हेरोदेस ज्ञांगौ, कैलैकि तिणीए परमेश्वरा री बोडाई नाई की; सेऊ किडै लागीयो मौरौ। 24 पर परमेश्वरा रौ वचन बौडै और फैलदै लागौ। 25 जैबे बरनबास और शाऊलै आपणी सेवा पुरी की तैबे तैबे सै यरुशेमा कु वापिस डेवै और तिउरै यहुन्ना ज़ासलै मरकुस भी बोला ई, आपु आइलै नियौं।

बरनबास और शाऊळ भेजणै

13 अन्ताकिया री कलीसिया दी कई भविष्यवक्ता और परचार कौरनै वालै थै; जिणौ की : बरनबास और शमौन जुण कालै थै, और लुकियुस कुरेनी, और चोथे हिस्से रौ राजौ हेरोदेसा रौ भाई मनाहेम, और शाऊल। 2 जेबी सै ब्रौता छाड़ीयो प्राथना कौरदै थै लागै औन्दै, ता पवित्र आनै बोलौ कि "मुकालै बरनबास और शाऊल अलग कौरौ जेजै कामा लै मुइयै इयै चुने ई।" 3 तैबे तिउरै ब्रौत और प्राथना कौरौ और बरनबास और शाऊला माथे हाथा छाड़ीयो सै भेजै।

पतरसा रौ प्रचारा दी डेरुणौ शुरू

4 तैबे सै पवित्र आत्मा रै भेजै औन्दै सिलूकिया लै डेवै; तिरु पाणी री बौड़ी किशती दी साइप्रसा लै डेवै; 5 तिउरै सलमीस नावां री जागहा दी पौउंचीयो, तिउरै परमेश्वरा रौ वचन यहुदीऊ री धार्मिक खुम्बलीउ दी शुणाओ। यहुन्ना थौ तिउरौ सेवक (साथी)। 6 सै तिउरै (टापु) सारी जागहा दी डेइयो पाफुस नावां री जागहा झाऊं पौऊंनै। तिउरै तिउकै बार-यीशु नावां रौ एक यहुदी आदमी मिलौ, जुण जादु-टोनों, और हुणै वाली झुठी बुशै बोला थौ। 7 सेऊ सिरगियुस नावां रौ आफसर पौलुसा (शाऊला) आइलै थौ, सेऊ बुद्धीमान आदमी थौ। तिणीए बरनबास और शाऊल आपु काए औटाए कैलैकि सेऊ परमेश्वरा रौ वचन शुणौ चाहा थौ। 8 पर इलीमास नावां रै जादु-टोन्है कौरनै वाले, (एऊ तेसरै नावां रौ मतलब थौ) तिउरौ विरोध कौरौयो अफसर विश्वास कौरनै कु रोकणौ चाओ। 9 तैबे शाऊलै ज़ासरौ नाऊं पौलुस भी आ, पवित्र आत्मा कौरौ भौरुइयो तेस भिले बौडै ध्याना कौरौ देखौ और बोलौ, "ओ सारी बुराई और चालाकी कौरौ भरुओन्दै शैताना रै छोहरु, आचूछै कामा रौ दुश्मन, का तू परमेश्वरा री सिधी बाट दारखी कौरनौ नाई छाडदौ? 11 आबे देख, प्रभु रौ हाथ ताऊं माथे लागौ आ; और तू कुछ बौगता झाऊं शेडौ रौआई और सूरज नाई देखदौ।" तेभी तेसरी आखी दी धुंधलौ और इनारौ छाई गौ, और सेऊ अरु-पोरु तोपीदै लागौ ताकी कोई तेसरौ हाथ पाकड़ीयो हण्डावा। 12 तैबे आफसर जे कुछ तिउरै हुओ थौ तेस देखीयो और प्रभु रै वचना शुणीयो हैरानी कौरौयै विश्वास कियो।

पिसिदिया रै अन्ताकिया दी

13 पौलुस ओर तेसरै साथी पाफुसा कु जहाज खोलीयो पंफूलिया इलाकै रै पिरगा गावां दी आशै; और यहुन्ना तिउं छाड़ीयो यरुशेमा लै वापिस आशौ। 14 पिरगा कु औगाऊं बौड़ीयो सै पिसदिया रै अन्ताकिया दी पौऊंनै; और आरामा रै दिना दी दार्मिक खुम्बली दी डेइयो बोशी गौरे। 15 कानुना (धर्मशास्त्रा) और पुराण गुरु री किताबी कु पौडनै बासीए धार्मिक खुम्बली रै मुख्यै लोगुए तिउंले बोलौ, "ओ भाईओ, अगर तुमारै जिवा दी कुछ बूश आ लोगु कै बोलणा लै ता बोलौ।" 16 तैबे पौलुसै खोडै हुइओ और हाथा हिलाइयो बोलौ, "ओ इस्राइली लोगुओ, और परमेश्वरा कु डेरनै वालेऊओ, शुणौ : 17 इऊं इस्राइली लोगु रै परमेश्वरै आमारे नान-बुडु चुनी गौरे, और जेबी इए मिस्र देशा दी परदेशी हुइयो रौआ थै, ता सै बोडाए; और आपणी

शक्ती कौरौए सै तिरु आजाद किए। 18 सेऊ कम से कम चालिस साला झाऊं जागला दी तिउं री देखबाल कौरदै थाकौ लागी, 19 और कनान देशा री सात जाती ज्ञांगीओ इस्राइली लोग तिउरै साढे चार शौ साला झाऊं बौसालै। 20 तेथ बासीए शमुएल भविष्यवक्ता झाऊं तिउं मांझीए फैसलै कौरनै वालै छाडै। 21 तेथ बासीए तिउरै एक राजौ मांगौ: तैबे परमेश्वरै बिन्ध्यामिना रै वंशा कु चालिस साला झाऊं एक आदमी; मतलब कीशा रौ छोहरु शाऊल तिउं माथे राजौ चाणौ। 22 तैबे सेऊ अलग कौरौयो दाऊद राजौ चाणौ; जेथरै बारै दी तिणीए गवाही देई, कि मुकै एक आदमी, यिशै रौ छोहरु दाऊद, मैरै जीवा जिणौ मिली गौ आ; एऊ मेरी सारी मर्जी पूरी कौरा आ।" 23 तेसी रै वंशा कु परमेश्वरै आपणौ वादौ कियो ओन्दै इस्राइला कै एक छुटकारै देंगै वालौ, मतलब यीशु भेजौ आ। 24 ज़ासरै आशणै कु पैहलै यहुन्ने सारै इस्राइलीऊ मांझीए मन बदुलनै रै बसीस्मा रै बारै दी परचार कियो। 25 जेबी यहुन्ना आपणी सेवा पुरी कौरनै वालौ थौ, ता तिणीए लोगु लै बोलौ कि तुमै मूं का समझा ई? हाऊं सेऊ नाई ऊ, पर देखौ मूं बासीए एक आशणै वालौ आ, ज़ासरै हाऊं बुटा खोलनै रै लायक भी नाई।" 26 "ओ भाईओ, तुमै जुण अब्राहमा री सन्तान ई; और तुमै जो परमेश्वरा कु डौरा ई, तुमुकै एऊ छुटकारै रौ वचन भेजौ ओन्दौ। 27 कैलैकि यरुशेमा दी रौइणै वालै और तिउरै स्याणुउरै, ना सेऊ पराणौ और ना पुराणै गुरु री बुशै समझी, जो हर आराम वालै दिना दी पौडा ई, एथीलै सेऊ आरोपी चाणीयो सै बुशै पुरी की। 28 तिउरै ज्ञाणै लायक तेसदी कोई गलती नाई देखी, तैबे भी पिलातुसा कु औरज कौरौ की एस पोरु ज्ञांगौ। 29 जैबे तिउरै यीशु रै बारै दी लिखी ऐन्दी सारी बुशै पुरी की, ता सेऊ क्रुसा माथे कु धौनी उतारीयो कन्ना (ओडाची) दी छाडौ। 30 पर परमेश्वरै सेऊ मौरै औन्दै मांझीया कु जीऊंदौ कियो, 31 और यीशु तिउकै जुण तेस आइलै गलीला कु यरुशेमा लै आशै थै, भौरी दिना झाऊं दिशौ; लोगु मांझीए आबे से ई गवाह ई। 32 आमै तुमुकै तेस वादै रै बारै दी जो नान-बुडु कु कियो थौ, एजी खुश-खबरी शुणाई, 33 कि परमेश्वरै यीशु जीऊंदौ कौरौयो, सेजौ वादौ आमारे लोलडेऊ लै पुरौ कियो आ; जिणौ भजन संहिता री किताबी दी दजे पाठा दी आ लिखी ओन्दौ कि 'तू मैरौ छोहरु ई; आज मुइयै ताऊंले जन्म दैओ आ।' 34 और तेसरै इणै मौरनै बासीए जीऊंदै हुणै रै बारै दी भी, कि सेऊ केभी ना शौडदौ, तिणीए इणौ बोलौ, हाऊं दाऊदा माथा री पवित्र और केबी ना खत्म हुणै वाली बौड़ी दया तुमु माथे कौरा ऊ।" 35 एथीलै तिणीए एक औजौ भजना दी भी बोलौ, 'कि तू आपणै पवित्र आदमी शडनै नाई देंदौ।' 36 कैलैकि दाऊद ता परमेश्वरा री मर्जी कौरौए आपणै बौगता दी सेवा कौरौयो सदा लै सुती गौओ, और आपणै नान-बुडु मांझीए मिली गौ, और शौडी भी गौओ। 37 पर जो परमेश्वरै जीऊंदौ कियो आ सेऊ नाई शौडौ। 38 एथीलै, 'ओ भाईओ, तुमै सौमझौ कि यीशु रै जरीए पापा कु माफी पाइणै री खुश-खबरी तुमुलै देई ऐन्दी; 39 और जेजी बुशा दी तुमै मुसा रै कानुना रै जरीए निर्आरोप नाई बौणा थै, तिउं सौभी दी हरक विश्वास कौरनै वालौ यीशु रै जरीए निर्आरोप बौणा आ। 40 एथीलै खबरदार रौएऊ, इणौ ना चाई हुओ कि जो पुराणै गुरु री किताबी दी लिखौ ओन्दौ, सेऊ तुमु माथे पौडा: (घोटा) 41 ओ 'बुराई कौरनै वालेओ, देखौ, और हैरान हुइयो मौरौ; कैलैकि हाऊं तुमारै दिना दी एक काम कौरा ऊ, इणौ काम कि अगर कुण तुमु मांझीया कु तेसरी बुशै भी ला लौ, ता तुमै केभी विश्वास ना कौरा।" 42 तैबे पौलुस और बरनबास तिरु बाइरै आशणै बासीए लोग तिउंकु औरज कौरदै लागै कि दुजै आराम वालै दिना दी इयै बुशै आमुकै औजौ शुणाएऊ। 43 जैबे खुम्बली रै लोग उठी गौरे ता यहुदी और यहुदी गुटा रै आशै औन्दै लोगु मांझीया कु भौरी लोग पौलुस और बरनबासा पिछु डेई गौरे; और तिउरै सै लोग सौमझाए कि परमेश्वरा री दया दी सदा बौणी रौएऊ। 44 दुजै आरामा रै दिना दी इलाकै रै सारै लोग परमेश्वरा रै वचन शुणना लै दोउती कौडै हुइ गौरे। 45 पर यहुदी लोग भीडा रै लोगु देखीयो रोशा कौरौए भौरुई गौरे, और पौलुसा री बुराई कौरदै लागै। 46 तैबे पौलुस और बरनबासै बिण डौरी तिउंले बोलौ, "जुरुरी थौ कि पेहलै परमेश्वरा रौ वचन तुमुकै शुणाइया; अगर तुमै नाई शुणदै और आपणौ जिऊ सदा री जीन्दगी रै लायक नाई सौमझदै, ता आमै दुजी जाती रै लोगु भिलै मुडी (और तिउंकै परमेश्वरा रौ वचन शुणाई)। 47 कैलैकि प्रभु आमुकै इणौ हुकम दैओ आ 'मुइयै तुमै दुजी जाती लै प्याशै चाणै, ताकी दुनीया रै कुणै-कुणै झाऊं सौभी

लोगु रौ छुटकारो औलौ।” 48 इणें शुणीयो दुजी जाती रै लोग खुश हूरे, और परमेश्वर रै वचना री बौड़ाई कौरदै लागै; जेती लोग सदा री जिन्दगी पाइणे वालें थें, तिउं सौंभीरे तेभी विश्वास कियौ। 49 तैबै परमेश्वर रौ वचन सारै देशा दी फैलदै लागौ। 50 पर यहूदी लोगुए उंची जाती री भगत छेउडी और इलाकै रै कुछ स्याणें लोग आपणें वशा किये, तिउंकु पौलुस और बरनबासा रौ विरोध कौराइयो सैं आपणें इलाकै कु बाइरें गौड़ाए। 51 तैबै पौलुसैं और बरनबासैं तिउं कारे आपणें बुटा री धूल झाडी और तिनकरु निकलीयो इकुनियुमा गावां लै डेवै। 52 चलै खुशी कौरिए और परमेश्वर री आत्मा कौरि भौरिं धाकै लागी।

इकुनियुमा दी पौलुस और बरनबास

14 इकुनियुमा रै गावां दी इणौ हुओ कि पौलुसा और बरनबासैं धार्मिक खुम्बलीऊ दी डेइयो इणौ परचार कियौ कि यहूदी और युनानी लोगु मांझीया कु भौरी लोगुए विश्वास कियौ। 2 पर ज़ुणी यहूदीउरे विश्वास नाई कियौ तिउंरै सैं दुजी जाती रै लोग आपणें वशा दी किये और तिउंरें जिवा दी भाईऊ रै खिलाप दुश्मनी पैदी की। 3 पौलुस और बरनबास भौरी दिना झाऊं तिउंरै रोए और प्रभु माथें विश्वास छाडीयो हिम्मती कौरिए वचन शुणावा थें; तिउंरें ज़रीए प्रभु भौरी हैरानी वालें काम कौरा थौ, और आपणी बोडी दया री गवाही दिया थौ। 4 पर इलाकै रै लोगु मांझीए फुट पौडी गोई थो, तिउं मांझीए कुछ लोग यहूदीऊ आइलें और कुछ पौलुस और बरनबासा आइलें हुई गोए थें। 5 तैबै दुजी जाती रै लोग और यहूदी लोग, तिउं रौ विरोध और तिउं ढोलियाउणा लै आपणें स्याणेऊ आइलें तिउं पिछु दौडै। 6 पर पौलुस और बरनबासा कैं इणौ पौतौ लागौ और सैं तिनकरु लुकाउनिया रै लुस्त्रा और दिरबे इलाकै दी और नजदीका रै परदेशा लै भागै। 7 और तिउंरें खुश-खबरी शुणाउंदै लागै।

लुस्त्रा और दिरबे दी

8 लुस्त्रा दी एक आदमी थौ बोशौ औन्दौ, सेऊ बांगणें रौ अपंग थौ और जन्मा कु लौंगडौ थौ सेऊ केबी भी ना हांडौ थौ। 9 सेऊ पौलुसा री बुशें शुणदै थौ लागौ औन्दौ। पौलुसैं तेस भीलें बौडै ध्याना कौरि देखौ कि तेस कैं चांगे हूणें रौ विश्वास आ, 10 और हाकें मारीयो बोलौ, “आपणें बांगणें रै टेका दी सिधौ खौडौ ऊ।” तैबै सेऊ उछलीयो उठौ और हांडदै-फिरदै लागौ। 11 लोगुए पौलुसा रै इणें कामा देखीयो लुकाउनिया री बोली दी हाकें मारीयो बोलौ, “आज परमेश्वर आदमी रै रूपा दी आमु मांझीए आशौ आ।” 12 तिउंरें बरनबासा लै ‘ज्यूस’ और पौलुसा लै ‘हिरमेश’ बोलौ, कैलैकी सेऊ भौरी बुशें लाइणें रौ मुख्य थौ। 13 ‘ज्यूस’ रै तेस मन्दिरा रौ माली (पुजारी) जो तिउंरें शहरा रै सामनैं थौ, पशु और फुला री माला दारा कारे आपणीयो लोगु आइलें बली कौरनैं चाहा थौ। 14 पर जैबै पौलुस और बरनबासैं इणौ शुणौ ता तिउंरें आपणें जुड़कें चिरें, आपु पौडें लोगु भिलें और हाकें मारीयो बोलदै लागै, 15 “ओ लोगुओ, तुमैं का कौरा ई, इणौ पा? आमैं भी ता तुमु बाशीए दुःख-सुख भोगणें वालें आदमी ई, और तुमुकें परमेश्वर री खुश-खबरी शुणाई, ताकी तुमैं इउं फुको री जिजा कु अलग हुइयो जिउंदैं परमेश्वर भिलें फिरा, जुणीए सौरग, धौतरी और समुन्दर और जो कुछ तिणीए चाणौ। 16 तिणीए बितैं बौगता दी सारी जाती रै लोग आपणी-आपणी बाटा दी हांडणें दै। 17 तैबै भी तिणीए आपु गवाही दैणी नाई छाडी; बल्की भौलाई कौरदै थाकौ लागी, सौरगा कु पाणी और फसला रै बौगता दी भरपुर फसल देइयो तुमारें जिऊ खाणें और खुशी कौरि भौरदै थाकै लागी। 18 इणें बोलीयो तिउंरें लोग बौडी मुश्किला कौरिए रोकें ताकी लोग तिउंरें बली ना कौरा। 19 पर कुछ यहूदीउरें अन्ताकिया और इकुनियुस इलाकै कु आशीयो भीडा रै लोग आपणें वशा दी कौरियो, पौलुसा ढोलीयाउंदै लागै, और मौरौ औन्दौ जाणीयो सेऊ इलाकै कु घीथीयो बाइरें गाडौ। 20 पर जैबै चलै तेसरें चारौ तौरफा दी खौडै हूरे ता पौलुस उठीयो इलाकै दी डैओ, और दुजें दिनैं बरनबासा आइलें दिरबे इलाकै लै डैओ।

सीरिया रै अन्ताकिया लै वापिस डेउणौ

21 तेस इलाकै दी तिउंरें परमेश्वर रै नावां री खुश-खबरी शुणाइयो, और भौरी चलै चाणीयो, तिनकरु लुस्त्रा, इकुनियुस और अन्ताकिया लै डेवै, 22 चलेऊ रै जिऊ विश्वासा दी मजबूत कौरदै और इणौ परचार कौरा थें कि विश्वासा दी बोणी रोएऊ छाडेऊ नाई; “कैलैकि आमुए बौडै दुःख उठाइयो परमेश्वर रै राजा दी जा डेउणौ।” 23 तैबै तिउंरें हरेक कलीसिया दी तिउं कालें मुख्यें चाणें, और ब्रौता छाडीयो तिउंरें प्राथना कौरियो सैं परमेश्वर रै हाथा दी सौंभालें, जास माथें तिउंरें विश्वास कियौ थौ। 24 तैबै पौलुस औ बरनबास पिसिदिया गावां बाटीए डेइयो पंफूलिया दी पौउंचें: 25 तैबै पिरगा इलाकै दी वचन शुणाइयो अतलिया दी आशें, 26 तिनकरु सैं पाणी री किशती दी बोशीयो अन्ताकिया लै डेवै, जिदरु सैं एजें कामा लै जो तिउंरें पुरौ कियो आ, परमेश्वर री बौडी दया कौरि भेजै थें। 27 तिउंरें डेइयो तिउंरें कलीसिया कौडै की और तिउंरें लोगु कारे बोलौ, कि परमेश्वरें तिउं आइलें रौइयो किणें बौडै-बौडै काम किए ई, और दुजी जाती रै लोगु कालें विश्वासा रौ दार खोली गौ। 28 तैबै पौलुस और बरनबास तिउंरें चलेऊ आइलें भौरी दिना दी रौए।

यरुश्लेमा री खुम्बली

15 तैबै कुछ लोग यहूदीया कु आशीयो भाईऊ कैं शिखाउंदै लागै : “कि अगर मुसा रै रिवाजा जिणौ तुमारौ खतनौ नाई औलौ ता तुमु लै छुटकारो नाई मिलदौ।” 2 एजी बुशा माथें पौलुस और बरनबासा रौ तिउंरें आइलें भौरी झौंगडौ और (भंहस बाजी) वाद-विवाद हुओ, तैबै तिउंरें इणौ फेसलौ कियौ कि आमु आंझीया कु कुछ मुख्य लोग यरुश्लेमा रै स्याणेऊ कारे डेवा। 3 तैबै कलीसिया रै लोगुए सैं आधी बाटा झाऊं छाडें; तिनकरु सैं फिनकैं और सामरीया बाटीए दुजी जाती रै लोगु कैं मन बदुलनैं रै बारें दी खुश-खबरी शुणाइ-शुणाइयो डेवै, सारें भाई भौरी खुश हूरे। 4 जैबै सैं यरुश्लेमा दी पौउंचें ता तिनकरु सारी कलीसिया, चलै और कलीसिया रै मुख्यें लोग तिउंरें कु खुशी कौरि मिलै, तिउंरें तिउंरें बोलौ कि परमेश्वरें तिउंरें आइलें केती बौडै-बौडै काम किए ई। 5 पर फरीसिऊ रैं गुटा मांझीया कु जुणीए विश्वास कियौ थौ, तिउंरें मांझीए कु कुछ लोगुए उठीयो बोलौ, “तिउंरें खतना कौरनैं री और मुसा रै कानून मानणें रौ हुकम दैणौ चांई।” 6 एजी बुशा माथें विचार कौरना लै चलै (प्रेरित) और स्याणें लोग कौडै हूरे। 7 तैबै भौरी बुशु बासीए पतरसैं खौडै हुइयो तिउंरें बोलौ, “ओ भाईओ तुमैं जाणा ई कि भौरी बौगत पैहलें ओउलें परमेश्वरें हाऊं चुनौ ऊ, ताकी दुजी जाती रै लोग मरैं मुआ कु परमेश्वर वचन शुणीयो विश्वास कौरा। 8 जिऊ पौरखुणें वालें परमेश्वरें तिउंरें भी आमु जिणी पवित्र आत्मा देइयो तिउंरें गवाही देइ; 9 और विश्वासा रै कारण तिउंरें जिऊ शुद्ध कौरियो आमु और तिउंरें कोई भी फर्क नाई छाडौ। 10 आबै तुमैं कैलें पौरखा ई परमेश्वर, कि चलेऊ रैं औडै माथें एती भार छाडौ, जास ना आमारें नान-बुडें चुंगी सौका थें, और ना आमैं चुंगी सौकदै? 11 बल्कि आमारो ता इणौ विश्वास आ कि जिणौ, प्रभु यीशु री बौडी दया कौरिए आमारो छुटकारो हुआ आ, तिणी तिउंरें भी छुटकारो हुआ आ।” 12 तैबै सारी खुम्बली रैं लोग चुटकचार पौलुस और बरनबासा री शुणदै लागै, कि परमेश्वरें तिउंरें ज़रीयें किणें बौडै-बौडै और नोखैं-नोखैं काम किए ई। 13 जैबै सैं चुटक थाकें ता याकुबें बोलौ, “ओ भाईओ मेरी शुणौ। 14 शमौनैं बोलौ, कि सारेऊ कु पैहलें परमेश्वरें दुजी जाती रैं लोगु माथें किणी दया की आ कि तिउंरें मांझीया कु काई लोग आपु कालें चुने ई। 15 इयें बुशें तीणी सी, जिणौ पुराणें गुरु री किताबी दी आ लिखौ औन्दौ, 16 “एथ बासीए हाऊं तौरें आशीयो दाऊदा रौ ढौलौ औन्दौ घौर चाणाऊ, तेथरी दवाली दुबारौ चाणा ऊ, तेस खौडौ कौराऊ, 17 एथीलें ताकी बौचें औन्दै दुजी जाती रैं लोग जो मरैं ई सैं प्रभु लोडा, 18 इणौ सेजौ प्रभु बोला आ जुण धौतरी रैं पैहला कु इउं बुशु री खौबर पौउंचावा आ।” 19 एथीलें मरैं विचार इणौ आ कि दुजी जाती मांझीया कु जुण लोग परमेश्वर भीलें मुडा ई, आमुए तिउंरें लै दुःख नाई चांई दैणें; 20 बल्कि तिउंरें लै इणौ चांई लिखीयो भेजणौ कि, सैं मुरती लै च़डाओ औन्दौ खाणौ नाई खा, और गान्दै काम ना कौरा, ना गौलें फैचै औन्दै पशु रौ मांस और ना (पौलाऊ) खून खा। 21 कैलैकि पुराणें बौगता कु मुसा रै कानुना

रौ परचार कौरनै वालै इलाकै-इलाकै दी हुआ थै। और हर आराम वालै दिना दी धर्मिक खुम्बली दी भी परचार हुआ थौ।

दूजी ज़ाती रै विश्वासिउ लै चिड्डी

22 एजी बूश सारी कलीसिया रै लोगु कै, चलेऊ और स्याणेरु कै आच्छी लागी कि आपु मांझीया कु कुछ लोगु छांटा, तिउंरें यहूदा ज़ासलै बरसबा बोला थै, और सिलास जुण भाईरु मांझीए मुख्यौ थौ छांटै और पौलुस, बरनबासा आइलै अन्ताकिया लै भेजै। 23 तिउंरें तिउंकै लिखीयौ एक चिड्डी भेजी जेथदी इणौ थौ लिखौ औन्दौ कि; "अन्ताकिया, सीरिया और किलकिया दी रौइणें वालै भाईरु लै जुण दुजी ज़ाती कु ई, आमु सारेऊ री तौरफा कु तुमुलै (ढाल) नमस्कार। 24 आमुए शुणौ कि आमु मांझीया कु कुछ लोगुए तुमु कारे आशीयौ, तुमै आपणी बुशु कौरी डौराई गौरे; और तुमारै जिऊ विश्वासा दी कमजोर हुई गौरे, पर आमुए तिउंलै हुकम नाई दैऔ थौ। 25 एथीलै आमुए एक मन हइयौ ठीक सौमझौ कि आपणें चुनै औन्दै आदमी प्यारै पौलुस और बरनबासा आइलै तुमु कारे भेजु। 26 इयें इणें आदमी ई जुणीए आपणी ज्ञान प्रभु यीशु मसीह री ताइंरें मुश्किला दी पाई आ। 27 एथीलै आमुए यहूदा और सिलास तुमु कारे भेजै ई, जुण आपणें मुंआ कौरी तुमु कारे आपणी गवाही शुणावा ई। 28 पवित्र आत्मा और आमुके एजी बूश ठीक लागी कि, जरुरी बुशा रै अलावा ओर कोई बूशा रौ भार (गौरवौ) तुमु माथें ना पाऊ; 29 कि तुमै मुरती लै चडाओ औन्दौ खाणौ नाई खाएऊ, ना गौलै फेंचै औन्दै पशु रौ मांस और ना (पौलाच) खून खाएऊ, और गान्दै कामा कु दूर रौएऊ। इऊं चिजा कु दूर रौआ लै ता तुमारौ भौलौ हुआ आ। आच्छा तैबै। 30 तैबै सै तिरु डेइयौ अन्ताकिया दी पौउंचै, और खुम्बली कौइ कौरीयौ सै चिड्डी तिउंकै देई। 31 सै तिउंरें चिड्डी पौडीयौ तिउंरें शिक्षा री बुशु कु भौरी खुश हुए। 32 यहूदे और सिलासै भी जो आपु भविष्यवक्ता थै, भौरी बुशु कौरीयै भाईरु लै शिक्षा देइयौ तिउंरें रौ जिऊ मजबूत कियौ। 33 सै कुछ दिना ज़ाऊं तिउंरें रौइयौ, भाईरु कु शान्ती कौरीयै तिरु आपणी जागहा लै डेवै जिदरु सै भेजै औन्दै थै। 34 पर सिलासा कै तिउंरें रौउणौ आच्छौ लागौ 35 पर पौलुस और सिलास रौए अन्ताकिया दी : और ओरी भौरी लोगु आइलै प्रभु रै वचना री शिक्षा दैदैं और खुश-खबरी शुणाउंदैं थाकै लागी।

पौलुसा रौ दूजी बारै प्रचार दी डेउणौ, पौलुस और बरनबासा री आपु माँ अणबण

36 कुछ दिना बासीए पौलुसै बरनबासा लै बोलौ, "जेजै-जेजै इलाकै आमुए प्रभु रौ वचन शुणाओ थौ, चाल, तौंरें तिउंरें कारे डेइयौ तिउंरें देखुलै कि सै किये ई?" 37 तैबै बरनबासै यहूदा ज़ासलै मरकुस भी बोला ई आपु आइलै निणें रै बारै दी सुंचौ। 38 पर पौलुसै सेऊ जुण पंफूलिया दी तिउंकु अलग हुई गौ थौ, और कामा दी तिउंरें आइलै नाई डैऔ, सेऊ साथा दी निणौ ठीक नाई सौमझौ। 39 और लोग इणौ लागै बोलदैं कि इयें दुई गौरे अलग हुई; और बरनबास मरकुसा नी ई औ किशती दी साइप्रसा लै डैऔ। 40 और पौलुसै चुनौ सिलास आपु आइलै, भाईउरें सेऊ प्रभु रै हाथा दी सौंभालौ तैबै सै तिरु निकली गौरे। 41 और सेऊ कलीसिया रै लोगु विश्वासा दी मजबूत कौरीयौ सीरिया और किलकिया बाटीयै डैऔ।

पौलुसा रौ तिमुथियुस साथई निणौ

16 तैबै सेऊ दिरबे और लुस्त्रा दी भी डैऔ। तिउंरें तिमुथियुस नांवा रौ एक चेलौ थौ, सेऊ कास विश्वासी छेउडी रौ छेहरु थौ, पर तेसरौ बाब थौ यनानी। 2 सेऊ लुस्त्रा और इकुनियुमा रै भाईरु मांझीए सारेऊ कु भौलौ और आच्छौ आदमी थौ। 3 पौलुस तेस आपु आइलै निणौ चाह थौ; और जो यहूदी लोग सेजी जागहा दी थै तिउंरें कारण पौलुसै तिमुथियुसा रौ खतनौ कियौ, कैलैकि सै सारै जाणा थै कि तसरौ बाब युनानी थौ। 4 तैबै सै तिरु इलाकै-इलाकै दी डेइयौ तिउंरें हुकम (शिक्षा) शिखाउंदैं लागै जो यरुशेमा रै चलेउरें और स्याणेरुए चाणी थी। 5 इणें कौरीए कलीसिया विश्वासा दी बौददै लागी और हर दिना दी गिनती दी भी भौरी बौडी।

त्रोआसा दी: पौलुसा रौ दर्शन

6 सै फ्रुगिया और गलातिया परदेशा बाटीए डै, कैलैकि पवित्र आत्मै तिउंरें एशिया दी वचन शुणाउणा लै नाई थी कौरी ऐन्दी। 7 जेबै सै मुसिया गावां दी पौउंचै, ता सै बितूनिया लै डेऊणौं चाह थै; पर यीशु री आत्मै सै डेउणें नाई दै। 8 तैबै सै मुसिया कु त्रोआसा दी आशौ। 9 तिउंरें पौलुसै राची एक सुइणौ (दर्शन) देखौ, कि एक मकिदुनिया रौ आदमी खोडौ हइयौ तेसलै औरज कौरीओ बोलदैं लागौ औन्दौ, कि "वारै मकिदुनिया दी आशीयौ आमारी मजद कर।" 10 तेस दर्शन देखणें बासीए तेबी आमुए मकिदुनिया लै डेउणें रौ फैसलौ कियौ, इणौ ज़ाणीयौ कि परमेश्वरै आमै तिउंरें खुशखबरी शुणाउणा लै ओटाएई।

फिलिप्पी दी: लुदिया रौ जिऊ बौबलियाँ

11 एथीलै त्रोआसा कु आमै पाणी री किशती दी सुमात्राके और दुजें दिनै नियापुलिसा दी आशौ। 12 तिरु आमै फिलिप्पी दी पौउंचै, जो मकिदुनिया परदेशा रौ इलाकौ आ, और रोमियों री बस्ती आ; आमै तेस इलाकै दी कुछ दिना ज़ाऊं रौए। 13 आरामा रै दिना दी आमै इलाके कु बाइरै नौई कारे इणौ सौमझीयौ डेवै थै, कि तिउंरें प्रार्थना कौरनै री जागहा मिला ली, पर तिउंरें थौ कुछ छेउडी कौठै हुई ऐन्दी, आमै तिउंरें कारे बोशीयौ बुशै लाइंदै लागै। 14 तिउंरें एक लुदिया नावां री भगतण छेउडी थी, जो थुआथीरा री एक बंगणी रौंगा रै जुडकै बेचणे वाली थी, सै थौ तिउंरें बुशु शुणदैं लागी ऐन्दी। प्रभुए तिआंरौ जिऊ खोलौ ताकी सै पौलुसा री बुशु ध्याना कौरी शुणा। 15 जेबै तिआंरें सित टौबरुए बसिस्मा निर्ऑ, तैबै तिआंरें आमुकु औरज कौरी कि, "अगर तुमै मूं प्रभु री आच्छी विश्वासी माना ई ता मैरें चालौ और तिउंरें रौएऊ," और तिआंरें आमै मौनाइयौ आपणें घोरै निरें।

पौलुस और सीलास कैदा दी

16 तैबै इणौ हुओ जेबै आमै प्रार्थना कौरनै री जागहा लै थै लागै औन्दै डेउंदैं, तैबै आमुके एक दासी मिली ज़ासदी भविष्य बोलणे वाली आत्मा थी; सै लोगु रौ भविष्य बोलीयौ आपणें मालिकु लै भौरी कुछ कमाइयौ आणा थी। 17 सै आमु और पौलुसा पिछु इणें बोलियाँ आशदैं लागी कि, "इयें आदमी परमपरधान परमेश्वर रै दास (सेवक) ई, जो आमुके छुटकारे री खुश-खबरी शुणावा ई।" 18 सै भौरी दिना ज़ाऊं इणौ थाकी कौरदैं लागी; इणौ रोज शुणी-शुणीयौ पौलुस दु:खी हुओ, और पिछाऊं फिरियाँ (मुडीयौ) पौलुसै तिउंरें बुरी आत्मा लै बोलौ, "हाऊं ताऊं लै यीशु मसीह रै नावां कौरी हुकम दियाऊ कि इणें छेउडी कु बाइरें निकुल।" और सै तिआंकु तेभी निकली गई। 19 जेबै तिआंरें मालिकुए देखौ कि आमारौ कमाई खत्म हुई गई तैबै तिउंरें पौलुस और सिलास पाकडैं और झीडी-झीडीयौ परधानु और अधीकारीऊ कारे आणे; 20 तिउंरें सै सजा देणें वालै अफसरु कारे आणे, और बोलौ, "इए यहूदी ई और आमारै इलाकै दी आशीयौ गडबडी फैलाउंदैं ई लागै औन्दै; 21 इयें इणें रिवाज और बुशै ई लागै औन्दै शिखाउंदैं जो आमु रोमी लोगु लै मानणी और आपणाउणी ठीक नाई आसती।" 22 तैबै भिडा रै लोग भी पौलुस और सिलासा रै खिलाफा दी खौडै हुए, और आफसरुए तिउंरें जुडकै चिरें और तिउंरें बँत लाइणें रौ हुकम दैऔ। 23 भौरी बँत लौआइयौ सै जेला दी पाए और सिपाई लै हुकम दैऔ कि तिउंरें चोउकीदारी कौरा। 24 सिपाई ए हुकम मानीयौ सै जेला रै भीतलै कौरमै दी निरें और तिउंरें बांगणें काठा दी शांगली दी बानै।

पौलुस और सीलासा री कैदा कु मुक्ती

25 आधी राचीए पौलुस और सिलास प्रार्थना कौरदैं और परमेश्वर रै भजन गाइंदैं थै लागै औन्दै, ओर कैदी थै लागै औन्दै तिउंरें शुणदैं। 26 तेभी अचानक एक भौडौ भुईचल आशौ और जेला री पौई हिली गई। तेभी जेला रै सारै दार खुली गौरे, और कैदीऊ री बेडी (शांगली) भी खुली गई। 27 सिपाई उठौ, और जेला रै सारै दार खुले देखीयौ सुंचौ कि सारै कैदी भागी गौरे, ता तिणीए आपणी तलवार झीडी और आपु दी लाइयौ मौरनौ चाह थौ।

28 पर पौलुसै ज़ोरै हाका देख्यो बोलौ, “(नाई डौर) आपणौ नुकसान नाई कौर केलैकि आमै सारै इदे ई।” 29 तैबै तिणीए दिवो अणाओ और भितरै डैओ, तैबै कांबी-कांबीयो पौलुस और सिलासा रै बांगणै माथै पौडौ; 30 और तिऊं बाइरै नीईओ तिउंलै बोलौ, “ओ महान गुरुओ, छुटकारै पाइणा लै हाऊं का कौरुलै?” 31 तिउंरै बोलौ, “प्रभु यीशु मसीह माथै विश्वास कर तैबै तू और तैरौ घोर छुटकारो पा ई।” 32 तैबै पौलुस और सिलासा तेसकै और तेसरै टौबरा कै प्रभु रो वचन शुणाओ। 33 राची तेभी ई तिणीए सै तिनरु नीई ओ तिउंरै जखम धोए, सिपाईए आपणै पुरै टौबरा आइलै तेभी ई बसिस्मा निंओ। 34 और तिणीए सै आपणै घोरै निरै, तिउंलै रोटी देई, तैबै सारै टौबरुए परमेश्वरा माथै विश्वास कौरीयो खुशी मनाई। 35 जैबै दिन हुओ तैबै आफसरुए सिपाइऊ कै चिडी भेजी कि तिऊं आदमी जेला कु ओरु छाडौ। 36 सिपाइए इरे बुशै पौलुसा कै बोली, कि “आफसरै तुमु जेला कु छाडनै रो हुकम देई गौ आ। एथीलै आबै निकलियो शान्ती कौरीए डैओ।” 37 पर पौलुसै बोलौ, “तिऊं रोमी आदमीउए आमै आरोपी चाणीयो आमै लोगु माझीए पिटे ई और जेला दी पाए ई, आबै का आमु इदरु चुटुकचार गाड़ा ई? इणौ नाई पर आबै सै आपु आशीयो आमु इदरु बाइरै निआ लै।” 38 सिपाईउए इरे बुशै आफसरु काए बोलौ, और सै इणौ शुणीयो कि पौलुस और सिलास रोमी ई ता सै भौरी डौरै, 39 और आशीयो तिऊं मनाउंदै लागै, और बाइरै नीईयो तिऊंकु औरज कौरी कि एस इलाके कु पोरु डैओ। 40 तैबै पौलुस और सिलास जेला कु निकलीयो लुदीया रै घोरै डेवै, और भाइऊ कु मिलीयो तिउंकै शान्ती मिली, और सै तिनरु डेवै।

थिस्सलुनीका इलाकै दी

17 तैबै सै अम्फिपुलिस और अपुल्लोनिया रै इलाकै बाटीए थिस्सलुनीके गावां दी आशै जीए यहूदिऊ री एक धार्मिक खुम्बली थी। 2 पौलुस आपणी रीती जिणौ तिऊं काए डैओ और, तिऊं आइलै चिन आराम वालै दिना झाऊं पवित्र शास्त्रा कु वाद-विवाद कौरुदे थाकौ लागी; 3 और तेथरौ मतलब तिऊं काए साफ-साफ समझावा थौ, कि मसिह रो दु:ख उठाउणौ, और मौरै औन्दै मांझीया कु जीउंदौ हुणौ, जरुरी थौ; “और एऊ यीशु जासरी हाऊं तुमुकाए बूश शणावा ऊ, मसीह आ।” 4 तिऊं मांझीया कु, और भक्त युनानिऊ मांझीया कु कई लोगुए, और भौरी मुख्य छेउडीउए, मानी गौ और पौलुस और सिलासा आइलै मिली गौए। 5 पर यहूदी गौए तिऊंकु चिडी, तिउंरै बजारा कु कुछ बुरै लोग कौडै किये और भीड कौडै कौरीयो इलाकै दी तिउंरै खिलाफ शोर-शराबा मचाउंदै लागै, और यासोना रै घौरा कु पौलुस और सिलास बाइरै गाडदै लागै। 6 पर जैबै तिउंकै पौलुस और सिलास तिरे नाई मिलै, ता तिउंरै यासोन और कुछ लोग इलाकै रै मुखे लोगु काए जिडीयो निरै, और हाकै मारीयो बोलदै लागै कि “इरे लोग जुणीए संसार उलटौ-पुलटौ कौरी गौ आ, इदँ भी आशी गौए ई। 7 यासोन सै आपणै घौरा कै छाडै औन्दै। इरे सारै इणौ बोला ई कि यीशु राजौ आ, और कैसर राजै रै हुकमा रौ विरोध कौरा ई।” 8 तिउंरै लोग और इलाकै रै मुख्य लोग इणै बोलीयो तिउंरै खिलाफ भडकाए। 9 एथीलै तिउंरै यासोन और बाकी लोगु री जमानत नीईयो सै तिनरु डेउणै दै।

बिरीया इलाकै दी

10 भाईउए तेबी राची-राच पौलुस और सिलास बिरीया लै भेजे, तिरे पौंऊंचीयो सै यहूदीऊ री धार्मिक खुम्बली दी डेवै। 11 इरे लोग जो थिस्सलुनीके रै यहूदी लोगु कु भौलै थै, और इऊंरै बड़ी खुशी कौरीए प्रभु रौ वचन अपणाओ, और हर दिना दी पवित्र शास्त्रा दी देखा थै कि इरे बुशै इणी आसती कि नाई। 12 एथीलै तिऊं मांझीया कु भौरी लोगुए, और युनानी मुख्य छेउडीऊ मांझीया कु और मौरदु मांझीया कु भौरी लोगुए विश्वास कियौ। 13 पर जैबै थिस्सलुनीके रै यहूदीऊ कै पौलौ लागौ कि पौलुस बिरीया दी भी प्रभु रौ वचन शणाउंदै आ लागौ औन्दौ ता सै तिरे आशीयो भी लोगु भडकाउंदै और विरोध कौरुदे लागै। 14 तैबै भाईउए तेबी पौलुस तिनरु समुन्दरा रै चिका झाऊं भेजौ; सिलास और तिमुथियुस छाडे तिरे आपु काए। 15 जुण पौलुसा छाडदै थै डै औन्दै तिउंरै सेऊ एथेंसा झाऊं निंओ;

तिरे पौलुसै तिउंलै हुकम दैओ कि सिलास और तिमुथियुसा लै बोलेऊ कि सै मुकाए जल्दी कु जल्दी आशा, इणै शुणीयो सै तिनरु वापस आशै।

एथेंस इलाकै दी

16 जेबी पौलुस एथेंसा दी सिलास और तिमुथियुसा जागदँ थौ लागौ औन्दौ, तिरे तेस इलाके दी भौरी मुरती देखीयो पौलुसा भौरी दुखी हुओ। 17 और पौलुस धार्मिक खुम्बली दी यहूदीऊ और भक्त लोगु आइलै, और बाटा दी जुण भी लोग पौलुसा कै मिला थै तिऊं आइलै रोज वाद-विवाद कौरा थौ। 18 तैबै इपीकुरी और स्तोईकी पंडीत लोग भी तेसकु स्वाल-जवाब कौरुदँ लागौ। कुछ लोग लागै बोलदँ “एऊ बुशुवारौ का बोलणौ चाह सा?” पर कुछ लोगुए बोलौ, “एऊ दुजै देवा रौ परचार कौरुनै वालौ जाणीया आ”, कैलैकि पौलुस यीशु रौ और यीशु रै जीउंदँ हुणै रौ परचार कौरा थौ। 19 तिउंरै पौलुस आपु आइलै अरियुपगुसा री खुम्बली दी नियो। और तिरे तेसकु पुछौ, “कि आमुकै बोल जो तू शिक्षा दियाई इरे कासरै बारे दी आ? 20 कैलैकि तू आमुकै नोखी बुशै शणावा ई एथीलै आमै जाणनौ चाई कि एथरौ मतलब का सा।” 21 (कैलैकि सारै एथेंसा रै लोग और परदेसी जो इदँ रौआ ई सै नई-नई बुशै बोलनै और शणुनै रै सिवाय केजे भी कामा दी आपणौ भोगत नाई बितावा थै।)

अरियुपगुसा री खुम्बली दी पौलुसा रौ भाषण

22 तैबै पौलुसै खुम्बली रै बिचा दी खौडै हुइयो बोलौ, “ओ एथेंसा रै लोगुओ, हाऊं देखाऊ कि तुमै हर बुशा दी देवा रै भौरी मानणै वाले ई। 23 कैलैकि मुइयै आपणुदी बारे तुमरै पुजणै री जागह देखी, ता मुइयै एक इणी वेदी भी देखी जेथदी इणौ थौ लिखौ औन्दौ कि, ‘अणजाणै इश्वरा लै।’ एथीलै जास तुमै बिण जाणै पुजा ई हाऊं तुमु कै तेसरै बारे दी खुश खबरी शणावा ऊ। 24 जुणी परमेश्वरै धरती और धरती री सारी चिजे चाणी ई, सेऊ सौरगा रौ मालिक हुइयो, हाथा रै चाणै औन्दै मन्दिरा दी नाई रौडंदौ; 25 ना केजी चिजा री जरुरता रै कारण आदमी रै हाथा कु आपणी सेवा कौराउंदौ, कैलैकि सेऊ आपु सारेऊ कै जीन्दगी और सांस और सब कुछ दिया आ। 26 तिणीए एकी आदमी कु सारी ज़ाती धौतरी माथै रौइणा लै चाणी आ; और तिणीए तिऊंरौ भोगत फिक्स, और रौइणै री जागह री भी मंड लाइ ऐन्दी, 27 ताकी सै परमेश्वर लोडा, और सेऊ तिउंकै लोडीयो मिला, तैबै भी सेऊ आमु मांझीया कु कासी कु भी दूर नाई आसतौ। 28 कैलैकि आमै तेसीदी जीउंदँ, चालदँ-फिरदँ और खोडै रौई ई; जिणौ कि तुमरै कुछ आपणै कवीउए भी बोलौ आ कि, ‘आमै ता आपु भी तेसी री सन्तान ई।’ 29 परमेश्वरा री सन्तान हुइयो आमुए इणौ नाई समझणौ चाई कि परमेश्वर सुनै, रुपै और पात्थरा जिणौ नाई आ, जो आदमीऊ रै सोचा कौरौ और कारीगरी कौरौए हुआई चाणै औन्दै। 30 एथीलै परमेश्वरै अग्यान्ता रै भोगता माथै ध्यान नाई दैओ, पर आबै हर जागह दी सारै आदमीऊ लै मन बदलनै रौ हुकम दिया आ। 31 कैलैकि तिणीए एक भोगत आ पाकौ कियो औन्दौ, जेथदी सेऊ एक आदमी कौरीयै धर्मा कौरी धौतरी रौ फंसलौ कौरा आ, जो तिणीए पाकौ कियो औन्दौ, और तिणीए सेऊ मौरै औन्दै मांझीया कु जीउंदौ कौरीयो एजी बूश सारेऊ काए साबीत कौरी गोई। 32 मौरै औन्दै कु जिउंदँ हुणै री बुशै शुणीयो कुछ लोग ता मजाक कौरुदे लागै, और कुछ लोगुए बोलौ, कि “एजी बुशै आमै ताऊंकु दुजी बारै शुणी ई।” 33 एथ माथै पौलुस तिऊं मांझीया कु उठीयो निकली गौ। 34 पर तिऊं मांझीया कु कुछ लोग तेस आइलै मिली गौए, और विश्वास कियो; जेथ मांझीए दियुनुसियुस अरियुपगुसा रै गुटा रौ थौ, और दमरिस नावां री एक छेउडी थी, और तिऊं आइलै ओर भी लोग थै।

कुरिन्थुस इलाकै दी

18 तेथ बासीए पौलुस एथेंसा छाडीयो कुरिन्थुसा दी आशौ। 2 तिरे तेसकै अक्विला नावां रौ एक यहूदी मिलौ, जासरौ जनम पुन्तुसा दी हुओ थौ। सेऊ आपणी छेउडी प्रिस्किल्ला आइलै इटली कु कुछ भोगत पैहलै ही आशौ थौ, कैलैकि क्वौदियुसै सारै यहूदीउ लै रोम देश छाडनै रौ हुकम देई

गो थौ, एथीलै पौलुस तितरै कारे डैओ।³ कैलैकि पौलुस और तेसरौ एक जिणौ काम थौ, एथीलै सेऊ इऊं आइलै रौ ओ, और सै कामा कौरदै लागै; तितरौ काम ताम्बु चाणनै रौ थौ।⁴ पौलुस हर आराम वालै दिना दी धार्मिक खुम्बली दी डेइयौ सवाल-जवाब कौरीयौ यहूदीऊ और युनानीऊ भी सौमझावा थौ।⁵ तैबै सिलास और तीमुथियुस मकिदुनिया कु वापिस आशै, पर पौलुस वचन शुणाउंदै और यहूदीऊ कै गवाही दैदैं थाकौ लागी कि यीशु ही मसीह आ।⁶ पर जैबै सै विरोध और बेइज्ती कौरदै लागै, ता पौलुस आपणै जुड़कै चिरियौ तितलै बोलौ, "तुमारौ खून (पाप) तुमारै ओठै माथे चाई पौडौ! हाऊं निर्दाश ऊ। आबै हाऊं दुजी ज्ञाती रै लोगु कारे डियाऊ।"⁷ तितरु सेऊ तितुस यूस्तुस नावां रै परमेश्वरा रै भन्ता रै घोरै आशौ, ज़ासरो घोर धार्मिक खुम्बली कारे थौ।⁸ तैबै धार्मिक खुम्बली रौ मुख्य क्रिसपुस आपणै सारै टौबर आइलै प्रभु माथे विश्वास कियौ; और भौरी कुरीन्थयु रै लोगुए शुणीयौ विश्वास कियौ और बसिसमौ नियौ।⁹ प्रभुए एकी राचीए पौलुसा कै दर्शन देइयौ बोलौ, "डौर नाई बोलदैं थाक लागी चुटुक ना थाक;¹⁰ कैलैकि हाऊं ताऊं आइले ऊ, और कोई ताऊं माथे हामलै कौरीयौ ताउंलै नुकसान नाई पौउंचाऊंदौ कैलैकि एजै इलाके दी मैरै भौरी लोग ई।"¹¹ एथीलै सेऊ तितुं माझीए तितुकें वचन शिखाउंदै देउडी साला ज़ाऊं रौ ओ।¹² जेबी गल्लीयो अखाया देशा रौ आफसर थौ, ता यहूदी लोगुए कौडै हुइयौ पौलुसा माथे हामलौ कियौ, और सेऊ फैसलै कौरने री ज़ागहा दी आपणीयौ बोलदैं लागै,¹³ "एऊ लोगु कै सौमझावा की परमेश्वरा री बौडाई इणी चाई कौरणी, जो कानुना रै खिलाफ आ।"¹⁴ जेबी पौलुस बोलने वालौ थौ, ता गल्लीयो आफसररै यहूदीऊ लै बोलौ, "ओ यहूदीऊओ, अगर इयै बुरी और गलत बूश हुआ थी, ता हाऊं जरूर तुमारी शुणा थौ।¹⁵ पर अगर इयौ झौगडौ सिरफ बोलीयौ, नावां रौ, और तुमारै नियमा रै बारे दी आ ता तुमै जाणौ; कैलैकि हाऊं इऊं बूशु रौ फैसलै कौरने वालौ नाई बौणनौ चाहदौ।"¹⁶ और तिणीए सै तितरु पोरु गाडाई गौए।¹⁷ तैए सारै लोगुए धार्मिक खुम्बली रौ मुख्य सोस्थिनेस फैसलै कौरने री ज़ागहा दी पिटौ। पर गल्लियो आफसररै इऊ बूशु री कोई फिकर नाई की।

अन्ताकिया लै वापिस डेऊणौ

¹⁸ पौलुस भौरी दिना ज़ाऊं तिरे रौ ओ, तैबै भाईऊ कु मिलीयौ किफ्रिया दी एथीलै मूंड कुंडाओ, कैलैकि तिणीए मन्नत थी मांगी ऐन्दी, और किशती दी सीरिया इलाके लै डैओ तेस आइलै साथा दी प्रिस्केला और अक्विला थै।¹⁹ तिणीए इफिसुस पौउंचीयो सै छाडै तिरे, आपु लागौ धार्मिक खुम्बली दी डेइयौ यहूदिऊ आइलै सवाल जवाब कौरदै।²⁰ जैबै तितरै तेसकु औरज कौरि कि, "आमु आइलै कुछ दिना दी औजौ रौऊ।" ता तिणीए नाई मानौ।²¹ पर इणै बोलीयौ तितरु डैओ कि, "अगर परमेश्वर चाहा लौ ता हाऊं तुमु कारे दुबारौ आशा ऊ।" तैबै सेऊ इफिसुसा कु किशती दी बोशीयौ डैओ;²² और कैसरिया दी पौउंचीयो (यरुशेमा लै डैओ) और कलिसिया रै लोगु कु मिलीयो अन्ताकिया लै डैओ।

पौलुसा रौ चीजी बारै प्रचारा दी डेऊणौ

²³ तैबै कुछ दिना दी रौइयौ तितरु निकलियौ गलातिया और फ्रूगिया परदेशा दी सारै चलै विश्वासा दी पाकै कौरदै थाकौ लागी।

इफिसुस इलाकै दी अपुल्लोस

²⁴ अपुल्लोस नावां रौ एक यहूदी ज़ासरो जनम सिकन्दरिया दी हुआ थौ, जो ज्ञानी आदमी थौ और पवित्र शास्त्र आच्छा कौरि ज्ञाणा थौ, सेऊ इफिसुसा दी आशौ।²⁵ तिणीए प्रभु री बाटा री शिक्षा थी पाई ऐन्दी, और जिवा लाइयौ यीशु रै बारै दी ठीक-ठीक शुणावा और शिखाडा थौ, पर सेऊ सिरफ यहून्ना रै बसिस्मा री बूश ज्ञाणा थौ।²⁶ सेऊ धर्मिक खुम्बली दी निडर हुइयौ बोलदैं लागौ, पर प्रिस्केल्लै और अक्विल्लै तेसरी बुशु शुणीयो सेऊ आपणी भीलै नियौ और परमेश्वरा री बाट तेसकै औजौ भी ठीक-ठीक समझाई।²⁷ जेबी तिणीए सुंची गो कि पारबिलै डेइयौ अखाया लै डेऊणौ, ता भाइए तेसकै हिम्मत देइयौ च़ेलेऊ लै लिखौ कि सै तेसकु आच्छा कौरि

मिला; और तिणीए तिरे डेइयौ तितुं लोगु री भौरी मज़द की जुणीए बड़ी दया रै कारण विश्वास कियौ थौ।²⁸ कैलैकि सेऊ पवित्र शास्त्रा कु सबूत देइ देइयौ कि यीशु ई मसीहा आ, बड़ी हिम्मती कौरि यहूदीऊ कै सारैऊ रै सामनै थौ लागौ ओन्दौ जवाब दैदैं।

इफिसुस इलाकै दी पौलुस

¹⁹ जेबी अपुल्लोस कुरिन्थुसा दी थौ ता पौलुस माथले सारै परदेशा बाटीए इफिसुसा दी आशौ। तिरे तेसकै कुछ च़ेले मिलै।² तिणीए तितुंलै बोलौ, "का तुमुए विश्वास कौरदी बारै पवित्र आत्मा पाओ आ?" तितरै तेसलै बोलौ, "आमुए ता पवित्र आत्मा री बुशै भी नाई शुणी।"³ पौलुस तितुंलै बोलौ, "तैबै तुमुए कासरो बसिस्मौ नियौ आ?" तितरै बोलौ, "यहुन्ना रौ बसिस्मौ।"⁴ पौलुस तितुंलै बोलौ, "यहुन्ना ता इणै बोलीयो न बदुलनै रौ बसिस्मौ दैओ, कि जो मूं बासीए आशणै वालौ आ, मतलब यीशु माथे विश्वास कौरैऊ।"⁵ इणौ शुणीयो तितरै प्रभु यीशु रै नावां रौ बसिस्मौ नियौ।⁶ जैबै पौलुस तितुं माथे हाथ छाडै ता पवित्र आत्मा तितुंकी आशौ और सै अलग-अलग बोली बोलदैं और भविष्यवाणी कौरदै लागै।⁷ इए सारै लगभग बारह आदमी थै।⁸ सेऊ धार्मिक खुम्बली दी डेइयौ चिन मिहनै ज़ाऊं बिण डौरै थाकौ बोलदैं लागी, और परमेश्वरा रै राजा रै बारे दी बुशै लाइदैं और सौमझाऊंदै थाकौ लागी।⁹ जैबै कुछ लोगुए काडै हुइयौ तेसरी नाई मानी पर लोगु मांझीए तितरै बारे दी बुरी बोलदैं लागै ता, तिणीए सै पोरु छाडै, और च़ेले अलग किये, और हर दिनै तितुं आइलै तुरन्नुसा री पाठशाला दी स्वाल-जवाब कौरा थौ।¹⁰ दुई साला ज़ाऊं इणी थाकौ हुन्दै लागी, इदरा ज़ाऊं कि आसिया दी रौइणै वाले का यहूदी का युनानी सारैउरे प्रभु रौ वचन शुणौ।¹¹ परमेश्वर पौलुसा रै हाथा कौरि शक्ति वालै नोखै काम देखावा थौ।¹² इदरा ज़ाऊं कि रुमाल और जुड़कै लोग तेसदी छुआइयौ बिमारु माथे छाडा थै और तितरै बिमारी खतम हुआ थी और बुरी आत्मा भी तितुंउ पोरु भागा थी।¹³ पर कुछ यहूदी जुण जादु टोणे कौरा थै, सै इणौ लागै कौरदै ज़ासदी बुरी आत्मा हुआ थी तितुं माथे प्रभु यीशु रै नावां कौरि फुकरा थै और बोला, थै कि जेथरौ परचार पौलुस कौरा, हाऊं तुमुकै तेसी री कसम दिया ऊ।¹⁴ सिक्कवा नावां रै एक यहूदी परधान याजका रै सात छोहरु थै जुण इणौ कौरा थै।¹⁵ पर बुरी आत्मै तितुंलै जवाब दैओ कि, "यीशु हाऊं ज्ञाणा ऊ और पौलुस भी पराणा, पर तुमै कुण ई?"¹⁶ तैबै सेऊ आदमी ज़ासदी बुरी आत्मा थी तितुं भिलै पौडौ और सै आपणै वशा दी किये और इणै पोथे कि सै तेस घोरु कु नांगै और घायल हुइयौ भागै।¹⁷ इए बुशै इफिसुसा दी रौइणै वाले सारै यहूदी और युनानीऊ कै भी पौतौ लागी, और सै भौरी डौरि गौए; और प्रभु यीशु रै नावां री बौडाई हुन्दै लागी।¹⁸ जुणीए विश्वास कियौ थौ तितुं मांझीया कु भौरी लोगुए आशीयो आपणै काम मानी गौए और परगट किये।¹⁹ जादु कौरनै वालेऊ मांझीया कु भौरीउरे आपणी-आपणी पोथी कौडै कौरियो सारैऊ कारे ज़ाली, जैबै तितरै तेथरै पैसै जोडै ता पचास हजार च़ांदी रै सिकेऊ रै बराबर निकलौ।²⁰ इणै कौरि प्रभु रौ वचन शक्ति कौरिए फ़ैलदैं लागौ और काम कौरदै लागौ।²¹ जैबै इयै बुशै हुई गौई ता पौलुस आत्मा दी शुंची गो कि मकिदुनिया और अखाया बाटीए यरुशेमा ले डेऊ, और बोलौ, "तिरे डेइयौ मुइए रोम देखणौ भी जरुरी आ।"²² एथीलै आपणी सेवा कौरनै वालेऊ मांझीया कु तीमुथियुस और इरास्तुस मकिदुनिया भेजीयो आपु कुछ दिना ज़ाऊं आसिया दी रौई गौ।

इफिसुसा दी झौगडौ

²³ सेजे बौगै एजे पंथा रै बारै दी बौडौ शोर-शराबो हुआ।²⁴ कैलैकि देमेत्रियुस नावां रौ एक सुनार अरतिमिसा रै च़ांदी रौ मन्दिर च़ौणाइयो कारीगरु कै भौरी काम दिलावा थौ।²⁵ तिणीए सै और इणै काम कौरनै वाले कौडै कौरियो बोलौ, "ओ आदमीउओ, तुमै ज्ञाणाई कि एस काम कौरना लै आमुलै केती पैसै मिलाई।²⁶ तुमै देखा और शुणा ई कि सिरफ इफिसुसा दी नाई, बल्की सारै आसीया दी इणै बोलीओ पौलुस सौमझाए और बहकारे कि जो हाथा री कारिगरी आ सेऊ ईश्वर नाई आ।²⁷ एथ कौरि आबै सिरफ एथीरौ डौर नाई भी नाई कि आमारौ एऊ काम खतम हुआ पर एऊ भी कि

3 जेबे साइप्रस दिशदै लागौ ता, आमुए सेऊ उलटी भिलै छाडौ, और सीरिया लै डेइयौ सूरु दी उत्तर; कैलैकि तिए किशती कु समान उतारनौ थो। 4 चलेऊ कु मिलीयौ आमे तिए सात दिना झाऊं राए, तितउं आत्मा कु शिखीयौ पौलुसा लै बोलौ कि यरुशेमा दी नाई डेवेऊ। 5 जेबी सै दीन पुरै हुई गौए, ता आमे तिवरु डेई गौए; और सारेउए, छेउडी और छोहरुए आमे इलाके कु बाइरै झाऊं पाउंचाए; और आमुए ढिका काए धौनी झुकियो प्राथना की। 6 तैबे एकी दुजै कु मिलणै बासीए, आमे किशती दी चोई और सै डेवे आपणै-आपणै घोरै। 7 तैबे आमे सूर देशा कु किशती रौ सफर पुरौ कौरीयो पतुलिमयिसा दी पाउंचै और भाईऊ कु मिलीयो तितुं आइलै एकी दिना दी राए। 8 दुजै दिन आमे तिवरु डेइयो कैसरिया दी आशै, और फिलीपुस परचार कौरनै वालै रै घौरा कै जुण साता मांझीया कु एक थो डेइयो तेसरै काए राए। 9 तेसरी चार बिण ब्याही छोटुडी थी, जुण भविष्यवाणी कौरा थी। 10 जेबे आमे भौरी दिना झाऊं तिए राए, ता अगबुस नावां रौ एक भविष्यवक्ता यहूदीया कु आशौ। 11 तिणीए आमु काए आशीयो पौलुसा रौ गाचौ नियौ और आपणै हाथ-बागणै बानीयो बोलौ, “पवित्र आत्मा इणौ बोला आ, कि जास आदमी रौ इयो गाचौ आ तेस यरुशेमा दी यहूदी इणौ बाना ई और दुजी जातीऊ रै हाथा दी सौंभाला ई। 12 जेबी आमुए इयै बुशै शुणी ता आमे और तिवलै लोगुए तेसकु औरज कौरि कि यरुशेमा लै नाई डेवे। 13 पर पौलुसै जवाब दैओ तुमै का कौरा ई कि लेरी-लेरीयो मैरौ जीऊ चोडाई, हाऊं ता प्रभु यीशु रै नावां री ताइए यरुशेमा दी बानीणा लै नाई बल्की मौरना लै भी तयार ऊ। 14 जेबे तिणीए नाई मानौ ता आमे इणै बोलीयो चुटुक थाकी गौए कि प्रभु री मौरजी पुरी हुआ। 15 इऊं दिना बासीया आमुए तयारी की और यरुशेमा लै चाल पाई। 16 कैसरिया कु भी कुछ चैलै आमु आइलै चाल पाई और आमे मनासौन नावां रै साइप्रसा रै एक चले रै काए नियै और आमे तेसरै काए थाकै।

पौलुसा री याकुबा आइलै मुलाकात

17 जेबी आमे यरुशेमा दी पाउंचै ता भाई बडी खुशी कौरि ए आमुकु मिलै। 18 दुजै दिन पौलुसै आमे याकुबा काए निणै, जिणै सारै स्याणै कौडै थै। 19 तैबे तिणीए तितुंके ढाल कौरिओ जो-जो काम परमेश्वरै तेसरी सेवा कौरि ए दुजी जाती मांझीए किए थै सै सारै बारी-बारीए बोलै। 20 तितउं इणै शुणीयो परमेश्वरा री बांझाई की ई, तैबे तेसलै बोलौ, ओ भाई तू देखा ई कि यहूदीऊ मांझीया कु काई हज्जारुए विश्वास कियो आ, और सारै नियमा री ई बुशै ला ई। 21 तितुंके तैरे बारै दी शिखाओ औन्दौ कि तू दुजी जाती दी रौइणै वालै यहूदीऊ कै मुसा छाड़नै रै बारै दी शिखावा ई और बोला ई कि ना आपणै लोलडेऊ रौ खतना कौराओ, और ना रिवाज मानौ। 22 तैबे का कौरुलै लोग जरुरी शुणा ई कि तू आशौ औन्दौ ई। 23 एथीलै जो आमे ताउंके बोली ई तेस कर, आमुकै इदै चार आदमी ई जुणीए मन्नत मांगी एन्दी। 24 तितुं निर्इयो तितुं आइलै आपु तू शुद्ध ऊ। और तितुंके खौरि दै ताकी सै आपणै बाल कटावा, तैबे सारै जाणा ई कि जो बुशै तितुंके तैरे बारै दी बोली एन्दी तितुंकी कोई सच्च्चाई नाई आ पर तू आपु भी कानून मानीयो तितुं जिणौ हाण्डा ई। 25 पर तितुं दुजी जाती रै बारै दी जुणीए विश्वास कियो आ आमुए इणौ फैसलौ कौरिओ लिखौ आ कि सै मुतिऊं काए बली कौरै औन्दे मास और खुना कु, और गौलै फेंचै औन्दे मासा कु, और गान्दै कामा कु बौची रौआ। 26 तैबे पौलुसै तितुं आदमीऊ नी इयो और दुजै दिन तितुं आइलै शुद्ध हुइयो परमेश्वरा रै घौरा दी डैओ। और तिए बोली गौ कि शुद्ध हुणै रै दिना ई मतलब तितुं मांझीया कु हर एकी लै कुछ चोड़ाउणै रै दीन केबी झाऊं पुरै हुआई।

परमेश्वरा रै घौरा दी पौलुस पाकुडनौ

27 जेबी सै सात दिन पुरै हुणै वालै थै, तैबे आसिया रै यहूदीऊ ए पौलुस परमेश्वरा रै घौरा दी देखीयो सारै लोग चितलाए और हाकै देइयो सेऊ पाकडी गौ। 28 ओ इस्राइलीऊओ आमारी मजद कौरौ एऊ सेजौ आदमी आ जो लोगु और कानुना रै और इयै जागहा रै विरोधा ई सारी जागहा दी सारै लोगुकै शिखावा आ, इदरा झाऊं कि युनानीऊ भी परमेश्वरा रै घौरा दी

आणीयो तिणीए इयै पवित्र जागहा अशुद्ध कौरि आ। 29 तितउं एथुकु पैहलै इफिसुसा रै लोग तुफिमस तेस आइलै इलाकै दी देखौ थो, और सै सौमझै कि पौलुसै सेऊ परमेश्वरा रै घौरा दी आणौ आ। 30 तैबे सारै इलाकै दी हाललौ पोडी गौ और लोग फेटी मारीयो कौडै हुए और पौलुस पाकडीयो परमेश्वरा रै घौरा कु बाइरै घीशीयो आणौ, आपु किए फेटी दार बन्द। 31 जेबे सै तेस झाणौ चाहा थै ता तितउं मुख्य कै खबर पाउंची कि सारै यरुशेमा दी हाललौ पोडी गौ आ। 32 तैबे सेऊ फेटी ई फौजीऊ और सुबेदार नीईयो तितुं काए तौलै दौडीयो आशौ, और तितउं मुख्य और फौजीऊ देखीयो पौलुस पिटणौ छाडी गौ। 33 तैबे मुख्य नजदीक आशीयो सेऊ पाकडौ और दुई शांगली कौरि बानणै रौ हुकम देइयो पुछदै लागौ कि इयो कुण आ और इणीए का कियो आ? 34 पर भिडा मांझीया कु कुण कुछ बोलदै लागौ और कुण कुछ, जेबे हाललै रै कारण तेसकै सौच्यै पौतौ नाई लागी, तैबे तिणीए सेऊ एखुले दी निणै रौ हुकम दैओ। 35 जेबे सेऊ पैडीउ दी पाउंचौ ता इणौ हुओ कि भीडा रै दबाअ रै कारण फौजीउए सेऊ चुंगीयो पा निणौ पाई। 36 कैलैकि लोगु री भीड हाललौ पाइदै लागी कि एस पोर झाणौ। 37 जेबे सै पौलुस एखुलै दी निणै वालै थै ता तिणीए पलटना रै मुख्य लै बोलौ कि का मुलै इजाजत आसती आ कि हाऊं तुमुकै कुछ बोलु, तिणीए बोलौ, का तू युनानी जाणा ई? 38 का तू सेजौ मिस्री नाई जो इबकु पैहलै बन्दी चाणीयो चार हजार लोग लाइणी दी जांगला दी निणै? 39 पौलुसै बोलौ, हाऊं ता तरसुसा रौ यहूदी आदमी ऊ किलकिया रै जानै-मानै इलाकै रौ आदमी ऊ। हाऊं ताऊं कु औरज कौरा ऊ कि मूं लोगु आइलै बुशै लाइणै दै। 40 जेबे तिणीए हुकम दैओ ता पौलुसै पैडीऊ दी खौडी हुइयो लोगु कै हाथा कौरि इशारौ कियो जेबे सै चुटुक रौई गौए ता सेऊ इब्रानी बोली दी बुशै लाइंदै लागौ।

भीडा रै सामने पौलुसा रौ भाषण

22 “ओ भाइयो और स्याणैउओ मैरौ जवाब शुणौ, जो हाऊं आबै तुमु काए बोला ऊ।” 2 सै इणै शुणीयो कि एऊ आमु आइलै इब्रानी बोली दी पा बोला आ, सै औजौ चुटुक थाके। तैबे तिणीए बोलौ : 3 “हाऊं ता यहूदी आदमी ऊ, जो किलकिया रै तरसुसा दी पैदौ हुओ ऊ; पर एजै इलाकै दी गमलियला रै बांगणेऊ काए बोशीयो पाईऊ ऊ, और नाना बुडु रै नियम कानून आछा कौरि शिखे ई; और परमेश्वरा लै इणौ जोशीलौ थो जिणै आज तुमै ई। 4 मुइयै मरद का छेउडी दुइया बानी-बानीयो जेला दी पाए, और एजै (पथा) रै लोग इणै सताए कि कुछ ता पोरु भी झगाए। 5 एजी बुशा लै बाँडै याजक और सारै स्याणै शाजत ई, कि तितुंकु हाऊं भाईऊ रै नांवा री चिह्नी नीईयो दमिशका लै थौ लागौ औन्दौ डेउंदे, कि जो तिए औलै तितुं भी सजा दैणा लै बानीयो यरुशेमा लै आणु।

आपनै जिऊ बौदलिणा रै बारै दी शुणाउणौ

(प्रेरितौ 9:1-19; 26:12-18)

6 जेबी हाऊं हांडदै-हांडदै दमिशका रै नजदीक पाउंचौ, ता इणौ हुओ कि खौरै दुसै रै बोगतै देखण देखदु एक बाँडौ प्याशौ सौरगा कु मुं फिदियालै चौमको। 7 और हाऊं जमीना माथे धौनी लोटौ, और इणौ बोलदै शुणौ, ‘ओ शाऊल ओ शाऊल तू मुं कैलै सतावा ई?’ 8 मुइयै जवाब दैओ, ‘ओ प्रभु तू कुण ई?’ तिणीए मुलै बोलौ, ‘हाऊं यीशु नासरी ऊ जास तू सतावा ई।’ 9 मैरै साथा रै लोगुए प्याशौ ता देखौ पर जो मुं आइलै बुशै लाइंदै थौ लागौ औन्दौ तेसरौ बोलणौ नाई शुणौ। 10 तैबे मुइयै बोलौ, ‘ओ प्रभुआ हाऊं का कौरु?’ प्रभुए मुलै बोलौ, ‘उठीयो दमिशका लै डेऊ और जो कुछ तैरे कौरनै रौ औलौ तिए ताउंके सब बोलणौ आ।’ 11 तैबे तेस बाँडै प्याशै री वजाह कु मुकै कुछ ना दिशौ हाऊं आपणै साथीऊ रै हाथा पाकडीयो दमिशका लै आशौ। 12 “तैबे हनन्याह नावां रौ एक नियम कानुना रै कारण भोगत, जो तिए रौइणै वालै यहूदीऊ मांझीया कु जानौ-मानौ थो, मुकाए आशौ, 13 और खौडै हुइयो मुलै बोलौ, ‘ओ भाई शाऊल आबै देखदै लाग।’ तेबी मेरी आखी खुली गोई और मुइयै सेऊ देखौ। 14 तैबे तिणीए बोलौ, ‘आमारै नाना-बुडु रै परमेश्वरै तू एथीलै छांटो ई ताकी तू तेसरी इच्छा जाणा, और तेस धर्मी देखा और तेसरै मुआ

कु बुशै शुणा। 15 कैलैकि तू तेसरी तरफा कु सारै लोगु मांझीयै इऊं बुशु रौ गवाह हुणो ई, जो तारै देखी और शुणी ई। 16 आबे बेर कैलै पा ई उठ बसिस्मो निऊं, और तेसरौ नाऊं नीईयौ आपणै पाप धोऊ।

दूजी जातिउ लै प्रचारा लै बोलणौ

17 “जैबे हाऊं तोएँ यरुश्लेमा दी आशीयो परमेश्वरा रै घोरा दी प्राथना कोरदें थौ लागौ औन्दौ तैबे हाऊं बेहोश हुओ, 18 और मुइयै प्रभु देखौ कि सेऊ मुलै बोला आ, ‘फेटी यरुश्लेमा कु जल्दी निकुल; कैलैकि सै मरै बारै दी तेरी गवाही नाई मानदें।’ 19 मुइयै बोलौ, ‘ओ प्रभु सै ता आपु जाणा ई कि हाऊं, ताऊं माथै विश्वास कोरने वालेऊ जेला दी पा थौ, और जागहा-जागहा दी धार्मिक खुम्बली दी पिटावा थौ। 20 जेबी तैरै गवाह स्तिफनुसा रौ खून थौ बहाउणै लाओ औन्दौ तेबी हाऊं भी तिरे खौडौ थौ और तिऊं आइलै शामिल थौ। हाऊं झांगणै वालेऊ रै जुडके जागदें थौ लागौ औन्दौ।’ 21 और तिणीए मुलै बोलौ, ‘डेऊ : कैलैकि हाऊं ताऊं दुजीजातीऊ काए दूर-दूर भेजाऊ।’ 22 सै एजी बुशा झाऊं पौलुसा री शुणदें थाकै लागी, तैबे जोरै चिलांदें लागै कि, ‘इणै आदमी रौ खतमौ कोरौ, एसरौ जिउंदौ रौअणो ठीक नाई आसतौ!’ 23 जेबी सै चिलांदें और जुडके शोटदें और धुला उडाऊंदें थै लागै औन्दें; 24 तैबे सिपाइऊ रै मुख्य बोलौ, ‘एस महला दी आणौ, और कोडै लाइयो पोरखौ, ताकी मुकै पौतौ लागी कि लोग केजै कारण एसरै विरोधा दी इणौ चिलांदें लागै औन्दें।’ 25 तैबे तिउंरे सेऊ तसमै कोरी बानौ ता पौलुसै तेसलै बोलौ जो तेस काए खौडौ थौ, ‘का एऊ ठीक (जाइज) आ कि तुमै एक रोमी आदमी दी कोडै लाओ और सै भी बिण गलतिरे?’ 26 सिपाइए मुख्य काए डेइयो बोलौ, ‘तू इणौ का कोरारै? एऊ ता रोमी आदमी आ।’ 27 तैबे सिपाइऊ रै मुख्य तेसकाए डेइयो बोलौ, ‘मुकै बोल, का तू रोमी ई?’ तिणीए बोलौ, ‘ओ।’ 28 इणै शुणीयो सिपाई रै मुख्य बोलौ, ‘मुइयै रोमी बणना लै भौरी पैसै दे ई।’ पौलुसै बोलौ, ‘हाऊं ता जन्मा कु रोमी ऊ।’ 29 तैबे जो लोग तेस पोरखणै वाले थै सै तेस काए कु पोरु हुए; और मुख्य भी इणै जाणीयो कि एऊ रोमी आ और मुइए एऊ बानौ औन्दौ, डौरी गौ औ।

बौडी खुम्बली रै सामने पौलुस

30 दुजै दिने तिणीए ठीक-ठीक पौतौ कियो कि यहूदी एस माथे आरोप कैलै ला ई, तेसरै बन्धन खोली गौरे; और परधान याजक और सारी खुम्बली कौडै हुणै रौ हुकम दैओ, और पौलुस तौल भिलै नीईयो तिऊं काए खौडी कियो।

23 पौलुसै बौडी खुम्बली भिलै ध्याना कोरी देखौ और बोलौ, ‘ओ भाइयो, मुइयै आज झाऊं परमेश्वरा लै बिल्कुल सौच्यै जिवा कोरी जीन्दगी बिताई आ।’ 2 इणै शुणीयो हनन्याह बौडै याजकै तिउंलै जुण तिरे खौडै थै, तेसरै मुआ दी थापै लाइणै रौ हुकम दैओ। 3 तैबे पौलुसै तेसलै बोलौ, ‘ओ चुने लाई एन्दी भीत, परमेश्वर ताऊं झांगा सा। तू नियमा कोरी मरै फसलै कोरना लै इ बोशौ औन्दौ, तैबे का नियमा रै खिलाफ मु पिटणै रौ हुकम दिया ई?’ 4 जो तिरे खौडै थै तिउंरे बोलौ, ‘का तू परमेश्वरा रै बौडे याजका लै बुरौ-भौलौ बोला ई?’ 5 पौलुसै बोलौ, ‘ओ भाइयो हाऊं नाई जाणदौ कि एऊ बौडौ याजक आ; कैलैकि लिखौ औन्दौ आ कि : ‘आपणै लोगु रै परधाना लै बुरौ नाई बोल।’ 6 तैबे पौलुसै इणै जाणीयो कि एक खुम्बली सदकिकरु री और दुजी फरीसिकरु री आ, खुम्बली दी हाङ्के देइयो बोलौ, ‘ओ भाईउओ हाऊं फरीसि और फरीसिउ रै वंशा रौ ऊ, मौरै औन्देऊ री आश और जिउंदें हुणै रै बारै दी मरौ केस चालौ औन्दौ।’ 7 जैबे तिणीए एजी बूश बोली ता फरीसिकरु और सदकिकरु मांझीए झौगडौ हुन्दै लागौ; और खुम्बली दी फूट पौडी गोई। 8 कैलैकि सदकिकरु ता इणौ बोला ई, कि ना दुजी बारै जीउंदें हुदें, ना सौरगदूत, ना ई आत्मा; पर फरीसि इऊं सारेऊ माना ई। 9 तैबे बौडौ हाल्लौ हुओ और कुछ शास्त्री जो फरीसिकरु री खुम्बली रै थै, खौडै हुए और इणै बोलीयो लौडदें लागै, ‘आमै एस आदमी दी कोई भी बुराई नाई देखदें, और अगर कोई सौरगदूत या आत्मा एस आइलै बुशै लाई ता का हुओ?’ 10 जैबे भौरी झौगडौ हुओ, ता सिपाइऊ रौ मुख्य डौरी गौ, कि इऊंरे एसरै टुकडै-टुकडै ना चाई किरै, एथीलै तिणीए सिपाइऊ

लै हुकम दैओ कि तौलबिलै डेइयो तिऊं मांझीया कु तेस जौबरीयै गाडीयो महला दी नियां। 11 सेजी राची प्रभुए तेस काए खौडै हुइयो बोलौ, ‘ओ पौलुस, हिम्मत छाड; कैलैकि जिणी तारै यरुश्लेमा दी मेरी गवाही देई आ तिणी ई तारै रोमा दी भी गवाही देणी आ।’

पौलुस झांगणा लै चौपडिणौ

12 जैबे दुस्रो हुओ ता यहूदिये खुम्बली चाणी और कसम खाई कि जेबी झाऊं आमै पौलुस पोरु ना झांगु लै, तेबी झाऊं आमै कुछ ना खादें पिदें। 13 खुम्बली चाणनै वालै चालिसा कु जादें आदमी थै। 14 तिउंरे परधान याजक और स्याणेऊ काए डेइयो बोलौ, ‘आमुए आबे इणौ सुंची गौ आ कि, जेबी झाऊं आमै पौलुस पोरु ना झांगु लै, तेबी झाऊं आमै कुछ ना खादें पिदें। 15 एथीलै आबे बौडी खुम्बली और सिपाइऊ रै मुख्य समझाओ कि तेस तुमु काए आणा, ताकी जाणा कि तुमै तेस औजौ भी आच्छा कोरी पोरखणौ चाहा ई; और आमै तेसरै पौउचणे कु पैहलै तेस झांगणा लै तैयार रौई ई। 16 पौलुसा रै भाजै शुणौ कि इरे तेस झांगणे री ताकी दी, ता तिणीए पौलुसा कै महला दी डेइयो खबर देई। 17 तैबे पौलुसै एक सिपाई औटाओ और तेसलै बोलौ, एस जवान सिपाइऊ रै मुख्य काए नियौ, इयो तेसलै कुछ बोलनौ चाहा सा।’ 18 एथीलै तिणीए सेऊ मुख्य काए निईयो बोलौ, ‘केदी पौलुसै हाऊं औटाओ और मुकु औरज कोरी कि एऊ जवान मुख्य लै कुछ बोलनौ चाहा सा एथीलै एस तेस काए निऊं।’ 19 सिपाइऊ रै मुख्य सेऊ हाथा कु पाकडीयो एखुले दी नियौ और तेसकु पुछौ, ‘तू मुं आइलै का बोलणौ चाहा ई?’ 20 तिणीए बोलौ यहूदिये खुम्बली चाणी ऐन्दी कि ताऊं कु औरज कोरा कि कालै पौलुस बौडी खुम्बली दी आणा, ताकी जाणीया कि सै तेस आच्छा कोरी पोरखणौ चाहा ई। 21 पर तिउंरी ना मानेऊ कैलैकि तिऊं मांझीया कु चालिसा कु जादें लोग तेस झांगणे री ताकी दी, जुणीए इणौ सुंचौ औन्दौ कि जेबी झाऊं सै पौलुस पोरु ना झांगा लै, तेबी झाऊं सै कुछ खादें ना पिदें। और आबे सै तैयार ई और तैरौ हुकम पौखदे ई लागै औन्दें। 22 तैबे मुख्य तेस जवाना लै हुकम दैओ और भेजौ, ‘कि कासी कै ना बोलै कि तारें इरे बूश मुं काए बोली आ।’

पौलुस फेलिक्सा काए भेजणौ

23 तैबे तिणीए दुई सिपाई औटाइयो बोलौ, ‘दुई शौ सिपाई, सत्तर घोडें रै सवार, और शौ बोरछे वाले राची लै कैसरिया डेउणा लै तैयार कोरौ। 24 और पौलुस निणा लै घोडें तैयार छाडौ, कि तेस फैलिक्स आफसरा काए सही सलामत पौउंचावा।’ 25 तिणीए इणी चिट्टी भी लिखी : 26 ‘महामहिम फैलिक्स आफसरा लै क्लौदियुस लूसियासा री ढाल। 27 एऊ आदमी यहूदिये पाकडियो झांगणौ चाओ, पर जेबी मुकै पौतौ लागौ कि एऊ रोमी आ, ता सिपाईऊ निईयो एऊ छुडाओ। 28 हाऊं जाणनौ चाहा थौ कि सै तेस माथे केजै कारण आरोप ला ई, एथीलै सेऊ तिउंरी बौडी खुम्बली दी नियौ। 29 तैबे मुकै पौतौ लागी गौ कि तिउंरे आपणै नियमा रै कई स्वाल पुछीयो तेस माथे आरोप लाए, पर एसदी इणी कोई भी गलती नाई कि एसलै मौता री या एस जेला दी पाइणे री सौजा मिला। 30 तैबे मुकै इणौ बोलौ कि सै एस झांगणे री ताकी दी ई, तैबे मुइए तेबी सेऊ ताऊं काए भेजौ; और एस माथे आरोप लाइणै वालेऊ लै हुकम दैओ कि सै तिऊं आरोप ताऊं काए बोला।’ 31 और जिणौ सिपाइऊ लै हुकम थौ दैओ औन्दौ तिउंरे तिणी ई सेऊ राची-राच अन्तिपत्रिसा दी निओ। 32 दुजै दिने तिऊं आइलै घोडें वाले लोग भेजै और आपु आशै वापिस। 33 तिउंरे कैसरिया दी पौउंचियो आफसरा कै चिट्टी देई; और पौलुस भी किओ तेस काए खौडौ। 34 तिणीए चिट्टी पौडीयो पुछौ, ‘एऊ केजै परदेशा रौ आ?’ 35 और जेबी तेसकै पौतौ लागौ कि किलकिया रौ आ ता तेसलै बोलौ, ‘जेबी तैरै विरोधी भी आशा लै ता हाऊं तेरी मजद कोराऊ।’ और तिणीए सेऊ हेरोदेसा रै महला दी सही-सलामत छाडनै रौ हुकम दैओ।

हाकिम फेलिक्सा कारे पौलुस

24 पांज दिना बासीए हनन्याह बौडै याजकै कई स्याणै और तिरतुल्लुस नावां रौ बकील आपु आइलें आणै। तिउंरें आफसरा कारे पौलुसा माथे आरोप लाए। 2 जेबी पौलुस औटाओ ता तिरतुल्लुस तेस माथे आरोप लाइयो बोलदै लागौ कि : “ओ महामहिम् फेलिक्स, तैरें कारण आमारे देशा दी शान्ती औआ आ; और तैरें इन्जामा कौरी एजी जाती लै कई बुराई सुधरा ई। 3 एजी बूश आमै हर जागहा दी हर तरीकै कौरी धन्यवाद कौरीयो मानी। 4 एथीलै ताउंलै औजौ दुःख नाई दैणौ चाहंदौ, हाऊं ताऊंकु अरज कौरा ऊ छोट्टी आमारी एक-दुई बुशै शुण। 5 कैलैकि आमुए एऊ आदमी, गुनाही और दुनीया रै सारै यहुदिऊ माझीए फूट टालदै, और नसरीउ रै गुटा रौ मुख्य देखौ आ। 6 तिणीए परमेश्वरा रौ घौर भी अशुद्ध कौरनौ चाओ, पर आमुए सेऊ पाकडी गौ आमुए तेस लै आपणै नियमा कौरी सजा दैणी थी; 7 पर सिपाई रै मुख्य लूसियासै सेऊ ज़ौबरीयै आमा रै हाथा कु छुड़ाओ, 8 और एस माथे आरोप लाइणै वालेऊ लै ताऊं कारे आशणै रौ हुकम दैओ। इऊं सारी बुशै जेथरें बारै दी आमै एस माथे आरोप लाई, तुमुकै आपु एस पौरखीयो पौतौ लागा।” 9 यहुदिउरें भी तेसरौ साथ देईयो बोलौ, ओ इए बुशै सौचवी ई।

पौलुसा रौ जवाब

10 ज़ैबै आफसरें पौलुसा लै बोलणै रौ इशारौ कियो ता पौलुसै बोलौ, : ज़ैबै मुकै इणौ पौतौ लागौ कि तुमै भौरी साला ओअलै एजी जाती रौ फैसलै कौरदै लागै औन्दै ता आबै हाऊं खुश हुइयो आपणै ब्यान दिया ऊ। 11 तू आपु जाणी सौका ई कि जेबी कु हाऊं यरुश्लेमा दी आराधना कौरदै आशो ऊ ता मुं इदै बारहा दिना कु जादौ बोगत भी ना हुओ। 12 तिउंरें हाऊं ना परमेश्वरा रै घौरा दी, ना धार्मिक खुम्बली दी और ना इलाके दी कासी आइलै बुशैऊ लाइदै और हालै मचाउंदै देखौ; 13 और ना ता इऊंकै इऊं बुशु रौ जेथरौ आबै इए मुं माथे आरोप लाइदै ई लागै औन्दै, ताऊं कारे सच साबीत कौरी सौकदै। 14 पर हाऊं ताऊं कारे एजी बूश माना ऊ, कि जेजै गुटा लै इए बेकार गुट बोलाई, तेथी कौरी हाऊं आपणै नाना-बुदु रै परमेश्वरा री सेवा कौरा; और जेजी बुशै नियम-कानुना दी और भविष्यवक्ताऊ री किताबी दी लिखी ऐन्दी तिऊं सारेऊ माथे विश्वास कौराऊ। 15 और परमेश्वरा कु आश छाडाऊ जो सै आपु भी छाडाई, कि धर्मी और अधर्मी दुइया जिऊंदै हुणै। 16 एथीलै हाऊं भी परमेश्वर और आदमी कारे आपणौ ज़ीऊ साफ निर्दाश छाडने री कोशीष कौरा ऊ। 17 भौरी साला बासीए हाऊं आपणै लोगु कै दान पौंचाउंदै, और भंटा च़ौडाउंदै आशौ थौ। 18 तिउंरें हाऊं परमेश्वरा रै घौरा दी, शुद्ध हुइयो, एखुली और बिण हल्लै मचाइयो, भंटा च़डाउंदै देखौ, पर तिरे आसिया रै कुछ यहुदी थै। पर इणौ ठीक थौ कि, 19 अगर तिऊंकै मरै विरोधा दी कुछ बूश थी ता इदै तुमु कारे आशीयो मुं माथे आरोप ला थे। 20 या सै आपु बोला लै, कि जेबी हाऊं बौडी खुम्बली माझीए खौडौ थौ ता तिउंरें मुंदि केजी गलती देखी आ? 21 इए एकी बुशा छाडीयो जो मुइरे तिऊं माझीए खौडै हुइयो हाके देइयो बोलौ थी: मौरै औन्दै रै जीऊंदै हुणै रै बारै दी आज मौरौ तुमु आइलै केस हुन्दै लागौ औन्दौ।” 22 फेलिक्सै जो एजै गुटा री बुशु आच्छा कौरी जाणा थौ, सै इणै बोलीयो टाली गोई, “जेबी सिपाइऊ रौ मुख्य लूसियास आशा लौ, ता तुमारी बुशु रौ फैसलौ कौराऊ।” 23 और सिपाई लै हुकम दैओ कि पौलुसा लै थोडी छूट देइयो तेसरी रखवाली कौरैऊ, और तेसरै गोष्टणा माझीया कु कासी भी तेसरी सेवा कौरनै कु नाई रोकेऊ।

फेलिक्स और द्रुसिल्ला कारे पौलुस

24 कुछ दिना बासीए फेलिक्सै आपणी छेउडी द्रुसिल्ला, जो यहुदी थी, साथी दी आणी और पौलुस औटाइयो तेस विश्वासा रै बारै दी जो मसिह यीशु माथे आ, तेसकु शुणौ। 25 जेबी सेऊ धार्मिक, सबर और आशणै वाले फैसलै रै बारै बुशै लाइदै थौ लागौ औन्दौ, ता फेलिक्सै डौरी-डौरीयो जवाब दैओ, इबी तू डेऊ :मौकौ मिलीयो ताऊं हाऊं औजौ औटावा ऊ।” 26 तेसकै पौलुसा कु कुछ पैसै निणे री आश थी, एथीलै सेऊ घौडी-घौडीए तेस

औटाइयो तेस आइलै बुशै ला थौ। 27 पर जेबी दुई सालै बिती गोई ता पुरकियुस फेस्तुस, फेलिक्सा री जागहा दी आशौ; और फेलिक्सै यहुदीऊ खुश कौरना लै पौलुस कैदा दी छाडौ।

पौलुसा री राजा लै दोहाई दैणी

25 फेस्तुस सेजै परदेशा दी पौंउंचणै कु चिया दिना बासीए कैसरिया कु यरुश्लेमा लै डैओ। 2 तैबै परधान याजकु और यहुदिऊ रै मुख्य लोगुए तेस कारे पौलुसा रौ विरोध कियो; 3 और तेसकु औरज कौरीयो तेसकु इणौ चाओ कि सेऊ पौलुस यरुश्लेमा कु औटावा। कैलैकि सै तेस बाटा दी झांगणे री ताकी दी थै। 4 फेस्तुसै जवाब दैओ, “पौलुस कैसरिया रै कैदा दी आ, और हाऊं आपु जल्दी तिरे डेआऊ।” 5 तौएँ बोलौ, “तुमु माझीए कु ज़ुण स्याणै ई सै मुं आइलै आशा, और अगर तिणी आदमी कुछ गलत कियो ता तेस माथे आरोप ला।” 6 तिऊं माझीए सेऊ आठ-दस दिना दी रौइयो कैसरिया लै डैओ; और दुजै दिनै राज गादी माथे बोशीयो हुकम दैओ कि पौलुस इदै आणौ। 7 जेबी सेऊ आशौ ता जो यहुदी यरुश्लेमा कु थै आशै औन्दै, तिउंरें नजदीक खौडै हुइयो तेस माथे बुरै-बुरै आरोप लाए, जेथरें सै सबूत भी नाई देई बौला थै। 8 पर पौलुसै जवाब दैओ, “मुइयें नां ता यहुदिऊ रै नियमा रै, ना परमेश्वरा रै घौरा रै और ना कैसर राजे रै विरोधा दी कुछ बुरौ कियो।” 9 तैबै फेस्तुसै यहुदीऊ खुश कौरना लै, पौलुसा लै बोलौ, “का तू चाहा ई यरुश्लेमा लै डेउणौ; और तिरे मुकारे तैरौ फैसलौ कौरा?” 10 पौलुसै बोलौ, “हाऊं कैसरा रै फैसलै कौरनै री जागहा दी खौडौ ऊ; मरै मुकदमै, केसा रौ फैसलौ इदै चाई हुओ। जिणौ तू आच्छा कौरी जाणा ई कि मुइरे यहुदिऊ रै खिलाप कोई गुनाह नाई कियो। 11 अगर हाऊं गुनाही ऊ और झांगणै लायक कोई काम कियो आ, ता हाऊं मौरनै कु नाई मुकुरदौ; पर जेजी बुशा रौ इए मुं माथे आरोप लाइदै ई लागौ औन्दै, अगर तिऊं माझीया कु कोई भी बूश सौचव नाई निकला ली, ता कोई भी मुं तिउंरें हाथा दी नाई सौभाली सौकदौ। हाऊं कैसरा कु औरज कौरा ऊ।” 12 तैबै फेस्तुसै आपणी खुम्बली दी चौपडुइयो जवाब दैओ, “ताएँ कैसरा री बडाई की आ, तू कैसरा कारे डेउणौ ई।”

राजा अग्रिप्पा कारे पौलुस

13 कुछ दिना बासीए अग्रिप्पा राजौ और बीरनीके कैसरिया दी आशीयो फेस्तुसा कु मिलै। 14 तिऊं भौरी दिना दी तिरे रौइणै बासीए फेस्तुसै पौलुसा रै बारै दी राजेऊ कै बोलौ : “एक आदमीआ जो फेलिक्सै कैदी चाणीयो आ छाडौ औन्दौ। 15 जेबी हाऊं यरुश्लेमा दी थौ ता बौडै याजक और यहुदिऊ रै स्याणैउरें तेस माथे भौरी आरोप लाए, और औरज कौरी कि तेसलै सोजा दैओ। 16 पर मुइरे तिऊंले जवाब दैओ कि रोमीउ रौ इणौ रिवाज नाई आसतौ कि कासी भी सोजा दैणा लै भेजा। जेबी झाऊं आरोप लाइणै वालेऊ के सामनै खौडै हुइयो आपु बौचणा लै जवाब दैणै रौ मौकौ ना मिला। 17 जेबी सै इदै कौडै हुए, ता मुइयें कुछ ना जागौ, पर तेबी राज गादी माथे बोशीयो तेस आदमी आणनै रौ हुकम दैओ। 18 जेबी तेसरै दुश्मन खौडै हुए ता तिउंरें तेस माथे इणै गुनाहा रौ आरोप नाई लाओ जिणौ हाऊं सुंचा थौ। 19 पर सै आपणै धर्मा रै, और यीशु नावां रै कास आदमी रै बारै दी, जो मौरौ गौ थौ, और पौलुस तेसलै जिउंदौ बोला थौ, झांगडौ कौरा थै। 20 मुकै सौमझी दी ना आशौ कि हाऊं एजी बुशु रौ पौतौ किणौ लाऊलै? एथीलै मुइरे तेसकु पुछौ, ‘का तू यरुश्लेमा लै डिआ ई कि तिरे इऊं बुशु रौ फैसलौ हुआ?’ 21 पर ज़ैबै पौलुसै औरज कौरी कि तेसरै केसा रौ फैसलौ सारेऊ कु बौडै राजे एकारे हुआ, ता मुइरे हुकम दैओ कि जेबी झाऊं एस कैसर राजे कारे ना भेजु तेबी झाऊं कैदा दी छाडु।” 22 तैबै अग्रिप्पे फेस्तुसा लै बोलौ, “हाऊं भी तेस आदमी री शुणनी चाहा ऊ।” तिणीए बोलौ, “तू कालै शुणा ई।” 23 और दुजै दिनै जेबी अग्रिप्पा बिरनीके बडी धूम-धामा कौरौ आशौ, और सिपाइऊ रै मुख्य और इलाकै रै जानै-मानै लोगु आइलै दरबारा दी पौउंचौ। तैबै फेस्तुसै हुकम दैओ कि पौलुस ओरु आणौ। 24 फेस्तुसै बोलौ, “ओ राजौ अग्रिप्पा और ओ सारै लोगुओ जो इदै आमु आइलै ई, तुमै एस आदमी देखा ई, जासरै बारै दी सारै यहुदीउरें यरुश्लेमा दी और इदै भी हाके देई-देईयो मुकु औरज

कौरि कि एसरो जीऊंदौ रौउणो आचछौ नाई आसतौ। 25 पर मुइए जाणी ऐरो कि इणीए इणो कुछ भी ना किओ कि एस पोरु झांगा; जैबै कि इणीए आपु सारेऊ कु बौडै राजै री औरज कौरि आ, ता मुइए भेजणै रौ फैसलौ कियो आ। 26 तैबै भी मुकै एसरे बारै दी बौडै राजै लै लिखणा लै कोई पाकी बूश नाई आसती। एथीलै मुइए एऊ तुमु कारे और खास कौरिए 'ओ राजौ अग्रिप्पा, तुमु कारे आणो आ। ताकी पोरखणै बासीए मुकै कुछ लिखणा लै मिला। 27 कैलैकि कैदी भेजणो और जो आरोप तेस माथे लागे ई, तिऊं नाई बोलणौ मुकै बेकार लाग़ा सा।"

अग्रिप्पा कारे पौलुसा रौ साफ-साफ बोलणौ

26 अग्रिप्पे पौलुसा लै बोलौ, "ताउंके आपणै बारै दी बोलणै री इजाजत आ।" तैबै पौलुसे अपणो हाथ खौडौ कियो और बोलदै लागौ, "ओ राजौ अग्रिप्पा जेती बुशु रौ यहुदी मुं माथे आरोप ला ई, आज ताउं कारे हाऊं तिऊंरौ जवाब दैणा लै आपुलै खुशी माना ऊ, 3 खास कौरिए एथीलै कि तू यहुदीऊ रै सारै रिती-रिवाज और विवाद ज़ाणा ई। और हाऊं ताऊं कु औरज कौरा ऊ कि तू मेरी बुशै ध्याना कौरि शुणा। 4 "मेरौ चाल-चलन शुरु कु आपणी ज़ातीऊ मांझीए और यरुशेमा दी जिणो थौ, सै सारै यहुदी ज़ाणा ई। 5 अगर सै गवाही दैणी चाह लै, ता पैहले कु मुं ज़ाणा ई कि फरीसी हुइयो आपणै धर्मा रै सारेऊ कु काठै नियमा माथे चालोऊ। 6 और आबै तेस वादै रै कारण जो परमेश्वर आमारे नान-बुडु आइलै कियो थौ, मुं माथे केस/मुकदमौ चालदै लागौ औन्दौ। 7 सेजे वादै रै पुरे हुणै री आश छाडीयो, आमारे बाहरा खानदानै/गोत्रे आपणै सारै जिवा कौरिए राच-दीन परमेश्वरा री की ई आ। ओ राजौ, एजी आश छाड़ने री बारे दी यहुदी मुं माथे आरोप ला ई। 8 जैबै कि परमेश्वर मौरै औन्दै भी जिऊंदै कौरा आ, ता तुमै इरै बूश विश्वासा रै लायक कैलै ना सौमझदै? 9 मुइयै भी सौमझौ थौ कि यीशु नासरी रै नावा रै विरोधा दी मुइयै भौरी कुछ कौरनौ चांई। 10 मुइयै यरुशेमा दी इणो ओ कियो; और परधान याजका कु हक पाइयो भौरी पवित्र लोग कैदा दी पाए, और जेबी तिऊं झांगा थै तेबी हाऊं भी तिऊंरै विरोधा दी राजी औआ थौ। 11 हर धार्मिक खुम्बली दी हाऊं तिऊं सतावा थौ और यीशु री बुराई कौरावा थौ, और इणो रोशा कौरि पागल हुई गौ थौ कि बाइलै इलाके दी डेइयो भी तिऊं सतावा थौ।

आपणै जिऊ बौदलिणा रै बारै दी शुणाउणौ

(प्रेरितो 9:1-19; 26:12-18; 22:6-16)

12 इणै कौरि जेबी हाऊं परधान याजक कु हक और हुकम पाइयो दमिशका लै थौ लागौ औन्दौ डेउंदै; 13 ता ओ राजौ, बाटा दी दुसके बोग्तै मुइए सौरगा कु सुरजा रै प्याशे कु भी बौडीयो एक प्याशौ, आपणै और आपु आइलै साथे रै लोगु फिदीयालै चमकदै देखौ। 14 जेबी आमै सारै धौनी लोटी गौए, ता मुइए इब्रानी बोली दी मुं आइलै इणो बोलदै एक बूश शुणी, "ओ शाऊल ओ शाऊल तू मुं कैलै सतावा ई? पोइनै माथे लात लाइणी ताउंलै कठीण आ।" 15 मुइए बोलौ, 'ओ प्रभु तू कुण ई?' प्रभुए बोलौ, 'हाऊं यीशु ऊ जास तू सतावा ई। 16 पर तू उठ, आपणै बांगणै माथे खौडौ ऊ; कैलैकि मुइए ताउंके एथीलै दर्शन दैओ आ कि ताऊं इऊं बुशु रौ गवाह और चेलौ चाणु, जो ताए देखी ई, और तिऊंलै भी जेथलै हाऊं ताउंलै दर्शन दिया ऊ। 17 और हाऊं ताऊं तैरै लोगु और दुजी ज़ाती रै लोगु कु बौचावा ऊ। ज़ासकारे ताऊं हाऊं आबै एथीलै भेजाऊ 18 ताकी तू तिऊंरी आखी खोला कि सै न्यारे कु प्याशे भिलै, और शेताना रै हका कु परमेश्वरा भिलै मुडा; कि पापा री माफी और तिऊं लोगु आइलै जुण मुं माथे विश्वास कौरियो पवित्र हुए ई, राज कौरा।'

आपणै कामा रै बारै दी बोलणौ

19 "और: ओ राजौ अग्रिप्पा, मुइए सौरगा रै दर्शणा री बूश नाई टाली, 20 पर पैहलै दमिशका रै, तैबै यरुशेमा रै, तैबै यहुदिया रै सारै देशा दी रौइणै वालेऊ, और दुजी ज़ातीऊ सौमझाऊंदै थाकौ लागी, कि मन बौदलौ और परमेश्वरा भिलै फीरीयो मन बदुलनै लायक काम कौरौ। 21 इऊं बुशु रै कारण यहुदी मुं परमेश्वरा रै घौरा दी पाकडीओ झांगणे री कोशिश कौरा थै। 22 पर

परमेश्वरा री मजदा कौरिए हाऊं आज झाऊं जिऊंदो ऊ, और छोटै-बौडै सारेऊ कारे गवाही शुणावा ऊ, और इऊं बुशै छाडीयो ओर कुछ ना बोलदै जो भविष्यवक्तुए और मुसै भी बोली कि हुणै वाली ई, 23 कि मसीह ए दु:ख ज़ा ई उठाउणै और सेऊ सौभी कु पैहलै मौरै औन्दै मांझीया जीऊंदै हुइयो, आमारे लोगु और दुजी ज़ाती रै लोगु कारे प्याशै रौ परचार कौराई।" 24 जेबी सेऊ इणै कौरि जवाब दैदै थौ लागौ औन्दौ, तैबै फेस्तुसै हाके देइयो बोलौ, "ओ पौलुस तू पागल ई। और भौरी शिखीयो तू पागल बाणी गो ई।" 25 पर पौलुसै बोलौ, "ओ महामहिम फेस्तुस, हाऊं पागल नाई बल्कि सौचाई और अकला री बूश बोलाऊ। 26 राजौ भी ज़ास कारे हाऊं बिण डौरै ऊ लागौ औन्दौ बोलदै, इऊं बुशु ज़ाणा; और मुकै विश्वास आ कि इऊं बुशु मांझीया कु कोई भी तिऊंकु छिपी ऐन्दी नाई, कैलैकि इरे घटना केजे कुणे दी नाई हुई। 27 ओ राजौ अग्रिप्पा, का तू भविष्यवक्ताऊ रौ विश्वास कौरा ई? ओ हाऊं ज़ाणाऊ कि तू विश्वास कौरा ई।" 28 तैबै अग्रिप्पे पौलुसा लै बोलौ, "तू थौडौ सौमझाइयो मुं मसीह चाणनौ चाह ई?" 29 पौलुसे बोलौ, "परमेश्वरा कु मेरी प्राथना सा कि का थौडौ का भौरी, सिरफ तू ई नाई जेती लोग आज मेरी शुणा ई, इऊं बानणा छाडीयो सै मुं बाशीए बोणा।" 30 तैबै राजौ और आफसर और बिरनीके और तिऊं आइलै बोशै औन्दै उठीयो खौडी हुए; 31 और अलग हुइयो आपु मांझीए चौपड़िदै लागे, "एऊ आदमी इणो ता कुछ भी ना कौरदौ, जो मौता री सौजा और कैदा दी पाइणै लायक औलौ।" 32 अग्रिप्पे फेस्तुसा लै बोलौ, "अगर एऊ आदमी कैसरा कु औरज नाई कौरा थौ ता आजाद हुई सौका थौ।"

पौलुसा रौ रोमा कु क्रेते झाऊं डेउणौ

27 जैबै इणो पाकौ हुई गौ कि आमै बौडी किशती दी इटली लै डेई, ता तिउंए पौलुस और कुछ ओर कैदी भी यूलियुस नाऊं औगस्तुसा री फौजा रै सिपाई रै हाथा दी सौभाली गौए। 2 अद्रमुतियुमा रै एकी किशती दी जो आसीया रै ढिका कारे डेउणा लै तैयार थी। तेथदी आमै बोशै और चाल पौडै, अरिस्तर्खुस नाऊं थिस्सलुनीके रौ एक मकिदुनी भी आमु आइलै थौ। 3 दुजे दिने आमै सैदा दी रुकै, और यूलियुसे पौलुसा माथे दया कौरियो सेऊ तेसरै गोष्टणु कारे डेउणै दैओ, कि सेऊ आराम कौरा। 4 तैबै आमै किशती दी बोशीयो साइप्रसा रै ओला दी चालै, कैलैकि बागुर थौ भौरी लागौ औन्दौ। 5 किलिकिया और पंफुलिया रै नजदीक समुन्दरा बाटीए लुसीया रै मुरा दी उत्तरै। 6 तिरे सिपाई के इटली लै डेउणै वाली सिकन्दरिया री एक किशती मिली, और तिणीए आमै तिदरा दी बोशालै। 7 जैबै आमै भौरी दिना झाऊं सुल-सुलै हाणडीयो बौडी मुश्केला कौरि कनिदुसा कारे पौऊंचै, ता बागुर आमु ओगाऊं बौडनै नाई दिया थौ, एथीलै आमै सलमोनै रै सामनै क्रेतै रै ओला दी चालै; 8 तेथरे ढिका बाटीए मुश्केला कौरि डेइयो 'शुभलंगरबारी' नावा री एक ज़ागहा दी पौउंचै, तिरु लसवा इलाकौ नजदीक थौ। 9 जैबै भौरी दिन बिती गौए और पाणी रै सफरा दी मुश्केल एथीलै हुआ थी कि ब्रौता रै दिन बीती गौए थै। पौलुसे सै इणै बोलियो सौमझारे, 10 "ओ भाईओ, मुकै इणो ज़ाणीया कि एस सफरा दी मुश्केल और भौरी नुकसान, हुणै वालौ आ, ना सिरफ समान और किशती रौ बल्कि आमारे प्राणा रौ भी।" 11 पर सिपाइए पौलुसा कु बौडीओ किशती चलाउणै वाले और मुख्य री बूश ज़ादी मानी। 12 सै ज़ागहा शेलै काटणा लै ठीक नाई थी, एथीलै सारेउए सुंचौ कि तिरु किशती किणै कौरिए फीनिक्सा दी पौउंचा ताकी तिरे शेले कु बौचा। इरे क्रेते री एक ज़ागहा सा जेथरै दार चारो तरफा दी खुला ई।

समुंद्रा दी तेज बागुर (तुफान)

13 जैबै थोडी-थोडी बागुर लागदै लागी, ता इणै सौमझीयो कि आमारे मतलब पुरौ हुई गौ आ, ता लांगर चुंगौ और ढिका ढिका दी क्रेते बाटीए डेउंदै लागौ। 14 पर कुछ बोगता बासीए धौनी कु भौरी बागुर(आंधी) चाली, जेथलै यूरकुलीन बोलाई। 15 जैबै बागुर किशती लागी ता किशती खौडी नाई टेकी बोली, और आमुए सै बौइणै देई और बौइंदै-बौइंदै चालदै थाके लागी। 16 तैबै कौदा नावा रै एकी ढोकसु बाटीए बौइंदै-बौइंदै मुश्केला कौरि किशती वशा दी की। 17 तैबै तिउंए किशती चुंगी और बौडी किशती तौला कु माथे झाऊं

लोअली कौरीए बानी, और सुरतिस ढोकसु माथे फौसणै रै डौरा कु पाल और समान उतारी बौइयों डेई गौरे। 18 दुजे दिनै जैबै आमुरे बागुरा कौरी भौरी धाके खाए ता किशती कु समाना शोटदै लागै; 19 और चिजै दिनै तिउंरे आपणै हाथा कौरी किशती रै रौशै समान शोटी गौरे। 20 जैबै भौरी दिना झाऊं ना ता सुरज दिशौ ना सौरगा रै तारै दिशै और बागुर थौ लागौ औन्दौ ता आखरी दी आमुकै बौचणै री आश भी खातम हुई। 21 जैबै तिउंरे बिण रोटीए भौरी दीन बिताए तैबै पौलुसै तिउं माझीए खौडै हुइयों बोलौ, "ओ भाईओ आच्छौ इणौ थौ कि तुमै मेरी बूश माना थै और क्रेतै कु नाई चाला थै, तैबै ना ता इरे मुसिबत आशा थी और ना नुकसान हुआ थौ। 22 पर आबै हाऊं तुमु सौमझावा की हिम्मत छाडौ, कैलैकि तुमु माझीया कु कासीरै भी प्राण नाई डेउणै, पर किशती रौ नुकसान हुआ। 23 कैलैकि परमेश्वर ज़ासरो हाऊं ऊ, और ज़ासरी सेवा कौरा ऊ, तेसरै दुतै आज राची मुकारे आशीयों बोलौ, 24 'ओ पौलुस नाई डर! तैरौ कैसर राजे कारे खौडौ हुणौ ज़रुरी आ। देख, परमेश्वरै सारै जो ताऊं आइले सफर कौराई, ताऊंकै ई सौभाले औन्दै।' 25 एथीलै, ओ भाईओ, हिम्मत छाडौ; कैलैकि हाऊं परमेश्वरा माथे विश्वास कौरा ऊ, कि जिणौ मुलै बोलौ औन्दौ आ तिणी हुआ। 26 पर आमुरे केजै ढोकसु माथे जा डेउणौ।"

जहाज चूटणौ

27 जैबै चौदवी राच आशी और आमै अद्रिया समुन्दरा दी थै लागै औन्दै भटकदै, ता आधी राचीए किशती चलाउणै वालेऊ के पौतौ लागौ कि आमै केजै देशा रै नजदीक पौंचदै लागै औन्दै। 28 तैबै तिउंरे समुन्दरा री गहराई नापी जो सेंटिस मीटर थी, और थोडौ आगुडै डेइयों नापी औजौ तिरे थी छब्वीस मीटर। 29 तैबै डोकै कु टकराइणै रै डौरा कु तिउंरे किशती दी पिछ बिलै चार लांगर लाए, और राच खुलना लै प्राथना कौरदै लागै। 30 पर जै किशती चलाउणै वालै किशती कु भागणौ चाह थै और आगलै हिस्से कु लांगर टालनै रै बाहनै कौर छोटी किशती(डोंगी) समुन्दरा दी उतारी गई थी; 31 ता पौलुसै सिपाइऊ और चोअकीदार लै बोलौ, "अगर इरे किशती दी नाई रौआ लै ता तुमै भी ना बौचणै।" 32 तैबै सिपाइए रौशै काटीयों डोंगी तौलै पाई गई। 33 जैबै राच खुलनै वाली थी तैबै पौलुसै इणै बोलीयों सारै रोटी खाणा लै सौमझाए, "आज चौदह दिन हुई गौरे तुमै झोरी कौरीयों भुखे रौरे और कुछ रोटी ना खाई। 34 एथीलै तुमु सौमझावा ऊ कि कुछ खाओ, जेथ कौरी तुमै बौचा; कैलैकि तुमु माझीया कु कारी रै मुंडा रौ एक बाल भी ना छुटदौ।" 35 इणै बोलीयों तिणीए रोटी कौरी और सारेऊ कारे परमेश्वरा रौ धन्यवाद कियौ और चोडीयों खांदै लागौ। 36 तैबै सै सारै भी हिम्मत कौरीयों रोटी खांदै लागै। 37 आमै सारै मिलीयों किशती दी दुई शौ छियतर लोग थै। 38 जैबै सै रोटी खाईओ रौजै, ता गिरुं समुन्दरा दी शोटीयों किशती औलखी कौरदै लागै। 39 जैबै दुसौ हुओ ता तिउंरे सेऊ देश नाई पराणौ, पर एक जगहा देखी जेथरौ कुणौ चोकुणौ थौ, और सुंचदै लागै कि अगर हुई सौका ता किशती एथी माथे रुकाई। 40 तैबै तिउंरे लांगर खोलीओ समुन्दरा दी पाए और और तेबी पतवारा रै रौशै खोली गौरे, और बागुरा रै सामनै छोटै पाले खोलीयों ढिका भीलै चालै। 41 पर दुई समुन्दरा रै बिचा दी तिउंरे किशती टेकाई। किशती रौ आगलौ हिस्सौ इणौ फौसी गौ कि हिलौ भी नाई और पिछलौ हिस्सौ लागौ छालेऊ कौरी चुटदै। 42 फौजी सुंचा थै इणौ कि कैदीऊ पोरु झांगी ई इणौ ना चाई हुओ कि कैदी तैरीयों पोरु ना भागा। 43 पर सिपाईए पौलुस बचाउणै री इच्छा कौरी सै इणै कौरना लै रोकै, और हुकम दैओ कि ज़ुण तैहरी ज़ाणा सै पैहलै तैहरीयों ढिका कारे डिआ। 44 और बाकी डियालै, कुण पाटडेऊ और ज़ुखडेऊ रै सहारै कौरी। इणै कौरी सारै सही-सलामत किशती कु उतरीयों ढिका कारे पौंचदै।

माल्टा द्वीपा दी पौलुस

28 जैबै आमै बौची गौरे तैबै आमुकै पौतौ लागौ कि इरें जगहा लै माल्टा बोला ई। 2 तिवलै लोगुरे आमु माथे भौरी दया की; कैलैकि पाणी लागणै री वज़ाह कु भौरी शेलौ थौ, और तिउंरे आग जालीयों आमारौ स्वागत कियौ। 3 जैबै पौलुसै जुखडे कौडै कौरीयों आगी माथे छाडै, ता एक

साप तौपीयों बाइरै निकलौ और तेसरै हाथा दी मेशुओ। 4 जैबै तिवलै लोगुरे साप पौलुसा रै हाथा दी मेशुओ औन्दौ देखौ, ता आपु मांझीए चौपडिंदै लागै कि, पाको एक आदमी गुंडौ आ कि समुन्दरा कु बौची गौ पर फेसलै कौरनै वालै जिउंदौ ना छाडौ।" 5 तैबै तिणीए सेऊ साप आगी दी शोटौ, और पौलुसा दी कुछ ना हुआ। 6 पर सै थै जगदै लागै औन्दै कि आबै एक उशाआ और एकी घोड़ीए धौनी पौडीयों मौरा, पर जैबै सै काफी बोग्ता झाऊं देखदै थै लागै औन्दै ता तिउंरे देखौ कि तेसदी कुछ भी ना हुआ, ता आपणै विचार बौदलीयों बोलदै लागै कि, "एऊ ता कुण देऊ आ।" 7 तिउंरे जगहा रै नजदीक, तेस ढोकसु रै परधान पुबलियुसा री ज़मीन थी। तिणीए आमै आपणै घौरै निरे और चिया दिना झाऊं आमारी सेवा-पाणी की ई। 8 पुबलियुसा रौ बाब बुखार और पेचिसा कौरी भौरी बिमार थौ। पौलुसै तेस कारे डेइयों प्राथना कौरी और तेस माथे हाथा छाडीयों सेऊ चांगौ कियौ। 9 जैबै इणौ हुओ ता तिउंरे जगहा रै सारै बिमार आशै और चांगे हुइयों डेवै। 10 तिउंरे आमारी बौडी इज्जत की ई, और जेबी आमै तिवरु डेउंदै लागै ता जो आमुलै ज़रुरी थौ, सेऊ समान तिउंरे आमारी किशती छाडौ।

माल्टा द्वीपा कु रोमा भिलै

11 चिया मिहनै बासीए आमै सिकन्दरिया रै एकी किशती दी चाल पौडै, जो तिरे पुरै शेलै रै बोग्तै रौ ओ ज़ासरो निशाण, 'जुडुओ भाई थौ। 12 तैबै सुरकूसा दी आमै चिया दिना झाऊं थाकै। 13 तिवरु आमै घुमी-फीरीयों रेगीयुमा दी आशै; और एकी दिना बासीए तेज बागुर चाली, तैबै आमै दुजे दिनै पुतियुली दी आशै। 14 तिरे आमुकै कुछ भाई मिलै ज़ुणीए आमुकु औरज कौरी कि सात दिना झाऊं आमारै कारे रौ औ; इणै कौरी आमै रोमा दी पौंचदै। 15 जैबै भाइए आमारै बारै दी शुणौ ता अपियुसा रै चोका माथे और चिया सरांग झाऊं सै आमुकु मिलदै आशै, तिउं देखीयों पौलुसा के हिम्मत आशी और तिणीए परमेश्वरा रौ धन्यवाद कियौ। 16 जैबै आमै रोमा दी पौंचदै, ता पौलुसा लै एक सिपाई आइलै जो तेसरी रखवाली कौरा थौ, एखुलै दी रौइणै रौ हुकम मिली गौ।

रोमा दी पौलुस

17 चिया दिना बासीए पौलुसै यहुदीऊ रै मुख्य लोग औटाए, और जैबै सै कौडै हुए ता तिउंलै बोलौ, "ओ भाईयो, मुंइए आपणै लोगु और आपणै नान-बुडु रिती-रिवाजा रै विरोधा दी कुछ भी ना कियौ, तैबै भी यरुशेमा दी हाऊं कैदा दी पाइयों रोमीऊ रै हाथा दी सौभालौ। 18 तिउंरे हाऊं पौरखीयों छडनौ चाओ, कैलैकि मुंदी मौता रै लायक कोई गलती नाई थी। 19 पर जैबै यहुदी एथरै विरोधा दी बोलदै लागै, ता मुं कैसरा री औरज कौरनी पौडी : एथलै नाई कि मुंइए आपणै लोगु माथे आरोप लाइणौ थौ। 20 एथीलै मुंइए तुमै औटाए ई कि तुमु कु मिलु और बुशै-धाशै लाऊ; कैलैकि इज्जाला री आश छाडना ले ऊ हाऊ इरें शांगली दी बानौ औन्दौ।" 21 तिउंरे तेसलै बोलौ, "ना आमुकै तैरे बारै दी यहुदीऊ कु चिड्डी मिली, ना भाईऊ माझीया कु कुणीए आशीयो आमुकारे तैरे बारै दी कुछ बोलौ, और ना बुरौ बोलौ। 22 पर तैरौ विचार का सा? तिउं आमै ताऊकु शुणनौ चाई, कैलैकि आमै जाणी कि हर जगहा दी लोग एथरै बारै दी बुशै ला ई।" 23 तैबै तिउंरे तेसलै एक दिन छांटौ, और भौरी लोग तिरे कौडै हुए तैबै पौलुसै परमेश्वरा रै राजा री गवाही देई, और मुसा रै नियमा और भविष्यवक्ता री किताबी कु यीशु रै बारै दी सौमझाइ-सौमझाइयों दोअती कु बयाली झाऊं थाकौ शिखाउंदै लागी। 24 तैबै कुछ लोगुरे ता सै बुशै मानौ गई, और कुछ लोगुरे नाई विश्वास कियौ। 25 जैबै सै एकी-दुजे कु राजी नाई हुए ता पौलुसा री, इऊं बुशु छाडीयों तिवरु डेई गौरे : "पवित्र आत्मै यशायाह भविष्यवक्ता रै ज़रीए आमारै नान-बुडु आइलै ठीक ई बोलौ आ, 26 "डेइयों इऊं लोगु लै बोल, शुणदै ता थाकाई लागी, पर सौमझदै नाई, देखदै ता थाका ई लागी, पर दिशदौ नाई; 27 कैलैकि इऊं लोगु रौ जिऊ मोटौ और इऊंरै कौंधु भौरुई गौरे, और इऊंरे आपणी आखी बन्द की ऐन्दी, ताकी इणौ ना हुआ कि सै आखी कौरी देखा, कौंधु कौरी शुणा और जिवा कौरी सौमझा, और बदलीया, और हाऊं इऊं चांगौ कौर।" 28 और तुमै जाणौ कि परमेश्वरा रै छुटकारे इरे खबर दुजी जातीऊ कारे भेजी गई आ, और सै

शुणा ई।" ²⁹ जेबी तिणीए इणौ बोलौ ता यहुदी आपु मांझीए चौपडीं दे लागै और तिदरु पोरु भागै। ³⁰ सेऊ पुरै दुई साला झालुं तिऐ आपणै कराय रै घौरा दी रौऔ, ³¹ और जो भी तेस काऐ आशा थै, तिऊं सौभी कु मिला थौ

और बिण रुकै निडर हुइयौ परमेश्वरा रै राजा रौ परचार कौरा थौ और प्रभु यीशु मसीह री बुशै शिखाउंदै थाकौ लागी।

रोमियो

अभिवादन

1 पौलुसा री तौरफा कु जो यीशु मसीह रौ सेवक आ, और प्रेरित हुणा लै आटाओ आ, और परमेश्वर रै तेस खुशी रै संदेशा लै अलग कौरी ऐरो आ। 2 जासरी तिणीए पहला कु आपणै गुरु नबी रै जौरिऐ पवित्रशास्त्रा दी। 3 आपणै छेहरु आमारे प्रभु यीशु मसीह रै बारे दी वाइदौ किओ थौ; जो शरीरा कु ता दाऊदा रै वशां कु पैदौ हुओ। 4 और पवित्र आत्मा कु मोरै औन्दै माझिऐ कु जीउंदौ हुणा रै कारण शक्ती आइलै परमेश्वर रौ छेहरु बौणौ आ। 5 जासरे जौरिऐ आमुकै बौडी दया और सेवकाई मिली कि तेसरै नाऊं रै कारण सारी जाती रै लोग विश्वास कौरीयो तेसरी माना, 6 जास मांझीऐ तुमै भी यीशु मसीह दी हुणा लै आटाऐ औन्दै ई। 7 तिऊं सौभी रै नाऊं जो रोमा दी परमेश्वर रै गौतै ई और पवित्र हुणा लै आटाऐ औन्दै ई। आमारे बाब परमेश्वर और प्रभु यीशु मसीह री तौरफा कु तुमुलै बौडी दया और शान्ति थाका मिलदैं लागी।

धन्यवादा री प्राथना

8 पैहलै हाऊं तुमु सारेऊ लै यीशु मसीह रै जौरिऐ आपणै परमेश्वर रौ धन्यवाद कौराऊ कि तुमारे विश्वासा री बुशै सारी दुनिया दी औन्दै लागी ऐन्दी। 9 परमेश्वर जासरी सेवा हाऊं आपणी आत्मा कु तेसरै छेहरु रै खुशी रै संदेशा रै बारे दी कौराऊ, सेऊ ई मेरौ शाजत आ की हाऊं तुमु किणै कौरिऐ लगातार याद कौरदैं थाकाऊ लागी, 10 और रोज आपणी प्राथना दी औरज कौराऊ कि केजी भी रीती कु आबै तुमु काए आशणा लै मेरौ सफर परमेश्वर री मौरजी कु सफल हुआ। 11 कैलैकि हाऊं तुमुकै मिलणै री आश कौराऊ। कि हाऊं तुमुलै केजौ आत्मिक वरदान देऊ जेथ कौरी तुमै पाकै हुआ। 12 यानी कि जेबी हाऊं तुमारे बीचा दी हुइयो, तुमु आइलै तेस विश्वासा रै जौरिऐ जो मुंदी, और तुमुदी आ, एकी दुजै कु हौसलौ पाओ। 13 और ओ भाईयो हाऊं नाई चाहादौ कि तुमै एथाकु अनजान रौओ कि मुइंरे घौडी-घौडीऐ तुमु काए आशणौ चाहौ, कि जिणौ मुलै और दुजी ज़ातिऊ दी फल मिलौ आ तिणौ ई तुमु लै भी मिला, पर इबी झाऊं रुकी रौ आ। 14 हाऊं युनानिउ और दुजै बोली बोलणै वालेउ रौ, और बुद्धि वालेउ और जासकै बुद्धि नाई आसती तिउंरौ हाऊं रिणी ऊ। 15 और हाऊं तुमु लै भी जो रोमा दी रौआ ई, खुशी रौ संदेश शुणाऊणा लै बिलकुल तैयार आ।

खुशी रै संदेशा री ताकत

16 कैलैकि हाऊं खुशी रै संदेशा कु नाई शौरमिंदौ, एजी ताईऐ कि सेऊ हर एक विश्वास कौरणा वालेउ लै पैहलै ता यहूदी बासिऐ युनानीउ लै, जुण भी तेसदी विश्वास छाड़ा ई- तेसरी मुक्ति लै परमेश्वर री ताकत आ। 17 कैलै कि तेसदी परमेश्वर री धार्मिकता विश्वासा कु और विश्वासा लै परगट हुआ आ जिणौ लिखौ औन्दौ आ, " विश्वासा कौरिऐ धौर्मी लोग जिऊंदै रौआई।"

आदमी री ज़ाती रौ पाप

18 परमेश्वर रौ रोश ता तिऊं लोग री सारी बुराई और अधर्मा दी सौरगा कु परगट हुआ, जुण सच्चाई अधर्मा कौरी दबाई छाड़ा सा। 19 एजी ताईऐ कि परमेश्वर रै बारे दी ज्ञान तिउंरौ मौना दी परगट आ कैलैकि परमेश्वरै तिऊं माथै परगट किओ आ। 20 तेसरै अणदेखै गुण, मतलब कि तेसरी पैहला ओउलै ताकत और आपु परमेश्वर, दुनिया चाणनै रै बौगता दी तेसरै काम रै

जौरिऐ देखणै दी आशा सा, इदरा झाऊं कि लोगु कै कोई भी बाहनौ नाई आसतौ। 21 एजै कारण की परमेश्वर ज़ाणियो भी तिउंरै परमेश्वर रै लायक बौड़ाई और धन्यवाद नाई कियो, पर गौलत बिचार कौरदैं लागै, इदरा झाऊं कि तिउंरौ जासदी बुद्धि नाई तिउंरौ मन निआरौ हुई गौ आ। 22 सै आपु लै बुद्धिमान बोलियो मुख बौणी गौऐ। 23 और नाश ना हुणै वाले परमेश्वर री महिमा कु नाश हुणै वाले आदमी, और चडकु और धौण, और लौअराणै वाले कीड़ा री शौकली दी बौदली गौऐ। 24 एजै कारण परमेश्वर सै तिउंरै मौना री इच्छा रै अनुसार बुराई लै छाडी गौऐ, कि सै आपु मांझिऐ आपणै शरीरा री बेइज्जती कौरा। 25 कैलैकि तिउंरै परमेश्वर री सौचाई बौदलियो झूठ चाणी गोई, और दुनिया री अराधना और सेवा की, नाई कि तेस दुनियां चाणनै वाले री जो सौदा भौलौ आ। आमीन। 26 एथिलै परमेश्वर सै बुरै बिचारा रै वशा दी छाडी गौऐ; इदरा झाऊं की तिउंरौ छेउडी भी आच्छै बिचारा छाडियो गान्दै बिचार छाडदैं लागी। 27 तीणी इ मौरद भी छेउडी आइलै आच्छै वरताव छाडियो आपु मांझीऐ गान्दै काम कौरियो बरबाद औन्दै लागै, और मौरदुरे मौरदु आइलै गान्दै काम कौरियो आपणै गौलती रौ ठीक फल पाओ। 28 जेबी तिउंरै परमेश्वर नाई पराणनौ चाओ, ता परमेश्वर भी सै तिउंरै निकामै मौना माथै छाडी गौऐ कि सै गान्दै काम कौरा। 29 एथिलै सै सारै रौंगा रै अधर्मी, बुराई, और लोभ, और कूड-कपटा कु भौरुइयो; और चिड़नौ, और खून, और झौगडै, और छल-कपट, और मीशा कु भौरुइओ, और चुगली वाले, 30 बदनाम कौरणै वाले, परमेश्वर कु नफरत कौरणै वाले, दुजेउ री इज्जत नाई कौरणै वाले, घमंडी, शेखी मारने वाले, बुरी-बुरी बुशेऊ मानणै वाले, मां बाबा री आज्ञा नाई मानणै वाले, 31 बिण ओकली वाले, विश्वासा दी दोखौ देणै वाले, आच्छै प्यारा रै बीणा काठै बौणी गौऐ ई। 32 सै ता परमेश्वर री इयें विधी ज़ाणाई, कि इणै-इणै काम कौरणै वाले मौरणा री सज़ा रै लायक ई, तैबै भी ना सिरफ आपु ई एजै काम कौरदैं, पर इणै काम कौरणै वालेऊ कु खुश भी हुआई।

परमेश्वर रौ फैसलौ

2 ओ आरोप लाइणै वाले, तु चाऊ कोई भी कैलै ना औलौ, तैरौ कुछ मतलब नाई; कैलैकि जेजी बुशा दी तू दूजै माथै आरोप ला ई, सेजी बुशा दी आपुलै भी आरोपी बौणा ई, एथिलै कि तू जो आरोप ला ई, आपु सेजौ काम कौरा ई। 2 आमै ज़ाणी सी कि, इणै-इणै काम कौरणै वालेउ माथै परमेश्वर री तौरफा कु ठीक-ठीक सौजा रौ हुकम हुआ सा। 3 और ओ आदमी, तु जो इणै-इणै काम कौरणै वालेऊ माथै आरोप लाआ ई, और आपु ई तेस काम कौराई जेथरौ तू दूजै माथै आरोप ला ई; का इणौ सौमझाई, कि तु परमेश्वर री सौजा रै हुकमा कु पोरु बौचा ई। 4 का तु तेसरी दया, और सहन कौरनै वाली ताकत, और (सौबर) धीरजा रौ धन बेकार नाई ज़ाणदौ? और का तु नाई सौमझदौ, कि परमेश्वर री दया ताऊंलै मन बदलनौ शिखावा सा? 5 पर आपणै काठै और हठ वाले मौना रै अनुसार तेसरै रोशा रै दिना लै, जेथदी परमेश्वर रौ सौचौ फैसलौ परगट हुआ सा, आपुलै रोश कमाऊंदै लागौ औन्दौ। 6 सेऊ हर एकी-एकी लै तेसरै कामा रै अनुसार कु बौदलौ दिया सा। 7 जो आच्छै कामा दी रौइयो महिमा, और आदर, और सौदा री जिन्दगी री खोजा दी आ, तिउंलै सेऊ सौदा रौ जीवन दिया। 8 पर जो वाद-विवाद आ, और सौचाई नाई मानदैं, पर सै बुरै काम माना ई, तिऊं माथै रोशा और पाप पौड़ा सा। 9 और दुःख और संकट हर एक आदमी रै प्राणा माथै जो बुरौ कौरा सा, आशा लौ, पैहलै यहूदी माथै तैबै युनानी माथै। 10 पर महिमा और इज्जत और मुक्ति हर एकी लै मिला लौ, जो भौलौ कौरा सा,

पैहलै यहूदी माथे तैबै युनानी माथे। 11 कैलैकि परमेश्वर कासी आइलें आपणौ-मैरौ नाई कौरदौ। 12 एथीलै की जुणीए बिणा कानुना पाईयौ पाप कियौ, सै बिणा कानुना कौरी नाश भी हुआई, और जुणीए कानुन पाईयौ पाप कियौ, तिउंरी सौजा कानुना रै जौरीए हुआ। 13 कैलैकि परमेश्वरा रै कारे कानुन शुणनै वाले धौर्मी नाई, पर कानुना माथे चालणै वालौ धौर्मी बौणा ई। 14 तैबै जेबी दुजी जाती रै लोग जासकै कानुन नाई, स्वभावा कौरी कानुना री बुशा माथे चाला ई, तैबै कानुन तिउं कारे नाई हुणै माथे भी सै आपु लें आपु ही कानुन आ। 15 सै कानुना री बुशै आपणै-आपणै मौना दी लिखै औन्दी देखाळा ई और तिउंरी आत्मा भी गवाई दिआ, और तिउंरी फिकर आपु मांझीए आरोप ला ई, या तिउं बिण गौलती वालै चाणा ई। 16 जेजै दिने परमेश्वर मैरौ खुशी रै संदेशा रै अनुसार यीशु मसीह रै जौरीए आदमी री छुपी ऐन्दी बुशु रौ फंसलौ कौरा सा।

यहूदी और कानून

17 अगर ताउंलें यहूदी बोलाई, और कानुना माथे भरोसौ छाड़ा ई, और परमेश्वरा रै बारै दी घमण्ड कौराई। 18 और तेसरी मौरजी जाणाई और कानुना री शिक्षा शिखीयौ आच्छी बुशै प्यारी जाणाई। 19 और आपु माथे भरोसौ छाड़ा ई, कि हाऊं शेडेऊ के बाट देखाउणै वालौ, और न्यारी दी पौडै औन्देउ रौ प्याशौ ऊ। 20 और जासकै औकल नाई तिउंके शिखाऊणै वालौ, और छोहरू के उपदेश देणै वालौ आ, और ज्ञान, और सौच्चाई रौ पूतलौ, जो कानुना दी आ, मुके मिलौ आ। 21 यानी के, का तू जो ओरी के शिखावा ई, आपु के नाई शिखाऊंदौ? का तू चोरी ना कौरणै री शिक्षा दिआई, आपु ई चोरी कौरा ई। 22 तु जो बोलाई, गांदौ काम नाई कौरणौ, का आपु ही गांदौ काम कौराई? तू जो मुर्ति कु नफरत कौराई, का आपु ही मन्दिर लुटाई? 23 तू जो कानुना रै बारै दी घमण्ड कौराई, का कानून नाई मानियौ, परमेश्वरा री बेईज्जती कौराई? 24 कैलैकि तुमुरै कारणे दुजी जातीउ दी परमेश्वरा रै नांवा री बेईज्जती कौराई," जिणौ लिखौ औन्दौ भी आ। 25 अगर तू कानुना माथे चालालौ ता, तैबै खतना कौरी फायदौ ता आसा, पर अगर तू कानून नाई मानालौ ता, तैबै तैरौ खतना बिणा खतना जिणौ हुई गौ। 26 एथीलै अगर बिणा खतना वालौ आदमी कानुना री बिधी मानदें थाका लौ लागी, तैबै का तेसरी बिणा खतना री हालत खतनै रै बराबर नाई गौणीआली। 27 और जो आदमी शरीरा रै रूपा बिणा खतना वालौ रौआ अगर सेऊं कानून पूरौ कौरालौ, तैबै का ताउंलें चीडी निणा और खतना किये औन्दै तैबै भी कानून मानदौ नाई, आरोपी नाई बौणदौ? 28 कैलैकि सेऊ यहूदी नाई, पर परगटा दी यहूदी दिशा ई; और नाई सेऊ खतना सा, जो परगट आ, और शरीरा दी आ। 29 पर यहूदी सेई सी, जो मौना दी आ; और खतना सेई सा, जो जीवा रौ और आत्मा दी आ; नाई कि चीठी रौ: इणी ही तारिफ आदमी री तौरफा कु नाई पर परमेश्वरा री तौरफा कु हुआ सा।

3 एथीलै यहूदी री का बौडाई, और खतने रौ का फायदौ? 2 हर प्रकारा कु भौरी कुछ। पैहलै ता इणौ कि परमेश्वरा रौ वचन तिउं के सांभी ऐरौ। 3 अगर केती विश्वास चोडणै वालै निकलालै भी ता का हुआ। का तिउं रै विश्वास चोडणै कु परमेश्वरा री सौच्चाई बेकार ठहरा सा। 4 केभी भी नाई, पर परमेश्वर सौचौ और हर एक आदमी झुठौ ठहरा, जिणौ लिखौ औन्दौ आ, कि जेथ कौरी तू आपणी बुशा दी धौर्मी बौणा और फंसलै कौरदी बारै तू जीता लौ। 5 एथीलै अगर आमुरौ अधर्म परमेश्वरा री धार्मिकता बौणा सा, ता आमँ का बोली ई? का इणौ कि परमेश्वर जो रोश कौरा आ फंसलै नाई कौरदौ? एस ता हाऊं आदमी री रीती माथे बोलाऊ। 6 केभी भी नाई, नाई ता परमेश्वर दुनिया रौ फंसलौ किणौ कौरा सा? 7 अगर मैरे झुठा रै कारण परमेश्वरा री सौचाई तिउंरी महिमा लै भौरी का परगट हुई, तैबै कैलै मू पापी जिणौ सौजा रै लायक बौणा ई। 8 आमँ कैलै बुराई ना कौरिलै, कि भलाई निकला? जिणौ आमु माथे एजौ आरोप ला भी ई, और कुछ बोलाई, कि इऊंरौ एजौ ई बोलणौ सा। पर इणेऊ रौ आरोपी ठहराउणौ ठीक आ।

कोई भी धौर्मी नाई

9 ता तैबै का हुआ? का आमँ तिउं कु आच्छे ई? केभी भी नाई; कैलैकि आमुए यहूदिऊ और युनानिऊ दुइया माथे एऊ आरोप लाई ऐरौ आ कि सै सारै पापा रै वशा दी ई। 10 जिणौ लिखौ औन्दौ आ, कोई भी धौर्मी नाई, एक भी नाई। 11 कोई समझदार नाई, कोई परमेश्वरा लोडणै वालौ नाई। 12 सारै भोटकी गौए ई, सारै बेकार बौणी गौए, कोई भलाई कौरणै वालौ नाई, एक भी नाई। 13 तिउंरौ गौलौ खुली औन्दी ओडाची आ: तिउंवै आपणी जीभा कौरी दोखौ किआ आ: तिउरै ओठा दी सापा रौ बीश आ। 14 और तिउं रै मूँ श्राप और कौडवै कौरी भौरुआ औन्दौ। 15 तिउरै बाँणणै लोऊ बौआउणा लै तेज ई। 16 तिउंरी बाटा दी नाश और दु:ख आ। 17 तिउंरै आच्छी बाट नाई जाणी। 18 तिउरै आखी कारे परमेश्वरा रौ डौर नाई। 19 आमँ जाणी ई, कि कानून जो कुछ बोला सा और तिउं आइलै बोला आ, जो कानुना रै आधीना दी: एथीलै कि हर एकी रै मुह बंद चांई कौरणै, और सारी दुनिया परमेश्वरा री सौजा रै लायक बौणा। 20 कैलैकि कानुना रै कामा कु कोई आदमी तेसरै सामनै धौर्मी नाई बौणदौ, एथीलै कि कानुना रै जरीए पापा री पहचाण हुआ सा।

विश्वासा कौरी धार्मिकता

21 पर आबै कानुना कु अलग परमेश्वरा लै सेजी धार्मिकता परगट हुई आ, जेथरी गवाही कानून और भविष्यवक्ता दिआई। 22 मतलब परमेश्वरा री ए धार्मिकता, जो यीशु मसीह माथे विश्वास कौरणै दी सारै विश्वास कौरणै वालेउ लै आ। कैलैकि कुछ भेद नाई। 23 एथीलै कि सारेउए पाप कियौ और परमेश्वरा री महिमा कु दूर ई। 24 पर तिउरै बौडी दया दी तेस छुटकारे रै जौरिऐ जो मसीह यीशु दी आ, सारै मुफ्तिऐ (सेत-मेंत) धौर्मी चाणा ई। 25 सेऊ परमेश्वरे तेसरै लोऊ रै कारण एक इणौ प्रायश्चित बौणौ, जो विश्वास कौरणै दी काम कौरणै वालौ हुआ सा, कि जो पाप पैहले की ऐरे, और जास माथे परमेश्वर आपणी सहनशीलता रै कारण ध्यान नाई दैआ। तिउं रै बारै दी सेउ आपणी धार्मिकता परगट कौरा। 26 यानी के एजे ऐ बोग्तै तिउंरी धार्मिकता परगट हुआ कि जेथ कौरी सेऊ आपु ई धौर्मी बौणा, और जो यीशु माथे विश्वास कौरालौ, तेसरौ भी धौर्मी ठहराऊणै वालौ हुआ। 27 ता घमण्ड कौरणौ किये रौआ? तेसरी ता जागह नाई: केजै कानुना रै कारण कु? का कौरमा रै कानुना कु? नाई, यानी के विश्वासा रै कानुना रै कारणे। 28 एथीलै आमँ एजे नतीजे माथे पहुंची ई, कि आदमी कानुना रै कामा कु अलग हुआ, विश्वासा रै जौरिऐ धौर्मी बौणा सा। 29 का परमेश्वर सीरफ यहूदिउ रौ ई आ?, का दुजी जातीउ रौ नाई आ? ओ, दुजी जाती रौ भी आस्ती आ। 30 कैलैकि एक ई परमेश्वर आ, जो खतना वालेउ विश्वासा दी और बिणा खतना वालेउ भी विश्वास रै जौरिऐ धौर्मी चाणा सा। 31 ता का आमँ कानून विश्वासा रै जौरिऐ बेकार बौणा सा? केभी भी नाई, पर कानून पाकौ कौरा सा।

अब्राहमा रौ उदाहरण

4 एथीलै आमँ का बोली आमारौ बाब इब्राहीम जो शरीरा दी थौ तेसलै का मिलौ आ? 2 कैलैकि अगर इब्राहीम कामा कु धौर्मी ठहरावा थै, तैबै तेसके घमण्ड कौरणै री जागह हुआ थी, पर परमेश्वरा रै सामने नाई। 3 पवित्रशास्त्र का बोला सा? इणौ कि, "इब्राहीम परमेश्वरा माथे विश्वास किआ, और सेउ तेथीलै धार्मिकता दी गौणुआ। 4 कामा कौरणै वाले री मजदुरी दैणौ दान नाई, पर हक सौमझिआ सा। 5 पर जो काम नाई कौरदौ मतलब कि बिणा भक्ती रै धर्म ठहराऊणै वाले माथे विश्वास कौरा सा, तिउंरौ विश्वास तिउंलै धार्मिकता गिणिया सा। 6 जास परमेश्वर बिणा कामै धौर्मी ठहरावा सा, तेसलै दाउद भी भौलौ बोला सा। 7 भौलै ई सै, जासरै बुरे काम माफ हुऐ, और जासरै पाप छुपाई गौए। 8 भौलै ई सै आदमी जास परमेश्वर पापी नाई ठहरावा लौ। 9 त एऊ भौलौ वचन, का खतना वालेऊ लै आ, या बिणा खतना वालेउ लै भी? आमँ इणौ बोली ई, "कि इब्राहीमा कालै तेसरौ विश्वास धार्मिकता गौणुई गौ आ।" 10 तैबै सेऊ किणौ गिणुआ आ? खतनै री हालता दी या बिणा खतनै री हालता दी? खतनै री हालता दी नाई

पर बिणा खतनै री हालता दी। 11 तिणिए खतनै रौ निशाण पाओ, कि तेस विश्वासा री धार्मिकता माथे छाप हुआ ली, जो तिणिए बिणा खतनै री हालती दी थौं छाड़ौ औन्दौ: जिणै कौरी तिऊ सारेउ रौ बाब ठहरा, जो बिणा खतनै री हालती दी विश्वास कौराई, ताकी सैं भी धौर्मी ठहरा लै। 12 और तिऊ खतना किए औन्देउ रौ बाब हुआ, जो ना सीरफ खतना किए औन्दे ई, पर आमारे बाब इब्राहीमा रै तेस विश्वासा री लीका दी भी चालाई, जो तिउंरें बिणा खतना री हालती दी किओ थौ।

विश्वासा रै ज़ोरिए वाइदौ मिलणौ

13 कैलैकि ऐ प्रतिज्ञा आ कि सेउ दुनिया रौ वारिस हुआ सा, न इब्राहीमा लै, न तेसरें वंशा लै कानूना रै ज़ोरिए देई गोई थी, पर विश्वासा री धार्मिकता रै ज़ोरिए मिली। 14 कैलैकि अगर कानून वालें वारिस ई, ता विश्वास बेकार और प्रतिज्ञा बिण फौला री ठहरी। 15 कानून ता रोश बोड़ावा सा, और जिऐ कानून नाई तिए तेथारौ उल्लंघन नाई। 16 एज्जे कारणे प्रतिज्ञा विश्वासा माथे आधारित आ, कि बौडी दया री रीती माथे हुआ, कि प्रतिज्ञा सारी पीडीउ काले पाकौं हुआ, न कि सीरफ तेसलै जो कानून वालो आ, यानी की तिउंलै भी जो इब्राहीमा रै बराबर विश्वास कौरणें वालो आ: सेऊ ता आमु सौबी रौ बाब आ, 17 जिणौ लिखौ औन्दै आ, "कि मुइए तु भौरी ज़ाती रौ बाब चाणौ ई,— तेस परमेशवरा रै सामने ज़ास माथे तिणिए विश्वास किओ और जो मौरें औन्दै जिऊंदौ कौरा सा, और जेज़ी बुशें आसती ई नाई, तिऊ रौ नाउं इणौ निआं आ, कि मानौ कि सैं आसती आ। 18 तिणिए निराशा दी भी आशा छाड़ियो विश्वास किओ, एथीलै कि तेस वचना रै अनुसार कि, "तैरौं वंश इणौ औलौं" सेऊ भौरी ज़ातिउ रौ बाब हुआ। 19 सेऊ जो शौ बौरषा रौ थौ, आपणें मौरें औन्दै जिणें शरीर और सारा रै गौरबा री मौरिऔन्दी ज़ीणी हालत ज़ाणीओ भी विश्वासा दी कमज़ोर नाई हुओ। 20 और ना ता अविश्वासी हुईयो परमेश्वरा री प्रतिज्ञा माथे शक किओ, पर विश्वासा दी पाकौं हुईयो परमेश्वरा री महिमा की। 21 और पाकौं ज़ाणौ, कि जेज़ी बुश री तिणिए प्रतिज्ञा कि आ, सेऊ तिए पुरी कौरणें री भी सामर्थ आ। 22 एज्जे कारण, एऊ तेसलै धार्मिकता गौणुई गौ। 23 और एऊ वचन, "कि विश्वास तेसलै धार्मिकता गौणुई गौ, न सीरफ तेसी लै थौं लिखौ औन्दै, 24 याने कि आमु काले भी ज़ासलै विश्वास धार्मिकता गौणीया लौ, याने कि आमु काले जो तेस माथे विश्वास कौराई, जुणिए आमारे प्रभु यीशु मौरें औन्दै मांज़िया कु जिउंदौ किओ। 25 सेऊ आमारे बुराई लै पाकुडुओ, और आमु धौर्मी चाणना लै जिऊंदौ भी किओ।

परमेश्वरा आइलै मेल-मिलाप

5 जेबी आमै विश्वासा कौरी धौर्मी बाणें, ता आपणें प्रभु यीशु मसीह रै ज़ोरिए परमेश्वरा आइलै मेल छाड़ौ। 2 ज़ासरें ज़ोरिए विश्वासा रै कारण तिए बौडी दया झांऊ, ज़ासदैं आमै बाणी ई, आमारी पौऊंच भी हुई, और परमेश्वरा री महिमा और आशा दी घमण्ड कौरी। 3 सीरफ एऊ इ नाई, पर आमै दुखा दी भी घमण्ड कौरी, इणै ज़ाणियो की दुखा कु सहन कौरणें री ताकत, 4 और सहन कौरणें री शक्ति कु आछौं निकुलणौं और आछे निकुलणें कु भरोसो पैदौ हुआ सा; 5 और भरोसै कु शौरम नाई औन्दी, कैलैकि पवित्र आत्मा जो आमु कै देई औन्दी आ तेथरें ज़ोरिए परमेश्वरा रौ प्यार आमारे मौना दी पाओ औन्दी आ। 6 कैलैकि जेबी आमै कमज़ोर ई थैं, तैबे यीशु मसीह ठीक बांगता दी जो भौक्ती नाई कौरदैं तिउंरी ताई मौरौं। 7 पर शायद ही कुण धौर्मी आदमी लै मौरा, इणौ ता मुश्किल आ, पर का ज़ाणी कास भौलै आदमी लै कुण मौरणें री भी हिम्मत कौरा। 8 पर परमेश्वर आमु माथे आपणें प्यारा री भलाई इणै कौरी परगट कौरा आ, कि जेबी आमै पापी ई थैं तेबी मसीह आमु लै मौरौं। 9 एथीलै ज़ैबे कि आमै, आबे तेसरें लोऊ रें कारण धौर्मी बाणें, ता तेसरें ज़ोरिए रोशा कु कैलै नाई बाँचिलै? 10 कैलैकि दुश्मन हुणें री हालता दी हाऊं ता तेसरें छोहर मौरणें रै ज़ोरिए आमारे मेल परमेश्वरा आइलै हुओ तैबे मेल हुईयो तेसरि ज़िन्दगी रै कारण आमै मुक्ति कैलै ना पाइलै। 11 और सीरफ इणौ इ नाई, पर आमै आपणें प्रभु यीशु

मसीह रै ज़ोरिए ज़ासरें ज़ोरिए आमारे मेल हुओ आ, परमेश्वरा रै बारे दी घमण्ड भी कौरा ई।

आदमा रै ज़रिए मौउत- मसीहा रै ज़रिए ज़िन्दगी

12 एथीलै जिणौ एकी आदमी रै ज़ोरिए पाप दुनिया दी आशौ, और पापा रै ज़ोरिए मौत आशी, और एजी रीती कु मौत सारेउ आदमी दी फौइली गोइ, एथीलै कि सौबिए पाप कियो। 13 कैलैकि कानून दैणै झाऊं पाप दुनिया दी ता थौं, पर जिऐ कानून नाई, तिए पाप नाई गिणीदौ। 14 तैबे भी आदमा कु मूसा झाऊं मौउततै तिऊं लोगु माथे भी राज कियो, जुणिए तेस आदमा री गुनाहा री नाई जो तेस आशणें वालें रौ निशाण आ, पाप नाई कियो। 15 पर जिणी बुराई री हालत आ, तिणी ई बौडी दया री वरदाना री नाई, कैलैकि जेबी एकी आदमी री बुराई कु भौरी का लोग मौरें, ता परमेश्वरा री बौडी दया और तेसरौ जो दाण एकी आदमी रै, यानी की यीशु मसीह री बौडी दया कु हुओ, भौरी लोगु माथे ज़रुरी ई भौरी ज़ादौ हुओ। 16 और जिणौ एकी आदमी रै पापा कौरणें रौ नतिजौ हुओ, तिणौ ही दाणा री हालत नाई, कैलैकि एकी ई रै कारणे सज़ा री आज्ञा रौ फैसलौ हुओ, पर भौरी सारें गुनाहा कु इणौ वरदान पैदौ हुओ, कि लोग धौर्मी ठहरें। 17 कैलैकि जेबी एकी आदमी रै गुनाह रै कारण मौउततै तेस एकी ई रै ज़ोरिए राज कियो, ता जो लोग बौडी दया और धर्मा रें जिणें वरदान भौरी का पा ई सें एक आदमी रै, मतलब कि यीशु मसीह रै ज़ोरिए पाकौं ई सौदा ज़िन्दगी दी राज कौराई। 18 एथीलै जिणौ एक गुनाह सौबी आदमी लै सौज़ा री आज्ञा रौ कारण हुओ, तिणौ ई एक धौर्मा रौ काम भी सौबी आदमी लै ज़िन्दगी रै निमित धौर्मी ठहराउणें रौ कारण बाणौं। 19 कैलैकि जिणौ एकी आदमी रै आज्ञा ना मानणें कु भौरी लोग पापी बाणें, तिणी ई एक आदमी रै आज्ञा मानणें कु भौरी लोग धौर्मी बाणें। 20 और कानून बीचा दी आशी गौ, कि गुनाह भौरी हुआ, पर जिऐ पाप भौरी हुओ, तिए बौडी दया भी तेस कु भी भौरी हुओ। 21 कि जिणौ पापें मौउत फहलाइओ राज कियो, तिणौ ही आमारे प्रभु यीशु मसीह रै ज़ोरिए बौडी दया भी सौदा री ज़िन्दगी लै धौर्मी ठहराइयो राज कौरा।

पापा लै मौरौं औन्दौ: मसीहा दी ज़िन्दगी

6 तैबे आमै का बोली? का आमै पाप कौरदैं थाकी लागी, कि बौडी दया भौरी हुआ? 2 केभी भी नाई, आमै जेबी पापा कौरना लै मौरौं गोरै ता तैबे आमै एथे बासिए आमै एथी दी किणी ज़िन्दगी बिताई? 3 का तुमै नाई ज़ाणदैं, कि आमु जेतीए मसीह यीशु रौ बपतिस्मौ नियौं, ता तेसरि मौउता रौ बपतिस्मौ नियौं? 4 ता तिआं मौउता रौ बपतिस्मा पाईणा कु आमै तेस आइलै दाबी गोरै, ताकि जिणौ मसीह बाबा री महीमा रै ज़रिए मौरें औन्दै मांज़ीआ कु जिउंदौ किओ, तिणी ई आमु भी नौई ज़िन्दगी री चाल जा चालणी। 5 कैलैकि अगर आमै तेस री मौउता री समानता दी तेस आइलै कौठे हुई गोरै ता ज़रुरी तेसरें जीउंदै हुणें री समानता दी भी कौठे हुई आ। 6 कैलैकि आमै ज़ाणी ई, कि आमारे पुराणें आदमी री ज़िन्दगी यीशु आइलै कुसा दी चडाई गोई, ताकि पापा वालो शरीर बेकार हुआ, ताकि आमै आशणें वालें पापा री गुलामी दी न रौई। 7 कैलैकि जो मौरौं गौ, सेऊ पापा कु छुटियो धौर्मी बाणौं। 8 एथीलै अगर आमै मसीह आइलै मौरौं गोरै, ता आमारे विश्वास एऊ आ कि तेस आइलै जीउंदै भी हुई ई। 9 कैलैकि इणौ ज़ाणी ई, कि मसीह मौरें औन्दै मांज़ीआ कु जीउंदौ हुईयो तैबे मौरदौं नाई, तेस माथे ऐबे मौरणें रौ हक नाई आ। 10 कैलैकि सेऊ जो मौरौं गौ आ, ता पापा काले एकी बारे मौरौं गौ आ; पर जो जीउंदौ सा, ता परमेश्वरा काले जीउंदौ आ। 11 इणी ई तुमै भी आपु पापा लै ता मौरौं गोरै, पर परमेश्वरा काले मसीह यीशु दी जीउंदै सौमज़ौं। 12 एथीलै पाप तुमारे मौरणें वालें शरीरा दी राज ना कौरा, कि तुमै तेस री मौरजी रै आधीन रौओ। 13 और ना आपणें आंग अधर्मा रै हथीयार हुणा लै पापा कै सांबौं, पर आपु मौरें औन्दै मांज़ीआ कु जीउंदौ हुओ औन्दौ ज़ाणियो परमेश्वरा काए सांबौं, और आपणें आंग धौर्मा रै हथीयार हुणा लै परमेश्वरा कै सांबौं। 14 और तुम माथे पापा रौ हक नाई औन्दौ, कैलैकि तुमै कानूना रै आधीन नाई पर बौडी दया रै आधीन ई। धौर्मी रौ कामा दी या पापा रै दास

धार्मिकता है सेवक

15 ता का हुआ? का आमै एथीलै पाप कौरी लै, कि आमै कानूना है आधीन नाई यानी कि बोड़ी दया है आधीना दी ई? केभी भी नाई। 16 का तुमै नाई जाणद, कि जासरै हुकुम मानणा लै तुमै आपु सेवका बाशिरे सांबाई, तेसी है सेवक हुआ: और जासरै माना ई, चाउ पापा है, जासरै अन्त मौउत आ, चाउ हुकुम मानणै रौ, जासरै अन्त धोर्मी रौ काम आ। 17 पर परमेश्वरा रौ धन्यावाद चाई हुआ, कि तुमै जो पापा है सेवक थे तैबे भी मौना कु तेस उपदेश मानणै वालै हुई गौरे, जासरै सांचे दी पाई गौरे थे। 18 और पापा कु छुड़ाइयौ धोर्मा है सेवक हुई गौरे। 19 हाऊं तुमुरै शरीरा री कमजोरी है कारण आदमी री रीति माथे बोलाऊ, जिणै तुमुरे आपणै आंग बुरै कामा लै अशुद्धता और गांदे कामा लै दास जाणियो सांबो थौ, तिणी ई ऐबै आपणै आंग पवित्र हुणालै धोर्मा है दास जाणियो सांबो। 20 जेबी तुमै पापा है दास थे, ता धोर्मा री तोरफा कु आजाद थे 21 एथीलै जेजी बुशा कु तुमै ऐबै शोर्मिया ई, तिऊं कु तुमै सेजे बौगै का फल पा थे 22 कैलैकि तिऊं रौ अन्त ता मौउत आ पर आबे पापा कु आजाद हुइयौ और परमेश्वरा है सैवक बौणियो तुमु कै फल मिलौ जासकु पवित्रता मीला आ, और तेसरौ अन्त सौदा री जिन्दगी आ। 23 कैलैकि पापा री मजदुरी ता मौउत आ, पर परमेश्वरा रौ वरदान आमारै प्रभु मसीह यीशु दी सौदा री जिन्दगी आ।

शादी-शुदा जिन्दगी रौ औनैणौ

7 ओ भाईयो, का तुमै नाई जाणद (हाऊं कानून जाणनै वालेउ लै बोलाउ), कि जेबी झाऊं आदमी जीऊदौ रौआ सा, तेबी झाऊं तेस माथे कानूना रौ हक रौआ सा। 2 कैलैकि ब्याई औन्दी छेवडी कानूना है अनुसार जेबी झाऊं तिआरौ बोउटौ जिउंदौ आ तेबी झाऊं तेस आइलै बानुइ रौआ सा, पर अगर बोउटौ मोरी जाआ लौ, ता सै बोउटौ री कानूना कु छुटी गोई। 3 एथीलै अगर तिआरौ बोउटौ जीऊंदौ आ सै डेआली कास दूजे आदमी आइलै, ता तिआलै बुरै कामा कौरणै वाली बोलाई, पर अगर बोउटौ मोरी जाआ लौ, ता सै तेस कानूना कु छुटी गोई आ, इदरा झाऊं कि अगर सै कास दूजे आइलै डिआली तैबे भी सै बुरे काम कौरणै वाली नाई औली। 4 एथीलै ओ आमारै भाइयो, तुमै भी मसीह री शरीरा है जौरिरे कानूना लै मौरै औन्दै बौणी गौरे, कि तेस दुजे है हुआ, जो मौरै औन्दै मांझीरे कु जीऊंदौ हुआ: ताकि आमै परमेश्वरा कालै फल आणी। 5 कैलैकि जेबी आमै शरीरा है थे, ता पापा री इच्छा जो कानूना है जौरिरे थी, मौउता रौ फल पैदौ कौरणा लै आमारै आंगा दी काम कौरा थी। 6 पर जासरै बानणा दी आमै थे तेसलै मौरियों, आबे कानूना कु इणै छुटी गौरे, कि चीठी री पुराणी रीति माथे नाई, पर आत्मा री नौई रीति माथे सेवा कौरा ई।

कानून और पाप

7 ता आमै का बोली? का कानून पाप आ? बिल्कुल नाई। पर बिणा कानूना कु हाऊं पाप नाई प्राणदौ: कानून अगर नाई बोलदौ, कि लालच नाई कर ता हाऊं लालच नाई जाणदौ। 8 पर पापै मोकौ पाइयो हुकुमा है जौरिरे मुंदी सारै रौंगा रौ लालच पैदौ किओ, कैलैकि बिण कानून है पाप मुदौ आ। 9 हाऊं ता कानूना है बिणा पैहलै जीऊंदौ थौ, पर जेबी हुकुम आशौ, ता पाप जीऊंदौ हुआ और हाऊं मोरी गौ। 10 और सेऊ हुकुम जो जीन्दगी लै थौ, सेऊ मुंलै मौरणै रौ कारण बौणौ। 11 कैलैकि पापै मोकौ पाइयो हुकुमा है जौरिरे हाऊं बहकाओ, और तेसी है जौरिरे हाऊं झांगी भी गो ऊ। 12 एथीलै कानून पवित्र आ, और हुकुम भी ठीक और आच्छौ आ। 13 ता का सेऊ जो आच्छौ थौ, मुंलै मौउत बौणी? बिल्कुल नाई! पर पाप तिआं आच्छी चीजा है जौरिरे मुं कालै मौउत पैदी करणै वालौ हुआ कि तेसरौ पाप हुणौ परगट हुआ, और हुकुमा है जौरिरे पाप भौरी ही पाप वालौ बौणा।

आदमिउ रौ पाप

14 कैलैकि आमै जाणी ई कि कानून ता आत्मिक आ, पर हाऊं शारीर और पापा है हाथा दी ऊ बिकौ औन्दौ। 15 और जो हाऊं बोलाउ, तेस हाऊं नाई

जाणदौ, कैलैकि जो हाऊं चाहाऊ,, तेस नाई कौरदौ, पर जेथ कु मुकै नफरत आशा सा, तेसी कौराऊ। 16 और अगर, जो हाऊं नाई चाहादौ तिणौ ई कौराऊ, ता हाऊं मानाऊ, कि कानून भौलौ आ। 17 ता इणी हालता दी तेसरौ कौरणै वालौ हाऊं नाई, पर पाप आ, जो मुन्दी आ बौसौ औन्दौ। 18 कैलैकि हाऊं जाणांउ, कि मुन्दी यानी कि मैरै शरीरा दी कोई आच्छी चीज नाई बौसदी, इच्छा ता मुन्दी आ, पर भौलै काम मुकै नाई औन्दै। 19 कैलैकि जास आच्छे कामा री हाऊं इच्छा कौराउ, तेस ता नाई कौरदौ, पर जास बुराई री इच्छा नाई कौरदौ, तिणै कौराउ। 20 पर अगर हाऊं तिणौ ई कौराउ, जासरी इच्छा नाई कौरदौ, ता तेसरौ कौरनै वालौ हाऊं न रौओ, पर पाप जो मुन्दी बौसौ औन्दौ आ। 21 एथीलै हाऊं एऊ कानून पाआ ऊ, कि जेबी भौलाई कौरणै री इच्छा कौराउ, ता बुराई मुं काए आशा आ। 22 कैलैकि हाऊं भीतरी आदमी कु ता परमेश्वरा है कानूना कु भौरी खुश रौआ ऊ। 23 पर मुकै आपणै आंगा दी दुजे रौंगा रौ कानून आ दिशदौ लागी औन्दी, जो मेरी बुद्धि री कानूना कु पिटिया सा, और मुं पापा री कानूना है बानणा दी पा सा जो मैरै आंगा दी आ। 24 हाऊं किणौ बदकिस्मत आदमी ऊ! मुं एस मौरणै वालै शरीरा कु कुण छुड़ावा आ। 25 हाऊं आपणै प्रभु यीशु मसीह है जौरिरे परमेश्वरा रौ धन्यावाद कौराउ: एथीलै आपकु ता हाऊं बुद्धि कु परमेश्वरा री कानूना रौ, पर शरीरा कु पापा री कानूना रौ काम कौराऊ।

पवित्र आत्मा है जरिरे जिन्दगी

8 एथीलै ऐबै जो मसीह यीशु दी आ, तिऊं माथे सजा रौ हुकुम नाई:

कैलैकि सै शरीरा है अनुसार नाई पर आत्मा है अनुसार चाला ई। 2 कैलैकि जिन्दगी री आत्मा कानून मसीह यीशु दी मुं पापा री, और मौउता री कानूना कु आजाद कौरी गौरे। 3 कैलैकि जो काम कानून शरीरा है कारण कमजोर हुईओ ना कौरी बौलै, सेऊ परमेश्वरै कियो, यानी के आपणौ छेहरु पापी शरीरा री समानता दी, और पापा लै बलिदान हुणा लै भेजियो, शरीरा दी पापा माथे सजा रौ हुकुम दैओ। 4 एथीलै कि कानूना री विधि आमु दी जो शरीरा है अनुसार नाई पर आत्मा है अनुसार चाला आ, पूरी चाई कौरणी। 5 कैलैकि शरीरा वालौ आदमी शरीरा री बुशै माथे मन ला ई; पर आत्मा वालौ आत्मा री बुशु माथे मन ला ई। 6 शरीरा दी मन लाइणौ ता मौत आ, पर आत्मा दी मन लाइणौ जिन्दगी और शान्ति आ। 7 कैलैकि शरीरा दी मन लाइणौ ता परमेश्वरा आइलै दुशमनी छाड़नी आ, कैलैकि न ता परमेश्वर री कानूना है आधीन आ, और ना हुई बौलदौ। 8 और जो शरीरा री हालता दी आ, सै परमेश्वर खुश नाई कौरी बौलदौ। 9 पर जेबी परमेश्वरा री आत्मा तुमु दी बौसा आ, ता तुमै शारीरिक हालता दी नाई, पर आत्मिक हालत आ। अगर कास दी मसीह रौ आत्मा नाई ता सेऊ तेसरौ आदमी नाई। 10 और अगर मसीह तुमु दी आ, ता शरीर पापा है कारण मौरौ औन्दौ आ; पर आत्मा धोर्मा है कारण जीऊंदी आ। 11 अगर तेसी रौ आत्मा ज़ुणीरे यीशु मौरै औन्दै मांझीरे कु जीऊंदौ किओ आ, तुमु दी बौसी औन्दी आ; ता ज़ुणीरे मसीह मौरै औन्दै मांझीरे कु जीऊंदौ किओ, सेऊ तुमारै नाश हुणै वालै शरीरा लै भी आपणी आत्मा है जरिरे जो तुमु दी बौसी औन्दी आ, जिऊंदौ कौरा सा। 12 एथीलै ओ भाइयो, आमै शरीरा है कर्जदार नाई, ताकि शरीरा है अनुसार आमै दिन काटी। 13 कैलैकि अगर तुमै शरीरा है अनुसार दिन काटा लै, ता पोरु मौरा लै, अगर आत्मा कौरी शरीरा है काम नाश कौरा लै ता तुमै जीऊंदै रौआ लै। 14 एथीलै कि जेती लोग परमेश्वरा री आत्मा कौरी चाला ई, से ई परमेश्वरा है छोहरु ई। 15 कैलैकि तुमुलै गुलामी री आत्मा नाई मिली कि तैबे डौरै औन्दै ई, पर धोर्म बेटै री आत्मा मिली सा, जासलै आमै ओ अब्बा, ओ बाब बोलियो औटाई। 16 आत्मा आपु आमुरी आत्मा आइलै गवाई दिया सा, कि आमै परमेश्वरा री सन्तान ई। 17 और अगर सन्तान ई, ता वारिस भी, पर परमेश्वरा है वारिस और मसीह है साथई वारिस ई, जेबै कि आमै तेस आइलै दुख उटाई कि तेस आइलै महिमा भी पाई।

आशणै वालै बौक्ता दी परगट हुणै वाली महिमा

18 कैलैकि हाऊं समझाऊ, कि एस बौगता है दुख और क्लेश तेस महिमा है नजदीक, जो आमु माथे परगट हुणै वाली आ, कुछ भी नाई। 19 कैलैकि

धोतरा बोड़ी आशा वाली नोजरी कु परमेश्वर रै छोहरु री परगट हुणै री बाट लोड़दैं इ लागै औन्दै।²⁰ कैलैकि दुनिया आपणी इच्छा कु नाई पर अधीन कौरणै वालै री तौरफा कु बेकारा रै आधीन इएँ आशा कु की गई।²¹ कि दुनिया भी आपु ई नाशा री गुलामी कु छुटकारा पाइयो, परमेश्वर री सन्तानु री और महिमा री आज्ञादी मिला।²² कैलैकि आमै जाणी ई, कि सारी दुनिया इबी झाऊं मिलियो लेशा और दुखा दी पोड़ी औन्दी तौड़पा आ।²³ और सीरफ सेऊ नाई पर आमै भी जासकै आत्मा रै पैहलौ फल आ, आपु ई भीतरा तौलै लेरी आ; और धोर्म बेटै हुणे री, यानी के आपणै शरीरा रै छुटकारै पाहणै री बाट लोड़ी आ।²⁴ आशा रै जरिरे ता आमूलै मुक्ति मिली आ पर जेजी चीजा री आश छाडी आ जैबै सै दिशाली' तैबै सै आश कियै रौई? कैलैकि जेजी चीजा कोई देखदैं आ लागौ औन्दी तेसरी आश का कौरा सा? ²⁵ पर जेजी चीजा आमै नाई देखदैं, अगर तेसरी आश छाडी ई, ता धीरजा कौरियो तेसरी बाट भी लोड़ी ई।²⁶ इणै कौरा आत्मा भी आमारी कमजोरी दी मजद कौरा आ, कैलैकि आमै नाई ज्ञानदैं, कि प्राथना किणै कौरा चाई कौरनी, पर आत्मा आपु ई इणी आहें भौरा भौरियो जौ आमारी सौमझी कु भी बाइरै आमुलै औरज कौरा आ।²⁷ और मन परखुणै वालौ ज्ञाणा आ, कि आत्मा री इच्छा का सा? कैलैकि सै पवित्र लोगु कालै परमेश्वर री इच्छा रै अनुसार औरज कौरा आ।²⁸ और आमै जाणी ई, कि जौ लोग परमेश्वर आइलै प्यार छाड़ाई, तिऊं कालै सारी बुशै मिलियो भौलाई पैदौ कौरा ई; यानी के तिऊं कालै जौ तेसरी इच्छा रै अनुसार औटाए औन्दै ई।²⁹ कैलैकि जौ तिणीए पैहलै कु जाणी गौए ई सै पैहलै कु ठहराई भी गौए ई कि तेसरै छोहरु जिणै हुआ ताकि सेऊ भौरा भाईऊ दी पैहलौ जेतौ बौणा।³⁰ तैबै जौ तिणीए पैहलै कु ठहराए, सै औटाए भी ई, और जौ औटाए, सै धोर्म भी ठहराए, तिउंलै महिमा भी देई।

परमेश्वर रौ प्यार

³¹ ता आमै इऊं बुशु रै बारै दी का बोली? अगर परमेश्वर आमु भीलै आ, ता आमारौ बिरोद्धी कुण हुई सौका आ? ³² जुणीए आपणौ इकलौतौ छोहरु भी नाई छाडौ, पर सेऊ आमु सौबी लै दैऔ: सेऊ तेस आइलै आमु' और सारौ कुछ कैलै नाई दैदौ? ³³ परमेश्वर रै छांटे औन्दैउ माथे आरोप कुण ला? परमेश्वर सेऊ आ जौ तिऊं धोर्मै ठहराउणै वालौ आ। ³⁴ तैबै कुण आ जौ सौजा रौ हुकम दिया? मसीह सेऊ आ जौ मौरा गौ पर मौरै औन्दै मांझिऊ कु जीउंदौ भी हुआ, और परमेश्वर री सुलटी भिलै आ, और आमु लै औरज भी कौरा आ। ³⁵ आमु कुण मसीह रै प्यारा कु ओलग कौरा सा? का दु:ख या मुसीबत, या झोगड़े या काल, या नंगाई, या खौतरौ, या तलवार? ³⁶ जिणौ लिखौ औन्दौ आ, कि ताउंलै आमै दिन भर घात हुई आ: आमु झांगणै वाली भेरी जीणी गिणा ई। ³⁷ पर इऊं सौबी बुशै दी आमै तेसरै जरिरे जुणीए आमु कु प्यार कियो आ, जितणै कु भी भौड़ियो ई। ³⁸ कैलैकि हाऊं पाकौ ज्ञाणाऊं, कि ना मौउत, ना जिन्दगी, ना सौरगा रौ दूत, ना परधानताएँ, ना आज कालकौ, ना आशणै वालौ, ना ताकत, ना ऊंचाई, ³⁹ ना गहराई और ना कोई धौतरा, आमु परमेश्वर रै प्यारा कु, जौ आमारै प्रभु मसीह यीशु दी आ, ओलग कौरा बौलदौ।

परमेश्वर और तेसरै छांटे औन्दै लोग

9 हाऊं मसीह दी सौच्यौ बोला ऊ, हाऊं झूठ नाई बोलदौ और मेरी आत्मा विवेक भी पवित्र आत्मा री गवाही दिया आ। ² कि मुलै भौरा दु:ख ई, और मेरौ मन सौदा दुखदैं थाका लागी, ³ कैलैकि हाऊं इदरा झाऊं चाहा थौ कि आपणै भाईउ कालै जौ शरीरा कौरा मेरै ब्रादरी ई, आपु ई मसीह कु शापित हुआई। ⁴ हाऊं इस्राएली ऊ, और धोर्म बेटै रौ अधिकारी और महिमा और वाइदैं और नियम और ब्राँत और प्रतिज्ञाएँ तिऊं री ई। ⁵ स्याणै भी तिऊं रै ई, और मसीह भी शरीरा कु तिऊं मांझीआ कु हुआ, जौ सौबी माथे परम परमेश्वर सारै जुगा झाऊं भौलौ आ। आमीन। ⁶ पर इणौ नाई, कि परमेश्वर रौ वचन टौली ऐरौ, एथीलै कि जौ इस्राएला रै वंशा रौ आ', सै सारै इस्राएली नाई। ⁷ और ना इब्राहीमा रै वंश हुणै रै कारण सौबी तेसी री सन्तान ठहरा, पर लिखौ औन्दौ आ कि इसहाका कु तैरौ वंश गोणिया।

⁸ मतलब कि शरीरा री सन्तान परमेश्वर री सन्तान नाई, पर वाइदैं री सन्तान वंश गिणीया सा।⁹ कैलैकि वाइदा रौ वचन एऊ आ, कि हाऊं' एजै बौरतै रै अनुसार आशाऊ, और सारा रौ छोहरु हुआ।¹⁰ और सिर्फ इणौ ई नाई, पर जेबी रिबका भी एकी कु मतलब के आमारौ बाब इसहाका कु गौरकडी थी।¹¹ और इबी झाऊं ना ता छोहरु पैदैं हुए थै, और ना तिउंए कुछ भौलौ कियो और ना तिउंए कुछ बुरौ कियो तिउंए बोलौ, कि परमेश्वर रै बिचार जौ तेसरै छांटेणै रै अनुसार ई कौरमा रै कारण नाई पर औटाउणै रै कारण ई, बौणी रौआ : ¹² तिणीए बोलौ, "जेतौ काणछै रौ दास हुआ सा। ¹³ जिणौ लिखौ औन्दौ आ कि, "मुइंरे याकुबा आइलै प्यार कियो, पर ऐसाब बिगानौ ज्ञाणौ आ" ¹⁴ एथीलै आमै का बोली? का परमेश्वर रै काए फैसलौ नाई आ? बिबकुल नाई। ¹⁵ कैलैकि सेऊ मुसा कु बोला आ, हाऊं जास कासी माथे दया कौरणौ चाहाऊ, तेस माथे दया कौराऊ, और जास कासी माथे दया कौरणौ चाहाऊ तेस माथे कृपा कौराऊ। ¹⁶ एथीलै एऊ ना ता चाहाणै वालेउ री, ना फेटै मारनै वालेउ री पर दया कौरणै वालै परमेश्वर री बूश आ। ¹⁷ कैलैकि पवित्रशास्त्रा दी फिरोना कु बोलो थौ, कि मुइंरे तू एजी ताइंरे खौड़ी कियो ई, कि ताऊं दी हाऊं आपणी ताकत देखालू, और मेरै नाउं रौ परचार सारी धौतरा माथे हुआ। ¹⁸ एथीलै सेऊ जास माथे चाहा सा, तेस माथे दया कौरा सा; और जास चाहा सा, तेस काठौ कौरा सा।

परमेश्वर रौ रोश और तेसरी दया

¹⁹ ता तू मुं आइलै बोलाई, सेऊ तैबै आरोप कैलै ला सा? कुण तेस री इच्छा रौ सामनौ कौरा सा? ²⁰ ओ आदमी, भौलौ तू कुण ई, जौ परमेश्वर रौ सामनौ कौरा आ? का चाणी औन्दी चीजा चाणनै वाले कु बोला आ कि ताइंरे हाऊं इणौ कैलै चाणौ ऊ? ²¹ का कुम्हारा रै माटै माथे अधिकार नाई, कि एक ही लोंदे मांझिरे कु, एक ओखर इज्जता लै, और दुजौ बेइज्जती लै चाणा? ²² ता एस दी केजी हेरानी री बूश आ? कि परमेश्वर आपणौ रोश देखाउणा लै और आपणी ताकत परगट कौरणै री इच्छा कु रोशा रै ओखर री, जौ नाश कौरनालै तैयार कियै औन्दै थै, बोड़ी हिमता कौरा धीरज सहन की। ²³ और दया रै ओखर माथे, जौ तिणीए महिमा लै पैहलै कु तैयार किओ, आपणै महिमा रै जयदाद परगट कौरणै री इच्छा की? ²⁴ यानी कि आमु माथे जौ तिणीए ना सिर्फ यहूदिउ मांझिआ कु, पर दुजी जातिऊ मांझिआ कु भी औटाए। ²⁵ जिणौ सेऊ होशे री किताबी दी भी बोला सा, "जौ मेरी जौण पौरजा नाई थी, तिऊं हाऊं आपणी जौण पौरजा बोलाऊ; और जौ प्यारी नाई थी, तेसलै प्यारी बोलाऊ। ²⁶ और इणौ हुआ कि जेजी ज़ागाह दी तिणीए इणौ बोलो कि तुमै मेरी जौण पौरजा नाई ई, सेजी ई ज़ागाह दी जिऊंदै परमेश्वर री सन्तान बोलाई।" ²⁷ और यशायाह इस्राएला रै बारै दी औटाइयो बोला आ, " चाऊ इस्राएला री संताना री गिनती समुंदरा रै बालु रै समान औली, तैबै भी तिऊं मांझिऊ कु थोड़ै ही बौचाई। ²⁸ कैलैकि प्रभु आपणै वचन धौतरा माथे पुरौ कौरियो धोर्मि रै कामा कु शीगरी पाकौ कौरा आ।" ²⁹ जिणौ यशायाह गुरुए पैहलै भी बोलौ थौ, "अगर सेनाओं रौ प्रभु आमु कालै केजौ भी वंश नाई छाड़दौ, ता आमै सदोमा रै जिणै हुई, और अमोरा रै जिणै ठहरा थै।"

इसायला रौ अविश्वास

³⁰ ता आमै का बोली? इणौ कि जौ दुजी जाती रै लोग जौ धोरमा रै कामा री खोज नाई कौरा थै, धोरमा रै काम पाए मतलब कि तिऊं धोरमा रै काम जौ विश्वासा कु ई; ³¹ पर इस्राएली, जौ धोरमा रै कानुना री खोज कौरा थै तेस कानुना झाऊं नाई पौउंचै। ³² केथ लै? एथीलै कि सै विश्वासा कु नाई, पर मानौ कामा कु तेसरी खोज कौरा थै। तिउंए तेस ठोकरा रै ढोला दी ठोकर खाई, ³³ जिणौ लिखौ औन्दौ आ, " देखौ, हाऊं सिय्योना दी एक ठोकर लागणै वालौ ढोल, और ठोकर खाणै री चट्टान छाड़ाऊ, और जौ तेस माथे विश्वास कौरा लौ सेऊ नाई शौरमीदौ।"

10 ओ भाइयो, मेरै मैना री इच्छा और तिऊंलै परमेश्वर कु मेरी प्राथना आ, कि सै छटकारौ पा। ² कैलैकि हाऊं तिऊं री गवाई दिआउ ऊ, कि तिऊंरै परमेश्वर लै ध्यान रौआ, पर बुद्धिमानी आइलै नाई। ³ कैलैकि सै

परमेश्वर रै भौलै कामा कु अनजान हुइयो, और आपणै भौलै काम टेकाइयो कोशिश कौरीयो, परमेश्वर रै भौलै कामा रै आधीन नाई हुऐ। 4 मसीहै कानूना रौ अन्त कियो ताकी जुण-कुण विश्वास कौरा, परमेश्वर कालै धौरमा वालो हुआ।

मुक्ति सारेउ लै आ

5 कैलैकि मुसै इणो लिखो आ, कि जो आदमी तेस भौलै कामा माथे जो कानूना कु आ, चाला सा, सै एजै कारण कृ जीऊंदै रौआ ई। 6 पर जो भौलै काम विश्वास कु ई, सेउ इणो बोला आ, कि ताएँ आपणै मौना दी इणो ना बोलणो कि सौरगा माथे कुण चोढा? (मतलब कि मसीह तौलै उतारणा लै!) 7 या अधोलोका दी कुण उतरा? (मतलब मसीह मौरै औन्दै मांझीए कु जीऊंदो ऊपरै आणना लै!) 8 पर सै का बोलाई? इणो, कि वचन तैरै नजदीक ई, तैरै मुआ दी और तैरै मौना दी ई; एउ तेसी विश्वास रौ वचन आ, जो आमै परचार कौरी ई। 9 कि अगर तु आपणै मुआं कु यीशु प्रभु जाणियो माना लौ कौरा लौ और आपणै मौना कु विश्वास कौरा, कि परमेश्वरै सेऊ मौरै औन्दै मांझीआ कु जिऊंदो कियो, ता तू पाको ई मुक्ति पा ई। 10 कैलैकि भौलै कामा लै मौना कु विश्वास कौरणो ज्ञा आ, और मुक्ति लै ज्ञा मुआं कु अंगीकार कौरणो। 11 कैलैकि पवित्र शास्त्र इणो बोला आ, कि जुण-कुण तेस माथे विश्वास कौरा लौ, सेऊ शोर्मिदो ना हुआ लौ। 12 यहूदिय और युनानिय दी कुछ भेद नाई, एथीलै कि सेऊ सौबी रौ प्रभु आ; और आपणै सौबी नाऊं निणे वालेउलै मुक्ति आ। 13 कैलैकि जुण-कुण प्रभु रौ नाऊं निया लौ, सेऊ मुक्ति पा। 14 तैबै ज्ञास माथे तिउंरे विश्वास नाई किओ, सै तेसरौ नाऊं किणो नियाई? और ज्ञासरै बारे दी नाई शुणो तेस माथे कैलै विश्वास कौरी? और बिणा परचारक किणो शूणी आ? 15 और अगर भेजी नाई लै, ता किणो परचार कौरी? जिणो लिखो औन्दो आ, कि तिउंरै बांगणै का ई सुहावनै ई, जो आच्छी बुशा रौ खुशी रौ संदेश शुणावां ई। 16 पर सौबीए तेस खुशी रै संदेशा माथे कौन्थू नाई लाए: यशायाह बोला आ, कि ओ प्रभु, कुणोए आमारै खौबरा री प्रतीति की आ? 17 ता विश्वास शुणनै कु, और शुणनो मसीहा रै वचना कु हुआ सा। 18 पर हाऊं बोलाऊ, का तिउंरे नाई शुणो? शुणो ता सही कैलैकि लिखो औन्दो आ, तिउंरी बाच सारी धौतरी माथे, और तिउंरै वचन दूनिया रै धूरै झाऊं पौंचवी गौए ई। 19 तैबै हाऊं बोलाउ कि का इस्त्राएली नाई जाणा थै? पैहलै ता मुसा बोला आ, कि हाऊं तिउंरै जौरिरे जो ज्ञाती नाई, तुमारै जिवा दी जलन पैदो कौराऊ, हाऊं एक मूढ जाति रै जौरिरे तुमुलै रीश दिलावाऊ। 20 तैबै यशायाह बोडी हिम्मती आइलै बोला आ, जो मु नाई लोडा थै, तिउंके हाऊं मिली गो ऊ: और जो मुं पुछा भी नाई थै, तिउं माथे हाऊं परगट हुई गो। 21 पर इस्त्राएला रै बारे दी सेऊ इणो बोला आ हाऊं सारै दिनै आपणै हाथ एक आज्ञा ना मानणै वाली और विवाद कौरणै वाली जौण पौरजा री भिलै छाडौ फैलाई।

इस्त्रायला माथी परमेश्वर री दया

11 एथीलै हाऊं बोलाउ, का परमेश्वर आपणी पौरजा पोरु शोटी गोइ? केभी भी नाई; हाऊं भी ता इस्त्राएली थो: इब्राहीमा रै वंश और बिन्यामीना रै गोत्रा मांझीए कु। 2 परमेश्वरै आपणी सै जौण पौरजा नाई शोटी, जो तिणीए पैहले कु जाणी : का तुमै नाई जाणदै, कि पवित्र शास्त्र एलिय्याह री कहाणी दी का बोला सा; कि सै इस्त्राएला रै विरोध परमेश्वर कु औरज कौरा ई। 3 कि "ओ प्रभु तिउंरै तैरै भविष्यवक्तु पोरु ज्ञागे ई; और तेरी बेदी शेलियो बरबाद की गोई आ; और हाऊं एखुली बोची गो, और सै मेरै प्राणा रै भी खोजी ई।" 4 पर परमेश्वर कु तिउंलै का जवाब मिलौ कि मुंरे आपु कालै सात हजार आदमी छाडी ऐरै ई जुण बाअला काए नाई झुके। 5 एथीलै एजी रीति कु एजै बौगतै भी, बोडी दया कु चुणै औन्दै केती लोग बाकी ई। 6 अगर एउ बोडी दया कु हुआ आ, ता तैबै कर्मा कु नाई; नाई ता बोडी दया तैबै बोडी दया नाई रौआ। 7 एथीलै नतीजो का हुआ? इणो कि इस्त्राएली ज्ञास लोडदई लागै औन्दै, सेऊ तिउंके नाई मिलौ; पर जो छोटै औन्दै ई तिउंके मिलौ, और बाकी लोग काठे की ई गौए। 8 जिणो लिखो औन्दो आ, परमेश्वर सै आज्ञा रै दिना ज्ञाऊं भौरी नीजा दी ई सुतालै औन्दै, और इणी

आखी देई जो नाई देखाली और इणै कौन्थू जो नाई शुणालै। 9 और दाऊद बोला सा; तिउं री रोटी तिउंलै जाल, और गौलै री फाई, और ठोकर, और सौजा रौ कारण चाई हुआ। 10 तिउं री आंखी दी न्यारो चाई हुआ ताकि सै नाई देखा, और तू रोज तिउं री पीठ झुकाई छाडै। 11 ता हाऊं बोलाऊ का तिउंरे एथीलै ठोकर खाई, कि सै धौनी लोटा लै? केभी भी नाई: पर तिउंरै लोटणै रै कारण दूजी जाति रै लोग लै मुक्ति मिली आ, कि तिउंरै जलन हुआ। 12 एथीलै अगर तिउं रौ लोटणो दूनिया लै धन और तिउं री कमी दूजी जाति रै लोग कालै जयदादा रौ कारण हुआ, ता तिउं री भरपुरी कु केती ना हुआ लौ।

दीजी ज्ञातिउ री मुक्ति: कलम लाइणा रौ उदाहरण

13 हाऊं तुमु दूजी ज्ञातिउ रै लोग लै इयै बूश बोलाउ : जैबै कि हाऊं दूजी ज्ञाति रै लोग लै प्रेरित ऊ: ता हाऊं आपणी सेवा री बोडाई कौराउ। 14 ताकि केजी रीति कु हाऊं आपणै टौबर कु जलन कराइयो तिउं मांझीए कु कास एकी री मुक्ति कौराऊ। 15 कैलैकि जेबी तिउं रौ मौनै दैणो दूनिया रै मिलापा रै कारण हुआ, ता का तिउं रौ अपणाउणो मौरै औन्दै मांझीए कु जीउंदै हुणै रै बराबर ना हुआ लौ। 16 जेबी भंटा री पहली पीठा री पीडी प्रवित्र ठहरी, ता सारो मुछो औन्दै पिठो भी प्रवित्र आ: और जेबी जौड पवित्र ठहरी, ता शाउटी भी इणी इ आ। 17 और अगर केजी एक डाली चोडी गोई, और तू जंगली जैतूना रौ पेड हुईयो तेसदी दी जोडी गोई, और जैतूना री जौडी री चिकनाई रौ भागी हुआ आ। 18 ता डालिय माथे घमण्ड ना कौरणो: और अगर तु घमण्ड कौरालौ, ता याद छाडै, कि तू जौड नाई, पर जौड ताऊं सम्भाला आ। 19 तैबै तु बोला लौ डाली एथलै चोडी गोई, कि हाऊं तेथदी जौडुई। 20 भौलौ, सै ता बिण विश्वास रै कारण चोडी गोई, पर तु विश्वास कु बौणी रौ आ ई एथीलै घमण्डी ना हुऐ, पर डौर कर, 21 कैलैकि जैबै परमेश्वर आसान डाली ना छाडी, ता ताऊं भी ना छाडदौ। 22 एथीलै परमेश्वर री कृपा और कठोरता देख जो लोटी गौऐ, तिउं माथे कठोरता, पर ताऊं माथे कृपा, अगर तु तेस दी बौणी रौउ, नाई ता, ताऊं भी काटाई। 23 और सै भी अगर बिण विश्वास दी ना रौआलै, ता तिउं भी तेस दी जोडा ई, कैलैकि परमेश्वर तिउं जोडी सौका आ। 24 कैलैकि अगर तू तेस जैतूना कु, जो शौकली कु जंगली आ काटी ऐरौ आ, और स्वभावा रै विरुद्ध आच्छे जैतूना दी जोडी गौ, ता ऐ जो स्वाभाविक डाली आ, आपणै ई जैतूना दी कैलै ना जोडा लै।

सारै इस्त्राइलिय री मुक्ति

25 ओ भाइयो, किरै इणो ना चाई हुआ, कि तुमै आपु लै बुद्धिमान समझा लै; एथीलै हाऊं नाई चाहांदो कि तुमै एजै भेदा कु अनजान रौ, कि जेबी ज्ञाऊं दूजी ज्ञाति रै लोग पुरी रीति कु परगट ना कौरा लै, तेबी ज्ञाऊं इस्त्राएला रौ एक भाग इणो ई काठौ रौआ सा। 26 और एजी रीति कु सारो इस्त्राएल मुक्ति पा; जिणो लिखो औन्दो आ, कि छुड़ाऊंणै वालो सिन्योना कु आशा सा, और बिणा भक्ती रौ जीऊ याकुबा कु दूर कौराई। 27 और तिउं आइलै मेरौ इणो इ वाइदो ओलौ, जैबै कि हाऊं तिउं रै पाप दूर कौराऊ। 28 सै खुशी रै संदेशा रै भाव कु ता तुमु रै दुश्मन ई, पर जैबै चुणी गौऐ तेथारै भाव कु बाब दादेउ रै गौतै ई। 29 कैलैकि परमेश्वर आपणै वरदाना कु, और बुलाहटा कु केभी पिछाऊं नाई हटदौ। 30 कैलैकि जिणो तुमु रै पैहलै परमेश्वर री आज्ञा नाई मानी पर इबी तिउं री आज्ञा ना मानणै कु तुमु माथे दया हुई। 31 तिणी ई तिउंरे भी ऐबै आज्ञा नाई मानी कि तुमु माथे जो दया हुआ सा, इणै कौरौ तिउं माथे भी दया हुआ। 32 कैलै कि परमेश्वर सौबी कु आज्ञा ना मानणै रै कारण बन्द छाडौ ताकि सै सारेउ माथे दया कौरा।

परमेश्वरारी स्तूति

33 आहा! परमेश्वर रौ धन और बुद्धि और ज्ञान का ई गैहरौ आ! तेसरौ विचार किणै खूब (अथाह) और तेसरी बाट केती आसान (अगम) आ! 34 प्रभु री बुद्धि कुणीए जाणी? या तेसरौ साहाब कुण आ? 35 या कुणीए पैहलै तेसलै कुछ दैओ आ ज्ञास रौ बौदलौ तेसलै दिया लै। 36 कैलैकि तेस री तौरफा कु,

और तेसरें जौरिए, और तेस कालें सब कुछ आ: तेस री महीमा जुगै-जुगै औन्दी थाका लागी: शामीन।

परमेश्वरा री सेवा री जिन्दगी

12 एथीलै ओ भाइयो, हाऊं तुमू के परमेश्वरा री दया याद कौराइयो औरज कौराउ, कि आपणें शरीर जीऊंदौ, और पवित्र, और परमेश्वरा के आच्छौ लागणें वालौ बलिदान चौड़ाओ: एजी ई तुमारी आत्मिक सेवा आ। 2 और इयें दुनिया बाशिरे नाई बौणौ; पर तुमुरी बुद्धि नौई हुणें कु तुमारौ चाल-चलन भी बदलुओ च्आई, जेथ कौरी तुमै परमेश्वरा री भौली, और आच्छी लागणें वाली, और पाकी इच्छा, पौरखीयो जाणदे थाको लागी। 3 कैलैकि हाऊं तेस बौडी दया रै कारणे जो मुके मिलौ आ, तुमू मांझिरे एकी एकी आइलै बोलाऊ, कि जिणौ सौमझुणौ च्आई, तेस कु बौडियो कोई भी आपु लै ना सौमझा पर जिणौ परमेश्वरै हर एकी लै विश्वास नतीजै रै अनुसार बाँटी ऐरो आ, तिणी ई सुबुद्धि आइलै आपु लै समझा। 4 कैलैकि जिणौ आमारे एकी शरीरा दी भौरी आंग ई, और सौभी आंगा रौ एक ई काम नाई आसतौ। 5 तिणी ई आमै जो भौरी ई, मसीह दी एक शरीर हुईयो आपु मांझिरे एकी दुजै रै आंग ई। 6 और जेबी तेस बौडी दया रै जौरिरे जो आमुकै दैओ औन्दौ आ, आमू लै अलग-अलग वरदान मिले ई, ता ज्जासके भविष्यवाणी रौ वरदान आ मिलौ औन्दौ सेउ विश्वासा रै परिणामा रै अनुसार भविष्यवाणी कौरा; 7 अगर सेवा कौरणें रौ दाण आ मिलौ औन्दौ, ता सेउ सेवा दी लागी रौआ; अगर कुण शिखाऊणें वालौ आ, ता शिखाऊंदै थाका लागी; 8 जो उपदेश दैणें वालौ आ, सेऊ उपदेश दैणें दी थाका लागी; दाण दैणें वालौ खुशी कौरी दिआ; जो अगुआई कौरा, सेऊ हिम्मती कौरी कौरा जो दया कौरा, सै खुशी कौरी कौरा; 9 प्यार बिणा कपट वालौ च्आई; बुराई कु नफरत कौरौ; भलाई दी लागी थाकौ। 10 भाईचारे रै प्यारा कु एकी दुजै आइलै प्रेम भाव छाडौ; रोज आदर कौरणें दी एकी दुजै कु बौडदे थाको लागी। 11 कोशिश कौरणें दी आलसी नाई हुओ; आत्मिक (उन्माद) हिम्मती कौरी भौरुई थाको, प्रभु री सेवा कौरदे थाको लागी। 12 परमेश्वरा कु आश छाडौ और खुश रौ ओ; हर मुसीबता कु निपटुणा लै रोज तैयार रौ ओ; प्राथना दी रोज लागी रौ ओ। 13 प्रवित्र लोग जो कुछ जरुरी आ, तेस दी तिऊं री मजत कौरौ; पहुणाई कौरदे लागी थाकौ। 14 आपणें सताउणें वालेउ लै आशीष दैओ; आशीष दैओ शाप नाई दैओ। 15 आनन्द कौरणें वालेउ आइलै आनन्द कौरौ; और लेरनं वालेउ आइलै लेरौ। 16 आपु मांझिरे एक जिणौ मन छाडौ; घमण्डी नाई हुओ; पर नीउलें आइलें संगति छाडौ; आपणी नौजरी दी बुद्धिमानी नाई हुओ। 17 बुराई रै बौदलें कासी आइलै बुराई नाई कौरौ; जो बुशें सौबी लोगु कारे भौली ई, तिऊं री फिकर कौरदे थाको लागी। 18 जिदरा झाऊं हुई सका, तुमै आपणें भरसक सौबी आदमी आइलै मेल मिलाप छाडौ। 19 ओ प्यारै भाइयो, आपणौ बौदलौ ना नियौ; पर परमेश्वरा रै रोशा लै मौकौ दैओ, कैलैकि लिखौ औन्दौ आ, बौदलौ निणौ मैरौ काम आ, प्रभु बोला सा कि हाऊं ऊ बौदलौ निआऊं। 20 पर अगर तुमारौ दुश्मन भोखौ आ, ता तेसलै रोटी खिलाओ; अगर चीशौ आ, ता तेसलै पाणी पिआओ; कैलैकि इणौ कौरणें कु तुमै तेसरे मुंडा माथे आगी रै गाँठे रौ ढेर लाआ ई। 21 बुराई कु ना हारौ पर भलाई कु बुराई जीतौ।

राज्य लै काम

13 हर एक आदमी परधान अधिकारिउ रै अधीम रौआ लै, कैलैकि केजौ भी अधिकार इणौ नाई जो परमेश्वरा री तौरफा कु ना औलौ; और जो अधिकारी आ, सै परमेश्वरा रै ठहराए औन्दै ई। 2 एथा कु जुण-कुण अधिकारा रौ विरोध कौरा सा, सेऊ परमेश्वरा री विधि रौ सामनौ कौरा आ, और सामनै कौरणें वालौ सौजा पा सा। 3 कैलैकि हाकिम आच्छे कामा रै नाई, पर बुरे कामा लै डौरा रौ कारण ई; एथीलै अगर तु हाकिमा कु निडर रौइणौ च्आहा ई, ता आच्छे काम कर और तेस री तौरफा कु तुमारी तारीफ हुआ सा; 4 कैलैकि सेऊ तेरी भलाई लै परमेश्वरा रौ सेवक आ। पर अगर तु बुराई कौरा लौ, ता डर; कैलैकि सै तलवार बेकार नाई छाडी ऐन्दी, और परमेश्वरा रौ सेवक आ; कि तेसरै रोशा रै अनुसार बुरे काम कौरणें वालेउ लै

सजा दिया। 5 एथीलै अधीन नाई रौइणौ सिर्फ तेस रोशा कु, पर डौरा कु जरुरी आ, पर विवेक भी इणी गवाई दिया सा। 6 एथीलै कौरौ भी, कैलैकि परमेश्वरा रै सेवक ई, और रोज एजै कामा दी लागी रौआई। 7 एथीलै हर एकी रौ हक पोरु निपटाओ, ज्जासके रीण चाई, तेसके रीण दैओ; ज्जासके मामलौ चाई, तेसके मामलौ दैओ; ज्जासकु डौरनौ चाई, तेसकु डौरौ; ज्जासरी इज्जत कौरणी चाई; तेसरी इज्जत कौरौ।

एकी दुजै लै काम

8 आपु मांझिआ रौ प्यार छाड और केजी बुशा दी कासी रौ रीणी नाई हुओ; कैलैकि जो दुजै आइलै प्यार छाडा आ, तिणिरे कानून पुरौ कियो आ। 9 कैलैकि, इणौ आ कि गाँदो काम नाई कौरणौ, खून नाई कौरणौ, चोरी नाई कौरणौ, लालच नाई कौरणौ, और इऊं सौबी छाडियो और अगर केजी भी आज्ञा औली ता सौबी रौ निचोड एजी बुशा दी मिला सा, कि आपणें पड़ोसी आइलै आपु जिणौ प्यार छाडौ। 10 प्यार पड़ोसी री केजी बुराई नाई कौरदौ, एथीलै प्यार छाडनौ कानून पुरौ कौरणौ आ। 11 और बौगता प्राणियो इणौ इ कौरौ, एथीलै कि आबै तुमुलै नीजा कु बिउजणें रौ बौगता आशी गौ आ, कैलैकि जेजे बौगते आमूरे विश्वास किओ थौ, सेजे बौगते रै बिचारा कु आबै आमुरी मुक्ती नजदीक आ। 12 राच भौरी बीती गोई आ, और दिन निकुलणें वालौ आ; एथीलै आमै न्यारै रै काम पोरु छाडियो प्याशे रै औजार भिडौ। 13 जिणौ दुसै ढौबा ई, तिणी ई आमू सीधी चाल च्आई चालणी; नाई की लीला क्रीडा, और सूरी पिणें दी, ना गाँदो काम, और ना लुचपना दी, और ना झौगडे और रागा दी। 14 यानी के तुमै प्रभु यीशु मसीह भिडौ, और शरीरा रै भोग विलास पुरौ कौरणें रौ तरीको नाई कौरौ।

आपणें भाई माथे दोष नाई लाओ

14 जो विश्वासा दी कमजोर ई, तेस आपणी संगती दी निर्ओ; पर तेसरै शौका माथे विवाद कौरणा लै नाई। 2 कैलैकि एकी कै विश्वासा आ, कि सारौ कुछ खाणौ ठीक आ, पर जो विश्वासा दी कमजोर आ, सेऊ साग पात ई खा आ। 3 और खाणें वालौ ना खाणें वाले बेकार जाणा, और जो ना खाणें वालौ आ सेउ खाणें वाले माथे आरोप ना ला लौ; कैलै कि परमेश्वरै सेऊ अपणाओ आ। 4 तु कुण ई जो दुजै रै सेवका माथे आरोप ला ई? तेसरौ खौडौ रौइणौ या लोटणौ तेसरै मालिका कु मेल छाडा आ, यानी के तेस ई खौडौ कौरा ई; कैलैकि प्रभु तेस खौडौ टेकावा सा। 5 कोई ता एकी दिना कु दुजौ दिन बौडियो माना आ, और कोई सारै दिन एकी ई जिणौ माना सा: हर एक आपणें ई मौना दी पाकौ कौरा लै। 6 जो केजौ दिन माना सा, सेऊ प्रभु काले माना आ। जुण खा सा, सेऊ प्रभु काले खा आ, कैलैकि सेऊ परमेश्वरा रौ धन्यवाद कौरा आ, और जुण नाई खान्दौ, सेऊ प्रभु काले नाई खान्दौ और सेऊ परमेश्वरा रौ धन्यवाद कौरा। 7 कैलैकि आमू मांझिरे कु ना ता कोई आपुलै जीऊंदौ और न कोई आपुलै मौरदौ। 8 कैलैकि अगर आमै जीऊंदै ई, ता प्रभु काले जीऊंदै ई; और अगर मौरौ ता प्रभु काले मौरौ ई; चाऊ आमै जीवी या मौरौ, आमै प्रभु रै ई। 9 कैलैकि मसीह एथीलै मौरौ और जीऊंदौ भी हुओ कि सेऊ मौरै औन्दै और जीऊंदै रौ, दुइया रौ प्रभु आ। 10 तु आपणें भाई माथे कैलै आरोप ला ई? या तु तैबै कैलै आपणौ भाई बेकार जाणा ई? आमै सारै रै सारै परमेश्वरा री फैसले वाली गादी कारे खौडै हुई ई। 11 कैलैकि लिखौ औन्दौ आ, प्रभु बोला आ, मेरी जीन्दगी री शौपतै कि हर एक आदमी रै हुंडै मैरै सामनै झुकाई, और हर एक जीभ परमेश्वर माना ई। 12 ता आमू मांझिरे कु हर एक परमेश्वरा कै आपणौ आपणौ लेखौ दिआ।

आपणें भाई दूबणें रौ कारण नाई बौणौ

13 एथीलै एथ बासी आमू एकी दुजै माथे आरोप नाई जाँदौ लाइणौ पर तुमै इणी ई आपणें जीवा दी ठाणौ कि कोई आपणें भाई रै सामने ठेस या ठोकर खाणें रौ कारण ना बौणा लै। 14 हाऊं जाणाऊ, और प्रभु यीशु कु मुके इणौ पाकौ हुओ कि कोई चीज आपकु आपु लै अशुद्ध नाई, पर जो तियाँ चीज अशुद्ध समझा आ, तेसलै अशुद्ध आ। 15 अगर तुमारौ भाई तुमू री रोटी रै कारण उदास हुआ आ, ता तैबै तु प्यारा री रीति कु नाई चालदौ: जासलै

मसीह मौरों आ तेस तु आपणी रोटी रें जौरिरे नाश नाई कौर। 16 आबे तुमु री भौलाई री बेईज्जती ना चाई हुणी। 17 कैलैकि परमेश्वरा रौ राज्य खाणौ पिणौ नाई; पर धर्म और मिलाप और सै खुशी आ; 18 जो पवित्र आत्मा कु हुआ सा और जुण-कुण एजी रीती कु मसीह री सेवा कौरा आ, सेऊ परमेश्वरा के आच्छौं लागा सा और आदमी दी अपणाउणै लायक ठहरा सा। 19 एथीलै आमै तिऊं बुशु री कोशिश कौरि जेथकु मेल मिलाप और एकी दुजै रौ सुधार हुआ लौ। 20 रोटी लै परमेश्वरा रौ काम नाई बिगाड़ौ: सब कुछ शुद्ध ता आसती आ, पर तेस आदमीलै बुरौ आ, जास कालै तेसरै रोटी खाणै कु ठोकर लागा आ। 21 भौलौ ता एऊ आ, कि तु ना मास खाए और ना सूर पीए, ना ओर कुछ इणौ कौरै, जेथ कु तैरौ भाई ठोकर खा। 22 तैरौ जो विश्वास आ, तेस परमेश्वरा रें सामने आपणै मौना दी छाड़: भौलौ आ सेऊ, जो तियां बुशा दी, जो सेऊ ठीक सौमझा आ, आपुलै आरोपी नाई ठहराउंदौ 23 पर जो शक कौरियो खा आ, सेऊ सौजा रें लायक ठहरी गो आ; कैलैकि सेऊ विश्वासा कौरि नाई खांदौ, और जो कुछ विश्वासा कु नाई, सेऊ पाप आ।

दुजेऊ री तरक्की कौरौ

15 यानी कि आमु ताकती वालेउ लै चाई, कि कमजोर आदमिउ री कमजोरी सहन कौरि ना कि आपणौ ज़ीऊ खुश कौरि। 2 आमु मांझिरे कु हर एक आपणै पड़ोसी री भलाई लै खुश कौरा कि तेसरी तरक्की हुआ। 3 कैलै कि मसीह आपणौ ज़ीऊ खुश नाई कियो, पर जिणौ लिखौ औन्दौ आ, कि तेरी बेईज्जती कौरणै वालेउ री बेईज्जती मु माथे आशी आ। 4 जेती बुशै पैहलै कु लिखी ऐन्दी आ, सै आमुकै शिक्षालै लिखी आ कि आमै धीरज और पवित्र शास्त्रा री शान्ति रें जौरिरे आश छाड़ौ। 5 और धीरज, और शान्ति रौ दाता परमेश्वर तुमुलै इणौ वरदान दिआ लौ, कि मसीह यीशु रें अनुसार आपु मांझीरे एक मन छाड़ौ। 6 ताकि तुमै एक मन और एक आवाजा दी आमारै प्रभु यीशु मसीह रें बाब परमेश्वरा री बौड़ाई कौरौ।

सौबिऊ लै खुशी रौ संदेश

7 एथीलै, जिणौ मसीह परमेश्वरा री महीमा लै तुमै अपणाए ई, तिणी ई तुमै भी आपु मांझिरे एकी दुजै अपणाओ। 8 हाऊं बोलाउ कि जो वाइदें बाप दादेउलै देई गोए थे, तिऊं पाके कौरणा लै मसीह, परमेश्वरा री सच्चाई रौ प्रमाण देणालै खतना किये औन्दै लोगु रौ सेवक बौणौ। 9 और दूजी ज़ाती रें लोग भी दया रें कारण परमेश्वरा री बौड़ाई कौरा; जिणौ लिखौ औन्दौ आ; कि एथीलै हाऊं जाति-जाति रें लोगु मांझिरे तैरौ धन्यवाद कौराउ, और तैरै नांवा रौ भजन गा ऊ। 10 तौएँ बोलौ आ, ओ जाति-जाति रें सब लोगुओ, तेस री ज़ौण पौरजा आइलै आनन्द कौरौ। 11 और तौएँ, ओ जाति-जाति रें सब लोगुओ, प्रभु री स्तुति कौरौ; ओ राज्य-राज्य रें सब लोगुओ; तेसरौ गुणगाण कौरौ। 12 और तैबै यशायाह बोला सा, कि यिश्शै री एक ज़ौड परगट आआ, और दूजी ज़ाती रौ हाकिम हुणालै एक उठालौ, तेस माथे दूजी ज़ाती आश छाड़ाई। 13 एथीलै परमेश्वर जो आशा रौ दाता आ तुमु विश्वास कौरणै दी सारै रौंगा री खुशी और शान्ति कौरि पूरौ कौरा, कि पवित्र आत्मा री ताकती कौरि तुमारी आशा बौड़दें थाका लागी।

हिम्मत लिखणै रौ कारण

14 ओ मरै भाइयो, हाऊं आपु भी तुमारै बारै दी पाकौ ज़ाणाऊ, कि तुमै भी आपु ई भलाई कौरि भौरीया और ईश्वरीय ज्ञाना कु भरपूर हुआ और एकी दुजै चितलाई सौका। 15 तैबै मुइएँ किये-किये याद कौरणा लै तुमुलै जो भौरी हिम्मत कौरियो लिखौ, एऊ तेस बौडी दया रें कारण हुआ, जो परमेश्वरै मुकै दैओ आ। 16 कि हाऊं दूजी ज़ातीउ कालै मसीह यीशु रौ सेवक हुइयौ परमेश्वरा रौ खुशी रें संदेशा री सेवा याजकु बाशिरे कौरु; जेथ कौरि दूजी ज़ातिउ रौ मानो चढाउणौ, पवित्र आत्मा कौरि पवित्र बौणियो चाई अपणाउणौ। 17 एथीलै तिऊं बुशा रें बारै दी जो परमेश्वरा आइलै रिशतौ छाड़ा ई, हाऊं मसीह यीशु दी बौड़ाई कौरि सौकाउ। 18 कैलैकि तिऊं बुशै छाड़ियो मुकै ओर केजी बुशु रें बारै दी बोलणै री हिम्मत नाई, जो मसीह दूजी ज़ातीऊ

री अधीनता लै वचन, और कर्म, 19 और चिन-चमत्कार और नोखे कामु री ताकती कु, और पवित्र आत्मा री ताकती कु मरै जौरिरे किये: इदरा झाऊं कि मुइएँ यरुशलेमा कु नीइयौं चारों तौरफ इल्लुरिकुमा झाऊं मसीह रें खुशी रें संदेशा रौ पुरौ-पुरौ परचार कियो। 20 पर आमु रें मौना री चाहा इणी आ, कि जिरे-जिरे मसीह रौ नाऊं नाई निंदै, तिदै खुशी रौ संदेश शुणाऊं; इणौ ना चाई हुआ, कि दुजै री पौई माथे घोर चाणु। 21 पर जिणौ लिखौ औन्दौ आ, तिणी ई चाई हुआ, कि जासकै तेसरौ खुशी रौ संदेश नाई पौउंवा, सै ई देखाई और जुपीए नाई शुणौ सै ई सौमझाई।

रोमा लै डेउणा लै पौलुसा री योजना

22 एथीलै हाऊं तुमु काए आशणै कु घौडी-घौडी पिछाऊँ हौटौ। 23 पर ऐबै इउं देशा दी मुकै कामा कौरणालै तौइरे ज़ागहा नाई रौई, और भौरी बौर्षा ओउलै मुकै तुमु काए आशणै री ईच्छा सा। 24 एथीलै जेबी हाऊं स्पेना लै डेरुलौ ता तुमु बाटीए आशाऊँ कैलैकि मुकै पूरी आश आ, कि तेस सफरा दि हाऊं तुमु के मिलाऊ, और जेबी तुमारी संगति कु मरै ज़ीऊ कुछ भौरीया लौ, ता तुमै मुँ कुछ दूर आगुडै झाऊं पहुंचाइयौ। 25 पर इबी ता पवित्र लोगु री सेवा कौरणालै यरुशलेमा लै डेआऊ। 26 कैलैकि मकिदुनिया और अखया रें लोगु के एजौ आच्छौं लागौ, कि यरुशलेमा रें पवित्र लोगु रें गरीबुलै कुछ पैसै कौठै कौरलै। 27 आच्छौं ता लागौ, पर सै तिऊं रें कर्जदार भी ई, कैलैकि अगर दूजी ज़ाती तिऊं री आत्मिक बुशु दी साथी हुआ लै, ता तिऊंलै भी ठीक आ, कि शारीरा वाली बुशु दी तिऊं री सेवा कौरा। 28 एथीलै हाऊं एस काम पुरौ कौरियो और तिऊं री ग्रॉई (चन्दा) सांबियो तुमु बाटिरे आशियो स्पेना लै डेआऊ। 29 और हाऊं ज़ाणाउ, कि जेबी हाऊं तुमु काए आशुलौ, ता मसीहा री पूरी आशीषा आइलै आशाऊ। 30 और ओ भाइयो, हाऊं यीशु मसीह रौ जो आमारौ प्रभु आ और पवित्र आत्मा रौ प्यार याद दिलाइयौ, तुमु कु औरज कौराऊ, कि मुकालै परमेश्वरा कु प्राथना कौरणै दी आमु आइलै मिलियो मगन रौ। 31 कि हाऊं यहुदिया रें अविश्वासीउ कु बौचीयौ रौऊ, और मेरी सै सेवा जो यरुशलेमा लै आ, पवित्र लोगु के ठीक लाग। 32 और हाऊं परमेश्वर री इच्छा कु तुमु काए खुशी आइलै आशियो तुमु आइलै आराम कौरु। 33 शान्ति रौ परमेश्वर तुमु सौबी आइलै साथी रौआ। आमीन।

व्यक्तिगत अभिवादन

16 हाऊं तुमु कु फीबे री, जो आमुरी बौइण और किंखिया री कलीसिया री सेवक आ, औरज कौराउ। 2 कि तुमै जिणौ कि पवित्र लोगु लै चाई, तियां प्रभु दी अपणाओ; और जेजी केजी बुशा दी तियां के तुमारी ज़रूरत औली, तियां री मजत कौरौ; कैलैकि सै भी भौरी री यानी की मेरी भी भौलाई कौरणै वाली रौई आ। 3 प्रिसका और अक्विला जो यीशु दी आमारे साथी कामा कौरणै वाली आ, ढाल। 4 तिउंएँ मरै प्राणालै आपणी इ जिन्दगी मुश्किला दी पाई थी और सिर्फ हाऊं इ नाई, पर दूजी ज़ातिउ री सारी कलीसियाए भी तिऊं रौ धन्यवाद कौरा ई। 5 तियां कलीसिया लै भी ढाल जो तिउंरै घौरा दी आ। मरै प्यारै इपेनिउसा लै जो मसीह लै आसिया रौ पैहलौ फल आ, ढाल। 6 मरियमा लै जुपीएँ तुमुलै भौरी मेहनत की आ, ढाल। 7 अन्दुनीकुस और युनियासा लै जो आमु रें टौबर ई, और मु आइलै कैद हुए थे, और प्रेरिता दी मशहूर ई, और मुँ कु पैहलै मसीह दी हुए थे, ढाल। 8 अम्पलियातुसा लै, जो प्रभु दी मरै प्यारौ आ, ढाल। 9 उरबानुसा लै, जो मसीह दी आमारे साथी कामा कौरणै वालौ आ, और आमारे प्यारै इस्तखुसा लै, ढाल। 10 अपिल्लेसा लै जो मसीहा दी खौरौ निकलौ, ढाल। अरिस्तुबुलुसा रें घरानै लै ढाल। 11 मरै टौबरी हेरोदियोना लै ढाल नरकिस्सुसा रें घौरा लै जो लोग प्रभु दी ई, तिऊं लै ढाल। 12 त्रुफेना और त्रुफौसा लै जो प्रभु दी मेहनत कौरा ई, ढाल। प्यारी पिरसिसा लै जुपीएँ प्रभु दी भौरी मेहनत की आ, ढाल। 13 रुफुसा जो प्रभु दी चुनौ औन्दौ आ, और तेस री मां जो मेरी भी मां आ, दुइया लै ढाल। 14 असुंक्रितुसा और फिलगोन और हिर्मस और पत्रुबास और हिर्मस और तिऊं रें साथी रें भाईउ लै ढाल। 15 फिलुलुगुस और युलिया और नेर्युस और तिउंरी बौइण, और उलुम्पास

और तिउरै साथै पवित्र लोगु लै ढाल। 16 आपु मांझीए पवित्र खोबू कौरी ढाल कौरौ। तुमु लै मसीहा री सारी कलीसियाउ री तौरफा कु ढाल।

आखरी बूश

17 ऐबे ओ भाइयो, हाऊं तुमु कु औरज कौराऊ, कि जो लोग तियां शिक्षा रै बीचा दी जो तुमुए शीखी थी, झोंगडै कौरणै, और ठोकर खाणै रौ कारण हुआ ई, तिऊं पोरु गाड़ौ; और तिऊं कु दूर रौ। 18 कैलैकि इणै लोग आमारे प्रभु मसीह रै नाई, पर सै आपणै पेटा री सेवा कौरा ई; और मीठी- मीठी बुशा कौरी सीदै सादै मौना रै लोगु बहकावा ई। 19 तुमुरी आज्ञा मानणै री खौबर सारै लोगु मांझीए फैली गोई आ, एथीलै हाऊं तुमुरै बारै दी आनन्द कौराउ; पर हाऊं इणौ चाहा ऊ, कि तुमै भलाईलै बुद्धि वालै, पर बुराईलै भोलै बौणी रौ। 20 शान्ति रौ परमेश्वर शैताना कु तुमुरै बांगणा कौरी शीगरी कुचला सा। आमारे प्रभु यीशु मसीह रौ बौड़ी दया तुमु माथै औन्दै थाका लागी। 21 आमारे साथै कामा कौरणै वालै तीमुथियुसा रौ, और मैरै टौबरु लुकियुस और

यासोन और सोसिपत्रुसा री तुमुलै ढाल। 22 मेरी चिड्डी लिखणेवालै तिरतियुसा रौ प्रभु दी तुमु लै ढाल। 23 गयुस जो मेरी और कलीसिया री पहुनाई कौरणै वालौ आ तेसरी तुमुलै ढाल: इरास्तुस जो इलाकै रौ भंडारी आ, और भाई क्वारतुसा री, तुमुलै ढाल। 24 आमारे प्रभु यीशु मसीह रौ बौड़ी दया तुमु माथै औन्दै थाका लौ लागी।

परमेश्वर री स्तुति

25 ऐबे जो तुमु कै मैरौ खुशी रौ संदेश मतलब यीशु मसीह रै संदेशा रै परचारा रै अनुसार पाकौ कौरी सौका आ, तेस भेदा रै प्याशै रै अनुसार जो पहला ओउलै चोरुई थाकौ। 26 पर ऐबे परगट हुइयौ जो पहला कु आ तेस परमेश्वर री आज्ञा कौरी भविष्यवक्तु री किताबी रै जौरिरे सारी जातिउ लै बोली गौ आ, कि सै विश्वासा री आज्ञा मानणै वालै हुआ। 27 तेसी सिर्फ एक इ बुद्धिमान परमेश्वर री यीशु मसीह रै जौरिरे जुगै-जुगै महिमा औन्दै थाका ली लागी। आमीन।

1 कुरिन्थियों

अभिवादन

1 पौलुसा री तौरफा कु जो परमेश्वरारी मौरजी कौरी यीशु मसीह रौ प्रेरित हुणा लै औटाओ थौ और भाई सोस्थिनेसा री तौरफा कु, 2 परमेश्वरारी तिएँ कलिसिया रै नावां दी जो कुरुन्थुसा दी आ, मतलब कि तिररै नाऊं जो मसीह यीशु दी पवित्र किए ई, और पवित्र हुणा लै औटाए औन्दै ई; और तिऊं सौभौ रै नाऊं जुण सारी जागहा दी आमारे और आपणै प्रभु यीशु मसीह रै नावां री प्राथना कौरा ई। 3 आमारे बाब परमेश्वर और प्रभु यीशु मसीह री तौरफा कु तुमु लै बौड़ी दया मिलदै थाका लागी।

मसीहा दी आशीष

4 हाऊं तुमारै बारै दी आपणै परमेश्वरा रौ धन्यवाद कौराऊ, एथीलै कि परमेश्वरा री इयै बौड़ी दया तुमु माथे मसीह यीशु दी हुई। 5 कि यीशु मसीहा दी हुईयो तुमें हर बुशा दी, मतलब सारै वचन और सारी अकला दी अमीर की गोए — 6 जिणौ मसीहा री गवाही तुमु दी पाक्की निकली 7 एथीलै केजै भी आत्मिक वरदाना दी तुमुलै कमी नाई, और तुमें आमारे प्रभु यीशु मसीह रै परगट हुणै री बाट लोडाई। 8 सेउ तुमु आखरी झाऊं मजबूत भी कौरा आ कि तुमें आमारे प्रभु यीशु मसीहा रै आशणै रै दिना दी धौमी रौ। 9 परमेश्वर सौच्चौ आ, जुणिए तुमें आपणै छोहरु यीशु मसीह आइलै साथा दी आपण्डणा लै औटाए ई।

कलिसिया दी फूट

10 ओ भाइयो, हाऊं तुमु कु प्रभु यीशु मसीह रै हका कौरी काठी ई औरज कौराऊ कि तुमें सारै एका बूश बोलौ, तुमु मांझीए विरोध ना औआ, पर एक ही मन, कौडै मिलियो रौ। 11 कैलैकि ओ मैरै भाइयो, खलोए रै घौरा रै लोगुए मुकै तुमारै बारै दी बोलौ आ कि तुमु मांझीए जौगडै इ हुंदै लागै औन्दै। 12 मैरै बोलणा रौ मतलब इणौ आ कि तुमु मांझीए कुण ता आपुलै "पौलुसा रौ, "कुण "अपुल्लोसा रौ, "कुण "केफा रौ, "त कुण "मसीहा रौ," बोला ई। 13 का मसीह बांटइ गौ आ? का पौलुस तुमुलै कूसा माथे चौडाई गौ आ? या तुमुलै पौलुसा रै नावां दी बपतिस्मौ मिलौ आ? 14 हाऊं परमेश्वरा रौ धन्यवाद कौराऊ कि क्रिस्पुस और गयुसा छाडियो मुंयै तुमु मांझिया कु कासी लै भी बपतिस्मौ नाई दैओ। 15 किए इणौ ना चाई हुओ कि कोई तुमु लै इणौ बोला कि तुमुलै मैरै नावां कौरी बपतिस्मौ मिलौ आ। 16 और मुंयै स्तिफनुसा रै टौबरा लै भी बपतिस्मौ दैओ; इऊं छाडियो हाऊं नाई जाणदौ कि मुंयै तौयें कासलै बपतिस्मौ दैओ। 17 कैलैकि यीशु मसिहै हाऊं बपतिस्मा दैन्दै नाई बल्कि खुशखबरी शुणाउणा लै ऊ भेजौ औन्दौ और इणौ भी कि आक्षरु रै ज्ञाना कौरी नाई, इणौ न चाई हुओ कि मसीहा रै कूसा री बूश बेकार बोलु। 18 कैलै कि कूसा री कहाणी नाश हुणै वालेउ लै ता मुखता सा, पर आमु छुटकारे पाइणे वालेउ लै परमेश्वरा री ताकत आ। 19 कैलैकि लिखौ औन्दौ आ कि, "हाऊं ज्ञान वालेउ रौ ज्ञान खात्म कौराऊ, और समझदारु री समझ छोटी कौराऊ।" * 20 किए रौ ज्ञान वालौ? किए रौ शास्त्री? किए रौए इरें दुनिया रै वाद-विवाद कौरने वालै? का परमेश्वरै दुनिया रै ज्ञाना लै मुख नाई बोलौ? 21 कैलैकि जेबी परमेश्वरा रै अनुसार कौरी संसारै ज्ञाना कु परमेश्वर नाई जाणौ, तैबे परमेश्वरा के इणौ आच्छौ लागौ कि एजै परचारा री मुखता रै जरिये विश्वास कौरणे वालेउ लै छुटकारौ देऊ। 22 यहूदी ता निशाण चाहा ई, और युनानी सी ज्ञाना लोडदै। 23 पर आमै ता तेस कूसा माथे चौडाए औन्दै

मसीह रौ परचार कौरी ई, जुण यहूदी लै ठोकरा रौ कारण और दूजी जातिऊ लै आ मुखता; 24 पर जुण औटाए औन्दै ई, का यहूदी का युनानी तिऊं काए मसीह री ताकत और मसीहा रौ ज्ञान आ। 25 कैलै कि परमेश्वरा री मुखता आदमीउ रै ज्ञाना कु भौरी ज्ञान वाली आ, और परमेश्वरा री कमजोरी आदमीउ री ताकती कु भौरी ताकती वाली आ। 26 ओ भाइयो जिणै तुमै औटाए औन्दै ई तिणौ सुचौ कि ना आपणै शरीरा कौरी भौरी ज्ञानवाले, और ना भौरी ताकती वाले और ना भौरी औटाए औन्दै। 27 पर परमेश्वरै दुनिया रै मुख छांटी ऐरे ई कि सै ज्ञान वालेऊ री बेइज्जती कौरा, और परमेश्वरै दुनिया रै कमजोर छांटी ऐरे ई कि ताकती वालेऊ शर्मिदै कौरा; 28 और परमेश्वरै दुनिया रै कगाल और जो केजै कौरमा रै नाई और जुण नाई भी ई, सै भी छांटी ऐरे ई कि तिऊं जुण आसती ई; बेकार सौमझा। 29 ताकी केजौ भी प्राणी परमेश्वरा काए घमण्ड ना कौरा। 30 पर तेसी री तौरफा कु तुमें मसीह यीशु दी ई, जो परमेश्वरा री तौरफा कु आमु लै बौणौ, मतलब धर्म, पवित्रता, और छुटकारौ; 31 ताकी जिणौ लिखौ औन्दौ आ, तिणी ई हुआ, "जुण घमण्ड कौरालौ सेऊ प्रभु दी घमण्ड कौरा।"

कूसित मसीहा रै बारै दी खुशी रौ संदेश

2 ओ भाइयो, जेबी हाऊं परमेश्वरा रै भेद शुणाउंदै-शुणाउंदै तुमु काए आशौ, आक्षरु रौ ज्ञान सौबी कु बौडिया नाई आशौ। 2 कैलैकि मुंयै इणौ ठाणी ऐरौ थौ कि तुमु मांझीए यीशु मसीह यानी कि कूसा माथे चौडाए औन्दै मसीह कु छाडियो केजी भौ बूश ना जाणौ। 3 हाऊं कमजोर हुंयो और डौरियो, और भौरी कांबियो तुमु आइलै रौ; 4 और मैरै वचन और मैरै परचारा दी ज्ञाना री लुभाउणे वाली बुशे नाई, पर आत्मा और सामथरौ रौ सबूत थौ, 5 एथीलै कि तुमारौ विश्वास आदमीउ रै ज्ञाना माथे नाई, पर परमेश्वरारी ताकती माथे विश्वास औआ।

परमेश्वरा रौ ज्ञान

6 तैबे भी आमै जुण सारी बुशे जाणाई तिऊंके ज्ञाना री बुशे शुणाई आ, पर एस संसारा रौ और एस संसारा रै नाश हुणै वालै रै हाकिमा रौ ज्ञान नाई; 7 पर आमै परमेश्वरा रौ सेऊ गुप्त ज्ञान, भेदा री रीती माथे बोली आ, जो परमेश्वरै पहला ओउलै आमारी महिमा लै छाडौ। 8 जो एस संसारा रै हाकिमा मांझिया कु कोइये ना जाणौ, कैलै कि अगर सै जाणा थै ता सै सर्व-शक्तिमान प्रभु कूसा माथे ना चौडावा थै। 9 पर जिणौ लिखौ आ, "जो बुशे आखिए ना देखी और कौन्थुए ना शुणी, और जो बुशे आदमी रै मौना दी ना आशी, और सेइ बुशे परमेश्वरै आपु आइलै प्यार कौरने वालेउ काले तैयार की आ।" 10 पर परमेश्वरै से बुशे आपणी आत्मा रै जरिए आमु माथे परगट की, कैलै कि आत्मा सारी बुशे, मतलब परमेश्वरा री मिठी बुशे भी परखा सा। 11 आदमी मांझीए कुण जाणा सा केजे आदमी री बुशे, सिर्फ आत्मा जो तेसदी आ? तीणी इ परमेश्वरा री बुशे भी कोइयो नाई जाणदौ, सिर्फ परमेश्वरा री आत्मा। 12 पर आमुए संसारा री आत्मा नाई, पर सेजी आत्मा पाई आ जो परमेश्वरा री तौरफा कु आ कि आमै तिऊं बुशु जाणी जो परमेश्वरै आमुकै देई आ। 13 जो आमु आदमी रै ज्ञाना री शिखाई औन्दी बुशु दी नाई, पर आत्मा री शिखाई औन्दी बुशु दी आत्मिक बुशे आत्मिक बुशु दी मिलाइयो शुणावा ई 14 पर शरीर वाली आदमी परमेश्वरा री आत्मा री बुशे नाई मानदौ, कैलै कि सै बुशे तिऊंरी नौजरी दी मुखता री बुशे ई, और न सेउ तिऊं बुशु जाणी सकदौ कैलै कि तिऊं री जांच आत्मिक रीती कौरी हुआ सा। 15 आत्मिक आदमी

सब कुछ परखा सा, पर सेउ आपु कासी कु नाइं परखिदो 16 “कैले कि प्रभु रौ मन कुणीए जाणौ आ कि प्रभु कै शिखावा?” पर आमु दी मसीहा रौ मन आ।

कलिसिया दी गुट बाजी री बुराई

3 ओ भाइयो, हाऊं तुमुलै इणी रीती कु बुशै नाइं कौरी बोलौ जिणी आत्मिक लोगु कु, पर ज़ीणी शारीरिक लोगु कु, और ज़ो मसीहा दी छोहरु आ। 2 मुइंरे तुमकु दूध पियाओ आ, नाज नाईं खौआओ; कैलै कि तुमे नाज नाईं खाई बौला थै; यानी कि इबी झाऊं भी नाईं खांदै, 3 कैलैकि इबी झाऊं तुमें शरीरा दी आ। एथीलै कि ज़ैबै तुमु दी डाह और झौंगडौं आ, का तुमें शरीरा दी नाईं आ? और का तुमें आदमी री रीती माथे नऊं चालदैं? 4 कैलै कि ज़ैबै एक बोला सा, “हाऊं पौलुसा रौ ऊ” और दुजौ, “हाऊं अपुल्लोसा रौ ऊ” ता का तुमे आदमी नाईं? 5 अपुल्लोसा का सा? और का सा पौलुस? सिर्फ सेवक, ज़ास कौरी तुमुए विश्वास कियौ, जिणौ हर एक लोगु कै प्रभु ऐ दैओ आ। 6 मुइंरे लाओ, अपुल्लोसै सिंचाओ पाणी कौरी, पर परमेश्वरै बौडाओ। 7 एथीलै ना ता लाइणै वालौ कुछ आ और ना सिंचाई कौरने वालौ, पर परमेश्वर ही सब कुछ आ ज़ो बौडाउणै वालौ आ। 8 लाइणै वालौ और सिंचाई कौरने वालौ दुइयो एक ज़ीणी सा; पर हर एक आदमी कौमाई कौरी आपणी ही मज़दूरी पा सा। 9 कैलैकि आमे परमेश्वरा रै साथी ई; तुमें परमेश्वरा रै डोखरै और परमेश्वरा रै चाणे औन्दै। 10 परमेश्वरा रि तिरें बोडी दया रै आनुसार ज़ो मुकै दैओ औन्दौ, मुयें बुद्धीमान राजमिस्त्री री पौई पाई, और दूजौ तेथ माथे चिनाई कौरा आ। पर हर एक आदमी चोकसी दी रौइयो कि सेउ तेस माथे किणी चिनाई कौरा सा। 11 कैलैकि तिरें पौई छाड़ियौ ज़ो पौडी एन्दी आ, और सै पौई यीशु मसीह आ, कोई भी दुजी पौई नाईं पाई बौलदौ। 12 अगर कुण इंरे पौई माथे सुनौ या चाँदी या भौरौ किमती पात्थर या काठ या घासा भूसा रि चिनाई कौरा, 13 ता सारै काम परगट हुआई; कैलै कि सेजौ दिन तेसलै बोला, एथीलै कि आगी आइलै परगट हुआ और सै आग हर एक काम परखा कि किणौ आ। 14 ज़ासरौ काम तेस माथे बौणीयो टेकी रौआ, सेउ मज़दूरी पा सा। 15 अगर कासरौ काम ज़ौली जा लौ, ता सेउ नुकसान उठाउवा लौ; पर सेउ आपु पोरु बौचा लौ जौलदैं-जौलदैं। 16 का तुमें नाईं जाणदैं कि तुमें परमेश्वरा रै घोर आ, और परमेश्वरा रौ आत्मा तुमु बितै रौआ? 17 अगर कुण परमेश्वरा रौ घोर नाश कौरालौ ता परमेश्वर तेस नाश कौरा सा; कैलै कि परमेश्वरा रौ घोर पवित्र आ, और सेउ घोर तुमें ई। 18 कोई भी आपुल्ले धोखौ ना दिआलौ। अगर तुमु मांझिरे कुण एस संसारा दी ज़ानी समझा लौ सेउ मूर्ख बौणा लौ ताकी ज़ानी हुआ। 19 कैलै कि एस संसारा रौ ज्ञान परमेश्वरा काए मूर्खता सा, जिणौ लिखौ औन्दौ आ, “सेउ ज्ञानिउ तिऊं री चालाकी दी फौसावा सा,” 20 और तैबै, “प्रभु ज्ञानिउ रै बिचार ज़ाणा कि सै सब बेकार ई।” 21 एथीलै आदमिउ माथे कोई घमण्ड ना कौरा, कैलै कि सारौ कुछ तुमारौ आ 22 का पौलुस, का अपुल्लोस, का कैफा, का दुनिया, का जिन्दगी, का मौरण, का चालदैं लागौ औन्दौ, का आशणै वालौ, सारौ कुछ तुमारौ आ, 23 और तुमें मसीह रै ई, और मसीह परमेश्वरा रौ आ।

मसीहा रै प्रेरित

4 आदमी आमु मसीहा रै सेवक और परमेश्वरा रै भेदा रै खजान्ची समझा। 2 तैबै इयै खजान्ची दी एजी बूश देखाई कि सेउ विश्वास वालौ हुणौ चांइ। 3 पर मेरी नौदरि ए ऐ भौरी छोटी बूश आ कि तुमु या आदमिउ रौ केजौ भी फैसल कौरणै वालौ मू पौरखा, नाईण ता हाऊं आपु आपुल्लै नाईं पौरखुदौ 4 कैलैकि मेरौ मन मु केजी भी बुशा दी दोशी नाईं ठहराऊदौ, पर इणै कौरी हाऊं बिणा गौलती वालौ नाईं बौणदौ कैलैकि मु परखूणै वालौ प्रभु आ। 5 एथीलै जेबी झाऊं प्रभु ना आशा लौ, बौगता कु पैहलै केजी भी बुशा रौ फैसलौ नाईं कौरै: सेउ इ निआरै दी चोरुएन्दी बुशै प्याशै दी देखाला, और मौना रौ मतलब भी प्रगत कौरा, तैबै परमेश्वरा री तौरफा कु एकी एकी री तारीफ हुआ सा। 6 ओ भाइयो मुइंयें इउं बुशु दी तुमु लै आपणी और अपुल्लोसा री बुशै औनैणा री रीती माथे लाई आ, एथीलै कि तुमे आमु कौरिए इणौ शिखौ कि लिखै औन्दै कु औगाऊं बौडनौ, और एकी रै तौरफा दी और

दुजा रै विरोधा दी घमण्ड नाईं कौरणौ। 7 कैलैकि तुमु दी और दुजेऊ दी कुण भेद कौरा सा? और ताउंकै का सा ज़ो ताए (दुजेऊ कु) नाईं पाओ? और ज़ैबै कि ताए (दुजेऊ कु) पाओ आ, ता इणौ घमण्ड कैलै कौराई कि मानो नाईं पाओ? 8 तुमारै ता पेट भौरुइ गोए आ, सेउ हुई गोए, तुमुए बिण आमुए राज कियौ; पर आच्छौ हुआ थौ कि तुमे राज कौरा थे कि आमे भी तुमु आइलै राज कौरा थै। 9 मेरी सौमझी दी परमेश्वरै आमे प्रेरित (चेलै) सारेऊ बासिए तिऊं लोगु भाशिरे ठहराए आ, ज़ासरी मौरनै री आज्ञा हुई गौइ आ; कैलैकि आमे दुनिया और सौरगा रै दूत और आदमिउ लै एक तौमाशौ बौणे ई। 10 आमे मसीहा लै मुर्ख आ, पर तुमे मसीहा दी बुद्धी वालै इ; आमे कमजोर इ पर तुमे ताकती वालै इ। तुमलै इज्जत मिला सा, पर आमारी बेइज्जती हुआ इ। 11 आमे एजै बौगता झाऊं भोखै चीशै और नांगे इ, और मार खाई और औरकेशी रिटी इ; 12 और आपणे इ हाथा कौरी कामा कौरियो मेहनत कौरी इ। लोग आमुलै बुरौ बोलाई, आमे आशिष देई आ; सै आमु सतावा इ आमे सहन कौरी आ। 13 सै बदनाम कौराई आमे प्राथना कौरी आ। आमे इबी झाऊं दुनिया रौ सांगर-कौइट और सारेउ चीज़ा री खुरचन जिणे बौणे इ।

खबरदार कौरणै

14 हाऊं तुमारी बेइज्जती कौरनालै इउं बुशै नाईं लिखदौ, पर आपणे प्यारै छोहरु ज़ाणियो तुमु चितलावा उ। 15 कैलैकि अगर मसीहा दी तुमारै शिखाउणै वालै दस हजार भी औले, तैबै भी तुमारै बाब भौरी नाईं; एथीलै कि मसीह यीशु दी खुशी रै संदेशा रै ज़ौरिरे हाऊं तुमारौ बाब हुआ। 16 एथीलै हाऊं तुमकु औरज कौराउ कि मू ज़िणी चाल चालौ। 17 मुइंयें तिमुथियुस ज़ो प्रभु दी प्यारौ और विश्वास वालौ छोहरु आ, तुमु काए भेजौ आ। सेउ तुमु मसीहा दी मेरौ चाल-चालण याद कौरावा, जिणौ कि हाऊं हर जगाह दी और एकी एकी कलिसिया दी उपदेश कौराउ। 18 कुण ता इणै फुली गौए आ, मानो कि हाऊं तुमु काए आशदौ इ नाईं। 19 पर प्रभुए चाहौ ता हाऊं तुमु काए शीघ्री आशाऊ, और तिऊं फूलै औन्दै री बुशै नाईं, पर तिऊंरी ताकत ज़ाणाऊं। 20 कैलैकि परमेश्वरा रौ राज बुशु दी नाईं पर ताकती दी आ। 21 तुमे का चहा ई? का हाऊं डीगै कौरियै तुमु काए आशु, या प्यार और नीऊलै री आत्मा आइलै?

कलिसिया दी बुराई

5 इदरा झाऊं कि मुकै शुणेने दी आशौ आ कि तुमु मांझीए गौंदे काम हुआई यानी के इणै गौंदे काम ज़ो दूजी जातिउ मांझी भी नाईं औन्दै कि एक आदमी आपणे बाबा री छेवडी आपुल्ले छाड़ा। 2 और तुमे शोक ता नाईं कौरदैं, जिणे कौरी इणे कामा कौरणै वालौ तुमु मांझिया कु पोरु गाड़िया, पर घमण्ड कौराई। 3 हाऊं ता शरीरा रै भाव कु दूर थौ, पर आत्मा रै भाव तुमु आइलै हुइयौ मानो जिणौ तुमु आइलै हाजिर उ, इणै काम कौरणै वालै रै बारेउ दी एजी आज्ञा देई ऐरी आ 4 कि ज़ैबै तुमे और मेरी आत्मा आमारे प्रभु यीशु री ताकती आइलै कौठै हुआ ता इणौ आदमी आमारे प्रभु यीशु रै नावां कौरी 5 शरीरा रै नाशा कौरना लै शैताना कै सौंभाला, ताकी तेसरी आत्मा प्रभु यशु रै दिना दी मुक्ति पा। 6 तुमारौ घमण्ड कौरनौ आच्छौ नाईं; का तुमे नाईं जाणदैं थोडो ज़ेई संजेडौ पूरौ मुछौ औन्दौ पिठौ उसारा। 7 आपकु पुराणौ संजेडौ गाड़ियौ तुमे शुद्ध हुआँ कि नौवौ मुछौ औन्दौ पिठौ बौणौ ताकी तुमे बिणा संजेडे वालै हुआ। कैलैकि आमाराँ भी फसह, ज़ो यीशु मसीह आ, बलिदान हुआँ आ। 8 एथीलै आशौ, आमे साजै दी खुशी मनाई, ना ता पुराणै संजेडे कौरी और ना बुराई और ना दुष्टता रै संजेडा कौरी, पर सीधाई और सौचाई री बिणा संजेडे री कौरी 9 मुइंयें आपणी चिड्डी दी तुमुलै लिखौ आ गौंदै कामा कौरनै वालेउ री संगती दी ना रौएऊ। 10 इणौ नाईं कि तुमे बिल्कुल इयै दुनिया रै गौंदै कामा कौरनै वालेउ री, या लोभिऊ री, या बुराई कौरनै वलेउ री, या मूरती पुजणै वालेउ री संगती नाईं कौरौ; कैलैकि एजी हालती ए ता तुमु दुनिया कु निकुलनौ इ ज़ा। 11 पर मेरौ बोलणौ इणौ आ कि अगर कुण भाई बालियो, गौंदे काम, या लोभी, या मूर्ती पूजणै वालौ, या गाली दैणै वालौ, या सूरी पीणै वालौ, या बुराई कौरणै वालौ ओलौ ता तेसरी संगती नाईं कौरणी; इदरा झाऊं कि इणै आदमी आइलै रोटी भी ना खाइयो।

12 कैलैकि मुकै बाइलै वालेउ रो फैसलै कौरणे कु का काम? का तुमे भीतलै वालेउ रो फैसलौ नाई कौरदै? 13 पर बाइलै वालेउ रो फैसलौ परमेश्वर कौरा सा। एथीलै तेस गाँदे काम कौरनै वालौ आपु मांझीए कु पोरु गाडौ।

मसीहीउ दी मुकदमेबाजी

6 का तुमु मांझीए कु कास दी ए हिम्मत आ कि जैबै दुजेऊ आईलै झगडौ औलौ ता फैसलै कौरदै अधर्मी काए डेआ और पवित्र लोगु काए नाई लै डेआ? 2. का तुमे नाई ज्ञानदै कि पवित्र लोग दुनिया रो फैसलौ कौराई? एथीलै जैबै तुमारै दुनिया रो फैसलौ कौरनौ आ, तो का तुमे छोटै कु छोटै झगडै रो भी फैसलै कौरनै लायक नाई? 3. का तुमे नाई जानदै कि आमै परमेश्वर रै दूता रो फैसलौ कौरौ? तैबै का दुनिया री बुशु रो फैसलौ नाई कौरिलै? 4. अगर तुमुए दुनिया री बुशु रो फैसलौ कौरणौ औलो, का तिऊं बोशालाइ ज़ास कलिसिया दी कुछ नाई समझुदै? 5. हाऊं तुमु बेइज्जत कौरणालै इणौ बोलाउ। का सौच्चो तुमु मांझी एक भी बुद्धिमान नाई मिलदौ, जो आपणै भाईउ रो फैसलौ कौरौ बोला? 6. तुमु मांझी भाई-भाईउ दी मुकदमौ हुआ, और सेउ भी तिऊं काए जो विश्वास नाई कौरदै। 7. पर सौच्चो तुमु मांझी बाँडी गौलती ता इणी कि तुमे आपु मांझी मुकदमौ कौरा ई। बुराई कैले नाई सहन कौरदै? आपणौ नुकसान कैले ना सहन कौरदै? 8. पर तुमे ता आपु कौराई बुराई और नुकसान पहुंचावा ई, और तेस भी आपणै भाईउ लै। 9 का तुमे नाई ज्ञानदै कि बुराई कौरणे वालै लोग परमेश्वरारै राजा रै अधिकारी नाई औन्दै? धोखौ ना खाओ, ना गाँदे काम कौरणे वालै, ना मूर्ती पूजणे वालै, ना दुजै री छेवडी आइलै रौइणै वालै, ना लुच्चै, ना गाँदे आदमी आइलै रौइणै वालै, 10 ना चोर, ना लोभी, ना सूरी पिणै वालै, ना गाली देणै वालै, ना बुराई कौरणे वालै, परमेश्वर रै राजा रै वारिस औन्दै। 11 और तुमु मांझी केती इणै ई थै, पर तुमे प्रभु यीशु मसिह रै नावां कु और आमु रै परमेश्वर री आत्मा कौरौ धोइ गौए और पवित्र हूए, और धौर्मौ बणै।

शरीर परमेश्वर री महिमा लै

12 सारी चीजै मुलै ठीक ता आस्ती आ, पर सारी चीजै फायदै री नाई; सारी चीजै मुलै ठीक आ, पर हाऊं केजी भी बुशा रै अधीन नाई औउलौ। 13 रोटी पेटालै और पेट रोटिलै आ, पर परमेश्वर एस और तेस दुईया खात्म कौरा सा। पर शरीर गाँदे कामा लै नाई बल्कि प्रभु लै आ और प्रभु शरीरा लै आ। 14 परमेश्वर आपणी ताकती कौरौ प्रभु जीऊंदौ कियौ, और आमु भी जीऊंदौ कौरा सा। 15 का तुमे नाई ज्ञानदै कि तुमारौ शरीर मसिह रो आंग आ? तो का हाऊं मसीहा री आंग नीइयौ गाँदी छेवडी रै आंग चाणु? बिल्कुल नाई। 16 का तुमे नाई ज्ञानदै कि जुण-कुण गाँदी छेवडी री संगति कौरा, सेऊ तिआ आइलै एक शरीर हौआ? कैलैकि लिखौ औन्दौ: "सै दुई एक शरीर औआई" 17 और जुण प्रभु री संगती दी रौआ सा, सेऊ तेस आइलै एक आत्मा हुआ सा। 18 गाँदे कामा कु बाँची थाकौ। जेती भी दुजै पाप आदमी कौराई सै शरीरा कु बाहरै आ, पर गाँदे काम कौरणे वालै आपणै ई शरीरा रै खिलाफ पाप कौरा ई। 19 का तुमे नाई ज्ञानदै कि तुमारौ शरीर पवित्र आत्मा रो घोर आ। जो तुमु दी बौसो औन्दौ आ, और सेउ तुमुलै परमेश्वर री तौरफा कु आ मिलौ औन्दौ; और तुमे आपणै नाई ई? 20 कैलैकि तुमे किमती देईओ आ खरिदै औन्दै, एथीलै आपणै शरीरा कौरौए परमेश्वर री महिमा कौरौ।

शादी रै बारे दी सवाल

7 तिऊं बुशु रै बारे दी जो तुमुए लिखी आ, कि इणौ आच्छौ आ कि आदमी छेवडी नाई छूआं। 2. पर गाँदे कामा रै डौरा कौरिए हर एक आदमी री छेवडी, और हर एक छेवडी रो बोउटौ चाई हुओ। 3. बोउटौ आपनी बोउटी रो हक पूरौ कौरा; और तिणी ई बोउटी भी आपणै बोउटा रो हक पूरौ कौरा। 4. बोउटी रो आपणै शरीरा माथे कोई हक नाई पर तिआंरै बोउटै रो हक आ; तिणी इ बोउटै रो भी आपणै शरीरा माथे कोई हक नाई, पर तेसरी बोउटी रो आ। 5 तुमे एकी दूजै कु अलग नाई रौ; पर सिर्फ आपु मांझीए चौपडुइयौ कुछ बौगता झाऊं अलग रौ तेथ बासिए रौ एकी साथीई; इणौ ना चाई हुओ कि तुमारै बिण स काबू रै कारण शैतान तुमु मुसीबता दी

पा। 6 पर हाऊं जो इणौ बोलदै लागौ औन्दौ ए तुमुलै छूटए आ ना कि आज्ञा। 7 हाऊं ता इणौ चहा उ कि जिणौ हाऊं आ तिणी सारै आदमी हुआ; पर हर एक आदमी लै परमेश्वर री तौरफा कु अलग-अलग वरदान ए आ मिलै औन्दै; कासलै केजै रौंगा रौ और कासलै केजै रौंगा रौ। 8. पर हाऊं जो बिण शादी रै ई और जुण विधवा ई तिउरै बारे दी बोलाऊ कि तिऊं लै इणौ ई रौइणौ आछौ आ जिणौ हाऊं आ। 9. पर अगर सै आपणै जिवा दी काबू ना कौरा लै ता सै शादी कौरा लै; कैले कि शादी कौरणी बुरै बिचारा कु आच्छी आ। 10 ज़ासरी शादी हुई गौइ आ, तिउंलै हाऊं नाई पर प्रभु आज्ञा दिया कि बोउटी आपनै बोउटै कु अलग ना हुआ 11 और जैबै अलग भी हुआ लै बिणा शादिए रौएउ; या ता पहलकै बोउटै आइलै डेवे ऊ—और ना बोउटौ आपणी बोउटी गाडा लौ। 12 दुजेउ आइलै प्रभु नाई पर हाऊं भी तुमुलै बोलाऊ, अगर कास भाई री छेवडी इवश्वास नाई छाडा ली और तेस आइलै खुश औली ता सेउ तिे ना गाडा लौ। 13 ज़ास छेवडी रो बोउटौ भी विश्वास नाई छाडा लौ, और आपणी बोउटी आइलै रौइणा लै खुश औलो; सै आपणौ बोउटौ पोरु नाई गाडा ली। 14 कैलै कि इणौ बोउटौ जो विश्वास नाई छाडा लौ, सेउ आपणी बोउटी जौरिए पवित्र ठहरा; और इणी बोउटी जो विश्वास नाई छाडदी, सै आपणै बोउटै रै जौरिए पवित्र ठहरा सा; ना ता तुमारै छोटी छेहरु अशुद्ध औन्दै, पर ऐबै ता पवित्र आ। 15 पर जो आदमी विश्वास नाई कौरदौ, अगर सेउ अलग औलो ता अलग औणै दैओ, इणी हालतिए कोई भाई या बौईण बानणा दी नाई। परमेश्वर आमै मेल मिलापा कौरना लै इ औटाए औन्दै। 16 कैलैकि ओ छेवडी जात, तू का ज़ाणाई कि तू आपणै बोउटै री मुक्ति कौरौ बोलाई? ओ पुरुष, तू का ज़ाणाई तू आपणी छेवडी मुक्ति कौरौ बोलाई?

जिणौ परमेश्वर औटावा सा तिणौ चालौ

17 जिणौ प्रभुए एकी-एकी कै बाँडौ आ, और जिणौ परमेश्वर आमै एकी-एकी औटाए ई, सेउ तिणौ ई चाला लौ। हाऊं सारी कलिसिया दी इणौ ई ठहरावा ऊ। 18 जो खतनौ कियौ औन्दौ आ औटाओ औन्दौ सेउ बिणा खतना वालौ ना बौणा लौ। जुण बिणा खतना वालै आ औटाए औन्दै, सै खतना ना कौरावालै। 19 ना खतना वालौ कुछ आ और ना बिणा खतनै वालौ, पर परमेश्वर री आज्ञा मानण ई सब कुछ आ। 20. हर एक आदमी जो जेजी हालती दी आ औटाओ औन्दौ सेउ सेजी हालती दी रौआ। 21. अगर तू सेवा री हालती दी आ औटाओ औन्दौ ता फिकर ना कौरै; पर अगर तू आज्ञाद हुई बोला ई, ता इणौ ई काम कर। 22. कैलैकि जो सेवा कौरनै री हालती दी प्रभु रै औटाए औन्दौ आ, सेउ प्रभु रै आज्ञाद कियौ औन्दौ आ। तिणौ इ जो आज्ञादी री हालती आ औटाओ औन्दौ, सेउ मसीह रो सेवक आ। 23. तुमे यीशु मसीह रै किमती देइयौ ई खरीदै औन्दै; आदमीउ रै नुकर ना बणौ। 24. ओ भाइयो, जो कुण जेजी हालती आ औटाओ औन्दौ, तिणिए सेजी हालती दी परमेश्वर आइलै रौ।

बिण ब्याही और विधवाए

25. बिण ब्याई छोट्टी रै बारे दी मुकै प्रभु यीशु री कोई भी आज्ञा नाई मिली, पर विश्वास वालौ हुणा लै जिणी दया प्रभुए मु माथे की आ, तेथी रै अनुसार हाऊं तुमुलै आज्ञा दियाऊ। 26. मेरी सौमझि ए इणौ आच्छौ आ कि आजकाले कलेशा रै कारण, आदमी जिणौ आसा आ तिणौ इ रौ। 27. अगर तेरी बोउटी आ, त तिआंकु अलग हुणै री कोशिश ना कर; अगर ताउंके बोउटी नाई * ता बोउटी लोडदै नाई डेऊ। 28. पर अगर तू ब्याओ भी कौरालौ, ता किछ पाप नाई; और अगर बिण ब्याई घौरा कु डेआली ता कुछ पाप नाई। पर इणेऊ ले शरीरा रौ दुःख हुआ, और हाऊं चहाऊ इणै कु बाँचणौ। 29. ओ भाइयो हाऊं इणौ बोलाऊ कि बाँगत कामती की ऐरौ आ, एथीलै चाँई कि ज़ासरी बोउटी आ, तिउंए तिणौ हुओ मानौ कि तिउंरी बोउटी नाई आसती; 30. और लेरनै वालै इणै हुओ, मानो कि सै केभी भी लेरदै नाई; और खुशी कौरनै वालै इणै हुओ, मानो कि सै कोई खुशी ना कौरा; और खरीदणै वालै इणै हुओ कि, मानो कि तिऊं कै कुछ भी नाई आसतौ। 31. और इयें दुनिया आइलै मेल छाडनै वालै इणै हुओ, कि इयें

दुनिया रै नाई हुआ लै; कैलैकि इऐ दुनिया रीती और चाल चालण बौदलिंदै थाका लागी।³² पर हाऊं इणौ चहा कि तुमु लै फिकर ना हुआ। बिणा शादी रौ आदमी प्रभू री बुशु री फिकरा दी रौआ सा कि प्रभु किणै कौरी खुश छाडु लै।³³ पर शादी शुदा आदमी दुनिया री बुशु री फिकरी दी रौआ कि आपणी बोउटी किणै कौरीए खुश छाडुलै।³⁴ शादी शुदा और बिण शादी शुदा छेवडिउ दी भी फर्क आ: बिण शादी शुदा वाली छोटी प्रभु री फिकरी दी रौआ कि सै शरीर और आत्मा दी दुइया दी पवित्र चाई, पर शादी शुदा वाली छेवडी दुनिया री फिकरी दी लागी रौआ सा कि आपणौ बोउटौ किणै कौरिऐ खुश छाडी।³⁵ हाऊं इयै बूश तुमारै फाइदा लै बोलाऊ ना कि तुमु फौसाउणा लै, इणौ कि एथीलै जिणौ शोभा-दौभा आ तिणौ इ चाई कौरणौ, कि तुमे एकी मौना हुइयौ प्रभु री सेवा दी लागी रौआ।³⁶ अगर कुण इणौ सोमझा कि हाऊं तिऐ बिणा शादी शुदा वाली रौ हक मारा ऊ, ज़ास ज़ासरी ज़वानी दौलदै आ लागी औन्दी, और ज़रूरत भी औली, त जिणौ तुमे चहा ई तिणौ कौरौ, एजी बुशा रौ कोई पाप नाई, से तिऊं रौ ब्यायौ औणै दिआलौ।³⁷ पर जुण मौना दी पाकौ रौआ और तेसकै ज़रूरत नाई औली, यानी के आपणी इच्छा माथै हक छाडा लौ, और आपणै मौना दी ऐ बूश ठाणा ऐरी कि आपनी बिण ब्याई छोटी री शादी नाई कौरदौ, ता सेऊ आच्छौ कौरा सा।³⁸ एथीलै कि जो आपणी बिण ब्याई छोटी री शादी कौरा लौ, सेउ आच्छौ कौरा सा, और जुण शादी नाई कौरदौ, सेउ तेथाकु भी आच्छौ कौरा सा।³⁹ ज़ेबी झाऊं कास छेवडी बोउटौ जिउंदौ रौआ सा, तेबी झाऊं सै तेस आइलै बानुई ऐदी आ, पर अगर तिआंरौ बोउटौ मौरि जाआ लौ ता सै ज़ास आइलै चहा ली ब्यायौ कौरि बौला सा, पर सिर्फ प्रभु दी।⁴⁰ पर जीणी आसा सा तीणी इ रौआ ली ता मैरै बिचारा दी ओर भी आछौ आ; और हाऊं समझाऊ कि परमेश्वरा री आत्मा मुन्दी भी आ।

मूर्तिउ लै चौड़ाओ औन्दी भोग

8 एबै मूर्ति रै सामने बौली की एन्दी चीजेऊ रै बारै दी — आमैं जाणी आ कि आमु सौभिऊ दी औकल आ। औकल घमण्ड पैदी कौरा सा, पर प्यारा कौरिऐ बढोतरी हुआ सा।² अगर कुण सोमझा कि हाऊं कुछ जाणाउ, ता जिणौ जाणनौ चाई तिणौ इबी झाऊं नाई जाणदौ।³ पर अगर कुण परमेश्वरा आइलै प्यार छाडा लौ ता परमेश्वर तेस प्राणा सा।⁴ यानी कि मूर्ति रै सामने बौली की एन्दी चीजे रै खाणै रै बारै दी — आमैं जाणी आ कि मूर्ति दुनिया दी कोई चीजे नाई आसती, और एकी छाडियो दुनिया दी केजौ भी परमेश्वर नाई।⁵ तैबै भी सौगा दी और धौतरी माथै भीरी का ईश्वर बोलाई— जिणौ कि भौरी का ईश्वर और भौरी का प्रभु आ —⁶ तैबै भी आमु लै ता एक ही परमेश्वर ऐ आ : मतलब कि ज़ासरी तौरफा कु सारी चीजे आ, और आमैं तेसी लै आ। और एक ई प्रभु आ, यानी कि यीशु मसीह ज़ास कौरिऐ सारी चीजे हुई, और आमैं भी तेसी कौरिऐ आ।⁷ पर सारेउ के एउ ज्ञान नाई, पर कुण ता इबी झाऊं मूर्ति कुछ सोमझणा रै कारणै मूर्तिउ रै सामने बौली की औन्दी चीजेउ कुछ सोमझियो खा ई, और तिऊंरौ मन कमजोर हुणै रै कारणै अशुद्ध हुआ सा।⁸ रोटी आमु परमेश्वरा काऐ नजदीक नाई निन्दी। अगर आमैं नाई खाउलै ता आमारौ कुछ भी नुकसान नाई, और अगर खाइलै भी ता कुछ फाइदौ नाई।⁹ पर खबरदार ! इणौ ना चाई हुआ कि तुमारी ऐ आज़ादी किए कमजोर आदमिऊ लै ठोकरा रौ मतलब हुआ।¹⁰ कैलैकि अगर कुण ताऊं ज्ञानी मूर्ति रै मन्दिरा रै सामने रोटी खान्दै देखा और सेउ औलौ कमजोर आदमी, त का तेसरै मौना लै मूर्ति रै सामने बौली की औन्दी चीजे खाणै री हिम्मत ना हुआ ली।¹¹ इणी रीती कौरिऐ तैरै ज्ञाना रै कारणै सेउ कमजोर भाई ज़ासलै यीशु मसीह मौरौ, खात्म हुआ सा।¹² इणै कौरिऐ भाइउ रै खिलाफ बुरौ काम कौरनै कु और तिउरै कमजोर मौना लै चोट पहुचाउणा कु तुमे मसीहा रै खिलाफ बुरौ काम कौराई।¹³ एजे मतलबै अगर रोटी मैरै भाई लै ठोकर खौवावाली, ता हाऊं केभी भी केजी भी रीती कौरि मांस नाई खाउलौ, इणौ ना चाई हुआ कि हाऊं आपणै भाई लै ठोकरा रौ कारण बौणू।

प्रेरितु रै हक और काम

9 का हाऊं आज़ाद नाई उं? का हाऊं प्रेरित नाई उं? का मुइयें यीशु जुण आमारौ प्रभु आ नाई देखो? का तुमे प्रभु दी मैरै चाणै औन्दी नाई आ?² अगर हाऊं दुजेऊ लै प्रेरित नाई, तैबै भी तुमुलै ता आसती उ; कैलै कि तुमै प्रभु दी मेरी प्रेरिताई माथै छाप आ।³ जुण मुं पौरखा ई, तिउंलै ऐजौ इ मैरौ ज़वाब आ।⁴ का आमुलै खाणै—पिणै रौ हक नाई आ?⁵ का आमुलै ऐजौ हक नाई आ, कि कास मसीह छोटी आइलै ब्याओ कौरिओ तियां आइलै रौई, जिणौ दुजे प्रेरित और प्रभु रै भाई और कैफा बोलाई।⁶ या सिर्फ मुलै और बरनबासा लै ई हक नाई कि कौमाई कौरनी पोरु छाडिलै।⁷ सेना दी इणौ कुण हुआ जुण आपणै इ खौरचै माथै एक फौजी रै रूपा दी काम कौरा? मतलब कि इणौ हुआ कुण कि जुण अंगूरा रौ बौगिचौ लाईओ तिमरा कु अंगूर ना खा? और कुण ऐ आ इणौ जुण भरी चारियो तिऊंरौ दूध ना पिया?⁸ का हाऊं इउं बुशु आदमिउ री रीती रिवाजा माथै बोलाऊ?⁹ का कानून भी इणौ इ नाई बोलदी? कैलैकि मूसा रै कानूना दी आ लिखौ औन्दी, “बाइंदी बारै बौलदा रै मूं नाई चाई बानणै” का परमेश्वर बौलदा री ई फिकर कौरा सा?¹⁰ या खास कौरिये आमुलै इ बोला सा। ओ, आमुलै इ लिखौ औन्दी, कैलैकि ठीक इणौ कि बौलदा जोचणै वालौ आशी कौरिये बौलद जोचा और बाइणै वालौ भागीदार भी आशी कौरिये हौल चलावा।¹¹ और ज़ेबै कि आमु ऐ तुमु कालै आत्मिक चीजे बौइ, त का एजी बोडी बूश आ कि तुमारी शरीर वाली चीजेउ री फौसल लौइ।¹² ज़ेबै दुजेउ रौ एजी हक आ, तै का एथाकु ज़ादौ नाई औलौ? पर आमुऐ ऐ हक कामा दी नाई आणै; पर आमैं सब कुछ सहन कौरि आ कि आमु कौरिऐ मसीहा रौ खुशी रौ संदेशा दी रुकावट नाई हुआ।¹³ का तुमे नाई जाणदै जुण परमेश्वरा रै घोरा दी सेवा कौराई, सै परमेश्वरा रै घोरा कु खा पिया ई; और जुण बेदी री सेवा कौराई, सै बेदी आइलै भागीदारी हुआई?¹⁴ इणै कौरिऐ प्रभु रै भी ठहराओ औन्दी आ कि जो लोग खुशी रौ संदेश शुणाउवांइ तेसरौ खौचौ भी खुशी रै संदेशा कौरिऐ औआ।¹⁵ पर हउं इउं माझिया कु केजी भी बूश कामा दी नाई आणी, और मुइयें ऐ बुशै एथलै नाई लिखी कि मुलै इणौ इणौ कौरा, कैलै कि एथकु ता मैरौ मौरनौ इ आछौ आ कि कुण मैरौ घमण्ड बेकार ठहरावा।¹⁶ अगर हाऊं खुशी रौ संदेश शुणाऊं ता मुलै कुछ भी घमण्डा री बूश नाई, कैलैकि ऐउ ता मुलै ज़रूरी आ। अगर हाऊं खुशी रौ संदेश नाई शुणाउलो, ता मूं माथै हाय।¹⁷ कैलैकि अगर आपणी मौरजी कौरि इणौ कौराउ ता मजदूरी मुलै मिला सा, और अगर हाऊं आपणी मौरजी कौरि नाई कौरदौ तैबै भि खौजान्दी रौ हिसाब किताब मुकै साम्बौ औन्दी।¹⁸ ता मेरी केजी मजदूरी आ? एजौ कि हाऊं खुशी रौ संदेश शुणाउणा दी संत मंत कौर लौ, इदरा झाऊं कि खुशी रै संदेशा दी जो मैरौ हक आ तेस भी हाऊं पुरी रीती कौरि कामा दी नाई आणु?¹⁹ कैलै कि सौभी कु आज़ाद हुइयो भी हाऊं सौभी रौ सेवक हुआ एथीलै कि हाऊं ज़ादौ कु ज़ादौ लोग सौचाई मिलै झिडियो आणु।²⁰ हाऊं यहुदिये लै यहुदी बौणौ कि हाऊं यहुदिये झिडियो आणु। जो लोग कानूना थालिए दौबै औन्दी आ तिऊं लै हाऊं कानूना थालै ना हुइयो भी कानूना थाली बौणी रौ औ कि तिऊं जो कानूना थाली आ तिऊं सौभी झिडियो आणु।²¹ हाऊं एक इणौ आदमी बौणौ जो कानूना री केजी भी बिधी नाई मानदौ। यानै के हाऊं परमेश्वरा रै कानूना कु दूर नाई आसतौ बल्कि मसिहा रै कानूना थालिए उ। ताकी हाऊं जो कानूना री बिधी नाई जाणदै तिऊं झिडियो आणु।²² हाऊं कमजोर आदमिउ लै कमजोर ज़ेई बौणौ ताकी कमजोर झिडियो आणु। हाऊं सब आदमिउ लै सब कुछ बौणौ ताकी हाऊं किणै ना किणै कौरिऐ कई आदमिउ री मुक्ति कौराऊं।²³ हाऊं एस सब कुछ खुशी रै संदेशा लै कौराऊ कि ओरी आइलै तेथारौ भागीदारी औ ऊ।

मसीह दी फेट

²⁴ का तुमे नाई जाणदै कि फेटै रै मुकाबला दी ता सब फेटे माराई, पर ईनाम एक इ आदमी निआं सा? तुमे इणी इ फेटै मारौ कि तुमे जीता।²⁵ हर एक पहलवान सारौ कुछ संयम कौरा सा; सै ता एक मुरझाअणै वालै ताज

जीतना लै इणो सब कुछ कौराई, पर आमैं ता तेस ताजा लै कौरी सा जो केबी ना मुरझाअंदो। 26. एथीलै हाऊं ता ऐजी ई रीती कौरिरे फेटै माराऊ पर बिणा मतलबा (लक्ष्यहीन) री फेटै नाई मारदो; हाऊं भी इणी रीती कौरिरे मुकुरे गिनी पिटिआ ऊ, पर तेस भाशीरे नाई जो बागुरा दी मुकुरे लाइयो पिटिया सा। 27. पर हाऊं आपणो शरीर पिटाऊ कूटाऊ और आपणें वौशा दी आणाऊ, इणो ना चांई हुओ कि ओरीलै प्रचार कौरियो हाऊं केजी रीती माथें निकामो बौणु।

इस्त्रायला रै इतिहासा देखियो खबरदार कौरणें

10 ओ भाईओ हाऊं नाउं नाई चहांदो कि तुमे ऐजी बुशा अनजान रौ कि आमारे नान बुद्ध बादला थालिरे थै, और जेती आसा थै सारे समुद्रा दी टोपियो पारभिले डेवे; 2 और सारेउए बादला दी और समुद्रा दी मूसा रौ बपतिस्मो निओ; 3. और सारेउए एक जीणी आत्मिक रोटी खाई; 4. और सारेउए एक जिणोइ आत्मिक पाणी पियो, कैलैकि सै तेस आत्मिक ढोका कु पिया थै जो तिऊं आइलै साथा साथा इ आप्ण्डा थो, और सेउ ढोक यीशु मसीह थो। 5. पर परमेश्वर तिऊं सारेउ माझिया कु भौरी लोगु कु खुश नाई हुओ, एथीलै सै जंगला दी मौरी गोरे। 6. ए बुरे आमूलै औनेणो बोणो, कि जिणो तिउंरे लालच किओ, तिणो आमैं भी बुरी चीजु माथें लालच ना कौरी; 7. और ना तुमे मुर्ती पूजणें वाले बोणो, जिणो कि तिऊं माझिरे केती आदमी बोणी गोरे थै, जिणो लिखो औन्दो आ, "लोग खान्दे पिन्दै बोशे, खेलदैं और फाली मारदैं उठै।" 8. और ना आमुरे गान्दे काम चांई कौरणें, जिणो तिऊं माझिरे केती आदमिउए कियो आ; और एकी दीना दी एक बीरे चिन हजार मौरें। 9. और ना आमुरे प्रभु चांई परखुणो, जिणो तिऊं माझिरे केती आदमिउए इणो काम कियो, और सै सापा कु टुकाइयो झांगै। 10 और ना तुमे घुणमुणाओ, जिनी रीती कौरिरे सै घुणमुणाए और नाशा कौरनै वाले कौरिरे नाश किए। 11 पर ए सारी बुशें जो तिऊं आइलै हुई एक औनेणा जाणियो थी; और सै आमुरे चितलाउणा लै आ जो दुनिया रै आखरी बौगता दी रौआई तिउंलै आ लिखी औन्दी। 12 एथीलै जुण सौमझा सा, "हाऊं टेको औन्दो उ," सेउ चोकसिरे रौआलो किए धौनो ना चांई लोटो। 13 तुमे केजी ईणी मुसीबता दी ना चांई पौडै, जै आदमिउ के सहन ना हुआ। परमेश्वर सौचौ आ* सेउ तुमुलै एती मुसीबत नाई देन्दो जो तुमके सहन ना हुआ, और मुसीबता रै बौगते तुमुलै बौचणें री बाट भी दिया ताकी तुमैं तिआ मुसीबता कु बोचा।

मूर्ति पूजणा लै खबरदार कौरणें

14 एजै मतलबै ए मेरे प्यारै भाइयो, मूर्तिपूजा कु बौचियो रौएउ। 15 हाऊं औकली वालो जाणियो तुमु आइलै बोलाऊ: जो हाऊं बोलाऊ तेस तुमे परखो। 16 सेउ धन्यवादा रौ खोरु, जेथ माथें आमैं धन्यवाद कौरी; का आमैं यीशु मसीह रै लोउ आइलै शामिल नाई औन्दै? सै रोटी जो आमैं चोडी सा, का तिआ रोटी चोडियो आमैं यीशु मसीह रै शरीरा आइलै शामिल नाई औन्दै? 17 एथीलै कि एक इ रोटी आ ता आमैं भी जो भौरी का सा, एक शरीर आ: कैलैकि आमैं सौभी तिआ रोटी आइलै शामिल हुई आ। 18 तिऊं इस्त्राइलित रै बारे दी सूचो जो बौली दी चोडाई ऐन्दी चीजै खा ई। का सै तिआ बेदी अइलै शामिल नाई आसतै? 19 तैबै हाऊं का बोलाऊ? का इणो कि मूर्ति काए चोडाओ औन्दो बौलीदान कुछ आ, या मूर्ति कुछ आ? 20. नाई, पर इणो कि दुजै लोग जो बौलीदान कौराई; सै परमेश्वरा लै नाई पर बुरी आत्मा लै बौलीदान कौराई और हाऊं नाई चहांदो कि तुमे भी बुरी आत्माएँ आइलै शामिल हुआ 21. तुमे प्रभु रै खोरु और बुरी आत्मा रै खोरु दुइया माझिया कु नाई पी बौलदैं। तुमे प्रभु री मेज और बुरी आत्माओं री मेज दुया रै भागीदार नाई हुई बौलदैं। 22. का आंमे प्रभु कु रोश गौडाई? का आमैं प्रभु कु ताकती वालै ई?

सारी कुछ परमेश्वरा री महिमा लै

23. सारी चीजै मु कालै ठीक ता आसा, पर सारी फाइदा री नाई: सारी चीजै मु कालै ठीक ता आसा, पर सारी चीजै कौरी तरक्की नाई। 24. केजो

आपणी भौलाई नाई, पर दुजेउ री भौलाई लोडा। 25. जो कुछ कस्साइउ कारे बिका तेस खाओ और मौना रौ मतलब कुछ नाई पूछो? 26. "कैलैकि धौतरी और तेथारी भरपूरी प्रभु री आ।" 27. अगर बिणा विश्वास वाला माझिया कु तुमु कुण औटावा लो और तुमैं डेउणें चहा लै, ता जो कुछ तुमु कारे छाडा लै तेस इ खाओ; और मौना रौ मतलब नाई पूछो। 28. पर अगर कुण तुमु आइलै बोला, ए चीज ता मूर्ति काए बौली की औन्दी, "ता तेसी बोलनै वालै रै मतलबा माथें और मौना रै मतलबा माथें नाई खाओ। 29. मौरै मतलब तैरौ मन नाई, पर तेस दुजै रौ। भला, मेरी आजादी दुजेउ रै बिचारा कौरी कैलै पौरखिया? 30. अगर हाऊं धन्यवाद कौरियो शामिल हुआ ऊ ता जास माथें हाऊं धन्य कौराऊ तेसरै मतलबै मेरी बदनामी कैलै ओआ सा? 31. एथीलै तुमे चाहै खाओ, चाहै पियो, चाहै जो कुछ कौरा प्रभु री महिमा लै कौरौ। 32. तुमे ना यहुदिउ, ना युनानिउ, और ना परमेश्वरा री कलिसिया लै ठोकरा रौ कारण बोणो। 33. जिणो हाऊं भी सारी बुशेंऊ दी सारेऊ खुश कौराऊ, और आपणो नाई पर भौरी सारेऊ रौ फाइदो लोडाउ कि सै मुक्ति पा।

11 तुमे मुं जिणी चाल चालो जिणो हाऊं मसीहा री चाल चालाऊ।*

आराधना कौरदी बारे मूंड ढौकणो

2. ओ भाईओ, हाऊं तुमारी तारीफ कौराऊ कि सारी बुशेंउ दी तुमे मूं याद छाडाई; जो कुछ मुइयें तुमके आ शिखाओ औन्दो; तेथ माथें चालदैं थाकौ लागी। 3. हाऊं चहा उ कि तुमे इणो जाणो हर एक मौरदा) रौ मूंड यीशु मसीह आ और छेवडी रौ मूंड पुरुष आ, और यीशु मसीहा रौ मूंड परमेश्वर आ। 4. जो पुरुष टोपै लाइयो या मूंडा ढौकियो प्राथना या भविश्यवाणी कौरा सा सेउ आपणें मूंडा री बेईज्जती कौरा सा। 5. पर जुण छेवडी नांगी मुंडै प्राथना या भविश्यवाणी कौरा सा सै भी आपणें मूंडा री बेईज्जती कौरा सा। सै तिआ छेवडी भाशिरे आ जासरे आपणो मूंड जोडी कु कून्डो औन्दो आ। 6. अगर जुण छेवडी ढाटू या चुनरी मूंडा माथें नाई ला ली ता बाल भी पोरु कुंडावा ली; अगर छेवडी लै बाल कुंडणें या मुंडन कराउणो लाजी री बुश ए आ, ता सै ढाटू ला या चुनरी पा। 7. ओ पुरषा लै आपणो मूंड दुमणो ठीक नाई, कैलैकि सेउ परमेश्वरा री शौक और महिमा सा; पर छेवडी पुरषा री महिमा आ। 8. कैलैकि पुरुष छेवडी कु नाई हुओ, पर छेवडी पुरषा कु हुई आ; 9. और पुरुष छेवडी कालै नाई चाणी पर छेवडी पुरषा कालै चाणी आ। 10. एथीलै परमेश्वरा रै दुतु रै कारणे छेवडी लै ठीक ए आ कि हक आपणें मूंडा माथें छाडा। 11 तैबै भी प्रभु दी ना ता छेवडी घोट मौरद औ ना मौरदा घोट छेवडी आ। 12 कैलैकि जिणी छेवडी मौरदा कु आ तिणी ई मौरद भी छेवडी कौरिरे आ; पर सारी चीजै परमेश्वरा कौरिरे आ। 13 तुमे आपु इ बिचर कौरौ कि का छेवडी नांगी मुंडे परमेश्वरा लै प्राथना कौरदी बारे ढौबा सा? 14 का आसान रीती कौरी भी तुमे नाई कि जाणदैं अगर पुरुष लाम्बे बाल छाडा लो ता तेसलै बेईज्जती आ। 15 पर अगर छेवडी लाम्बे बाल छाडा ली ता तिआलै ईज्जत आ, कैलैकि बाल तिआ कालै चुनरी कौरौ या ढाटू कौरौ दुमणा लै आ दैओ औन्दै। 16 पर अगर कुण ऐजी बुशा माथें वाद बिवाद कौरनो चहा लो। ता इणो जाणा लो कि ना आमारी और ना परमेश्वरा री कलिसिया री ऐ रीती आ।

प्रभु भोजा रै बारे दी

(मती26:26-29; मरकुस14: 22-25; लूका22: 14-20)

17 पर इयें आज्ञा देन्दी बारे हाऊं तुमारी तारीफ नाई कौरदो, एथीलै कि तुमारै कौठे हुणें कु भलाई नाई पर नुकसान हुआ सा। 18 कैलैकि पैहलै ता हाऊं इणो शुणाउ कि जैबै तुमे कलिसिया दी कौठे हुआ ई ता तुमु माझियें झौगडो हुआ सा, और हाऊं एथ माथें कुछ कुछ विश्वास भी कौराऊ। 19 कैलै कि गुटबाजी भी तुमु माझी जरूर औदी औली, एथीलै कि जो लोग तुमु माझिरे ठीक आ तिउंरे प्रगट हुओ। 20. इणो कि तुमे जो एकी जगा दी हुआ इ ता तुमे प्रभु-भोज खाणालै कौठे थोडी हुआइ, 21. कैलैकि खाणें रै बौगते एकी दुजै कु पैहलै आपणो भोज खा सा इणें कौरिरे केजो ता भूखौ रौआ सा और केजो मतवालो हुआ सा। 22 का खाणा पिणा लै तुमके आपणो घोर नाई

आसतौ? या परमेश्वरारी कलिसिया बेकार जाणाई, और जासकै नाई आसतौ तिऊं री बेईज्जती कौराई? हाऊं तुमुलै का बोलू? का ऐजी बूशा लै तुमारी तारीफ कौरू? नाई, हाऊं तारीफ नाई कौरदौ। 23. कैलै कि ऐ बूश मुकै प्रभु कु पहुंची, और मुइयें तुमु काए भी पहुंचाई गोई कि प्रभु यीशुए जेजी राचिरे सेउ पौकडाओ, रोटी नीं, 24. और धन्यवाद कौरियों सै रोटी चोड़ी और बोलौ, “एउ मैरौ शरीर आ जो तुमु लै आ: मेरी याद कौरना लै इणौ ई कौरनौ।” 25. एजी रीती कौरिरे तेथ बासिए खोरु भी निंओ और बोलौ, “एउ खोरु मैरै लोउ दी नौवौ वचन आ: जेबी केबी पिया लै, ता मेरी याद कौरना लै इणौ ई कौरौ।” 26. कैलै कि जैबै केबी तुमे इयें रोटी खा ई और एस खोरु मांझिया कु पिया ई, तो प्रभु री मौत जेबी झाऊं से दुजी बारै ना आशौ, प्रचार कौरौ आ 27. एथीलै जुण-कुण प्रभु री रोटी गलत रीती कौरौ खा और तेसरै खोरु कु पिया, सेउ प्रभु रै शरीर और लोउ रौ गुनाही औआ। 28. एथीलै आदमी आपणौ ज़ीऊ पौरखी और देखियो इणी रीती कौरिए इयें रोटी मांझिया कु खा, और एस खोरु भिता कु पिया। 29. कैलै कि जो खान्दी-पिन्दी बारै प्रभु रौ शरीर नाई प्राणदै, सेउ एस खाणै पिणै कु आपु माथे सौजा आणा सा। 30. एजै मतलबै तुमु मांझिरे भौरी लोग कमजोर और रोगी आ, और भौरी लोग सूती भी गोए (मौरी गोए)। 31. अगर आमै आपु पौरखुई थै ता सौजा नाई हुआ थी। 32. पर प्रभु अमु पौरखणा लै सौजा दिआ आ, एथीलै कि आमै इयें दुनिया आइलै बुरै ना ठहरी। 33. एथीलै, ओ मैरै भाईयो, जैबै तुमे रोटी खान्दै कौठै हुआइ ता एकी दुजै लै ठहरा कौरौ। 34. अगर कुण भोखौ आ ता सेउ आपणै घौरा कै रोटी खा लौ, जेथ कौरौ तुमारौ कौठै हुणौ सौजा रौ कारण ना हुआ। बाकी बुशै हाऊं आपु आशियो ठीक कौराऊ।

आत्मिक वरदान

12 ओ भाईयो, हाऊं नाई चहांदौ कि तुमे आत्मा रै वरदाना रै बारै अनजाण रौ। 2. तुमे जाणा ई कि जैबी तु मसीह दी नाई थै, ता लाटी मूर्तिउ रै पिछै चाला थै, जिणौ सै चलावा थै तिणौ चाला थै। 3. एथीलै हाऊं तुमु चितलावा ऊ कि जो कुण परमेश्वरारी आत्मा री अगुवाई कौरिरे बोला सा, सेउ नाई बोलदौ कि यीशु शापित ऐ आ; और ना कोई बिण पवित्र आत्मा कौरिरे बोली बोलदौ कि यीशु प्रभु आ। 4. बरदान ता कई रौंगा रै आ, पर आत्मा एक इ आ; 5. और सेवा भी कई रौंगा री आ, पर प्रभु एक इ आ; 6. और शक्ति वालै काम ता कई रौंगा रै आ, पर परमेश्वर एक इ आ, जुण हर रौंगा री शक्ति तयार कौरा सा। 7. पर सारेउ रै फाइदा पहुंचाउणा लै हर आदमी लै आत्मा रौ प्याशौ दिया ई। 8. कैलै कि एकी लै आत्मा रै जरिरे बुद्धी री बुशै दिया ई, और दुजै लै तिणै आत्मा रै अनुसार ज्ञाना री बुशै दिया ई। 9. कासलै तिणै इ आत्मा कु विश्वास, और कासलै तिणै एक आत्मा कु चांगे कौरनै रौ वरदान दिया ई। 10. तैबै कास लै शक्ति रै काम कौरनै री शक्ति रौ वरदान, और कासलै भविष्यवाणी कौरनै रौ वरदान, और कासलै आत्माएं री परख कौरनै रौ, और कासलै कई रौंगा री बोली बोलणा रौ, और कासलै बोली रौ मतलब समझाउणा रौ वरदान दिआ ई। 11. पर ऐ सब शक्ति वालै काम एक इ आत्मा कौरा आ जो जास जास ठीक सौमझा सा तिउलै इउं वरदान दिया सा।

शरीर एक आंग भौरी

12 कैलैकि जिणौ आमारौ शरीर ता एक आ और ऐथारै आंग भौरी का, और तेस एक शरीरा रै सारै आंग भौरी हुईयो भी सरै मिलियो भी एक इ शरीर ऐ आ, तिणौ इ मसीह भी आ। 13. कैलैकि अमु सारेउए केजौ यहूदी औलौ का युनानी, केजौ दास औलौ या केजौ आजाद औलौ, एक इ आत्मा कौरिरे एक इ शरीर हुणा लै बपतिस्मौ नौओ, और अमु सौबी लै एक इ आत्माआ पिलाई एन्दी 14. एथीलै कि शरीरा दी एक इ आंग नाई पर भौरी सारै आ। 15. अगर बांगणै बोललै, “हाऊं हाथ नाई, एथीलै हाऊं शरीरा रौ नाई, “तै का सेउ ऐजै मतलबै शरीरा रौ नाई? 16. और अगर कौन्थू बोलालै, “हाऊं आखी नाई एथीलै शरीरा रौ नाई, “तै का कौन्थू एजै मतलबै शरीरा रौ नाई? 17. अगर सारौ शरीर आखी इ औआ थी ता शुणा किणै कौरौ थै? अगर सारौ शरीर कौन्थू इ औआ थौ ता शौंगा किणै कौरौ थै? 18. पर परमेश्वरै सौची ई

आंग आपणी मोरजी रै अनुसार एकी एकी कौरिए शरीरा दी छाडै आ। 19. अगर ऐ सारै एक इ आंग हुआ थै ता शरीर किरै हुआ थौ? 20. पर ऐबै आंग ता भौरी सा, पर शरीर एक इ आ। 21. आखी हाथा लै ना बोली बोलदी, “मुकै तेरी जरूरत नाई, “और ना मूँड बाँगणा लै बोली बोलदौ कि, “मुकै तेरी जरूरत नाई।” 22. पर शरीरा रै सै आंग जो दुजै कु कमजोर लागा ई, भौरौ इ जरूरी आ; 23. और शरीरा रै जेजै आंगा लै आमै ईज्जत लायक नाई सौमझदै तिउलै आमै जादी ईज्जत देई आ; और आमारै शोबा वालै आंग तौइं भी भौरी शोबलै बोणाई, 24. तैबै भी आमारै शोबा वालै आंगा लै एथारी जरूरत नाई आसती। पर परमेश्वरै आमारौ शरीर इणौ चाणी गो आ कि जेजै आंगा लै ईज्जत री कमी थी तेस आंगा लै तौइं भी भौरी ईज्जत मिला। 25. ताकी शरीरा दी बिरोध ना पौडा, पर आंग एकी दुजै री एक जेती फिकर कौरा। 26. एथीलै अगर एक आंग दु:ख झेला आ, ता सारै आंग तेस आइलै दु:ख झेलाई; और अगर एकी आंगा री बोडाई हुआ सा, ता तेस आइलै सारै आंग खुशी मौनावा ई। 27. इणै कौरिरे तुमे सारै मिलियो मसीहा रौ शरीर ऐ आ, और अलग अलग तेथारै आंग आ; 28. और परमेश्वरै कलिसिया दी अलग अलग आदमी आ छोटै औन्दै: पैहलै प्रेरित, दुजै भविष्यवाणी कौरनै वालै, और चीजे आ पौडाउनै वालै, तैबै शक्ति वालै कामा कौरनै वालै, तैबै चांगे कौरनै वालै, और भौलाई कौरनै वालै, और इन्तजाम कौरनै वालै, और कई रौंगा री बोली बोलणै वालै। 29. का सारै प्रेरित ऐ आ? का सारै भविष्यवाणी बोलणै वालै आ? का सारै उपदेश कौरनै वालै आ? का सारै शक्ति वालै कामा कौरनै वालै आ? 30. का सारेउ लै चांगे कौरनै रौ वरदान आ मिलौ औन्दौ? का सारै कई रौंगा री बोली बोलाई? 31. का सारै अनुवाद कौराई? तुमे बौडै बौडै वरदाना री धुना दी रौ। पर हाऊं तुमुलै तौरै भी सौबी कु बौडिया बाट बोलाऊ।

प्यार- एक सौबी कु आच्छी बाट

13 अगर हाऊं आदमी और परमेश्वरारी रै दुतु री बोली बोलू और प्यार ना छाडू, ता हाऊं टण-पणादौ पितल और छण छणांदी झाँझ ऊ। 2. और अगर हाऊं भविष्यवाणी कौरौ बोलू, और सारै भेद और सारै रौंगा रै ज्ञान सौमझू, और इदरा झाऊं कि मुकै पूरौ विश्वास आ कि हाऊं धारै टीरै एकी जागा कु दुजी जागा लै हटाऊ। पर प्यार ना छाडू, ता हाऊं कुछ भी नाई आसतौ।* 3. अगर हाऊं आपणौ सारी धन जयदाद गरीबू लै खिलाऊ, या आपणौ शरीर जालना लै देऊ, और प्यार ना छाडू, ता मुकै कुछ भी फाइदो नाई। 4. प्यार धीरज वालौ आ, और कृपा वालौ आ प्यार डह नाई कौरदौ, प्यार आपणी बोडाई नाई कौरदौ, और फूलना नाई। 5. प्यार बिणा रीती माथे नाई चालदौ, सेउ आपणौ भौलाई नाई चहांदौ, झुंझलांदौ नाई, बुरौ नाई मानदौ। 6. बुरे कामा कु खुश नाई हुंदौ, पर सौच्यै कु खुश हुआ सा। 7. सेउ सारी बुशै सहन कौरा सा, सारी बुशु माथे नौजर छाडा सा, सारी बुशु री आश छाडा सा, सारी बुशु दी धीरज छाडा सा। 8. प्यार केबी टौलदौ नाई, भविष्यवाणी री ताकत भी नाई रौइंदी; जो ताकत दुजी बोली बोलणै वाली जीभा दी आ सै जीभै एकी दीनै चुटकचार थाकाई; ज्ञान औलौ ता, सेऊ भी पोरु मिटा सा। 9. कैलै कि आमारौ ज्ञान अधूरौ सा, और आमारी भविष्यवाणी भी अधूरौ; 10. पर जैबै सर्वशक्तिमान, सारै ज्ञान जाणनै वालौ आशालौ, जो जो अधूरौ आ सेउ सारौ पूरौ हुआ सा। 11. जेबी हाऊं छोटौ छोहरु थौ, ता हाऊं छोहरु बाशिरे बोला थौ, छोहरु रै जिणौ मन थौ, और छोहरु री जीणी औकल थी; पर जैबै स्याणौ हुई गौ आ ता छोहरु वाली बुशै जाणै देई गोई आ। 12. अबै आमकै शीशा दी धुधलौ जेई दिशा सा, पर सेजे बौन्तै आमनै-सामनै देखिलै; एजै बौन्तै मैरौ ज्ञान अधूरौ आ, पर तेबी तेस बौन्तै इणी पूरी रीती कौरिरे प्राणु लौ, जिणौ हाऊं प्राणुओ औन्दौ आ। 13. पर ऐबै विश्वास, आशा, प्यार बौणी रौआई, पर इउं चिरेऊ मांझिया कु सौबी कु बौडौ प्यार आ।

भविष्यवाणी और दूजी- दूजी रौंगा री बोली

14 प्यारा री बाटा दी आपण्डणा री कोशिश कौरौ, और आत्मा रै वरदाना रै धुना दी रौ, खास कौरिरे इणौ कि भविष्यवाणी कौरौ।

2. कैलैकि जो दुजी बोली दी बुशै ला सेउ आदमी आइलै नाइं बल्कि परमेश्वरा आइलै बुशै ला सा; एथीलै कि तेसरी बुशै कोइयौ ना सौमझदौ, कैलैकि सेउ भेदा री बुशै आत्मा दी हुइयौ बोला सा। 3. पर जो भविष्यवाणी कौर सा, सेउ आदमी आइलै तरक्की और उपदेश और शान्ति री बुशै बोला सा। 4. जो दुजी बोली दी बुशै बोला सा, सेउ आपणी इ तरक्की कौरा सा; पर जो भविष्यवाणी कौरा सा, से कलिसिया री तरक्की कौरा सा। 5. हाऊं चहाउ कि तुमे सारै दुजी बोली दी बुशै लाओ, पर एथकु जादौ इणौ चहाऊ कि तुमे भविष्यवाणी कौरौ: कैलै कि अगर दुजी बोली बोलणै वालौ कलिसिया री तरक्की कौरना लै अनुवाद ना कौरालौ ता भविष्यवाणी कौरनै वालौ तेसकु बोडी चौड़ियौ आ। 6. एथीलै ओ भाईयो, अगर हाऊं तुमु काए आशियौ दुजी बोली दी बुशै लाऊ, और प्याशै री, ज्ञाना री, या भविष्यवाणी या उपदेशा री बुशै तुमु आइलै नाई बोल लौ, ता मुकु तुमुलै का फाइदौ हुआ सा? 7. इणौ कौरिए अगर बिण जिवा री चीजै जेथा कु आवाज निकला सा, जिणी बाँइशी या बीन, अगर तिउंरी आवाजा दी भेद ना ओलौ ता, जो फूकरा ई या बाजा ई, सेउ किणै कौरिए प्राणिया सा? 8. और अगर तुरही री आवाज साफ ना ओली, ता कुण कौरा सा लोडाई कौरना लै तैयारी? 9. इणी इ तुमे भी अगर जीभा कु साफ साफ बुशै नाई बोला लै, ता जो कुछ बोलिया सेउ किणौ सौमझिया सा? तुमे ता बागुरा आइलै बुशै लाइणै वालै ठहरा ई। 10. दुनिया दी चाउ केती भी रैगा री बोली कैलै ना ओली, पर तिउं मांझिया कु केजी बिणा मतलबा री नाई ओली। 11. एथीलै अगर हाऊं केजी बोली रौ मतलब ना समझ, ता बोलणै वालै री नौदरिए परदेशी ठहराउ, और बोलणै वालौ मेरी नौदरी दी परदेशी ठहरा सा। 12. एथीलै तुमे भी जैबै आत्मा रै वरदाना रै धुना दी ओलै, ता इणी कोशिश कौरौ तुमारै वरदाना री तरक्की कु कलिसिया री तरक्की भी हुआ। 13. एजै कारणे जो दुजी बोली बोलालौ, सेउ प्राथना कौरा कि साथाई तेथारौ अनुवाद भी कौरौ बोलौ। 14. एथीलै अगर हाऊं दुजी बोली दी प्राथना कौरलौ, ता मेरी आत्मा प्राथना कौरा सा पर मेरी बुध्दी काम नाई कौरदी। 15. तैबै का चांइ कौरनौ? हाऊं आत्मा कौरौ भी प्राथना कौराऊ, और बुध्दी कौरिए भजन भी गा ऊ। 16. नाई ता अगर तू आत्मा कु धन्यवाद कौरालौ, ता बिणा ज्ञान वालौ तैरै धन्यवादा माथे आमीन किणै कौरिए बोला? कैलैकि सेउ ता नाई जाणदौ कि तू का ई बोलदौ लागौ ओन्दौ? 17. तू ता आपकु ठीक धन्यवाद कौराई, पर दुजा री तरक्की नाई हुन्दी। 18. हाऊं आपणै परमेश्वरा रौ धन्यवाद कौराउ, कि हाऊं तुम सारेउ कु जादौ दुजी बोली दी बोला ऊ। 19. पर कलिसिया दी दुजी बोली दी दस हजार बुशै बोलणै कु एउ मुलै तौई भी आच्छौ जाणिया आ, कि दुजै कु शिखाउणा लै बुध्दी कु पांजा बुशै बोलू। 20. ओ भाईयो, तुमे ओकली कु छोहरु ना बौणौ: बुराई दी ता छोहरु रौ, पर सौमझी दी स्याणै बौणौ। 21. कानूना दी आ लिखौ ओन्दौ, कि प्रभु बोला, "जो दुजी बोली बोलाई, तिउंरौ इस्तेमाल कौरियौ, और जुण बिगाने आ, तिउंरै मू इस्तेमाल कौरियौ, लोगु आइलै बुशै ला ऊ, तैबै भी सै मेरी नाई शुणालै।" 22. एथीलै दुजी बोली विश्वासिउ लै नाई, पर अविश्वासिउ लै निशाण आ; और भविष्यवाणी अविश्वासिउ लै नाई, पर विश्वासिउ लै निशाण आ। 23. एथीलै अगर कलिसिया एकी जाणै कौठी ओली, और जेती आसाई सै दुजी बोली बोला, और बाईलै या जुण विश्वास नाई कौरदै सै भितरै आशा लै तै का से पागल नाई बोलालै? 24. पर अगर सब भविष्यवाणी कौरदै लागा लै, और कुण जो विश्वास नाई कौरदै या बाईलौ आदमी भितरै आशा लै, ता सारै तेस आरोपी ठहरावा ई और पौरखा ई; 25. और तिउंरै मौना दी भेद प्रगत हुआई और तैबै सेउ मुंआ री हाँगिरे धौनी पौड़ियौ परमेश्वरा कु ढाल कौरा, और आच्छा कौरिए माना कि परमेश्वर तुमु मांझिरे आ।

उपासना दी अनुशासन

26. एथीलै ओ भाईयो, का कौरनौ चांइ? जैबै तुमे कौठै हुआई, ता एकी एकी रै जीवा दी भजन या उपदेश या दुजी बोली या प्याशौ या बोली रौ मतलब बोलणौ रौआ सा। सारौ कुछ आत्मा री तरक्की लै हुणौ चांइ। 27. अगर दुजी बोली दी बुशै लाइणी ओली ता दुई या भौरी ओलै ता चीन लोग बारी बारीए बोलालै और एक तेथारौ मतलब सौमझावा लै। 28. पर अगर मतलब

सौमझाउणा वालौ ना ओलौ ता, दुजी बोली बोलणै वालौ कलिसिया दी चुटुकचार थाका लौ, और आपणै मौना कु और परमेश्वरा आइलै बुशै ला लौ। 29. भविष्यवाणी बोलणै वालै मांझिया कु दुई या चीन बोलालै, और बाकी लोग तिउंरै वचन पौरखा लै। 30. पर अगर दुजै माथे, जुण बोशौ ओन्दौ आ, कुछ परमेश्वरा री तौरफा कु प्याशौ आ ता पहलौ भविष्यवाणी बोलणै वालौ चुटुकचार चांइ थाकणौ। 31. कैलैकि तुमे सारै एकी एकी कौरियौ भविष्यवाणी कौरौ बोलौ ई, ताखी सारै शिखा लै, और सारै शान्ती पा लै। 32. और भविष्यवाणी बोलणै वालै री आत्मा भविष्यवाणी बोलणै वालै रै वशा दी हुआ 33. कैलैकि परमेश्वर गड़बडी रौ नाई पर शान्ति रौ परमेश्वर आ। जिणौ पवित्र लोगु री सारी कलिसिया दी आ। 34. छेवडी कलिसिया री मण्डली दी चुटुकचार थाका ली, कैलैकि तिउंलै बुशै लाइणा रौ आज्ञा नाई पर अधीन रौइणा री आज्ञा सा, जिणौ कानूना दी लिखौ ओन्दौ भी आ। 35. अगर सै कुछ शीखणौ चहा ली, ता घौरा के आपणै बोउटै कु पूछा, कैलै कि छेवडी री कलिसिया दी बुशै लाइणी लाजी लाइणा री बूश आ। 36. का परमेश्वरा रौ वचन तुमको निकलौ आ? या सिर्फ तुमु इ काए पौंउचौ आ? 37. अगर कुण आदमी आपुलै भविष्यवाणी कौरनै वालौ या आत्मिक आदमी सौमझा लौ ता सेउ इणौ जाणा लौ कि जो बुशै हाऊं तुमुलै लिखाऊ, सै प्रभु री आज्ञाएँ आ। 38. पर अगर कुण इणौ ना माना लौ, ता तेस भी नाई मानौ। 39. और ओ भाईयो, भविष्यवाणी कौरना री धुना दी रौ, और दुजी बोली बोलणा लै मना नाई कौरौ; 40. पर सारी बुशै ढोंगा री और कानूना कौरिए चांइ हुणी

मसीह रौ दूजी बारै जिउंदौ हुणौ

15. ओ भाईयो, आबै हाऊं तुमुलै सेजौखुशी रौ संदेश बोलाउ जो मुइयें पैहलै शुणाई ऐरौ आ, जो तुमुरे मानी भी ऐरौ थौ और जेथाई तुमे टेके ओन्दै भी आ। 2. और तेथी कौरिए तुमारौ उदार भी हुआ सा, अगर तेस खुशी रौ संदेश जो मुइयें तुमके शुणाओ थौ, याद छाडाई; नाई ता तुमारौ विश्वास कौरणौ बेकार हुआ। 3. एजै कारणे मुइयें सौभी कु पैहलै तुम के सेजी बूश पहुंचाई, जो मुके पहुंची थी कि पवित्र शास्त्रा रै वचना रै अनुसार यीशु मसीह आमारे पापा री ताइरे मौरि गौ आ, 4. और ओडाची दी छाडौ आ, और पवित्र शास्त्रा रै अनुसार चीजै दिनै जीउंदौ भी हुआ आ, 5. और पतरसा (कैफा) कै और सारै बारह चलेऊ कै भी दिशौ आ। 6. तैबै सेउ पाँज शौआ कु जादौ भाईउ कै एकी बारै दिशौ आ, जास मांझिया कु भौरी का इबी झाऊं जिउंदै भी आ, पर कुछ गौए मौरि। 7. तैबै सेउ याकुबा कै दिशौ और तैबै सारै प्रेरितु कै दिशौ आ। 8. सारेउ बासिरे मुके भी दिशौ आ, जो मानौ अधूरे दिना रौ जौन्मौ ऊ। 9. कैलैकि हाऊं प्रेरिता दी सौभी कु छोटी ऊ, याने के प्रेरिता बोलणै रै लायक भी नाई आसतौ, कैलैकि मुइयें परमेश्वरा री कलिसिया परेशान की थी। 10. पर हाऊं जो कुछ भी उ परमेश्वरा रै बोडी दया कु आ। तेसरौ बोडी दया जो मुं माथे हुआ, सेउ बेकार नाई हुआ; पर मुइयें सौभी कु बोडी चौड़ियौ मेहनत भी की आ; तैबै भी ऐउ सब मेरी तौरफा कु नाई बल्कि परमेश्वरा रै बोडी दया कु जो मुं माथे थौ। 11. एथीलै चाऊ हाऊं आ, चाउ सै ओलै, आमै ऐजौप्रचार कौरौ आ, और एथी माथे तुमुरे विश्वास भी कियौ आ।

आमारौ दूजी बारै जिउंदौ हुणौ

12. एथीलै जैबै कि मसिहा रौ एस प्रचार कौराई कि सेउ मौरै ओन्दै मांझिया कु जिउंदौ हुआ आ, ता तुमु मांझिया कु केती इणौ बोलाई कि मौरै ओन्दै रौ दुजी बारै जिउंदौहुणौ आसतौनाई? 13. अगर मौरै ओन्दै रौ दुजी बारै जिउंदौ हुणौ आसतौनाई, ता मसीह भी नाई हुआ जिउंदौ; 14. अगर मसीह जिउंदौ नाई हुआ, ता आमारौ प्रचार कौरनौभी बेकार आ, और तुमारौ विश्वास भी बेकार आ। 15. याने के आमै परमेश्वरा रै झूठै गवाह ठहरै; कैलैकि आमुए परमेश्वरा रै बारै दी ऐ गवाही देई आ कि तिणिए यीशु मसीह जिउंदौ कियौ आ, याने कि नाई जिउंदौ कियौ अगर मौरै ओन्दै नाई जिउंदै हुआ थै। 16. और अगर मौरै ओन्दै नाई जीआ थै, ता मसीह भी नाई हुआ जिउंदौ; 17. और अगर मसीह जिउंदौ नाई हुआ, ता तुमारौ विश्वास बेकार आ, और तुमे इभी झाऊं आपणै पापा दी आ फौसै ओन्दै। 18. याने के जो मसीहा दी मौरिगोए आ, सै भी खात्म हुए। 19. अगर आमै सिर्फ इयें जिन्दगी दी मसीह कु

आश छाड़ाई ता आमैं सारैं आदमिउ कु भौरी बिण भागा रैं ई। 20. पर सौंजीयीशु मसीह मुदें मांझियाकु जिउंदौ हुआँ आ और जुण सुतीमौर गोए तिउं मांझिएउ प्हेलौ फौल हुआँ आ। 21. कैलैकि जैबैं आदमी रैं जौरिरे मौत आशी, ता आदमी रैं जौरिरे मौरें औन्दै रौ दुजी बारें जिउंदौ हुणौ भी आशौ आ। 22. और जिणौ आदमा दी मौरा ई, तिणौ मसीहा दी जीउंदौ भी हुआ, 23. पर हर एक आपणी आपणी बारीए: प्हेलौ फौल मसीह, और तेथ बासिए मसीह रैं दुजी बारें आशणें बासिए तेसरें लोग। 24. एथ बासिए (अन्त) आखरी हुआ। सेजें बौगैं सेउ सारौ राज (प्रधानता), और सारौ हक, और शक्ति रौ (अन्त) खात्तौ कौरियौ सारौ राज यीशु मसीह आपनैं बाब परमेश्वरा रैं हाथा सौम्भाला आ। 25. कैलैकि जेबी झाउं सेउ आपणें दुश्मण आपनैं बाँगणा थालिए ना आणालौ, तेबी झाउं यीशु मसीह रौ राज कौरणौ जरूरी आ। 26. सौबी कु आखरी दुश्मण जो खातम जा कौरणौ, सेउ मौत आ। 27. कैलैकि "परमेश्वरें सारौ कुछ तेसरें बाँगणें थाली की गौ अ, "पर जैबैं सेउ बोला सा कि सारौ कुछ तेसरें हाथा दी कौरि ऐरौ आ, ता साफ जाहिर आ जुणिए सारौ कुछ तेसरें हाथा दी की ऐरौ आ, और आपु सेउ औलग रौ आ। 28. और जैबैं सारौ कुछ तेसरें हाथा दी हुई जा लौ, ता छोहरू भी आपु तेसरें हाथा दी हुआ सा, जुणिए सब कुछ तेसरें हाथा दी कियौ, ताकी सारेउ दी परमेश्वर सब कुछ औलौ। 29. नाई ता जो लोग मौरें औन्दै लैं बपतिस्मौ निआसैं का कौराई? अगर जो मुदें जिउंदै औन्दैनाई ता तैबैं कैलै निआ ई तिउंलैं बपतिस्मौ? 30. और आमैं भी कैलै हर बौकतैं मुसीबता दी पौड़ी थाका ई? 31. ओ भाईओ, मुलें तेस घौमण्डा री कौसम जो आमारें प्रभु यीशु दी हाऊं तुमारें बारें दी कौराऊ कि हाऊं रोज-रोज मौराऊ। 32. अगर हाऊं आदमी री रीती माथें इफिसुसा दी बौणा रैं बौणपेष्ठा आइलैं लौडौ ता मुलें का फाइदौ हुआँ आ? अगर मौरें औन्दै जिआवा नाई लैं, " ता आशौ, खाई पीइ लैं, काले ता इणी भी मौरि आ।" 33. धोखौ नाई खणौ, " बूरी सौगंती आच्छौ चाल चालन पोरू बिगाडा सा।" 34. धौर्म लैं खौड़ी बिउजौ और पाप ना कौरौ, कैलैकि कुछ इणैजो परमेश्वर नाई जाणदैं। हाऊं तुमुलें ऐजी तांईरे बोलदैं लागौ औन्दौ ताकी तुमुदी शौर्म आशा।

दूजी बारें जिउंदै हुणें रौ शरीर

35. आबैं कुण इणौ बोली बौला, मौरें औन्दै किणें जीउंदै हुआई, और किणौ शरीर धारण कौरियौ आशा सा? 36. ओ बिणा औकली वालें ओ! जो कुछ तुमे बौआईजेबी झाऊं सेउ मौरा नाई लौता सेउ जिउंदौ नाई हुंदौ। 37. और जो तू बौआई, सेउ सेजौ शरीर नाई जो पैदौ हुणें वालौ आ, पर बीजा रौ गुलौ आ, चाऊ गीवाँ रौ आ चाऊ केजें भी नाजा रौ आ। 38. पर पेमेश्वर आपणी मौरजी रैं अनुसार तेसलैं शरीर दिआ सा, और हर एकी बीजा लैं तेसलैं खास शरीर। 39. सारौ शरीर एक जिणौ नाई: आदमिउ रौ कुछ ओर। गुन्दू रौ शरीर दूजौ आ, चिदू- चिटकोरु रौ ओर आ, और माच्छी रौ शरीर दूजौ। 40. सौरगा रौ शरीर आ और धौतरी माथलौशरीर भी आ। पर सौरगा रैं शरीरा री चौमक कुछ ओर आ और धौतरी माथलैं शरीरा रौ कुछ ओर। 41. सूरजा री चौमक कुछ ओर आ, और जूना रौ कुछ ओर, और तारेऊ री चौमक कुछ ओर, (कैलैकि एकी तारें कु दुजें तारें रैं चमकुणा दी फौरक ऐ आ) 42. मौरें औन्दै रौ जिउणौ भी इणौआ। शरीर भी नाश हुणौ री हालती दी जालियौ या दाबियौ इयें धौतरी माथें बौआ, और सेउ शरीर जो दुजी बारें जिउंदौ हुआँ आ सेउ नाश हुणें वालौ नाई आ। 43. सेउ शरीर बिणा इज्जती कौरि धौतरी दी बौ आ और तेज चमक आइलैं जिउंदौ हुआँ आ, कमजोर हुइयौ बौआई और शौक्ति आइलैं जिउंदौ हुआँ आ। 44. स्वाभाविक शरीर बौआई और आत्मिक शरीर जिउंदौ हुआँ आ: जैबैं कि संसारिक शरीर आ, ता आत्मिक शरीर भी आ। 45. इणौ लिखौ भी आ कि "पहलौ आदमी यानी के आदम जिउंदौ प्राणी बौणौ।" और आखरी आदम याने कि यीशु मसीह जिउंदौ देणे वाली आत्मा बौणौ। 46. पर प्हेलैं आत्मिक नाई थौ पर संसारिक थौ, तेथ बासिए आत्मिक हुआँ। 47. पहलौ आदमी धौतरी कु याने कि माटै रौ थौ; दुजौ आदमी आसमानी आ। 48. जिणौ सेउ माटै रौ थौ, तिणेंसैं भी आ जो माटै रैं आ; और जिणौ सेउ आसमानीआ, तिणेंसैं भी आ जो आसमानी आ। 49. और जिणौ आमुए तेसरौ रूप धारण कियौ आ जो माटै रौ थौ तिणौतेस आसमानी रौ

रूप भी धारण कौरि आ। 50. ओ भाईयो, हाऊं इणौ बोलऊ कि मास और लोऊ परमेश्वरा रैं राजा रैं हकदार नाई हुई बौलदैं, और ना नाश हुणें वालौ बीणा नाश हुणें वालें रौ हकदार हुई बौलदैं। 51. देखौ, हाऊं तुमकें भेदा बूश बोलाऊ: आमैं सारें नाई सुतदैं, पर सारें बौदलुइ आ, 52. और एउ एकी घौडिए पलक झौपकियौ आखरी तुरही फूकरियो हुआँ आ। कैलैकि तुरही फूकराई और मौरें औन्दै बिणा नाश हुणें वाली हालती दी उठावा ई 53. कैलै कि जरूरी आ कि नाश हुणें वालौ शरीर बिणा नाश हुणें वालौ शरीर भीडा लैं, और एउ मौरनैं वालौ शरीर अमर हुणें वालौ शरीर भीडा लैं। 54. और जैबैं एउ नाश हुणें वालौ शरीर बिणा नाश हुणें वालौ शरीर भीडी जा लौ और एउ मौरनैं वालौ शरीर अमर हुणें वालौ शरीर भीडी जा लौ, तैबैं सेउ वचन जो लिखौ औन्दौ आ सेउ पूरा हुआँ आ: 55. ओ मौत, तेरी जीत किये रौई आ? ओ मौत तैरौ डंक किये रौ आ? 56. मौता रौ डंक पाप आ, और पापा री ताकत कानून आ। 57. पर परमेश्वरा रौ धन्यवाद आ, जो आमारें प्भु यीशु मसीह रैं जौरिरे आमू जीतावा आ। 58. एथीलैं ओ मैरें प्यारें भाईयो, मजबूत और अटल रौ, और प्रभु रैं कामा दी सौदा बौडदैं थाकौ लागी, कैलैकि आमैं इणौ जाणी आ कि तुमारी मेहनत प्रभु दी बेकार नाई आसदी।

विश्वासिउ लैं दाण

16 आबैं तिणें फौटी रैं बारें दी जो पवित्र लोगु लैं कौराई, जीणी आज्ञा मुइयें गलातिउ री कलिसिया लैं देई, तिणौ तुमे भी कौरौ। 2. हौंमैं रैं प्हेलें दिनें तुमु मांझिया कु हर एक आपणी-आपणी आमदानी रैं अनुसार कुछ आपु कें छाडा लैं कि जेबी हाऊं आशु लौ ता फौट ना जा ली मांगणी। 3. और जेबी हाऊं आशु लौ, ता जास तुमे चहा लैं तिउं हाऊं चिड्डी देइयौ भेजाउ कि तुमारौ दाण यरुश्मेमा दी प्हुचावा लैं। 4. आगर मैरौ डेउणौ ठीक हुआँ लौ ता, से मु अइलैं आशा लैं।

पौलुसा रौ डेउणौ और काम कौरणौ

5. हाऊं मकिदुनिया हुइयौ तुमु काए आशाऊ, कैलैकि मू मकिदुनिया बाटिरे आशणौ जा सा। 6. पर शायद कि हाऊं तमारें काए रौऊ और शेला रैं दूस तमारें काए काटू, तैबैं जेजी भिलैं मैरें डेउणौ औलौ मू सेजी भिलैं प्हुचाइयौ। 7. कैलैकि हाऊं आबैं बाटा दी तुम कें मिलणौ नाई चहांदौ; पर मुकें विश्वास आ कि आगर प्रभु चहालौ ता कुछ बौकता झाऊं तुमु आइलैं साथई रौआऊ। 8. पर हाऊं पिन्तेकुस्ता झाऊं इफिसुसा दी रौआऊ। 9. कैलैकि मु कालें इरे एक बौडौ और फाइदैं वालौ दार खुलौ आ, बिरोध कौरणें वालें भौरी आ। 10. आगर तीमुथियुस आशी जा लौ, ता देखणौ कि तेसलैं तुमारें काए कासी रौ डौर ना चाई हुआँ; कैलै कि सेउ मू जिणौ प्रभु रैं काम कौरा सा। 11. एथीलैं कोइयौ तेस बेकार ना जाणा लौ, पर तेस ठीक-ठाक एजी भीलैं प्हुचाइयौ कि मू काए आशा, कैलै कि हाऊं तेस पौखदैं लागौ औन्दौ कि सेउ भाईउ रैं साथ ई आशा। 12. भाई आपुहोसा कु मुइयें भौती औरज की आ कि तुमु काए भाईउ आइलैं साथई आशा; पर तिणिए एजें बौगैं डेउणा री कुछ भी इच्छा नाई की, पर जैबैं मोकौ लागा लौ तेबी आशालौ।

आखरी आज्ञा और अभिवादन

13 ऊज्जी रौएउ, विश्वासा दी टेकी रौएऊ, हिम्मत वालें बौणौ, ताकती दी मजबूत रौ। 14. जो कुछ तुमे कौराई प्यारा कौरि कौरौ। 15. ओ भाईयो, तुमे स्तिफनासा रैं घोरानौ ता जाणाई कि से अरवाया री फौसली रैं प्हेलें फल आ, और पवित्र लोगु री सेवा लैं सौभी कु प्हेलें तैयार रौआ ई। 16. एथीलैं हाऊं तुमु कु औरज कौराऊ कि इणें आदमिउ रैं अधीन रौ, याने केहर एकी रैं जो एजें कामा दी मेहनती और साथ दिआ ई। 17. हाऊं स्तिफनास और फूरतूनातुस और अखइकुस रैं आशणें कु भौरी खुश ऊ, कैलैकि तिउंरे तुमारी कामी घौटी पूरी की आ। 18. तिउंरे मेरी और तुमारी आत्मा लैं चैन देई आ। एथीलैं इणें आदमिउ मानौ। 19. आसिया री कलिसिआउ री तौरफा कु तुमुलैं नमास्ते; अक्विला और प्रिस्का रौ और तिउंरे घौरा री कलिसिया रौ भी तुमु लैं प्रभु दी भौरी भौरी नमास्ते। 20. सारें भाईउ री तौरफा कु तुमु लैं

नमास्ते। पवित्र खोबू कौरिऐ आपु मांझिऐ ढाल कौरौ 21 .मूँ पौलुसा री तौरफा कु आपणै हाथा कौरौ लिखी औन्दी नमास्ते। 22 .अगर कुण प्रभु कु प्यार ना छाड़ा लौ ता सेउ शापित ए आ। ओ आमारै प्रभु, आशश! 23 .प्रभु यीशु रौ

बौड़ी दया तुमु माथे औन्दै थाका लौ लागी। 24 मैरौ प्यार मसीह यीशु दी तुमु सौबी आइलै बौणी रौआ। आमीन।

2 कुरिन्थियों

अभिवादन

1 पौलुसा री तौरफा कु जो परमेश्वरा री मौरजी कु मसीह यीशु रौ प्रेरित ऐ आ। और भाई तीमुथियुसा री तौरफा कु परमेश्वरा री तिरे कलिसिया रै नावां दी, जो कुरिन्थुसा दी आ, और सारै अखया रै सब पवित्र लोगु रै नावां दी: 2 आमारै बाब परमेश्वर और प्रभु यीशु मसीहा री तौरफा कु तुमुलै बौड़ी दया और शान्ति मिलदै थाकाली लागी।

परमेश्वरारौ धन्यवाद कौरणौ

3 आमारै प्रभु यीशु मसीहा रै परमेश्वर और बाबा रौ धन्यवाद चाई, जो दया रौ बाब और सारेउ च्चिजु री शान्ति रौ परमेश्वर ऐ आ। 4 सेउ आमारै सारै कलेशा दी शान्ति दिआ सा; ताकी आमैं तिरे शान्ति रै कारण जो परमेश्वर आमुलै दिआ सा, तीउलै भी शान्ति देई बोला जो केजै भी रौंगा रै कलेशा दी आ पौडै औन्दै। 5 कैलै कि जिणौ मसीहा रै दुखा दी आमैं जादौ शामिल हुई आ, तिणौ इ आमैं शान्ति दी भी मसीहा रै जौरिऐ जादौ शामिल हुई आ। 6 अगर आमैं कलेश और दुःख पाई आ, ता सेउ कलेश तुमारी शान्ति और मुक्ति लै आ; और अगर शान्ति मिला सा, ता तुमारी शान्ति लै आ; जेथारी ताकती कौरी तुमैं धीरजा आइलै तेस कलेश सहन कौराई, और जो आमैं भी सहन कौरी आ। 7 आमारी आश तुमारै बारै दी मजबूत आ; कैलैकि आमैं जाणी आ कि तुमैं जिणौ आमारै दुःखा दी, तिणौ इ सुखा दी भी शामिल हुओ। 8 ओ भाईयो, आमैं नाई चाहंदै कि तुमैं आमा रै तेस कलेशा रै बारै दी अनजान रौ जो आसिया दी आमु माथे पौडौ; आमैं इणै गौरके बोझा थाली दौबी गोरे थे, जो आमारी ताकती कु बाइरै थौ, इदरा झाउं कि आमुऐ आपणी जन्दगी कु भी हाथ धोई गोरे थे। 9 याने कि आमुऐ आपणै मौना दी सौमझी ऐरो थौ कि आमु माथे मौउता री आज्ञा हुई गोई आ, ताकी आमैं आपणौ भोरोसौ ना छाडी, मतलब के परमेश्वरा रौ भोरोसौ छाडी जुण मौरै औन्दै माझिया कु जिउंदौ कौरा सा। 10 तिणिए आमैं मौउता री इणी बौड़ी फाई कु छुडाऐ आ, और छुडावा सा; और तेस माथे आमारी ऐजी आश आ कि सेउ हाआरी लै भी आमु छुडाउंदै थाका लागी। 11 तुमैं भी मिलियौ प्राथना रै जौरिऐ आमारी सहायता कौरालै कि जो वरदान सारेउ रै जौरिऐ आमुलै मिलौ आ, तेथारै कारण भौरी लोग आमारी तौरफा कु धन्यवाद कौरौ।

पौलुसा रौ डेउणौ- योजना दी बदलाव

12 कैलैकि आमैं आपणै मौना री इयें गवाही माथे घमण्ड कौरी आ कि दुनिया दी और खास कौरीऐ तुमु मांझिऐ, आमारौ चाल-चालण परमेश्वरा रै लायक इणौ पवित्र और सौच्चाई आइलै थौ, जो शरीरा रै ज्ञाना कु नाई पर परमेश्वरा री बौड़ी दया आइलै थौ। 13 आमैं तुमु लै तौई कुछ नाई लिखदै, सेउ जो तुमैं पौडाई या माना भी आ, और हाऊं आश कौराउ कि आखरी झाऊं भी तुमैं मानदै थाका इ लागी। 14 जिणौ कि तुमु मांझिउऐ काईएउऐ मानी भी ऐरो आ कि आमैं तुमारै घौमण्डा रौ कारण आ, तिणौ इ तुमैं भी प्रभु यीशु रै दीना दी आमुलै घौमण्डा रौ कारण बाणा ई। 15 एजै भरोसे कु हाऊं चाहा थौ कि पैहलै तुमु काऐ आशु कि तुमुलै एक दिन तौऐ दाणा दी मिला; 16 और तुमु बाटिऐ कु आशियौ मकिदुनिया लै डेऊ, और तैबे मकिदुनिया कु तुमु काऐ आशु; और तुमैं मू यहुदिया रै तौरफा कु कुछ दूर झाऊं पहुँचाओ। 17 एथीलै जो मुइयें एउ सूँचौ औन्दौ थौ कि, का हाऊं मुश्केला दी थौ? या जो हाऊं कौरनौ चाहाऊ का शरीरा रै अनुसार कौरनौ चाहा ऊ, कि हाऊं

बुशु दी 'ओ, ओ' भी लौ कौरु और 'ना, ना भी लौ कौरु? 18 परमेश्वर सौच्चौ गवाह आ कि आमारै तेस वचना दी जो मुइयें तुमु आइलै बोलै आ तेथादी 'ओ और नाई दुई नाई मिलदै। 19 कैलै कि परमेश्वरा रौ छोहरु यीशु मसीह जासरो आमु रै जौरिऐ मतलब के मरै और सिलवानुस और तीमुथियुसा रै जौरिऐ तुमु मांझिऐ दी प्रचार हुओ आ, तेथ दी 'ओ' और 'नाई' दिया नाई थै, पर तेथादी 'ओ' इ 'ओ' हुई। 20 कैलैकि परमेश्वरा रै जेती भी वाइदै ई, सै सब तेथी दी 'ओ' आइलै ई। एथीले तेथरै जौरिऐ आमीन भी हुई कि आमारै जौरिऐ परमेश्वरा री महिमा हुआ। 21 और जो आमु तुमु आइलै मसीह दी मजबूत कौरा सा, और जुणिए आमुरो आभिषेक कियो आ सेउ इ परमेश्वर आ, 22 जुणिए आमु माथे छाप भी लाई ऐरी आ और बयाने दी आत्मा आमारै मौना दी देई आ। 23 जो हाऊं बोलाऊ तेथरौ गवाह परमेश्वर इ आ कि हाऊं इबी झाऊं कुरिन्थुसा दी एथलै नाई आशौ कि मुकै तुमु माथे तरस आशा थी। 24 इणौ नाई कि आमैं विश्वासा रै बारै दी तुमु माथे हक जमाउणौ चाई सा; पर आमारी खुशी दी मजत कौरना लै साथा दी आ कैलै कि तुमैं विश्वासा कौरी पाके रौआई।

2 मुइयें आपणै मौना दी इणौ ई ठाणी ऐरो थौ कि दुजी बारै तुमु काऐ उदास कौरदै ना आशु। 2 कैलै कि अगर हाऊं तुमु उदास कौरु, ता मुलै खुशी दैणै वालौ कुण हुआ सा, सिर्फ सेउ ई जुण मुइयें उदास कियो आ? 3 और मुइयें एजी इ बूश तुमुलै एथलै लिखी आ कि किये इणौ ना चाई हुओ कि मरै आशणै माथे, जासकु मुलै खुशी मिलणी चाई हाऊं तिऊंकु उदास औऊ; कैलै कि मुकै तुमु सौभी माथे एजी बूशा रौ भरोसौ आ कि जो मेरी खुशी आ कि सेजौ ई खुशी तुम सौभी री भी आ। 4 भौरी कलेश और मौना रै कौषा कु मुइयें भौरी लेरी-लेरियो तुमु लै लिखौ थौ, मुइयें एथलै ना लिखौ कि तुमैं उदास हुआ, पर एथीलै लिखौ कि तुमैं तेस बौडौ प्यार जाणौ, जो प्यार मरौ तुमु आइलै आ।

अपराधी लै माफी

5 अगर कुणिए दुःख दैओ आ सेउ सिर्फ मुइं लै ना दैओ, पर अगर बौडाई च़ौडाइयो ना बोलू ता थोडौ भौरी दुःख तुमुलै भी दैओ आ। 6 इणै आदमी लै भौरी सौजा जो तेसलै मिली गोई आ सै तेसलै काफी आ। 7 एथीलै एथकु आच्छौ इणौ आ कि तेसरो पाप माफ कौरौ, और तेसलै शान्ति दैओ, इणौ ना चाई हुओ कि सेउ आदमी भौरी दुःखा दी इबा। 8 एजै मतलबै हाऊं तुमु कु प्राथना कौराऊ कि तुमैं तेस आदमी लै आपणौ प्यार देखाओ। 9 कैलै कि मुइयें तुमुलै एथलै भी लिखौ थौ कि हाऊं तुमु पौरखु कि तुमैं मेरी बुशु मानणा लै तैयार आसती भी आ कि नाई। 10 जासरो तुमैं कुछ माफ कौराई ता हाऊं तेस माफ कौराऊ, कैलै कि जो कुछ मुइयें भी माफ कियो आ या माफ कियो औलौ, ता तुमारै कारण मसीहा री जागा दी हुइयो माफ कियो आ 11 कि शैताना रौ आमु माथे कोई भी हक ना चाला, कैलै कि जो कुछ शैतान कौरा सा तेथरै बारै दी आमैं अनजान नाई आसतै।

त्रोआसा दी पौलुसा री परिशानी

12 जेबी हाऊं यीशु मसीहा रौ खुशी रौ संदेश शुणाउंदै त्रोआसा दी आशौ, ता प्रभु ऐ मुलै दार खोलौ सा, 13 ता मरै मौना लै चैन ना मिलौ, एथीलै कि मुकै आपणौ भाई तीतुस तिऐ नाई मिलौ; एथीलै हाऊं तिऊंकु मिली जुलियो हाऊं मकिदुनिया लै चाल पौडौ।

मसीहा दी जीत- साजो

14 पर परमेश्वर रौ धन्यवाद आ कि जो आमु मसीहा रै जौरिरे जीतणा रै जलूसा दी आमके बाट देखाला सा, और आपणे ज्ञाना री खुशबु आमुरे जौरिरे सौबी जागा दी फैलावा सा। 15 कैलै कि आमै परमेश्वर रै नजदीक मुक्ति पाईणा वालै और नाश हुणै वालै लै दुइया लै मसीह री खुशबु ई। 16 जुण नाश हुणे री बाटा दी ई तितलै मोरनै री गन्ध और जुण ई छुटकरै री बाटा दी तितलै आ जीउणै री खुशबु। पर एजी बुशा लायक कुण आ? 17 कैलै कि आमै तितुं सारेउ जिणै नाई आसतै जो परमेश्वर रै वचना दी मिलावट कौराई; पर मौना री सौचाई कु और परमेश्वर री तौरफा कु, और इणो जाणियो बोली कि परमेश्वर आमु माझिरे आ।

नौरे वाइदा रै सेवक

3 का आमै तैबे आपणी बौड़ाई कौरदै थाकी लै लागी? या आमै ओरी लोगु बाशिरे सिफारिशा री चिड्डी आणनी या तुमु कु नीणी आ? 2 आमारी चिड्डी ता तुमै इ आ, जो आमारे जीवा दी आ लिखी औन्दी और तिरं चिड्डी सारे आदमी प्राणा और पौदाई। 3 इणो परगट ऐ कि तुमै यीशु मसीहा री चिड्डी आ, जो आमुरे सेवा कौरनै वालेउ जिणी लिखी आ, और जो स्याई कौरी नाई पर जिउंदे परमेश्वर रै आत्मा कु, पाथरा री पट्टी माथे नाई पर जिवा रै मासा जिणी पट्टी माथे लिखी औन्दी।* 4 आमै मसीह रै जरिरे परमेश्वर माथे इणो इ भरोसो छाडी आ। 5 इणो नाई कि आमै आपु इ इणै जोगी आ कि आमै आपणी तौरफा कु केजी बुशु रौ बिचार कौरी बोली, पर जो कुछ आमारे शिखो औन्दी आ, और औकल आ, सब कुछ परमेश्वर री तौरफा कु आ। 6 जुणिए आमै नौवे वाइदा रै सेवक हुणै रै लायक भी किये, आक्षर रै सेवक नाई पर आत्मा रै; कैलै कि आक्षर ऐ आ झांगा, पर आत्मा कौरा जिउंदो। 7 अगर मोरनै रै कानून जेथरै आक्षर पाथरा माथे पाके कौरी लिखे औन्दी, तेथादी ऐती चोमक थी कि इस्रायली लोग मूसा रौ मुंह नाई देखी बोला थे, जेबी मूसा सिने पर्वता कु परमेश्वर रै नियमा कौरी आपणे लोगु माझिरे वापिस आशो आ। (और बासिए सै चोमक पोरु टौली)। 8 ता आत्मा रौ वाइदो तेथकु जादो चोमकिलो कैलै ना औन्दी? 9 कैलै कि जेबै आरोपी चाणने वालो वाइदो चोमकिलो थो, ता धौर्मी चाणने वालो वाइदो ऐथाकु जादो चोमकिलो कैलै ना औन्दी? 10 और जो चोमक थी, सै भी तेस चोमकिला रै कारण जो चोमक तेथाकु जादो चोमकिलो थो, कुछ भी जादो चोमकिलो नाई थो। 11 कैलै कि जेबै जो घोटदें थो लागो औन्दी और चोमकिलो थो, ता सै चोमक जो सौदा टेकी रौआ, सै चोमक तेथाकु जादो चोमकिलो कैलै ना औन्दी? 12 एथीलै एजी आश छाडियो आमै हिम्मत कौरी बोली ई, 13 और मूसा बाशिरे नाई, जुणिए आपणे मुँआ माथे पौरदो पाओ थो ताकी इस्रायली लोग तिरं घोटणै वाली चोमका रौ आखरी बोग्त ना देखा। 14 कैलै कि तिरं मन काठे हुई गोरे, कैलै कि आज झाऊं पुराणो नियम पौददी बारे तिरं जिवा दी सेजो इ पौरदो आ पौडो औन्दी, पर सेउ पौरदो यीशु मसीहा दी विश्वास कौरियो उठा सा। 15 आज झाऊं जेबै भी मूसा री किताब पौदाई, ता तिरं जिवा माथे पौरदो पौडी थाका आ। 16 पर जेबै-केबी तितुंरौ जिऊ प्रभु भिलै फिरा लो, तैबे सेउ पौरदो पोरु टौला आ। 17 प्रभु ता आत्मा आ : और जिरे-किये प्रभु रौ आत्मा सा, तिये आज्ञादी आ। 18 पर जेबै आमै सारे आपणे खुलै मुँआ कौरी शिशे दी प्रभु री चोमका रौ ध्यान कौरी ई, ता आमै भी तिणी ई लागी ई, और आमारी चोमक भी आत्मा कौरी बौडदै थाका लागी।

माटै रै ओखरा दी धन

4 एथीलै जेबै आमु माथे ईणी दया हुई कि आमुके इरे सेवा मिली, ता आमै निराश नाई औन्दी। 2 पर आमुरे लाजी रै गुप्त काम पोरु छाडी ऐरे, और ना चालाकी कौरी चालदै, और ना परमेश्वर रै वचना दी मिलावट कौरदै; पर सौचाई परगट कौरियो, परमेश्वर रै सामनैए एकी-एकी आदमी रै मौना दी आपणी भौलाई बोशाली आ। 3 पर अगर आमारे खुशी रै संदेशा माथे पौरदो आ पौडो औन्दी, ता एउ पौरदो नाश हुणै वालेउ लै आ पौडो औन्दी। 4 और

तितुं सौबिउ लै जो विश्वास नाई कौरदै, जासरी बुध्दी दुनिया रै ईश्वरे शेडी आ कीई ऐन्दी, ताकी मसीह जो परमेश्वर रौ रूप आ, तेसरे चोमकुणे वालो खुशी रौ संदेशा रौ प्याशो तितुं माथे ना चोमका। 5 कैलै कि आमै आपुलै नाई, पर मसीह यीशु लै परचार कौरी ई कि सेउ प्रभु आ; और आपणे बारे दी इणो बोली ई कि आमै यीशु रै कारणे तुमारै सेवक ई। 6 एथीलै कि परमेश्वर इ आ, जुणिए बोलो आ, "न्यारे मांझिया कु प्याशो चोमको," और सेउ इ आमारे जिवा दी चोमको कि परमेश्वर री महिमा रै पहचाणा रौ प्याशो यीशु मसीहा रै मुँआ कु चोमकुदै थाका लागी। 7 पर आमुकै सै धन जयदाद माटै रै ओखरु दी आ छाडी औन्दी कि ऐ सौदा री ताकत आमारी तौरफा कु नाई पर परमेश्वर री तौरफा कु बौणी रौआ। 8 आमै चारो तौरफा दी दुःख ता भोगी आ, पर मुसीबता दी नाई पौडदै; घौबराई ता ई, पर निराश नाई औन्दी। 9 आमु सतावा ता भौरी ई, पर आमु शोटदै नाई, लोटाला ता ई, पर नाश नाई औन्दी। 10 आमै यीशु री मोत हर बोग्त आपणे शरीरा दी उठाइयो आंडी-फिरी ई, कि यीशु री जिन्दगी भी आमारे शरीरा दी परगट हुआ। 11 कैलै कि जेबी झाऊं आमै जिउंदे ई सौदा यीशु रै कारणे आमु मौउता रै हाथा दी सौभाला ई कि यीशु री जिन्दगी भी आमारे मोरनै वालै शरीरा दी परगट हुआ। 12 इणै कौरिरे मोत ता आमु माथे असर पा सा, और जिन्दगी तुमु माथे। 13 एथीलै कि आमुदी सेई विश्वासा री आत्मा सा जेथरै बारे दी लिखो औन्दी भी आ, "मुइयें विश्वास कियो, एथीलै "हाऊं" मतलब के आमै भी विश्वास कौरी ई, एथीलै आमै बोली ई। 14 कैलै कि आमै जाणी ई कि, जुणिए प्रभु यीशु जिउंदो कियो आ, सेउ आमु भी प्रभु यीशु आइलै साथई जाणियो जिउंदो कौरा सा, और तुमु आइलै आपु काए हाजिर कौरा सा। 15 कैलै कि सारी चीजे तुमु काले ई, ताकी बौडी दया सारेउ कौरिरे भौरी हुईयो परमेश्वर री महिमा लै धन्यवाद भी बौडावा 16 एथीलै आमै निराश नाई औन्दी; आमारे एउ नाश हुणै वालो शरीर सुलै-सुलै कमजोर हुआ सा, और आमारे भितलो आत्मा वालो शरीर हर दिना दी नौवो थाका आ औन्दी लागी। 17 कैलै कि आमारे थोडे बौना रौ हौलको जेई दुःख भौरी इ खास और सौदा री महिमा तयार कौरदै थाका लागी। 18 और आमै ता देखी ऐन्दी चीजु नाई पर अणदेखी चीजु देखदै थाकि लागी; कैलै कि देखी ऐन्दी चीजु धौख दिना री ई, पर अणदेखी चीजे सौदा लै बौणी रौआ ई।

आमारो सौरगा जिणो घोर

5 कैलै कि आमै जाणी ई कि आमारे धौतरी माथलै चाणै औन्दी घोर पोरु ढाला ई, ता आमु काले परमेश्वर री तौरफा कु सौरगा दी एक इणो घोर मिला सा जो हाथा कौरी बौणी औन्दी घोर नाई पर सौदा लै पाको घोर आ। 2 एजे घौरा दी ता आमै लेरी आ और आश छाडी आ कि आमु लै सौरगा रौ घोर मिला आ 3 सौची ई आमै जाणी ई आमुलै सौरगा रौ घोर मिला आ और आमै बिणा घौरा रै ना रौईदै 4 और आमै एस घौरा दी रौइयो (बोझा) भारे थाली दाबुरे औन्दी, कैलै कि आमै खोलनो नाई बल्कि ओजो भीडनो चाई आ, ताकी जो मोरनै वालो शरीर आ सेउ जिउणै वालै शरीरा दी पोरु डूबा। 5 जुणिए आमै एजी बुशा लै ई तयार किये औन्दी सेउ परमेश्वर आ, जुणिए आमुके बयाने दी आत्मा भी आ देई औन्दी। 6 आमुके पूरो विश्वास आ, कैलै कि आमै जाणी ई कि जेबी झाऊं आमै शरीरा दी रौइदै लागे औन्दी तेबी झाऊं आमै परमेश्वर कु अलग ई— 7 कैलै कि आमै रूपा देखियो नाई, पर विश्वासा कौरी चाली ई— 8 एथीलै आमै हिम्मत छाडी आ, शरीरा कु अलग हुईयो प्रभु आइलै रौइणो सौबी कु आच्छो सोमझी ई। 9 एजे कारणे आमै आपणे मौना दी इणो चाहई कि आमै साथई रौउलै च़ाऊ अलग रौउलै आमै प्रभु के आच्छे चाई लागणे। 10 कैलै कि जरुरी आ कि आमु सौभीऊ रौ हाल मसीह रै फैसला रै राजगादी काए खुला कि हर एक आदमी आपणे-आपणे भौले बुरे कामा रौ बौदलो निआ जो तिणिए आपणे शरीरा कौरिरे किये ई। 11 एथीलै प्रभु रौ डोर मानियो आमै लोगु सोमझाई ई; पर परमेश्वर आमारे हाल जाणा आ और मेरी आश इणी आ कि तुमारै मौना दी भी पौतौ आ कि तुमारो हाल का सा। 12 तैबे भी आमै आपणी बौड़ाई तुमु काए नाई कौरदै, पर आमै आपणे बारे दी तुमुके घौमण्ड कौरनै रौ मौको देई ई कि तुमै तितुंलै जवाब देई बोला, जो मौना लै नाई पर देखावटी बुशु लै घौमण्ड कौराई।

13 कैलै कि अगर आमें तौना-मौना कौरी परमेश्वरा आइलै ई और स्याणै हुईयो ई तुमु आइलै। 14 कैलै कि परमेश्वरा रौ प्यार आमुं मजबूर कौरा सा; एथीलै कि आमें इणो सौमझी ई कि जैबै एक सारेउ लै मौरी गौ आ ता सारै मौरी गोए। 15 और सेउ इणै कौरी सारै लोगु लै मौरी कि जो लोग जिउंदै ई, से एथ बासी आपुलै ना जिआ पर तेसलै जिआ जो तितुलै मौरी आ और तौरै दुजी बारै जिउंदै हुआ आ।

मसीहा दी नौई सृष्टि

16 पर एथ बासी आमें कासी भी शरीरा रै अनुसार नाई सौमझदैं। यानी के एकी बारै प्रभु यीशु भी आमुए शरीरा रै अनुसार जाणो थौ, तैबै भी एथ बासी मसीहा आमें इणो नाई जाणदैं। 17 एथीलै अगर कृण मसीहा दी आ सेउ नौई सृष्टि आ : पुराणी बुशै बीती गोई; देखौ, ऐबै सारी बुशै नौई हुई गोई आ। 18 एजी सारी बुशै परमेश्वरा री तौरफा कु आ, जुणिए यीशु मसीहा रै जौरिए आपु आइलै मेल-मिलाप कौरी ऐरो आ, और मेल मिलापा री सेवा आमु सौबी कै सांबी एरी आ। 19 एथरौ मतलब इणो आ कि परमेश्वरै मसीहा दी हुइयो आपु आइलै दुनिया रौ मेल मिलाप कौरी ऐरो आ, और तितुंरै बुरै कामा रौ आरोप तिकु माथै नाई लाओ और प्रभुए मेल मिलापा रौ वचन आमुकै सांबाली एरो आ। 20 एथीलै, आमें मसीहा रै बज्जिर ई; मानौ परमेश्वर आमारै जौरिए प्राथना कौरदैं लागो औन्दौ, आमें मसीहा री तौरफा कु औरज कौरी ई कि परमेश्वरा आइलै आमारौ मेल मिलाप कौरौ। 21 जो पापा कु अनजान थौ, सेउ इ तिणिए आमुलै पाप चाणो कि आमें तेस कौरिए आच्छै और धौर्मी आदमी बाणा।

6 आमें जो परमेश्वरा आइलै काम कौरी ई, आमें लोगु कें इणो भी सौमझाई कि प्रभु री बौडी दया जो तुमु माथै हुई आ, तितें बेकार ना दैओ डेरुणै। 2 कैलै कि सेउ ता बोला सा, "आपणी खुशी रै बोगतै मुइयें तेरी शुणी आ, और मुक्ति रै दिनें मुइयें तेरी मजत की आ।" देखौ इबी एऊ खुशी रौ बोगत आ; देखौ इबी एऊ छुटकारै रौ दीन आ 3 आमें केजी भी बुशा दी ठोकर खाणे रौ कोई भी मोको नाई देन्दै ताकी आमारी सेवा दी कोई भी आरोप ना लाग। 4 पर सारी बुशु कु परमेश्वरा रै सेवकु जिणो आपणै सारै आच्छै गुण देखाली ई बौडी तसली कौरी, दुःखा दी, गरीबी दी, कौष्टा दी, 5 डींगे खाइयो, कैदा दी पौडियो जिणै शान्ति नाई औन्धी तिरु, मेहनती कौरी, ऊज्जी रौइओ, ब्रौता छाडियो, 6 पवित्रता कौरी, ज्ञाना कौरी, धीरजा कौरी, दया देखालियो, पवित्र आत्मा कौरी, 7 सौचै प्यारा कौरी, सौचाई रै वचना कौरी, परमेश्वरा री ताकती कौरी, धौर्मा रै औजारा कौरी जो उलटै सुलटै हाथा दी आ, 8 ईज्जत और बेइज्जती कौरी, आछै नावां कौरी और बुरै नांवा कौरी। यानी के बिश्वाशणै वाले जिणै लागी ई तैबै भी सौचै ई; 9 आमु नोखै जाणाई, जैबै कि आमु सौबी जाणाई और मशहूर ई, और इणै जाणाई जिणै मौरै औन्दै ई, देखौ तैबै भी जिउंदै ई; पिटियो आमु झागणै चाहा ई पर जानिए नाई झागदैं, 10 शोग कौरनै वाले जिणै जाणाई पर सौदा खुशी मौनावार्ड; गरीबु जिणै ई पर आमें भौरी आदमी अमीर चाणी ई; इणै ई कि जिणै आमुकै कुछ भी नाई तैबै भी सब कुछ छाडी आ। 11 ओ कुरिन्थियो, आमुए जीवा खोलियो तुमु आइलै बुशै लाई आ, आमारौ जीऊ तुमु लै खुलौ औन्दौ आ। 12 तुमु लै आमारै मौना दी कोई भी खोट नाई, पर तुमारै मौना दी आमुलै खोट आ। 13 पर आपणै छोहरु जाणियो तुमु आइलै बोलाऊ कि तुमै भी तेथरै बौदलै आपणो जीऊ पोरु खोलौ।

कई रौंगा रै शौमाई दी ना जोचियो

14 अविश्वासिऊ आइलै बेइज्जती रै शौमाई थाली ना जोचियो, कैलै कि धौर्मा रौ और अधर्मा का मेल मिलाप? या प्याशै और न्यारै री का संगती? 15 इणो इ मसीहा रौ शैताना आइलै का तालमेल औआ सा? या विश्वासिउ रौ अविश्वासिउ आइलै का नातौ? 16 और मूर्तिऊ आइलै परमेश्वरा रौ का मतलब? कैलै कि आमें ता जिउंदै परमेश्वरा रौ घोर ई; जिणो परमेश्वरै बोलौ आ, "हाऊं तिकुंदी बौसाऊ और तिकुंदी आंडदैं-फिरदैं थाकाऊ लागी; और हाऊं तिकुंरौ परमेश्वर हुआऊ, और सै मरै लोग हुआई।" 17 एथीलै प्रभु बोला सा, "तिकुं मांझिया कु पोरु निकलौ और अलग रौ; और जौगरी चीजे नाई

छूँओ, तैबै तुमु हाऊं आपु काए अणणावाऊ; 18 और हाऊं तुमारो बाब हुआऊ, और तुमै मरै छोटी और छोहरु हुआई, और एऊ सौभी कु शक्ती वालै परमेश्वरा रौ वचन आ।"

पौलुसा री खुशी

7 पर ओ प्यारै लोगुओ जेबै कि ऐ वाइदैं आमुकै मिले ई, ता आशौ आमें आपु और आपणो शरीर और आत्मा आपणी सारी बुराई कु पवित्र कौरी आ, और परमेश्वरा रौ डौर छाडियो आपणी पवित्रता मजबूत कौरी ई। 2 आमु लै आपणै जिवा दी जागाह दैओ। आमुए ना ता कासी आइलै बुरो कियो, ना कासी आइलै कुछ बिगाडौ, और ना आमुए कोइयो ठौगो। 3 हाऊं तुमु आरोपी चाणना लै इणो नाई बोलदौ। कैलै कि, मूर्यै पैहलै इ बोली ऐरो आ कि तुमै आमारै जिवा दी इणै बौसी गोए कि आमें तुमु आइलै मोरना-जिउणा लै तयार आ। 4 हाऊं तुमु आइलै भौरी हिम्मती कौरी, बोलदैं लागो औन्दौ, मुकै तुमु माथै भौरी घमण्ड आ, हाऊं शान्ति कौरी भौरुई गो ऊ। आपणै सारै दुःखा दी हाऊं खुशी कौरिए बिल्कुल भरपूर रौआऊ। 5 कैलै कि जेबी आमें मकिदुनिया दी आशै, तेबी भी आमारै शरीरा लै चैन नाई मिलौ, पर आमें चारों तौरफा कु दुःख उठाई ई; बाइरै ता लडाई-झोंगडै थै, और मौना भित्तै थौ डौराउणै वाली बुशै। 6 तैबै भी घाँगी गरीबु लै सुख दैणै वाले परमेश्वरै आमु काए हौसलै दैणा लै तितुस भेजो 7 और ना सिर्फ तेसरै आशणै कु पर तेसरी तितें शान्ति कु भी जो तेसलै तुमारी तौरफा कु मिली थी। तिणिए तुमारी लालसा, तुमारै दुःख, तिणिए आमु आइलै बोलो आ कि तुमै आमु मिलना लै उताउलै ई, तुमै मेरी केती फिकर छाडाई, एजी बूशा कु हाऊं तौडै भी भौरी खुश उ। 8 कैलै कि अगर मुइयें आपणी चिडी कु तुमै नाराज किये ई, पर तेथकु हाऊं पश्ताओ नाई जिणो कि हाऊं पैहलै पश्तावा थौ, कैलै कि हाऊं देखाऊ कि तितें चिडी कु तुमै नाराज ता हुए पर तुमारो सेउ नाराज हुणो थोडी देरा लै थौ। 9 ऐबै हाऊं खुश उ पर ऐथलै नाई कि तुमै नाराज हुए, पर ऐथलै कि तुमुएँ तेस नाराज हुणै रै कारण मन बौदलौ आ, कैलै कि तुमारो नाराज हुणो परमेश्वरा री मोरजो रै अनुसार थौ कि आमारी तौरफा कु तुमुलै केजी भी बुशा दी नुकसान ना पहुंचा। 10 कैलै कि सेउ दुःख जो परमेश्वर दिआ सा, तेस दुःखा कौरिए इणो मन बौदलिया सा जेथरौ नतिजौ छुटकारो आ और तैबै तेथकु पश्ताउणो नाई जानदौ। पर दुनिया रौ दुःख मौत पैदी कौरा सा। 11 और देखौ जो दुःख तुमुलै परमेश्वरै दैणो आ तेस दुखा कौरी तुमु लै केती हिम्मत आशी आ, आपणी सौचाई देखालना लै, जौलन, और डौर, और लालसा, हिम्मत और फैसलै कौरणै री केती इच्छा पैदी कौरा सा! तुमुए सारी बुशु कौरिए इणो देखाली ऐरो आ कि तुमै इउं सारी बुशु दी सौचुचै ई। 12 तैबै मुइयें जो तुमुलै लिखौ थौ, सेउ ना ता तेथरै मतलबै लिखौ जुणिए बुरो कियो और ना ता तेथरै मतलबै ज्ञास आइलै बुरो हुआ आ, पर एथलै लिखौ आ कि तुमारी हिम्मत जो आमुलै आ, सै परमेश्वरा काए तुमु माथै परगट हुआ। 13 एथीलै आमुलै शान्ति मिली। आमारी इयें शान्ती आइलै तितुसा री खुशी रै कारण तौरै भी खुशी हुई कैलै कि तेसरी आत्मा जो तुमु सौबी कारणे हौरी भौरी हुई गोइ आ। 14 कैलै कि अगर मुइयें तेस काए तुमारै बारै दी कुछ घौमण्ड देखालौ आ, हाऊं बेइज्जत नाई हुआ, पर जिणो आमुए तुमु आइलै सारी बुशै सौचुची सौचुची बोली थी, तिणो इ तितुसा काए आमारौ घौमण्ड देखाउणो भी सौचुचौ निकलौ। 15 जैबै तेसकै याद आशा सा कि तुमुए तेसरी आज्ञा डौरि-डौरियो और काँबियो किणी मानी आ; ता तेसरौ प्यार तुमु भिलै तौइयें भी बौडदैं थाका लागी। 16 हाऊं खुश उ कैलै कि मुकै सारी बुशु दी तुमु माथै पूरौ भरोसो आ।

खुशी कौरी दाण देणो

8 ऐबै ओ भाईयो आमें तुमुलै परमेश्वरा री तितें बौडी दया री खौबर देई आ जो मकिदुनिया री कलिसिउ माथै हुई आ। 2 कि दुःखा री बौडी परीक्षा दी तितुंरी बौडी खुशी और भौरी गरीबी दी तितुंरी भौलाई भौरी बौडी गोई। 3 तितुंरै बारै दी मेरी इए गवाही आ तितुंरै आपणी ताकती कु यानी के ताकती कु भी जादौ मन दैओ आ। 4 और एस दाणा दी और पवित्र लोगु री सेवा दी साथाई हुणै बौडी दया रै बारै दी, आमुकु घोडी-घोडी औरज की,

5 और जिणी आमुए आश की थी, तिणी ई नाई बल्कि पैहलै आपणों जिक्र प्रभु लै दैऔ और तेथ बासी आमुलै भी दैऔ। 6 एथीलै आमुए तितुस सौमझाओ कि जिणी तीणिणै पैहलै शुरु किये थौ तिणी ई तुमु माझिणै दी एस दाणा रौ काम पूरौ भी कौरालौ। 7 एथीलै जिणीं तुमै सारी बुशु दी मतलब के विश्वास, वचन, ज्ञान और सारी रौंगा री कोशिश दी, और तेस प्यारा दी जो आमु आइलै छाड़ा इ, बौड़दें लागे औन्दे और तिणी ई दाणा रै कामा दी भी बौड़दें थाकौ लागी। 8 हाऊं इयें बूश तुमुलै आज्ञा रै रूपा दी नाई दैन्दै लागे औन्दे पर दुजे रै हौसला कु तुमारौ प्यारा री सौचुचाई परखुणा लै भी उ बोलदें लागे औन्दे। 9 तुमै आमारे प्रभु यीशु मसीहा री बौड़ी दया जाणाई कि अमीर हुइयो भी तुमुलै गरीब बाणौ आ ताकी तेसरें गरीब हुइयो तुमै अमीर हुओ। 10 इयें बुशा दी मेरी सलाह एजी आ कि: एउ तुमुलै आच्छो आ। दाण देणे री इच्छा दी तुमै सिर्फ पिछले बोरशे ई ओगाडी नाई थे पर दाण देणा लै भी तुमै सौबी कु ओगाडी रोए ई। 11 एथीलै एबे एस काम पूरौ कोरौ कि जिणीं तुमै देणा री इच्छा लै तुमै तैयार थे तिणी ई आपणे आपणे खौदें रै अनुसार पूरौ भी कौरौ। 12 कैलै कि अगर मौना री तैयारी औली ता दाण तेथरै अनुसार कबूल भी हुआ सा जो तेसके आसती आ, ना कि तेथरै अनुसार जो तेसके नाई आ। 13 एउ नाई कि दुजेऊ लै सुख और तुमु लै मिला दुःख, 14 पर बराबरी रै बिचारा कु एजे बगतै तुमारी जादी कौमाई कम कौमाई वालै री जरूरत पुरी कौरा ताकी तिउरी जादी कौमाई तुमारौ काठौ बगत सौबाला कि तुमारौ हिसाब किताब बराबर हुआ। 15 जिणीं लिखौ औन्दे आ, "जुणिए भौरी कौमाओ आ तेसरौ कुछ भी ना निकलौ, और जुणिए थोड़ौ कौमाओ तेसरौ कुछ भी कामती ना निकलौ।"

तितुस और तेसरै साथी

16 परमेश्वरा रौ धन्यवाद आ, जुणिए तुमु लै सेजौ इ होसलौ तितुसा रै जिवा दी पाई एरौ आ 17 कि तिणिणै आमारौ समझाउणौ मानी एरौ तैबे इ भौरी खुश हुइयो सेउ आपणी मौरजी कौरौ तुमु काए आशौ आ। 18 आमुए तेस आइलै सेउ भाई भी भेजौ आ ज़ासरौ नाऊ खुशी संदेशा रै बारै दी सारी कलिसिया दी फौडलौ औन्दे आ; 19 और एती इ नाई, पर सेउ कलिसिउ ए मानी भी एरौ कि एस दाणा रै कामा लै आमु आइलै आशा। आमैं इयें सेवा एजी ताइएँ कौरौ आ कि प्रभु री महिमा और आमारे मौना री तैयारी परगट हुई बाँला। 20 आमैं एजी बुशु दी चोकसिए रौई ई कि एस छुटकारे रै कामा रै बारै दी ज़ासरी सेवा आमैं कौरौ ई, कोई भी आमु माथे बौदी ना लाई बाँला। 21 कैलै कि जो बुशे सिर्फ प्रभु काए ई नज़दीक नाई, पर आदमिउ रै नज़दीक भी भौली ई कि आमैं तिउरी फिकर कौरौ ई। 22 आमुए तेस आइलै आपणौ भाई भी भेजौ आ जो आमुए घोड़ी-घोड़ी पौरखियौ भौरी बुशु दी हौसलै वालौ देखौ आ; पर एबे तुमु माथे तेसरौ बौड़ो भरोसौ आ, एजे कारणे तेसदी तौइएँ भी भौरी हौसलौ आ। 23 अगर कुण तितुसा रै बारै दी पूछा लौ, ता सेउ मारौ साथी और तुमुलै मारै साथी कामा कौरने वालौ आ; और अगर कुण आमारे भाईउ रै बारै दी पूछा लौ, ता सै कलिसिउ कु भेजै औन्दे यीशु मसीहा री महिमा सा। 24 यानि कि आपणौ प्यार और आमारौ सेऊ घौमण्ड जो तुमारै बारै दी आ कलिसिउ रै सामने साबित कौरियो तिउके देखाँलौ।

साथी- मसीहलिउ लै मज़त

9 एबे तिणें सेवा रै बारै दी जो पवित्र लोगु लै कौराई, तिणें सेवा रै बारै दी मुइयें तुमुलै लिखणौ जरूरी नाई। 2 कैलै कि हाऊं तुमारै मौना री तयारी जाणाउ, जेथरै कारणे हाऊं तुमारै बारै दी मकिदुनिया दी रौइणे वालेउ रै सामने घमण्ड देखाला ऊ कि अखया रै लोग एकी बोरषा ओउलै तयार ई हुए औन्दे, और तुमारै हौसलै तौइएँ भी भौरी लोग उकसाए ई। 3 पर मुइयें सै भाई एथलै भेजै ई कि आमुए जो घमण्ड तुमारै बारै दी देखाँलौ आ, सेउ घमण्ड एजी बुशा दी बेकार ना बाँगा; पर जिणीं मुइयें बोलेँ तिणी ई तुमैं तयार रौओ। 4 इणौ ना चाई हुओ कि अगर कुण मुं आइलै मकिदुनिया रै लोग आशा और तुमु तैयार ना देखा, ता हुई बाँला आ कि एजे भरोसै रै कारणे आमैं (इणौ नाई बोली बाँलदें कि तुमैं) बेइज्जत हुई। 5 एथीलै मुइयें भाईउ कु इणी औरज कौरनी जरूरी सौमझी कि सै पैहलै कु ई तुमु काए आशा, और

तुमारै छुटकारे रौ फौल जेथरै बारै दी पैहलै कु वचन देई गो थौ, तयार कौरियो छाड़ा कि एउ जौबरीए नाई पर छुटकारे रै फौला बाशिरे तयार हुआ

दाण किणौ देई लै

6 पर बूश एजी आ: जुण थोड़ो बौआ सा, सेउ थोड़ो लौआ भी आ; और जो भौरी बौआ सा, सेउ भौरी का लौआ सा। 7 हर एक आदमी जिणीं मौना दी ठाणा तिणीं दाण कौरा; ना ता कुड़- कुड़ाइयो और ना जौबरी ऐ, कैलै कि परमेश्वर खुशी कौरौ दैणै वालेऊ आइलै प्यार छाड़ा सा। 8 परमेश्वर सारै रौंगा रौ बौड़ी दया भौरी का दिआ सा जेथ कौरि हर बुशु दी और हर बौगतै, सारौ कुछ जो तुमके जरूरी औली, तुमु काए रौआ; और हर एक भौलै कामा लै तुमु कें भौरी कुछ चाई हुओ। 9 जिणीं लिखौ औन्दे आ, "तिणिणै बिखोरौ, तिणिणै गरिबु लै दाण दैओ, तेसरौ धौरम सौदा लै बाँणी रौआ।" 10 मतलब कि जो बौड़णे वालेउ लै बीज और खाणा लै रोटी दिआ सा, सेउ तुमुके बीज दिआ, और तेस कामयाब कौरा; और तुमारै धौरमा रै फौल बौड़ाउवा सा। 11 तुमैं हर बुशु दी सारै रौंगा रै छुटकारे लै जो आमु कौरिरे परमेश्वरा रौ धन्यवाद कौरावा सा, धनवान कौरदै रौ। 12 कैलै कि इयें सेवा पूरी कौरने कु ना सिर्फ पवित्र लोगु री जरूरत पूरी औन्दी सा, पर लोगु री तौरफा कु परमेश्वरा रौ भी भौरी धन्यवाद हुआ सा। 13 कैलै कि इयें सेवा रौ प्रमाण मानियो सै परमेश्वरा री महिमा परगट कौराई कि तुमैं यीशु मसीह रौ खुशी री खबर मानियो तेथरै अधीन रौआई, और तिउरी और सारेउ री मज़त कौरने दी उदारता परगट कौरदै थाका ई लागी। 14 और सै तुमु लै प्राथना कौराई; और एथिले कि तुमु माथे परमेश्वरा रौ बौड़ी ई बौड़ी दया आ, तुमारी आश कौरदै थाका ई लागी। 15 परमेश्वरा रौ, तेसरै दाणा लै जो हिसाबा कु बाईरै आ, तेसरौ धन्यवाद चाई हुओ।

पौलुसा रौ हक

10 हाऊं सेउ ई पौलुस उ जो तुमु काए निउलौ ऊ पर पीठी पिछु तुमारी तौरफा दी हिम्मत कौराउ, तुम कें मसीहा रौ निउलौ पन और कौंअलाई रै कारणे समझावाऊ। 2 हाऊं एजी औरज कौराऊ कि तुमु काए मुं निउर हुइयो हिम्मत ना कौरनी पौड़ा, जिणीं हाऊं कुछ लोगु माथे जो आमु शरीरा रै अनुसार आंङणे वालै सौमझा ई; हिम्मत देखाँलने रै बारै दी बिचार कौरा ऊ। 3 कैलै कि अगर आमैं शरीरा दी आंडा-फिरा ई, तैबे भी शरीरा रै अनुसार नाई लौड़दें। 4 कैलै कि आमारी लौड़ाई रै औज़ार शरीरा कौरौ लौड़ना रै नाई आसतै, पर इलाके तबाह कौरना लै परमेश्वरा रै जौरिरे ताकती वाले ई। 5 एथीलै आमैं खयाला रौ और हर ऊँची बूशा रौ, जो परमेश्वरा रै पहचाना रै विरोधा दी उठा सा तिउं बुशे जौड़ी कु खातम कौरौ ई और हर एक भावना कैदा दी कौरौओ मसीहा रौ आज्ञाकारी चाणी ई। 6 और तयार रौई ई कि जेबे तुमारी आज्ञा रौ पालन पूरौ हुई जा लौ, ता हर एक रौंगा री आज्ञा ना मानणे वालै लै सज़ा दिआ। 7 तुमैं तिउं बुशु देखौ, जो आखी रै सामने ई। अगर कासके आपणै घोरा माथे भरोसौ औलो कि हाऊं मसीह ऊ, ता सेऊ इणौ भी जाणा लौ कि जिणीं सेऊ मसीहा रौ आ तिणें आमैं भी आ। 8 कैलै कि अगर हाऊं तेस हका रै बारै दी औजौ भी घमण्ड देखाँलु लौ, जो प्रभुए तुमु बिगाड़ना लै नाई पर चाणना लै आमुकें दैओ आ ता हाऊं बेशर्म नाई औन्दे। 9 इणौ हाऊं एथलै बोलाऊ कि चिडिउ रै जौरिरे कि हाऊं तुमु डराउणै वालौ ना बाँणू। 10 कैलै कि सै बोलाई, "तिउरी चिडी ता गहरी और दमदार आ; पर जेबी सेउ सामने हुआ ता तेबी सेउ शरीरा दी कमजोर और बौगता रै अनुसार हौलकौ जाणिआ सा।" 11 जो इणौ बोला सा, सेउ इणौ सौमझी छाड़ा लौ कि जिणीं पीठी पिछु चिडिउ दी आमारे वचन ई, और तिणी ई तुमुरै सामने आमारे काम भी हुआई। 12 कैलै कि आमुकें एजी हिम्मत नाई कि आमैं आपु ई तिउं मांझिरे इणै कुछ आइलै साथै इ गिणिया या तिउंके आपु मिली लै, जुण आपणी तारीफ आपु कौराई और आपु ई आपु मांझिरे नापुई-तोलूइयो एकी दूजा आइलै मिलुइयो मूरख बाँगाई। 13 आमैं ता हिसाबा कु बाइरे घमण्ड बिल्कुल भी नाई कौरिलै, पर तिणें ज़ागाहा झाऊं जो परमेश्वरा रै आमु काले चाणी ऐन्दी आ, और तेथदी तुमैं भी आशी गौए ई, और तेथी रै अनुसार घमण्ड भी कौरा ई। 14 कैलै कि आमैं आपणै हिसाबा कु

बाइरें आपु बोडाउणें नाई चाहानें, जिणों कि तुमु झाऊं ना पहुचणा री हालती दी हुआ, पर यीशु मसीहा रों खुशी रों संदेश शुणाउंदै-शुणाउंदै तुमु झाऊं पहुचौ ऐरें ई। 15 आमैं हिसाबा कु बाइरें दूजै री मँहनती माथें घमण्ड नाई कौरदै; पर आमुकें आश आ कि जिणी- जिणी ई तुमारों विश्वास बौडै थाका लौ लागी, तिणी-तिणी ई आमैं भी आपणें हिसाबा रें अनुसार तुमारें कारणें तौरें भी बौडै थाकी लागी। 16 ताकी आमैं तुमारें हिसाबा कु ओगाऊं बौडिये खुशी रों संदेश शुणाई, और इणों नाई कि आमैं दूजा रें हिसाबा भितैं बौणें-बणाए कामा माथें घमण्ड कौरी। 17 पर जो घमण्ड कौरालों सेउ आपणें प्रभु माथें घमण्ड कौरालों। 18 कैलें कि जुण आपणी बौडाई कौरा सा सेऊ नाई, पर ज़ासरी बौडाई प्रभु कौरा सा तेसी इ अपणावा ई।

पौलुस और झूठे प्रेरित

11 अगर तुममें मेरी थोड़ी जेई मुखता भी सहन कौरी बौला थै ता का ई भौलौं हुणौं थौ; ओ, मेरी सहन भी कौरा ई। 2 कैलेंकि हाऊं तुमारें बारै दी प्रभु दी मोगन रोंआऊ, एथीलें कि मुइयें एक इ आदमी के तुमारी बूश लाई आ कि तुमैं पवित्र बिण ब्याही छोटी जिणी मसीहा के सौंभालू। 3 पर हाऊं डौराऊ कि जिणों सापें आपणी चतुराई कौरीए हव्वा टोंगाई तिणी ई तुमारें मन तिणें सीधाई और पवित्रता कु जो मसीहा आइलें हुणी चाई किरें बिटालुए ना चाई। 4 अगर कुण तुमु काए आशियौं कास दुजै यीशु रों परचार कौरालों, जेथारों प्रचार आमुएं नाई किओ; या केजी ओर आत्मा तुमकें मिला, जो पैहलें नाई मिली थी; या कुण सुसमाचार शुणावालौं जो तुमुएं पैहलें नाई मानौं थौ ता तुमैं तेस सहन कौराई। 5 हाऊं ता सौमझाऊ कि हाऊं केजी बुशा दी बौडै कु बौडै प्रेरिता कु कम नाई आसतौ। 6 अगर हाऊं बोलने दी अनजान उ तैबै भी ज्ञाना दी नाई। आमुएं एउ हर बुशु दी सारें ढोंगा कौरी तुमुलें परगट किओ आ। 7 का एथी दी मुइयें केजौं पाप कियौं आ कि तुमुकें परमेश्वरा रों सुसमाचार आच्छा कौरिऐ शूणाओ। और आपु बौणों छोटी कि तुमैं बौडै बौणा? 8 मुइयें दुजी कलिसिया लूटी, मतलब के मुइयें तिउंकु मजदूरी मांगी ताकी तुमारी सेवा कौरौ। 9 और जेबी हाऊं तुमु आइलें थौ और मुकें कामी हुई, मुइयें कासी माथें भार नाई पाओ, कैलेंकि भाईउरें मकिदुनिया कु आशियौं मेरी कामी पुरी की आ; और मुइयें हर बुशु दी आपु तुमु माथें भार बौणनै कु रोकौं और रोकदें थाकाऊ लागी। 10 अगर मसीहा री सौंझाई मुन्दी ता अख्या देशा दी कोई मूं ऐजे घमण्डा कु नाई रोकदौ। 11 कैलें? का एथीलें कि हाऊं तुमु आइलें प्यार नाई छाडदौ? परमेश्वर ज़ाणा कि हाऊं प्यार छाडाऊ। 12 पर जो हाऊं कौराऊ तेसी थाकाऊ कौरदै लागी कि जो लोग मोकौं लोडाई तिउं के हाऊं मोकौं नाई देऊ, ताकी जेजी बुशा दी सैं घमण्ड कौराई, तेथदी सैं आमु जिणें बौणा। 13 कैलेंकि इणें लोग झूठे प्रेरित, और छल कौपटा कौरिऐ काम कौरने वालें, और मसीहा रें प्रेरिता जिणों रूप हुणें वालें हुआई। 14 ऐ कुछ हैरानी वाली बूश नाई कैलेंकि शैतान आपु भी चौरकिलें स्वर्गदूता रों रूप धारण कौरा सा। 15 एथीलें अगर तेसरें सेवक भी धौर्मा रें सेवका जिणों रूप कौरा लें, ता कोई बौडी बात नाई, पर तिउंरौं आखरी बौग तित्तरें कामा रें अनुसार हुआ सा।

प्रेरिता रें रूपा दी पौलुसा रों दुःख भोग

16 हाऊं तोइयें बोलाऊ, कोई मूं मुख ना सौमझा लौ; नाई ता मुख ही सौमझियौं मेरी सहन कौरौं ताकी थोडों जेई हाऊं भी घमण्ड कौरौं बौलू। 17 एस बेधडक घमण्डा दी जो कुछ हाऊं बोलाऊ, सेउ प्रभु री आज्ञा कौरिऐ नाई मानौं मुखता कौरिऐ बोलाऊ। 18 जैबै कि भौरी लोग शरीरा कौरिऐ घमण्ड कौराई ता हाऊं भी घमण्ड कौराऊ। 19 तुमैं ता समझदार हुइयौं खुशी कौरिऐ मुखी री सहन कौराई। 20 कैलें कि जैबै तुमूं कुण नुकर चाणौं एरा, या खा सा, या फौसावा सा, या आपु कु बौडौं बौणा सा, या तुमारें मुआं दी थापें ला सा ता तुमैं सहन कौराई। 21 मेरी बोलनौं बेइज्जती इ री रीती जिणों आ, मानो आमैं एथलें कमजोर जिणें थैं। पर जेजी केजी बुशा दी कुण हिम्मत कौरा सा—हाऊं मुखता कौरौं बोलाऊ—ता हाऊं भी हिम्मत कौराऊ। 22 का से ई सी इब्रानी? हाऊं भी उ। का से ई सी इस्पायली? हाऊं भी उ आ। का से ई अब्राहमा रें वंशा रें ई? हाऊं भी उ। 23 का से इ मसीहा रें

सेवक ई— हाऊं पागला बाशिऐ कौराऊ—हाऊं तिउं कु जादौ ऊ ! जादी मेहनत कौरनै दी; घौडी-घौडीऐ जेल हुणें दी; डीगें खाणें दी; घौडी-घौडीऐ मौरनै रें खौतरें दी पौडनै दी। 24 पाँजा बारें मुइयें यहूदी रें हाथा कु उन्तालिस-उन्तालिस डीगें खाए ई। 25 चिआ बारी मुइयें बैनै खाई आ; एकी बारें हाऊं ढोलियाओ आ; चिआ बारी जहाज जेथा दी हाऊं बोशौं थौ सैं चूटी गोए; एक राच एक दीन मुइयें समुंदरा दी पाणी माँजी काटौं। 26 हाऊं घौडी-घौडीऐ सौफरा दी; नौई रें खौतरें दी; डाकू रें खौतरें दी; आपणी जाती वालेउ कु खौतरें दी; दुजी जाती कु खौतरें दी; इलाकें रें खौतरें दी; जांगला रें खौतरें दी; समुन्दरा रें खौतरें दी; झूठे भाईउ मझिऐ हाऊं खौतरें दी रों। 27 मेहनत और कौषा दी; घौडी-घौडीऐ उजी रौइणें कु; बोखें-चिशें दी; घौडी-घौडीऐ ब्रौता कौरनै दी; शलें दी; फूको रौइणें दी; 28 और दुजी बुशेऊ छाडियौं जेथरौं हाऊं हिसाब-किताब नाई कौरदौं, सारी कलिसियाउ री फिकर हर रोज मूं दबावा सा। 29 केथरी कमजोरी कु हाऊं कमजोर नाई औन्दौ? कासरें टोकर खाणें कु मेरौं जीऊ नाई दुखदौ? 30 अगर घमण्ड कौरनौं जरूरी आ, ता हाऊं आपणी कमजोरी री बुशु माथें घमण्ड कौराऊ। 31 प्रभु यीशु रों परमेश्वर और बाब जो सदा भौलें ई, ज़ाणा कि हाऊं झूठ नाई बोलदौ। 32 दमिश्क दी अरितास राजा री तौरफा कु जो हाकिम थौ, तिणिए मूं पाकुडना लें दमिश्किए रें इलाकें माथें पैहरौं बोशाली थौ छाडौं औन्दौ, 33 और हाऊं छाबडी दी खिडकी बाटें हुइयौं सिउं माथें टौपियौं बाइरें उतरौं, और तेसरें हाथा कु बौचियौं निकलौं।

पौलुसा रें दिव्य दर्शन और कमजोरी

12 अगर घमण्ड कौरनौं मुलें ठीक नाई आ तैबै भी कौरनौं जा सा; एथीलें हाऊं प्रभु रें दैओ औन्दै दर्शन और परमेश्वरा री देखाती ऐन्दी बुशें बोलाऊ। 2 हाऊं मसीहा दी एक आदमी ज़ाणाऊ; चोदह बौरख हुऐ नाई कि ना ज़ाणें कि शरीरा आइलें, या बिण शरीरा आइलें, परमेश्वर ज़ाणा सा; इणों आदमी चीजे सौरगा दी उठाओ आ। 3 हाऊं एक इणों आदमी ज़ाणाऊ; का पौतो कि शरीरा आइलें, या बिण शरीरा आइलें, परमेश्वर इ ज़ाणा सा 4 कि इणों आदमी सौरगा दी उठाओ आ और इणी बुशें शुणी जो बोलणें री नाई; और जो मुआं दी आणनी आदमी लें ठीक नाई। 5 इणें आदमी माथें ता हाऊं घमण्ड कौराऊ, पर आपु माथें आपणी कमजोरी छाडियौं, आपणें बारें दी घमण्ड नाई कौरदौं। 6 कैलेंकि अगर हाऊं घमण्ड कौरनौं चाऊ लौ ता मुख नाई औन्दौ, कैलेंकि सौंझौ बोलाऊ; तैबै भी टेकाऊ, इणों ना चाई हुओ कि जिणों कुण मुं देखाली या मुकु शुणालौं मूं तेसकु बौडौं सौमझा। 7 एथीलें कि हाऊं परमेश्वरा री देखाली औन्दी बुशें कौरी घमण्डी ना बौण, मेरें जीवा दी एक काँडौं खुबाओ आ यानी के शैताना रों एक दूत मुदी मुकुएं ला आ ताकी हाऊं घमण्ड ना कौरौ। 8 एथरें बारें दी मुइयें प्रभु कु चिआ बारें औरज की मुकाए कु एउ दूर चाई हुओ। 9 तिणिए मूं आइलें बोलौं, “मेरी बौडी दया ताउलें भौरी आ; कैलें कि मेरी ताकत कमजोरी दी पौरखिया सा।” एथीलें हाऊं बौडी खुशी कौरिऐ आपणी कमजोरी माथें घमण्ड कौराऊ कि मसीहा री ताकत मु माथें बौणी रोंआ। 10 एजे मतलब है हाऊं मसीहा लें कमजोरी दी, और बेइज्जती दी, और गरीबी दी, और झोंगडे दी, और मुसीबता दी खुश उ; कैलें कि जेबी हाऊं कमजोर हुआउ तेबी हाऊं ताकती वालौं हुआऊ।

कुरिन्थिउ लें पौलुसा री फिकर

11 हाऊं मुख ता बौणों पर तुमुए इ हाऊं इणों कौरना लें मजबूर कियौं उ। तुमुए ता मेरी तारीफ कौरनी चाई थी, कैलें कि अगर हाऊं कुछ भी नाई, तैबै भी तिउं बौडै कु बौडै प्रेरिता कु केजी भी बूशा कु कम नाई आसतौ। 12 प्रेरिता रें लौछण भी तुमु माँझिऐ सारें रोंगा रें धीरजा आइलें चिन्ह, और नोखें काम, और ताकती वालें कामु दी देखालें इ। 13 तुमैं केजी बुशु दी दुजी कलिसियाउ कु कम थैं, सिर्फ एथदी कि मुइयें तुमु माथें भार नाई पाओ। मेरौं एस अन्याय माफ कौरौं। 14 देखौं हाऊं चीजी बारें तुमु काए आशणा लें तैयार उ, और हाऊं तुमु माथें केजौं भी भार नाई छाडदौं, कैलेंकि हाऊं तुमारी धन-जयदाद नाई बल्कि तुमु ई चाहा उ। कैलेंकि छोरुऐ आमा-बाबा लें धन-जयदाद कौठै नाई चाई कौरनी, पर आमैं-बाबै छोरु लें धन-जयदाद कौठै

कौरनी चाई। 15 हाऊं तुमारी आत्माओं लै भौरी खुशी कौरी खौर्च कौराऊ यानी कि आपु भी खौर्चियाउ। का जेती बौड़ी चौड़ियो हाऊं तुमु आइलै प्यार छाड़ाऊ, तेती इ घौंटियो तुमें मू आइलै प्यार छाड़ाई? 16 इणौ हुई बौला कि मुइयें तुमु माथे भार नाई पाओ, पर चतुराई कौरी मुइयें तुमु लै धोखौ दैइयो फौसाए इ ! 17 शूणौ जो मुइयें तुमु काए छाड़ै, का तिऊं मांझीया कु कास कौरिरे मुइयें ठौगाइयो तुम कु कुछ नी एरौ आ? 18 मुइयें तीतुस समझाईयो तेस आइलै सेऊ भाई भेजौ, ता का तीतुसै ठौगाइयो तुमकु कुछ नीओ आ? का आमै एक इ आत्मा कौरी चलाइयो नाई चालिलै? का आमै आत्मा री बुशा माथे नाई चालै? 19 तुमें इबी झाऊं समुझदैं औलै लागै औन्दै कि आमैं तुमु काए आपणी तौरफदारी देखाली ई। आमैं ता परमेश्वर री मौजूदगी ज्ञाणियो मसीह दी बोली ई, और ओ प्यारै भाइयो सारी बुशै तुमारी इ तरक्री लै बोली ई। 20 कैलैकि मुके डौर आ कि, किरै इणौ ना चाई हुओ कि हाऊं आशियो ज्ञिणौ हाऊं चाहा ऊ, तिणौ मुके तुमु दी ना दिशा; और ज्ञिणौ तुमें भी ज्ञिणौ मूं चाहा इ तिणौ इ दिशु; और तुमु मांझी झोगडौ डाह, रोश, बिरोध, ईर्ष्या, चुगली, घमंड और बखेडै हुआ; 21 और किरै इणौ ना चाई हुओ कि मैरौ परमेश्वर मैरै दुजी बारै तुम काए आशियो मूं माथे दबाव पा और मूं भौरी सारेउ लै तौई दुःख कौरनौ जा लौ, जुणिएरै पैहलै पाप कियो थौ और गान्दै काम और बुरै बिचार और लालच जो तिउंरे कियो, तेथकु मन ना बौदलौ।

आखरी बार खबरदार कौरणै

13 ऐबै चीजी बारै हाऊं तुमु काए आशा ऊ: दुई या चीन गवाईउ रे मुंआ कौरी सारी बुशै पाकी कौराई। 2 ज्ञिणौ हाऊं जेबी दुजी बारै तुमु आइलै थौ, तिणी ई ऐबै दूर रौइयो तिऊं लोगु कु जुणिएरै पैहलै पाप कियो, और ओरी सारेऊ लोगु कु पैहलै बोलाऊ कि अगर हाऊं तौइंरे आशुलौ ता

नाई छाड़दौ, 3 कैलैकि तुमें ता एथरौ सबूत चाहा ई कि मसीह तुमु दी बोला सा, जो तुमुलै कमजोर नाई पर तुमु दी ताकती वालौ आ। 4 सेऊ कमजोरी रे कारण क्रूसा माथे टांगी ता ऐरौ आ, तैबै भी परमेश्वर री ताकती कौरी जीऊंदौ आ। आमैं भी तेसदी कमजोर ई, पर परमेश्वर री ताकती कौरी जो तुमुलै आ तेस आइलै जीवी ई। 5 आपु पौरखियो कि विश्वासा दी आसती कि नाई। आपणी जाँच कौरौ। का तुमें आपणै बारै दी इणौ नाई जाणदैं कि यीशु मसीह तुमु दी आ? नाई ता तुमें पौरखुइयो निकामै निकली गोरे ई। 6 पर मेरी आश आ कि तुमें पोरू ज्ञाणाई कि आमैं निकामै नाई आसतै। 7 आमैं आपणै परमेश्वर कु प्राथना कौरी कि तुमें कोई भी बुराई ना कौरा। ऐथलै नाई कि आमैं ठीक दीशी गोरे, पर ऐथलै कि तुमें भौलाई कौरौ, चाऊ आमैं निकामैं इ कैलै ना औलै। 8 कैलैकी आमैं सौच्चाई रे विरोधा दी कुछ नाई कौरी बौलदैं, पर सौच्चाई लै ई कोरी ई। 9 जैबै आमैं कमजोर ई, और तुमें ताकती वाले ई, ता आमैं खुश हुई ई, और इणी प्राथना भी कौरी ई कि तुमें (साफ) सिद्ध हुओ। 10 एजै मतलबै हाऊं तुमारी पीठी पिछु इऊं बुशै लिखाऊ, कि हाजिर हुइयो मुके तेस हका कौरिरे जो प्रभुए बिगाडना लै नाई पर चाणना लै मुकै दैओ आ, सौकती कौरी कुछ ना जा लौ कौरनौ।

अभिवादन

11 पर ओ भाइयो, खुश रौओ, और पाकै (साफ) सिद्ध थाकौ बौणदैं लागी; हिम्मत छाड़ौ; एक इ मन छाड़ौ; मेल मिलापा कौरी रौओ। और प्यार और शान्ति दैणै वालौ तुमु आइलै हुआ। 12 एकी दुजै लै पवित्र खोबू कौरी ढाल कौरौ। 13 सारै पवित्र लोग तुमकै ढाल कौराई। 14 प्रभु यीशु मसीह री बौड़ी दया और प्रभु रौ प्यार और पवित्र आत्मा रौ साथ तुमु सौभी आइलै औन्दै थाका लौ लागी।

गलातियों

अभिवादन

1 पौलुस—जो ना आदमिऊ री तौरफा कु और ना आदमिऊ रै जरीए, यानी कि यीशु मसीह और बाबा परमेश्वरा कौरीए जुणिए सेउ/यीशु मौरै औन्दै मांझिया कु ज़िउंदौ कियो आ, प्रेरित आ— 2 और सारै भाईउ री तौरफा कु जुण मुं आइलै आ, गलातिउ री कलिसिया रै नावां दी: 3 परमेश्वर बाब और आमारे प्रभु यीशु मसीह री तौरफा कु तुमुलै बौडी दया और शान्ति मिलदैं थाका ली लागी। 4][:.HGq1 तीणिए ई अपनी ज़िन्दगी अमारै पापा री ताई आमूलै देई ताकी आमारे परमेश्वर और बाबा री मौरजी रै अनुसार आमु आज काला री इयें बुरी दुनिया कु छुड़ावा। 5 तेसरी स्तूती और बड़ाई जुगा-जुगा दी हुआ। आमीन।

केजी भी दुजी आच्छी खौबर नाई

6 मुकै हैरानी हुआ कि जुणिए तुम मसीहा री बौडी दया दी औंटाए ई तेसकु तुमुए एती शीघ्रीई पीठ बौदलियो दुजैए रेंगा री खुशखबरी भिलै झुकदैं लागी गोए 7 पर सै दुजी खुशखबरी आसती नाई: पर बूश इणी आ कि कुण इणै भी ई कि जुण तुमारौ ज़िऊ घौबरावा ई, और मसीह यीशु री खुशखबरी बिगाड़नै चाहा ई। 8 पर अगर आमै, या सौरगा कु केजौ दूत भी तिऐं खुशखबरी छाड़ियो जो आमुए तुमकै शुणाई आ, और केजी दुजी खुशखबरी तुमुकै शुणाऊ लै ता सेउ शापित हुणौ चाई। 9 ज़िणौ आमुए पैहलै ई बोली ऐरो आ, तिणी ई हाऊं आबे दुजी बारै बोलाऊ कि तिऐ खुशखबरी छाड़ियो जो तुमुए मानी आ, अगर कुण दुजी खुशखबरी शुणाउवा सा सेउ शापित चाई हुणौ। 10 आबै का हाऊं आदमी मानाउं या परमेश्वर? का हाऊं आदमिउं खुश कौरनौ चाहा ऊ? अगर हाऊं इबी झाऊं आदमिऊ खुश कौरा थौं ता हाऊं मसीह रौं सेवक नाई हुआ थौं।

पौलुस किणै कौरी बौणौ प्रेरित

11 ओ भाईओ, हाऊं तुमुकै बोली छाड़ाऊ कि जो खुशखबरी मुंडैए शुणाई आ सै आदमिउं री नाई। 12 कैलैकि सै मुलै आदमिउं री तौरफा कु नाई पौउंची, और ना मुकै कोइए शिखाई, पर यीशु मसीहा री तौरफा कु प्रकाशन मिलौ सा। 13 यहूदी रै अनुसार जो पैहलै मैरौ चाल चालन थौं तेथरै बारै दी ता तुमुए शुणी ऐरो आ कि हाऊं परमेश्वरा री कलिसिया भौरी परेशान कौरा थौं और नाष कौरा थौं। 14 आपणै भौरी जाती वालेऊ कु जो मुं आइलै साथे दी थै, यहूदी रै अनुसार बौडदैं थाका थौं और आपणै बाब-दादा री रिती रिवाजा लै भौरी ई खुश रौआ थौं। 15 पर परमेश्वरा री, जुणिए हाऊं मेरी मां रै गौवा दी चुनौं, और आपणी बौडी दया कौरी औंटाई ऐरो ऊ, 16 जेबी परमेश्वरा री इच्छा हुई कि मुकै आपणौं छोहरु परगट कौरा कि हाऊं दुजी ज़ातिऊ दी तेसरी खुशखबरी शुणाऊं, तैबै ना ता मुंड्यै लोऊ और मासा कु सलाह नी ई, 17 और ना यरुश्लेमा लै तिऊं काए डैओ जुण मुकु पैहलै प्रेरित थै, पर एकदम अरब देशा लै डैओ और तेथ बासिए तिदरु दमिश्का लै वापिस आशौं। 18 तैबै चीया बौरशा बासिए कैफा कु मिलदैं यरुश्लेमा लै डैओ, और तेस काए पौन्दरा दीना झाऊं रौं ओ। 19 प्रभु रै भाई याकूबा छाड़ियो ओरीऊ प्रेरिता कु नाई मिलौ। 20 जो बुशै हाऊं तुमुलै लिखाऊ, देखौं, परमेश्वर आपु काए ज़ाणियो बोलाऊ कि सै झूठी नाई असती। 21 तेथ बासिए हाऊं सिरिया और किलकिया रै इलाकेउ दी आशौं। 22 पर यहूदिया री कलिसिया रै लोगुए जो मसीह दी थै, मैरौ मूकेबी नाई देखौं थौं; 23 पर इणौं शुणा थी कि जो आमु

पैहलै सतावा थौं, सेउ आबै सेजैए विश्वासा री खुशखबरी शुणावा सा ज़ास पैहलै नाश कौरा थौं। 24 मैरै बारै दी परमेश्वरा री महिमा कौरा थी।

ओरी प्रेरिता कौरी पौलुसा लै मान्यता

2 चौदह बौरशा बासिए हाऊं पौलुस बरनबासा आइलै तौइंरे यरुश्लेमा लै डैओ, और आपु आइलै तितुस भी नींओ। 2 मैरौ डेरुणौ परमेश्वरा रै प्रकाशना रै अनुसार हुओ; और जो खुश-खबरी हाऊं दुजी ज़ातिऊ मांझीए शुणावा ऊ सै मुंड्यै तिउंकै बोली एरी, और एखुलै दी तिउंलै भी ज़ास बौडै सौमझा थै, ताकि इणौं ना चाई हुओ कि मैरौ पिछलौं कोइ कौरनौ बेकार हुआ। 3 पर तितुस भी जो मू आइलै थौं, और जो युनानी आ, खतना कौरना लै मज़बूर नाई कियो थौं। 4 सेउ तिऊं झूठै भाईउ रै कारणे हुओ जो चोरिए आमु मांझिए आशै थै, कि आज़ादी रौं जो मसीह यीशु कु आमुकै मिलौ आ, भेद नीइंयो आमु दास चाणा। 5 एकी घौड़िए भी तिउरै अधीना दी रौइणौं आमुए नाई मानौं, एथीलै कि खुशखबरी री सौंचाई तुमुदी बौणी रौआ। 6 तैबै जो लोग कुछ सौमझिया थै (सै चाऊ किणै भी थै मुकै तिऊं कु कुछ काम नाई; परमेश्वर कासी री तौरफदारी नाई कौरदौं) — तिऊं कु जो कुछ सौमझा थै, मुकै कुछ भी नाई मिलौ। 7 पर एथरै बीचा ई जेबी तिउंरे देखौं कि ज़िणौं खतना किए औन्दै लोगु लै खुशखबरी रौं काम पतरसा कै थौं साम्बौ औन्दौं, और तिणौं इ बिण खतना किए औन्दै वालेउ लै खुश-खबरी शुणाउणी मुकै साम्बी थी। 8 कैलैकि जुणिए पतरसा कु खतना किए औन्देउ मांझीए प्रेरिताई रौं काम बौडी ताकती कौरी कौराओ आ, तिणिए ई मुकै भी दुजी ज़ातिउ मांझीए भी ताकतीवालौं काम कौराओ। 9 और जेबी तिउंरे तिऐं बौडी दया कु जो मुकै मिली आ ज़ाणी गौं, ता याकूबै और कैफै, और यहूनै, जो कलिसिया रै खाम्बै ई, मुकै और बरनबासा कै संगती रौं सुलटौं हाथ देओ कि आमै दुजी ज़ातिवालेउ काए डैई लै और सै डिया खतना किए औन्देउ काए; 10 सिर्फ इणौं बोलौं कि आमै गरिबू री देखभाल कौरु, और एजै काम कौरनै री हाऊं आपु भी कोशिश कौरदैं थौं लागौं औन्दौं।

पौलुसा कौरी पतरसा रौं विरोध

11 पर ज़ैबै कैफा अन्ताकिया दी आशौं, ता मुंड्यै तेसरै मुआं रौं सामनौं कियो कैलै कि सेउ आरोपी थौं बौणौं औन्दौं। 12 एथी लै याकूबा री तौरफा कु कुछ लोग आशणै कु पैहलै सेउ दुजी ज़ातिऊ आइलै खा पिआ थौं, पर ज़ैबै सै आशै ता खतना किए औन्दै लोगु रै डौरा रै मारै सै पिछाऊं फिरी गोए और अलग औन्दै लागै। 13 तेस आइलै बाकी यहूदिउ ऐ भी कपट कियो, इदरा झाऊं कि बरनबास भी तिउरै कौपटा दी पौडी गौ आ। 14 पर ज़ैबै मुंड्यै देखौं कि सै खुशखबरी री सौंचाई माथै सीधी चाल नाई चालदैं, ता मुंड्यै सारेउ रै सामनै कैफा लै बोलौं, "ज़ैबै तू यहूदी हुइयो दुजी ज़ातिउ बाशिऐ चाला ई और यहूदी बाशिऐ नाई चालदौ, ता तू दुजी ज़ातिउ लै यहूदी बाशिऐ चालणा लै कैलै बोलाई?"

विश्वासा कौरी धौरमी ठहरणौं

15 आमै ता जन्मा कु यहूदी ई, और पापी दुजी ज़ातीउ मांझिया कु नाई। 16 तैबै भी इणौं ज़ाणियो कि आदमी कानूना रै कामा कौरी नाई, पर सिर्फ यीशु मसीह माथै विश्वास कौरनै कु धोर्मौं बौणा, आमुए आपु भी मसीह यीशु माथै विश्वास कियो आ कि, आमै कानूना रै कामा कौरी नाई, पर मसीह माथै विश्वास कौरीयो धोर्मौं बौणै ई; एथीलै कि कानूना रै कामा कौरी कोई भी

प्राणी धोर्मी नाई बोगदौ। 17 आमै जो मसीह दी धोर्मी बोगनै चाई, अगर आपु ई पापी निकला लै ता का मसीह पापा रौ सेवक आ? बिल्कुल भी नाई। 18 कैलै कि जो कुछ मुंइयै फोकी ऐरो आ अगर तेसी ई खोड़ी चूं लौ, ता हाऊं आपुलै गुनाही बोगा ऊ। 19 ता हाऊं कानूना कौरिऐ कानूना लै मौरी जो ऊ कि परमेश्वर लै जीऊ। 20 हाऊं मसीह आइलै कूसा माथे चोडाई ऐरो उ, ऐबै हाऊं जीउंदौ नाई रौ, पर मसीह मुंदी जीउंदौ आ; और हाऊं शरीरा दी ऐबै जो जीउंदो उ ता सिर्फ सेजै विश्वासा कौरी जिउंदो उ जो परमेश्वरारै छोहरु माथे आ और जुणिए मूं आइलै प्यार कियो और मुलै कूसा माथे आपणी ज्ञान देई आ। 21 हाऊं परमेश्वर री बौड़ी दया बेकार नाई औणै दैदौ; कैलै कि अगर कानूना रै जौरिऐ धार्मिकता हुआ थी, ता मसीह रौ मौरनौ बेकार हुआ थौ।

कानून और विश्वास

3 ओ बिण बुद्धी रै गलातियो, तुमै कुणिए बिश्वासै ई? तुमारी ता मानौ आखी रै सामनै यीशु मसीह कूसा माथे देखाळौ थौ! 2 हाऊं तुमकु सिर्फ इणौ ज्ञाननौ चाहा ऊ कि तुमुऐ आत्मा, का कानूना रै कामा कु या विश्वासा री खुशखबरी कु पाओ आ? 3 का तुमै इणै बिण बुद्धी रै ई कि आत्मा री रीती कु शुरु कौरियो ऐबै शरीरा री रीती माथे खात्म कौराई? 4 का तुमुऐ एती दुःख बिण मतलबा रौ उठाओ आ? पर बिल्कुल बेकार नाई। 5 जो तुमुलै आत्मा रौ दाण कौरा सा और तुमु दी ताकती रै काम कौरा सा, सेउ का कानूना रै कामा कु या खुशखबरी माथे विश्वासा कु इणौ कौरा सा? 6 "अब्राहमै ता परमेश्वर माथे विश्वास कियो और सै तिउंलै धार्मिकता गौणुई गोई।" 7 यानी कि इणौ ज्ञानौ कि जो विश्वास कौरनै वालै ई, सेई अब्राहमा री सन्तान ई। 8 और पवित्र शास्त्रै पैहलै कु इणौ ज्ञानियो कि परमेश्वर दुजी जाती वालेउ विश्वासा कौरिऐ धोर्मी चाणा, पैहलै कु अब्राहमा कै एजी खुश-खबरी शुणाई एरी कि "ताऊंदी सारी जातीउ रै लोग आषिष पा लै।" 9 एथीलै जो विश्वास कौरनै वाले ई, सै विश्वासी अब्राहमा आइलै आषिष पा ई। 10 एथीलै जेती लोग कानूना रै कामा माथे भरोसौ छाडाई, सै सारै श्रापा रै अधीन ई, कैलै कि लिखौ औन्दौ आ कि, "जो कोई कानूना री किताबी दी लिखी ऐन्दी सारी बुशैऊ नाई मानदौ सेउ श्रापित आ।" 11 पर इऐ बूश परगट आ कि कानूना कौरिऐ परमेश्वर काऐ कोई भी धोर्मी नाई बौनदौ, कैलै कि धोर्मी लोग विश्वासा कौरिऐ जिउंदौ रौआ सा। 12 पर कानूना रौ विश्वासा कु कोई भी नातौ नाई आसतौ, "कैलै कि जो तिउं माना लौ, सेउ तेथरै कारणे जिउंदौ रौआ सा।" 13 मसीहै जो आमूलै शापित बोगौ, आमै मोल नीई औ कानूना रै श्रापा कु छुड़ाऐ, कैलै कि लिखौ औन्दौ आ, "जुण-कुण झुखडै माथे लटकाइआ सेउ श्रापित आ" 14 एऊ एथलै हुआ आ कि अब्राहमा री आषिष यीशु मसीह दी दुजी ज्ञातिउ झाउं पहुँचा, और आमै विश्वासा रै जौरिऐ तिऐ आत्मा पाउलै जेथरौ वाइदौ हुआ आ।

कानून और वाचा

15 ओ भाईयो, हाऊं आदमिउ री रीती माथे बोलाउ; आदमिउ रौ वाइदौ भी जो पाकौ हुआ सा, ता ना कोई तेस टालदौ और ना कुछ तेथदी बौडदौ। 16 यानी के वाइदौ अब्राहम और तेसरै वंशा लै थौ दैओ औन्दौ। सेउ इणौ नाई बोलदौ, "वंशा लै," जिणौ भौरिउ रै बारै दी बोलौ; पर जिणौ एकी रै बारै दी बोलौ कि, "तैरै वंशा लै" और सेउ मसीह आ। 17 पर हाऊं इणौ बोलाऊ : जो वाइदौ परमेश्वरै पैहला कु पाकौ कियो थौ, तेस वाइदौ कानून चार शौ तीस साला बासिए भी आशियो नाई टालदौ कि वाइदौ बेकार बोगा। 18 कैलै कि अगर विरासत कानूना कु पैहलै मिली आ ता वाइदौ कु नाई, पर परमेश्वरै अब्राहमा लै वाइदौ रै जौरिऐ देई एरी आ। 19 तैबै कानून कैलै देई औली? सै ता गुनाहा रै कारणे बासिए देई आ कि तेस वंशा आशणै झाऊं रौआ, जासकै वाइदौ दैओ थौ; और सेउ सौरगा रै दूता रै जौरिऐ एक बिच्वाई रै (यीशु मसीह) रै हाथा दी सांबी गोई 20 बिच्वाई ता एकी रौ नाई हुंदौ, पर परमेश्वर ता एक इ आ

कानून रौ मौकसद

21 तैबै का कानून परमेश्वर रै वाइदौ रै बिरोधा दी आ? केबी नाई! कैलै कि अगर इणौ कानून दिआ थै, जो जिन्दगी दिआ थी ता सौच्चि ई धार्मिकता कानूना कौरिऐ हुआ थी। 22 पर पवित्रशास्त्रै ता सारै पापा रै अधीन कौरी ऐरै, ताकी सेउ वाइदौ जेथरौ आधार यीशु मसीह माथे विश्वास कौरनौ आ, विश्वास कौरनै वालेऊ लै पूरी हुआ। 23 पर विश्वासा रै आशणै कु पैहलै कानूना दी रौइयो आमारी चोकसी हुआ थी, और तेस विश्वास आशणै झाऊं जो परगट हुणै वालौ थौ आमै तेसी रै बन्धना दी रौऐ। 24 एथीलै कानून मसीह झाऊं पहुँचाउणा लै आमारी शिक्षा हुई आ कि आमै विश्वासा कौरी धोर्मी बोगा। 25 पर जैबै विश्वास आशी ऐरो, ता आमु ऐबै विश्वासा रै अधीन नाई चाई रौइणौ। 26 कैलै कि तुमै सारै तेस विश्वासा रै जौरिऐ जो मसीह यीशु माथे आ, परमेश्वर री सन्तान ई। 27 और तुमु मांझिया कु जेतिउऐ मसीह दी बपतिस्मौ निओ आ तिउंऐ मसीह भिडी ऐरो आ। 28 ऐबै ना कोई यहूदी रौ और ना यूनानी, ना कोई नूकर ना आजाद, ना कोई मौरद ना छेवडी, कैलै कि तुमै सारै मसीह दी एका ई। 29 और अगर तुमै मसीह रै ई ता अब्राहमा रै वंश और वाइदा रै अनुसार वारिस भी ई।

गलातिउ रै बारै दी पौलुसा रौ सुंचणौ

4 हाऊं इणौ बोलाऊ कि वारिस जेबी झाऊं छोटौ माऊं आ, यानी कि सारी चीजू रौ मालिक आ, तैभै भी तेसदी और नुकरा दी कोई फर्क नाई। 2 पर बाबा रै चाणै औन्दै बौगता झाऊं देखभाल और भंडारी रै वशा दी रौआ सा। 3 तिणी ई आमै भी, जेबी छोटै थै ता दुनिया री आदी शिक्षा रै वशा दी हुइयो नुकर थै बौणै औन्दै। 4 पर जैबै बौगत पूरी हुआ ता परमेश्वरै आपणौ छोहरु भेजौ जो छेवडी कु पैदौ हुआ, और कानूना रै आधीन पैदौ हुआ, 5 ताकी कानूना रै सारै हक खरिदियो छुड़ावा लौ, और आमूलै लेपालक हुणा री पदवी मिला, 6 और तुमै जो छोहरु ई, एथीलै परमेश्वरै आपणै छोहरु री आत्मा, जो 'ओ आब्बा, 'ओ बाब बोलियो ओटावा सा,' आमारै जीवा दी भेजौ आ। 7 एथीलै ऐबै तू नुकर नाई, पर छोहरु ई; और जैबै छोहरु बौणौ, ता परमेश्वरारै जौरिऐ वारिस भी बौणौ। 8 पैहलै ता तुमै परमेश्वर ना ज्ञानियो तिउंरै नुकर थै जो स्वभावा कु परमेश्वर नाई थै, 9 पर ऐबै तुमुऐ परमेश्वर प्राणी ऐरो यानी कि परमेश्वरै तुमै प्राणै, ता तिउं कमजोर और निकामी आदि शिक्षा री बुशु री तौरफा दी कैलै बौदलिया ई, जेथरै तुमै दूजी बारै नुकर हुणै चाहा ई? 10 तुमै दिन महिनै ठीक बौगत और बौरिष माना ई। 11 हाऊं तुमारै बारै दी डौरा ऊ कि इणौ ना चाई हुआ कि जो मैहनत मुंइऐ तुमुलै की आ सै बेकार हुआ। 12 ओ भाईयो, हाऊं तुमुलै औरज कौराऊ, कि तुमै मूं जिणै हुआ; कैलै कि हाऊं भी तुमु जिणौ हुई गो ऊ; तुमुऐ मैरौ कुछ नाई बिगाडौ। 13 पर तुमै ज्ञाणाई कि पैहलै-पैहलै मुंइऐ शरीरा री कमजोरी रै कारणे तुमकै खुशी रौ संदेश शुणाओ। 14 और तुमुऐ मेरी शरीरा री हालत जो तुमारी परिक्षा रौ कारण थी बेकार नाई ज्ञाणी और ना नफरत की, और परमेश्वर रै दूत यानी कि आपू मसीह जिणौ हाऊं अपनाओ। 15 ता सै तुमारी खुशी मौनाऊणी किरै डेई आ? हाऊं तुमारौ गवाह उ कि अगर हुई सौका कि तुमै आपणी आखी भी गाड़ियो मुकै दिआ थै। 16 तैबै का तुमकु सौच्चौ बोलणा रै कारणे हाऊं तुमारौ दुश्मण बौणी गो ऊ? 17 सै तुमु गोश्टण ता चाणनौ चाहा ई, पर भौली नियती कौरी नाई; यानी कि तुमु अलग कौरनौ चाहा ई कि तुमै तिउं ई गोश्टण चाणौ। 18 पर इणौ भी आच्छौ आ कि भौली बूशा दी हर बौगै गोश्टण चाणने री कोशिश कौरनी चाई, ना सिर्फ सेजै बौगै कि जेबी हाऊं तुमु आइलै रौआउ। 19 ओ मैरै छोहरुओ जेबी झाऊं तुमु दी मसीह रौ रूप ना बौणा लौ, तेबी झाऊं हाऊं तुमुलै इणौ दुःख सहन कौराऊ जिणौ औलखिदी बारै छेवडी लै हुआ सा। 20 इच्छा ता इणौ हुआ कि ऐबै तुमु काऐ आशियो दूजै ऐ रौगं रौ बोलू कैलै कि तुमारै बारै दी हाऊं शौखा दी ऊ।

सारा और हाजिरा रौ औनेणौ

21 तुमै जो कानूना रै अधीना दी हुणौ चाहा ई, मुकै बोलौ, का तुमै कानूना री नाई शुणदौ? 22 इणौ आ लिखौ औन्दौ कि अब्राहमा रै दुई छोहरु हुऐ; एक

नुकराणी कु और दूजौ आज़ाद छेवड़ी कु।²³ पर जो छोहरु नुकराणी कु हुआ सेउ शरीरा री रीती कु जौनमौ; और जो आज़ाद छेवड़ी कु जौनमौ सेउ वाइदा रै अनुसार जौनमौ।²⁴ एजी बुशु दी औनेणौ आ : इयै छेवड़ी मानौ दुई वाइदै ई, एक ता सीनै पर्वता री जासकु नुकुर पैदै हुआई; और सै हाजिरा आ।²⁵ और हाजिरा मानौ अरबा रौ सीनै पर्वत आ, और आजकालकौ यरुशलेम तेस बाशीऐ आ, कैलैकि सेउ आपणै छोहरु समेत गुलामी दी आ।²⁶ पर माथली यरुश्लेम आज़ाद आ, और सै आमारी मां सा,²⁷ कैलैकि लिखौ आ, “ओ बिण लोलडेऊ री, तू जो नाई ज्ञानदी खुश औऊ; तू जासलै बेदण नाई उठाउंदी, हाकै मारियौ जय-जयकार कर; कैलैकि तुकराई औन्दी सन्तान सुहागिणी री सन्ताना कु भी जादी आ”²⁸ ओ भाइयो आमै इसहाका बाशिऐ वाइदै री सन्तान आ।²⁹ और जिणौ सेजै बौगै शरीरा रै अनुसार जौनमै औन्दै सतावा थौ, तिणौ ई अबै भी हुआ सा।³⁰ पर पवित्र शास्त्र किणौ बोला सा? “नुकराण और तिआरौ छोहरु पोरु गाडौ, कैलैकि नुकराणी रौ छोहरु आज़ाद छेवड़ी रै छोहरु आइलै हकदार नाई औन्दी”³¹ एथीलै ओ भाईयो, आमै नुकराणी रै नाई पर आज़ाद छेवड़ी री सन्तान ई।

आज़ादी सौभालिऔ छडौ

5 मसीह ऐ आज़ाद हुणा लै आमै आज़ाद किए ई; यानी एथी दी अटल रौ, और गुलामी रै शौमाई दी तौइऐ ना जोचियो।² देखौ, हाऊं पौलुस तुमु आइलै बोलाऊ कि अगर खतना कौरावा लै, ता मसीह कु तुमुलै कुछ भी फाइदौ नाई औन्दी।³ तैबै भी हाऊं हर एक खतना कौराउणै वालैउ लै बोलाऊ कि सेऊ सारौ कानून मानणौ जा सा।⁴ तुमै जो कानूना रै जौरिऐ धर्मी बौणनौ चाहा ई, मसीह कु अलग और बौड़ी दया कु लोटी गौरै ई।⁵ कैलैकि आत्मा रै कारण आमै विश्वास कु, आश की ऐन्दी धार्मिकता री बाट लोडी ई।⁶ मसीह यीशु दी ना खतना, और ना बिण खतनै वालै कुछ कामा रै ई, पर सिर्फ विश्वास, जो प्यारा रै जौरिऐ असर पा ई।⁷ तुमै ता आच्छा कौरी थै फेटी मारदै लागै औन्दै। आबै कुणिए रोके तुमै कि सच्चाई नाई मानौ।⁸ इणी शिक्षा तुमारै औटाउणै वालै री तौरफा कु नाई आसती।⁹ थोडौ जेई सौजेडौ सारौ मूछौ औन्दी पिठौ ओसारा सा।¹⁰ हाऊं प्रभु माथै तुमारै बारै दी भरौसौ छडाऊ कि तुमारौ केजौ भी दूजौ बिचार नाई ओलौ; पर जो तुमु घबरावा सा, सेउ चाउ केजौ भी औलौ सजा पा सा।¹¹ पर ओ भाईयो, अगर हाऊं इबी झाऊं खतना रौ परचार कौराऊ, ता कैलै इबी झाऊं मूँ सतावा ई? तैबै ता क्रूसा री ठोकर डेउंदै थाकी लागी।¹² भौलौ हुआ थौ कि जो तुमु बहकाउआ ई, सै आपणौ आँग इ काटा थै¹³ ओ भाईयो तुमै आज़ाद हुणा लै ई औटाऐ औन्दै; पर इणौ ना चाई हुणौ कि ऐ आज़ादी शरीरा रै कामा लै मौकौ बौणा, मतलब कि प्यारा कौरी एकी दूजै रै गुलाम बौणौ।¹⁴ कैलै कि सारौ कानून इयै एक इ बुशा दी पूरी हुआ सा, “तू आपणै पड़ोसी आइलै आपू जिणौ प्यार छाड़।”¹⁵ पर अगर तुमै एकी दूजै लै दाँद चाकाइ और चिरीऔ खा ई ता चोकसीऐ रौ कि एकी दूजै रौ सत्यनाश ना कौरौ।

पवित्र-आत्मा कौरी चलाईणौ

16 पर हाऊं बोलाऊ आत्मा रै अनुसार चालौ ता तुमै शरीरा री लालसा केजै भी तरीकै कौरी पूरी ना कौरा लै।¹⁷ कैलैकि शरीर आत्मा रै विरोधा दी और आत्मा शरीरा रै विरोधा दी लालसा कौरा सा, और इऐ एकी दूजै रै विरोधी ई, एथीलै कि जो तुमै कौरनौ चाहा ई तेस नाई कौरी सौका।¹⁸ और

अगर तुमै आत्मा रै अनुसार चालालै ता कानूना री गुलामी दी नाई रौ।¹⁹ शरीरा रै काम ता पौगडे ई यानी कि गाँदै काम, बुरै काम, लुचपन,²⁰ मूर्तिपूजा, दूणौ, दुशमनी, झौगडौ, ईर्ष्या, रोश, विरोध, फूट, विधर्म,²¹ डाह, चाखणौ-माचणौ, लीलाक्रीडा और इऊं जिणै ओर भी काम ई एथरै बारै दी हाऊं तुमुकै पैहलै छाडाउ बोली, जिणौ पैहलै भी बोलौ औन्दै, कि इणै-इणै काम कौरनै वालै परमेश्वरा रै राज्य रै वारिस नाई औन्दै।²² पर आत्मा रै फल “प्यार, आनन्द, शान्ति, धीरज,²³ कृपा, भौलाई, विश्वास, नम्रता, और संयम ई; इणै-इणै कामा रै विरोधा ई केजौ भी कानून नाई आसतौ।²⁴ और जुण यीशु मसीह रै ई, तिउंऐ शरीर लालसा और इच्छा समेत क्रूसा माथै चोड़ाई गौरै।²⁵ अगर आमै आत्मा कौरी जिऊंदै ई, ता आत्मा कौरीऐ चालनै भी चाई।²⁶ आमै घमण्डी हुइऔ एकी-दुजै नाई चाई छेड़नै, और न एकी-दुजै कु जौलनौ चाई।

एकी दुजै री मदद कौरौ

6 ओ भाईयो, अगर कुण आदमी केजै गुनाहा दी पाकडिया लौ भी ता तुमै जो आत्मिक ई निउलै कौरिऐ तिऊं सौभालौ, और आपणी चोकसी भी छडौ ताकी तुमै परीक्षा दी ना पौडा।² एकी दूजै रौ भार चुंगौ, और इणै कौरिऐ मसीह रौ कानून पूरौ कौरौ।³ कैलैकि अगर कुण कुछ ना हुणै माथे भी आपूलै कुछ सोमझा सा ता सेउ आपूलै धोखौ दिया सा।⁴ पर हर एक आदमी आपणै-आपणै काम जौचौ-पौरखौ, और तैबै दूजै बारै दी नाई पर आपणै ई बारै दी तेसलै घमण्ड कौरनै रौ मौकौ हुआ सा।⁵ कैलैकि हर एक आदमी आपणौ बोझ उठावा सा।⁶ जो वचना री शिक्षा पा सा, सेउ सारी आच्छी चिजेऊ दी शिखाउणै वालौ शामिल कौरा।⁷ धोखौ ना खाऔ, परमेश्वरा रौ ठाडौ नाई उडाऊंदै, कैलै कि आदमी जो कुछ बौआ सा तेसी ई लौआ सा।⁸ कैलैकि जो आपणै शरीरा लै बौआ सा, सेउ शरीरा रै जौरिऐ विनाशा री फौसल लौआ सा; पर जो आत्मा लै बौआ सा, और सेउ आत्मा रै जौरिऐ जिन्दगी री फौसल लौआ सा।⁹ आमु भौलै कामा कौरना लै हिम्मत ना चाई हारनी, कैलै कि अगर आमै ढीलै ना हुइलै ता ठीक बौगता दी फौसल लौई सा।¹⁰ एथीलै जीऐ भी मौकौ मिलालौ आमु सारेउ आइलै भौलाई चाई कौरनी, खास कौरिऐ विश्वासी भाईउ आइलै

आखरी खोबरदारी और अभिवादन

11 देखौ मुंइऐ किणौ बौडे-बौडे आक्षर दी तुमुलै आपणै हाथा कौरी लिखौ आ।¹² जो लोग शरीरा लै दिखाऔ चाहा ई सेइ ई तुमारौ खतनौ कौराउणा लै दबाव पा ई सिर्फ एथलै कि सै मसीह रै कारणे दुःखी ना औआलै।¹³ कैलैकि खतना कौरनै वालै आपु ता कानूना माथे नाई चालदै, पर तुमारौ खौतनौ कौराउणौ चाहा ई ताकी तुमारै शरीरा रै हालता माथे घमण्ड कौरा।¹⁴ पर इणौ ना चाई हुआ कि हाऊं ओरी केजी बुशु रौ घमण्ड कौरु, सिर्फ आमारे यीशु मसीह रै क्रूसा रौ, जेथरै जौरिऐ दुनिया मेरी नौजरी दी और हाऊं दुनिया री नौजरी दी क्रूसा माथे चोड़ाई ऐरौ ऊ।¹⁵ कैलैकि ना खतना और ना बिण खतना वालौ कुछ आसतौ, पर नौई स्त्री।¹⁶ जेती ऐजे नियमा माथे चालालै तिऊं माथे, और परमेश्वरा रै इस्राइला माथे शान्ती और दया चाई औन्दै लागी।¹⁷ एथ बासी कोई मुलै दुःख ना दिआलौ, कैलैकि हाऊं यीशु रै दाग आपणै शरीरा दी चुंगियो हांडा ऊ।¹⁸ ओ भाईयो, आमारे प्रभु यीशु मसीहा री बौड़ी दया तुमारी आत्मा आइलै साथई रौआ। आमीन।

इफिसियों

मसीह दी आत्मा री आशीष

1 पौलुसा री तौरफा कु जो परमेश्वर री इच्छा कौरी यीशु मसीहा री प्रेरित आ, तिऊं पवित्र और मसीह यीशु दी विश्वासी लोगु रें नावां दी जो इफिसुसा दी आ। 2 आमारें बाब परमेश्वर और प्रभु यीशु मसीहा री तौरफा कु तुमुलें बोड़ी दया और शान्ती थाका ली मिलदै लागी। 3 आमारें प्रभु यीशु मसीहा री, परमेश्वर जुण बाब भी आ धन्यवाद चाई हुओ तिणीए आमुलें मसीह दी (कैलैकि आमैं मसीह आइलें मिलें) सौरगा री जागाहा दी सारें रोंगा री आत्मिक आशीष देई आ। 4 जिणों तिणीए आमैं दुनिया चाणनं कु पैहलें मसीह दी छाँटी ऐरें, कि आमैं तेसरें नजदीक प्यारा दी पवित्र और निर्दोष औलें। 5 और आपणी इच्छा रें अभिप्राय रें अनुसार आमैं आपुलें पैहलें कु चुनै, ताकि यीशु मसीह रें जौरिऐ आमैं तेसरें इणें छोहरु औलें जिणें कासरें धाचणा लें औआ ई आणें औन्दै। 6 कि तेसरी तिणें बोड़ी दया री महिमा री स्तूति चाई हुई, जो तिणीए आमुलें तेसरें प्यारें छोहरु रें जरीए मुफ्त देई। 7 आमुलें तेथ दी तेसरें लोऊ रें जौरिऐ छुटकारों, मतलब कि बुरें कामा री माफी, तेसरी तिणें बोड़ी दया री जयदादा रें अनुसार मिलौं आ 8 जेथकु तिणीए सारें ज्ञान और समझा आइलें आमु माथे जरूरता कु जादौं कियौं आ। 9 कि तीणिऐ आपणी इच्छा रें भेद मसीह रें जरीए आमुकें बोलौं जो तीणिऐ आपु दी ठाणी ऐरौं आ। 10 और परमेश्वरें इणों विचार कियौं कि ठीक बौगता दी जुण सौरगा दी आ, और जो कुछ धौतरी माथे आ, तेस सारौं कुछ मसीह दी कौठें कौरा। 11 तेथी दी जेथ दी आमैं भी परमेश्वर री मौरजी कौरी पैहला कु चुनै औन्दै रें कारण वारीस बौणें, जुण आपणी मौरजी रें चुनाव रें अनुसार सब कुछ कौरा आ। 12 कि आमु जुणीए मसीह माथे पैहला ओउलें आश छाडी आ, तेसरी महिमा री स्तूती रें कारणे हुआ। 13 तेथी दी तुमु माथे भी जेबी तुमुए सौच्चार्इ रौ वचन शूणौं आ, जो तुमारें छुटकारें रौ खुशी रौ संदेश आ, और जेथ माथे तुमुए विश्वास कियौं आ, वाइदै किये औन्दै पवित्र आत्मा री छाप लागी आ। 14 सेउ तेसरें खरिदियौं नियें औन्दै रें छुटकारें लें आमारी मीरासा रौ बयानौं आ, कि तेसरी महिमा री स्तूती हुआ।

पौलुसा री प्रार्थना

15 एजें कारणें, हाऊं भी तेस विश्वासा री खौबर शुणियौं जो जो तुमु लोगु दी प्रभु यीशु माथे आ और सारेउ पवित्र लोगु माथे परगट आ। 16 तुमुलें हाऊं धन्यवाद कौरणौं नाई छाडदौं, और आपणी प्रार्थना दी तुमु याद थाकाऊ कौरदै लागी। 17 कि आमारें प्रभु यीशु मसीह रौ परमेश्वर जो महिमा रौ बाब आ, तुमु आपणी पहचाना दी, ज्ञान और प्याशें री आत्मा दिआ। 18 और तुमारें मौनारौं आखी प्याशें वाली हुआ, कि तुमैं ज़ाणों कि तेसरें औटाउणें री किणी आश हुआ सा, और पवित्र लोगु दी तेसरी मीरासा री महिमा रौ धन किणौं आ। 19 और तेसरी ताकत आमारी तौरफा दी जो विश्वास कौराई, केती बोड़ी आ, तेसरी ताकती रें प्रभाव रें तेस कामा रें अनुसार 20 जो तीणिऐ मसीहा रें बारें दी कियौं आ, कि तेस मौरें औन्दै मांझिया कु जीउंदौं कौरियौं सौरगा री ज़ागा दी आपणी सुलटी भिलें बोशालौं आ। 21 सारें रोंगा रें राज और हक, और ताकत, और प्रभुता रें, और हर नावां माथे, जो ना सिर्फ एजें जुगा दी, पर आशणें वालें जुगा दी भी नीआ ई बोशालौं। 22 और सब कुछ तेसरें बाँगणा थाली कौरी ऐरौं आ और सेउ सारी चीजु माथे शिरोमणी चाणियौं कलिसिया कै दैओ। 23 एउ तेसरौं शरीर आ, और तेसरी परिपूर्णता सा, जो सारेउ दी सब कुछ पूरौं कौरा सा।

मौरणें कु ज़िन्दगी भियें

2 तिणीए तुमैं भी ज़िउंदै कियें, जुण आपणें बुरें काम और पापा कौरी मौरें 2 ज़ासदी तुमैं पैहलें इयें संसारा री रीती माथे, और आसमाना रें अधिकारा रें आफ़सर मौतलब सेजी आत्मा रें अनुसार चाला थै, जुण ऐबें भी हुकम नाई मानणें वालेऊ माझीं काम कौरा ई। 3 इउंदी आमैं भी सारें रें सारें पैहलें आपणी शरीरा री इच्छा दी दीन बितावा थै, और दुजें लोगु बाशी तिउरें कामा कु रोशा रें छोहरु थै। 4 पर परमेश्वरें जुण दया रौ सेठ आ, आपणें तेस बौड़ें प्यार कु जेथ कौरी तिणीए आमु आइलें प्यार कियौं, 5 जैबें आमैं बुरें कामा कौरी मौरें औन्दै थै ता आमैं मसीह यीशु आइलें ज़िउंदै किये (बोड़ी दया कौरी ई तुमुरौं छुटकारौं हुओ आ), 6 और मसीह यीशु दी तेस आइलें उठाए, और सौरगा री ज़ागह दी तेस आइलें बोशाओ 7 कि सेऊ आपणी सेजी किरपा कौरी जेजी मसीह यीशु दी आमु माथे आ, आशणें वालें बौगता दी आपणी बोड़ी दया री भौरी का जयदाद देखाला। 8 कैलैकि विश्वासा कौरी बोड़ी दया कु ई तुमुरौं छुटकारौं हुओ आ; और एउ तुमुरी तौरफा कु नाई, बल्कि परमेश्वर रौ दैयौं औन्दौं दान आ, 9 और ना कामा कौरी, इणौं ना चाई हुओ कि कृण घमण्ड कौरा। 10 कैलैकि आमैं तेसरें चाणें औन्दै ई, और मसीह यीशु दी तिऊं भौलें कामा लें चाणें जेजै तिणीए पैहलें कु आमु लें कौरणा लें ई चाणें औन्दै।

मसीह दी एक

11 इणें कौरी याद छाडौं कि तुमैं जुण शरीरा री रीती कु दुजी जाती ई (और जुण लोग शरीरा दी हाथा कौरी किये औन्दै खतनै कु खतनैवालें बोलाई, सैं तुमुलें बिण खतना रें बोला ई), 12 तुमैं सेजै बौगता दी यीशु मसीह कु अलग, और इस्राइला रें लोगु री ज़ागह कु अलग किये औन्दै और कौसमा रें वायदा रें भागी नाई थै, बिण आशा रें और धौतरी दी ईश्वर कु दूर थै। 13 पर ऐबें मसीह यीशु दी तुमैं जुण पैहलें दूर थै, मसीह रें खुना कौरी नजदीक हुई गोरें ई। 14 कैलैकि सेऊ आमुरौं मिलाउणें वालौं आ, जुणिए दुइया एक किये ई और अलग कौरणें वाली द्राल जेजी बीचाई थी ढाली गोई आ, 15 और आपणें शरीरा रें दुश्मन मौतलब सेजै नियम ज़ासरी आज्ञा नियमा री रीती माथे थी, मिटाई गोई कि दुइया कु आपु दी एक नौवाँ चाणिओ मिलावा, 16 और क़ुसा माथे दुश्मनी नाश कौरिओ एथ कौरिऐ दुइया दी एक शरीर चाणिओ परमेश्वर कु मिलावा। 17 तिणीए आशिओ तुमुलें जुण दूर थै, और जुन नजदीक थै, दुइया लें मेल-मिलापा री खुश-खौबरी शुणाई आ। 18 कैलैकि तेसी कौरी आमु दुई री एक आत्मा दी बाबा झ़ाऊं पोहुच हुआ आ। 19 एथीले तुमैं ऐबें विदेशी और बौटैणु नाई रोए, पर पवित्र लोगु रें साथी दुजें देशा रें और परमेश्वर रें टौबरा रें हुई गोरें। 20 और प्रेरितौं और भविष्यक्ताओं री पौई माथे, जेथरें कुणें रौ पात्थर यीशु आपु आ, चाणें औन्दै ई। 21 ज़ासदी सारें चाणें औन्दै कौठें मिलिओ प्रभु दी एक पवित्र परमेश्वर रौ घोर बौणा आ, 22 जेथदी तुमैं भी आत्मा कौरी परमेश्वर री रौइणें री ज़ागह हुणा लें कौठें चाणियाई।

ओरी जातिउ माझीं पौलुसा री सेवा

3 एथीले हाऊं पौलुस जुण तुमु रोंग-रोंगा री जाती लें मसीह यीशु रौ गुलाम आ— 2 अगर तुमुए परमेश्वर री तिणें बोड़ी दया रें प्रबंधा रौ प्रचार हौणौं शुणौं औन्दौं, जेजौं तुमु लें मुकें दैओ औन्दौं, 3 मतलब एउ कि सेउ भेद मुं माथे प्याशें कौरी परगट हुओ, जिणों कि पैहलें ई थोड़ौं लिखी गौ,

4 ज़ास पौढ़िओ तुमै ज़ाणी सौका ई कि हाऊं मसीह रौं भेद किये झाऊं सौमझी सौकाऊ। 5 जुण ओरी बोंगता ई आदमी री सन्ताना लै इणौं नाई बोलौं थौं, जिणौं कि आत्मा कौरी ऐबे तेसरै पवित्र प्रेरितु और भविष्यवक्ताओं माथे परगट किओ औन्दौं आ। 6 मतलब एजौं कि मसीह यीशु दी सुसमाचारा कौरी ओरी ज़ाती रै लोग मीरासा ई साझी, और एक ई शरीरा रै और कौसमा रै भागी ई। 7 हाऊं परमेशवरा री बौड़ी दया रै तेस दाना रै अनुसार, जो तेसरी शक्ति रै असरा रै अनुसार मुकै दैओ औन्दौं, तेस सुसमाचारा रौं सेवक चाण। 8 मुं माथे जुण सारै पवित्र लोगु मांझीया कु छोटै कु भी छोटै आ, एजी बौड़ी दया हुआ कि हाऊं ओरी ज़ाती लै मसीह रै केभी ना खत्म हुणै वाली धन-जायदादा रौं सुसमाचार शुणाऊं, 9 और सारेउ मांझी एजी बूश बोलु कि तेस भेदा रौं प्रबंध का सा, जुण सारेऊ रै चाणनै वालै परमेश्वरा दी पैहलै कु छुपौं औन्दौं थौं। 10 ताकि ऐबे कलिसिया कौरी, परमेश्वरा रौं अलग-अलग रौंगा रौं ज्ञान तिऊं परधान और अधिकारीऊ माथे जुण सौरगा री ज़ागह दी आ, परगट कौरिया लौ। 11 तेस पैहला ओउलै मौना रै अनुसार जेजी तिणिए आमुरै प्रभु यीशु दी की थी। 12 ज़ासदी आमु लै तेस माथे विश्वास कौरनै कु हिम्मत और भरौसै आइलै परमेश्वरा रै नौजदीक आशणै रौं हक आ। 13 एथीलै हाऊं औरज कौरा ऊ कि जेजै दुःख तुमु लै मुकै हुआ ई, सेजै कारणै हिम्मत न छाडौं, कैलैकि तिऊं दी तुमुरी महीमा आ।

मसीह रौं प्यार

14 हाऊं एजै कारणै तेस बाबा काए घुटनै टेका/ झुकाऊ, 15 जेथ कौरीए सौरग और धौतरी माथे, हर एक टोबरा रौं नाऊं छाडिया आ, 16 कैलैकि सेउ आपणी महिमा री धन-जायदादा रै अनुसार तुमुलै इणौं दान दिया कि तुमै तेसरी आत्मा कौरी आपु भितै आदमिउ दी पाके थाका औन्दै लागी; 17 और विश्वासा कौरी मसीह तुमुरै जीवा दी रौआ कि तुमै प्यारा दी जौड पाकडियौं और पौई टालिओ, 18 सारै पवित्र लोगु आइलै ठीक-ढोंगारौं सोमुझणै री शक्ति पाओ कि तेसरी चौडाई, और लम्बाई, ऊंचाई, और गहराई केती आ; 19 और मसीह रौं सेजौं प्यार ज़ाणी सौका जो ज्ञाना कु बौडौं आ कि तुमै परमेश्वरा री सारी भौरपुरी झाऊं पुरौं हुओ। 20 ऐबे जुण इणौं शक्तिशाली आ कि आमुरी औरज और सौमझा कु कई भौरी काम कौरी सौका आ, सेजी शक्ति कौरी जो आमु दी काम कौरा आ, 21 कलिसिया दी और मसीह यीशु दी तेसरी महिमा पीडी कु पीडी झाऊं जुगा जुगा झाऊं औन्दै थाकाली लागी। आमीन।

मसीह रै शरीरा ई एकता

4 एथीलै हाऊं जुण प्रभु दी गुलाम ऊ तुमु कु औरज कौरा ऊ कि जेजी हाका कौरी तुमै ओटाए थै, तिणी ई चाल चालौं, 2 मौतलब सारी दीनता और कौंअलै हुईओ, और धीरज छाडियौं प्यारा कौरी एकी-दुजै री सौओ; 3 और मिलनै रै बन्धना ई आत्मा री एकता छाडनै री कोशिश कौरौ। 4 एक ही शरीर आ और एक ही आ आत्मा; जिणै तुमै जुण ओटाए औन्दै थै आपणै ओटाए औन्दै कु एका आश आ। 5 एक ही प्रभु आ, एक ही विश्वास, और एक ही बपतिस्मा, 6 और सारेऊ रौं एक ही परमेश्वर और बाब आ, और सारेऊ माथे और सारेऊ रै बीचा ई और सारेऊ दी आ। 7 पर आमु मांझी हर एकी लै मसीह रै दाना रै नतिजै रै अनुसार बौड़ी दया मिली आ। 8 एथीलै सेउ बोला आ: “सेउ ऊंचै माथे चौडौं आ और गुलाम निरें बानियौं, और आदमी लै दैओ दान।” 9 (तेसरै चौडनै कु, और का पाई आ बल्कि एउ कि सेऊ धौतरी री थालकि ज़ागह माथे ऊतरौं भी थौं। 10 और जुण ऊतरौं आ एऊ सेऊ आ जुण सारै आकाशा माथे चौडी भी गौ कि सारौं कुछ ठीक कौरा।) 11 तिणिए कुछ प्रेरित छाँटिओ, और कुछ भविष्यवक्ता छाँटिओ और कुछ खुश-खबरी शुणाऊणै वालै छाँटिओ और कुछ रौखवाले और उपदेश देणै वालै छाँटिओ दै ई, 12 जेथ कौरी पवित्र लोग सिद्ध हुआ और सेवा रौं काम कौरिया और मसीह रौं शरीर बौडा, 13 जेबी झाऊं कि आमै सारै रै सारै विश्वास और परमेश्वरा रै छोहरु री पहचाना दी एक ना हुआलै, और एक सिध्द आदमी ना बौणिलै और मसीह रै पुरै डील-ढौला झाऊं ना बौडी लै। 14 ताकि आमै औगाऊं लै छोहरु ना रौआ लै जुण आदमी री टग-विध्या और चालाकी कौरी, तिऊं दी शका रै बिचारा रै और शिक्षा रै हर एक झौंके कु

उछाला और एशी-तेशी घुमाईया ई। 15 बल्कि प्यारा ई सौचाई कौरी आपण्डी बारै सारी बुशु दी तेथदी जुण मूंड आ, मौतलब मसीह दी बौडदे थाकौं लागी, 16 जेथ कौरी सारौं शरीर, हर एक ज़ोडा री मजदा कौरी कौडै मिलिओ और कौडै बानुईओ, तेस असरा रै अनुसार जुण हर एक अंग रै ठीक-ठीक काम कौरीयौं तेस दी हुआई, आपणै आपु ई बौडा ई कि सै प्यारा ई बौडदे थाका ली लागी।

मसीह दी नौऊंई जिन्दगी

17 एथीलै हाऊं इणौं बोलाऊ और प्रभु दी बिनती कौरा ऊ कि जिणै ओरी ज़ाती रै लोग आपणै मौना री बिण मौतलबा री रीति माथे चाला ई, ऐबे तुमै तिणी ई नाई चालौं। 18 कैलैकि तिउरी बुध्दि शेडी हुइ गोई आ, और सेजै बिण ज्ञाना रै कारण जो तिउँदी आ और तिउँरै मौना रै काठै हुणै रै कारण सै परमेश्वरा रै जीवना कु अलग ई किये औन्दै; 19 और सै शुन्न हुईओ बेकदरी दी लागी गौए आ कि सारै रौंगा रै बुरै/गान्दै काम आपणी मोरजौं कौरी कौरा। 20 पर तुमुरै मसीह री इणी शिक्षा नाई पाई। 21 बल्कि तुमुरै सौचै तेसी री शुणी और, जिणौं यीशु दी सौचवौं आ, तेसी दी शिखाए भी ई 22 कि तुमै पिछलै चालचलना रै पुराणै स्वभाव जो बहकाऊणै वाली ईच्छा रै अनुसार नाष हुआ आ, पोरु छाडौं 23 और आपणै मौना रै आत्मिक स्वभाव दी नौएँ थाकौं बोणदे लागी, 24 और नौएँ स्वभाव भिडी छाडौं जो परमेश्वरा रै अनुसार सौचाई री धार्मिकता और पवित्रता दी आ चाणौं औन्दौं। 25 एजै कारण झूठ बौलणौं छाडियौं हर एक आपणै पड़ोसी आइलै सौचौं बोलौं, कैलैकि आमै आपु मांझी एकी-दुजै रै अंग ई। 26 रोश ता गाडौं, पर पाप ना कौरौं; दीन ओइनै झाऊं तुमुरै रोश नाई चाई रौइणौं, 27 और ना शैताना लै मौकौं दैओ। 28 चोरी कौरणै वालौं दुजी बारै चोरी नाई कौरा लौ, बल्कि भौलै कामा कौरना लै आपणै हाथा कौरी मेहनत कौरा लौ, एथीलै कि ज़ासकै जरूरत हौणी तेसकै देणा लै तेसकै कुछ हौणौं चाई। 29 केजी भी गान्दी बूश तुमारै मुँआ कु नाई चाई निकली, पर जरूरता रै अनुसार सेजी बूश चाई निकली जो आगे बौडना लै आच्छी औणी, ताकि तेथ कौरी शुणनै वालेऊ माथे बौडी दया हुआली। 30 परमेश्वरा री पवित्र आत्मा शोकित नाई कौरौं, जेथ कौरी तुमु माथे छुटकारै रै दिना लै छाप आ देई औन्दी। 31 सारै रौंगा री कडवाहट, और गुस्सा, और झौगडौं, और निन्दा, सारी दुश्मनी भाव तुमु कु दूर चाई हुए। 32 एकी-दुजै माथे कृपालु और दया वाले बौणौं, और जिणै परमेश्वरै मसीह दी तुमुरै गुनाह माफ किये ई, तिणी ई तुमै भी एकी-दुजै रै गुनाह माफ कौरौं।

प्याशै रै छोहरु बौणौं

5 एथीलै प्यारै छोहरु बाशीए परमेश्वरा रौं ध्यान(जिणौं बौणौं) कौरौं, 2 और प्यारा दी चालौं जिणौं मसीहै भी तुमु आइलै प्यार कियौं आ, और आमुलै आपु सुखी मीठै बासा लै परमेश्वरा काए भेंट हुईओ बलिदान हुआ आ, 3 जिणौं पवित्र लोगु रै लायक आ, तिणौं तुमु दी बुरै काम और किणी भी रौंगा रै बुरै काम या लालचा री बुशै झाऊं ना चाई हुई; 4 और ना बेशर्मी, और ना मुखा वाली बुशु री, और ना मजाका री; कैलैकि इए बुशै नाई जौबदी, बल्कि धन्यवाद ई चाई शुणुओ। 5 कैलैकि तुमै इणौं ज़ाणाई कि केजै भी बुरै, या गान्दै आदमी, या लालची आदमी लै, जो मुति पुजा रै बराबर ई, मसीह और परमेश्वरा रै राज़ा ई कोई जगाह नाई। 6 कोई तुमु लै बिण मतलबा री बुशु कौरी थोखौं ना चाई दैओ, कैलैकि इणै कामा री ताई ऐ परमेश्वरा रै रोश आज्ञा ना मानणै वालै माथे भौडका आ। 7 एथीलै तुमै तिउँरै साथी नाई बौणौं। 8 कैलैकि तुमै ता पैहलै न्यारै थै पर आबै प्रभु दी प्याशै ई, एथीलै प्याशै रै छोहरु जिणै चालौं 9 (कैलैकि प्याशै रौं फौल भौलाई, धार्मिकता और सौचाई आ), 10 इणौं पोरखौं कि प्रभु के आच्छौं का लागी। 11 न्यारै रै काम ई ज़ासरै कोई फौल नाई साथी नाई बौणौं, बल्कि तिऊं प्याशै दी पौगडे कौरौं। 12 कैलैकि तिउँरै छुपै औन्दै कामा री बातचीत भी शौरमा री बूश आ। 13 सै सारै काम, जो प्याशै कौरी परगट हुआई, दिशाई, जुण सारौं कुछ परगट कौरा आ सेऊ प्याशौं आ। 14 एजै कारण सेऊ बोला आ, “ओ सुतणैवालेउओ, ऊठौं मोरै औन्दै मांझीया कु जिउंदै हुओ; ता मसीह रौं प्याशौं तुमु दी ज़ौमका आ।” 15 एथीलै ध्याना कौरी देखौं, कि किणी चाल

चालाई: मुखर्जा जिणें नाई बल्कि बुद्धिमाना जिणें चालौ। 16 बोग्त कीमती सौमझौ, कैलैकि दीन बुरै ई। 17 एजै कारणें मुखर्जा नाई बौणौ, पर ध्याना कौरी सौमझौ कि प्रभु री ईच्छा का सा। 18 दाखरसा कौरी मतवालै नाई बौणौ, कैलैकि एथ कौरी बुरी कादर हुआ आ। पर आत्मा कु भौरिन्दै थाकौ लागी, 19 और आपु माझीए भजन और स्तुति गाओ और आत्मा रै गीत थाकौ गाईदें लागी, और आपणै-आपणै मौना ई प्रभु कारे गाईदें और भौक्ती कौरदें थाकौ लागी। 20 और सौदा हर बुशा लै आमारे प्रभु मसीह रै नांवा दी परमेश्वर बाबा रौ धन्यवाद थाकौ कौरदें लागी। 21 मसीह यीशु रै डौरा कौरी एकी-दुजै रै अधीन रौओ।

पति और पत्नि

22 ओ छेउडिओ, आपणै-आपणै बोउटै रै इणें अधीन रौओ जिणें प्रभु रै रौआई। 23 कैलैकि बोउटौ छेउडी रौ मूंड आ जिणौ कि मसीह कलिसिया रौ मूंड आ और आपु ई शरीरा रौ उद्धार कौरा आ। 24 पर जिणी कलिसिया मसीह रै अधीन आ, तिणी ई छेउडी भी आपणै-आपणै बोउटै रै अधीन चाई रौई। 25 ओ बोउटेउओ, आपणी-आपणी छेउडी आइलै प्यार कौरौ जिणौ मसीह कलिसिया आइलै प्यार कौरिओ आपणी जिन्दगी कलिसिया लै देई एरी आ 26 ताकि तिंए आपणें वचना कौरौ पाणी दी धोइओ पवित्र चाणा, 27 और तिंए एक ईणी मजबूत कलिसिया चाणियो आपु कारे खौडी कौरा, जासदी न कलंक, न गुडी, और न केजी ईणी चिजै हुआ बल्की पवित्र और बिण आरोपा वाली हुआ। 28 ईणी ई कौरौ ठीक आ कि बोउटै आपणी-आपणी छेउडी कु आपणें शरीरा जिणौ प्यार कौरालौ। जुण आपणी छेउडी कु प्यार कौरा आ, सेऊ आपु कु प्यार कौरा आ। 29 कैलैकि कोई भी केभी भी आपणें शरीरा आइलै दुश्मनी नाई छाडी बल्कि तेसरौ पालन-पोषण ई किओ, जिणौ मसीह भी कलिसिया आइलै कौरा आ। 30 एथीलै कि आमै तेसरै शरीरा रै टुकडै ई। 31 “एजै कारणें आदमी आपणें माँ-बाब छाडिओ आपणी छेउडी कु मिली थाका, और सै दुइया एक शरीर हुआई।” 32 एऊ भेद ता बौडौ आ, पर हाऊं इदें और कलिसिया रै बारै ई बोलाऊ। 33 पर तुमु मांझी हर एक आपणी छेउडी आइलै आपु जिणौ प्यार कौरा, और छेउडी भी आपणें बोउटै रौ डौर माना।

माँ-बाब और छोहरु

6 ओ छोहरुओ, प्रभु दी आपणें माँ-बाबा रै आज्ञाकारी बौणौ, कैलैकि एउ ठीक आ। 2 “आपणें माँ-बाबा रौ आदर कौर (इरे पैहली आज्ञा आ जास आइलै वायदौ भी आ) 3 ताकि तैरौ भौलौ हुआलौ, और तु धौतरी माथे भौरी दीना दी जिउंदौ रौआ।” 4 ओ लोलडेऊ वालेउओ, आपणें छोहरु लै रोश ना दिलाओ, पर प्रभु री शिक्षा और चेतावनी देईओ तिउं धाचौ।

मालिक और नुकुर

5 ओ नुकुरुओ, जुण आदमी एजै संसारा ई तुमुरै मालिक ई, आपणें मौना री सीधाई कौरौ डौरिओ और काम्बिओ, जिणी मसीह री तिणी ई तिउंरी भी

आज्ञा शुणौ। 6 आदमी खुश कौरणें वालेउ बाशीए देखाउणा लै सेवा ना कौरौ, पर मसीह रै नुकुरु बाशीए मौना कौरौ परमेश्वर री ईच्छा माथे चालौ, 7 और तिंए सेवा आदमीउ री नाई बल्कि प्रभु री मानिओ सौचवै मौना कौरौ कौरौ। 8 कैलैकि तुमै ज्ञाणाई कि जुण भी जिणौ आच्छौ काम कौरालौ, चाउ नुकुर हौणौ चाउ आज्ञाद, प्रभु दी तिणी पाआ लौ। 9 ओ सेदुओ, मालिकुओ, तुमै भी धौमकी दैणी छाडिओ तिउं आइलै तिणौ ई बर्ताव कौरौ; कैलैकि तुमै ज्ञाणाई कि तिउंरौ और तुमारौ मालिक (बाब) सौरगा दी आ, और सेऊ कासी रौ पक्ष नाई कौरदौ।

आत्मा री लौड़ाई रै हथियार

10 एथीलै प्रभु दी और तेसरी शक्ति रै प्रभाव दी मजबूत बौणौ। 11 परमेश्वर रै सारै हथियार बानौ ताकि तुमै शैताना री युक्ति रौ सामनौ कौरौ सौका। 12 कैलैकि आमारी एजी लौड़ाई लोहु और मासा री नाई पर परधाना कु, और अधिकारी कु, और एजै संसारा रै न्यारै रै हाकिमा कु, और सेजी बुरी आत्मा री फौजा कु आ और जुण सौरगा दी आ। 13 एथीलै परमेश्वर रै सारै हथियार बानौ छाडौ ताकि तुमै बुरे दिनाई सामनौ कौरौ बौला, और सारौ कुछ पुरौ कौरिओ टेकी बौला। 14 एथीलै सौच्चाई कौरौ आपणी कौमर कौशिओ, और धार्मिकता रौ चोगौ भिडिओ, 15 और बांगणें दी मेल-मिलापा रै खुश-खबरी री तैयारी रै बूट भीडिओ, 16 और ईउं सारेउ आइलै विश्वासा री ढाल नीईओ तैयार थाकौ जेथ कौरौ तुमै तेस दुष्टा रै सारै जौलदें बाण इशाई बौला। 17 और छुटकारे री टोपी, और आत्मा री तलवार, जो परमेश्वर रौ वचन आ, नीई छाडौ। 18 हर बौगता दी और हर रौंगा कौरौ आत्मा दी प्राथना, और औरज थाकौ कौरदें लागी, और एथीलै उजी थाकौ ताकि सारै पवित्र लोगु लै सौदा प्राथना थाका कौरदें लागी, 19 और मुलै भी कि मुकै बोलदी बारै इणौ मजबूत वचन चाई देउओ कि हाऊं हिम्मता कौरौ खुश-खबरी रौ भेद बोली सौकु, 20 जेथलै हाऊं शांगली कौरौ बानौ औन्दौ राजदूत ऊ; और इणौ भी कि हाऊं तेसरै बारै दी जिणौ मुकै चाई हिम्मता कौरौ बोलु।

आखरी अभिवादन

21 तुखिकुस, जुण प्यारौ भाई और प्रभु दी विश्वासा रै लायक सेवादार आ, तुमुकै सारी बुशै बोला ताकि तुमै भी मेरी हालत ज्ञाणा लै कि हाऊं किणौ रौआऊ। 22 सेउ मूइरें तुमू कारे एथीलै भेजौ ताकि तुमै मेरी हालत ज्ञाणा, और तुमुरै मौना लै आराम दिआ। 23 परमेश्वर बाब और प्रभु यीशु री तौरफा कु भाईऊ लै आराम और विश्वास वालौ प्यार मिला। 24 जुण आमारे प्रभु यीशु आइलै सच्चौ प्यार कौरा ई, तिउं माथे बौडी दया औन्दै थाका ली लागी।

फिलिप्पियों

1 मसीह यीशु रौ सेवक पौलुस और तीमुथियुसा री तौरफा कु, सारै पवित्र लोगु रै नावां दी जो मसीह यीशु दी विश्वास कौरणै वालै फिलिप्पीऊ दी रौआ ई, अध्यक्षों और सेवकों समेत। 2 आमारै बाब परमेश्वर और प्रभु यीशु मसीह री तौरफा कु तुमुलै बौड़ी दया और शांती मिलदी रौआ।

पौलुसा री प्रार्थना और धन्यवाद

3 हाऊं जेबी-जेबी तुमु याद कौराऊ, तैबे आपणै परमेश्वरा रौ धन्यावाद कौराऊ; तेबी-तेबी आपणै परमेश्वरा रौ धन्यावाद कौराऊ। 4 और जेबी केबी तुमु सौबीलै औरज कौराऊ; ता सौदा खुशी आइलै औरज कौराऊ। 5 एथीलै कि तुमै पैहलै दिना कु आजा झाऊं खुशी रौ संदेश फैलाउणे दी मुं आइलै रौए ई। 6 मुंकै इऊं बुशु रौ विश्वास आ कि जुणीए तुमु मांझिऐ आच्छौ काम कियो सा, सेऊई तेस यीशु मसीह रै दिना झाऊं पुरौ कौरा। 7 एऊ ठीक आ कि हाऊं तुमु सौबीलै इणी ई बिचार कौरु, कैलैकि तुमै मरै जीवा दी बोसी ऐरे ई, और मरै जेला दी और खुशी रौ संदेशालै जवाब और प्रमाण देणै दी तुमै सौबी मुं आइलै शांती दी साथई 8 ऐथ दी परमेश्वर मरै गवाह आ कि हाऊं यीशु जिणौ प्यार कौरौओ तुमु सौबी री लालसा कौराऊ। 9 हाऊं इणी प्रार्थना कौराऊ कि तुमारौ प्यारा रौ ज्ञान और सारै रौंगा री हिम्मत कौरौ ओजौ भी बौड़दैं थाकौ लागी, 10 इदरा झाऊं कि तुमै आच्छे कु आच्छी बुशै प्यारी जाणौ, और मसीहा रै दिना झाऊं सौच्चै बौणी रौओ, और तेस नाई खाओ; 11 और तेस धोर्मै रै कामा रै फला कु जो यीशु मसीह रै जरियै हुआ सा, बौड़दैं रौओ जासकु परमेश्वरा री महिमा और स्तुति औन्दै रौआ।

पौलुसा री केदी कु आच्छी खोबरा रौ विकास

12 ओ भाईउओ, हाऊं चाह ऊ कि तुमै इणौ जाणौ कि मुं माथे जो बितौ सा, तेसकु खुशी रै संदेशा री उन्नती हुई आ। 13 इदरा झाऊं कि कैसरा रै मेहला री सारी फौज और बौचै औन्दै सारै लोगु दी इणौ परगट हुई गौ कि हाऊं मसीह काले कैदा दी ऊ; 14 और प्रभु दी जो भाई आ, तिऊ मांझिउ कु भौरी जौणै मरै जेला दी हुणा रै कारण, विश्वास बानियो परमेश्वरा रौ वचन बिणा डौरियो शुणाउंगा लै ओजौ भी हिम्मत कौरा आ। 15 कुछ ता डाह और लड़ाई रै कारण मसीहा रौ परचार कौराई और कुछ आच्छी इच्छा कु। 16 कोई एक ता इणौ जाणाई कि हाऊं खुशी रौ संदेशा लै जवाब देणा लै चाणौ औन्दै आ, प्यारा कौरौ परचार कौरा सा। 17 और कई एक ता सौचाई कु नाई पर बिरोधा कु मसीह री काआणी शुणाउवाई, इणौ सुचीओ कि मरै जेला दी मुं काले दुःख पैदौ कौरा। 18 ता का हुआ? सिरफ इणौ कि सौबी रौंगा कु, चाए बहाना कु चाए सौच्चै कु, मसीहा री काआणी शुणावा ई, और हाऊं ऐथकु भौरी खुश ऊ और भौरी खुश रौऊ भी।

जिऊंदौ रौइणौ मसीह आ

19 कैलैकि हाऊं जाणाऊ कि तुमारै औरजा रै जरियै, और यीशु मसीह री आत्मा रै दाना रै जरियै, एथरौ इनाम मरौ छुटकारौ हुआ आ। 20 हाऊं ता भौरी औरज और आश छाडाऊ कि हाऊं केजी बुशु दी बेइज्जत ना ओऊ, पर जिणै मरै शक्ती रै हिम्मत रै कारण मसीह री बौड़ाई मरै शरीरा रै जरियै सौदा औन्दै रौई आ, तीणी ई आबे भी हुआ, चाए हाऊं जीऊंदौ रौऊ या मौरु लौ। 21 कैलैकि मरौ जीऊंदौ रौइणौ मसीह आ, और मौरणौ लाभ आ। 22 पर अगर शरीरा दी जीऊंदौ रौइणौ ई मरै कामा लै ठीक आ ता हाऊं नाई

जाणदौ कि कास छांटु। 23 कैलैकि हाऊं दुई रै बिचा दी लौटकौ औन्दौ ऊ; जीऊ ता चाह ई कि डेइयौ मसीह काए रौऊ, कैलैकि एऊ भौरी आच्छौ आ, 24 पर शरीरा दी रौइणौ तुमारै कारण ओजौ भी जरुरी आ। 25 एथीलै कि मरौ एथरौ भरौसौ आ तैबे हाऊं जाणाऊ कि हाऊं जीऊंदौ रौऊ, पर तुमु सौबी आइलै रौऊ जेथकु तुमै विश्वासा दी मजबूत औन्दै रौओ और तेथा दी खुश रौओ; 26 और जो घमण्ड तुमै मरै बारै दी कौरा ई। सेऊ मरै तौइंए तुमु काए आशणै कु मसीह यीशु दी भौरी बौड़दैं रौओ। 27 सिरफ एती कौरौ कि तुमारौ चाल-चलन मसीह रै खुशी रै संदेशा जिणौ हुआ कि चाए हाऊं आशियो तुमु देखू चाए नाई भी आशू, तुमारै बारै दी हाऊं इणौ शुणु कि तुमै एक ई आत्मा दी बौणी रौओ, और कौठै हुइयौ खुशी रै संदेशा रै विश्वासा लै मेहनत कौरदैं रौआ ई, 28 और केजी भी बुशु दी बिरोधीऊ कु डौरदैं नाई। इणौ तिऊं काले विनाशा री साफ निशाणी आ, पर तुमु काले उद्वारा रौ और इणौ परमेश्वरा री तौरफा कु आ। 29 कैलैकि मसीह रै कारण तुमु माथे इणी बौड़ी दया हुई कि ना सिरफ तेस माथे विश्वास कौरौ पर तेस लै दुःख भी उठाओ; 30 और तुमुए तिणी ई मेहनत कौरणी आ, जिणी तुमुए हाऊं कौरदैं देखौ ऊ, और आबे भी शुणाई कि हाऊं तिणी ई कौराऊ।

मसीह रौ निउलौपन और महानता

2 तैबे अगर मसीह दी कुछ शान्ति, और प्यारा कु हिम्मत, आत्मा रौ साथ, और कुछ करुणा और दया आ, 2 ता मेरी एजी खुशी पूरी कौरौ कि एक मन छाडौ, और एक ई प्यार, एक ई विश्वास, और एक ई इच्छा छाडौ। 3 विरोध या झुठी बौड़ाई लै कुछ ना कौरौ, पर छोटौ रौइयौ एकी दुजै आपु कु आच्छे सौमझौ। 4 हर एक आपणै ही हौका री नाई, पर दुजैऊ रै हौका री भी फिकर कौरौ। 5 जिणौ मसीह यीशु रौ स्वभाव थौ तिणी ई तुमारौ भी स्वभाव हुआ; 6 जुणीए परमेश्वरा रै रुपा दी हुइयौ भी परमेश्वरा रै जिणै हौणा लै आपणै बौशा दी छाडनै री चीज नाई सौमझी। 7 पर आपु लै तिणीए कुछ भी नाई सौमझौ, और सेवका रौ रुप धारण कियो, और आदमी रै जिणौ हुई गौ। 8 और आदमी रै रुपा दी परगट हुइयौ आपु छोटौ बौणौ, 9 एजै कारण परमेश्वरै सेऊ भौरी महान भी कियो, और तेसलै सेऊ नाऊं दैओ जो सौबी कु बौड़ौ आ, 10 कि जो सौरगा दी और धौतरी माथे और धौतरी भितै आ, से सौबी यीशु रै नावां दी घुंडे टेका; 11 और परमेश्वर बाबा री महिमा लै हर एक जीभ अंगीकर कौरा ली कि यीशु मसीह ई प्रभु सा।

धौतरी दी प्यारै बाशी चौमकौ

12 एथीलै ओ मरै प्यारैऊओ, जिणै तुमै सौदा ओउलै हुकम मानीओ आशे ई, तिणी ई आबे भी ना सिरफ मुं आइलै रौइंदी बारै पर खास कौरिए आबे मरै दूर रौइयौ भी डौरियो और कांबीओ आपणै-आपणै उद्वारा रौ काम पूरौ कौरदैं रौओ। 13 कैलैकि परमेश्वर ई आ जुणिए आपणी इच्छा कौरिए तुमारै जीवा दी इच्छा और काम, दुइआ बुशै रै कौरनै रौ असर पाओ आ। 14 सौबी काम बिण कुडकुडाइओ और बिण झौगडिओ किया कौरौ, 15 ताकि तुमै निर्दोश और भौलै हुइयौ टेढे और भौरी ढीलै लोगु मांझीए परमेश्वरा रै बिणा कलंका री संतान बौणी रौओ, जास मांझीए तुमै जीवना रौ वचन निइयौ संसारा दी जौलै औन्दै दियै जिणै दिशा ई 16 कि मसीह रै दिना दी मुंकै घमण्ड कौरनै रौ कारन हुआ कि ना मरौ आंडणौ और ना मेरी मेहनत कौरणी खराब हुई। 17 अगर मुं तुमारै विश्वासा रै बलिदान और सेवा आइलै आपणौ लोऊ भी बहाउणौ पौडालौ, तैबे भी हाऊं खुश ऊ और तुमु सौबी आइलै

खुशी मौनावा ऊ। 18 तिणी ई तुमै भी खुश रौओ और मुं आइलै खुशी कौरौ।

तिमुथियुस और इपफ्रुदीतुस

19 मुकै प्रभु यीशु दी आश आ कि हाऊं तीमुथियुस तुमु कारे जल्दी ई भेजाऊ, ताकि तुमुरी हालत शुणियों मुकै शान्ति मिला। 20 कैलैकि मुं कारे इणौ ढाँगारौ कोई नाई जो साफ मौना कौरौ तुमारी फिकर कौरौ। 21 कैलैकि सौबी आपणै मतलब ई लोडाई, ना कि यीशु मसीह। 22 पर सेऊ ता तुमुए पौरखौ और जाणी भी गौ आ कि जिणौ छोहरु बाबा आइलै कौरा सा, तिणी ई तिणीए खुशी रौ संदेश फैलाऊणै दी मुं आइलै मैननत की ई। 23 एथीलै मुंके आश आ कि जिणी ई मुंके पौतौ लागा लौ कि मेरी का हालत हुआ आ, तिणी ई हाऊं तेस खरकचार भेजाऊ। 24 और मैरौ प्रभु दी भरोसो आ कि हाऊं आपू ई शीगरी आशाऊ। 25 पर मुंइरे इपफ्रुदीतुसा लै जो मैरौ भाई और मुं आइलै कामा कौरणै वालौ और मुं आइलै योद्धा और तुमरौ दूत, और जरुरी बुशे दी मेरी सेवा टहल कौरणै वालौ आ, तुमु कारे भेजणौ जरुरी सौमझौ। 26 कैलैकि तेसरौ जीऊ तुमु सौबी दी लागौ औन्दौ थौ, एजै कारण सेऊ घभरांदे रौआ थौ कैलैकि तुमुए तेसरी बिमारी री हालत शुणी थी। 27 सेऊ जरुरी ई बिमार ता हुई गौ थौ इदरा झाऊं कि मौरणै वालौ थौ, पर परमेश्वरै तेस माथे दया की, और सिरफ तेस ई माथे नाई पर मुं माथे भी कि मुंके शोका माथे शोक ना चाई हुओ। 28 एथीलै मुंइरे तेस भेजणा लै भौरी कोशीष की ई कि तुमै तेसकै मिलीयौ खुशी कौरौ और मैरौ भी शोक कम हुआ। 29 एथीलै तुमै प्रभु दी तेसकै भौरी खुशी आइलै मिलीयौ, और इणै री इज्जत कौरनी, 30 कैलैकि सेऊ ई मसीह रै कामा लै आपणै प्राणा माथे कष्टा कौरियौ मौरणै वालौ थौ, ताकि जेथरी कामी तुमुरी तौरफा कु मेरी सेवा दी हुई तेस पूरी कौरै।

सौच्यौ धौरम

3 एथिलै ओ मैरै भाईओ, प्रभु दी खुश रौओ। सेई बुशे तुमुलै घोडी-घोडिरे लिखणै दी मुंदि ता कोई कौष्ट नाई औन्दौ, और एथदी तुमारी खुशी आ, 2 कुकुरा कु बौची रौओ, तिऊं बुरे काम कौरणै वालेऊ कु बौची रौओ, तिऊं काटणै कटणा वालेऊ कु बौची रौओ। 3 कैलैकि खतनावालै ता आमै ई जो परमेश्वरा रै आत्मा री तौरफा कु बोडाई कौरौ ई, और मसीह यीशु माथे घमण्ड कौरौ ई, और शरीरा माथे भरोसो नाई छाडदौ। 4 पर हाऊं ता शरीरा माथे भी भरोसो कौरौ बोला ऊ। अगर कासी ओरी रौ शरीरा माथे भरोसो छाडनै रौ बिचार आ, ता हाऊं तेसकु भी बौडियो छाडी बोलाऊ। 5 आतुरे दिनै मैरौ खतनौ हुओ, इस्राएला रै वंश, और बिन्यामीना रै गौत्रा रौ ऊ; इब्रानिऊ रौ इब्रानी ऊ; कानूना रै बारै दी अगर बोलौ ता फरीसी ऊ। 6 खुशी रै बारै दी अगर बोलौ ता धार्मिक खुबली रौ सताउणै वालौ; और कानूना री धौरम रै कामा रै बारै दी अगर बोलौ ता निर्दोष थौ। 7 पर जो-जो बुशे मैरै लाभा री थी, सेई मुंइरे मसीह रै कारण हानि सौमझौ गो ई। 8 पर हाऊं आपणै प्रभु मसीह यीशु री पराणनै री अच्छाई रै कारन सौबी बुशे हानि सौमझा ऊ। जासरै कारण मुंइरे सौबी चीजू री हानि उठाई, और तिऊं कूडी सौमझा ऊ; जेथ कौरौ मुकै मसीह मिला। 9 और तेसी दी रौऊ; ना कि आपणै तेस धौरम रै कामा आइलै, जो कानूना कु आ, पर तेस धौरम रै कामा आइलै जो मसीह माथे विश्वास कौरनै रै कारण आ और परमेश्वरा री तौरफा कु विश्वास कौरणै माथे मिलाई; 10 ताकि हाऊं तेस और तेसरै मौउता माथे जीतणै री शौक्ती लै, और तेस आइलै दुःखा दी साथी रौइणै रै मर्म जाणू और तेसरी मौरणै री समानता पाई बोलु। 11 कि हाऊं केजी भी रीति कु मौरै औन्दै माझीऊ कु जीऊंदै हुणै री जागा झा ऊणै पौउंचु।

निशाणै भिये दौड़णौ

12 इणौ मतलब नाई आ कि मुंइरे पाई गौ आ, या सिद्ध हुई ऐरो ऊ; पर तिरै चीज पाकुडना लै फेट मारदौ थाकाऊ लागी; जेथलै मसीह यीशुए हाऊं पाकडौ थौ। 13 ओ भाईओ, मेरी इच्छा इयै नाई आ कि मुंइरे पाकडौ ऐरो आ; पर सिरफ इयै एक काम कौरा ऊ कि जो बुशे छूटी गोई तिऊं बिसरीयो, आगाऊ री बुशु री तौरफा दी बोडीओ, 14 निशाणा री तौरफा दी दौड़दौ रौऊ;

ताकि तेस इनाम निऊं जेथ लै परमेश्वरै हाऊं मसीह यीशु दी उपरै औटाओ ऊ। 15 आमू माझीए जेती सिद्ध ई, इणै बिचार छाडा, और अगर केजी बुशा दी तुमरौ ओर ई बिचार हुआँ ता परमेश्वर तेस भी तुमु माथे परगट कौराई। 16 एथीलै आमै जीदरा झाऊं पौउंचै ई, तेसी जिणै आण्डौ। 17 ओ भाईओ, तुमै सौबी मिलियौ मुं जीणी चाल चालौ, और तिऊं पराणी छाडौ जो इणै रीति माथे आण्डाई जासरौ औनेणौ तुमै आमू दी पा ई; 18 कैलैकि भौरी इणी चाल चाला ई, जेथरै बारै दी मुंइरे तुमुकै घोडी-घोडीए बोलौ आ, और आबे भी लेरी-लेरियौ बोलाऊ कि सै आपणी चाल-चलणा कु मसीह रै क्रुसा रै दुष्मन ई। 19 तिऊंरौ अन्त विनाश आ, तिऊंरौ ईश्वर पेट आ, सै आपणी गान्दी बुशु माथे घमण्ड कौराई और संसारा री चीजेऊ माथे जीऊ लाई छाडाई। 20 पर आमरौ रौउणै रौ देश सौरगा दी आ; और आमै एक छुटकारै देणै वालै प्रभु यीशु मसीह रै तिरदा कु आशणै री बाट लागै औन्दै चाणदौ। 21 सेऊ आपणी शक्ति रै तेस प्रभाव रै अनुसार जासरै जरीयै सेऊ सौबी चीजेऊ आपणै वशा दी कौरौ सौका आ, आमारी दीन-हीन शरीर रौ रूप बौदलियौ, आपणै महिमा रै शरीरा जिणौ चाणाई।

4 एथीलै ओ मैरै आच्छे भाईओ, जेथदी मैरौ जीऊ लागी रौआ सा, जो मेरी खुशी और ताज ई, ओ आच्छे भाईओ, प्रभु दी इणी कौरौ मजबूत रौओ।

आपसी मेल मिलापा रै बारै दी बोलणौ

2 हाऊं यूओदिया लै भी सौमझावा ऊ और सुन्तुखे लै भी सौमझावाऊ, कि सै प्रभु दी एक जीऊ छाडिओ बौणी रौओ। 3 ओ सौच्ये साथी, हाऊं ताऊंके भी औरज कौराऊ कि तू तिऊं छेउडी री मजद कौर, कैलैकि तिऊंरे मुं आइलै खुशी रौ संदेश फैलाऊणा दी, केमंस और मैरै दुजै गौश्टणु आइलै मैननत की ई आ, जासरै नाऊं जिवना री किताबी दी लिखौ औन्दौ आ। 4 प्रभु दी सोदा खुश रौओ; हाऊं तुमुलै तौइरे बोला ऊ, खुश रौओ। 5 तुमारी अच्छाई सौबी आदमीऊ माथे परगट हुआ। प्रभु नजदीक आ। 6 केजी भी बुशु री फिकर नाई कौरौ; पर हर एक बुशु दी तुमरै निवेदन, प्राथना और औरजा रै जरीयै धन्यावादा आइलै परमेश्वरा कारे देईया ई। 7 तैबै परमेश्वरा री शान्ति, जो सारी सौमझा कु पोरु आ, तुमुरौ जीऊ और तुमुरौ बिचार मसीह यीशु दी बौचाई छाडाई। 8 एथीलै ओ भाईओ, जो जो बुशे सौच्ये ई, और जो जो बुशे इज्जत कौरणै वाली ई, और जो जो बुशे ठीक ई, और जो जो बुशे पवित्र ई, और जो जो बुशे आच्छे ई, और जो जो बुशे जीवा दी लागी ई, मतलब जो भी सौदगुण और बोडाई री बुशे ई तिऊं माथे ध्यान लाई छाडौ। 9 जो बुशे तुमुए मुकु शीखी, और मानी, और शुणी, और मुंदि देखी ई, तिऊंरौ पालन कौरौ, तैबै परमेश्वर जो शान्ति रौ राजौ आ तुमु आइलै रौआ आ।

दाना लै प्रार्थना

10 हाऊं प्रभु दी भौरी खुश ऊ कि आबे एती दिना बासिरे तुमारी फिकर मैरै बारै दी औजौ जागृत हुई आ; जरुरी तुमुकै शुरु दी भी ऐथरौ बिचार थौ, पर तुमुकै एथरौ मौकौ नाई मिलौ। 11 इणौ नाई कि हाऊं आपणै जरुरता रै कारण इणौ बोला ऊ; कैलैकि मुंइरे इणौ शीखौ आ कि जैजै हालता दी ई; तेसी दी खुशी कौरु। 12 हाऊं छोटौ हुणौ भी जाणाऊ और भौडनौ भी जाणाऊ; हर एक बूश और सौबी हालती दी मुंइरे ढौटणौ, भुखौ रौउणौ, और बौडनौ-घोटणौ शीखौ आ। 13 जो मुंदि शक्ति दिआ सा तेसदी हाऊं सारौ कुछ कौरौ सौका ऊ। 14 तैबै भी तुमुए भोलौ किओ आ कि मैरै दुःखा दी मुं आइलै रौए ई। 15 ओ फिलिप्पिऊ, तुमै आपू भी जाणा ई कि खुशी रै संदेशा रै परचारा रै शुरु दी, जैबै हाऊं मकिदुनिया कु डैओ थौ, तैबै तुमु छाडियो और कासी खुबलीए निणै देणै रै बारै दी मेरी मजद नाई की। 16 इणै कौरौ जैबै हाऊं थिस्सलुनीके दी थौ, तैबै भी तुमुए मेरी जरुरत पूरी कौरणा लै एकी बारै का पर दुई बारै कुछ भेजौ थौ। 17 इणौ नाई कि हाऊं दाण चाहाऊ पर हाऊं इणौ फल चाहाऊ जो तुमुरै लाभा लै बौडदौ रौआ। 18 मुंके सारौ कुछ आ, पर भौरी का भी आ; जो चीजे तुमुए इपफ्रुदीतुसा रै हाथा कु भेजी थी तिऊं निंड्यौ हाऊं ढौटी गो ऊ, सेऊ ता सुखवाली खुशबु, ग्रहण कौरनै रै लायक बलिदान आ, जो परमेश्वरा के आच्छे लागी आ। 19 मैरौ परमेश्वर भी आपणै

तेस धना रैं अनुसार ज़ो महिमा समेत मसीह यीशु दी आ, तुमारी हर एक जरूरत पूरी कौरा आ।²⁰ आमाराँ परमेश्वर और बाबा री महीमा सौदा-सौदा औन्दी रौआ। आमीन।

आखरी नमस्ते

²¹ हर एक पवित्र लोगु लैं, ज़ो यीशु मसीहा दी आ ढाल कौरौ। ज़ो भाई मुं आइलैं आ, तुमुलैं ढाल कौरा ई।²² सौबी पवित्र लोग, ज़रुरी कौरैं ज़ो कैसरा रैं घौरा रैं ई, तुमु लैं ढाल कौरा ई²³ आमाराँ प्रभु यीशु री बौड़ी दया तुमारी आत्मा आइलैं रौआ।

कुलुस्सियों

अभिवादन

1 पौलुसा री तौरफा कु, जो परमेश्वरा री मौर्जी कु मसीह यीशु रौं प्रेरित आ, और भाई तीमुथियुसा री तौरफा कु, 2 मसीह दी तिऊं पवित्र और विश्वासी भाईऊ रैं नाऊं जो कुलुस्सा दी रौआ ई; आमारै बाबा परमेश्वरा री तौरफा कु तुमुलै बौड़ी दया और शान्ति मिलदी थाका लागी।

धन्यवादा री प्राथना

3 आमै तुमुलै रोज प्राथना कौरियौ आपणै प्रभु यीशु रैं बाबा मतलब परमेश्वरा रौं धन्यावाद कौरि ई। 4 कैलैकि आमुऐ शूणौ आ कि मसीह यीशु माथै तुमुरौ विश्वास आ, सौबी पवित्र लोगू कु प्यार छाडाई; 5 तिऐं आश कौरि ऐन्दी चीजै रैं कारण जो तुमुलै सौरगा दी छाडी औन्दी आ, जेथरै बारै दी तुमुऐ तेस खुशी रैं संदेशा रैं सौच्यै वचना दी शूणी ऐरौं आ, 6 जो तुमु कारे पौउंचौं आ, और जिणौं दुनिया दी भी फल आणा, और बौडदै रौआ सा; मतलब जेजै दिना कु तुमुऐ सेऊ शूणौं, और सौच्यै कु परमेश्वरा री बौड़ी दया पराणी आ, तुमु दी भी इणौं ई कौरा सा। 7 तेसी री शिक्षा तुमुऐ आमारै आच्यै गोष्टन इपफ्रसा कु पाई, जो आमुलै मसीह रौं विश्वासवालौ सेवक आ। 8 तिणिए तुमारै प्यारा लै जो आत्मा दी आ आमु माथै परगट कियौ। 9 एथीलै जेजै दिना कु इणौं शूणौं सा, आमै भी तुमु लै इणौं प्राथना कौरनी और औरज कौरनी नाई बिसुरदैं कि तुमै सारी आत्मा री औकल और सौमझियौ परमेश्वरा री इच्छा री पैहवाणा दी भोरपूर हुआ, 10 ताकि तुमारौं चाल-चलन प्रभु रैं जिणौं हुआ, और सेऊ सौबी तौरफा कु खुश हुआ, और तुमु दी सारै रौंगा रैं भौलै कामा रैं फल लागा, और परमेश्वरा री पैहवाना दी बौडदै रौआ, 11 और तेसी री महिमा री शक्ति कौरि सौबी रौंगा री सामथा कु शक्तिशाली औन्दै रौआ, इवरा झाऊं कि खुशी आइलै हर रौंगा कु शान्ति और सहन कौरणै री शक्ति देख्वाई बौली। 12 और बाबा रौं धन्यावाद कौरदैं रौआ, जुणिए आमै एस लायक चाणै कि प्यारै दी पवित्र लोगू आइलै मीरासा दी सहभागी रौआ। 13 तिणिए ई आमै न्यारै रैं वशा कु छुडाइयौ आपणै आच्यै छेहरु रैं राज्य दी नियै, 14 जेथ दी आमै छुटकारौ मतलब पापा री माफी मिला सा।

मसीह री उँचाई और तेसरै काम

15 सेऊ ता नाई दिशणैवालौ परमेश्वरा रौं जिणौं रूप और सारी दुनिया दी पैहलौ आ। 16 कैलैकि तिणिए सारी चीजै चाणी, चाए सै सौरगा री आ चाए सै धौतरी री आ, चाए सै दिशणै वाली आ चाए नाई दिशणै वाली आ, का सिंहासन, का प्रभुताए, का प्रधानताए, का अधिकार, सारी चीजै तेस रैं जरीयै और तेस कालै चाणी औन्दी आ। 17 और सेऊ सौबी चीजैऊ कु पैहलौं, और सारी चीजै तेसी दी टेकी रौआ ई। 18 और सेऊ शरीर, मतलब खुंबली रौं मूढ आ; सेऊ सौबी कु पैहलौं आ और मौरै औन्दै माझिऊ कु जीऊंदौ हुणैवालौ दी सौबी कु पैहलौं आ कि सौबी बुशै दी सेऊई प्रधान हुआ। 19 कैलैकि बाबा री खुशी ऐथी दी आ कि तेस दी सारौं कुछ वास कौरा। 20 और तेसरै क्रूसा माथै बाए औन्दै लोऊ रैं जरीयै मेल मिलाप कौरियौ, सौबी चीजैऊ रौं तेसरै जरीयै कु आपू आइलै मिलौं चाए सै धौतरी माथै री ई, चाए सै सौरगा माथै री आ। 21 और तिणिए आबै तेसरी शरीरा दी मौरणै रैं जरीयै तुमारौं भी मेल कौरि ऐरौं जो पैहलै दाबै औन्दै थै और बुरै कामा रैं कारण जीवा कु दुश्मन थै। 22 ताकि तुमै आपू कारे पवित्र और जासदी कोई कलंक नाई आ, और निर्आरोप चाणियौ आपू आपू कारे निया।

23 अगर तुमै विश्वारा री पौई माथै पाके बौणी रौआ, और तेस खुशी रैं संदेशा री आशा रौं जो तुमुऐ शूणौं आ नाई छाडौं, जासरौं प्रचार सौरगा थाली सारी धौतरी दी कियौ आ; और जासरौं हाऊं पौलुस सेवक बौणौं।

कलिसिया रौं सेवक-पौलुस

24 आबै हाऊं तिऊं दुखा रैं कारन खुशी मनाऊंवाऊं, जो तुमुलै कौराउ, और मसीहा रैं दुखा री कामी तेसरै शरीरालै, मतलब कलिसिया कालै, आपणै शरीरा दी पूरौं कौराउ। 25 जास रौं हाऊं परमेश्वरा रौं तेस प्रबन्धा रैं अनुसार सेवक बौणौं, जो तुमुलै हाऊं देयौ औन्दौं आ, ताकि परमेश्वरा रैं वचन पूरौं-पूरौं प्रचार कौरु। 26 मतलब तेस भेदा रौं जो बौगै और पोसता कु छुपी रौआ, पर आबै तेसरै तिऊं पवित्र लोगू माथै प्रकट हुआ। 27 जास माथै परमेश्वरै प्रकट कौरणौं चाओ, कि तिऊंके पौतौं हौणौं चाई कि दुजीजातिऊ दी तेस भेदा री महिमा री किमत का आ? और सेऊ ऐऊ आ, कि मसीहा जो महिमा री आशा आ तुमु दी रौआ सा। 28 जासरौं प्रचार कौरियौ आमै हर एक आदमी लै बोली आ और सारी बुदी कु हर एक आदमी शिखाई, कि आमै हर एक आदमी मसीहा दी ठीक कौरियौं मौजूद कौरि। 29 और एथीलै हाऊं तेस री तियां शक्ति रैं अनुसार जो मुंदी शक्ति कालै प्रभाव पा ई तन मन लाइयौं मैनत भी कौराऊ। ष

2 हाऊं चहाऊ कि तुमै जाणा लै, कि तुमारै और तिऊं रैं जो लौदीकिया दी आ, और तिऊं सौबी कालै जुणिए मैरौं शरीरा रौं मुंह नाई देखौं कि हाऊं किणी महनत कौरु सा। 2 ताकि तिऊं रैं जीवा दी शान्ति हुआ और सै प्यारा कौरि आपू माझिऐ कौठै रौआ, और सै पूरी सौमझी रौं सारौं धन पा लै, और परमेश्वर बाबा रैं भेदा रौं— मतलब मसीहा पराणा लै। 3 जासदी औकल और ज्ञाना रैं सौबी भण्डार छुपै औन्दै आ। 4 ऐऊ हाऊं एथीलै बोलाऊ, कि कोई आदमी तुमु लुभाउणै वाली बुशै कौरि तुमुलै धोखौं ना देयालै। 5 कैलैकि हाऊं अगर शरीरा रैं भाव कौरि तुमुकै दूर ऊ, तैबैभी आत्मा रैं भाव कौरि तुमु कारे उ, और तुमारै विधि रैं अनुसार चाल-चलन और तुमारै विश्वासा री जो मसीहा दी आ पाको देखियौं खुश रौआऊ,

मसीह दी जिन्दगी री भरपूरी

6 तैबै जिणौं तुमुऐ मसीह यीशु लै प्रभु कौरियौ मानी गौ आ, तिणी ई तेस दी हाण्डदै रौआ। 7 और तेसी दी जौड़ी पाकडियौं और बौडदै रौआ; और जिणौं तुमुलै शिखाओ औन्दौं आ तिणी ई विश्वासा दी पाके औन्दै रौआ, और भौरी धन्यावाद कौरदैं थाकौ। 8 खबरदार रौआ कि कोई तुमु तेस तत्व-ज्ञाना और बुरै धोरखा रैं जरीयै नाज ना चाई कियै, जो आदमीऊ रैं रिवाजा रैं मत और संसारा री सौबी कु पैहलै री शिक्षा रैं अनुसार आ, पर मसीहा रैं अनुसार नाई। 9 कैलैकि तेसदी ईश्वरा री सारी परिपूर्णता सदेह वास कौरा सा। 10 और तुमै तेस दी भरपूर हुई गोए ई जो सौबी प्रधानता और हौका रौं मुकुट आ। 11 तेसी दी तुमारौं इणौं खतनौं हुआ आ, जो हाथा कौरै नाई औन्दौं, मतलब महीहा रौं खतना, जेथ कौरि शरीरा रौं अंग पोरु गाडा ई। 12 और तेस आइलै बपतिस्मा दी दाबे औन्दै, और तेसी दी परमेश्वरा री शक्ति दी विश्वास कौरियौं, जुणिए सेऊ मौरै औन्दै माझिऊ कु जीऊंदौं कियौं, तेस आइलै जीऊंदै भी हुआ। 13 और तिणिए तुमै भी, जो आपणै गुनाहा, और आपणै शरीरा री बिणा खतनै री हालती दी मौरौं औन्दै थै, तेस आइलै जीऊंदै कियै, और आमारै सब गुनाह माफ कियै। 14 और विधिऊ रौं सेऊ लेख जो आमारै नावां माथै, और आमारै विरोधा दी थौं मिटाई ऐरौं; और सेऊ क्रूसा माथै परणै कु

जौड़ियों सामना कु हटाई गौ आ। 15 और तिणीए प्रधानता और हौका लै आपू माथे कु उतारियों तिऊं रौ खुल्लमखुल्लौ तमाशौ चाणौ और कूसा रै कारन तिऊं माथे जय-जयकारा री बाच शुणाई। 16 एथीलै खाणै-पिणै या साजै या नौई चान्द, या आरामा रै दिने रै बारा दी तुमारौ कोई फैंसलौ नाई कौरा लौ। 17 कैलैकि इयै सौबी आशणैवाली बुशै री छांई आ, पर मूल चीजै मसीहा री आ। 18 कैजौ आदमी दीनता और सौरगा रै दूतै री पूजा कौरियों तुमु दौडा रै फला कु दूर ना कौरा। इणौ आदमी देखी औदी बुशै दी लागी रौआ। और अपनी शरीरा री सौमझा माथे इणौ ई फूला आ। 19 और तेस मुकुटा लै पाकडी नाई छाडदौ जासकै सारौ शरीर जोडा और पड्डौ रै जरीयै देख-भाल कौरियों और एकी साथी गांठियों, परमेश्वरा री तौरफा कु बौडदौ रौआ ई।

मसीह आइलै मौरणौ और जिऊणौ

20 जैबै कि तुमै मसीहा आइलै संसारा री सौबी कु पैहलै री शिक्षा री तौरफा कु मौरै औन्दै ई, ता तैबै तिऊं रै जिणै जो संसारा रै आ जीवन बितावा ई? आदमीऊ रै हुकमा और शिक्षा रै अनुसार, 21 इणी विधिऊ रै बौशा दी कैलै रौआ ई कि 'एऊ नाई छुंइणौ', 'तेस नाई चाखियों', और 'तेसदी हाथ ना लाइयो।' 22 (कैलैकि इयै सारी चीजै कामा दी आणी आणियों नाश हुआई)। कैलैकि इयै आदमीऊ रै हुकमा और शिक्षा रै अनुसार आ। 23 इऊं विधिऊ दी आपणै इच्छा रै अनुसार दाबी औन्दी भक्ति री रीति, और दीनता, और शरीरा री योगाभ्यासा रै भाव कु ओकली रौ नांऊ ता आ, पर शरीरा री लालसा रै रोकणा दी इऊं कु कुछ भी लाभ नाई औन्दौ।

3 तैबै जैबै तुमै मसीह आइलै जीऊंदै हुए, ता सौरगा रै चीजै लोडदौ रौओ, जीयै मसीह आज आ और परमेश्वरा री सूलटी बियै बौशौ औन्दौ आ। 2 धौतरी माथे री नाई पर सौरगा री चीजै माथे ध्यान लाओ, 3 कैलैकि तुमै ता मौरौ गौए, और तुमारौ जीवन मसीह आइलै परमेश्वरा दी छिपी गौ आ। 4 जैबै मसीह जो आमारौ जीवन आ, प्रकट हुआ, तैबै तुमै भी तेस आइलै मसीह समेत प्रकट कौरा ई

पुराणी जिन्दगी और नौई जिन्दगी

5 एथीलै आपणै तिऊं अंग पौरु छांगौ, जो धौतरी माथे आ, मतलब गांदे काम, अशुद्धता, दुष्टवालै काम, बुरी लालसा, लोभा लै जो मूर्ति पूजा रै बराबर आ। 6 इऊं रै कारण परमेश्वरा रौ रोश हुकम नाई मानणै वाला माथे पौडा। 7 और तुमै भी, जैबै इऊं बुराई दी जीवन बितावा थै, ता इऊं रै कारन हांडा थै। 8 पर आबै तुमै भी इऊं सौबी रै मतलब गुस्सौ, रोष, बैरभाव, बुराई, और मुंह कु गाली भौकणौ इयै सौबी बुशै पौरु छाडौ। 9 एकी दुजै आइलै झूठ नाई बोलौ कैलैकि तुमुए पुराणौ आदमीऊ तिउरै कामा समेत उतारी गौ आ, 10 और नौवै आदमी बोणी गौए आ जो आपणै, जुणिऐ आमै चाणै तेसरै रुपा रै अनुसार बुद्धि मिलणै कालै नौवो चाणदै रौआई। 11 तिऊं दी ना ता यूनानी रौ ना यहूदी, ना खतना, ना खतनारहित, ना जांगली, ना स्कूती, ना सेवक और ना आज्ञाद : सिरफ मसीह सौबी कुछ और सौबी दी आ। 12 एथीलै परमेश्वरा रै छोटै औन्दै रै नाई जो पवित्र और आच्छौ आ, बौडी दया, और भलाई, और दीनता, और कौमलता, और सहनशीलता धारण कौरौ। 13 और अगर कासी रौ कासी माथे आरोप लाइणा रौ कोई कारण, ता एकी दुजै सैन कौरौ, और एकी दुजै रै गुनाह माफ कौरौ: जिणौ प्रभुए तुमारौ गुनाह माफ कियै आ, तिणी ई तुमै भी कौरौ। 14 और इऊं सौबी माथे प्यारा रौ जो आच्छौ रौ कटिबन्ध आ बानी छाडौ। 15 और मसीहा री शान्ति जास कालै तुमै एकी शरीरा हुइयौ औटाए औन्दै ई, तुमारै जीऊ दी राज कौरा, और तुमै धन्यावादी बोणी रौआ। 16 मसीहा रै वचन आपणै जीवा दी भौरी कु बौसणै दौओ; और आच्छौ ज्ञाना समेत एकी दुजै कु शिक्षाओ, और चिताओ, और आपणै आपणै जीवा दी बौडी दया आइलै परमेश्वरा कालै भजन और स्तुति रै गीत और आत्मा रै गीत गाओ। 17 और वचन कु या कामा कु जो कुछ भी कौरौ सौबी प्रभु यीशु रै नाऊ कु कौरौ, और तेसरै जरीयै परमेश्वर बाबा रौ धन्यावाद कौरौ

नौई जिदगी रै परिवारा रै नियम

18 ओ छेउडीऊओ, जिणौ प्रभु दी ठीक आ, तिणी ई आपणै आपणै बोउटे शुणौ। 19 ओ बोउटेउओ, आपणी आपणी छेउडी बोउटे कु प्यार छाडौ, और तिऊं कु कठोरता नाई कौरौ। 20 ओ लोलडेऊ, सौबी बुशै दी आपणै आपणै मां-बाबा रौ हुकमा रौ पालन कौरौ, कैलैकि प्रभु एथा कु खुश रौआ ई, 21 ओ लोलडेऊ वालैऊ, आपणै लोलडे तंग नाई कौरौ, इणौ नाई चाई हुआ कि तिऊंरौ चाई साहस चुटौ। 22 ओ नुकरौ, जो शरीरा रै अनुसार तुमारौ मालीक आ सौबी बुशै दी तिऊंरौ हुकम मानौ, आदमीऊ खुश कौरणै लै नाई, पर जीवा री आच्छौ और परमेश्वरा रै डौरा कु। 23 और जो कुछ तुमै कौराई, तन मौना कौरै कौरौ, इणौ जाणीयौ कि आदमीऊ लै नाई पर प्रभु कालै कौरौ ई; 24 कैलैकि तुमै जाणाई कि तुमुलै एथारै बौदला प्रभु कु मीरास: तुमै प्रभु मसीहा री सेवा कौरा ई। 25 कैलैकि जो बुरौ कौरा आ, सेऊ आपणी बुराई रौ फल पा ई; तिऊं कासी रौ आपणौ मौरौ नाई।

4 ओ स्वामिऊ, आपणै आपणै नुकरा आइलै फैंसलौ और तिऊं आइलै ठीक ठीक रौओ, इणौ सौमझिऊ कि सौरगा दी तुमारौ भी एक मालिक आ।

कुछ चाल-चालना री सलाह

2 प्राथना कौरदें थाकौ लागै, और धन्यावादा आइलै तेस दी बोणै रौओ; 3 और एथी आइलै आमूलै भी प्राथना कौरदें थाकौ लागै, कि परमेश्वर आमू कालै वचन शुणाऊणा रौ इणौ दार खोला, कि आमै मसीहा रै तेस भेदा रै बारै दी बोली सौकी जैथा रै कारन हाऊं जैला दी ऊ, 4 और तेस इणौ प्रकट कौरु, जिणौ कौरणौ मुलै ठीक आ। 5 मौका लै तुमै भौरी किमती सौमझिओ बाइरै वालैऊ आइलै बुद्धि कौरै बुशै लाओ। 6 तुमारौ वचन सौदा बौडी दया कौरै तौंइए आच्छौ चाई हौणौ, कि तुमुलै हर आदमी लै ठीक रीति कु जवाब दैणौ चाई आशणौ।

आखरी अभिवादन

7 आच्छौ भाई और विश्वास वालौ सेवक, तुखिकुस, जो प्रभु दी मुं आइलै साथी आ, मैरी सारी बुशै तुमुलै बोला ई। 8 सेऊ मुइयै एथीलै तुमु काए भेजौ आ, कि तुमुकै आमारी हालती रौ पौतौ चाई लागौ और सेऊ तुमारै जीवा लै शान्ति दिआ। 9 ओए तेस आइलै उनेसिमुसा लै भी भेजौ आ जो विश्वालौ आ और आच्छौ भाई और तुमु माझिऊ कु आ, इयै तुमुलै इदरै री सारी बुशै बोलाई। 10 अरिस्तरुस, जो मुं आइलै जैला दी आ, और मरकुस जो बरनबासा रौ भाई लागा ई (जासरै बारै दी तुमुए हुकम मानौ थौ कि अगर सेऊ तुमु काए आशा लौ, ता तेस आइलै आच्छौ तरहा रौइयौ), 11 और यीशु जासलै यूस्तुस बोलाई, तुमुलै ढाल कौराई। खतना कियै औन्दै लोगू माझिऊ कु सिरफ इयै ही परमेश्वरा रै राजा कालै मैरै साथी और मैरै शान्ति रै कारन रौए आ। 12 इपफ्रास जो तुमु माझिऊ कु आसती और मसीहा रौ सेवक आ, तुमुलै ढाल कौरा और सौदा तुमुलै प्राथना दी कौशीश कौरा आ, ताकि तुमै सिद्ध हुइयौ पूरै विश्वासा आइलै परमेश्वरा री इच्छा माथे ठीकै रौओ। 13 हाऊं तेसरौ जीऊंद मान ई, कि सेऊ तुमु कालै और लौदीकिया और हियरापुलिसवालैऊ कालै बौडी कौशीश कौरदें रौआ ई। 14 आच्छौ वैध लूका और देमासा रौ तुमुलै ढाल। 15 लौदीकिया रै भाईऊ लै और नुमफास और तिऊं रै घोरा री खुबली लै ढाल बोलियौ। 16 और जैबी इयै चिड्डी तुमुरै काई पौडिया ली, ता इणौ कौरियों कि लौदीकिया री खुबली दी भी चाई पौडी, और सै चिड्डी जो लौदीकिया कु आ आशै औन्दी तिणै तुमै भी पौडियौ। 17 तैबै अरिप्पुस कु बोलियौ कि जो सेवा प्रभु दी ताउलै सौभाली औन्दी आ, तिणै आच्छौ कौरै पूरी कौरियौ। 18 मुं पौलुसा रौ आपणै हाथा कौरै लिखी औन्दी ढाल। मैरी शांगली याद छाडियौ; तुमु माथे बौडी दया थाका औन्दै लागी। आमीन।

1 थिस्सलुनीकियों

अभिवादन

1 पौलुस और सिलवानुस और तिमुथियुसा री तौरफा कु थिस्सलुनीकियों री कलिसिया रें नावें, जो परमेश्वर बाब और प्रभु यीशु मसीहा दी ई: तुमुलें बौड़ी दया और शान्ति मिलदें थाका लागी।

थिस्सलुनीकियुस रौ विश्वास

2 आमैं आपणी प्राथना दी तुमु याद कौरी और सोदा तुमु सौबिऊ रें बारे दी परमेश्वर रौ धन्यवाद कौरी ई, 3 और आपणें परमेश्वर और बाबा रें सामने तुमारें विश्वासा रें काम, और प्यारा री मैहनत, और आमारें प्रभु यीशु मसीहा दी आशा री सबर लगातार याद कौरी सी। 4 ओ भाईयो, परमेश्वर रें प्यारें लोगुओ, आमैं जाणी ई कि तुमैं चुनै औन्दै ई 5 कैलैकि आमारी खुश-खबरी तुमु काए ना सिर्फ आक्षरु दी आ, पर ताकती और पवित्र आत्मा दी, बौड़ें आच्छै कौरिरे पहुँचौ आ; जिणौ तुमैं जाणाई कि आमैं तुमुलें तुमु मांझिरे किणें बौणी गोए थै। 6 तुमैं बौड़ी मुसीबता दी, पवित्र आत्मा री खुशी आइलै, वचन मानियौ आमारी और आमारें प्रभु री जिणी चाल चालदें लागै। 7 इदरा झाउं कि मकिदुनिया और अखया रें सारें विश्वासिउ लें तुमैं आच्छै बौणै। 8 कैलै कि तुमारें काए कु ना सिर्फ मकिदुनिया और अखया दी प्रभु री खुश-खबरी शुणाई, पर तुमारें विश्वासा दी जो परमेश्वर माथे आ, सारी ज़ागाह दी इणी बूश फैली गोई आ कि आमुकें बोलणा री ज़रूरता इ नाई आसती। 9 कैलैकि सै आपु ई आमारें बारे दी बोलाई कि तुमु काए आमारौ आशणौ किणौ हुओ; और तुमैं किणें मूर्ती पूजणें कु परमेश्वर भिलें फिरें ताकी जिउंदै और सौचचै परमेश्वर री सेवा कौरा, 10 और तेसरें छोहरू सौरगा माथे कु आशणै री बाटा पौखदें थाका लागी जुण तिणीरे मौरें औन्दै मांझिआ कु जिउंदै कियो आ, मतलब कि यीशु री जो आमूं आशणै वाली मुसीबता कु बौचावा सा।

पौलुसा रौ प्रचारा रौ काम

2 ओ भाईयो, तुमैं आपु इ जाणाई कि आमुरो तुम काए आशणौ बेकार नाई हुओ, 2 पर तुमैं आपु इ जाणाई कि पैहलै फिलिप्पी दी दुःख उठाउणें और भौलै बूरें सहन कौरणा माथे भी आमारें परमेश्वरें एती हिम्मत देई, कि आमैं परमेश्वर री खुश-खबरी भौरी विरोधा मांझिरे भी तुमकें शुणाई। 3 कैलैकि आमारौ उपदेश ना ता शौखा कौरी आ और ना बुराई कौरी आ और ना ता छल कौपटा आइलै आ; 4 पर जिणौ परमेश्वरें आमैं इणें लायक चाणीयो खुश-खबरी सांबी (संभाली) आ, आमैं तिणी इ परचार कौरी ई, एथदी आमैं आदमिउ नाई पर परमेश्वर, जो आमारौ मन पौरखा सा खुश कौरी ई। 5 कैलैकि तुमैं जाणाई आमैं ना ता केबी हेरा-फेरी वाली बुशें लाइ थै, और ना लोभ-लालचा लें बाहनौ कौरा थै, एजी बूशा रौ परमेश्वर गवाह सा; 6 पर अगर आमैं मसिह रें प्रेरित हुणें रें कारणें तुमु माथे भार पाई बौली थै, तैबे भी आमैं आदमिउ कु आदर-ईज्जत नाई चाई थै, और ना तुम कु, और ना ओरी कासी कु। 7 पर जिणें कौरी माँ आपणें लोलडेउ री देख भाल कौरा सा, तिणौ इ आमुए भी तुमु मांझिरे रौइयो प्यार देखावौ आ; 8 और तिणी इ आमैं तुमारी लालसा कौरियो ना सिर्फ परमेश्वर री खुश-खबरी माथे आपणी जान देणा लें भी तुमुलें तैयार थै, एथलें कि तुमैं आमारें भौरी प्यारें हुई गोए थै। 9 कैलै कि ओ भाईयो, तुमैं आमारी मेहनत और कौष याद छाड़ाई; आमुए एथीलै राची-दिने काम धान्दौ कौरियो तुमु मांझिरे परमेश्वर री खुश-खबरी रौ

परचार कियो आ कि तुमु मांझिरे कासी माथे भी भार ना पौड़ा। 10 तुमैं आपु इ गवाह ई, और परमेश्वर भी गवाह आ कि तुमु विश्वासिऊ मांझिरे आमारौ चाल-चालण किणौ पवित्र और धार्मिक और निर्आरोप रौ आ 11 तुमैं जाणाई कि जिणौ बाब आपणें छोहरू आइलें बरताव कौरा, तिणी ई आमैं भी तुमु मांझिरे हर एकी लें उपदेश दिया थै, और शान्ति दिया थै, और सौमझाई थै 12 ताकि तुमारौ चाल-चालन परमेश्वर रें लायक हुआ, जुण तुमु आपणें राजा दी और महिमा दी औटावा सा। 13 एथीलै आमैं भी परमेश्वर रौ धन्यवाद सोदा कौरी कि जेबे आमु रें जौरिरे परमेश्वर री खुश-खबरी रौ वचन तुमु काए पहुँचा, तुमु ए सेऊ आदमीउ रौ नाई बल्कि परमेश्वर रौ वचन सौमझीओ (और सौचै ऐऊ इणी इ सा) मानौ आ; और सेऊ तुमु विश्वासिउ लें जुण विश्वास छाड़ा ई, ताकतिवालौ (प्रभावशील) सा। 14 एथीलै तुमैं, ओ भाईयो, परमेश्वर री तिऊं कलीसियाउ री जीणी चाल-चालदें लागौ जुण यहुदिया दी मसीह यीशु दी आ, कैलैकि तुमु ए भी आपणें लोगु कु तिणौ दुःख पाओ जिणौ तिउंरे यहुदिया दी पाओ थौ, 15 जुणिरे प्रभु यीशु और भविष्यवक्ता भी झांगें और आमैं भी सौताए, और परमेश्वर तिऊं कु खुश नाई, और सै सारें आदमी रौ विरोध कौरा ई, 16 और सै ओरी जाति कु तिउंरें छुटकारें लें बुशें लाइणें कु आमु रोका ई कि सोदा आपणें पापा रौ घौड़ो भौरदें थाका लागी; पर तिऊं माथे परमेश्वर रौ डौराउंदौ रोष आशी गौ आ।

कलिसिया कु मिलनै रौ जिऊ

17 ओ भाईयो, जेबे आमैं थोड़ें बौगता लें, मौना इ नाई बल्कि परगटा दी, तुमु कु अलग हुइ गोए थै, ता आमुए बौड़ी आशा कौरी तुमु रौ मुँह देखणा लें और भी भौरी कोशीश की। 18 एथीलै आमुए (मुँई पौलुस) एकी बारें नाइ बल्कि दुई बारें तुमु काए आशणौ चाहौ, पर शैतानें हाऊं रोकि छाडौ। 19 भौलै इ आमुरी आशा या आन्नद या बौड़ाई रौ मुकुट का सा? का आमुरें प्रभु यीशु रें सामनै तेसरें आशणा रें बौगता दी तुमैं नाई औन्दै? 20 आमुरी बौड़ाई और आन्नद तुमैं ऐ ई।

तिमुथियुस भेजणौ

3 एथीलै जेबे आमुकें रौउओ इ नाई ता आमुए इणौ सुंचौ कि एथेन्सा दी एखुली इ रौऊलै; 2 और आमुए तिमुथियुस, जो मसीहा री खुश-खबरी दी आमारी भाई और परमेश्वर रौ सेवक आ, एथीलै भेजौ कि तुमु एकी ज़ागें टेकावा और तुमारें विश्वासा रें बारे दी तुमु सौमझावा, 3 कि कोई भी इऊं सताव रें कारणें डगमगाए ना चाई। कैलै कि तुमैं आपु इ जाणाई कि आमैं इऊंलें इ छोटै औन्दै। 4 कैलैकि पैहलै इ, जेबी आमैं तुमारें काए थै ता तुमु लें बोला थै कि आमु कलेश (मुसीबत) जा इ उठाउणें, और इणौ इ हुओ, जिणौ कि तुमैं जाणा भी ई। 5 एजै कारणें जेबे मुकें तौइरें भी रौउओ इ नाई, ता तुमारें विश्वासा रें हाल जाणना लें भेजौ, कि किरें इणौ ना चाई हुओ कि परीक्षा कौरणें वालेउए तुमारी परीक्षा कौरी औली, और आमारी मैहनत बेकार हुआ।

तिमुथियुसा रें जरिरे खुशी रौ संदेश मिलणौ

6 पर इबी तिमुथियुस जे तुमारें काए कु आमु काए आशौ आ, तुमारें विश्वासा री और प्यारा री खुश-खबर शुणाई और एजी बूश भी शुणाई कि तुमैं सदा प्यारा आइलै आमु याद कौराई, और आमु देखणा री आश छाड़ाई, जिणौ कि आमैं भी तुमु देखणा री आश छाड़ी ई। 7 और एथीलै ओ भाईयो,

आमुए आपणें सारें दुःख और कलेशा दी तुमारें विश्वासा कु तुमारें बारें दी शान्ती पाई आ।⁸ कैलें कि ऐबे अगर तुमें प्रभु दी टेकी रौआ लें ता आमैं जीऊंदें इ।⁹ और जीणी खुशी आमुकें तुमुकु आपणें परमेश्वर रें सामनैं आ, तेथरें बौदलें आमैं तुमारें बारें दी किणी रीती कौरी परमेश्वर रौ धन्यवाद कौरु लें? ¹⁰ आमैं राची-दिनें तुमुलें भौरी इ प्राथना कौरी ई कि तुमारौ मूँ देखी और तुमारें विश्वासा री कामी पूरी कौरी। ¹¹ आमारें परमेश्वर और बाब आपु इ और आमारौ प्रभु यीशु तुमारें कारे आशणें दी आमारी मजद और अगुवाई कौरा। ¹² और प्रभु इणौ कौरा कि जिणौ आमैं तुमु आइलें प्यार कौरी सी, और तिणौ इ तुमारौ प्यार भी आपु मांझिरे और सारेउ आदमिउ आइलें बौड़ा, और तरक्की कौरुदे थाका लागी, ¹³ ताकि सेउ तुमारौ मन इणौ टेकावा कि जेबी आमारौ प्रभु यीशु आपणें सारें पवित्र लोगू आइलें आशा और सैं आमारें परमेश्वर और बाबा रें सामनैं पवित्रता दी निर्आरोप ठहरा।

जिन्दगी सैं जो परमेश्वर कें ढौबा

4 एथीलें ओ भाईयो, आमैं तुमु कु औरज कौरी ई, और तुमु प्रभु यीशु दी सौमझाई ई जिणौ तुमुए आमु कु ठीक चाल चालणी और परमेश्वर खुश कौरणौ शिखौ आ, और जिणौ तुमें चाला भी ई, और तिणौ इ तौई भी बौड़दे थाकौ लागी। ² कैलें कि तुमें ज़ाणाई कि आमुए प्रभु यीशु री तौरफा कु तुमुलें केजी-केजी आजा पहुंचाई आ। ³ कैलेंकि परमेश्वर री इच्छा एजी आ कि तुमें पवित्र बौणो: यानी कि गांदे कामा कु बौची थाको, ⁴ और तुमु मांझिया कु हर एक पवित्रता और इज्जता आइलें आपणी बोटटी आणनी ज़ाणा, ⁵ और एजौ काम (आभिलाषा) इच्छा आइलें नाई, और ना तिऊं ज़ातिउ जिणें, जो परमेश्वर नाई ज़ाणदें, ⁶ कि एजी बूशा दी कोई भी आपणौ भाई ना ठौगा लौ, और ना तेस माथे चाल-चाला लौ, कैलें कि प्रभु इउं बूशु रौ पौलटौ नीणें वालौ आ; जिणौ कि आमुए पैहलें भी बोलौ और चितलाओ भी आ। ⁷ कैलें कि परमेश्वर आमैं अशुद्ध हुणालें नाई पर पवित्र हुणा लें इ औटाए औन्दें। ⁸ एजें कारणें जो एजी बूश बेकार ज़ाणा इ सैं परमेश्वर बेकार ज़ाणाई, जो आपणौ पवित्र आत्मा तुमु लें दिया सा। ⁹ पर भाई चारें रें प्यार रें बारें दी इणौ जरूरी नाई कि हाऊं तुमुलें कुछ लिखू, कैलें कि आपु मांझी प्यार छाड़णौ तुमुए आपु इ परमेश्वर कु शिखौ आ; ¹⁰ और सारें मकिदुनिया रें सब भाईउ आइलें इणौ भी चाई हुओ। पर ओ भाईयो आमैं तुमु सौमझाई आ कि औजौ भी बौड़दे थाकौ लागी। ¹¹ और जीणी आमुए तुमुलें आजा देई आ ईणी इ चुटुक चार रौइणें और अपणौ-आपणौ काम काज कौरणें और आपणें-आपणें हाथा कौरी कौमाउणें री कोशीश कौरौ; ¹² ताकी बाइरा वालेउ कु आदर इज्जत पा लें, और तुमु लें केजी भी चीजा री कामी ना हुआ।

यीशु रौ दूजे बारें आशणौ

¹³ ओ भाईयो, आमैं नाई चाहादें कि तुमें तिउरें बारें दी ज़ाणियाँ सुती थाकौ, और बिण औकलीए रौ; इणौ ना चाई हुओ कि तुमें दुजेऊ बाशिरे शोक कौरौ ज़ासकें आश इ नाई। ¹⁴ कैलें कि अगर आमैं विश्वास कौरी सी कि यीशु मौरौ भी और जिउंदौ भी हुओ, और तिणौ ई परमेश्वर तिऊं भी जुण यीशु दी सुती गोए तिऊं आइलें आणा सा। ¹⁵ कैलें कि आमैं प्रभु रें वचना रें अनुसार तुमकें इणौ बोली ई कि जो आमैं जिउंदे ई और प्रभु रें आशणें झाऊं बौची रौई आ, सूतें औन्दें कु केभी भी औगाउं नाई बौड़दें। ¹⁶ कैलेंकि प्रभु आपु ई सौरगा कु उतरा; सैंजें बौगें हाक, और परधान दूता रौ शब्द शुणीओ, और परमेश्वर री तुरही फुकरिया, और जुण मसीह दी मौरें ई, सैं पैहलें जिउंदें हुआई। ¹⁷ तेबी जेजें आमैं जिउंदें ई और बौची थाकी ई तिऊं आइलें बादला

माथे उठाईयाई ताकी बागुरा दी प्रभु कु मिला लें; और एजी रीति कौरी आमैं सौदा प्रभु आइलें रौआई। ¹⁸ एथीलें ईऊं बुशु कौरी एकी-दुजें लें शान्ति दैओ।

दूजे बारें आशणें रें दिना लें तैयार रौइणौ

5 पर ओ भाईयो, एथरौ इन्तजाम नाई, कि बौग और काला रें बारें दी तुमलें कुछ लिखुलें। ² कैलेंकि तुमें आपु ई ठीक ज़ाणाई कि जिणौ राची चोर आशा सा, तिणौ इ प्रभु रौ दिन आशणें वालौ आ। ³ जेबी लोग बोलदें औलें लागें औन्दें कि आमैं ठीक ई, और कुछ भी डौर नाई आसतौ, ता तिऊं माथे एकी ई घोड़ी विनाश आशा सा, जीणी गौरकी छेउड़ी दी बेदण, और सैं केजी भी रीती कौरी बौचाई। ⁴ पर ओ भाईयो, तुमें न्यारें दी नाई आसतें, कि सेउ दीन तुमु माथे चोरा बाशी आशा लौ। ⁵ कैलें कि तुमें प्याशें री सन्तान, और दुसा री सन्तान ई, आमैं ना राची रें और ना न्यारें रें ई। ⁶ एथीलें आमैं ओरी बाशीए सुतुलें नाई, पर ज़ाणदें और खबरदार रौएऊ। ⁷ कैलेंकि जुण सुता ई, सैं राची ई सुता ई, और जुण शराब पीणें वालें हुआई, सैं राची ही माचा ई। ⁸ पर आमैं ता दिना रें ई, विश्वास और प्यारा रौ चोगौ भिड़ियाँ और छटकारें रौ टोपौ भिड़ियाँ खौबरदार रौओ। ⁹ कैलेंकि परमेश्वर आमैं रोशा लें नाई, बल्कि एथलें छाड़े औन्दें कि आमैं आपणें प्रभु यीशु मसीह कु उध्दार पाई लें। ¹⁰ सेऊ आमु लें एथी लें मौरौ, कि आमैं चाऊ ज़ागी लें, चाऊ सुतें औन्दें ओणें: सारें मिलियाँ तेसी आइलें जिऊलें। ¹¹ एजें कारणें एकी दूजे लें शान्ती दैओ, और एकी दूजे री तरक्की रौ कारण बौणौ, पर पर आच्छौ आ कि तुमें इणौ भी कौरुदे थाका ई लागी।

कलिसिया लें उपदेश

¹² और ओ भाईयो, आमैं तुमु कु औरज कौरी ई, कि जेजे तुमु मांझीए मैहनत कौरा ई, और प्रभु दी तुमारें अगुवें ई, और तुमुलें शिक्षा दिआ ई, तिऊं मानौ। ¹³ और तिउरें कामा रें कारण प्यारा आइलें तिऊं भौरी इज्जता रें लायक सोमझौ: आपु मांझीए मेल-मिलापा ई रौओ। ¹⁴ और ओ भाईयो, आमैं तुमु सौमझाई ई, कि जुण ठीक चाल नाई चालदें, तिऊं सौमझाओ, कायरु लें हिम्मत दैओ, कमजोर सौमझालौ, सारेउ री तौरफा कु सौहिणें री चाल देखाओ। ¹⁵ खौबरदार! कोई भी कास आइलें बुराई रें बौदलें बुराई ना कौरा लौ, पर हमेशा भौलाई कौरना लें त्यार रौआ, और सौभी कु भौलाई री कोशिश कौरौ। ¹⁶ सौदा... खुश रौओ। ¹⁷ रोज प्राथना दी थाकौ लागी। ¹⁸ सारी बुशु दी धन्यवाद कौरौ: कैलें कि तुमु लें मसीह यीशु दी परमेश्वर री एजी ई इच्छा सा। ¹⁹ आत्मा इशणें नाई दैओ। ²⁰ भविष्यवाणी तुमें बेकार ना ज़ाणौ ²¹ सारी बुशें पौरखौ: जो बूश आच्छी आ तिणें पाकड़ी छाड़ौ ²² सारी रौंगा री बुराई कु बौची थाकौ।

आशीर्वाद

²³ शान्ती रौ परमेश्वर आपु ई तुमु पूरी रीती कौरौ पवित्र कौरा; और प्राण और शरीर आमारें प्रभु यीशु मसीहा रें आशणें झाऊं पूरें-पूरें और निर्आरोप और सौंभाली छाड़ा। ²⁴ तुमु औटाउणें वालौ सौचौ आ, और सेउ तिणौ ई कौरा सा। ²⁵ ओ भाईयो, आमुलें प्राथना कौरौ। ²⁶ सब भाईउ लें पवित्र खोबू कौरौ ढाल कौरौ। ²⁷ हाऊं तुमु लें परमेश्वर री शौपतें दिआऊ, कि इयें चिड़ी सारें भाईउ कें पौढियाँ शुणाएऊ। ²⁸ आमारें प्रभु यीशु मसीह री बौड़ी दया तुमु माथे औन्दें थाका लौ लागी।

2 थिस्सलुनीकियों

अभिवादन

1 पौलुस और सिलवानुस और तिमुथियुसा री तरफा कु थिस्सलुनीकियों री कलीसिया रै नावा दी, जो परमेश्वर बाब और प्रभु यीशु मसीहा दी ई 2 आमारै बाब परमेश्वर और प्रभु यीशु मसीहा री तरफा कु तुमुलै बौड़ी दया और शान्ती मिलदै थाका लागी। 3 ओ भाईयो तुमारै बारै दी आमु हर बौगै परमेश्वरा रौ धन्यवाद चाई कौरनौ, और इणौ कौरनौ ठीक भी आ, एथीलै कि तुमारौ विश्वास भौरी आ लागौ औन्दौ बौडदैं, और तुमु सारेऊ रौ प्यार भी आपु मांझी भौरी आ लागौ औन्दौ बौडदैं। 4 इदरा झाऊं कि आमैं आपु इ परमेश्वरा री कलीसिया दी तुमारै बारै दी घमण्ड कौरी ई कि जेती जोखीम और मुसीबत तुमै सहन कौराई, तिऊं सौभी दी तुमारौ सबर और विश्वास परगट हुआ सा। 5 परमेश्वरा रै सौचै फैसलै रौ साफ सबूत आ कि तुमै परमेश्वरा रै राजा रै लायक बौणा, जेथरी ताइए तुमै दुःख भी उठावाई। 6 कैलैकि परमेश्वरा रै सामनै एजौ फैसलो आ कि जो तुमुलै दुःख दिआई, तिउंलै बौदलै दी दुःख दिआ 7 और तुमै, जो दुःख पा ई, आमु आइलै चैन दिआ; तेस बौगै जैबै कि प्रभु यीशु आपणै शक्तीशाली दुतु आइलै, धधकती ऐन्दी आगी आइलै सौरगा कु परगट हुआ सा, 8 और जो परमेश्वर नाई जाणदैं-प्राणदैं और आमारै प्रभु यीशु मसीह री खुश-खबरी नाई मानदौ तिऊंकु बौदलौ नीआं सा। 9 और सै प्रभु रै सामनै कु और तेसरी ताकती रै तेजा कु दूर हुइयो सदा लै विनाशा रौ डांड पा ई। 10 एउ सेजै दिनै हुणौ सा, जेबी सेऊ आपणै पवित्र लोगु दी महिमा पाइदैं और सारै विश्वास कौरणै वालेऊ दी हैरानी रौ मतलब हुणा लै आशा लौ; कैलै कि तुमुए आमारी गवाही माथै विश्वास कियो सा। 11 एथीलै आमैं सौदा तुमुलै प्राथना भी कौरी ई कि आमारौ परमेश्वर तुमु इयै बुलाहटा रै लायक सौमझा, और भौलाई हर एक इच्छा और विश्वासा रै हर एक काम ताकती आइलै पूरौ कौरा, 12 ताकी आमारै परमेश्वर और प्रभु यीशु मसीहा री बौड़ी दया रै अनुसार आमारै यीशु मसीहा रौ नाऊं तुमु दी महिमा पा, तुमैं तेस दी महिमा पा।

पापा रौ पुरुष यानी कै विनाशा रौ छोहरू

2 ओ भाईयो, ऐबै आमैं आपणै प्रभु यीशु रै आशणै, और तेस कारे आपणै कौठै हुणै रै बारै दी तुमु लै औरज कौरी आ 2 कि केजी भी आत्मा, या वचन, या चिड्डी रै जौरिरे, जो कि मानो आमारी तरफा कु औली, इणौ सौमझियो कि प्रभु यीशु मसीह रौ दीन आशी गौ आ, तुमारौ मन एकदम बौदलौओ ना चाई और ना तुमै घबराणै चाई। 3 केजी भी रीती कौरी कासी रै धोखे दी ना आशणौ, कैलै कि सेजौ दिन नाई आशदौ जेभी झाऊं धौर्मा रै कामा कु मुँह ना मोडा लै, और सेउ पापा रौ आदमी यानी कि विनाशा रौ छोहरू परगट ना हुआ लौ। 4 जो विरोध कौरा लौ, और हर एकी कु जासलै प्रभु और ईज्जती वालौ बोलाई, और जो आपु लै बौडौ बौणा सा, इदरा झाऊं कि सेऊ परमेश्वरा रै घोरु दी बोशियो आपुलै प्रभु बौणा सा। 5 का तुमुकै याद नाई आ कि जेबी हाऊं तुमारै कारे थौ, ता तुमु आइलै इणी बुशु थाका थौ लाईदै लागी? 6 तुमैं तिरे वीज जाणाई, जो तेस इभी रोकदै लागी औन्दी कि सै आपणै इ बौगता दी परगट हुआ। 7 कैलै कि बुरै कामा रौ भेद इभी भी काम कौरदै लागौ औन्दौ, पर इभी एक रोकणै वालौ आ, और जेबी झाऊं सेउ दूर ना हुआ लौ तेबी झाऊं सेउ रोकदै थाका लागी। 8 तैबै सेउ बुरै कामा कौरणै वालौ परगट हुआ, जास प्रभु यीशु आपणै मुआं कौरी फूकरियो पोरु झांगा और आपणै आशणै वालै तेजा कौरिरे तेसरौ छार चाणा। 9 तेस

बुरै कामा कौरणै वालै रौ आशणौ शैताना रै कामा रै अनुसार सारै रौंगा री झूठी ताकत, और चमत्कार और हैरानी वालै कामा आइलै, 10 और नाश हुणै वालेउ लै बुरै कामा रै सारै रौंगा रै धोखे आइलै हुआ सा; कैलै कि तिणीए सौचचाई आइलै प्यार नाई कियो जेथ कौरी तिऊरौ उद्वार हुआ थौ। 11 एजै कारणे परमेश्वर तिऊंदी एक झौटके दैणै वाली ताकत भेजा सा कि सै झूठा री प्रतीती कौरा, 12 जेती लोग सौचचाई री प्रतीती नाई कौरदै, यानी कि जो लोग बुरै काम कौरी खुश हुआई सै सारै जुर्मा रै हकदार हुआ।

पाके बौणी रौएउ

13 ओ भाईयो, प्रभु रै प्यारै लोगुओ, चाई कि आमैं तुमारै बारै दी परमेश्वरा रौ धन्यवाद कौरदै थाकी लागी, कैलैकि परमेश्वर तुमैं पैहला ओउलै चुनी ऐरे कि आत्मा रै जौरिरे पवित्र बौणियो, और सौचचाई री प्रतीती कौरियो छुटकारौ पाओ, 14 जेथलै तिणीए तुमैं आमारी खुशखबरी रै जौरिरे औटाए, कि तुमैं आमारै प्रभु यीशु मसीह री महिमा पा लै। 15 एथीलै ओ भाईयो, टेकी और मजबूत रौओ; जो जो बुशै तुमुए चाऊ वचना रै जौरिरे या चिड्डी रै जौरिरे आमु कु शिखी ई, तिऊं बुशै तुमैं आपणै जीवा दी थाम्बी छाडौ। 16 आमारौ प्रभु यीशु मसीह आपु ई, और आमारौ बाब परमेश्वर, जुणीए आमु आइलै प्यार छाडौ आ और बौड़ी दया कौरी सौदा री शान्ति और आच्छी आश देई आ, 17 तुमारै मौना दी शान्ती दिआ और तुमु सारै आच्छै कामा दी और वचना दी मजबूत कौरा।

प्राथना कौरनै रौ अनुरोध

3 आखरी दी ओ भाईयो, आमुले प्राथना कौरदै थाकौ लागी कि प्रभु रौ वचन इणौ शीघ्री सारै दी फैला और महिमा पा, जिणौ तुमु दी हुओ आ, 2 और आमैं बुरै और कपटी आदमिऊ कु बौची थाकी कैलै कि हर एकी दी विश्वास नाई आसतौ। 3 पर प्रभु सौचचौ आ; सेऊ तुमु मजबूती कौरी टेकावा सा और तेस बुरै आदमी कु सारौ बौचाई छाडा सा। 4 आमुकै प्रभु दी तुमु माथै भरोसौ आ कि जो-जो आज्ञा आमैं तुमुलै देई ई, तिऊं तुमैं मानाई, और मानदैं भी थाकाई लागी। 5 परमेश्वरा रै प्यार और मसीहा रै सबरा री भिलै प्रभु तुमारै मौना री अगुवाई कौरा।

कामा कौरनै रौ हक

6 ओ भाईयो, आमैं तुमुलै आपणै प्रभु यीशु मसीह रै नावां कौरी आज्ञा देई ई कि तुमैं हर एक इणै भाई कु अलग रौओ जुण बुरी चाल-चाला सा और जो शिक्षा तिणीए आमुकु शिखी आ तेथरै अनुसार नाई कौरदौ। 7 कैलैकि तुमैं आपु इ जाणाई कि किणी रीती कौरी आमु जिणी चाल-चालणी चाई, कैलै कि आमैं तुमु मांझिरे बुरी चाल नाई चाली, 8 और कासी री भी रोटी मूफती ऐ नाई खाई; पर मेहनती और कौछा कौरी राच-दीन धान्धौ कौरा थै कि तुमु कासी भी माथै भार ना पौडा। 9 इणौ नाई कि आमुकै हक नाई, पर एथीलै कि आमैं आपु तुमुलै एक आच्छौ आदमी बौणी कि तुमैं आमु जिणी चाल चाला। 10 कैलै कि जेबी आमैं तुमारै कारे थै, तेबी भी इणी आज्ञा तुमुलै देई थै कि अगर कुण काम कौरणौ नाई चाहा लै ता सेऊ रोटी भी ना खा लौ। 11 आमैं शुणी ई कि कुछ लोग तुमु मांझिरे बुरी चाल चालाई, और कुछ काम नाई कौरदै, पर दूजा रै कामा दी हाथ पा ई। 12 इणै लोगु लै आमैं प्रभु यीशु दी आज्ञा देई और सौमझाई ई कि चुटकचार कामा कौरियो आपनी इ रोटी खा कौरालै 13 तुमैं ओ भाईयो, भौलाई कौरनै दी हिम्मत ना छाडौ। 14 अगर कुण

आमारी इऐं चिट्ठी री बूश नाई माना लौ, तेस माथे नज़र छाडौ, और तेस आइलै नाई आण्डौ, ताकी तेसरी बेईज़्जती हुआ ¹⁵ तैबै भी तेस दुश्मण नाई सौमझौ, पर भाई ज़ाणियों खबरदार कौरौ।

आखरी नमस्ते

¹⁶ प्रभु ज़ो शान्ती रो सोतौ आ आपु इ तुमुलै सौदा सारै रोंगा री शान्ती दिआ। प्रभू तुमु सौबी आइलै साथा दी रोआ। ¹⁷ हाऊं पौलुस, आपणै हाथा

कौरी तुमु सौबी लै ढाल लिखाऊ। सारी चिट्ठी दी मैरौ एऊ इ निशाण आ; हाऊं इणै कौरिऐ लिखाऊ। ¹⁸ आमारे प्रभु यीशु मसीहा री बौड़ी दया तुमु सौभी माथे औन्दै थाका लागी।

1 तीमुथियुस

अभिवादन

1 पौलुसा री तौरफा कु जुण आमारे उद्धारकर्ता परमेश्वर और आमुरी आशा माथे मसीह यीशु री आ कु मसिह यीशु रौ प्रेरित ए आ, 2 तीमुथियुसा रै नावाइं, जुण विश्वासा ई मैरौ सौचौ माउं आ: बाब परमेश्वर और आमुरे प्रभु यीशु मसीह री तौरफा कु तुमुलै बौडी दया, और दया और शान्ति मिलदै थाका ली लागी ।

गलत शिक्षा देणै वालै रै बारै दी खबरदार कौरणै

3 जिणौ मुईए मकिदुनिया लै डेउंटी बारै तु सौमझाओ थो, कि इफिसुसा ई रौईओ कुछ लोमुलै आ दै कि ओरी रौंगा री शिक्शा नाई दै, 4 और सेजी कहाणी और केभी ना खात्म हुणै वाली वंशावली माथे मन ना लाइयौ, जेथ कौरी झौगडे हुआई, और परमेश्वारा रै तेस प्रबन्धा माथे नाई आ, जुण विश्वासा माथे आ। तीणी तौई भी हाऊं बोलाउ । 5 आज्ञा रौ (सारांश) मतलब एऊ आ कि साफ मन आच्छौ विवेक और कौपटवालों विश्वासा कु प्यार प्रगट हौआलौ । 6 ईउं छाडियौ केति लोग बकवादी री तौरफी ए भौटकी गौए आ, 7 और कनून चाणनै वालै ता हुणौ चाई पर जेजी बुशै बोलाई और जेजी काटै कौरिओ बोलाई, तिउं सौमुझदै भी नाई । 8 पर आमै जाणी आ कि अगर कुण कानून ठीक रीती कौरी कामा दी आणाई ता ए भौली बूश ए आ। 9 इणौ जाणियो कि कानून धोमी आदमीऊ लै नाई पर अधमी आदमी निरकुश, जो भौक्ती नाई कौरदै पापिउ अपवित्र और अशुद्ध आदमिऊ, मॉ- बाबा घात कौरनै वालै खूनी, 10 गाँदै काम पुरुष गामियो आदमीऊ बेचणै वालेऊ, झूठ बोलणै वालेऊ, और झूठी कौसम खाणै वालेऊ, और ईउं कु छाडियौ खौरै उपदेशा रै बिरेधिऊ लै आ चाणी ऐन्दी। 11 एऊ इ बौडौ धन्य वादी परमेश्वर आ री महिमा री तीए खुश खबरी रै अनुसार जो मुकै साँबौ औन्दी आ।

अनुग्रहा लै धन्यवाद

12 हाऊं आणे प्रभु मसीह यीशु रौ, जुणिए मुलै ताकत देई आ, धन्य वाद कौराऊ कि तिणिए हाऊं विश्वास वालौ सौमझियो आपणी सेवा कौरना लै ठहराओ आ। 13 हाऊं ता पैहलै (निन्दा) बेईज्जती कौरनै वालौ, और सताउणे वालौ, और अन्धेर कौरणे वालौ थो; तैबै भी मूं माथे दया हुई, कैलै कि मूरं बीण विश्वासा री हालती दी बिणा जाणी बूझियो ए काम किये थै। 14 और आमारे प्रभु यीशु रौ बौडी दया तेस विश्वास और प्यारा आइलै जो मसीह यीशु दी आ, बौडी चौडीओ हौओ। 15 ए बूश सौचूची* और सारी तौरफा कु मानणै रै लायक आ कि मसीह यीशु पापिउ लै मुक्ती देन्दै दुनिया दी आशौ ज़ास मांझिया कु हाऊं सौबी कु बौडौ आ। 16 पर मूं माथे ऐथलै दया हुई कि मूं सौबी कु बौडै पापी दी यीशु मसीह आपणी सारी सहन शीलता देखाला, कि जो लोग तेस माथे सौदा री जिन्दगी लै विश्वास कौरालै, तिउंलै हाऊं एक आच्छौ आदमी बौण। 17 एबै सनातन राजौ (सौदा रौ राजौ) अणदेखै, सिर्फ एक परमेश्वर री आदर और महिमा जुगै जुगै चाई औन्दै लागी। आमीन। 18 ओ मैरौ छोहरु तीमुथियुस, तिउं भविष्यवाणीउ रै अनुसार जो पैहलै तैरै बरै दी हुई सा और की आ, हाऊं ताउंकै एजी आज्ञा दिआऊ यु तिउंरै अनुसार आच्छौ काम थाकै कौरदै लगी, 19 और विश्वास और तेस आच्छौ विवेक छाडै थामी, ज़ास दूर कौरनै रै कारणे काइऊ रौ विश्वास रूपी जहाज डूबी गो आ। 20 तिउं मांझिया कु हमिनयूस और

सिकन्दर आ, जो मुइयें शैताना कै देई ऐरे ई कि सै सै परमेश्वरा री निन्दा कौरनी ना शिखा।

आराधना रै बारै दी बोलणौ

2 एबै हाऊं सौबी कु पैहलै एजी बूश बोलाऊ कि, विनती और प्रार्थना, और निवेदन, धन्यवाद सारेउ आदमी लै कौरणी चाई। 2 राजेऊ और बौडी नुकुई वालेउ लै निमित एथीलै कि आमै आरामा रौ दिन, और चैना कौरिए सारी भौक्ति और गहराई कौरी बिताई। 3 एऊ आमारे उद्धारकर्ता परमेश्वरा कै आच्छौ लाग़ा सा और ढौबा भी आ। 4 जो इणौ चहा कि आदमिउ री मुक्ति हुआ, और सै सौचूचाई आच्छा कौरिए प्राणी सौका 5 कैलै कि परमेश्वर एक इ आ, और परमेश्वर और आदमी रै बीचा दी एक ई बौकील आ यानी कि यीशु मसीह जो आदमी आ। 6 जुणिए आपणी जिन्दगी आमुरे छुटकारा लै किमती लै देई ऐसी आ, और तेथारी गवाई ठीक बौगा माथे देई सा। 7 हाऊं सौचूचौ बोलाऊ, और झूठ नाई बोलदौ कि हाऊं एजे इ मतलबा लै प्रचार कौरणै वालौ और प्रेरित और दूजी जातिउ लै विश्वास और सौचाई लै उपदेश देणै वालौ ठहराओ आ।* 8 एथीलै हाऊं चहा ऊ कि हर जागै पुरुष बिण रोशै, और बिण विवादै आपणै पवित्र हाथ उठाइयो प्रार्थना थाकौ कौरदै लागी 9 इणी इ छेवडी भी बिण संकोच और संयमा आइलै और आच्छौ झुडकेऊ भीडियो खूब चाई दिशणी, इणौ नाई कि मुँडा बेलियो और सुनै चादी रै जेवरात लाइयो और किमती जुडकेऊ भीडियो,* 10 पर भौलै कामा कौरिए, कैलै कि परमेश्वरा री भौक्ती कौरणै वाली छेउडी लै इणौ इ ठीक भी आ। 11 छेउडिउ चुटुक चार पूरी अधीनता आइलै शिखणौ चाई। 12 हाऊं बोलऊ कि छेवडी उपदेश ना कौराली और ना मॉदू लै आज्ञा दिआ, पर चुटुक चार थाका ली। 13 कैलै कि परमेश्वर पैहलै चाणौ आदम और बासिए चाणी हव्वा। 14 और आदम शैताना रै बोलै नाई बहकाउओ, पर हव्वा बहकणा कौरी बूरी बौणी। 15 तैभै भी लोलडै पैदै कौरणा रै जौरिए उद्धार पा इ, अगर सै संयमा, विश्वास और प्यारा आइलै टेकी रौआ ली

कलिसिया दी परधान (बिशप)

3 ए बूश सौची आ कि जो मुखियो हुणौ चहा लौ सेउ भौलै कामा री इच्छा कौरा सा। 2 इणौ जरूरी आ कि मुखियो निर्आरोप और एक इ छेवडी रौ बोउटौ, संयम छाडनै वालौ, सुशील, सभ्य, पाउणे री इज्जत कौरणै वालौ और शिखउणा लै होशियार चाई हुणौ। 3 सूरी पिणै वालौ या पिटिणै वालौ बिल्कुल नाई चाई हुणौ, सेउ ता कौअलौ चाई, ना सेउ झौगडै कौरणै वालौ हुणौ चाई, और ना धन ज़यदादा रौ लोभी चाई हुणौ। 4 आपणै घौरा रौ आच्छौ सौम्भाल कौरणै वालौ हुणौ चाई और जो आपणै छोटी छोहरु री आच्छा कौरिए अधीन छाडा लौ। 5 जैबै कुण आपणै घौरा री देख भाल कौरणी नाई जाणा लौ ता सेऊ कलिसिया री देखभाल और चोकसी किणै कौरिए कौरा सा? 6 तैबै इणौ कि नौवौ चेलौ ना चाई हुओ, इणौ ना चाई हुओ कि सेउ घमण्ड कौरियो शैताना जिणी सज़ा पा। 7 बाइरै नाली देशा दी भी तेसरौ नाऊं चाई हुणौ, इणौ ना चाई हुओ कि बेइज्जत हुइयो शैताना रै जाला दी फौसा।*

कलिसिया दी सेवक

8 इणौ इ कलिसिया रौ सेवक भी गहरौ (गम्भीर) हुणौ चाई, दुई जीवा रौ, सूरी पिणै वालौ और बेकर नीच कौमाई रौ लोभी ना चाई हुणौ। 9 पर विश्वासा

रैं भेदा रौ शुद्ध विवेक बौचाई छाड़ा। 10 और इउं भी पैहलै पौरखेऊ जैबै सौचूचै साबित हुआ लै तैबै सैं सेवका रौ काम कौरा। 11 इणै कौरिए छेवडीउ भी गहरी हुणी चाई; आरोप लाइणै वाली नाई चाई हुणी, पर तेज (सचेत) और सारी बुशैऊ दी विश्वास वली चाई हुणी। 12 सेवक* एक इ छेवडी रौ बोउटौ चाई हुणौ, और छोटी छोहरू और आपणै घौरा री आच्छी देखभाल कौरणी जाणा लौ। 13 कैलै कि जो सेवका रौ काम आच्छा कौरिए कौरि सौका सा, सेउ आपुलै आच्छौ काम लोड़ा और तेस विश्वासा दी जो मसीह यीशु माथे आ, सैं बौड़ी हिम्मत पाई सौका ई।

बौड़ी बूश (रहस्य)

14 हाऊं ताऊं काए शीघ्री आशणा री आश छाड़ियौ भी इयै बुशै ताऊंलै एथलै लिखाउ, 15 कि अगर मुकै आशणा लै बेर हुआ ली, ता ताए इणौ जाणनौ कि परमेश्वरा रैं घरानै दी जो जीउंदै परमेश्वरा री कलिसिया सा और जो सचूचाई रौ खाम्भौ और पौई आ, किणौ बर्ताव कौरनौ चाई। 16 एथादी कोई शक नाई कि भौक्ती रौ भेद गहरौ आ, यानी कि, सेउ जो शरीरा दी परगट हुआ आत्मा दी धौर्मौ ठहरौ और सौरगा रैं दुतु कै दिशौ दुजी ज़ातीउ मांझीए तेसरौ परचार हुआ दुनिया दी तेस माथे विश्वास कियौ, और महिमा दी उपरै उठाओ।

झूठै शिखाउणै वालै

4 पर आत्मा आच्छा कौरिए बोला सा कि आशणै वालै बौगता दी केती लोग भरमाउणै वाली आत्मा और बुरी आत्मा री शिक्षा माथे मन लाइयौ विश्वासा कु पोरु बैहका ई 2 एउ तिऊं झूठै आदमिउ रैं कौपटा रैं कारणे हुआ सा, ज़ासरौ विवेक* मानो तोपै औन्दै लोहै कौरि दागौ औन्दौ आ। 3 जो शदी कौरनै कु रोकई और खाणै री कुछ चीजेऊ कु दूर छाड़ना लै आज्ञा दिआई, जो परमेश्वरै एथलै चाणै कि विश्वासी और सौचूचाई प्राणने वालै तिऊं धन्यवादा आइलै खा। 4 कैलै कि परमेश्वरा रैं चणी औन्दी हर एक चीज आच्छी आ, और कोई भी चीज अस्वीकार कौरनै रैं लायक नाई आसती; पर इणौ कि धन्यवादा आइलै खा लै, 5 कैलै कि परमेश्वरा रैं वचन और प्रार्थना रैं जौरिए शुद्ध हुआ सा।

मसीह यीशु रौ आच्छौ सेवक

6 अगर तु भाईउ लै इउं बुशु री सुधी थाका लौ देन्दै लागी, ता तू मसीह रौ आच्छौ सेवक ठहरालौ: और विश्वास और आच्छे उपदेशा री बुशु कु, जो तू मानदैं मानदैं आशौ आ, इणै कौरि तू धाचिदैं पालिदैं थाका लौ लागी। 7 पर अशुद्ध और बूढीऊ री कहाणिउ कु अलग रौऊ और भौक्ती री साधना कर। 8 कैलै कि शरीरा री साधना कु कम फाइदौ हुआ सा, पर भौक्ती सारी बुशैउ लै फाइदैं वाली आ, कैलै कि एजै बौगता री और आशणै वाली जिन्दगी रौ भी वाइदौ एथीलै ऐ आ। 9 ऐ बूश सौची और सारै तरीकै कौरि मानणै रैं लायक ऐ आ। 10 कैलै कि आमै मेहनत और कोशिश एथीलै कौरि आ कि आमारी आश तेस जिउंदै परमेश्वरा माथे आ, जो सारै आदमिउ रौ और आपणै सारै विश्वासिउ रौ मुक्ति दाता सा। 11 इउं बुशु री आज्ञा दै और शिखाउंदै थाक लागी। 12 कोई भी तेरी जवानी बेकार ना सौमझा लौ; पर वचन, और चाल चालण, और प्यार, और विश्वास, और पवित्रता दी विश्वासिउ लै आदर्श बौण। 13 जेबी झाउं हाऊं ना आशु लौ, तेबौ झाउं पौढनै दी और उपदेश देन्दै और शिखाउंदै मौगन रौऊ। 14 तेस वरदान जो ताऊंके आ, और भविश्य वाणी रैं जौरिए प्राचीना* रैं हाथा दी छाड़दी बारी ताऊं कै मिलौ थौ, बेफिक्र नाई रौऊ। 15 इउं बुशु सुंचदैं थाक लागी और इऊं दी आपणौ ध्यान लाई छाड़, ताकी तेरी तरक्की सारेउ माथे परगट हुआ 16 आपणी और आपणै उपदेशा री चोकसी छाड़। इउं बुशु माथे टेकी रौऊ, कैलै कि अगर इणौ कौरदैं थाका लौ लागी ता तू आपणै और आपणै शुणनै वालेउ लै भी मुक्ती रौ कारण हुआ लौ।

विश्वासिउ री जिमेवारी

5 कास बुढौ ना डॉट पर तेस बाब ज़ाणियौ समझाऊ, और जवान आदमिउ भाई ज़ाणियौ समझाऊ; 2 बूढी छेवडिउ आमा ज़ाणियौ,

और जवान छेवडिउ पूरी पवित्रता आइलै बौइण ज़ाणियौ समझाऊ। 3 तिऊं विधवा छेवडी, जौ सौचूची विधवा सा, तिऊंरी इज्जत कर। 4 अगर कास विधवा रैं कोई कौनालडु आ, त सैं आपणै घरानै आइलै भौक्ती रौ बर्ताव कौरा ली, आपणै माँ बाप अगर तौएँ कुण तिऊंरौ हक देणौ शिखा, कैलै कि इणौ परमेश्वरा कै आच्छौ लाग़ा सा। 5 अगर सौचूची कुण विधवा सा, और तीआंरौ कोइयौ नाई आसतौ, और परमेश्वरा माथे आश छाड़ा सा, सैं राची दिनै विनती और प्रार्थना दी मौगन रौआ सा; 6 जो भोग विलासा दी पौड़ी गोई आ, सैं जिउंदी इ मौरी गोई आ। 7 इउं बुशु री भी आज्ञा देन्दै थाक लागी कि ताकी सैं निर्आरोप रौआ। 8 पर अगर कुण आपणेउ री और आपणै कौरियौ आपडै घरानै री फिकर ना कौरालौ, ता सेउ विश्वासा कु मुकरी गो आ और अविश्वासी कु भौ बूरौ बौणी गो आ। 9 और तुमे तिऐँ विधवा रौ नाउं लिखियौ ज़ासरी उमर साठ साला कु कामती ना हुआ और जो एक ही बोउटै री बोउटी औली रौई औन्दी। 10 और आपणै इलाकै दी भौलै कामा दी तिआंरौ नाउं औलौ, और जुणी आपणै छोटी छोहरू धाचै पालै औलै, और पौची पाउणै री सेवा की औली, पवित्र लोगु रैं बंगणै धोएँ औलै, दूखी आदमिउ री सेवा की औली, औ हर एक भौलै कामा दी मन लाओ औलौ। 11 पर जवान विधवाउ रैं नाउं ना लिखियौ, कैलै जैबै सैं मसीहा रौ विरोध कौरियौ सुख विलासा दी पौड़ी ऐरा ई ता शदी कौरणी चहा ई, 12 और आरोपी ठहरा ई, कैलै कि तिउंएँ आपणौ पैहलौ विश्वास छाड़ी ऐरौ आ 13 और एथारै साथ़ा साथ़ा दी सैं घौरा घौरा दी रीटियौ आलसी हुणौ शिखा ई, और सिर्फ़ आलसी इ नाई पर बक बक कौरदैं थाका इ लागी और दुजै रैं कामा दी हाथ पा ई और बेढोंगी बुशै बोला ई। 14 एथी लै हाऊं इणौ चहा उ कि जवान विधवा शदी कौरा, और तीआंरै लोलडै हुआ और सैं घौर बार सौभाला और कासी भी विरोधिउ लै बदनाम कौरणै रौ मोकौ ना दिआ। 15 कैलै कि काई एक विधवा ता बहकियौ शैताना पिछु हुई गोई आ। 16 अगर कास विश्वासिउ रैं काए कुण, सैं ही तीआंरी मजत कौरा कि कलिसिआ माथे भार ना हुआ, ताकी सैं तिऊंरी मजत कौरा जो सौची इ विधवा सा। 17 जो पुराणै (प्रचीण) आच्छौ प्रबन्ध कौराई, खास कौरिए वचन शुणाउणा लै और शिखाउणा लै मेहनत कौराई ता सैं दुणौ इज्जती रैं लायक चाई समझुणै। 18 कैलै कि पवित्र शास्त्र बोला सा, “जोचै औन्दै बौलदा रौ मूँ ना चाई बानणौ,” कैलै कि “मजदूर आपणी मजदूरी रौ हकदार आ।”* 19 अगर कुण स्याणैउ रैं बिरोधा दी कुण बुशै ला लौ ता दुई चीन गवाइउ रैं बिणा तिऊं बुशै सौचूची ना मानेउ।* 20 जो पाप कौरा सा तेस सारेउ रैं सामनै समझाऊ, ताकी लोग भी डौरा। 21 परमेश्वर, और मसीह यीशु और चुनै औन्दै सौरगा रैं दूतु सामनै ज़ाणियौ, हाऊं ताऊं खबरदार कौराऊ कि जिवा खोलियौ इउं सारी बुशु मानै, और केजौ भी काम कासी पक्षा दी ना कौरै। 22 कासी माथे शिघ्री हाथ ना छाड़ियौ, और दुजै रैं पापा रौ भागी दारी ना हुणौ, और आपु पवित्र बोणी रौऊ। 23 आशणै वालै बौगता दी पाणी पीणै वालौ ना रौऊ, पर आपणै पेट, और आपु घौड़ी घौड़ी बिमार हुणै रैं कारण थोडौ थोडौ अंगूरा रौ रस भी कामा दी थाक आणदैं लागी। 24 कुछ आदमिउ रैं पाप परगट हुआ ई, और फैसलै कौरदैं सौबी कु पैहलै पहुंचा ई, पर कुछ आशाई बासिए बासिए। 25 इणी इ कुछ भौलै काम भी परगट हुआ ई; और जो इणै नाई औन्दै, और सैं भी नाई छिपी बौलदैं

6 जेती भी लोग गुलामी दी आ जोचुएँ औन्दै, सैं आपणै आपणै मालिक इज्जती रैं लायक ज़ाणा, ताकी परमेश्वरा रैं नावां और उपदेशा री बेइज्जती ना हुआ। 2 ज़ासरै मालिक विश्वासी आ तिऊं सैं भाई हुणै रैं कारण बेकार (तुच्छ) ना ज़ाणा मतलब के तिऊं री तौएँ भी सेवा कर, एथकु फाइदा उठउणै वालै तौएँ भी प्रेमी आ। इउं बुशु रौ उपदेश कौरदैं और सौमझाउंदै और कौरदैं थाक लागी

झूठी शिक्षा और धन जयदादा रौ लोभ

3 अगर तौएँ कुण इणौ इ उपदेश दिआ ता, और खौरि बुशैउ, मतलब के आमारे प्रभु यीशु रौ उपदेश और बुशु नाई मानदौ, जो भौक्ती रैं अनुसार आ, 4 ता सेउ घमण्डी हुई गो आ, और सेउ कुछ नाई ज़ाणदौ, यानी कि तेसदी फालतु बुशु और आक्षरु माथे बाद विवाद कौरणै री बीमारी आ, जेथ कौरि

डाह, और झोंगड़े, और कासरी बेइज्जती री बुशें और बुरे- बुरे शक, 5 और तिऊं आदमिऊ दी बेकार काँग- झोंगड़े पैदै हुआई, जासरी बुद्धी पोरु बिगाड़ी गोई आ, और सै सच्चाई कु दूर हुई गोए आ, जो समझा इ कि भौक्ती कौमाई रौ दार आ। 6 पर संतोषा आइलै भौक्ती बौड़ी कौमाई आ। 7 कैलै कि ना कुछ आमुए इए दुनिया दी आणौ आ और ना कुछ इए दुनिया कु नीं बौलदै। 8 अगर आमुकें खाणै और भीड़ना लै आसती आ ता एथी माथे आमु संतोष कौरणौ चाई। 9 पर जो सेठ हुणौ चा ई, सै इणै जौंजाला और फाई और इणी भौरी नुकसान वाली लालसा दी फौसाई जो आदमिउ पोरु बिगाड़ा ई और नाश वालै समुद्रा दी डुबाउवाई आ। 10 कैलै कि रुपाई पैसै रौ लोभ सारी रौंगा री बुराई री जड़ आ, जास कोमाउणा री कोशिशो दी भौरी आदमिउ ऐ आपणै विश्वासा कु टौलियौ आपु काई रौंगा रै दुःखा कु आपणौ जीउ चाणी एरौ आ।

तीमुथियुसा लै खास बूश

11 पर ओ परमेश्वरा रै आदमी, तू इउं बुशु कु पोरु भाग, और धोरम, भौक्ती विश्वास, प्यार, धीरज, और निउलापना रौ पिछौ कर 12 विश्वासा री आच्छी कुस्ती लड़; और तीआं सौदा री जिन्दगी पाकुड़, जेथारी ताए तू औटाओ औन्दौ और भौरी का गवाह लोगु रै सामनै आच्छो अंगीकार कियौ थौ

13 हाऊं ताऊं परमेश्वरा कै, जो सारेउ जीऊंदौ छाड़ा सा, और मसीह यीशु गवाह मानियौ जुणिए पुन्तियुस पिलातुसा रै सामनै आच्छौ अंगीकार कियौ,* इणी आज्ञा दिआ ऊ 14 कि तु आमारे प्रभु यीशु मसीह रै परगट हुणै झाउं इए आज्ञा निष्कलंक और निर्आरोप छाड़, 15 जास सेउ ठिक बौगता माथे देखाला लौ, जो परम धन्य और सिरफ एक मात्र अधिपति और राजेउ रौ राजौ और सारै प्रभुउ रौ प्रभु आ, 16 और अमरता सिरफ तेसी री आ, और सेउ केभी ना इशणै वालै प्याशें दी (अगम्य ज्योती) रौआ सा, और ना सेउ कोई आदमिउ ऐ देखौ और ना केभी देखी बौलदौ, तेसरी प्रतिष्ठा और राज जुगा जुगा दी रौआ सा। आमीन। 17 इयें दुनिया रै सेठ आदमिउ लै आज्ञा दै कि सै घमण्डी ना हुआ और ना सै चंचल जयदादा माथे आश छाड़ा, पर परमेश्वरा माथे जो आमारे सुखा लै सारौ कुछ भौरी का दिआ सा 18 सै भौलाई कौरा, और भौलै कामा लै सेठ बोणा, और उदार और मजत देणा लै सौदा तैयार थाका, 19 और औगाऊँ लै एक आच्छी पौई छाड़ा लै पाई कि सौच्चि जिन्दगी बौशा दी कौरा लै। 20 ओ तिमुथियुस एस (धरोहर) जो परमेश्वरा रौ ज्ञान आ एथारी चोकीदारी कर; और जेजे ज्ञाना लै ज्ञा बोलणौ इ बेकार आ, तेथारै अशुद्ध, बेकार बकबासा कु दूर रौऊ। 21 केती एस ज्ञाना रौ अंगीकारा कौरियौ विश्वासा कु भौटकी गोए इ। तुमु सारेउ माथे बौड़ी दया थाका लौ औन्दै लागी।

2 तीमुथियुस

अभिवादन

1 पौलुसा री तौरफा कु जो तिरें जिन्दगी रें वाइदा रें अनुसार जो मसीह यीशु दी आ, परमेश्वरा री मौज्जी कौरी यीशु मसीहा रें प्रेरित ऐ आ, 2 प्यारें छोहरू तीमुथियुसा* रें नावां दी: परमेश्वर बाब और आमारे प्रभु यीशु मसीहा री तौरफा ताउलें बोड़ी दया और दया और शान्ती मिलदें थाका लागी।

धन्यवाद और प्रोत्सहान

3 जेजें परमेश्वरा री सेवा हाऊं आपणें नाना बुद्धु री रीती रीवाजा माथें शुद्ध विवेका कौरी कौराऊ, तेसरें धन्यवाद चाई हूओ कि हाऊं आपणी प्राथना दी ताउं लगातार आद कौरदें थाकु लागी, 4 और तैरें आशु री सुधी नीं नीइंयों राची दिनें ताइं आइलें मिलणा री आश छाडाउ कि खुशी कौरी भौरुई। 5 मुकें तैरें तेस निष्कपट विश्वासा री सुधी आशा सा, जो पैहलें तेरी नानी लोइस और तेरी माँ यूनीके दी थौं, और मुकें पाकौ विश्वास आ कि तउंदी भी आसती आ।* 6 एजें कारणें हाऊं ताउंके सुधी दिलावाउ कि तू परमेश्वरा रें तेस वरदान जो मैरें हाथा छाडना रें जौरिऐ ताऊं कै मिलौ आ तेस सुलगाउ। 7 कैलें कि परमेश्वरें आमुकें डौरा री आत्मा नाई ताकती और प्यार और सहन कौरना री आत्मा देई आ। 8 एथीलें आमारे प्रभु री गवाही कु, और मुकू जो तेसरों केदी आ, शर्मिंदो ना हूओ, पर तेस परमेश्वरा री ताकती रें अनुसार खुशी संदेशा शुणाउंगालें मु आइलें दुःख उठाउ, 9 जुणी आमारे उद्धार कियौ और पवित्र बुलाहटा कु औटाऐ आ, और एउ आमारे कामा रें अनुसार नाई, पर तेसरें जो तीणी सुचौ औन्दो आ (उद्देश्य) और तेस अनुसार आ जो मसीह यीशु दी पैहला ओउलें आमु अइलें हूओ आ, 10 पर एबें आमारे उद्धारकर्ता मसीह यीशु रें परगट हूणें रें जौरिऐ प्रकाशित हूओ आ, जुणी मृत्यु रौ नाश कियौ जिन्दगी और अमरता तिरें खुश खबरी रें जौरिऐ प्याशलौ की ऐरौ आ। 11 जेथालें हाऊं प्रचार कौरणें वालौ, और प्रेरित औ उपदेश कौरणें वालौ भी बौणौ।* 12 एजें कारणें हाऊं इउं दुख भी उठाउवाउ, पर शौर्मिंदो नाई कैलें कि हाऊं तेस जास माथें मुएं विश्वास कियौ आ, हाऊं तेस जाणाऊ; मुकें पाकौ विश्वास आ कि सेउ आपणौ ज्ञान जो तीणी मुकें आ दैओ औन्दो तेस दिना झाऊं चोकसी कौरी सौका आ। 13 जो खौरी बुशें ताएं मुकु शुणी आ तिऊं तेस विश्वास और प्यारा आइलें, जो मसीह यीशु दी आ आपणौ आदर्श चाणियौ छाड। 14 और पवित्र आत्मा रें जौरिऐ, जो आमुदी आ बौसौ औन्दो इयें आच्छी आत्मा और ज्ञाना री चोकसी कर। 15 और तू जाणाई कि आसिया वालें सारें मुकु बौदलुई गोए ई जासदी फूगिलुस हिरमुगिनेस आ 16 उनेसिफुरुसा रें घराने माथें प्रभुए दया चाई कौरी, कैलें कि तीणी भौरी बारी मैरौ जीऊ शैलाओ आ और मेरी शॉंगली कौरी नाई शोर्मुओ। 17 पर जेबी सेऊ रोमा दी आशौ, ता बोड़ी कोशिश कौरी हाऊं लोडौ और मुकें मिलौ— 18 प्रभु कौरा कि सेजें दिनें तेस माथें दया हुआ— और जो जो सेवा तिणीऐ इफिसुसा दी की आ तीरें सेवा भी तू आच्छा कौरीऐ जाणाई।

मसीह यीशु रौ स्वामीभक्त सैनिक

2 एथिले ओ मैरें छोहरू तू तेस बोड़ी दया कु जो मसीह यीशु दी आ, एथादी ताकती वालौ हौऊ, 2 और जो बुशें ताएं भौरी गवाहिन रें सामनें शुणी आ, तिऊं विश्वासिउ आदमी काए सांब; जो दूजा कै भी शिखाउणें

लायक औलें। 3 मसीह यीशु रें आच्छे जोधें जिणौं मुं आइलें दुख उठाऊ। 4 जेबें कुण जोधौं लौडदें डेआ सा, ता एथीलें कि जुणिए सेउ भौरती कियौ आ तेस खुश कौरा, और सेऊ आपु दुनिया रें कामा दी नाई फौसदौ। 5 तैबें लौडने री जागहा दी जेबें सेउ विधी रें अनुसार नाई लौडालौ ता सेउ केबी भी ना जीतदौ। 6 जो जीमी दार मेहनत कौरा सा नाजा रौ हिसौ पैहलें तेसलें मिलणौ चाई। 7 जो हाऊं बोलाऊ तेथ माथें ध्यान दैयौ, और प्रभु तुमुलें सारी बुशु री सौमझ दिआ सा 8 यीशु मसीह आद छाड, जो दाउदा रें वशा कु हूओ और मौरें औन्दे माझिआ कु जिउंदो हूओ आ, और एउ मैरें खुशी रें संदेशा रें अनुसार आ। 9 जेथालें हाऊं बुरे कामा कौरणें वालेऊ जिणौं दुःख उठाउवाउ, इदरा झाऊं कैदा दी भी उ पर परमेश्वरा रौ वचन कैद नाई आसदौ। 10 एजें कारणें हाऊं चुनै औन्दे लोगु लें सब कुछ सहन कौराऊ, कि सै भी तीआं मुक्ति जो मसीह यीशुदी आ केभी ना खात्म हूणें वाली महिमा आइलें पा। 11 ऐ बूश सौच्चि* आ कि अगर आमें तेस आइलें मौरा भी गोए आ, ता तेस आइलें जिउदें भी हुई आ; 12 अगर आमें बीणा बिश्वास कौरणें वालें भी औलें, तैभें भी सेउ विश्वास वालौ बौणी रौआ सा, कैलें कि सेउ आपणौ इन्कार नाई कौरी बोलदौ। 13 इउं बुशु री सुधी तिउंलें दिआउ, और प्रभु रें सामनें खबरदार कर, कि आक्षरु माथें वाद विवाद ना थाकौ कौरदें लागी, जेथ कौरी कुछ फाइदौ नाइं हुंदौ, याने कि शुणनऐ वालें भी पोरु बिगडा ई।

सौबी कु आच्छौ करीगर

14 और आपु परमेश्वरा रौ इणौ मानणें लायक और इणौ काम कौरणें लायक ठहराउणा री कोशिश कर, जो शर्मिंदो ना हुआलौ, और ज सौच्चिइ रें वचन ठीक रती कौरा कामा दी आणा लौ। 15 पर अशुद्ध और बकबासा कू बौची थाक; कैलें कि कैलें कि इणें लोग तौएं भी बीणा भौक्ती दी बौडदें थाकाई लागी। 16 और तिउंरौ वचन शौडें औन्दे जाख्मा बाशिए फौडलदें थाका लागी।: हुमिनयुस और फिलेतुस तिऊं माझिया कु आ। 17 जो इणौं बोलियौ कि दुजी बारें जौल्म हुई गौ आ सौच्चिइ कु भौटकी गौ आ, और काइउ रें विश्वास उलटें सिधें कौरी ऐरे इ। 18 तैभें भी परमेश्वरा री पाकी पौई बौणी रौआ सा, और तेथ माथें इणी छाप लागी आ कि प्रभु आपणउ पोरु प्राणा सा; और जो कुण प्रभु रौ नाउं निआ सा सेउ बुरे कामा कु बौची रौआ लौ। 19 बोडें घोरा दी ना सिर्फ सुनै चाँदी इ रें नाई पर जुखडें और माटें रें ओखर भी हुआई, केजें केजें इज्जती लें, और केजें केजें बेइज्जती लें। 20 अगर कुण आपु इउं सौबी कु चोखौ कौरालौ, सेउ इज्जती रौ ओखर, और पवित्र ठहरा सा और मालिका रें कामा दी आशा सा, और हर भौलें कामा लें तैयार हुआ सा। 21 जवानी चहा कु पोरी भाग; और जो सौचें मौना कौरी प्रभु रौ नाउं नीआंई सा, तिऊं आइलें धौर्म, और विश्वास, और प्यार, और मेल मिलापा रौ पिच्छौ कर। 22 पर मुखता, और बिणा औकली रौ बूशा कु औलग रौउ; कैलें कि तू जाणाई कि सेजी बूशा कु झौगडें इ हुआइ। 23 और प्रभु री सेवा कौरणें वाले झौगडें कौरणें वाले नाई चाई हूणें, पर सौबिउ आइलें कौलिऐ, शिखाउणा लें तेज और सहन कौरणें वालौ चाई हूणौ। 24 और बिरोधिउ प्यारा कौरी समझावा, का पौतौ परमेश्वर तिउंलें मन बौदलना रौ मन दिआलौ, कि सै भी सौच्चिइ प्राणा लें। 25 एथारें जौ और रिऐ तेस री ईच्छा पूरी कौरणा लें खौबर दार हुइयो शैताना री फाई कु पोरु छूटा लौ। 26 और एथारें जौरिऐ तेसरी मौरजी पुरी कौरना लें चोकस हुइयो शैताना* री फाई कु पोरु छूटा।

आखरी दिनाई बुरै काम

3 पर इणौ जाणी छाड़, कि आखरी दिनु दी काठौ बोग्त आशा ई। 2 कैलै कि आदमी आपुलै सुँचणै वालौ, लोभ कौरणै वालौ, शेखी मारनै वालौ, घमण्डी, बेइज्जती कौरनै वालौ, मा- बाबा रै बोलै ना शुणनै वालै, धन्यवाद ना कौरनै वालै, और अपवित्र। 3 दया ना कौरनै वालौ, माफ ना कौरनै वालौ, आरोपा लाइणै वालौ, सयम ना कौरणै वालौ, काठै, भौलै कौरनै वालेउ रै दुश्मन। 4 विश्वासा दी घात कौरनै वालौ, डीठ, घौमण्डी, और परमेश्वरा रै नाई पर सुख विलास चहाणै वालै हुआई। 5 और सै भौक्ती रै भेषा दी ता हुआई, पर तेसरी भौक्ती नाई मानदै, इणै आदमिऊ कु दूर रौइणौ। 6 इउं मांझिए इणै लोग इ जो घौरा भीतै दौबडियौ- दौबडियौ डेआइ, और कमजोर छेउडिउ आपणै वौशा दी कौराई, जो पापा थाली दाबुई ऐन्दी और सारै रौंगा री चहाता रै वौशा दी आ। 7 और सौदा शिखदै थाकाई लागी पर जिदरौ सौंछाई रौ पौतौ लागी तीदै झाऊँ केबी नाई पहुँचदी। 8 और जिणौ यन्त्रेसै और यन्त्रेसै मुसा रौ रो बिरोध कियो थौ तिणौ ऐ भी सौंछाई रौ विरोध कौराई: ऐ ता इणै आदमी आ, जासरी बुद्धि बेब्रिष्ट हुई गोई आ, और विश्वासा रै बारै दी निकाम्मै ई। 9 पर ऐ ऐथाकु औगाऊँ नाई बौडी सौकदै, कैलै कि, जीणी तीउंरौ अज्ञानता सारेऊ आदमी माथै परगट हुई गोई थी, इणी इ इउंरी भी हुआई।

तिमथियुसा लै जरूरी सलाह

10 पर ताएँ उपदेश, चाल चलन, मनसा, विश्वास, सहनशीलता, प्यार, धीरज, और परीशान कौरनै दी, और दुख उठाउणै दी मैरौ सात दैओ आ। 11 और इणै दुखा दी भी जो आन्तकिया इकुनियुस और लुसा दी मूँ माथै पौडै थै और दुखा दी भी जो मुएँ उठाएँ ई; पर प्रभुए हाऊँ इउं सौभी कु छुडाई एरौ उ। 12 पर जेती मसीह यीशु दी भौक्ती आइलै जिन्दगी बिताउणौ चहा इ तिऊँ सब परेशान कौराई। 13 और दुष्ट, और बहकाउणै वालै धोखे देईयो। और धोखा खाइयो, बिगुडदै थाकाइ लागी। 14 पर तू इउं बुशु माथै, पर जो ताएँ शिखी आ, और ध्यान दैओ आ, इणौ जाणियो पाकौ बौणी रौऊ, कि ताएँ इणौ कास लोगू कु शिखौ आ। 15 और छोटी ओउलै पवित्र शास्त्र तैरै जाणौ औन्दौ आ, जो ताऊँ मसीहा माथै विश्वास कौरनै कु मुक्ति पाइणा औकली वालौ चाणी सौका सा। 16 हर एक पवित्र शास्त्र परमेश्वरा री प्रेरणा कु आ रौचौ औन्दौ और उपदेश, संमझाउणौ, और सुधारणौ, और धौर्मा री शिक्षा लै फाइदा मन्द आ। 17 ताकी परमेश्वरा रौ आदमी पाकौ बौणा, और हर एक भौलै कामा लै तैयार हुआ।

4 परमेश्वर और प्रभु यीशु मसीह गवाह कौरियो, जो जिउंदै और मौरै औन्दै रौ फैसलौ कौरा सा, तेस और तेसरै परगट हुणै, और राज्य लै सुधी देईयो हाऊँ तुमु खबरदार कौराऊ। 2 कि तू वचन प्रचार कर; बौग्त और बेबौग्त तैयार रौऊ, और सारै रौंगारी सहन शीलता और शिक्षा आइलै खबरदार कर, धौमकाऊ और समझाऊ। 3 कैलै कि इणौ बौग्त आशा सा,

कि लोग खौरौ उपदेश नाई सहन कौरौ सौकदै पर कौन्थू री खुजली रै कारणे आपणी मौरिी रै अनुसार आपु कालै भौरौ का उपदेश कौरणै वालै औटाउवाई। 4 और आपणै कौन्थू सौंछाई भिला कु बौदलियो कथा और कहाणी माथै ला ई। 5 पर तू सारी बुशु दी साव धान रौऊ, दुःख उठाऊ खुशी संदेशा शुणाउणा रौ काम कर, और आपणी सेवा पूरी कर। 6 कैलै कि हाऊँ भेटा जिणौ पेरिआउ, और मैरै भागणै रौ बौग्त आशी गौ आ। 7 हाऊँ आच्छी कुशती लौडी एरौ ऊ, मुएँ आपणी दौड पूरी की एरी आ, और मुएँ विश्वासा री चोकसी की आ 8 आशणै वालै बौगता दी मुकालै धौरमा रौ सेऊ ताज आ छाड़ौ औन्दौ जो प्रभु, जो धौर्मा, और फंसलै कौरणै वालौ आ, मुकै सेजै दिनै दिया और मुकै इ नाई पर तिऊ सौबिउ के भी जो तेसरौ परगट हुणौ प्यारौ जाणाई।

v

9 मुकाए शीग्री आशणै री कोशिश कर। 10 कैलै कि देमासै इएँ दूनिया प्यारी जाणियो हाऊँ छाडी एरौ ऊ, और थिस्सलुनीका लै डैओ आ और क्रेसकेस गलतिया लै और तीतुस दलमतिया लै डैओ आ। 11 लुका मु आइलै आ: मरकुस आपु आइलै साथी ओरु आण, कैलै कि सेऊ सेवा लै मैरै भौरौ कामा रौ आ। 12 तुखिकुस मुइएँ इफिसुसा लै भेजौ आ। 13 जो बागा दी, त्रौआसा दी करपुसा रै काए छाड़ियो आशौ उ, जेबी तू आशा लौ ता तेस और तेसरी किताबी खास कौरियो चामडै रै बैगा भितै ओरु आणे 14 सिकन्दर ठठेरै मु आइलै भौरौ बुराई की आ, प्रभु तेसलै तेसरै कामा रै अनुसार बौदलौ दिया सा 15 भी तेसकु बौचियो रौए, कैलै कि तीणिए आमारी बुशु रौ भौरौ बिरोध कियो आ। 16 मैरै पैहलै सवाला जवाबा रै बौग्तै कोईए भी मैरौ साथ नाई दैओ, पर सारेऊ ऐ हाऊँ छाडी एरौ थौ: भौलौ चाई हूओ कि ऐथारौ तिऊँ लेखौ ना देणौ पौडा। 17 पर प्रभु मु आइलै साथी दी रौ आ, और मुलै ताकत देई आ: ताकी मैरै जौरिए पुरौ पुरौ प्रचार हुआ, और सारी दुजी जाती शुणा ली, और हाऊँ ता ब्रागा रै मूआ कु छुडाउओ। 18 और प्रभु मू हर एक बुरै कामा कु छुडावा सा, और आपणै सौरगा रै राज्य दी मु सही-सलामत पहुँचावा सा: और तेसरी महिमा जुगै जुगै चाई औन्दै थाकी लागी। आमीन।

आखरी अभिवादन

19 प्रिसका और अक्विला लै, और उनेसिफुरुसा रै घौराना लै मेरी तौरफा कु ढाल। 20 इरास्तुस कुरिन्थुसा दी रौइ गो आ, और त्रुफिमस मुइयै मीलेतुसा दी बोमार हालती दी छाड़ौ औन्दौ। 21 शेला पौडनै कु पैहलै आशणा री कोशिश कर: यूबूलुसौर पूदंस, और लीनुस और क्लौदिया, और सारेउ भाई री ताउलै ढाल 22 प्रभु तेरी आत्मा आइलै रौआ: तुमु माथै बौडी दया थाका लौ औन्दै लागी।

तीतुस

अभिवादन

1 पौलुसा री तौरफा कु जुण परमेश्वरा रौ दास और यीशु मसीहा रौ प्रेरित आ, परमेश्वरा रै चुनै औन्दै लोगु रै विश्वास और भोक्ती रै अनुसार आ। 2 तिऐं सौदा री जिनन्दगी री आशी माथे, ज़ासरौ वाइदौ परमेश्वरै जो झूठ नाई बोली सौकदौ भौरी पैहला ओउलै की आ। 3 पर ठीक बौगता माथे आपणै वचन तेस परचारा रै ज़ोरिऐ परगट कियौ, जो आमारे छुटकारै दैणै वालै परमेश्वरा री आज्ञा रै अनुसार मुकै सांबी ऐरौ आ। 4 तीतुसा रै नावां दी जुण विश्वासा दी साथे ई रौइणै रै बचारा कु मैरौ सौचौ छेहरु आ: परमेश्वर बाब और आमारे छुटकारै दैणै वालै मसीह यीशु री बौड़ी दया और शान्ती थाका हुंदै लागी।

क्रेतेई तीतुसा रौ काम

5 हाऊं एथीलै ताऊं क्रेते दी छाडियौ आशो ऊ, कि जो बुशै छूटी ऐंटी तू तिऊं सारी बुशै सुधारा, और मेरी आज्ञा रै अनुसार इलाकै-इलाकै दी स्याणेऊ छाटा। 6 जो निर्आरोप और एक ई छेउडी रै बोउटै औलै, और ज़ासरै छोटी-छेहरु विश्वासी औलै, और ज़ासदी मौनमौरजी रौ आरोप नाई औलौ। 7 कैलैकि स्याणौ परमेश्वरा रौ भौण्डारी हुणै रै कारणे निर्आरोप हुणौ चाई, ना हठ कौरणै वालौ, ना रोष गाडनै वालौ, और ना सूरी पीणै वालौ, ना झौगडे कौरणै वालौ, और ना बेकार कौमाई रौ लोभी हुणौ चाई। 8 पर पाऊणै री इज्जत-मान कौरणै वालौ, भौलाई चाहाणै वालौ, खौइणै वालौ, फेसलै कौरणै वालौ पवित्र और ज़ीतणै वालौ हुणौ चाई। 9 और विश्वासा रै लायक वचन जो धौर्मा री शिक्षा रै अनुसार ई, टेकी रौआ; और आच्छी शिक्षा रै ज़ोरिऐ उपदेश देई सौका; और और जो वाद-विवाद कौरा आ तिऊंरौ मूं भी बन्द कौरी सौका। 10 कैलैकि भौरी का लोग निरंकुश/मौनमौरजी रौ बकबास कौरनै वालै और धोरखै दैणै वालै ई, खास कौरिऐ ज़ासरै खौतनौ आ कियौ औन्दौ। 11 इउरौ मूं बन्द चाई कौरनौ कैलैकि इऐ लोग बेकार कौमाई लै बेकार बुशै शिखाइयौ घौरा रै घौर पोरु बिगाडा ई। 12 तुमु मांझिया कु एकी आदमीऐ जो तिऊंरौ भविष्यवक्ता सा, बोलौ आ, कि क्रेते रै लोग झूठे, दुष्ट/बरे गूंड, आलसी, और सिर्फ पेटा भौरणै वालै ई। 13 इऐ गवाही सौच्यी आ, एथीलै तिऊं काठा कौरी खौबरदार थाक कौरदै लागी, कि विश्वासा दी पाकै चाई हुऐ। 14 और सै यहूदिउ री कथा कहाणित और आदमित री आज्ञा माथे जिऊ ना ला लै, और सौचाई कु भौटका लै पोरु। 15 सारेउ लोगु लै सारी चीजे चोखी ई, पर अशुद्ध विश्वासित लै कुछ शुद्ध नाई आसतौ, पर तिऊंरी बुद्धी और विवेक सब कुछ अशुद्ध आ। 16 सै बोलाई कि, आमै परमेश्वर जाणी ई:, आपणै कामा कु तेसरौ इन्कार कौराई, कैलैकि सै जोगरै और आज्ञा ना मानणै वालै ई, और केजै भी आच्छे कामा रै लायक नाई आसतै।

चालचलना लै पाक्की औकल

2 तू इणी बुशै लाइंदै थाक लागी, जो खौरी शिक्षा रै लायक औली। 2 बुद्धै मौरद, खबरदार, मुडी और सहन कौरनै वालै हुणै चाई, तिऊंरौ विश्वास और प्यार और धीरज पाकौ चाई हुओ। 3 इणै कौरिऐ बूढी छेउडी रौ चाल-चलण पवित्र लोगु जिणौ चाई हुओ, आरोपा लाइणै वाली और सूरी पिणै वाली नाई चाई हुई, पर आच्छी बुशै शिखाउणै वाली चाई हुई। 4 ताकी सै जवान छेउडित खबरदार थाका कौरदै लागी, कि आपणै बोउटै और लोलडेऊ आइलै प्यार छाडौ। 5 और काबू दी रौइणै वाली, पवित्र, घौरा रौ

कारोबार कौरणै वाली, भौली और आपणै बोउटै रै अधीन रौइणै वाली, ताकी परमेश्वरा रै वचना री बेइज्जती ना चाई हुई। 6 इणी ई जवान छेहरु भी समझाउंदै थाक लागी, कि सै भी काबू दी रौइणै वालै औलै। 7 सब बुशु दी आपु भौलै कामा लै एक औनैणौ बण : तैरी शिक्षा दी सफाई, गहराई, 8 और इणी खराई मिला ली, कोई भी तेथलै बुरौ ना बोला, जिणै कौरी बिरोधी कै आमु माथे केजौ भी आरोपा लाइणै रौ मौकौ ना मिला, और सै बेइज्जत हुआ। 9 नुकरु समझाऊ, कि आपणै-आपणै मालिका रै अधीना दी रौआ, और सारी बुशु दी तिऊं खुश छाडा, और पौलटुइयौ जवाब ना दिया। 10 चोरी और चलाकी ना कौरा, पर सौबी तरीका दी पूरे विश्वासी निकला, कि सै सारी बुशु दी आमारे छुटकारै दैणै वालै परमेश्वरा री शिक्षा दी शोभा दिया। 11 कैलैकि परमेश्वरा री बौड़ी दया परगट आ, जो सारेऊ आदमित लै छुटकारै रौ कारण आ। 12 और आमु खबरदार कौरा सा, कि आमै बिण भोक्ती और दुनिया री बुराई कु मन बौदलियौ एजै जुगा दी काबु और धौर्म और भोक्ती कौरी जिनन्दगी बितावा। 13 और तिऐं भौली आशा री मतलब कि-आपणै महान परमेश्वर और छुटकारै दैणै वालै यीशु मसीह री महिमा रै परगट औणै री बाटा दी थाका आण्डदै लागी 14 जुण आपु आमुलै कुसा माथे चौडौ, कि आमु सारी रौंगा री बुराई कु छुडावा लौ, और पवित्र कौरियौ आपुलै एक ईणी ज़ाती चाण जो भौलै कामा लै सौदा तैयार रौआ। 15 पूरे हका आइलै इउं बुशु बोल और समझाऊ और शिखाउंदै थाक लागी, कोइऐ भी तू बुरौ ना चाई ज़ाणौ।

मसीह चालनचलन

3 लोगु कै याद थाक कौराउंदै लागी, कि आफसर और अधिकारित रै अधीना दी रौआ, और तिऊंरी आज्ञा माना, और हर एक आच्छे कामा लै तैयार थाका रौई। 2 कासी भी बदनाम ना कौरालै; झौगडे कौरणै वालै ना हुआलै, पर कौअलै चाली रै हुआ, और सारेऊ आदमित आइलै बौडी नरमाई आइलै रौआ। 3 कैलैकि आमै भी पैहलै, बिण बुद्धी रै, और आज्ञा ना मानणै वालै, और दुविदा दी पौडै औन्दै, और रौंगा रौंगा री इच्छा दी, और सुख विलासा री गुलामी दी थे पौडै औन्दै, और बैर भाव, और डाह कौरनै दी आपणी जिनन्दगी बितावा थे, और कासी कै ढौबा नाई थे, और एकी दुजा आइलै दुश्मनी छाडा थे। 4 पर जैबै आमारे मुक्ती दैणै वालै परमेश्वरा री कृपा, और आदमी माथे तेसरौ प्यार परगट हुओ, 5 ता तिणिऐ आमुलै छुटकारौ दैओ, और एउ धौर्मा रै कामा कौरी नाई आसतौ, जो आमुऐ आपु किरै ई, पर आपणी दया रै अनुसार, नौऐं जौन्मा रै धोइणा कु, और पवित्र आत्मा कु आमु नौऐं चाणना रै ज़ोरिऐ हुओ 6 जो तिणिऐ आमारे छुटकारै दैणै वालै प्रभु यीशु मसीह रै ज़ोरिऐ आमु माथे भौरी कौरिऐ पेरौ। 7 जिणै कौरी आमै तेसरौ बौड़ी दया कौरी धौर्मा बौणीयो, सौदा री जिनन्दगी री आश लाइणा रै अनुसार हकदार बोणा। 8 ऐ बूश सौच्यी आ, और हाऊं चाहा ऊ, कि तू इउं बुशु रै बारै दी जोशा कौरी बोला एथीलै कि ज़ुणिऐ परमेश्वरा री बाट देखी और विश्वास कियौ, सै भौलै-भौलै कामा कौरनै रै ध्यान दी रौआ: इऐ बुशै भौली, और आदमित रै फाइदे री ई। 9 पर मूर्खता रै विवाद, वंशावलिऊ, और दुश्मनी विरोध, और तिऊं झौगडेऊ कु, जो कानूना रै बारै दी औलै एजी बूशा कु बौचियौ थाक, कैलै कि तिऊं बुशु रौ कोई फाइदौ नाई और बिण मतलबा री ई। 10 कास पाखंडी एकी दुई बारै समझाई-पौतियाइयो तेसकु अलग रौऊ। 11 इणै ज़ाणियौ कि जो इणै आदमी हुआई सै भौटकी गोऐ ई, और आपु आरोपी बौणीयो पाप थाका ई कौरदै लागी।

व्यक्तिगत सलाह और अभिवादन

12 जैबै हाऊं ताऊं काए अरतिमास और तुखिकुस भेजूलौ, ता मु काए निकुपुलुसा दी आशणै री कोशिश कौरणी: कैलैकि मुइंए तिऐ शेलै रै दूस काटणै री ठाणी गोई आ। 13 जेनास जो कानून चाणनै वालौ आ, और

अपुल्लोस कोशिश कौरियोँ औगाऊँ पौऊँचाउ, और देख, तिउंलै केजी भी चीजा री कामी ना चाई हुणी। 14 और आमारै लोग भी सारी जरूरत पूरी कौरना लै आच्छै कामा दी लागदै रौइणौ शिखा, ताकी कुछ कौमावा। 15 और मैरै सब साथिऊ री ताउंलै ढाल और जो विश्वास रै कारण आमु आइलै प्यार छाड़ा ई, तिउंलै भी ढाल। तुमु माथै बौड़ी दया थाका ली औन्दै लागी।

फिलेमोन

आभिवादन

1 पौलुसा री तौरफा कु जो मसीह यीशु रौ कैदी आ, और भाई तीमुथियुसा री तौरफा कु आमारे आच्छौ साथी फिलेमोन, 2 और बौइंग अफकिया, और आमारे साथी योद्धा अरखिप्पुस और फिलेमोना रै घोरा री खुंबली रै नाऊ। 3 आमारौ बाब परमेश्वर और प्रभु यीशु मसीह री तौरफा कु बौड़ी दया और शान्ति तुमुलै मिलदी रौआ।

फिलेमोना रौ प्यार और विश्वास

4 हाऊं तैरै तेस प्यार और विश्वासा री बुशै शूणियो, जो सौबी पवित्र लोगू आइलै और प्रभु यीशु माथे आ। 5 सौदा परमेश्वरा रौ धन्यावाद कौराऊ; और आपणी प्राथना दी भी ताऊं याद कौराऊ। 6 कि तैरै विश्वासा दी भागीदार हुणौ, तुमारी सारी भलाई री पहचाना दी, मसीहा कालै असरदार ई। 7 कैलैकि ओ भाई, मुलै तैरै प्यारा कु भौरी आनन्द और शान्ति मिली, एथीलै कि तैरै जरीयै पवित्र लोगू रै ज्रीऊ हौरै-भौरै हुई गौए आ।

उनेसिमसा लै औरज

8 एथीलै अगर मुलै मसीहा दी बौड़ी हिमत ता आ, कि जो बुशै ठीक आ, तेसरौ हुकम ताउंलै देऊ। 9 तैबेभी मुलै बूढे पौलुसा लै जो आबे मसीह यीशु कालै कैदी ई, एऊ औजौ भी आच्छौ जाणुओ कि प्यारा कौरी औरज कौरा। 10 हाऊं आपणै छेहरु उनेसिमसा कालै जो मुकु मैरी कैदा दी जन्मौ आ ताऊं कै औरज कौराऊ, 11 सेऊ ता पैहलै तैरै कुछ भी कामा रौ नाई थौ, पर आबे तैरै और मैरै दुईआ रौ बौड़े कामा रौ आ। 12 तेसी लै मतलब— जो मैरै ज्रीऊ रौ टुकड़ौ आ, मुंइयै सेऊ ताऊं कारे भेजी ऐरौ आ। 13 तेस हाऊं

आपू कारे छाड़णौ चहा थौ कि तैरी तौरफा कु ऐस कैदा दी जो खुशी रै संदेशा रौ कारण आ, मैरी सेवा कौरालौ। 14 पर मुंइयै तेरी इच्छा रै बिणा कुछ भी कौरणौ नाई चाहौ कि तेरी एजी दया दबाव कु नाई पर खुशी कौरी चाई हुओ। 15 कैलैकि का पौतौ सेऊ ताऊं कु कुछ दिना झाऊं ऐजे कारण अलग हुओ कि सौदा ताऊं आइलै रौऊ। 16 पर इबी कु दासा रै जिणौ नाई, पर दासा कु भी आच्छौ मतलब भाई जिणौ रौऊ, जो शरीरा दी भी और खासकर प्रभु दी भी मैरौ प्यारौ औलौ। 17 एथीलै अगर तू मुलै आपू आइलै सहभागी सोमझा ई, ता तेस इणै कौरी ग्रहण कौर जिणौ हाऊं कियो। 18 और अगर तिणिए तैरौ कुछ नुकसान कियो आ, या तेस माथे तैरौ कुछ आशा सा, ता मैरै नाऊं माथे लिख। 19 हाऊं पौलुस आपणै हाथा कौरी लिखाऊ, कि हाऊं आपू ई भौराऊ; और एथा रै बोलणै री कोई जरूरत नाई, कि मैरौ कौर्ज जो ताऊं माथे ई सेऊ तू ही आ। 20 ओ भाई, इयै खुशी मुलै प्रभु दी तेरी तौरफा कु मिला : मसीहा दी मैरै जीऊणा लै हौरौ भौरौ कर। 21 हाऊं तैरै आज्ञाकारी हुणै रौ भरोसौ छाड़ियो, ताउंलै लिखाऊ और इणौ जाणाऊं, कि जो कुछ हाऊं बोलाऊ, तू तेस कु कई बौड़ियो कौराई। 22 और एऊ भी आ, कि मु कालै रौइंगा लै जागहा तैयार छाड़; मुकै आश आ, कि तुमारी प्राथना रै जरीयै हाऊं तुमुलै ई देइयाउ।

आखरी अभिवादन

23 इपफ्रास जो मसीह यीशु दी मुं आइलै कैदा दी थौ। 24 और मरकुस और अरिस्तर्खुस और देमास और लूका जो मैरौ साथी आ इऊं री ताऊं लै ढाल। 25 आमारे प्रभु यीशु मसीहा रौ बौड़ी दया तुमारी आत्मा माथे औन्दै थाका लागी। आमीन।

इब्रानियों

परमेश्वरारौ वचन छोहरु कौरी

1 पैहलै जुगा दी परमेश्वरै बाबदादा कु थोड़ो थोड़ो कौरियो और अलग अलग पुराणै जमानै रै गुरु रै जरीयै बुशै लाईयो, 2 इयुं आखरी दिनु दी आमु कु छोहरु रै जरीयै बुशै लाई, जो तिणीए सौबी चीजेऊ रौ हकदार ठहराओ और तेसी रै जरीयै तिणीए सारी धौतरी चाणी आ। 3 सेउ तेसरी महिमा रौ प्याशौ और तेसरी छोटी कु छोटी चीजेऊ री छाप आ, और सारी चीजेऊ आपणी ताकती रै वचना कौरी संभाला सा। सेऊ पापा धोइयो ऊंची जागहा माथे परमेश्वरा री सुलटी भीए बोशौ; 4 और सौरगा रै दूतै कु तेती ही बड़ीया ठहरौ, जेती तिणीए तिऊं कु बौड़ी जागहा रौ वारिस हुईयो आच्छौ नाऊं कौमाओ।

परमेश्वर छोहरु री बौड़ाई

5 कैलैकि सौरगा रै दूतु मांझिरे कु तिणीए केबी कासलै बोलौ कि, तू मैरौ छोहरु ई, आज तू मुकु पैदौ हुओ? और तैबे इणौ कि, हाऊं तेसरो बाब औआऊ, और सेऊ मैरौ छोहरु औआलौ? 6 और जेबी पैहलौ छोहरु धौतरी दी तौई आणा आ, ता बोला आ, परमेश्वरा रै सारै सौरगा रै दूत तेसके ढाल कौरौ। 7 और सौरगा रै दूता रै बारै दी इणौ बोला आ, सेऊ आपणै दूतु लै बागुर, और आपणै सेवा कौरणै वालै लै आगी रौ जौहर चाणा आ। 8 पर छोहरु रै बारै दी बोला आ, ओ परमेश्वर तेरी राजगाद्दी जुगा-जुगा झाऊं रौआ : तैरै राज्य रौ राजा रै जौरिरे देई औंदी सौजा फेसलै री सौजा सा। 9 तांइरे धोर्मा कु प्यार और अधर्मा कु दुश्मनी छाडी; ऐथरे कारण परमेश्वर, तैरे परमेश्वरै तैरे साथीऊ कु बौड़ियो खुशी रै तेला कौरी तैरौ अभिषेक कियो। 10 और इणौ की, ओ प्रभु, सौबी कु पैहलै तांइरे धौतरी री पौई पाई, और सौरगा तैरे हाथा री कारीगरी आ। 11 सै ता नाश हुआई; पर तू रौआई बौणी: और सै सारै जुडकै रै जिणै पुराणै हुआई। 12 और तू तिऊं चादरा भाशिए लपेटाई, और सै जुडका रै भाशिए बोदलिआई : पर तू सेऊ ई आ और तैरी सालै-बोरशै केबी भी खातम नाई औंदी। 13 और सौरगा रै दूतु मांझिरे कु तिणीए कासलै केबी बोलौ, कि तू मैरै सुलटी भीए बोश, जेबी झाऊं कि हाऊं तैरे दुश्मन तैरे बागणा थाला री पीढी ना कौरु लौ। 14 का सै सौबी सेवा टहल कौरणै वाली आत्माएं नाई; जो उद्धार पाइणा वालेउलै सेवा कौरणा लै छाड़ाई?

बौड़ी आशीष

2 एजै कारण चाई, कि आमै तिऊं बुशै माथे जो आमुरे शुणी आ, औजौ भी मन लाई, इणौ नाई चाई हुओ कि बहकियो तिऊं कु दूर डेइआ। 2 कैलैकि जो वचन सौरगा रै दूतु रै जरीए बोलौ औन्दौ थौ। जेबी सेऊ टेकी रौ और हर एक गुनाह और हुकम ना मानणै रौ ठीक-ठीक बौदलौ मीलौ, 3 ता आमै लोग इणी बौड़ी मुक्ति कु बेफीकर रौइयो किनो बौची सौकी आ? जासरी बुशै पैहलै-पैहलै प्रभु रै जरीए हुई आ, और शुणनै वालेउ रै जरीए आमुकै पाकौ पौतौ चालौ। 4 और साथीए परमेश्वर भी आपणी इच्छा रै अनुसार निशाण, और नोखे काम, और कई रौंगा रै शक्ती रै काम, और पवित्र आत्मा रै वरदान बाण्डणा रै जरीए ऐथरी गवाही दैदौ थाकौ लागी।

बौड़ौ आशीष दैणै वालौ

5 तिणीए तियां आशणै वाली दूनिया री जासरी बुशै आमै लाइंदै आ लागै औन्दै, सौरगा रै दूतु रै आधीना दी नाई की। 6 यानी कि कुणिए इणी गवाई ही दैणी आ, आदमी का सा, कि तू तेसरी सुधी नियां ई? या आदमी रौ छोहरु का सा, कि तू तेसरी फिकर कौराई? 7 तांइं सेऊ सौरगा रै दूतु कु कुछ ही कम कियो; तांइं तेस माथे महिमा और इज्जती रौ ताज छाडी और तेसलै आपणै हाथा रै कामा माथे हक देणौ। 8 तांइं सारौ कुछ तेसरै बागणा थाल कौरी ऐरौ : एथीलै जेबै तिणीए सारौ कुछ तेसरै हका दि कियो, ता तिणीए कुछ भी नाई छाडी, जो तेसरै हका दी नाई हुओ: पर आमै इबी झाऊं सौब कुछ तेसरै आधीना दी नाई देखदै। 9 पर आमै यीशु जो सौरगा रै दूता कु कुछ ही कम कियो आ, मौऊता रै दुःख उठाउणै रै कारण महिमा और इज्जती रौ ताज भी डौ औन्दौ देखी आ; ताकि परमेश्वरा रै बौड़ी दया कु सेउ हर एक आदमी काले मौऊता रौ स्वाद चाखा। 10 कैलैकि जास काले सारौ कुछ आ, और जासरै जरीए सारौ कुछ आ, तेसके ऐऊ ही आच्छौ लागौ कि जेबी सेऊ भौरी छोहरु लै महिमा दी पौउचावा, ता तिउरै मुक्ती कौरणै वालै लै दुख उठाउणा रै जरीए पाकौ कौरा। 11 कैलैकि पवित्र कौरणै वालौ और जास पवित्र कौराई, सौबी एकी ही जागहा कु आ: ऐजै कारण सेऊ तिऊंलै भाई बोलना लै नाई शौरमीदौ। 12 सेउ बोला, हाऊं तैरौ नाऊं आपणै भाईऊ के शुणाऊवाउ, खुबली रै बिचा दी हाऊं तैरौ भजन गा ऊ। 13 और तैबे इणौ कि, हाऊं तेस माथे विश्वास (भरोसौ) छाड़ाऊ; और तैबे इणौ, देख, हाऊं तिऊं छोहरु समेत जो परमेश्वरै मुके देणै। 14 एथीलै जेबै कि छोहरु मांस और लोऊ रै भागी आ, ता सेऊ आपु भी तिउरै जिणौ तिउरै साथी दी हुई गौ; ताकि मौऊता रै जरीए तेसलै जासलै मौऊतै माथे शक्ति मिला थी, मतलब शैताना निकाम्मौ कौरा। 15 और जेती मौऊता रै डौरा कु जिन्दगी भर गुलामी दी थै फौसै औन्दै, तिऊं पोरु छुड़ाऊ। 16 कैलैकि सेऊ ता सौरगा रै दूतु लै नाई पर इब्राहीमा रौ वंश सौभाला सा। 17 एजै कारण तेसलै चाई थौ, कि सारी बुशु दी आपणै भाईऊ जिणै बौणा; जासकु सेउ तिऊं बुशु दी जो परमेश्वरा आइलै मेल छाड़ा सा, एक दया कौरणै वालौ और विश्वासा रै लायक बौड़ौ याजक बौणा ताकि लोगु रै पापा लै माफी मांगा। 18 कैलैकि जेबी तिणीए परीक्षा री हालता दी दुख उठाओ, ता सेऊ तिउरी भी मजद कौरी बौला सा, जासरी परीक्षा हुआ सा।

यीशु मुसा कु बौड़ौ

3 एथीलै ओ पवित्र भाईओ, तुमै जो सौरगा रै औटाऊणै दी साथी आ, तेस प्रेरित और बौड़ौ याजक यीशु माथे जास आमै अंगीकार कौरी आ, ध्यान कौरौ। 2 जो आपणै छांटणै वालैउ काले विश्वासा रै लायक थौ, जिणौ मुसा भी तेसरै सारै घौरा दी थौ। 3 कैलैकि सेऊ मुसा कु ऐती भौड़ियो महिमा रै लायक सौमजौ आ, जेती कि घौरा रौ चाणनै वालौ घौरा कु बौड़ियो आदर छाड़ा ई सा। 4 कैलैकि हर एक घौरा रौ कोई ना कोई चाणनै वालौ हुआ सा, पर जुणीए सारौ कुछ चाणौ सेऊ परमेश्वर आ। 5 मुसा ता तेसरै सारै घौरा दी सेवका जिणौ विश्वासा रै लायक रौओ, कि जो बुशै शुणाउणै वाली थी, तिऊं री गवाही दिया। 6 पर मसीह छोहरु जिणौ परमेश्वरा रै घौरा रौ हौककदार आ, और तेसरौ घौर आमै आ, अगर आमै हिम्मता माथे, और आपणी आशा रै घमण्डा माथे आखरी झाऊं पकाई कौरी बौणी रौई।

अविश्वासा कु खौबरदारी

7 एथिलै जिणौ पवित्र आत्मा बोला आ, अगर आज तुम तिरुंरी बाच शुणा, 8 ता आपणौ मन काठौ नाई कौरौ, जिणौ कि रोश आशणै रै बोगतै और परीक्षा रै दिने जागला दी कियौ थौ। 9 जिणै तुमारै बाबा दादै हाऊं जांचियौ पोरखौ और चालीस बोरशा झाऊं मरै काम देखै। 10 ऐजै कारणै हाऊं सेजै बोगतै रै लोगु कु रोशुई रौओ, और बोलौ, इऊंरै मन सौदा भौटकदै थाका ई लागी, और इऊंरै मेरी बाट नाई पराणी। 11 तैबै मुंइए रोशा दी आशियौ कसम खाई, 'सै मरै आरामा दी नाई आशी बोलदै। 12 ओ भाईओ, चोकसिए रौओ कि तुमु मांझी इणौ बुरौ और विश्वास नाई कौरणै रौ मन नाई चाई हुओ, जो तुमु जीऊंदै परमेश्वरा कु दूर कौरा सा। 13 पर जैजै दिना झाऊं आज कौ दिन बोला ई, हर दिन एकी दूजै समझाऊंदै लागी रौओ, इणौ नाई चाई हुओ, कि तुमु मांझी कु कोई आदमी पापा रै जाला दी आशीयौ काठौ हुआ। 14 कैलैकि आमै मसीहा आइलै हौकदार हुऐ ई, अगर आमै आपणै पैहलै विश्वासा माथे आखरी झाऊं पाकौ कौरौ टेकी रौओ। 15 जिणौ बोला ई, अगर तुमै आज तेसरी बाच शुणौ, ता आपणौ जीऊं काठौ ना कौरौ, जिणौ कि रोश दिलाऊंगा रै बोगतै कियौ थौ। 16 भला कुणी लोगुए शुणियौ रोश दिलायै? का तिऊं सौबीऐ नाई, जो मूसा रै जरीऐ मिस्रा कु गाड़ै थै? 17 और सेऊ चालीस बोरषा झाऊं कास लोगु कु रोशुई रौओ? का तिऊं कु नाई, जुणिए पाप कियौ, और तिरुंरी लाशै जागला दी पौडी रौई? 18 और तिरुंरै कास आइलै कसम खाई, कि तुमै मरै आरामा रै दिने दी नाई आशी बोलदै; सीरफ तिऊं कु जुणिए हुकम ना मानौ? 19 एथिलै आमै देखी आ, कि सै विश्वास ना कौरणै रै कारण नाई आशी बोलै।

परमेश्वरा रै लोगु रौ विश्वास

4 एथिलै जैबै कि तेसरै आरामा दै डेरुणै री कसम इबी झाऊं आ, ता आमु डौरनौ चाई, किए इणौ ना चाई हुओ कि तुमु मांझिए कु कोई आदमी तेसकु बेखबर रौआ। 2 कैलैकि आमुलै तिऊं भाशिए खुशी रौ संदेश शुणाओ, पर शुणै ओन्दै वचना कु तिऊंलै कुछ फाइदो नाई हुओ; कैलैकि शुणनै वालौ रै जिवा दी विश्वासा आइलै नाई बोशौ। 3 पर आमै, जुणिए विश्वास कियौ आ, तेस आरामा दै डेआई; जिणौ तिणीऐ बोलौ, "मुइए आपणै रोशा दी कसम खाई कि तिऊंकै मरै आरामा दी नाई आशीदौ।" पर दुनिया रै बौणनै रै बोगता कु तेसरै काम पुरै हुई गौऐ थै। 4 कैलैकि सातवे दिना रै बारै दी किए तिणीऐ इणौ बोलौ आ, "परमेश्वरा सातवे दिने आपणै सारै काम खातम कौरियौ आराम कियौ।" 5 और एजी जागहा दी तैबै इणौ बोलासा, "तिऊंकै मरै आरामा दी नाई आशीदौ।" 6 ता जैबै ऐ बुशै बाकी आ कि केती औजौ आ जो तेस आरामा दी आशा, और जासकै तिऊंरौ खुशी रौ संदेश पैहलै शुणाओ आ तिऊंरै हुकम ना मानणै रै कारण तेस आरामादी नाई आशुओ, 7 एथिलै सेऊ केजौ खास दिन ठहराइयौ ऐती दिने बासिए दाऊदा री किताबी दी तेसलै 'आज कौ दिन' बोला सा। जिणौ पैहलै बोलौ, "अगर आज तुमै तेसरी बाच शुणा लै, ता आपणौ मन काठौ ना कौरौ।" 8 कैलैकि अगर यहोशू तिऊं आरामा दी नीआं, ता तेथ बासीऐ दूजै दिने री बुशै नाई हुआ थी। 9 तैबै जाणौ कि परमेश्वरा रै लोगु कालै सबता रै साजै रौ आरामा रौ दिन बाकी आ; 10 कैलैकि जुण तेसरै आरामा दी डेवै, तिणीऐ भी परमेश्वरा रै जिणै आपणै काम पूरै कौरियौ* आराम कियौ आ। 11 तैबै आमै तेस आरामा दी डेरुणै री कोशिश कौरौ, किए इणौ ना चाई हुओ कि कोई आदमी तिऊं रै जिणै हुकम ना मानियौ धोनी लोटा। 12 कैलैकि परमेश्वर रौ वचन जिऊंदौ, और भौरी मजबूत, और हर दुई धारी तलवारा कु भी चौरौ आ; और प्राण और आत्मा लै, गांठ-गांठ और गूदे-गूदे अलग कौरियौ आर-पार छेदा और मना रै सोच और विचार पौरखा। 13 संसारा री कोई भी चीज तेसकु नाई चोरुई औंदी पर जासकु आमारौ काम आ, तेसरी आखी रै सामनै सब चीजै खुली और परगट आ।

बौडौ महायाजक

14 एथिलै जैबै आमारौ इणौ बौडौ याजक आ, जो सौरगा का हुइयौ डैओ, मतलब परमेश्वरा रौ छोरु री यीशु, ता आशौ, आमै आपणै अंगीकार काठै कौरौ थौबी छाडी। 15 कैलैकि आमारौ इणौ बौडौ याजक नाई जो आमारी कमजोरी दी आमु आइलै दुखी ना हुई बोलै; पर सेऊ सारी बुशा दी आमु जिणौ ता पोरखौ, तैबै भी पवित्र निकलौ। 16 एथिलै आशौ, आमै बौडी दया री राजगादी रै नजदीक हिम्मत कौरियौ डेई, कि आमै माथे दया हुआ, और सेऊ बौडी दया पा जो जरूरता रै बोगतै आमारी मजद कौरा।

5 कैलैकि हर एक बौडौ याजक आदमीऊ मांझिए कु नियाई और आदमीऊ ही कालै तिऊं बुशु रै बारै दी जो परमेश्वरा कु मेल छाडा, मानौ ओन्दौ है कि भेंट और पापा री बौली कौरदै थाका लाई। 2 सेऊ बिणा औकली वालै, और भुलै भौटकै आइलै काँउलिए आच्छौ बर्ताव कौरौ सौका, एथिलै कि सेऊ आपु भी कमजोरी कु घेरुओ ओन्दौ आ। 3 और एथिलै तेसलै चाई कि जिणौ लोगु कालै तिणौ ही आपु कालै भी पापा रै बौली कौरौ देई कौरा। 4 ऐ इज्जती री जगह कोई आफणी नाई निंदौ, जेबी झाऊं कि हारुना जिणौ परमेश्वरा री तौरफा कु ठहराइया नाई लौ। 5 तिणौ ही मसीहै भी बौडौ याजक बणनै री बौडाई आफणी ई नाई नीं, पर तेसलै तिणीऐ देई, जुणीऐ तेसलै बोलौ थौ, "तू मेरो छोरु आ, आज मुंइऐ ही तू पैदौ कियौ आ।" 6 इणौ ही सेऊ दूजी जागहा दी भी बोला, "तू मलिकिसिदका री रीति माथे सौदालै याजक आ।" 7 यीशुऐ आपणै शरीरा दी रौइणै रै दिना दी ऊँची बाचा कु औटाई-औटाईयौ और लेरी-लेरियौ तेसकु जो तेस मौऊता कु बचावा थौ, प्राथना और विनती की, और भौकी रै कारण तेसरी शूणी। 8 छोरु हुणै कु भी तिणीऐ दुख उठाई-उठाइयौ हुकम माणनौ शीखौ, 9 और पाकौ बौणियौ, आपणै सारै हुकम माणनै वालेउलै सौदा मुक्ती रौ कारण हुई गौ, 10 और तेसलै परमेश्वरा री तौरफा कु मलिकिसिदका री रिति माथे बौडै याजका रौ पद मिला।

विश्वासा कु भौटुकणै रौ नौतिजौ

11 एथरै बारै दी आमुए भौरी का बुशै लाइणी आ, जास रौ सौमझणौ भी कठीन आ, एथिलै कि तुमै ऊँचौ शुणदै लागी गौए ई। 12 बोगता रै विचारा कु ता तुमु गुरु हुणौ चाई थौ, तैबै भी इणौ जरुरी हुई गौ आ कि कोई तुमुलै परमेश्वरा रै वचना री आदी शिक्षा तौइए शीखावा। तुमै ता इणै हुई गौए आ कि तुमुलै नाजा रै बौदलै इबी झाऊं दूध ही चाई। 13 कैलैकि दूध पीणै वालै छोरु लै ता धर्मा रै वचना री पैहचान नाई हौन्दी, कैलैकि सेऊ बालक आ। 14 पर नाज स्याणेउलै आ, जासरी ज्ञाना री सौमजरी रौ (ज्ञानेन्द्रियौ) भ्यास कौरदै कौरदै भौलै-बुरै दी भेद कौरणै दी पाकै हुई गौई आ।

6 एथिलै आशौ मसीह री शिक्षा री शुरुआता री बुशै छाडीयौ आमै पकाई री भीलै बौडी, और मौरै ओन्दै कामा कु मन बौदुलणै, और परमेश्वरा माथे विश्वास कौरणै, 2 और बपतिस्मा और हाथा छाडने, मौरै ओन्दैउ रौ जिऊंणौ, और आखरी फैसलै री शिक्षा री पौई औजौ नाई पाईयौ। 3 अगर परमेश्वर चहा लौ ता आमै इणौ ही कौरौ आ। 4 कैलैकि जुणीऐ एकी बैरै जौत पाई गौई आ, और जुणीऐ सौरगा रै वरदाना रौ स्वाद चारखी गौ आ और पवित्र आत्मा रौ हकदार हुई गौऐ आ, 5 और परमेश्वरा रै सौभी कू आच्छै वचना रौ और आशणै वालै जुगा री ताकती रौ स्वाद चारखी गौ आ। 6 अगर सै भौटकी जा लै ता तिऊंलै मन बौदुलणै लै तौइए नौऊओ चाणनौ मुश्कल आ; कैलैकि सै परमेश्वरा रै छोरु आपु कालै तौए क्रुसा माथे चढावा ई और परगटा दी तेस माथे गोलती ला ई। 7 कैलैकि जो धौतरी सौरगा रै पाणी जो तेस माथे घौडी-घौडी पौडा सा, पी पियौ जास लोगु कालै ज्योती बौईया सा तिउरै कामा रौ साग-पाच जौमावा सा, सै परमेश्वरा कु आशीष पा ई। 8 पर अगर सै झाडी और काण्डै जौमावाई, ता निकामी और शापित हुणै माथे आ, और तेसरौ ओन्त इणौ आ कि सेऊ जालनौ जा सा। 9 पर ओ आच्छै लोगुओ, अगर आमै ईऊं बुशै बोली तैबै भी तुमारै बारै दी आमै ऐथकु बौडिया और मुक्ति वाली बुशैऊ रौ विश्वास कौरौ आ। 10 कैलैकि परमेश्वर इणौ नाई कि तुमारौ फैसलौ नाई कौरा, तुमारै और तेस प्यार पोरु बिसरा, जो

तुमारे तेसरें नाउंलें इणें कौरिए देखालों, कि पवित्र लौगु री सेवा की और कौरदै आ लागें औन्दै। 11 पर आमैं भौरी चहाई कि तुमु मांझिरे कु हर एक आदमी आखरी झाऊं पूरी आशा लें इणी ही कोशीश कौरदै रौआ लागी। 12 ताकि तुमैं आलसी नाई हुआ लें, पर तिऊंरौ भ्यास (अनुकरण) कौरौ जो विश्वास और धीरजा रें वाइदा रें वारिस हुआ ई।

परमेश्वर रौ केभी न टौलणें वालों वादों

13 और परमेश्वरें अब्राहमा लें प्रतिज्ञा देन्दी बारें जेबें कि कसम खाणेंलें कोई भी आपु कु बौड़ौ नाई देखौ, ता आपणी ही कसम खाइयों बोलौ, 14 कि "हाऊं सौची ताउंलें भौरी आशीश देरुलौ, और तेरी औलाद बड़ाऊंदै लागी रौआऊ।" 15 और इणें कौरिए तिणिए धीरज छाड़ियों वाइदा कौरौ औन्दी बूश पाई(शिखी)। 16 आदमी ता आपु कु कास बौड़ै री कसम खा ई, और तिउरें हर एक झोगडें रौ फेंसलौ कसमा कु पाकौ हुआ सा। 17 एथीलें जेबी परमेश्वरें प्रतिज्ञा रें वारिसा माथें ओर भी आच्छी रीती कौरौ परगट कौरणों चाहें कि तेसरौ सोच-बिचार बौदली नाई सौकदौ, ता कसमें बिचा दै आणी। 18 ताकि दुई बिण बौदलिणें वाली बुशैऊ रें जरिरे, जासरें बारें दी परमेश्वर रौ झूठौ ठहनौ मुश्किल आ, पाकौ कौरौ आमारी हिम्मत छाड़िया ली, जो शरण निणें लें एथीलें फेटै मारी कि तिरे आशा कु जो सामणें आ छाड़ी औन्दी पा लें। 19 सें आशा आमारे प्राणालें इणौ लागर आ जो पाकौ आ, और पौरदै रें भीलें झाऊं पौंउचावा, 20 जीयें यीशु मलिकिसिदका री रीति माथें सौदा लें बौड़ौ याजक बाणीयो, आमु कालें अगुआ रें रुपा दी आशौ आ।

मलिकिसिदका रें याजक

7 एऊ मलिकिसिदक शालेमा रौ राजौ, और परमप्रधान परमेश्वर रौ याजक, सौदा रौ बाणी रौआ। जेबी अब्राहम राजैऊ झागियो आशा थौ, ता इणीए तेसके मिलियो तेसलें आशीश देइ। 2 एसी के अब्राहम सारी चीजैऊ रौ दौसूवौ भाग भी दैओ। एऊ पैहलें आपणें नाउं रें मतलबा रें अनुसार, धोम रौ राजौ, और तैबें शालेम मतलब शांती रौ राजौ आ। 3 जासरौ ना बाब, ना मां, ना वंश आ, जासरें दिने रौ ना ता शुरुआत आ और ना जिन्दगी रौ अन्त आ; पर परमेश्वर रौ छेहरु रौ रूप बाणियो सेऊ सौदा लें याजक बाणी रौआ सा। 4 आबें एथ माथें ध्यान कौरौ कि सेऊ किणौ महान थौ जासलें कुलपति अब्राहम लूटियो आच्छे कु आच्छी चिजैऊ रौ दौसूवौ भाग दैओ। 5 लेवी री संताना मांझिऊ कु जो याजका रौ हक पा सा, तिउलें हुकूम मिलौ औन्दौ आ कि लोगू, मतलब आपणें भाईऊ कु, सें चारे अब्राहमा ही रें शरीरा कु कैलें ना जन्म आ, कानुना अनुसार दौसूवौ भाग निया। 6 पर इणीए, जो तिउरें वंश रौ नाई थौ, अब्राहमा कु दौसूवौ भाग नियो, और जासकें शौपत मिली थी तेसलें आशीश देइ। 7 एथादी कोई शक नाई कि छोटौ बौड़ै कु आशीश पा सा। 8 और इदै ता मौरणें वालें आदमी दौसूवौ भाग निया आ, पर तिरे सेऊ ई निया जासरी गवाही देया कि सेऊ जीऊंदौ आ। 9 ता आमैं इणौ भी बोली बौली ई कि लेवीए भी, जो दौसूवौ भाग निया सा, अब्राहमा रें जरीयें दौसूवौ भाग दैओ। 10 कैलैकि जेजे बोग्तै मलिकिसिदक तेसरें बाबा कु मिलौ, सेजी बोग्तै सेऊ आपणें बाबा रें शरीरा दी थौ।

मलिकिसिदका रें जिणें दिशणें वालें दुजें याजक

11 अगर लेवीय याजक हक रें जरिरे सिध्दी मिला (जासरें सहारें लौगु के कानून मिलौ थौ) ता तैबें का जरूरत थी कि दुजौ याजक मलिकिसिदका री रीति माथें खौडौ हुआ, और हारुना री रीति रौ नाई बोलाले? 12 कैलैकि जेबी याजका रौ पद बौदलाई, ता नियमा रौ भी बौदलनौ जरूरी आ। 13 कैलैकि जासरें बारें दी एजी बुशें बोलिया कि सेऊ दुजें गोतरा रौ आ, जास मांझिरे कु कोइए बेदी री सेवा नाई की, 14 ता परगट आ कि आमारौ प्रभु यहुदा रें गोतरा मांझिरे कु पैदौ हुआ आ, और एजें गोतरा रें बारें दी मूसे याजक पदा री कुछ बुशें नाई लाई। 15 आमारौ बोलौ औजौ भी आच्छा कौरौ परगट हुआ, जेबें मलिकिसिदका रें जिणौ एक औजौ याजक पैदा हुआ सा, 16 जो शरीर आज्ञा रें नियमा कौरौ नाई, पर अविनाशी जिन्दगी री शक्ति कौरें छाडौ औन्दौ आलौ। 17 कैलैकि तेसरें बारें दी इणी गवाही देइ ऐन्दी आ, "तू

मलिकिसिदका री रीति माथें जुगै-जुगै याजक आ।" 18 इणें कौरौ, पैहलौ हुकूम कमजोर और नाकाम हुणा रें कारण खातम हुइ गौ 19 (एथीलें की नियम केंजी भी बुशा री सीद्धी नाई की), और तेसरें जागहा दी एक इणी आच्छी आश छाड़ी औन्दी आ जासरें जरीयें आमैं परमेश्वर रें नजदीक डेइ बौली। 20 मसीहा रौ चुनाव बिणा कसमा कौरौ नाई हुआ, 21 कैलैकि सें ता बिणा कसमा कौरौ याजक चाणें पर एउ कसमा आइलें तेसरी तौरफा कु छांटौ औन्दौ आ जुणीए तेसरें बारें दी बोलौ, "प्रभुए कसम खाई, और सेऊ तेसकु तौयें नाई पछतालौ कि एऊ जुगै- जुगै याजक आ।" 22 एजें जरीयें यीशु एक आच्छे वचना रौ जागिन बाणौ। 23 सें ता भौरी जौणें याजक बाणी बाणियो आशें, एथारौ कारण एऊ थौ कि मौऊत तिऊं रौइणें नाई दिआ थी; 24 पर एऊ जुगै-जुगै रौआ सा, एजें जरीयें तेसरौ याजक पद पाकौ आ। 25 एथी लें जो तेसरें जरीए परमेश्वर काए आशा सा, सेऊ तेसरौ पूरौ पूरौ उद्धार कौरौ बौला आ, कैलैकि सेऊ तिउलें औरज कौरने लें सौदा जीऊंदौ आ। 26 ता इणौ ई बौड़ौ याजक आमारे लायक थौ जो पवित्र, और निष्कपट, और सिद्धौ साधौ, और पापीऊ कु औलग, और सौरगा कु भी ऊंचौ कियो औन्दौ आ। 27 तिऊं बौड़ें याजक जिणें तेसलें जरूरी नाई कि रोज पैहलें आपणें पापा और तैबें आपणें लोगू रें पापा कालें भेंट चड़ावा; कैलैकि तिणिए आपू ई आपणी भेंट चढ़ाईयो सेऊ एकी ही बारें दी पूरौ कौरौ गौ। 28 कैलैकि नियम ता कमजोर आदमीऊ लें बौड़ौ याजक चाणा आ, पर तेस कसमा रौ वचन, जो नियमा बासिए खाई आ, तेस छेहरु छांट आ जो जुगै-जुगै लें पाकौ कौरौ ऐरौ आ।

यीशु आमुरौ महायाजक

8 आबें जो बुशें आमैं बोलदै आ लागें औन्दै तिऊं मांझिऊ कु सौबी कु बौड़ौ बुश एजी आ कि आमारौ इणौ बौड़ौ याजक आ, जो सौरगा माथें परमेश्वर रें सिंहासना माथें सुलटी बिरे बोशौ औन्दौ आ, 2 और पवित्र जागा और तेस सौचें ताम्बू रौ सेवक हुआ जो केंजे आदमीऊए नाई, पर प्रभुए खौडौ कियो आ। 3 कैलैकि हर एक बौड़ौ याजक भेंट, और बलिदान चढ़ाउणेंलें ठहरावा ई, एजें कारण जरूरी आ कि एस याजका के भी कुछ चढ़ाउणा लें हुआ। 4 अगर सेऊ धौतरी माथें हुआ थौ ता केबी भी याजक नाई हुआ थौ, एथीलें कि नियमा रें अनुसार भेंट चढ़ाउणें वालें ता आस्ती आ। 5 सें सौरगा री चिजैऊ रें रुपा जिणें और निशाणा जिणें री सेवा कौरा इ; जिणौ जेबी मूसा ताम्बू चाणदै थौ लागौ औन्दौ, ता तेसलें इणौ हुकूम मिलौ, "देख, जो रूप ताउंकें टीरा माथें देखालौ थौ, तेसरें अनुसार सारौ कुछ चाणें।" 6 पर तिऊं याजक कु बौड़ियो सेवा यीशु लें मीली कैलैकि सेऊ आदमी और परमेश्वर रें बीचा दी रिशतें चाणनें वालौ प्रभु ठहरौ, जो औजौ आच्छी कौसमा रें सहारें बानी औन्दी आ। 7 कैलैकि अगर सेऊ पैहलौ वाइदौ निर्आरोप हुआ थौ, ता दुजें वाइदा लें मौकौ नाई लोडीया थौ। 8 पर सेऊ तिऊं माथें आरोप लाइयो बोला, "प्रभु बोला, देखौ, सें दिन आशणें कि हाऊं इस्त्राएला रें घरानें आइलें नौवौ वाइदौ बानुलौ। 9 एऊ तेस वाइदा जिणौ नाई हुआलौ, जो मुइरे तिउरें बाब दादैऊ आइलें सेजे बोग्तै कियो थौ, जेबी मुइरे सें हाथ पाकडियो मिस्त्र देशा कु गाडियो आपणें; कैलैकि सें मैरें वाइदा माथें नाई टेकी रौरे, एथीलें मुइरे तिउरें देखभाल नाई की, प्रभु इणौ इ बोला सा। 10 दुजी बारें प्रभु बोला, कि जो वाइदौ मुइरे तिऊं दुसा बासिए इस्त्राएला रें घरानें आइलें बानुलौ, सेऊ वाइदौ एऊ आ कि हाऊ आपणें नियम तिउरें मौना दी पाऊलौ, और तिऊं तिउरें मौना दी लिखाऊ, और हाऊं तिऊंरौ परमेश्वर ठहरलौ और सें मैरें लोग ठहराई। 11 और हर एक आपणें देशवालेऊ लें और आपणें भाईऊ लें इणी शिक्षा नाई दिआलौ, कि तू प्रभु प्राण, कैलैकि छोटै का बौड़ें झाऊं सारें मुं जाणाले। 12 कैलैकि हाऊं तिउरें अधर्मा रें बारें दी दया कौरुलौ, और तिउरें पाप तौइरे याद नाई कौरुलौ।" 13 नौवौ वाइदौ चाणियो तिणीए पैहलौ वाइदौ लें पुराणौ ठहराई; और जो चीज पुराणी और केंजे कामा री नाई रौआली तीयां चीजा रौ मिटणौ जरूरी आ।

पार्थिव ताम्बू दी सेवा

9 तेस पैहलै वाइदा दी भी सेवा रै नियम थै और इणी पवित्र ज़ागा थी जो इणें दूनिया री थी। 2 कैलैकि एक ताम्बू चाणो, पैहलै ताम्बू दी दीवट, और मेज़, और भेटा री रोटी थी; और तेसलै पवित्र ज़ागा बोला थै। 3 दूजो, पौरदें पीछु सेऊ ताम्बू थो, ज़ासलै परमपवित्र ज़ागा बोलाई। 4 तेस ताम्बू दी सुनै री (धुपदानी) धुडूस, और चारौ तौरफा दी सुना कौरी मोढौ औन्दौ वाइदा रौ संदूक और ऐथादी मत्रा कौरी भौरौ औन्दौ सुनै रौ मर्तबान और हारुना रौ डीगौ ज़ासदी फूल फल लागी गोए थै और वाइदा री पटी थी। 5 तेथ माथे दुई (तेजोमय) चोमकणै वालै करुब थै, ज़ासरी छाई प्रायश्चिता रै ढाकणा माथे थी लागी औंदी; इऊ बुशै एकी एकी कौरी समझाउणै रौ इबी बौग्त नाई आसतौ। 6 इयै चिजै इणै कौरी तैयार हुई आ। तेस पैहलै ताम्बू दी याजक हर बोग्तै भीतरै आशियो सेवा रै काम पूरै कौराई, 7 पर दुजै दी सिरफ बौडौ याजक बौरशा रौ एकी बारै डेआ सा, और बिणा लोऊ निइओ भीतरै नाई डेऊंदौ; ज़ास लोऊ कौरी सेऊ आपणी गौलती और दुजै लोगू री भूली बिसरी गौलती लै चड़ावा सा। 8 ऐथ कौरी पवित्र आत्मा इणो देखाला आ कि जेबी झाऊं पैहलौ ताम्बू खौडौ आ, तेबी झाऊं पवित्र ज़ागा री बाट परगट नाई हुई। 9 एऊ ताम्बू आज कालके बोग्ता कालै एक अनैणो आ; ज़ेथादी इणी भेटा और बौली चड़ावा ई, ज़ेथ कौरी आराधना कौरणै वालै रै विवेक पाके (सिद्ध) नाई हुइ बौलदैं। 10 कैलैकि सै सीरफ खाणै पीणै री चीजै और रौंगा-रौंगा री धोइणै री बिधी माथे शरीरा रै नियम ई, जो जेबी झाऊं लोग सुधरै नाई तेबी झाऊं चाणै औन्दै।

मसीह रै खुना री शौक्ती

11 पर जेबी मसीह आशणै वाली आच्छी आच्छी चिजेऊ रौ बोडौ याजक हुइयो आशौ, ता तिणीए तौई भी बोडै और पाके (सिद्ध) ताम्बू कु हुइयो, जो हाथ कौरी चाणो औन्दौ नाई यानी के ईणें सृष्टि रौ नाई, 12 और बाकरा और बाशटू रै लोऊ रै ज़रीए नाई पर आपणै ही लोऊ रै ज़रीए, एकी ही बारै पवित्र ज़ागा दी पहुँचौ और सौदा लै छुटकारौ पाओ। 13 कैलैकि जेबी बाकरा और बौलदा रौ लोऊ और कलारा रै झुखड़ा रै छारा रौ, जो आदमी पवित्र नाई तिऊं माथे छिडकाऊणो शरीरा शुद्ध कौरणालै तिऊं पवित्र कौरा आ,* 14 ता मसीह रौ लोऊ जुणीए आपुलै सदा रौइणै वाली (सनातन) आत्मा रै ज़रीए परमेश्वरा रै सामनै निर्आरोप चढाओ, तुमारै विवेक मौरै औन्दै कामा कु कैलै नाई शुद्ध कौरालौ ताकि तुमै जिऊंदै परमेश्वरा री सेवा कौरौ। 15 ऐजी वजाह कु सेउ नौवै वाइदें रौ बिष्टू (मध्यस्थ) आ, ताकि तेसरी मौऊता रै ज़रीए जो पैहलै वाइदा रै बोग्ता दी बुराई कु छुटकारौ पाइणालै हुओ आ, औटाए औन्दै लोग कौसमा कौरी सदा री मीरास पाआ लै। 16 कैलैकि जिए वाइदौ बानी गौ आ तिए वाइदौ बानणै वालै री मौऊता रौ सौमझणौ भी ज़रूरी आ। 17 कैलैकि इणी वाइदौ मौरणै कौरी पाकौ हुआ सा, और जेबी झाऊं वाइदें बानणै वालौ जीऊंदौ रौआ सा तेबी झाऊं वाइदौ कामा रौ नाई औन्दौ। 18 एथीलै पैहलौ वाइदौ भी बीणा लोहू कौरी नाई बानौ। 19 कैलैकि जेबी मूसा सौबी लोगू लै नियमा रौ हर एक हूकूम शुणाओ थौ ता तिणीए बाशटू और बाकरा रौ लोहू निइयो, पाणी और राती ऊन और बेखली री डाली कौरी, तिणें किताबी माथे और सौबी लोगू माथे छिडकी गौ 20 और बोलौ, "एऊ तेस वाइदा रौ लोऊ सा, ज़ासरो हूकूम परमेश्वरै तुमुलै दैओ आ।" 21 और इणी कौरी तिणियै ताम्बू और सेवा रै सारै समाना माथे लोऊ छिडकौ। 22 सौचूचौ ता इणो आ कि नियमा रै अनुसार सौबी चिजै लोऊ रै ज़रीयै शुद्ध कौरीयाई, और बीणा लोऊ बहाइयो पापा री माफी नाई आ।

मसीह री बौली कौरी पापा री माफी

23 एथीलै ज़रूरी आ कि सौरगा री चीजेऊ जीणी इऊं बौली रै ज़रीयै शुद्ध चाई कौरणै, पर सौरगा री चीजे आपु इ इऊं कु आच्छी बौली रै ज़रीयै शुद्ध कौराई। 24 कैलैकि मसीह तेस हाथा रै चाणै औन्दै पवित्र ज़ागा दी, जो सौचूचै पवित्र ज़ागा रौ नमूनौ आ, डैओ नाई पर सौरगा दी ही डैओ, ताकि आमुलै आबै परमेश्वरा काए दिशै चाई। 25 इणो नाई कि सेउ आपु घौडी-

घौडीयै चोड़ावा, जिणो कि बौडौ याजक हर बौरश दुजा रौ लोहू नियौ पवित्र ज़ागा दी डेआ ई, 26 नाई ता धौतरी रै पैदा हुणै रै बोग्ता कु तेसलै घौडी-घौडियै दुःख ऊठाउणो जा थो; पर आबै जुगा रै आखरी दी सेऊ एकी ही बारै परगट हुओ आ, ताकि आपणै ही बौली रै ज़रीयै पाप दूर कौरा। 27 और जिणै आदमीउ लै एकी बारै मौरणौ और तेथ बासिए फँसलौ हुणो पाकौ आ, 28 तिणी ई मसीहा भी भौरी लोगू रै पाप उठाउणालै एकी बारै बौली हुओ; और जो लोग तेसरी बाट लोड़ाई तिउंरि मुक्ति लै दुजी बारै बिणा पाप उठाइयो दिशा सा।

पाकी बौली

10 कैलैकि नियम, ज़ेथादी आशणै वाली आच्छी चीजेऊ री छाई आ, पर तिउंरौ औसली रूप नाई, एथीलै तिऊं एक ही जिणै बौली रै ज़रीयै जो हर बौरशे यादी कौरी चड़ावा ई, नजदीक आशणैवालै लै केबी भी सिद्ध नाई कौरी बौलदी। 2 नाई ता तिउंरौ चड़ाऊणो बौन्द कैलै ना औन्दौ? एथीलै कि जेबी सेवा कौरणैवालै एकी बारै शुद्ध हुआलै, ता तैबै तिउंरौ विवेक तिऊं पापी ना ठहराऊंदौ। 3 पर तिउंरै ज़रीयै हर बौरशे पापा री याद हुआ सा। 4 कैलैकि इणो हुणो ता मुश्कल आ कि बौलदा और बाकरै रौ लोऊ पाप दूर कौरा सा। 5 ऐजे कारणे दूनिया दी आशदी बारै बोला आ, "बौली और भेट ताइयै नाई चाही, पर मु कालै एक शरीर तयार कीयो आ। 6 होम-बौली और पाप-बौलीऊ कु तू खुश नाई हुओ। 7 तैबै मुइयें बोलौ, "देख, हाऊं आशी एरौ आ, पवित्र शास्त्रा दी मैरै बारै दी लिखौ औन्दौ आ, ताकि ओ परमेश्वर, तेरी इच्छा पूरी कौरु।" 8 माथै ता सेऊ बोला सा, "ना ताइए बौली और भेटा और होम बौलीऊ और पाप बौलीऊ चाई, और ना तिऊं कु खुश हुओ," यानी कि इयै बौली ता नियमा कौरी चड़ावा ई। 9 तैबै इणो भी बोला ई, "देख, हाऊं आशी एरौ ई, ताकि तेरी इच्छा पूरी कौरु," पर सेऊ पहलकौ चुंगा, ताकि दुजौ तेसरी ज़ागा दी छाडा सा। 10 सेजी इच्छा कु आमै यीशु मसीहा री शरीरा री एकी बारै बौली चाडाऊणा रै ज़रीयै पवित्र कियै औन्दै ई। 11 हर एक याजक ता खौडै हुइयो हर रोज सेवा कौरा सा, और एक ही रौंगा रौ बलिदान जो पापा लै केबी भी दूर नाई कौरी बौलदैं, घौडौ-घौडीयै चड़ावा ई। 12 पर एऊ आदमी ता पापा रै बौलदैं एक ही बौली सौदालै चड़ाइयो परमेश्वरा रै सुलटी बीयै बौशी एरौ आ, 13 और सैजे बोग्ता कु एसरी बाट तयार कौरदें लागौ औन्दौ आ कि तेसरै दुश्मन तेसरै बाणणै थालै री पीडी बौणी। 14 कैलैकि तिणीए एकी ही बौली रै ज़रीए तिउंलै ज़ास पवित्र कौराई, सौदा कालै पाकौ कौरी गौ आ। 15 और पवित्र आत्मा भी आमुलै इणी ही गवाही दिआ; कैलैकि तिणीए पैहलै बोलौ थौ, 16 "प्रभु बोला आ कि जो वाइदौ मुइए तिऊं दिनै बासिए तिऊं आइलै बानुलौ सै ऐजी आ कि हाऊं आपणै नियम तिउंरै जिवा दी लिखाऊ और हाऊं तिउंरै विवेका दी पा ऊ।" 17 तैबै सेऊ इणो बोला सा, "हाऊं तिउंरै पाप और तिउंरै अर्धमा रै काम केबी याद नाई कौरदौ।" 18 और जेबी इऊंरि माफी हुई गोई आ, ता तैबै पापा री बौली नाई रौई।

परमेश्वरा रै नौजदीक डैओ

19 एथीलै ओ भाईओ, जेबी आमै यीशु रै लोऊ रै ज़रीए तेस नोए और जीऊंदै बाटा कु पवित्र ज़ागा दी डेऊणै री हिम्मत हुई गोई आ, 20 जो तिणीए पौरदें— मतलब आपणै शरीरा मांझिऊ कु हुइओ, आमु कालै शुद्ध कियो आ, 21 और एथीलै कि आमारा इणो बौडौ याजक ई, जो परमेश्वरा रै घौरा रौ हौकदार आ, 22 ता आशौ, आमै सौचूचै जीऊ और पूरै विश्वास कौरौ, और विवेका रौ आरोप दूर कौरणालै जीऊ माथे छिडकाओ निइओ, और शरीर शुद्ध पाणी कौरी धोइयो परमेश्वरा रै नजदीक डैई आ। 23 आशौ आमै आपणी आशा रै पाप मानीयो पाके कौरीयै थाई छाडी, कैलैकि जुणीए कौसम खाई, सै सौचूचै आ; 24 और प्यार, और भौलै कामा दी बौडाऊणा कालै आमै एकी दूजे री फिकर थाकी कौरदैं लागी, 25 और एकी दुजे आईलै कौटै हुणो नाई छाडौ, जिणो कि कैतीउ री रीति आ, पर एकी दूजे सौमझाऊंदै थाकौ लागी; और जिणो-जिणो तेस दिन नजदीक आशदैं देखा लै ता तिणो-तिणो तौई भी भौरी इणो थाको कौरदैं लागी। 26 कैलैकि

सौच्यार्थी री पैहचान पाइणा बासिए अगर आमै जाणी बुजीयो पाप कौरदे रौई लै, ता पापालै तैबै कोई बौली बाकी नाई आसती। 27 ओ, सौजा रौ एक भयानक बाट लोडनी और आगी री लूपी इबी रौई औन्दी जो बिरोधिउ रौ नाश कौरा सा। 28 जैबै की मूसा रौ नियमा रौ नाई मानणै वालौ, दुई या चीन जौणा री गवाही माथे, बिणा दया कौरै पोरु झांगा ई, 29 ता सुचौ कि सेऊ केती तौई भी भौरी सौजा रै लायक ठहरा, जुणीए परमेश्वरा रौ छोहरु बांगणे कौरै फेचौ और वाचा रै लोऊ रौ, जेथारै जरीयै सेऊ पवित्र ठहराओ औन्दी थौ, अपवित्र जाणौ आ, और बौड़ी दया री आत्मा रौ अपमान कियो। 30 कैलैकि आमै तेस जाणी आ, जुणीए बोलौ, "बौदलौ निणौ मेरौ काम ई, हाऊं ही बौदलौ देऊ।" और तैबै इणौ, कि "प्रभु आपणै लोग रौ फँसलौ कौरा सा।" 31 जीऊंदै परमेश्वरा रै हाथा दी पौडनौ डराऊंदी बूश आ। 32 पर तिऊं पिछलै दिन याद कौरौ, जासदी तुमै प्याशै कौरौ दुःखा रै बौडै झोमेला दी पाकै रोए इ। 33 केबी-केबी ता इणौ कि तुमै बुराई और दुःख सहन कौरदी बारै तमाशौ बोणा, और केबी इणौ कि तुमै तिउरै साझी हुए जासरी हालत इणी बूरी थी। 34 कैलैकि तुमै कैदीउ रै दुखा दी भी दुखी हुए, और आपणी जायदाद भी खुशी कौरौ लुटणै देइ; इणौ जाणीयो कि तुमू कारे एक औजौ भौ बडीया और सौदा रौइणै वाली जायदाद आ। 35 एथीलै आपणी हिम्मत नाई छाडौ कैलैकि तेसरौ फल बौडौ आ। 36 कैलैकि तुमुलै हिम्मत छाडनी जरूरी ई, ताकि परमेश्वरा री इच्छा पूरी कौरियो तुमै वाइदा रौ फल पा। 37 "कैलैकि आबै भौरी ही थोडौ बोग्त रौई ऐरौ ई, जेबै कि आशणौ वालौ आशा सा और बेर नाई कौरदौ। 38 पर मेरौ धौर्मा लोग विश्वासा कौरौ जीऊंदै रौआई, और अगर सेऊ पिछा बौदलुई ऐरौ ता मेरौ जीऊ तेसकु खुश नाई हुआलौ।" 39 पर आमै बौदलिणै वालै नाई कि नाश हुआलै पर विश्वास कौरणै वालै ई कि ज्ञान बचाई।

विश्वासा रै अनैणै

11 ऐबै विश्वास आशा कौरौ ऐन्दी चीजेऊ रौ पाकौ कियो औन्दी, और बिण देखी चीजेऊ रौ प्रमाण आ। 2 कैलैकि ऐथरै बारै दी पुराणै जमाने रै लौगुए आच्छी गवाही देई। 3 विश्वासा कौरौ आमै जाणी कि सारी धौतरी परमेश्वरा रै वचना रै जरीए हुई आ। पर इणौ नाई कि जो कुच्छ देखणै दी आशा सा, सेऊ देखी ऐन्दी चीजेऊ कौरौ बौणौ औन्दी। 4 विश्वासा ही कौरौ हाबिलै कैना कु आच्छी बौली परमेश्वरा कै चडाई, और तेसी रै जरीए तेसरै धौर्मा हुणै री गवाही भी देणी, कैलैकि परमेश्वरै तेसरी भेटा रै बारै दी गवाही देई; और तेसी रै जरीए सेऊ मौरणै माथे भी इबी झाऊ बुशे ला सा। 5 विश्वासा ही कौरै हनोक चुंगौ ताकि मौऊत ना देखा, और तेसरौ ठेऊ नाई लागौ कैलैकि परमेश्वरै सेऊ चुंगी गौ थौ, और तेस चुंगणै कु पैहलै तेसरी इणी गवाहीथी देई ऐन्दी थी कि तिणीए परमेश्वर खुश कियो आ। 6 और विश्वास बिणा परमेश्वर खुश कौरणौ मुश्किल आ; कैलैकि परमेश्वरा काए आशणै वालैउ लै विश्वास कौरणौ चाई कि सेऊ आस्ती, और आपणै लोडनै वालै लै फल दिया ई। 7 विश्वासा ही कौरौ नूहै तिऊं बुशु रै बारै दी जो सेजै बोग्तै नाई दिशा थी, चेतावनी पाइयो भौकती आइलै आपणै घोरानै बचाऊणालै जहाज चाणौ, और तेसरै जरीए तिणीए दुनीयां आरोपी चाणी; और तेस धौर्मा रौ वारीस हुओ जो विश्वासा कौरौ हुआ आ। 8 विश्वासा ही कौरौ अब्राहम जेबी औटाओ ता हुकूम मानीयो इणी जागहा निकली गौ जास मीरासा दी निणै वालौ थौ; और इणौ नाई जाणा थौ कि हाऊ केशी डेआउ, तैबै भी निकली गौ। 9 विश्वासा ही कौरौ तिणीए वाइदै कियो औन्दै देशा दी, बिगानै देशा दी परदेसी रौइयो इसहाक और याकूब समेत, जो तेस आइलै तेसरी वाइदा रै वारीस थै ताम्बू दी वास कियो। 10 कैलैकि सै तिणै पाकी पौईवालै इलाके री बाट लोडा थौ, जासरो रचणैवालौ और चाणनैवालौ परमेश्वर आ। 11 विश्वासा कौरौ सारै आपु बुडी हुणा माथे भी गौरकडी हुणा री शक्ती पाई, कैलैकि तिणै वाइदै कौरणैवालौ सौच्यौ जाणौ थौ। 12 एजै कारणे एक ही जौणै कु, जो मौरै औन्दै जिणौ थौ, सौरगा रै तारै और समुद्रा रै तीरा रै बालू रै जिणै अनगिनत वंश पैदा हुए। 13 इयै सौबी विश्वासा ही री हालता दी मौरै; और तिउरे वाइदा की औन्दी चिजै नाई पाई, पर सै दूर कु देखियो खुश हुए और मानी गौरै कि आमै धौतरी माथे परदेसी और बाइरा कु आशै औन्दै ई। 14 जो इणी बुशै

बोलाई, सै प्रकट कौराई कि आपणै देशा लोडदै इ लागै औन्दै। 15 और जैजै देशा कु सै आशै औन्दै थै, अगर तेसरी सुधी कौरा ता तिउलै वापिस डेरुणै रौ मोकौ थौ। 16 पर सै एक आच्छे मतलब सौरगा रै देशा रै अबिलाषी आ; एथीलै परमेश्वर तिउरौ परमेश्वर बोलणै दी तिऊकु नाई शौर्मिदौ, कैलैकि तिणिए तिऊं कालै एक इलाकौ जाणौ औन्दी आ। 17 विश्वासा ही कौरै अब्राहम, पौरखणै रै बौगै दी, इसहाका री बौली चडाई; और जुणिए वाइदै सौच्यौ जाणै थै 18 और जासलै इणौ बौलौ औन्दी थौ, "इसहाका कु तेरौ वंश हुआई," सेऊ ही आपणै एकलौतौ बौली चडाउंदै लागौ। 19 कैलैकि तिणीए मानी गौ, कि परमेश्वर शौक्ती वालौ आ कि तेस मौरै औन्दै मांझिऊ कु जीऊंदी कौरा; तैबै तिऊं मांझिऊ कु अनैणै री रीति मांझिऊ कु सेऊ तेसकै तौई मिलौ। 20 विश्वासा ही कौरै इसहाकै याकूब और एसावा लै आशणै वाली बुशेऊ रै बारै दी आशीष देइ। 21 विश्वासा ही कौरै याकूबे मौरदी बारै यूसुफा रै दुई छोहरु मांझिऊ कु एकी एकी लै आशीष देइ, और आपणी डीगै माथे सहारै नीइयो डाल की। 22 विश्वासा ही कौरै यूसुफे, जेबी सेऊ मौरणै वालौ थौ, ता इस्राएला रै संताना री निकलनै री बुशै लाई, और आपणी हाडकै रै बारै दी हुकूम दैओ। 23 विश्वासा ही कौरै मूसा रै मां-बाबै तेसलै, पैदा हुणै बासिए चीन मीनै झाऊं चोरी छाडौ, कैलैकि तिउरे देखौ कि माऊं बाढणौ आ, और सै राजा रै हुकूम कु नाई डौरै। 24 विश्वासा ही कौरै मूसै स्याणौ हुइयो फिरौना री माई रौ छोहरु बोलणै कु मोना कियो। 25 एथीलै कि तेस पापा दी थोडै दिना रै सुख मिलणै कु परमेश्वरा रै लोग रै साथी दुख मिलणौ भौरी आच्छौ लागौ। 26 तिणीए मसीहै रै कारण शर्मिदौ हुणा लै मिस्रा रै भण्डरा कु बौडौ धन सौमझौ, कैलैकि तेसरी आखी फल पाइणा लै लागी औन्दी थी। 27 विश्वासा ही कौरै राजा रै रोशा कु नाई डोरियो तिणीए मिस्र छाडी गौ, कैलैकि सेऊ अनदेखै कौरियो भी देखियो पाकौ रौओ। 28 विश्वासा ही कौरै फसल और लोह छडकाउणा रौ रिवाज मानौ, कि पैहलै रौ नाश कौरणैवालौ इस्राएला माथे हाथ नाई पाओ। 29 विश्वासा ही कौरौ सै लाल समुद्रा रै पारभिलै इणै कौरै डेइ गौरै, जिणौ की शूके माटे माथे; और जैबै मिस्रिऊरे तिणौ ही कौरणै चाओ ता सारै डूबिओ मौरौ गौरै। 30 विश्वासा ही कौरौ यरीहौ री शहरपनाह, जैबै सै सात दिने झाऊं तेसरै फेरे लाई गौरै, ता सै ढौली गोई। 31 विश्वासा ही कौरौ राहाब वैश्या हुकूम नाई मानणै वालै आइलै नाश नाई हुई, एथीलै कि तिणै भेदी आच्छे कौरै छाडै औन्दै थै। 32 आबै तौइ का बोलू? कैलैकि बोग्त नाई रौओ कि गिदोना रौ, और बाराक और शिमशौना रौ, और यिफतहा रौ और दाऊद और शमूएला रौ और पुराणी बुशै बोलनै वालेऊ रै बारै दी बोलु। 33 तिउरे विश्वासा ही रै जरीए राज्य जिणै; धौर्मा रै काम किये; वाइदा री चिजै पाई; ब्रागा रै मुं बौन्द किये; 34 आगी रौ गेठौ शेलौ कियो; तलवारी री धारा कु बौचिरे निकलै; कमजोरी दी शक्तिशाली हुए; लडाई दी आच्छे निकलै; दुजै देशै री फौज झांगियो भौगाई। 35 छेउडीए आपणै मौरै औन्दै तौइ जिऊंदै देखै; केती ता मारा खान्दै-खान्दै मौरौ गौरै और छुटकारौ नाई चाओ, एथीलै कि आच्छे दुजी बैरै जिऊंदै हुणा रै साथी हुआ। 36 कई एक मजाका उडाउणा; और डीगै खाणै, पर बानणै, और कैदा दी पौडणै रै जरीए पौरखै। 37 ढोलै लाई; चारौ तौरफे आरी कौरौ चीरे; सै पौरखै; तलवारी कौरौ झांगै; सै गरीबी दी और दुखा दी, और कलेशा दी और दुख सहन कौरदी बारै भेरी और बाकरीयु रौ खालडौ कौषटौ औन्दी, ओरु-पुरु भौटकै; 38 और जागला, और टीरा, और डवारा दी, और धौतरी दी दरारा दी भौटकदै रौए। दुनीया तिउरै लायक नाई थी। 39 विश्वासा ही रै जरीए इऊ सौबी रै बारै दी आच्छी गवाई देई, तैबै भी तिउलै वाइदै की औन्दी चिजै नाई मीली। 40 कैलैकि परमेश्वरै आमूलै पैहलै कु एक आच्छी बूश ठहराई, कि सै बिण आमूए पककाई भीलै नाई पौहुवै।

परमेश्वर बाबा कौरौ सौताउणौ

12 एजै कारन जैबै कि गवाइउ रौ इणौ बौडौ बादल आमै धेरै औन्दै ई, ता आशौ, हर एक रोकणै वाली चीज और उलझणै वालै पाप दूर कौरियो, सेजी फेट जासदी आमारै फेट मारनी आ धीरजा कौरौ फेट जा देणी, 2 और विश्वासा रै काम कौरणै वालै और सिद्ध कौरणै वालै यीशु भीलै देखदै थाकेऊ लागी, जुणीए तेस खुशीलै जो तेस सामने छाडौ थौ लाजी री

कुछ फिकर ना कौरीयो कृसा रौ दुख सहन कियो, और परमेश्वर रै सिंहासना रै सुलटी बीए बौशौ। 3 एथीलै तेस माथे ध्यान छाड़ौ, ज़ुणीए आपणै विरोधा दी पापीऊ रौ ऐती विरोध सहन की गौ कि तुमै निराश हुइयो हिम्मत ना छाड़ौ। 4 तुमुए पापा कु लोडदै बारै तेसकै इणौ आमनौ-सामनौ नाई की कि तुमारौ लोऊ बआओ ई; 5 और तुमै तेस उपदेशा रौ, जो तुमुलै छौहरु रै जिणै दैओ औन्दौ आ बिसरी गोए ई : कि "ओ मेरौ छौहरु, प्रभु री डांट हौलखी बुश नाई जाणौ, और जैबै सेऊ ताउलै घूडका लौ ता हिम्मत ना छाड़। 6 कैलैकि प्रभु ज़ासकु प्यार कौरा सा, तेस डांटा भी, और ज़ास छौहरु ठीक कौरा, तेसदी डीगै भी ला सा।" 7 तुमै दुखा लै डांट सौमझियौ सहन कौरौ; परमेश्वर तुमु छौहरु जाणियौ तुमु आइलै बर्ताओ कौरा आ। सेऊ कैजौ छौहरु नाई ज़ास बाब नाई डांटदौ? 8 अगर सै डांट ज़ासरै हौकदार सारै हुआई, तुमुरी नाई हुइ ता तुमै छौहरु नाई, पर गान्दे कामा री संतान ठहरै। 9 तैबै जैबै कि आमारे शरीरा रौ बाब भी आमु डांटा थै और आमुए तिउरी इज्जत की, तैबै का आत्मा रै बाबा रै औजौ भी अधीन नाई रौइलै ज़ासकु आमै झाऊंदै रौई सा। 10 सै ता आपणी सौमझी कौरा थोडै दिना काले डांटा थै, पर सेऊ ता आमारे फाइदालै कौरा ई, कि आमै भी तेसरी पवित्रा रै हौकदार हुइ। 11 ऐजै बोग्गै दी कई रौंगा री डांट खुशी री नाई, पर शोका ही री बुश दिशा ई; तैबै भी जो तेस सहन कौरदै कौरदै पाकै हुइ गोए ई, बासिए तिउलै आरामा आइलै धौमा रौ प्रतिफल मिला सा।

उपदेश और खौबरदारी

12 एथीलै ढीलै हाथ और कमजोर घुँडे सीधे कौरौ, 13 और आपणै बांगणा कालै सिधी बाट चाणौ कि लौंगडौ ना चाई भौटकौ पर भौलौ चांगौ चाई हुओ। 14 सौबी आइलै मेल मिलाप छाड़ौ, और तेस पवित्रा रै लोडणै वालै बौणौ ज़ासरै बीणा कोई प्रभु लै कैबी भी नाई देखा लौ। 15 ध्याना कौरै देखदै रौओ, इणौ ना चाई हुओ कि कोई परमेश्वर रै बौडी दया कु दूर रौआ, या केजी कौडवी ज़ौड ज़ोमियौ कष्ट दिया, और तेसरै ज़रीए भौरी लौंग अशुद्ध हुआ। 16 इणौ ना चाई हुओ कि कोई आदमी गान्दे काम, या एसावा रै जिणै अधर्म ई ज़ुणीए एकी बारै री रोटी रै बौदलै आपणै पेहलै छौहरु हुणारी जागा बेची। 17 तुमै जाणाई कि बासिए जेबी तिणीए आशीष पाइणी चाई ता नालायक गौणुओ, और लेरी-लेरियो लोडनै माथे भी तेसलै जिऊ बौदलनै रौ मौकौ नाई मीलौ। 18 तुमा ता तिणै टिरा काए, ज़ास छुई सौका थै, और आगी कौरा जौलौ औन्दौ थौ, और काले बादल, और रात्र, पाणी बागुरा काए, 19 और बाँइशी री बाघ, और बोलणै वालै रै इणी बाघा काए नाई आशै, ज़ासरै शुणनै वालैउए औरज की कि ऐबै आमु आइलै औजौ बुशै नाई लाए। 20 कैलैकि सै तेस हुकम नाई सौई सौके : "अगर कोई गूंड भी टीर छुआं ता तेस माथे ढोलै लाइयो।" 21 और सेऊ दर्शन इणौ डराऊणौ थौ कि मूसे बोलौ, "हाऊं भौरी डौराउ और कांम्बाउ।" 22 पर तुमै सियोना रै टिरै काए, और जिऊंदै परमेश्वर रै इलाका, सौरगा रै यरुशलैम, काए और लाखौ सौरगा रै दूतै 23 और तिऊं पेहलै री आम सभा और खुंबली, ज़ासरै नाउं सौरगा दी लिखै औन्दै ई, और सौबी रौ फेसलौ कौरणै वालौ परमेश्वर काए, और पाकै किरै औन्दै धौमीऊ री आत्माए, 24 और कई वाचा रै बिचा दी यीशु और छडकाओ रै तेस लोऊ काए आशै ई, जो हाबिला रै लोऊ कु बडिया बुशै बोलाई। 25 खौबरदार रौइओ, और तेस बौलणै वालै कु मुं नाई फेरौ, कैलैकि सै लौंग जेबी धौतरी माथे रै चेतावनी देणै वालै कु मुं फेरियो नाई बौची सौके, ता आमै सौरगा माथे कु चेतावनी देणै वालै कु मुं फेरियो किणी बौची बोलै ई? 26 सेजै बौतै ता तेसरी बाघै धौतरी झुंगाई, पर आबै तिणीए इणी वाइदै किरै ई, "एकी बरै तैबै हाऊं ना सिरफ धौतरी पर सौरग भी झुगाउवाऊ।" 27 और ऐजी बुश 'एकी बारै औजौ' ऐजी बूश परकट कौरा ई कि जो चिजै झुगाइयाई, सै चाणी औन्दी चिजै हुणा रै कारण पौर टौलाई; जो चिजै नाई झुणकाईदी, सै सौदा बौणी रौआ। 28 इणी कौरै आमै ऐस राज्य

पाइयो जो झुणणै रौ नाई, तेस बौडी दया हाथा कु नाई डेउणै देइयो जेथारै ज़रिये आमै भौकती, और बिण डौरा कौरा परमेश्वर री इणी अराधना कौरौ जेथ कौरा सेऊ खुश हुआ सा; 29 कैलैकि आमारौ परमेश्वर छार चाणनै वाली आग आ।

मसीह जिन्दगी जिऊणै री सलाह

13 भाई चारै रौ प्यार बौणी थाका। 2 पाउणा री सेवा कौरणी ना बिसरेउ, कैलैकि एसरै ज़रीए कुछ लोगुए बिणा जाणीयो सौरगा रै दूता री सेवा की आ। 3 कैदीऊ आइलै इणै रौओ कि मानौ तुमै भी तिऊं आइलै कैदी आ, और ज़ास आइलै बुरौ बर्ताव कौरा ई, तिउरी भी इणौ जाणीओ सुधी कौरौ कि आमारौ भी जीऊ आ। 4 शादी सारी जागा दी इज्जता री बुश चाइ समजुणी, और शादी-बिस्तरौ निष्कलंक रौआ, कैलैकी परमेश्वर बुरै काम कौरणैवालै, और परस्त्रीगामियो रौ फेसलौ कौराई। 5 तुमारौ बोल-चाल ठीक चाई हुणौ, और जो कुछ तुमुकै आसा तेसी दी खुश रौओ; कैलैकि तिणीए आपु ई बोलौ आ, "हाऊं ताऊं कैबी नाई छाड़दौ, और ताऊं कैबी सौदा लै नाई छाड़दौ।" 6 एथीलै आमै बिणा डौरियो बौली ई, "प्रभु मेरौ सहायता कौरणै वालौ आ, हाऊं नाई डौरदौ; आदमी मेरौ का कौरा सौका आ।" 7 जो तुमारै अमुवै थै, और ज़ुणीए तुमुलै परमेश्वर रौ वचन शुणाओ आ, और याद छाड़ौ; और ध्याना कौरा तेसरै चाल-चलणा रौ अन्त देखीओ तिउरै विश्वासा रौ याद कौरौ। 8 यीशु मसीह इज और आज (युगानुयुग) कई वर्षा कु एकी जिणौ आ। 9 रौंगा-रौंगा रै नोखे उपदेशा कु नाई टौगीयो, कैलैकि मौना रै बौडी दया कु पाकौ रौइणौ भौलौ आ, ना कि तिऊं खाणै री चिजेऊ कु ज़ासकु काम कौरणै वालैऊ कु कुछ लाभ नाई हुओ। 10 आमारी एक इणी वेदी आ ज़ास माथे कु खाणै रौ हौक तिऊं लौंगु रौ नाई, जो ताम्बू री सेवा कौरा ई। 11 कैलैकि ज़ास धौणा रौ लोऊ बौडौ याजक पापा री बौली काले पवित्र जागा दी निंआ, तिउरौ शरीर चूडका कु बाइरै जाला ई। 12 इणै कौरा, यीशुए भी लौंगु लै आपणै ही लोऊ रै ज़रीए पवित्र कौरणै काले खोली रै बाइरै दुख सहन कियो। 13 एथीलै आशौ, तेसरी बुराई आपु माथे निंओ चूडका कु बाइरै तेस काए डेई। 14 कैलैकि इदँ आमारी पाकौ रौइणा रौ इलाकौ नाई, पर आमै एक आशणै वालै इलाकै लोडदै ई लागै औन्दै। 15 एथीलै आमै तेसरै ज़रीए स्तुति रुपी बौली, मतलब तिऊं ओदू रौ फल जो तेसरै नाउं रौ अंगीकार कौराई, परमेश्वर लै सौदा चढावाई। 16 भौलौ कौरणौ और उदारता दिखाउणौ नाई बिसरियो, कैलैकि परमेश्वर इणी बौली कौरा खुश रौआ सा। 17 आपणै अगुओ रौ हुकम मानौ और तिउरै हौक़ा दी रौओ, कैलैकि सै तिउरै जिणै तुमारै प्राणा काले जागदँ रौआ ई जिऊरै लेखौ ज़ा देणौ; सै ऐजौ काम खुशी कु कौरा, ना कि शेली सास नी-निंओ, कैलैकि ऐजी हालता दी तुमुलै कुछ फाइदौ नाई। 18 आमुलै प्राथना कौरदँ रौइओ, कैलैकि आमारौ भरौसौ आ कि आमारौ विवेक शुद्ध आ : और आमै सौबी बुशु दी आच्छी चाल चालणी चाई। 19 प्राथना कौरणालै हाऊं तुमु औजौ भी सौमझावाऊ कि हाऊं शीग्री तुमु कई औजौ आशी बौलु। 20 आबै शान्ती रौ दाता परमेश्वर, जो आमारे प्रभु यीशु लै जो भेरी रौ बौडौ रखवालौ आ सनातन वाच रै लोऊ रै गुणै कु मौरै औन्दै मांझिए कु जिउंदौ कौरियो आणौ, 21 तुमै हर एक भौली बुशै दी ठीक कौरा, ज़ासकु तुमै तेसरी इच्छा पुरी कौरौ, और जो कुछ तेसकै आच्छौ लागा आ तेस यीशु मसीह रै ज़रीए आमु दी पैदा कौरा। तेसी री महीमा सौदा थाका औन्दै लागी। आमीन। 22 ओ भाईओ हाऊं तुमुकै औरज कौराऊ कि ऐजै उपदेशै री बुशै सहन कौरौ, कैलैकि मुंए तुमुलै भौरी आच्छै कौरा लिखौ औन्दौ आ। 23 तुमुकै इणौ पौतौ चाई हौणौ कि तीमुथियुस, आमारौ भाई छुटीगौ आ और अगर सेऊ शीग्री आशी गौ ता हाऊं तेस आइलै तुमुकु मीलुलौ। 24 आपणै सारै अगुवौ और सारै पवित्र लौंगु लै बोलौ। इटली वालै तुमुलै ढाल बोला ई। 25 तुमु सौबी माथे बौडी दया थाका औन्दै लागी। आमीन।

याकूब

अभिवादन

1 परमेश्वर और प्रभु यीशु मसीह रै दास याकूबा री तौरफा कु तिउं बाराह खानदाना लै जो अलग-अलग रौआ ई ढाल पौउंचा।

विश्वास और औकल

2 ओ मैरै भाइयो, जेबी तुमै अलग-अलग मुसीबता दी पड़ा लै, ता इरें पुरी खुशी री बूश सौमझौ, 3 इणै ज्ञाणीयो कि तुमारौ विश्वासा पौरखीयो, धीरज पैदौ हुआ। 4 पर धीरज आपणौ काम पुरौ कौरनै दैओ कि तुमै पुरै शुद्ध बौणा, और तुमु दी केजी बुशा री कामी ना रौआ। 5 पर अगर तुमु मांझीया कु कासी कै भी अकला री कामी औली ता परमेश्वरा कु मांगा लौ, जो बिण पुछे सारेऊ कै भरपूर दिया सा, और तेसलै दिया आ। 6 पर विश्वासा कौरी मांगा, और कुछ शक ना कौरा कैलैकि शक कौरनै वालै समुन्दरा रै छालै जिणे ई जो बागुरा कौरी बौआ, और उछला ई। 7 इणौ आदमी इणौ ना सुंचा कि मुलै कुछ प्रभु कु मिला आ, 8 इणौ आदमी दोगलै जिवा रौ और आपणी सारी बुशा दी चाचल आ।

गरीबी और अमीरी

9 निउलौ भाई आपणी उंची पदवी माथे घमण्ड कौरा, 10 और सेठ आपणी गरीबी माथे; कैलैकि सेऊ घासा रै फुला बाशीए झौड़ा आ। 11 कैलैकि सुरज निकलीयो ताती रुड़ लागा, और घास शुखावा, और घासा रौ फूल पोरु झौड़ा आ तेथरी सुंदरता हुआ खतम। इणौ ई सेठ भी आपणी बाटा दी हांडदै-हांडदै धूल-माटे दी मिला।

पोरख और लालच

12 आशीष वालौ आ सेऊ आदमी जुण परीक्षा दी खौडौ रौआ आ, कैलैकि सेऊ परीक्षा दी खौडौ रौइयो जीन्दगी रौ सेजौ ताज पा लौ जेथरौ वायदौ परमेश्वरै आपणै प्रेम कौरनै वालेऊ आइलै कियो आ। 13 जैबै कासरी परीक्षा औली ता सेऊ इणौ ना बोला कि मेरी परीक्षा परमेश्वरा री तौरफा कु आ; कैलैकि ना ता परमेश्वर बुरी बुशेऊ दी पौरखदौ, और ना आपु परीक्षा कौरदौ। 14 पर हर आदमी आपणी बुरी इच्छा दी फौसीओ परीक्षा दी पौड़ा। 15 तैबै बुरी इच्छा गोरकडी हुइयो पाप पैदौ कौरा आ, और पाप जैबै भौरी बौड़ा ता मौत पैदी कौरा आ। 16 ओ मैरै प्यारै भाईओ, धोखो ना खाओ। 17 कैलैकि कोई भी आच्छौ बरदान और हर एक भौरी आच्छौ दान माथा ओउलै आ, और प्याशेरु रै बाबा री तौरफा कु मिला आ, जेथदी ना ता कोई बदलाअ हुई सौकदौ और ना ओरु-पोरु हुइओ तेस माथे छाई पौडदी। 18 तिणीए आपणी मौजी कौरी आमै सौचुचाई रै वचना कौरी पैदै किरै ई, ताकी आमै तेसरी चाणी ऐन्दी चिजेऊ मांझीया कु पैहलौ फल बौणा।

शुणनौ और कौरणौ

19 ओ मैरै प्यारै भाईयो, इरें बूश तुमै ज्ञाणौ : हर आदमी शुणना लै तैयार और बोलणा लै सुलै और रोशा लै शांत रौआ, 20 कैलैकि आदमी रै रोश परमेश्वरा री धार्मिका रौ मुकाबलौ नाई कौरी सौकदौ। 21 एथीलै सारी बुराई और बैर भाव दूर कौरीओ, तेस वचन निउलै कौरी अपणाओ जो तुमारै जिवा दी बिजौ औन्दी, जो तुमारै प्राण बचाई सौका आ। 22 पर वचना माथे हाण्डणै

वालै बौणौ, और शुणनै वालै नाई जुण आपु लै धोखौ दिया ई। 23 कैलैकि जुण कुण वचन शुणनै वालौ औलौ और तेस माथे हाण्डणै वालौ नाई औलौ, ता सेऊ तेस आदमी जिणौ आ जुण आपणौ असली मूह शिशे दी देखा आ। 24 एथीलै कि सेऊ आपणौ मुंह देखीयो डिया और तेबी बिसरा कि मैरौ मूह किणौ थौ। 25 पर जो आदमी आज्ञादी रै पाकै नियम-कानूना माथे ध्यान कौरा आ, सेऊ आपणै कामा दी एथीलै आशीष पा सा कि शुणीयो बिसरदौ नाई पर तिणौओ काम कौरा आ। 26 अगर आपुलै कुण भगत सौमझा लौ और आपणी जीभा दी लगाम नाई ला लौ, पर आपणै जिवा लै धोखौ दिया लौ, ता तेसरी भक्ति बेकार आ। 27 आमारे परमेश्वर बाबा रै नजदीक शुद्ध और साफ भक्ति इरे आ कि बेघर और विधवा लोगु रै दुःखा दी देखभाल कौरा और आपु संसारा दी बिण पापा रौ रौआ।

पक्षपाता रै विरुद्धा ई खौबरदारी

2 ओ मैरै प्यारै भाईयो आमारे महीमावालै प्रभु यीशु मसीह माथे तुमारौ विश्वास भेदभाव वालौ ना चाई हुओ। 2 कैलैकि अगर एक आदमी सुनै रै कौडै और आच्छे जुडकै भीड़ियो तुमारी खुम्बली दी आशा लौ, और एक गरीब भी गांदै जुडकै भीड़ियो आशा लौ, 3 और तुमै तेस आच्छे जुडकै भीडै औन्दै आदमी भीलै देखीयो बोला लै, "तू इदै आच्छी ज़ागहा दी बोश," और तेस गरीबा लै बोला लै, "तू इदै खौडौ रौऊ," या मैरै बांगणै काए बोश।" 4 तैबै का तुमुए आपु मांझीए भेदभाव नाई कियो और बुरै विचारा कौरी फैसलै कौरनै वालै नाई बौणै? 5 ओ मैरै प्यारै भाईयो, शुणौ। का परमेश्वरै इरें धौतरी रै गरीब नाई चुनै कि विश्वासा दी सेठ और सेजै राजा रै हकदार औलै, जेथरौ वादौ तिणीए तिउं आइलै कियो जुण तेस आइलै प्यार कौरा ई? 6 पर तुमुए तेस गरीबा री बेइज़्जती की। का सेठ लोग तुमु माथे जुल्म नाई कौरदै, और का सेई ई तुमु कोर्टा दी घीशी-घीशीयो नाई निदै? 7 का सै तेस बौडै नावां री बेइज़्जती नाई कौरदै ज़ासरै तुमुलै बोला ई? 8 तैबै भी तुमै पवित्र शास्त्रा रै एजे वचना जिणौ, कि "तू आपणै पडोसी आइलै आपु जिणौ प्यार कर" सौचुची तेस राज नियम पुरौ कौरा ई, ता आच्छौ कौरा ई। 9 पर अगर तुमै भेदभाव कौरा ई ता पाप कौरा ई; और नियम तुमु गुनाही चाणा ई। 10 कैलैकि जुण सारै नियम माना आ, और एक बुश बिसरा पोरु, ता सेऊ सारी बुशा दी आरोपी बौणा आ। 11 एथीलै जुणीए इणौ बोलौ, "तू गान्दै काम नाई कौरै" तिणीए इणौ भी बोलौ, "कि तू खून नाई कौरै" एथीलै अगर तू गान्दै काम नाई कौरदौ पर खून कौरा ई ता तू नियम ना मानणै वालौ बौणौ। 12 तुमै तिउं लोगु जिणै वचन बोलौ और काम भी कौरौ, ज़ासरौ फैसलौ आज्ञादी रै नियमा कौरी हुणौ आ। 13 कैलैकि जुणीए दया नाई की, तेसरौ फैसलौ बिण दया रौ हुणौ : दया फैसलै माथे जीती ऐन्दी ओआ।

विश्वास और कौरम

14 ओ मैरै भाईयो, अगर कुण बोलालौ कि मुकै विश्वास आ पर सेऊ काम नाई कौरा लौ तैबै एस कौरी का फाइदौ आ? 15 अगर कुण भाई-बौइण बिण जुडकै आ, और तिउंकै हर रोज़ रोटी री जुरत औली, 16 और तुमु मांझीया कु कुण तिउंलै बोला लौ, "शांती कौरी डैओ, तुमै न्यातै, और रोज़ औन्दै रौ ओ," पर जो चिजे शरीरा लै ज़रुरी आ तिउं नाई लै दिया आ तैबै का फाइदौ आ? 17 तिणी ई विश्वास भी, अगर तेथ आइलै काम नाई औलै ता विश्वास आपु दी मौरौ औन्दौ आ। 18 पर कुण बोली सौका कि, "मुकै विश्वास आ और हाऊं काम कौरा ऊ। तू आपणौ विश्वास मुकै बिण कामै देखाऊ;

और हाऊं देखाला ऊ आपणों विश्वास आपणें कामा कौरी ताउंके।¹⁹ ताउंके विश्वास आ कि एक ई परमेश्वर आ; तू आच्छौ कौरा ई। बुरी आत्माएं भी विश्वास छाड़ाई, और थरथरा ई।²⁰ पर ओ बेकार आदमी का तू इणों भी ना जाणदो कि कामा रें बिणा विश्वास बेकार आ? ²¹ जेबी आमारे बाबे अब्राहमै आपणों छेहर इसहाक बेदी माथे चड़ाओ आ, तैबे का सेऊ विश्वासा दी धोर्मी नाई बौणो? ²² और ताएं देखी गौ आ कि विश्वास आपणें कामा आइलै मिलीओ असर टालो आ और कामा कौरी विश्वास पाकौ हुओ आ, ²³ और पवित्र शास्त्रा रौ इयों वचन पुरो हुओ : आब्राहमै परमेश्वरा रौ विश्वास कियो, और इयों विश्वास तेसलै धर्मी बौणो; और तेसलै परमेश्वरा रौ गोश्टण बोला थै। ²⁴ एथीलै तुमुएं देखी गौ आ कि आदमी सिर्फ विश्वासा कौरी नाई, बल्कि कामा कौरी भी धोर्मी बौणा ई। ²⁵ तिणी ई राहब गान्दै काम कौरनै वाली भी, जेबी तिआंए दूत आपणें घौरा के छाड़े और दुजी बाटा बाटीए भेजे, तैबे का सें कामा कौरी धोर्मी नाई बौणी? ²⁶ जिणों शरीर बिण आत्मै मोरो औन्दो आ, तिणी विश्वास भी बिण कामे मोरो औन्दो।

जीभ वौशाई कौरणी

3 ओ मैरे भाईउओ, तुमु मांझीया कु भौरी शिक्षा दैणें वालें नाई बौणा, कैलैकि जाणा ई कि आमै शिक्षा दैणें वालें ओर भी आरोपी बौणनै ई। ² एथीलै कि आमुके कई बारें भूल हुआ; जुण बोलणे दी भूल नाई कौरदो सेऊ ता शुद्ध आदमी आ और सारो शरीर भी काबु कौरी सौका। ³ जेबी आमै आपणें वशा दी कौरना लै घोड़े रें मुआ दी लगाम लाई; तैबे आमै तेसरों सारों शरीर काबु ई कौरी सौकी। ⁴ देखो, बौड़ी किशती भी चाऊ केती बौड़ी औली तेज बागुरा कौरी चाला ई, तैबे भी एक पतवारा कौरी पुरी किशती चलाउणें वाले री मर्जी कौरी घुमा आ। ⁵ तिणी ई जीभ भी एक छोटो जेई टुकडो आ और सें बौड़ी-बौड़ी बुशै लाइयों तानै मारा सा। देखो इछांडी आगी कौरी केती बौड़े जांगला दी आग लागा सा। ⁶ जीभ भी एक आग आ; जीभ आमारे शरीरा दी एक बुराई रौ संसार आ, और सारें शरीरा दी धोबो ला सा पुरी जीन्दगी दी आग ला, और नरका री आगी दी जौलदै थाका लागी। ⁷ कैलैकि हर जाती रें पशु, चिडु-चिटकोर लौराउणें वालें जन्तु, और पाणी रें जीव, ता आदमी रें वशा दी हुई सौका ई, और हुई भी गौरे। ⁸ पर जीभ आदमी मांझीया कु कोई भी वशा दी नाई कौरी बौलदो; इरे एक इणी बुराई आ जो केबी ना रुकदी, सें प्राण नाष कौरनै वाले विशा कौरीए भौरुई ऐन्दी। ⁹ एथी कौरीए आमै प्रभु और बाबा री महीमा कौरी, और एथी कौरीए आदमी लै जो परमेश्वरा जिणों आ चाणों औन्दो शाप देई। ¹⁰ एकी मुआ कौरीए धन्यवाद और शाप दुइया निकला ई। ओ मैरे भाईओ, इणों नाई हुणों चाई। ¹¹ का जौला कु मिठो और कौडुओ दुइया पाणी निकला आ? ¹² ओ मैरे भाईओ, का फेडु रें पेडा दी जैतून, या अंगुरा री बेला दी अंजीर लागी सौका ई? तिणी कौडुरे जौला कु मिठो पाणी नाई निकलदो।

सौरगा री औकल

¹³ तुमु मांझीए बुद्धीमान और समझदार कुण आ? जुण इणों औलो सेऊ आपणों काम आच्छे चाल-चलना और निऊलै कौरीए पोगडें कौरा जो ज्ञाना कौरी पैदो हुआ ई। ¹⁴ पर अगर तुमै आपणें-आपणें जिवा दी कडवाहट और विरोध छाड़ा ई, ता सौचुचाई रें विरोधा दी घमण्ड ना कौरनी, और ना झूठ बोलनो। ¹⁵ इयों ज्ञान सेजो नाई जो सौरगा कु आशा, बल्की संसारिक, शारीरिक और शैतानी आ, ¹⁶ कैलैकि जिरे मतलबी और विरोध हुआ आ, तिरे हान्नी और सारी बुराई हुआई। ¹⁷ पर जो ज्ञान सौरगा कु आशा सा, सेऊ पैहलै ता पवित्र हुआ तैबे मिलनै-जुलनै वालो, शांती वालो, सहन कौरनै वालो, दयालु और आच्छे फौला कौरी भौरुओ औन्दो बिण भेदभाव और कपटा रौ ओआ सा। ¹⁸ मेल-जोल कौरनै वालें धार्मिकता रौ फल मिली-जुलीयो बौआ ई।

दुनिया आइलै दोस्ती

4 तुमु दी लड़ाई और झोगडें किवरु आशी गौरे? का तिऊं सुख आरामा कौरी नाई जो तुमारे शरीरा आइलै लौड़ा-झोगडा ई? ² तुमै आश ता

छाड़ा ई, पर तुमुलै मिलदै नाई; एथीलै तुमै खून कौरा ई। तुमै जौला ई पर कुछ भी पाई नाई बौलदै; तैबे तुमै लौड़ा और झगडा ई। तुमुलै एथिलै ना मिलदो कि मांगदै नाई। ³ तुमै मांगा ई पर मिलदो नाई, एथीलै कि बुरी इच्छा कौरी मांगा ई, ताकी आपणें ऐश-आरामा दी उडावा। ⁴ ओ गान्दै काम कौरनै वालीयो, का तुमै नाई जाणदै कि सण्सारा आइलै गोष्ठीणों परमेश्वरा आइलै नफरत कौरनी आ? मतलब जुण सण्सारा रौ गोष्ण हुणों चाहा सेऊ परमेश्वरा रौ दुश्मन बौणा आ। ⁵ का तुमै इणों जाणा ई कि पवित्र शास्त्र गलत बोला आ, “जेजी आत्मा तिणीए आमु बितै बसाई आ, का सें इणों चाह जेथरों इनाम जौलनो आ?” ⁶ सेऊ ता इणी भी बौड़ी दया दिया; एथीलै इणों लिखो औन्दो, “परमेश्वर घमण्डीऊ रौ विरोध कौरा आ, पर निऊलेऊ माथे कौरा आ दया।” ⁷ एथीलै परमेश्वरा रें अधीन हुओ; शैताना रौ सामनो कौरों, तैबे सेऊ तुमु काए कु दूर भागा। ⁸ परमेश्वरा काए आशो तैबे सेऊ भी तुमु काए आशा आ। ओ पापीओ आपणें हाथ शुद्ध कौरों; और ओ दोगलें लोगुओ, आपणें जिऊ पवित्र कौरों। ⁹ दुःखी हुओ और शोक कौरों, और लेरो तुमारे हंसणों शोका दी, और तुमारी खुशी निराशा दी बौदलीया। ¹⁰ प्रभु काए निऊलै बौणों तैबे सेऊ तुमु उचो उठावा।

भाईउ माथे दोष लाईणों

¹¹ ओ भाईओ, एकी दुजे री बदनामी नाई कौरों, जुण आपणें भाई री बदनामी कौरा या तेस माथे आरोप ला, सेऊ नियमा री बदनामी कौरा आ, और नियमा माथे आरोप ला आ; और अगर तू नियमा माथे आरोप लाअलो, तैबे तू नियमा माथे हाण्डणें वालो नाई पर तेथ माथे आफसर बौणों। ¹² नियम दैणें वालों और आफसर ता एका आ, जो बचाउणें और नाष कौरनै दी शक्ती वालो आ। पर तू कुण ई जुण आपणें पडोसी माथे आरोप ला आ?

घमण्डा रें विरोधाई खौबरदारी

¹³ तुमै जो इणों बोलाई, “आज या काले आमै केजे ओरी इलाके दी डेइयो तिरे एक साल बिताई, और, धांधें कौरीयो पैसें कौमाई।” ¹⁴ और इणों नाई जाणदै कि काले का हुणों। शुणों ता, तुमारी जीन्दगी आसा का सा? तुमै भाफा जिणे ई, जो थोड़ी देरा दी दिशा आ तैबे गायब। ¹⁵ तेथरें बौदलै तुमुए इणों बोलनो चाई, कि “अगर प्रभु चाहा लो ता आमै जीऊंदै रौउणे ई और एजो और सेजो काम भी कौरी ई।” ¹⁶ पर आबे तुमै आपणें बोलनै माथे शेखी मारीयो घमण्ड कौरा ई; इणों सारो घमण्ड बुरो हुआ आ। ¹⁷ एथीलै जुण भौलाई कौरनी जाणा और सेऊ नाई कौरदो ता तेसलै एऊ पाप आ।

पैसैवालेउ लै खौबरदारी

5 ओ सेठ लोगुओ, शुणों ता, तुमै आपणें आशणें वालें दुःखा लै राड़े देइ-देइयो लेरो। ² तुमारे धन शौड़ी गौ आ, और तुमारे जुडके किडेउरे खाई गौरे। ³ तुमारे सुनै-चांदी दी खौई लागी गोई; और सें खौई तुमारी गवाही दिया आ, और आगी जिणों तुमारे मांस खा आ। तुमुए आखरी जुगा दी धन-जयदाद कौट्टे कि ई आ। ⁴ देखो, जुणी जिमदारें तुमारे डोखरें लौरे ई, तिउरी सें मजदुरी जो तुमुए धोखे कौरीए आपके छाडी गोई थी सें हाके देंदे आ लागी ऐन्दी, और लौइणें वालेऊ री हाक्क प्रभु रें कौथु दी पौउंची गोई। ⁵ तुमै धौतरी माथे ऐश-आरामा दी थाके लागी और भौरी सुखी रौरे; तुमुए इरें बली रें दिना लै आपणों जिऊ पालो-पोसो, और मोटो-ताजो कियो। ⁶ तुमुए धोर्मी, आरोपी चाणीयो पोरु झांगो सेऊ तुमारे सामनो नाई कौरा थो।

दुःखा ई हिम्मत छाड़णी

⁷ एथीलै ओ भाईओ, प्रभु रें आशणें झाऊं शांती छाड़ो। देखो जिमदार धौतरी री मैंहगी फसला री आश छाडीयो पैहली और आखरी पाणी लागणें झाऊं शांती छाड़ा ई। ⁸ तुमै शांती छाड़ो; और आपणें जिऊ काठे छाड़ो, कैलैकि प्रभु रौ आशणो नजदीक आ। ⁹ ओ भाईओ, एकी दुजे माथे आरोप नाई लाओ, ताकी तुमै आरोपी ना बौणा; देखो आफसर दारा काए खौडो आ। ¹⁰ ओ भाईओ, जुण भविष्यवकुए प्रभु रें नावां कौरी बुशै लाई, तिऊं, दुःख उठाउणें और शांती छाड़ना लै याद कौरों। ¹¹ देखो, आमै शांती छाड़नै

वालेऊ लै आशीष वाले बोली ई, तुमुए अय्युबा रै सबर छाड़नै रै बारै दी ता शुणौ औलौ, और प्रभु री तौरफा कु तेथरौ इनाम मिलौ सेऊ ज़ाणी गौ आ, जेथ कौरी प्रभु री बौड़ी दया और दया पौगड़ी हुआ। ¹² पर ओ मैरै भाईओ, सारेऊ कु ज़रुरी बूश इए आ कि कसम ना खाणी, ना सौरगा री, ना धौतरी री, ना कास ओरी चिज़ा री; पर तुमारी बूश हां री हां और नाई री नाई चाई हुणी, कि तुमै सज़ा रै लायक ना बौणा।

प्रार्थना री शौक्ति

¹³ अगर तुमु मांझीए कुण दुःखी आ, ता सेऊ प्रार्थना कौरा। अगर खुश आ ता प्रभु री बौड़ाई कौरा। ¹⁴ अगर तुमु मांझीए कुण बिमार आ, ता कलिसिया रै स्याणै औटाओ, और सै प्रभु रै नावां कौरी तेस माथे तेला लाइयौ तेसलै प्रार्थना कौरा, ¹⁵ और विश्वासा री प्रार्थना कौरीयौ बिमार पोरु बौचा आ, और

प्रभु तेस चुंगीयौ खोड़ौ कौरा; और अगर तिणीए पाप भी औले कौरै औन्दै, ता तिउंरी भी माफी मिला आ। ¹⁶ एथीलै तुमै आपु मांझीए एकी दुजै काए आपणै-आपणै पाप मानौ, और एकी दुजै लै प्रार्थना कौरौ, जेथ कौरी चांगै हुआ : धौर्मी आदमी री प्रार्थना री शक्ति कौरीए भौरी कुछ हुई सौका। ¹⁷ एलिय्याह भी ता आमु बाशीए सुख-दुःख भोगी आदमी थौ; और तिणीए लेरी-लेरीयौ प्रार्थना कौरी कि पाणी नाई लागा; और साड़ै चिया साला झाऊं धौतरी माथे पाणी नाई लागौ। ¹⁸ तैबै तिणीए प्रार्थना कौरौ, और सौरगा कु पाणी लागौ और ज़मीन फौलदै लागी। ¹⁹ ओ मैरै भाइओ, तुमु मांझीया कु अगर कुण सौचाई री बाटा कु भटका लौ, और कुण तेस वापीस आणा लौ, ²⁰ ता सेऊ इणौ ज़ाणा लौ, कि ज़ुण कुण कास भटकाँ औन्दौ पापी वापिस आणा लौ, सेऊ एक प्राण मौता कु बौचावा आ और तिउरै पापा माथे पौरदौ पा सा।

1 पतरस

अभिवादन

1 पतरसा री तौरफा कु जो यीशु मसीह रौ प्रेरित आ, तिऊं परदेसिऊ रै नाऊं, जो पुन्तुस, गलतिया, कप्पदुकिया, आसिया और बिथुनिया दी तितर-बितर हुइयौ रौआई। 2 और परमेश्वर बाबा रै भविष्य ज्ञाना रै अनुसार, आत्मा रै पवित्र कौरणै रै जरीयै हुकम मानणौ, और यीशु मसीह रै लोऊ छिडकाउणा लै छोटै औन्दै ई। तुमुलै भौरी बौड़ी दया और शान्ति मिलदै रौआ।

एक जिउंदी आश

3 आमारै प्रभु यीशु मसीह रै परमेश्वर और बाबा रौ धन्यवाद, जुणीए यीशु मसीह रै मौरै औन्दै मांझिरे कु जीऊंदै हुणै रै जरीयै, आपणी बौड़ी दया कौरी आमै जीउंदी आशा लै नौवौ जन्म दैआ। 4 मतलब एक अविनाशी और निर्मल, और अजर मीराज कालै। जो तुमु कालै सौरगा दी आ छाडी ऐन्दी, 5 जेथरी देखबाल परमेश्वरा री सामर्थ और, विश्वासा रै जरीयै हुआ आ। तेस छुटकारै लै, जो आशणै वालै बौगै परगट हुणै वालौ आ, 6 और एजै कारण तुमै मगन हुआई, बल्की जरुरी आ कि आबै कुछ दिना झाऊं कई रौंगा री परिक्षा रै कारण दुखी हुआ; 7 और एऊ एथीलै आ कि तुमारौ पौरखौ औन्दौ विश्वास, जो आगी कौरी ताओ औन्दौ नाश हुए औन्दै सुनै कु भी भौरी कीमती आ, यीशु मसीह रै परगट हुणै रै बौगै खुश, और बौड़ाई, और इज्जता रौ कारण बोणा। 8 तेस कु तुमै बिण देखे प्यार छाडा ई, और आबै ता तेस माथे बिण देखे भी विश्वास कौरीयो इणै खुश और मगन हुआ ई, जो सुंचणै कु भी बाइरै और बौड़ाई कु भौरवौ औन्दौ आ। 9 और आपणै विश्वासा रौ इनाम, मतलब आत्मा रौ छुटकारौ पा आ ई। 10 एजै छुटकारै रै बारै दी तिऊं भविष्यवक्तुए भौरी लोडौ और जांच-पडताल की आ, जुणीए तिणै बौड़ी दया रै बारै दी जो तुमु माथे हुणै वाली थी, भविष्यदाणी की थी। 11 तिउंरे ऐजी बुशा री खोज की कि मसीह री आत्मा जो तिऊं दी थी, और पैहले कु सै मसीह रै दुखा री और तेथ बासिरे हुणै वाली बौड़ाई री गवाई दिया थै। सेऊ केजै और किणै बौगता रै बारै दी इशारौ कौरा थौ। 12 तिऊं माथे इणौ परगट कियो, कि सै आपणी नाई पर तुमारी सेवा लै इणी बुशै बोला थै, जासरी खबर आबै तुमुकै तिउरै जरिरे मिलौ जुणीए पवित्र आत्मा रै जरिरे जो सौरगा कु आ भेजौ औन्दौ: तुमुकै खुश खबरी शुणाई; और एजी बुशै सौरगा रै दूत भी ध्याना कौरी देखणै री इच्छा छाडाई।

चोखी जिउंदी जिउणै लै औटाईणौ

13 एजै कारण आपणी-आपणी औकला री कमर (गाची) बानिओ और खबरदार रौइओ तिणै बौड़ी दया री पुरी आश छाडौ, जो यीशु मसीह रै परगट हुणै रै बौगै तुमुकै मिलनै वालौ आ। 14 और हुकम मानणै वालै छोहरु जिणौ, आपणी बिण अकला रै बौगता रै पुराणै विचारा जिणै नाई बौणौ। 15 पर जिणौ तुमारौ औटाउणै वालौ पवित्र आ, तीणी ई तुमै भी आपणै सारै चाल-चलणा दी पवित्र बौणौ। 16 कैलैकि लिखौ औन्दौ आ, "कि पवित्र बौणौ, कैलैकि हाऊं पवित्र ऊ।" 17 और जेबी तुमै, 'ओ बाब' औटाइओ तेसकु प्राथना कोराई, जुण बिणा पशपात कौरीओ हर एकी रै कामा रै अनुसार फैसलौ कौरा आ, ता आपणै परदेसी हुणै रौ बौगता डौरा दी बिताओ। 18 कैलैकि तुमै जाणा ई, कि तुमारौ बेकार चाल-चलण जो दाद-परदाद कु आ चालौ औन्दौ, तेथ कु तुमारौ छुटकारौ चांदी-सुनै मतलब नाशवान यिजा रै जरिरे नाई हुआ। 19 पर

निर्आरोप और बिण पापा रै गाबडु मतलब मसीह रै किमती लोऊ कौरी हुआ आ। 20 तेसरौ ज्ञान ता दुनिया बौणनै कु पैहलै ओउलै ज्ञाणौ औन्दौ थौ, पर आबै आखरी जुगा दी तुमु लै परगट हुआ। 21 तेसरे जरिरे तुमै तेस परमेश्वर माथे विश्वास कौरा ई, जुणीए सेऊ मौरै औन्दै मांझिआ कु जिऊंदौ कियो, और बौड़ाई देई; कि तुमारौ विश्वास और आश परमेश्वरा माथे हुआ। 22 ता जेबी कि तुमुए आपणै भाईचारे री बिणा कपटा रौ प्यारा री सोचाई रै मानणै कु आपणै जिऊ पवित्र कौरी गौरे, ता तन-मौना लाइओ एकी दुजे कु भौरी प्यार छाडौ। 23 कैलैकि तुमुए नाशवान नाई पर अविनाशी बिजा कौरी परमेश्वरा रै जीउंदै और सौदा रौइणै वालै वचना कौरी नौवौ जन्म पाओ आ। 24 कैलैकि हर एक प्राणी घासा जिणौ आ, और तेस री सारी शोभा घासा रै फुला जिणी आ: घास शुका और फूल झोडा ई, 25 पर प्रभु रौ वचन जुगा-जुगा झाऊं पाकौ रोआ आ: और इए सेजी खुश-खबरी रौ वचन आ जो तुमुकै शुणाई गौ आ।

जिऊंदौ पात्थर और चोखी प्रजा

2 एथीलै सारै रौंगा रै भेदभाव और छल, कपट और डाह और बदनामी दूर कौरीओ, 2 नोए पैदै हुए औन्दै छोहरु जिणौ निर्मल, आत्मिक दुधा री इच्छा कौरौ, ताकि तेसरे जरिरे छुटकारै पाइणा लै बौड़दै रौआ, 3 अगर तुमुए प्रभु री किरपा रौ स्वाद चाखी गौ आ। 4 तेस काए आशीओ, जुण आदमीउए निक्कामौ ज्ञाणौ, पर परमेश्वरा रै नजदीक चुनौ औन्दौ और भौरी कीमती जीउंदौ पात्थर आ, 5 तुमै भी आपु जीउंदै पात्थरा जिणै आत्मिक घोर बौणदै थाका ई, जेथ कौरी याजकु रौ पवित्र समाज बौणीओ, इणै आत्मिक बलिदान चोडाओ, जो यीशु मसीह रै जरिरे परमेश्वर अपणावा आ। 6 एजै कारण पवित्र शास्त्रा दी भी आ लिखौ औन्दौ, कि देखो, हाऊं सिप्योना रै कुणै मुंडा कु चुनौ औन्दौ और भौरी कीमती पात्थर छाडाऊ: और जुण-कुण तेस माथे विश्वास कौरा आ, सेऊ केजी रीती कौरी शर्मिंदौ नाई औन्दौ। 7 तुमु लै जुण विश्वास कौरा ई, सेऊ ता किमती आ, पर जुण विश्वास नाई कौरदै तिऊं लै जेजौ पात्थर बाडीउए निकामौ ज्ञाणौ थौ, सेऊ ई कुणै रौ मूंड हुई गौ। 8 और ठोकर लागणै रौ पात्थर और ठोकर खाणै रौ डोकौ बौणी गौ आ: कैलैकि सै ता वचन नाई मानदै तैबे ठोकर खा ई, और सै एथीलै भी छाडै थै। 9 पर तुमै एक चुनै औन्दै वंश, और राजपदधारी, याजकु रै समाज, और पवित्र लोग, और (परमेश्वरा री) आपणी प्रजा ई, एथीलै कि जुणीए तुमै न्यारै मांझिया कु आपणै नोखै प्याशै दी औटाए औन्दै ई, तेसरे गुण परगट कौरौ। 10 तुमै पैहलै ता कुछ भी नाई थै पर आबै परमेश्वरा री प्रजा ई: पर आबै तुमु माथे दया हुई गई आ।

मसीही रौ काम

11 ओ प्यारेउओ, हाऊं तुमु कु औरज कौराऊ कि तुमै आपुलै परदेशी और यात्री जाणिओ तिऊं संसारिक विचार (दुनिया री इच्छा) कु जो आत्मा कु युद्ध कौरा ई, बौची रौओ। 12 दुजी ज्ञाती रै लोग कु तुमु रौ चाल-चलण आच्छौ चाई हुआ; ताकी जेजी-जेजी बुशु दी तुमु बुरै जाणिओ बदनाम कौरा ई, सै तुमारै आच्छे कामा देखीओ; तिऊं रै कारण बौड़ी दया रै दिना दी परमेश्वरा री बौड़ाई कौरा आ।

परमेश्वर रै नुकुर

13 प्रभु लै आदमीऊ रै कौरै औन्दै हर एक इन्तजामा रै अधीन रौओ, राजेरु रै एथलै कि सेऊ सारेऊ रौ परधान आ, 14 और आफसरा रै एथलै, कैलैकि सै कुकर्मिऊ लै सौजा देणा लै, और सुकर्मिऊ री बौड़ाई कौरना लै तेसरै भेजे औन्दै ई। 15 कैलैकि परमेश्वर री मौरिणी इणी आ, कि तुमै आच्छे कामा कौरीओ बिण औकली रै लोगु री अज्ञानता री बुशै बन्द कौरा। 16 और आपु लै आजाद जाणौ पर आपणी एजी आजादी कौरी बुराई लै आड नाई चाणौ, पर आपु परमेश्वर रै दास समझिओ चालौ। 17 सारेऊ री इज्जत कौरौ, भाईऊ कु प्यार कौरौ, परमेश्वर कु डौरौ, राजेरु री इज्जत कौरौ।

मसीह आमुरौ आदर्श

18 ओ सेवको, हर रौंगा रै डौरा लै आपणै मालिका रै अधीन रौ, ना सिरफ भौलेऊ और ना निउलेऊ रै, पर कुटिली (काठेरु) रै भी। 19 कैलैकि अगर कुण परमेश्वर रौ विचार कौरीओ अन्याय कौरी दुख उठाइओ क्लेश साहा आ, ता इणौ आच्छे आ। 20 कैलैकि अगर तुमुए गौलती कौरीओ मार खाई आ और धीरज छाड़ौ आ, ता एथदी का बौड़ाई री बुश आ? पर अगर आच्छे काम कौरीओ दुख उठाओ और धीरज छाड़ौ आ ता एऊ परमेश्वर कै आच्छे लागा आ। 21 और तुमै एथीलै औटाई भी गौए, कैलैकि मसीह ऐ भी तुमुरी ताइए दुख उठाइओ तुमु लै एक सबूत देई गौ आ, कि तुमै भी तेसरी निषाणी माथे चाला। 22 ना ता तिणिए पाप किओ, और ना तेसरै मुंआ कु गलत बूश निकली। 23 सेऊ गाली शुणिओ गाली नाई दिआ थौ, और दुःख उठाइओ कासी लै भी धौमकी नाई दिआ थौ, पर आपु सौचवै फेसलै कौरनै वालै रै हाथा दी सौभाला थौ। 24 सेऊ आपु ई आमारे पाप आपणै शरीरा माथे नीईओ कृसा माथे चौड़ी गौ, जेथकौरी आमै पापा दी मोरीओ धार्मिकता लै ज़िन्दगी बितावा: तेसी रै मार खाणै कु तुमै चांगे हुए। 25 कैलैकि तुमै पैहलै भोटकी औन्दी भेरीऊ जिणै थै, पर आबे आपणै प्राणा री रखवाली और अध्यक्षा कारे वापिस आशी गौए।

पति और पत्नि

3 ओ छेउडिउओ, तुमै भी आपणै बोउटेऊ रै अधीन रौओ। एथीलै कि अगर इऊं मांझिए कुण इणै ओलै जुण वचन नाई मानदो, 2 तैभै भी तुमारै डौरा कौरी पवित्र चाल-चालण देखियो बिण वचन आपणी-आपणी छेवडी रै चाल-चालणा ज़ोरिए खिचिया। 3 और तुमारौ शिंगार देखाउटी नाई चाई हुणौ, मतलब बाल बेलणै, और सुनै रै गैहनै या रौंगा-रौंगा रै जुडकै भिडणै, 4 पर तुमारौ छिपौ औन्दौ और भितलौ स्वभाव निउलौ और जिवा री निवलौपना री कादी ना नाष हुणै वाली सजावटा कौरी सौजी ऐन्दी रौआ। कैलैकि परमेश्वर री नौजरी दी सेऊ भौरी किमती आ। 5 और पुराणै जमानै दी पवित्र छेवडी भी, जो परमेश्वर माथे आश छाड़ा थी, आपु इणी रीती कौरी सौजावा और आपणै-आपणै बोउटै रै (हुकम माना थी) अधीन रौआ थी। 6 जिणौ सारा नावां री छेउडी आपणै बोउटै इब्राहीमा रौ हुकम माना थी और तेस लै मालिक बोला थी: ता तुमै भी भौलाई कौरौ, और केजै रौंगा रै डौरा कु नाई डौरौ, ता तुमै भी तेसरी छोटुडी बौणा ई। 7 तिणी ई ओ बोउटेउओ, तुमै भी बुद्धिमानी कौरी आपणी बोउटीऊ आइलै आपणी ज़िन्दगी बिताओ और छेवडीऊ निर्बल ओखर ज़ाणिओ तिआंरी इज्जत कौरौ, इणै सौमझिओ कि आमै दुइआ आपणै ज़िन्दगी रै वरदाना रै वारिस ई, जिणै कौरी तुमारी प्राथना नाई रुका।

भौलाई कौरणै कौरी सौताव

8 निदान, सारै रै सारै एकी मोनै और कृपावालै और भाईचारै रै प्यार कौरनैवालै, और करुणावालै, और निउलै बौणौ 9 बुराई रै बौदलै बुराई नाई कौरौ; और ना गाली रै बौदलै गाली दैओ; पर एजी रीति कौरी आशीष दैओ: कैलैकि तुमै आशीषा रै वारिस हुणालै ई ओटाए औन्दौ। 10 कैलैकि जुण-कुण ज़ीउणे री इच्छा छाड़ा आ, और आच्छे दिन देखणै चाहा ई, सै आपणी ज़ीभ बुराई कु, और आपणै मुंह बुरी बुशै लाइणै कु रोकौ। 11 सेऊ बुराई रौ साथ

छाड़ा लौ, और भौलाई ई कौरा लो; सेऊ मेल-मिलाप लोड़ा लौ और तेसरी खोजा दी रौआ लौ। 12 कैलैकि प्रभु री आखी धर्मिऊ माथे लागी रौआ ई, और तेसरै कौन्थु तिऊं री। औरजा माथे लागी रौआ ई; पर प्रभु बुराई कौरणै वालै रै विरोधा दी रौआ आ। 13 और अगर तुमै भौलाई कौरना लै त्यार रौआ लै ता तुमारी बुराई कौरणै वालै कुण ई? 14 और अगर तुमै धर्मिऊ रै कारण दुःख भी उठावा, ता भौलै ई तुमै; पर लोगु रै डौराउणै कु नाई डौरौ, और नाई घबराओ, 15 पर मसीह प्रभु ज़ाणीओ आपणै-आपणै ज़ीआ दी पवित्र सौमझौ, और जुण-कुण तुमु कु तुमारी आशा रै बारै दी कुछ पुछा ता तेसलै जवाब देणा लै रोज त्यार रौओ, पर निउलै और डौरा आइलै: 16 और विवेक भी शुद्ध छाड़ौ, एथीलै कि जेजी बुशु रै बारै दी तुमारी बदनामी औआ, तिऊं रै बारै दी सै जो तुमारी मसीही आच्छे चाद-चालणा रौ अपमान कौरा आ, शर्मिदो औआ आ। 17 कैलैकि अगर परमेश्वर री इणी मौरजी आ, कि तुमै भौलाई कौरणै रै कारण दुख उठाओ, ता सै बुराई कौरणै रै कारण दुख उठाणै कु उतम आ। 18 एथीलै मसीह भी, मतलब अधर्मिऊ रै लोगु लै धर्मि पापा रै कारण एकी बारै दुख उठाओ, ताकि आमै परमेश्वर कारे पहुचावा: सेऊ शरीरा रै भाव कु ता घात की ई गौ आ, पर आत्मा रै भाव कु जिउंदौ कियो। 19 तिदै ई सेऊ डेइओ तिऊं कैदी आत्माओं कै भी परचार कियो आ। 20 जुणिए तेस बीतै बौगता दी हुकम नाई मानौ, जेबी परमेश्वर नूह रै दिना दी धीरज छाड़िओ थौ रौओ औन्दौ, और सेऊ जहाज बौणदै थौ लागौ औन्दौ, जेथ दी बोशीओ थोडै लोग मतलब आठ प्राणी पाणी कु बौची गौए। 21 और तेस पानी रौ अनैणौ भी, मतलब बपतिस्मा, यीशु मसीह रै ज़ीउंदै हुणै कु, आबै तुमु बौचावा आ; एथ कौरी शरीरा रौ मौल दूर कौरणै रौ मतलब नाई आ, पर शुद्ध विवेका कु परमेश्वर रै वशा दी हुणै रौ मतलब आ। 22 सेऊ सौरगा माथे डेइओ परमेश्वर री सुलटी भीलै बोशी गौ आ; और सौरगा रै दूत और अधिकारी और सामर्थी तेसरै अधीन कौरी गौए ई।

बौदलुईऔन्दी ज़िन्दगी

4 ता जेबी मसीहै शरीरा दी दुख उठाओ ता तुमै भी तिरे मनसा धारण कौरिओ हथियार बानौ कैलैकि जुणिए शरीरा दी दुख उठाओ, सेऊ पापा कु छुटी गौ आ, 2 ताकी भविष्य दी आपणौ बौचौ औन्दौ शारीरिक ज़िन्दगी आदमीऊ री अभिलाषा रै अनुसार नाई पर परमेश्वर री इच्छा रै अनुसार बिताओ। 3 कैलैकि दुजी ज़ाती रै लोग इच्छा रै अनुसार काम कौरणै, और लुचपना री बुरी अभिलाषा, मतवालापन, लीलाक्रीडा, पियकडपन, और बुरी मूर्तिपूजा दी ज़िदरा झाऊं आमुरे पैहलै बौग्त गंवाओ, तेती ई भौरी आ। 4 एथीलै सै हैरान औआ ई कि तुमै एस भारी लुचपना ई तिऊंरौ साथ नाई दैन्दै, एथीलै सै बुरौ भौलौ बोलाई ई; 5 पर सै तेसलै जुण ज़िउंदौ और मौरै औन्दै फेसलौ कौरणा लै त्यार आ, लेखौ दिया ई। 6 कैलैकि मौरै औन्दै कै भी सुसमाचार एथीलै शुणाओ कि शरीरा दी ता आदमी रै अनुसार तिऊंरौ फेसलौ हुआ, पर आत्मा दी सै परमेश्वरै रै अनुसार जीउंदौ रौआ।

परमेश्वर रै भण्डारी

7 सारी बुशैऊ रौ खात्मौ जल्दी हुणै वालौ आ; एथीलै निउलै हुइओ प्राथना लै खबरदार रौओ। 8 सारेऊ कु बौडी बूश एजी सा कि एकी दुजै कु भौरी प्यार छाड़ौ, कैलैकि प्यार कई पाप दुमा आ। 9 बिण कुडकुड़ाए एकी दुजै री खातर-इज्जत कौरौ। 10 जासकै जो वरदान मिलौ आ, सै तेस परमेश्वर रै कई रौंगा री बौडी दया रै भौलै भंडारीऊ जिणै एकी दुजै री सेवा दी लाओ। 11 अगर कुण बोला लौ, ता इणौ बोला कि जिणौ परमेश्वर रौ वचन आ; अगर कुण सेवा कौरा लो, ता तिरे शक्ति कौरिरे जो परमेश्वर दिया सा; जेथकु सारी बुशु दी यीशु मसीह रै ज़रीए, परमेश्वर री बौड़ाई परगट हुआ। महिमा और राज पिडी-पिडी झाऊं तेसी रौ आ। आमीन।

मसीह रै दुःखाई शामिल हुणौ

12 ओ प्यारेउओ, जो दुःखा वाली आग तुमु पौरखणा लै तुमु मांझीए भौडकी ऐन्दी आ, एथकु इणौ समझिओ हैरान नाई हुओ कि केजी नोखी बुश

तुमु माथै बितदी आ लागी ऐन्दी। 13 पर जिणै-जिणै मसीह रै दुःखा दी साथी औआ ई, खुशी मौनाओ, जेथकु तेसरी बौड़ाई रै परगट औणै रै बौगता ई भी तुमै खुश और मगन रौओ। 14 तैबै अगर मसीह रै नावालै तुमारी बेईज्जती कौरा ई ता तुमै भौलै ई, कैलैकि महिमा री आत्मा, जो परमेश्वरारी आत्मा सा, तुमै माथै आशा सा। 15 तुमु मांझिऐ कुण आदमी खुन कौरनै वालौ या चोरी कौरणै वालौ या बुरै काम कौरणै वालौ या पराए कामा दी हाथ पाइणै रै कारण दुख नाई पा। 16 पर अगर मसीह हुणै रै कारण दुःख पाआई, ता तुमै नाई शौरमियौ, पर एजी बुशु लै परमेश्वरारी बौड़ाई कौरौ। 17 कैलैकि सेजौ बौगता आशी गौ कि पैहलै परमेश्वरारै लोगु रौ फैसलौ कौरिया; और जेभी कि फैसलै री शुरुआत आमु मांझिऐ हुआ ली ता तिउंरौ का खत्मौ हुआ जुण परमेश्वरारौ खुशी रौ सन्देश नाई मानदै? 18 और "अगर धौर्मी आदमी परेशानी कु छुटकारौ पाआलौ, ता भौक्ती नाई कौरणै वालौ और पापी रौ का ठिकाणौ?" 19 एथीलै जो परमेश्वरारी मौरजी रै अनुसार दुख ऊठावा ई, सै भौलाई कौरदी बारै आपणै-आपणै प्राण विश्वास वालै चानणै वालै परमेश्वरारै हाथा दी सौंभाला लै।

पुराणु और नौएँ जवानेउ लै सलाह

5 तुमु मांझियै जुण पुराणौ आ, हाऊं तिऊं जिणौ पुराणौ और मसीह रै दुखा रौ गवाह और परगट हुणै वाली बड़ाई दी शामिल हुईओ तिऊं इणौ समझावा ऊ 2 कि परमेश्वरारी तिऐं खुंबली री, जो तुमुं मांझिऐ आ देखभाल कौरौ; और इणै दबाव कौरौ नाई पर परमेश्वरारी मौरजी रै अनुसार खुशी कौरिए, और बुरी कौमाई लै नाई पर मौना लाइओ कौरौ। 3 जेजै लोग तुमुकै दैओ औन्दै ई, तिऊं माथै हक नाई देखाओ पर खुंबली लै आच्छै

बौणौ। 4 जेभी परधान रखवाली कौरणै वालौ परगट हुआ लौ, ता तुमुकै महिमा रौ ताज मिला आ जो केभी भी खराब नाई औन्दौ। 5 इणी ई कौरिए नोएँ-जवानुओ तुमै भी पुराणै आदमिऊं रै आधीन रौओ या तुमै सारै एकी दुजै री सेवा लै निउलै हुइओ कौमर बानी छाडौ, "कैलैकि परमेश्वर घमंडिऊ रौ विरौध कौरा आ, पर निउलै माथै कौरा आ बौड़ी दया।" 6 एथीलै परमेश्वरारै तागत वालै हाथा थालै निउलै हुइओ रौओ, जेथ कौरौ सेऊ तुमु ठीक बौगता दी बौड़ावा। 7 आपणी सारी फिकर तेस माथै टालौ, कैलैकि तेस कै तुमु रौ ध्यान आ। 8 खबरदार हुओ, और उज्जी थाकौ; कैलैकि तुमुरौ विरौधी शेतान उंगुरणै वालै ब्रागा रै बराबर एजी ताका दी रौआ आ कि कास धेड़ियौ खाउलै। 9 विश्वासा ई पाकै हुइओ, इणौ जाणियौ तेसरौ सामनौ कौरौ कि तुमुरौ भाई जुण संसारा ई आ इणै दुख लागै औन्दै सौहिन्दै। 10 आबै परमेश्वर जुण सारी बौड़ी दया रौ बाब आ, जुणिए तुमै मसीह दी आपणी केभी ना खत्म हौणै वाली महिमा लै ओटाए, तुमुरै थोडै ई दुःख उठाउणै बासिए आपु ही सिध्द और पाकौ और तागती वालौ कौरा। 11 तेसी रौ राज पीड़ी-पीड़ी झाऊं चाई रौओ। आमीन।

आखरी अभिवादन

12 मुंइयै सिलवानुसा रै हाथा दी, ज़ास हाऊं विश्वासा रै काबिल भाई सौमझा ऊ, थोडो-थोडो लिखियो तुमै सौमझाए ई, और एजी गवाई देई आ कि परमेश्वरारी सौची बौड़ी दया एजी ई आ, एथी दी पाकै रौओ। 13 जेजे बेबीलोना ई तुमु जिणै चुनै औन्दै लोग ई, सै और मैरौ छोहरू मरकूस तुमुलै ढाल कौराई। 14 प्यारा रै खोबु कौरौ एकी दुजै कै ढाल कौरौ। तुमु सारेऊ लै, जुण मसीह दी ई, शान्ति मिलदै चाई रौई।

2 पतरस

अभिवादन

1 शमोन पतरसा री तौरफा कु जो यीशु मसीह रौ दास और प्रेरित आ, तिऊं लोगु रै नावं जुणीए आमु रै परमेश्वर और उध्दार कौरणै वालो यीशु मसीह री धोर्मा रै कामा कु आमु रौ बोरी किमती विश्वास पाओ आ। 2 परमेश्वरा रै तौरफा कु आमु रै प्रभु यीशु री पहचान रै दवारा बोड़ी दया और शान्ति तुमु दी बोरी बोड़दी रोए।

परमेश्वरा रौ औटाउणौ और छॉटणौ

3 कैलैकि तेसरै परमेश्वरा री सामर्थ कु सारेऊ कुछ जो जीवन और भक्ति कु जुणौ औन्दौ आ, आमु तेस री पहचान रै जरिये दिओ औन्दौ आ, जुणिए आमै आपणी ही महिमा और सद्गुण रै अनुसार औटा औ। 4 जासरै जरिये तिणीए आमु लै बहुमुलय और बोरी बोड़ी कौसम दी थी: ताकि इऊं रै जरिये तिमै तेस बुराई कु छुट्यु जो दुनिया दै बुरी इच्छा कु हुआ सा, परमेश्वरा री चाल चलना आइलै शामिल हुआ। 5 और एजी कारणा तुमै सारै जरीयौ रौ कोशिश कौरियौ, आपणै विश्वासा माथे सद्गुण और सद्गुण माथे समझ, 6 और समुजुणु माथे सबर, और सबरा माथे धीरज, और धीरजा माथे भक्ति, 7 और भक्ति माथे री प्रीति, और भाईचारे री प्रीति माथे प्यार बोड़ाऊ दै रौओ। 8 कैलैकि अगर एजी बुश तुमु दी आजकाले रौआ, और बोड़ीदी रौआ, ता तुमै आमारै प्रभु यीशु मसीह री पगचाना दी निकामौ और निष्फल नाई होंगे दैन्दौ। 9 और जास दै ऐ बुश नाई, सैऊ शैडौ आ, और जूण धुन्धलौ देखा आ, और आपणै पुर्पकाली पापा कु धोएया साफ होंगे लै बोशौ औन्दौ आ। 10 एजी कारणा औ भाईयौ, आपणै औटाओ औन्दौ, और चुणौ औन्दौ काले सिध्द कौरणै रौ भौली भान्ती यन्न कौरदै रौह, कैलैकि अगर इणौ कौराई, ता तुमै केभी भी ठौकर नाई खा लै। 11 पर एजी रीति कु तुमै आमारै प्रभु और उध्दार कौरणै वालौ यीशु मसीह रौ अनन्त महला दै बोड़ै आदरा काले प्रवेश कौराई लै।

पतरसा रौ आखरी बौगत

12 एथीलै अगर तुमै एजी बुशा जाणाई सा, और जो सौचौ वचन तुमु लै मिलौ औन्दौ आ, तेस दै बोड़ै रौआ ई, ताभै हाऊं तुमु दी एजी बुशा री खबर दिलाऊणै काले सौदा तैयार रौऊं। 13 और हाऊं आपु काले आच्छौ समझु सा, कि जेबी झाऊं हाऊं एज ताबु दै, तैबी झाऊं तुमुरी खबर छाडियौ बड़ाऊदै थाकाऊ लागी। 14 कैलैकि इणौ जाणु सा, कि मसीह रौ वचना रै अनुसार मैरौ घोर ढालना रौ बौन्त शीगरी आशणै वालौ आ। 15 एथीलै हाऊं इणौ प्रियास कौर, कि मैरै आशणै कु पैहलै तुमै इऊं सारी बुशै सौदा लै याद छाड़ी बोलौ।

मसीह री महिमा रै आखी-देखे गवाह

16 कैलैकि जेबी हामुए तुमै आपणै प्रभु यीशु मसीह री शौकी रौ, और आशणै रौ संदेश दिखा थौ ता सेऊ चालाकी कौरी दाबी ऐन्दी काइणी री बुश नाई थी पर आमुए आपु ई प्रभु रौ शौकी देखी थी। 17 कि तिणीए परमेश्वर बाबा कु इज्जत, और महीमा पाई जैबै तेस शक्तिवालै महीमा माझिये कु एजी वाणी आशी कि एऊ मैरौ सौबी कु आच्छौ छोहरु आ, एसकु हाऊं खुश ऊ। 18 और जैबै आमै तेस आइलै पवित्र टिरे दी थै, ता सौरगा कु एजी वाणी आशदै शुणी। 19 और आमुकै जो भविष्यदवक्तै रौ वचन आ, सेऊ एस बुशै

कु पाक्कौ रौओ और तुमै एजी इच्छा कौरा ई जो इणौ जाणीयौ तेस माथे ध्यान कौरा आ, कि सेऊ एक दिओ आ, जो न्यारै जागहा कु तेस बौगै झाऊं प्याशौ दे ई जेबी झाऊं कि राची ना चाई बीयाई, और दौउती रौ तारौ तुमारी जीवा दी ना चाई चमकौ। 20 पैहलै इणौ जाणौ कि पवित्रशास्त्रा री कौई भी आशणै वाली बुशै कासीरै आपणै ई बिचारा कौरी पूरी नाई औन्दी। 21 कैलैकि केजी भी हुणै वाली बुशै आदमी री इच्छा कौरी केबी नाई हुई, पर भौगत(भक्त) पवित्र आत्मा रै जरीए उभरोयी परमेश्वरा री तौरफा कु बोला थै।

झूठे शिखाउणै वालै

2 जिणै कौरी तिऊं लोगु माझिऊ झूठै भविष्यदवक्ता थै, तिणी कौरी तुमु माझिऊ भी झूठै उपदेश देणै वालै हुआ, जो नाश कौरणै वालै पाखण्डा रौ उदघाटन छुपि-छुपियौ कौराई, और तेस स्वामी रौ जुणीए सै मोल निआ आ मौना कौरा ई, और आपूलै शीगरी ही विनाशा दी पाई। 2 भौरी जौणै तिऊं जिणै लुचपन कौराई, और जासरै कारन सौचुचाई रै बाटा री बुराई हुआ। 3 सै तुमुलै लालच देणा लै बुशै गाडोयी तुमुलै आपणै लाभा रौ कारण चाणा ई, जो सौज्जा री आज्ञा तिऊं माथे पैहलै कु हुई ऐरी तेसरै आशणै कु कुछ भी बैर नाई और तिऊंरौ विनाश सुतदौ नाई। 4 कैलैकि जेबी परमेश्वर सै सौरगा रै दूत लै जुणीए पाप कियौ नाई छाडौ, पर नौरका दी भेजीयौ न्यारै कुण्डा दी पा गौए ताकि फौंसलै रै दिने झाऊं बौन्द रौआ; 5 और पुराणै जुगा रै संसार भी नाई छाडौ पर भक्तिहीन संसारा दी पाणी कौरी बिनाष भेजौ, पर धोर्मा रै प्रचार कौरणै वालै नूह समेत आठ आदमीऊ बचावै; 6 और सदोम और अमोरा रै इलाकै लै बिनाशा रौ इणी सजा देई कि सै भस्म कौरियौ छारा दी मिला ऐरै ताकी सै आशणैवालै भक्तिहीन लोगु री शिक्षा काले एक औनैणौ बौना, 7 और धोर्मा लूता लै जो अधर्मिऊ रै अशुद्ध चालचौलना कु भौरी दुखी थौ तिउंलै छुटकारौ दैओ। 8 (कैलैकि सेऊ धोर्मा तिउरै बिचा दी रोइयौ और तिउरै अधर्मा रै काम देखी-देखियौ और शुणी शुणियौ, सारै दिने आपणौ ज़ीऊ दुखी कौरा थौ।) 9 ता प्रभु भौक्ता लै परिक्षा माझिऊ कु गाडनौ और अधोर्मिऊ रौ फौंसलै रै दिने झाऊं सौज्जा री हालती दी रौखणौ भी जाणा सा, 10 खास कौरियौ तिउंलै जो अशुद्ध इच्छा पीछु शरीरा रै अनुसार आण्डदै और तेसरी बोडाई लै कुछ भी नाई जाणदै। सै ठीठ, और ज़िददी आ, और ऊंचै अफरसा(पदवालो) लै बुरौ भौलौ बोलणा कु नाई डौरदौ, 11 तैबै भी सौरगा रौ दूत जो शौकिशाली दी तिऊं कु बोड़ौ आ, प्रभु काई तिउंलै बुरौ भौलौ बोलियौ आरोप नाई लांदै। 12 पर इयै लोग निर्बुदि धौणा ही रै बराबर ई, जो पाकुडनै और नाश हुणै लै पैदा हुए आ; और जो बुशै सै जाणदै भी नाई तिउरै बारै दी दुजै लै बुरौ भौलौ बुइला आ, सै आपणै गंदगी दी आपु ई शौडा आ। 13 दुजै रौ बुरौ कौरणा रै बौदुलै तिऊं रौ बुरौ हुआ। तिउंलै दुसै दी मौज मौस्ती कौरणौ आच्छौ लाग़ा आ। इयै कलक और आरोप आ; जेबी सै तुमु आइलै खा-पिआ ई, ता आपणी तौरफा कु प्यारौ री रोटी खाइयौ मौज मस्ती कौरा आ। 14 तिउंरी आखी दी गान्दे काम आ बौसौ औन्दौ, और सै पाप कौरी बिण रुकी नाई बौलदै। सै भौलै ज़ीऊ वालै फसावा ई। तिउरै ज़ीऊ आपु काले लाभ कौरणा लै भयास हुई ऐरौ आ; सै दुखी री संतान आ। 15 सै पीधी बाट छाडियौ भौटकी गौए आ, बओरा रै छोहरु बिलामा रै बाटा दी डेई गौए ई, जुणीए अधर्मा रौ काम आच्छौ जाणौ आ; 16 पर तिउरै गुनाहा रै बारै दी उलहाना दैओ, इदै झाऊं कि अबिल गदहीए आमदी री बोली कु सेऊ भविष्यदवक्ता तिणीए तेसरै बावलेपना कु रोको। 17 इयै लोग शूकै कूरं, और पाणी कौरी उडारे ऐन्दै बादल आ; तिउंलै सौदा लै न्यारौ आ बौनौ औन्दौ। 18 सै बुरी घमण्डा री बुशै कौरी कौरियौ

लालच रें कामा रें जरीए, तिऊं लोग शरीरा री इच्छा दी फसावा ई जो भोटकें औन्दै माझिऊ कु ऐबी निकलदै ई लागै औन्दै आ। 19 सैं तिउंलै आज्ञाद कौरणें रौ बाइदौ ता कौरा ई, पर आपू ई गंदगी रें सेवक आ; कैलैकि जो आदमी ज्ञासकें हारी ऐरौ, सेऊ तेसरौ सेवक बोणा आ; 20 जैबै सैं प्रभु और उद्धारकौरणौ वालौ यीशु मसीह री पहचाना कौरी संसारा री रौंगा रौंगा री अशुद्धता कु बौचीए निकला, और तैबै तिऊंदी फौसीयौ हारी गोए, ता तिउंरी हालत पैहली कु भी बुरी हुई गोई आ। 21 कैलैकि धौर्मा रें बाटा रौ नाई ज्ञानणौ ई तिउंलै इथकु भौलौ हुआ कि तेस ज्ञाणीयौ, तियां पवित्र आज्ञा कु फिरीयौ जो तिउंलै थी देई ऐन्दी। 22 तिऊं माथै एजी कहावत ठीक बौशा आ, कि कुकर आपणी छंट री तौरफा और निआंई ऐन्दी सूंगरी किच्छा दी पौड़नै लै तौइंरे डेआ आ।

प्रभु रें आशणें रौ दीन

3 ओ प्यारेउ ओ, आबै हाऊं तुमु लै दुजी चिड्डी लिखा ऊ, और दुइआ दी याद दिलाइऔ तुमारै शुद्ध जीऊं बौड़ावाऊ, 2 तुमै तिऊं बुशु कु, जो प्रवित्र भविष्यवक्तुए पहले कु ही बोली थी, और प्रभु, और उद्धार कौरणें वालें तेस हुकम याद कौरौ, जो तुमारै प्रेरिता रें जरिरे देई थी 3 और इणौ पहले ज्ञाणौ, कि आखरी दिना दी हौसणें वाले और मजाक उड़ाऊणें वाले आशाई, जो आपणी मौर्जी रें इच्छा रें अनुसार चालाई। 4 और बोला लै, तेसरौ आशणें रौ वाइदौ किए डैऔ आ? कैलैकि जेबी कु बाब दाद मौरी गोए, सारै कुछ तिणी ही सा, जिणौ धौतरी रें पैहलै कु थौ? 5 से ता ज्ञाणी बुझियौ बिसरी गोए, कि परमेश्वरा रें वचना रें जरिरे से सौरग पहला ओऊल्ले तिणौ ई मौजूद आ जिणौ आशा सा और धौतरी भी पाणी मांझिरे कु बौणी ई और पाणी माथै आ टेकी ऐन्दी। 6 इऊं बुरै आदमिउ रें जरिरे तेस जुगा री धौतरी पाणी दी दुबेयौ नाश हुई गोई। 7 पर आज कालकौ बौगता रौ सौरग और धौतरी तेस वचना रें जरिरे एथी लै आ छाडै औन्दै, कि पोरु जाली; और सैं बिण भक्ति कौरणें वालें आदमी रें फैसलै और नाश हौणें रें दिना झाऊं इणी ई रौआ ई। 8 ओ आच्छे लोगुओ, इणी एक बुश तुमु कु छुपी औन्दी नाई चाई

रौई, कि प्रभु रें काए एक दिन हजार बौरषा रें बराबर आ, और हजार बौरष एकी दिना रें बराबर आ। 9 प्रभु आपणें वाइदैं रें बारें दी बेर नाई पाईदौ, जीणी बेर कुछ लोग सौमाझा ई; पर तुमु रें बारें दी सबर कौरा सा, और नाई चहादों कि कोई नाश हुआ लौ; पर इणौ कि सौबिऊ लै मन बौदुलने रौ मौकौ मिला। 10 पर परमेश्वरा रौ दिन चोरा बाशी आशा, सेजे दिनै सौरग जोरें गुडने री आवाजा कु डेऊंदै थाका लागी, और सारी चीजें बौरी तौपीयो पौगला, और धौतरी और धौतरी माथै रें काम जौलाई। 11 ता जैबै कि ऐ सारी चिजें, एजी रीती कु पौघुलणें वाली आ, ता तुमै पवित्र चाल चालन और भौक्ति दी किणें आदमी हुणौ चाई, 12 और परमेश्वरा री सेजें दिना री बाट किणी कौरिए लोडणी चाई और तेसरे शिगरी आशणा लै किणी कोशिश कौरणी चाई; जासरें कारणा सौरग आगी कु पौगला ई, सौरगा रें तारें भौरी तौपीयो पोरु गौलाई। 13 पर तेस रें वाइदा रें अनुसार आमै एक नौए सौरग और नौई धौतरी री आश देखी आ जेथा दी धौर्मि रें काम वास कौराई।

उजी और तैयार थाकौ

14 एथीलै ओ आच्छे लोगुओ, जैबै कि तुमै इणी बुशा री आश देखाई ता तुमै कोशिश कौरौ कि तुमै शान्ति कौरौ तेसरें नजदीक चोखे शाखलै और निर्आरोप दिशा, 15 और आमारै प्रभु रौ धीरज उद्धार समझौ, जिणें आमारै प्यारै भाई पौलुसै भी ज्ञाना रें अनुसार जो तेसलै मिलौ, तुमु लै लिखौ आ। 16 तिणी ही तिणीए आपणी सारें चिड्डिउ दी भी एजी बुशा दी जोर दैऔ औन्दौ कि जेथा दी कुछ बुशे इणी आ, जेथरौ समझणौ मुशकल आ, और अनपड़ और चाचल लोग तेथारौ मतलब भी प्रवित्र शास्त्रा री ओरी बुशु भाशिए झिडी- झाडियौ आपणें ही नाशा रौ कारण चाणाई। 17 एथीलै ओ आच्छे लोगुओ, तुमै लोग पहला का ही इऊं बुशें ज्ञाणियौ खबरदार रौऔ, ताकि अधर्मियों रें चौकरा दी फौसियौ आपणी मजबुती किए आपणें हाथा कु पोरु ना चाई छूटी। 18 पर आमारै प्रभु, और छुटकारौ दैणें वालो यीशु मसीह री बौडी दया और पहचाना दी बौडदैं थाकौ लागौ। तेस री महिमा आबै भी चाई हुई, और सौदा औन्दै थाका लागी। आमीन।

1 यूहन्ना

जिन्दगी रौ वचन

1 तेस जिन्दगी रौ वचना रौ बारे दी जो पैहला ओअलै थौ, जो आमुए शुणौ, और जो आपणी आखी कौरी देखौ और हाथा कौरी छुआँ आ— 2 इए जिन्दगी पौगड़ी हुई और आमुए सै देखी, और तेथरी गवाही देई ई, और तुमु लै सदा री जिन्दगी री खुश-खबरी देई ई जो बाबा आइलै थौ और आमु माथे पौगड़ौ हुओ आ— 3 जो कुछ आमुए देखौ और शुणौ आ तेथरी खबर तुमु कै भी बोली ई, एथीलै कि तुमै भी आमु आइलै शामिल हुआ; और आमरौ एऊ साथ बाबा आइलै और तेसरै छोहरु प्रभु यीशु मसीह आइलै आ। 4 और इए बुशै आमै एथीलै लिखी कि आमारी खुशी पुरी औआ।

प्याशै ई आण्डणौ

5 जो खबर आमुए तेसकु शुणी आ और तुमु कै शुणार्, सै इए आ कि परमेश्वर प्याशौ आ, और तेथदी कोई भी न्यारौ नाई आ। 6 अगर आमै बोलुलै कि आमै तेसरै साथी दी ई और आपु हाण्डा लै न्यारै दी, ता आमै झुटे ई और सौचचाई माथे नाई चालदै; 7 पर जिणौ सेऊ प्याशै दी आ तिणी ई आमै भी प्याशै दी हाण्डु लै, ता एकी दुजै आइलै साथ दी ई, और परमेश्वरा रौ छोहरु प्रभु यीशु रौ खून आमु सारै पापा कु शुद्ध कौरा आ। 8 अगर आमै बोलुलै कि आमु दी कोई भी पाप नाई आ, ता आपुलै धोरखौ देई, और आमुदी सौचचाई नाई आ। 9 अगर आमै आपणै पाप मानु लै, ता सेऊ आमारै पाप माफ कौरना लै और आमु सारी बुराई कु शुद्ध कौरना लै विश्वास वालौ और धौर्मी आ। 10 अगर आमै बोलुलै कि आमुए पाप नाई कियौ ता तेस झुठौ चाणी और तेसरौ वचन आमुदी नाई आ।

मसीह आमुरौ सहायता कौरणै वालौ

2 ओ मरै लोलडेउओ, हाऊं इऊं बुशै तुमु लै एथीलै लिखा ऊ कि तुमै पाप नाई कौरा; और अगर कुण पाप कौरा लौ, ता बाबा काए आमारौ मजदगार आ, मतलब धौर्मी यीशु मसीह; 2 और सेऊ आमारै पापा री माफी आ, और सिरफ आमारै नाई बल्की सारी धौतरी रौ पापा रौ भी। 3 अगर आमै तेसरै हुकम मानु लै, ता एथ कौरी आमुकै पौतौ लागा की आमुए सेऊ जाणी गौ आ। 4 जुण-कुण इणौ बोला आ, कि "हाऊं तेस जाणा ऊ," और तेसरै हुकम नाई मानदौ, सेऊ झुठौ आ और तेसदी सौचचाई नाई आ; 5 पर जुण तेसरै वचना माथे हाण्डा लौ, तेसदी सौचची परमेश्वरा रौ प्यार परगट हुओ। एथी कौरी आमै जाणी की आमै तेसदी ई। 6 जुण-कुण इणौ बोला आ कि हाऊं तेस दी पाको ऊ, तिणीए तिणौ हाण्डणौ चाई जिणौ सेऊ हाण्डा थौ।

नौऊँओ हुकुम

7 ओ प्यारो, हाऊं तुमुलै कोई नौवौ हुकम नाई लिखदौ, पर सेई पुराणै हुकम जो पैहला ओअलै तुमु लै मिले ई; इए पुराणै हुकम सै वचन ई जो तुमुए शुणे ई। 8 तैबै हाऊं तुमु लै नौएँ हुकम लिखा ऊ, और इए तेसदी और तुमु दी सौचचै बौणा ई; कैलैकि न्यारौ आबै खतम हुआ और सौचचाई रौ प्याशौ लागा चमकदै। 9 जुण-कुण इणौ बोला कि हाऊं प्याशे दी ऊ, और आपणै भाई आइलै छाड़ा दुश्मनी, सेऊ इबी झाऊं न्यारै दी ई आ। 10 जुण छाड़ा आपणै भाई आइलै प्यार, सेऊ रौआ प्याशे दी और तेसदी ठोकर नाई लागदी। 11 पर जुण आपणै भाई आइलै दुश्मनी छाड़ा आ, सेऊ न्यारै दी आ और न्यारै दी हाण्डा आ, और नाई जाणदौ कि किये डिया, कैलैकि न्यारै

तेसरी आखी शेड़ी कौरी गोई। 12 ओ लोलडेउओ, हाऊं तुमुलै एथीलै लिखा ऊ, कि तेसरै नावां कौरी तुमारै पाप माफ हुए ई। 13 ओ स्यणेउओ, हाऊं तुमु लै एथीलै लिखा ऊ, जो पैहला ओअलै तुमै तेस जाणा ई। ओ जवानो, हाऊं तुमु लै एथीलै लिखा ऊ कि तुमै तेस दुष्टा कु जिते ई। ओ छोहरुओ, मुंडरे तुमुलै एथीलै लिखौ आ कि तुमुए बाब पराणी गौ आ। 14 ओ स्यणेउओ, मुंडरे तुमुलै एथीलै लिखौ आ कि जो शुरू ऊ कु आ, तुमुए सेऊ पराणी गौ आ। ओ जवानो, मुंडरे तुमु लै एथीलै लिखौ आ कि तुमै ताकत वालेई और परमेश्वरा रौ वचन तुमुदी रौआ सा, और तुमै तेस बुरे कु जिते ई।

दुनिया आईलै न कौरौ प्यार

15 तुमुए ना ता संसारा कु और ना संसारा री चिजा कु प्यार कौरौ। अगर कुण संसारा कु प्यार छाड़ा आ, ता तेसदी परमेश्वरा रौ प्यार नाई आ। 16 कैलैकि जो एस संसारा दी आ मतलब शरीरा री इच्छा और आखी रौ लालच और कमाई रौ घमण्ड, एऊ बाबा री तौरफा कु नाई पर संसारा री ई तौरफा कु आ। 17 सणसार और तेसरी इच्छा दुइया खतम हुआ ई, पर जुण परमेश्वरा री इच्छा माथे हाण्डा सेऊ सौदा जीऊंदौ रौआ।

मसीही विरोधी

18 ओ छोहरुओ, एऊ आखरी बौग्त आ; और जिणौ तुमुए शुणौ आ कि मसीही रौ दुश्मन आशणै वालौ आ, तेस जिणै ओर भी कई मसीह विरोधी उठीयो खौडै हुए ई; एथ कौरी आमुकै पौतौ लागा कि एऊ आखरी बौग्त आ। 19 सै निकलै ता ई आमु मांझीया कु, पर आमु मांझीया रौ नाई थै; अगर सै आमु मांझीया रौ ओआ थै, ता आमु आइलै रौआ थै; सै एथीलै निकली गौए ताकी इणौ परगट औआ कि सै आमु मांझीया रौ नाई ई। 20 पर तुमारौ ता तेस "पवित्रा" कौरी अभीषेक हुओ आ, और तुमै सारौ कुछ जाणा ई। 21 मुंडरे तुमुलै एथलै नाई लिखौ कि तुमै सौचचाई जाणदौ नाई पर एथलै लिखौ, कि तुमै जाणा ई, और एथिलै कि कोई भी झूठ सौचचाई री तौरफा कु नाई। 22 झुठौ कुण आ? सिरफ सेऊ जुण यीशु, मसीही नाई मानदौ; और मसीह रौ विरोधी सेऊ ऊ आ, जुण बाब और छोहरु नाई मानदौ। 23 जुण छोहरु नाई मानदौ तेसकै बाब भी नाई आसतौ : जुण माना छोहरु, तेसकै आ बाब भी। 24 जो कुछ तुमुए पैहले कु शुणौ आ, सेऊ चाई तुमुदी रौइणौ; जो तुमुए पैहले कु शुणौ आ अगर सेऊ आ तुमुकै, ता तुमै भी छोहरु आइलै और बाबा आइलै रौआ ई। 25 और जेथरी तिणीए आमु आइलै वाइदौ कियौ आ सै सौदा री जिन्दगी आ। 26 मुंडरे इयै बुशै तुमुलै तिंउरै बारे दी लिखी आ, जुण तुमु बौहकावा ई; 27 पर तुमारौ अभीषेक जो तेसरी तौरफा कु आ कियौ औन्दौ, सेऊ तुमु दी रौआ आ। तुमुकै एथरी जुरत नाई आ कि कुण तुमुकै शिखावा, पर जिणौ सेऊ अभीषेक जो तेसरी तौरफा कु हुओ आ, तुमुकै सारी बुशै शिखावा आ, और सेऊ सौचचौ आ झुठौ नाई, जिणौ तिणीए तुमुकै शिखाओ आ तिणी ई तुमै तेसदी बौणी रौआ ई।

परमेश्वरा रै छोहरु

28 और ओ छोहरुओ, तेस आइलै रौ ओ, जेबी सेऊ परगट औआ लौ तेभी तुमुदी हिम्मत औआ, और आमै तेसरै आशणै रौ बौग्तै तेसकु शौर्मीया नाई। 29 अगर तुमै जाणा ई, कि सेऊ धौर्मी आ, ता इणौ भी जाणा ई कि जुण धौर्मा रौ काम कौरा सेऊ तेसकु आ पैदौ हुओ औन्दौ।

एकी दुजै आईलै प्यार छाड़ौ

3 देखौ बाबै आमु आइलै किणौ प्यार कियो आ, कि आमुलै परमेश्वरारै वारिस बोला ई; और आमै आसती भी। एजै कारण सणसार आमु नाई जाणदौ, कैलैकि तिणीऐ सेऊ भी ना पराणौ। 2 ओ प्यारेउओ, आबै आमै परमेश्वरारै वारिस ई, इबी झाऊं इणौ परगट नाई हुओ कि आमै का कुछ औणै ई! एती जाणी कि जेबी सेऊ परगट ओलौ ता आमै तेस जिणै औणै ई, कैलैकि तेस तिणीई देखीई जिणौ सेऊ आसा आ। 3 और जुण तेस माथै आश छाड़ा आ, सेऊ आपु इणौ पवित्र कौरा आ, जिणौ सेऊ आ पवित्र। 4 जुण-कुण पाप कौरा, सेऊ नियमा रौ विरोध कौरा आ; और नियमा रौ विरोध ई पाप आ। 5 तुमै जाणा ई कि सेऊ एथीलै परगट हुओ कि पाप दूर कौरा; और तेसदी कोई पाप नाई। 6 जुण तेस आइलै रौआ आ, सेऊ पाप नाई कौरदौ; और जुण कौरा आ पाप तिणीऐ नाई सेऊ देखौ और नाई तेस जाणदौ। 7 लोलडेउओ, तुमुलै कुण धोखौ ना दिया। जुण धौर्मा रै काम कौरा आ, सेऊ ई तेस जिणौ धर्मा आ। 8 जुण पाप कौरा सेऊ शैताना री तौरफा कु आ। कैलैकि शैतान पैहला ओउलै पाप कौरा आ, परमेश्वरारै छोहरु एथीलै परगट हुओ कि शैताना रै काम नाष कौरा। 9 जुण-कुण परमेश्वरार कु पैदौ हुओ आ सेऊ पाप नाई कौरदौ; कैलैकि तेसरौ बीज तेसदी रौआ आ सेऊ पाप कौरा ना बोलदौ कैलैकि सेऊ परमेश्वरार कु पैदौ हुओ आ। 10 एथी कौरा शैताना रै वारिस और परमेश्वरारै वारिस पराणीया ई; जुण-कुण धौर्मा रै काम नाई कौरदौ सेऊ परमेश्वरार कु नाई आ, और ना सेऊ जुण आपणै भाई आइलै प्यार नाई कौरदौ। 11 कैलैकि जो खबर तुमुऐ पैहला कु शुणी आ, सै एजी आ कि आमै एकी दुजै आइलै प्यार कौरा; 12 और कैना जिणौ नाई बौणौ, जेथदी बुराई आ, और जुणीऐ आपणौ भाई झांगौ आ। सेऊ केजै कारणे झांगौ आ? एथीलै कि तेसरै काम बुरै थै, और तेसरै भाई रै काम थै धौर्मा रै। 13 ओ भाईओ, अगर सणसार तुमु आइलै दुष्मनी छाड़ा ता हैरान नाई हुणी। 14 आमै जाणी कि आमै मौता लांगीयौ जौन्दगी दी पौउंचे ई; कैलैकि आमै भाईऊ आइलै प्यार छाड़ी ई। जुण प्यार नाई छाड़दौ सेऊ मौरौ औन्दौ आ। 15 जुण-कुण भाईऊ आइलै नफरत छाड़ा आ सेऊ खुनी आ; और तुमै जाणा ई कि कासी भी खुनी दी सौदा री जीन्दगी नाई औन्दी। 16 आमुकै प्यारारौ पौतौ एथी कु लागौ की, तिणीऐ आमारी तांइऐ आपणी जान देई; और आमुऐ भी आपणै भाईऊ लै जान देणी चाई। 17 और जास कासी के सणसारार री जयदाद ओली और ऐऊ आपणौ भाई गरीब देखीयो तेस माथे दया कौरनी नाई चाह लौ ता तेसदी परमेश्वरार रौ प्यार किणै कौरा रौआ आ। 18 ओ लोलडेउओ, आमै वचन और जीभा कौरा नाई पर काम और सौचवाई कौराऐ भी प्यार कौरा।

परमेश्वरार कारे हिम्मत

19 एथी कौरा आमै जाणी की आमै सौचवाई रै ई; और जेजी बुशा दी आमारौ जिऊ आमुलै आरोप दिया, तेथरै बारै दी आमै तेस कारे आपणै-आपणै जिउआ लै हिम्मत देई सौका ई; 20 कैलैकि परमेश्वर आमारे जिवा कु बौड़ौ आ, और सब कुछ जाणा आ। 21 ओ प्यारेउओ, अगर आमारौ जिऊ आमुलै आरोप नाई दिया लौ, ता आमुकै परमेश्वरार कारे हिम्मत ओआ आ; 22 और जो कुछ आमै मांगी ई, सेऊ आमुकै तेसकु मिला आ, कैलैकि आमै तेसरै हुकम मानी ई, और जो तेसकै आच्छौ लागु आ तेसी कौरा ई। 23 तेसरै हुकम इई कि आमै तेसरै छोहरु यीशु मसीह माथे विश्वास कौरा, और जिणौ तिणीऐ आमुलै हुकम दैओ आ, ता तिणी ई आपु मांझीऐ प्यार छाड़ौ। 24 जुण तेसरै हुकम माना आ, सेऊ तेसदी और सेऊ तिऊं आइलै रौआ आ : और एथी कौरा, मतलब तिणै आत्मा कौरा जो तिणीऐ आमुकै देई आ, आमै जाणी ई की सेऊ आमु आइलै रौआ आ।

आत्मा पौरखौ

4 ओ प्यारेउओ, हर एक आत्मा रौ विश्वास नाई कौरौ, पर आत्मा पौरखौ कि सै परमेश्वरार री तौरफा कु आसती कि नाई; कैलैकि भौरी झुठै भविष्यवक्ता सणसारार दी उठी गौऐ। 2 परमेश्वरार री आत्मा तुमै इणै कौरा

पौरखी सौका ई : जुण आत्मा माना की यीशु शरीरार रै रूपा दी आशौ आ, सै परमेश्वरार री तौरफा कु आ, 3 जो आत्मा यीशु नाई मानदी, सै परमेश्वरार री तौरफा कु नाई आ; और सेई ता मसीह रै विरोधी आत्मा सा, जेथरै बारै दी तुमुऐ शुणौ भी आ कि सेऊ आशणै वालौ आ और इभी भी सणसारार दी आ, 4 ओ लोलडेउओ, तुमै परमेश्वरार रै ई और तुमै एथ माथे जीते ई; कैलैकि जो तुमुदी आ सेऊ तेसकु बौड़ौ आ जो एस सणसारार दी आ, 5 सै सणसारार रै ई, एथीलै सै सणसारार री बुशै बोला ई, और सणसारार तिउंरी शुणा आ। 6 आमै परमेश्वरार रै ई। जुण परमेश्वरार जाणा ई, सेऊ आमारी शुणा आ; जुण परमेश्वरार नाई जाणदौ सै सेऊ आमारी नाई शुणदौ। इणै कौराऐ आमै सौचवाई री और झुठी आत्मा पौरखी ई।

परमेश्वर प्यार ऐ आ

7 ओ प्यारेउओ, आपु मांझीऐ प्यार छाड़ौ; कैलैकि प्यार परमेश्वरार कु आ। जुण प्यार कौरा सेऊ परमेश्वरार कु पैदौ हुओ आ और परमेश्वरार पराणा आ। 8 जुण प्यार नाई कौरदौ सेऊ परमेश्वरार नाई पराणदौ, कैलैकि परमेश्वरार प्यार आ। 9 जो प्यार परमेश्वरार आमु कु कौरा आ, सेऊ एथकु परगट हुओ कि परमेश्वरार आपणौ एकलौतौ छोहरु सणसारार दी भेजौ आ ताकी आमुलै तेस कौरा जिन्दगी मिला। 10 प्यार एथ कौरा नाई कि आमुऐ परमेश्वरार आइलै प्यार कियो आ, पर एथ कौरा कि तिणीऐ आमु आइलै प्यार कियो आ। और आमारे पापार री माफी रै बदलै आपणौ छोहरु भेजौ। 11 ओ प्यारेउओ, जेबै तिणीऐ आमु आइलै इणौ प्यार कियो, ता आमुऐ भी आपु मांझीऐ प्यार छाड़नौ चाई। 12 परमेश्वरार केभी भी कोइऐ ना देखौ; पर जेबै आमै आपु मांझीऐ प्यार छाड़लै, ता परमेश्वरार आमुदी रौआ आ, और तेसरौ प्यार आमुदी परगट हुई गौ आ। 13 एथी कौरा आमै जाणी कि आमै तेसदी ई, और सेऊ आमुदी; कैलैकि तिणीऐ आपणी आत्मा मांझीया कु आमुलै दैओ आ। 14 आमुऐ देखी भी गौ आ और गवाही देई ई, कि बाबै आपणौ छोहरु सणसारार दी छुटकारै देणै वालौ चाणीओ भेजौ आ। 15 जुण-कुण इणौ माना आ, कि यीशु परमेश्वरार रौ छोहरु आ, परमेश्वरार तेसदी रौआ आ, और सेऊ परमेश्वरार दी। 16 जो प्यार परमेश्वरार आमु आइलै कौरा आ, तेस आमै जाणी ई, और आमुकै तेसरौ विश्वास आ। परमेश्वरार प्यार आ और जुण प्यारार दी रौआ आ, सेऊ परमेश्वरार दी रौआ आ, और परमेश्वरार तेसदी। 17 एथी कौरा प्यार आमुदी परगट हुओ कि आमुकै फैसलै रै दिना दी हिम्मत ओआ; कैलैकि जिणौ सेऊ आ तीणी सणसारार दी आमै भी ई। 18 प्यारार दी डौर नाई औन्दौ, बल्कि आच्छौ प्यार डौर दूर कौरा आ; कैलैकि डौरार रौ रिश्तौ सजा आइलै औआ आ, और जुण डौरार सेऊ प्यारार दी आच्छौ नाई आ। 19 आमै एथीलै प्यार कौरा ई, कि पैहलै तिणीऐ आमु आइलै प्यार कियो आ। 20 अगर कुण बोला लौ कि हाऊं, “परमेश्वरार आइलै प्यार कौरा ऊ” और आपणै भाई आइलै छाड़ालौ दुष्मनी ता सेऊ झुठौ आ; कैलैकि जुण आपणै भाई आइलै जो तिणीऐ देखौ आ प्यार नाई छाड़दौ, ता सेऊ परमेश्वरार आइलै जो तिणीऐ नाई देखौ प्यार किणौ कौरा सौका आ। 21 तेसकु आमुलै इणौ हुकम मिलौ आ, कि जुण परमेश्वरार आइलै प्यार कौरा आ, सेऊ आपणै भाई आइलै भी प्यार कौरा।

धौतरी माथे जित पाओ

5 जासरौ इणौ विश्वास आ कि यीशु ई मसीह आ, सेऊ परमेश्वरार कु पैदौ हुओ आ; और जुण-कुण पैदौ कौरने वालै आइलै प्यार छाड़ा सा; सेऊ तेस आइलै भी प्यार छाड़ा सा जुण तेसकु पैदौ हुओ आ। 2 जेबी आमै परमेश्वरार आइलै प्यार कौरा ई और तेसरै हुकम मानी ता इणै कौरा आमै जाणी कि आमै परमेश्वरार री सन्ताना आइलै प्यार कौरा ई। 3 कैलैकि परमेश्वरार आइलै प्यार कौरनौ इयो आ, कि आमै तेसरौ हुकम माना; और तेसरै हुकम कठीण नाई ई। 4 कैलैकि जो कुछ परमेश्वरार कु पैदौ हुओ आ, सेऊ सणसारार दी जितौ औन्दौ आ; और सेऊ जितणौ जो सणसारार माथे जिता आ, सेऊ आमारौ विश्वास आ। 5 सणसारार माथे जितणै वालौ कुण आ? सिरफ सेऊ जासरौ इणौ विश्वास आ कि यीशु परमेश्वरार रौ छोहरु आ।

यीशु मसीह रै बारै दी ग्वाही

6 एऊ सा सेऊ जुण पाणी और खुना कौरी आशौ थौ, मतलब यीशु मसीह : सेऊ ना सिरफ पाणी कौरी बल्कि पाणी और खुना कौरी आशौ थौ। 7 और जो ग्वाही दिया सा, सै आत्मा आ; कैलैकि आत्मा सौचूची आ। 8 ग्वाही दैणै वालै चीन ई आत्मा, पाणी और खून; और चिया एकी बुशा दी मंजूर ई। 9 जैबे आमै आदमी री ग्वाही मानी ई, ता परमेश्वरा री ग्वाही ता एथकु बौड़ीऔ आ; और परमेश्वरा री ग्वाही इणी आ, कि तिणीए आपणै छोहरु रै बारै दी ग्वाही देई आ। 10 जुण परमेश्वरा रै छोहरु माथै विश्वास कौरा आ, सेऊ आपु दी ग्वाही छाड़ा आ। जुणीए परमेश्वरा माथै विश्वास नाई कियौ तिणीए सेऊ झुठौ चाणौ आ, कैलैकि तिणीए तिणै ग्वाही माथै विश्वास नाई कियौ जो परमेश्वरै आपणै छोहरु रै बारै दी देई आ। 11 और सै ग्वाही एजी आ कि परमेश्वरै आमुकै सौदा री जिन्दगी देई आ, और सै सौदा री जिन्दगी तेसरै छोहरु दी आ। 12 जासकै छोहरु आ, तेसकै जिन्दगी आ; और जासकै परमेश्वरा रौ छोहरु नाई आ, तेसकै जिन्दगी भी नाई आ।

आखरी जिन्दगी

13 मुंडरे तुमै, जुण परमेश्वरा रै छोहरु माथै विश्वास कौरा ई, एथिलै लिखौ आ ताकी तुमुकै पौतौ लागा कि सौदा री जिन्दगी तुमारी आ। 14 और आमुकै

तेस काए जो हिम्मत हुआ, सै एजी आ; कि अगर आमै कुछ तेसरी मर्जी कौरी मांगी ई, ता सेऊ आमारी शुणा आ। 15 जैबे आमै जाणी कि जो कुछ आमै मांगी सेऊ आमारी शुणा, ता इणौ भी जाणी कि जो कुछ आमै तेसकु मांगौ आ, सेऊ मिलौ आ। 16 अगर कुण आपणौ भाई इणौ पाप कौरदै देखा लौ जेथरी सजा मौत नाई आ, ता औरज कौरौ, और परमेश्वर तेस तिऊंकालै, जुणीए इणौ पाप कियौ आ, जेथरी सजा मौत नाई आ, जिन्दगी दिया आ। पाप इणौ भी हुआ जेथरी सजा मौत नाई आ; तेथरै बारै दी हाऊं औरज कौरना लै नाई बोलदौ। 17 सारै बुरै काम पाप ई, पर इणै पाप भी ई जेथरी सजा मौत नाई आ। 18 आमै जाणी कि जुण परमेश्वरा कु पैदौ हुआ आ, सेऊ पाप नाई कौरदौ; पर जुण परमेश्वरा कु पैदौ हुआ आ, तेस सेऊ बौचाई छाड़ा आ, और सेऊ बुरौ शैतान तेस छुई नाई बोलदौ। 19 आमै जाणी कि आमै परमेश्वरा कु ई, और सारौ सणसार तेस बुरै शैताना रै वशा दी आ। 20 आमै इणौ भी जाणी ई परमेश्वरा रौ छोहरु आशी गौ आ, और तिणीए आमुकै अकल आ देई ऐन्दी ताकी आमै तेस सौचूच जाणा; और आमै तेसदी जो सौचूचाई आ, मतलब तेसरै छोहरु यीशु मसीह दी रौई ई। सौचूचौ परमेश्वर और सदा री जिन्दगी एजी आ। 21 ओ लोलडेउओ, तुमै आपु मुर्तीऊ कु बौचूची रौओ।

2 यूहन्ना

अभिवादन

1 मुं स्याणे री तौरफा कु तिरें छांटी ऐन्दी छेउड़ी और तिआंरें लोलडेऊ रें नावां दी ज़ासकु हाऊं सौच़्चाई प्यार कौरा ऊ, सिरफ हाऊं नाई बल्की सारें भी प्यार कौरा ई, जुण सौच़्चाई ज़ाणा ई। 2 सें सौच़्चाई जो आमुदी टेकी रौआ आ, और सौदा आमु आइलें रौआ आ; 3 परमेश्वर बाब, और बाबा रें छोहरु यीशु मसीह री तौरफा कु बौड़ी दया और दया, शान्ती, और प्यार आमु आइलें रौआ ई।

सौच़्चाई और प्यार

4 हाऊं भौरी खुश हुआँ कि मुझे तैरें कुछ लोलडें तेस हुकमा कौरी, जो आमुकें बाबा री तौरफा कु मिलें थें, सौच़्चाई माथें चालदें देखें थें। 5 आबें ओ बौइण, हाऊं ताउंलें कोई नौँओ हुकम नाई, पर सेई जो पैहला ओअलें आमुकें आ, लिखा ऊ; और ताऊकु औरज कौरा ऊ कि आमैं एकी दुजे कु प्यार कौरा। 6 और प्यार एऊ आ कि आमैं तेसरें हुकमा माथें हाण्डा; इयौं सेजौं हुकम आ जो तुमुए पैहला कु शुणौं आ, और तुमुए एथ माथें हाण्डणौं

भी चाई। 7 कैलैकि भौरी इणें बौहकाउणें वाले सण्सारा दी आशी गोए, जुण इणौं नाई मानदें कि यीशु मसीह शरीरा रें रुपा दी आशौं; बौहकाउणें वाले और मसीह रें विरोधी इए ई। 8 आपणें बारें दी चोकस रौँओ, कि जो मैहनत आमुए कीई आ तिरें तुमैं गवांएऊ नाई, पर तेथरौं पुरौं इनाम पाएऊ। 9 जुण मसीह री शिक्षा कु ओगाऊं बौड़ा आ और तेथदी नाई रौउंदौं, तेसकें परमेश्वर नाई आ; जुण तेसरी शिक्षा दी टेकी रौआ, तेसकें बाब भी और छोहरु भी आ। 10 अगर कुण तुमु काए आशा लौं और इणी शिक्षा नाई दिया लौं, तेस ना ता घौरा कें आशणें दैओ और ना तेसकें ढाल कौरौं। 11 कैलैकि जुण-कुण इणें आदमी कें ढाल कौरा आ, सेऊ तेसरें बुरें कामा दी शामिल औँआ आ।

आखरी अभिवादन

12 मुझे भौरी बुशें तुमुलें लिखणी आ, पर कागज़ और स्याही कौरी लिखणौं नाई चाहदौं। पर मुकें आश आ कि हाऊं तुमु काए आशाऊ और आमनै-सामनै बुशें लाआ ऊ, जेथ कौरी तुमारी खुशी पुरी औँआ। 13 तेरी चाणी ऐन्दी बौइणी रें लोलडें ताऊंले ढाल बोला ई।

3 यूहन्ना

आभिवादन

1 मूं स्याणे री तौरफा कु तेस आच्छै गयुसा रै नावां दी, ज़ास आइलै हाऊं सौच़्चौ प्यार कौराऊ। 2 ओ आच्छै भाई, मेरी इऐ औरज आ; कि ज़िणौ तू आत्मा दी बौडदै लागौ औन्दौ तिणी ई तू सारी बुशु दी भी बौड, और भौलौ चांगौ रौऊ। 3 कैलैकि ज़ैबै भाईउऐ आशियौ, तेरी सै सौच़्चाई री गवाही देई, ज़ास माथै तू सौच़्ची हाण्डा ई ता हाऊं भौरी खुश हुआ। 4 मुलै एथकु बौड़ियौ औजौ केजी खुशी नाई, कि हाऊं शुण, कि मैरै लोलडै सौच़्चाई माथै हाण्डा ई।

गयुसा री तारीफ

5 ओ आच्छै भाई, जो कुछ तू तिऊं भाईऊ आइलै कौरा ई, जो दुजे देशा रै भी ई, तेस आइलै विश्वासी ज़िणौ कौरा ई। 6 तिउंऐ खुंबली दी तैरै प्यारा रै बारै दी गवाही देई थी: अगर तू तिऊं तिणौ विदा कौरालौ ज़िणौ परमेश्वरा रै लोगु लै ठीक आ ता आच्छौ कौराई। 7 कैलैकि सै तेस नाउं लै निकलै ई, और दुजी ज़ाति कु कुछ नाई निंदै, 8 एथीलै इणेऊ रौ स्वागत चाई कौरणौ, ज़ेथकु आमै भी सौच़्चाई रै पौक्षा दी तिऊं रै साथी हुआ।

दियुत्रिफेस और दिमेत्रियुस

9 मुंड्यै खुंबली लै कुछ लिखौ थौ; पर दियुत्रिफेस जो तिऊं माझिऊ बौडौ बौणनौ चाहा आ, आमु नाई अपणाउंदौ। 10 ज़ेबी हाऊं आशु लै, ता तेसरै कामा लै जो सेऊ कौरदै आ लागौ औन्दौ याद दिलावाऊ, कि सेऊ आमारै बारै दी बुरी-बुरी बुशै भौका आ; और एथ माथै भी तस्सली नाई कौरीयौ आपू ई भाईऊ नाई अपणाउंदौ, और जो तिऊं मानणौ चाहा ई, तिउंलै कौरा नाई: और खुंबली कु गाडा आ पोरु। 11 ओ प्यारेउओ, बुराई रै नाई, पर भलाई रै साथी बोणौ, ज़ुण भलाई कौरा ई, सै परमेश्वरा री तौरफा कु ई; पर ज़ुण कौरा ई बुराई, तिणिए परमेश्वर नाई देखौ। 12 देमेत्रियुसा रै बारै दी सारेउऐ बल्की सौच़्चाईऐ भी आपू ई गवाही देई : और आमै भी गवाही देई, और तू ज़ाणा ई, कि आमारी गवाही सौच़्ची आ।

आखरी अभिवादन

13 मुंड्यै ताउंलै भौरी कुछ लिखणौ थौ, पर सियाही और कलमा कौरी लिखणौ नाई चांहदौ। 14 पर मुकै विश्वास आ कि हाऊं ताऊंकु फेटी मिलाऊ: तैबै आमै आमनै-सामनै बुशै लाई : 15 ताउंलै शान्ति मिलदै रौआ। इदलै गोष्टण ताउंलै ढाल कौरा ई : तिदलै गोष्टणा रै नाउं निर्द-नियौ ढाल बोलै।

यहूदा

अभिवादन

1 यहूदा री तौरफा कु जुण यीशु मसीह रौ चेलौ और याकुबा रौ भाई आ, तिऊं औटाए औन्दै रै नावां दी परमेश्वर बाबा रै प्यारै और यीशु मसीह काले बौचै औन्दै ई। 2 दया, शान्ती और प्यार तुमुलै भौरी मिलदैं थाका लागी।

झुठै शिखाउणै वालै

3 ओ प्यारेउओ, जेबी हाऊं तुमुकै तेस छुटकारै रै बारै दी लिखणै दी भौरी मैहनता कौरदैं थौ लागौ औन्दौ जेथदी आमै सारै शामिल ई, ता मुइए तुमुकै इणौ सौमझाउणौ जरुरी सौमझौ कि तेस विश्वासा लै पुरी कोशीश कौरौ जो पवित्र लोगु कै एकी बारै आ सौंभालौ औन्दौ। 4 कैलैकि केतरै इणै आदमी चुटकचार आमु मांझिरे आशी गौरे, ज़ासरै इरें सज़ा रै बारै दी पुराणै बोगता दी पैहला कु थौ लिखौ औन्दौ : इरे लोग बिण परमेश्वर रै ई और आमारै परमेश्वर री बौड़ी दया लोभ-लालचा दी बौदला ई, और आमारौ एक मालिक और प्रभु यीशु मसीह रौ इनकार कौरा ई। 5 पर अगर तुमुकै सारी बुशै एकी बारै पौतो लागी गोई आ, तैबै भी हाऊं तुमुकै एजी बुश याद कौराउणै चाहा ऊ कि प्रभुए एक ज़ाती मिस्र देशा कु छुड़ाउणै बासीए विश्वास नाई कौरनै वालै नाष किए। 6 तैबै जुण सौरगा रै दुत आपणी ज़ागाह दी टेकी नाई थाकै पर आपणी ज़ागाहा छाड़ी गोई, तिणीए सै भी सेजै फ़ैसलै रै दिना लै न्यारै दी, जो सौदा ले ई, बानीयौ छाड़ै औन्दै। 7 ज़िणै सदोम और आमोरा और तेथरै नज़दीका रै इलाकै, जो इऊं बाशीए बुरे कामा दी फौसी गौरे थे, और दुजै रै जिस्मा पिछु फौसी गौरे थे, सै आगी री सौदा री सौजा दी पौड़ीयौ औनैणौ बौणै। 8 इणी ई इरे सुइणै देखणै वालै भी आपणै-आपणै जिस्म अशुद्ध कौरा ई, और उंची ज़ागाहा रै लोगुलै बुरौ-भौलौ बोला ई। 9 पर परधान सौरगदूत मीकाइलै जेबी शैताना कु मुसा री लाशा रै बारै दी पूछ-ताछ कीई ता तेसलै बुरौ-भौलौ बोलीयौ आरोप लाइणै री हिम्मत नाई की, पर इणौ बोलौ, “प्रभु ताऊं डांटा।” 10 पर इरे लोग जेजी बुशै नाई ज़ाणदैं तेथीलै बुरौ-भौलौ बोला ई, बिण दिमागा रै गूडु बाशीए जेजी बुशै चाल-चलना कौरौ जाणा ई तेथी कौरौ नाष औआ ई। 11 तिऊं लै फिटकार! कैलैकि सै कैना ज़िणै चालेई, और मज़दुरी लै बिलामा बाशीए गलती कौरौ गोई, और कोरहा ज़िणै विरोध कौरौयौ नाष हुए ई। 12 इरे तुमारी प्यार कौरनै री खुम्बली दी तुमु आइलै खा-

पिया ई, समुन्दरा दी चोरुए औन्दै डोकै बाशीए ई और बेधडक हुईयौ आपणौ पेट भौरनै वालै ज़ागणै वाले ई; सै बिण पाणी रै बादला ज़िणै ई, ज़ास बागुर उड़ाइयौ नियां; झौडै औन्दै पाचा रै पेड़ ई, जो दुई बारै मौरै औन्दै ई, और जौड़ी कु पोदुई गौरे; 13 इरे समुन्दरा री बौड़ी छालै ई, जो आपणै शर्मा रै कामा री शेषे फिराउंदै थाका ई लागी। इरे ओरु-पोरु घुमणै वालै तारै ई, ज़ास काले सौदा लै भौरी न्यारौ आ छाड़ौ ओन्दौ। 14 हनोकै भी जुण आदमा कु सातवी पीड़ी दी थौ, एथरै बारै दी भविष्यवाणी की, “देखौ प्रभु आपणै लाखौ पवित्रु आइलै आशौ 15 कि सारेऊ रौ फ़ैसलौ कौरा, ताकी लोगुए जो बुरे काम कौरै ई तिऊं कालै और तिउंए जो परमेश्वर रै विरोधा दी बुरे वचन बोले ई, तिउंलै सौजा दिया आ।” 16 इरे ता चुगली कौरनै वालै ई और आरोप लाइणै वालेई इरे आपणी मोज़ी रै गुलाम ई और आपणै मुआं कु घमण्डा री बुशै बोला ई और इरे आपणै फाइदैं लै मुंआ देखीयौ बौड़ाई कौरा ई।

खौबरदारी और उपदेश

17 पर ओ प्यारेउओ, तुमै इऊं बुशै याद छाड़ौ जो आमारै प्रभु यीशु मसीह रै चलेउए पैहलै बोली गोई। 18 सै तुमु आइलै बोला थै, “पिछलै दिनु दी इणै मज़ाक कौरनै वालै हुणै जो आपणी बुरी इच्छा माथै हाण्डा ई।” 19 इरे से ई जो झौगडौ पाआ ई; इरे शारीरिक लोग ई; ज़ासदी आत्मा नाई आ। 20 पर ओ प्यारेउओ, तुमै आपणै पवित्र विश्वासा दी बौड़दैं और पवित्र आत्मा दी प्राथना कौरदैं, 21 आपु परमेश्वर रै प्यार दी बौणी रौओ; और सौदा री ज़िन्दगी लै आमारै प्रभु यीशु मसीही री बाटा दी हाण्डदैं थाकौ लागी। 22 तिऊं माथै जुण शक कौरा ई दया कौरौ। 23 और भौरी आगी मांझीया कु ओरु गाडौ, और भौरी माथै डौरीयौ दया कौरौ पर तेस जुडके कु नफरत कौरौ जो जिस्मा कौरौ दागी बौणी गौओ।

आशीषा रै वचन

24 आबै जो तुमु ठोकर खाणै कु बौचाई सौका और आपणी बौड़ाई री भरपुरी काए मगन और निर्दोश कौरौयौ खौडौ कौरौ सौका। 25 तेस एकी परमेश्वर आमारै छुटकारै दैणै वालै री महीमा और बौड़ाई और पराक्रम और हक आमारै प्रभु यीशु मसीह कौरौए ज़िणौ पैहलै जुगा ओअलै, आबै भी, और सौदा-सौदा लै रौआ लौ। आमीन!

प्रकाशित वाक्य

सातेउ कलिसिया रौ अभिवादन

1 यीशु मसीह रौ प्रकाशितवाक्य, जो तेसके परमेश्वर एजी ताई दैऔ कि सेउ आपणै सेवा कौरणै वालेउ के सैजी बुशै, जेथरौ हुणौ शिगरी और जुरुरी आ, तिऊं देखाला; और यीशुए आपणै सौरगा रौ दूत भेजियौ तेसरै जरीयै आपणै सेवक यूहन्ना लै बौलौ, 2 जुणिए परमेश्वरा रौ वचन और यीशु मसीह री गवाही, मतलब जो कुछ तिणिए देखौ थौ तेसरी गवाही देई। 3 भौलौ आ सेउ जुण इऊं हुणैवाली बुशु रै वचन पौड़ा आ, और सै जुण शुणा ई और एथदी लिखी औन्दी बुशै माना ई; कैलैकि बौग्त नजदीक आ। 4 यूहन्ना री तौरफा कु आसिया री सात धार्मिक खुंबलीऊ रै नावां दी : यीशु री तौरफा कु और जुण थौ और जुण आशणैवालौ आ; और तिऊं सात आत्मा री तौरफा कु जो सिंहासना काए ई, 5 और यीशु मसीह री तौरफा कु आ जो विश्वासा रै लायक गवाह और मौरै औन्दै मांझिआ कु जीउंदै हुणै वालौ सौबी कु पैहलौ आ और धौतरी रै राजेऊ रौ आफसर आ, तुमुलै बोडी दया और शान्ति मिलदै रौआ। जुण आमु आइलै प्यार छाड़ा आ, और जुणीए आपणै खुना कोरीए आमै पापा कु छुड़ाए ई। 6 आमुकै एक राज्य दैऔ और आमै आपणै बाब परमेश्वरा कालै याजक भी चाणी गौरै; यीशु री बोड़ाई और राज सौदा-सौदा लै औआ। आमीन। 7 देखौ, सेऊ बादला आइलै आशणैवालौ आ, और हर एक आखी तेस देखाई, पर जुणिए सेऊ छोपो थौ सै भी तेस देखाई, और धौतरी रै सौबी जाति रै लोग तेसरै कारण हिकडौं पिटाई। ओ। आमीन। 8 प्रभु परमेश्वर, जो आसती आ और जो थौ और जो आशणैवालौ आ, जो सौबी कु शक्तीवालौ आ, सेऊ बोला आ, “हाऊं ई अलफा और ओमेगा ऊ।”

यूहन्ना लै परमेश्वरा रौ दर्शन

9 हाऊं यूहन्ना, जो तुमारौ भाई और यीशु रै दुःख और राज्य और सौबरा दी हाऊं तुमु आइले ऊ, परमेश्वरा रै वचन और यीशु री गवाही रै कारण पतमुस नावां रै टापु दी कैद थौ। 10 हाऊं प्रभु रै दिनें आत्मा दी भौरुई गौ, और आपु पीछु शैहनाई री बोडी बाचीयै इणौ बोलदै शुणौ, 11 “जो कुछ तू देखा ई तेस किताबी दी लिखियौ साता धार्मिक खुंबलीऊ काए भेज, मतलब इफिसुस, और स्मुरना, और पिरगमुन, और थूआतीरा, और सरदीस, और फिलदिलफिया, और लौदीकिया लै” 12 तैबै मुंड्यै तेस, जो मुलै थौ बोलदै लागौ औन्दै, देखणा लै आपणौ मुं फेरौ; और पीछाऊं मुडीयौ मुंड्यै सुनै री सात (दीवटें) धूडुस देखी, 13 और तिऊं अलमारी रै बिचा दी आदमी रै छोहरु जिणौ एक आदमी देखौ, जुणिए बांगणै झाऊं जुडकै भीडै औन्दै, और हिकडे माथे सुनै रौ पाटौ बानौ औन्दै थौ। 14 तेसरै मूडा रै बाल शेतै ऊन पर पाले रै जिणै चौमकीलै थै, और तेसरी आखी आगी जीणी थी। 15 तेसरै बांगणै आच्छे पीतला रै जिणै थै जिणै कि सै आगी रै गेटै मांझिए तौपायै औन्दै ई, 16 तिणीए आपणै हाथा दी सात तारै थै आणै औन्दै, और तेसरै मूहा कु तेज दोधारी तलवार निकला थी। तेसरौ मूह इणौ चौमकौ औन्दै थौ, जिणौ सूरज ताती तौपी ऐन्दी रुडी रै बौगता दी चौमका आ। 17 जैबै मुंड्यै सेऊ देखौ ता तेसरै बांगणै माथे मौरौ औन्दै जिणौ पौडी गौ। तिणीए मुं माथे आपणौ सुलटौ हाथ छाड़ौ और बोलौ, “नाई डौर; हाऊं पैहलौ और आखरी और जीऊंदै ऊ; 18 हाऊं मौरौ गौ थौ, और आबै देख हाऊं सौदा जीऊंदौ ऊ; और मौरणै और अधोलोका री तालटी मुंडै कै ई। 19 एथीलै जो बुशै ताइयै देखी ई और जो बुशै औन्दै इ लागी ऐन्दी, और जो बुशै एथ बासीए हुणैवाली ई, तिऊं सारी लिख। 20 मतलब तिऊं सात तारेऊ रौ भेद जो

ताइए मौरै सुलटे हाथा दी देखै थै, और तिऊं सात सुने री अलमारी रौ भेद : सै सात तारै सात धार्मिक खुंबली रै दूत ई, और सै सात धूडुस सात धार्मिक खुंबली ई।

इफिसुसा लै खौबर

2 इफिसुसा री धार्मिक खुंबली रै दूता लै इणौ लिख, कि, जो सात तारै बीचा दी घुमा ई, सेऊ इणौ बोला आ कि 2 हाऊं तैरौ काम, और मेहनत, और तैरौ सौबर जाणाऊं; और इणौ भी, कि तू बुरै लोगु नाई देखी बौलवौ; और जुण आपु लै प्रेरित बोला ई, और आसतै नाई, सै ताइए पौरखियौ झूटै पाए। 3 और तू सौबर कौराई, और मौरै नावां लै दुःख झेली-झेलीयौ खौडौ नाई। 4 पर मुंड्ये तैरै खिलाफ इणौ बोलणौ आ कि ताइए आपणौ पैहलौ जिणौ प्यार छाड़ी गौ आ। 5 एथीलै याद कर, कि तू किदरु लोटौ ई, और जीऊ बौदुल और पैहलै जिणौ काम कर; और अगर तू जीऊ नाई बौदला लौ, ता हाऊं, ताऊं काए आशियो तेरी धूडुस तिवरा कु पोरु हटाऊ। 6 पर हां, ताऊंदी एजी बुश ता आसती आ, कि तू नीकुलइऊ रै कामा कु नफरत कौरा ई, जास कु हाऊं भी नफरत कौरु ई। 7 जासरै कौन्थु ई, सेऊ शुणा लौ कि आत्मा खुंबलीऊ लै का बोला सा : जुण जिता लौ, हाऊं तेसलै तेस जिन्दगी रै पेड़ा कु जो परमेश्वरा रै सौरगा दी ई, फल खाणा लै दिआ ऊ।

स्मुरणा लै खौबर

8 और स्मुरना री खुबलीऊ रै दूता लै इणौ लिख, कि जो पैहलौ और आखरी आ; जो मौरौ गौ थौ और आबै जीऊंदौ हुई गौ आ, सेऊ इणौ बोला कि ई 9 हाऊं तैरौ दुःख और गरीबी जाणा ऊ (पर तू सेठ ई), और जो लोग आपुलै यहूदी बोला ई और आसतै नाई, पर शैताना री खुंबली ई, हाऊं तिऊं री बुराई भी जाणा ऊ। 10 जो दुःख ताऊं झेलणै जा लै, तिऊं कु नाई डर : कैलैकि शुण, शैतान तुमु मांझिआ कु कइउ ता जेला दी पाइणै री ताकि दी आ। ताकी तुमै पौरखिया; और तुमुए दस दिना झाऊं दुःख जा ई झेलणै: मौरनै झाऊं विश्वासी रौऊ; ता हाऊं ताउंलै जीन्दगी रौ ताज दिआ ऊ। 11 जासरै कौन्थु ई, सै शुणा लै कि आत्मा खुंबलीऊ लै का बोला आ : जो जिता लौ, तेसलै दुजी मौउता कु नुकसान नाई औन्दै।

पिरगमुना लै खौबर

12 “पिरगमुना री खुंबली रै दूता लै इणौ लिख, कि, जासकै दुई-धार साफ तलवार आ, सेऊ इणौ बोला आ, कि 13 हाऊं इणौ ता जाणाऊ कि, तू तिरे रौआ ई जिरे शैताना रौ सिंहासन आ, तू मौरै नावां माथे पाकौ रौआ ई; और मुं माथे विश्वास कौरणै रै कारण तिऊं सेजे दिना दी भी पिछे ना मुडौ जेबी मौरै विश्वास वालौ साथी अन्तिपास, तुमु मांझीए सेजी जागहा दी झांगौ जिरे शैतान रौआ आ। 14 पर मुंड्ये तैरै खिलाप कुछ बोलणौ आ, कैलैकि तैरै बाटीए कुछ इणै ई, जो बिलामा री शिक्षा माना ई, जुणिए छोहरु इस्त्राएलिऊ काए ठोकरा रौ कारण छाड़णौ शिखाओ, कि सै मुर्ति काए चड़ाई ऐन्दी चीजे खा, और गान्दै काम कौरा। 15 तिणी ई तैरै बाटीए केती ता इणै ई, जो नीकुलिऊ री शिक्षा माना ई। 16 ता मन बौदलौ, नाई ता हाऊं, ताऊं काए फेटी आशियो, आपणै मुंआ री तलवारा कौरिए तिऊं आइलै लोडाऊ। 17 जासरै कौन्थु ई, सै शुणा लै कि आत्मा खुंबलीऊ लै का बोला आ; जुण जिता लौ, तेस लै हाऊं चोरिए मन्ना मांझिआ कु दिआऊ, और तेसकै एक

शेतो ढोल भी दिआऊ; और तेस ढोला माथे एक नाउं लिखो औन्दो हुआ, तेस सिरफ सेऊ ई देखी सौका जुण तेस ढोल निया लौ।

थुआतुरा लै खौबर

18 और थुआतीरा री खुंबली रै दूता लै इणो लिख, कि, परमेश्वरा रौ छोहर जासरी आखी आगी ज़ीणी ई, और जासरै बांगणै आच्छे पीतला रै जिणै ई, इणो बोला आ, कि 19 हाऊं तैरै काम, प्यार, विश्वास, और सेवा, और सौबर जाणाऊ, और इणो भी कि पिछलै काम पैहलै कु बौड़ियो ई। 20 पर मुंइरे तैरै बारै दी इणो बोलणो आ, कि तू तिरें छेउडी इजबेल रोअणै दिआई जो आपूलै भविश्यवाणी कौरनै वाली बोला आ, और मैरै सेवकु गान्दै काम कौरणा लै, और मूर्ति कारे चडाई ऐन्दी चीजै खाणा लै शिखाइओ बिश्वाशा आ। 21 मुंइरै तियांलै जीऊ बौदुलणै रौ मौकौ दैओ, पर सै गान्दै कामा कु जीऊ बौदुलणो नाई चांडी। 22 देख, हाऊं तिरें चारपाई माथे पा ऊ; और जो तियां आइलै गान्दै काम कौरा ई अगर सै भी तियां जिणै गान्दै काम कु जीऊ नाई बौदुला लै ता तिरुं बौडै दुःखा दी पाऊ। 23 और हाऊं तिरें लोलडै पोरु जांगाऊ; और तैबे सारी खुंबली जाणा ली कि हिकडौं और जीवा रौ परखणै वालो हाऊं ऊ; और हाऊं तुमु मांझिआ कु हर एकी लै तेसरै कामा रै अनुसार बौदलौ दिआऊ। 24 पर तुमै थुआतीरा रै बाकी लोगू के, जेती एजी शिक्षा नाई मानदै, तिरुं बुशे जेथलै शेताना री गेहरी बुशे बोला ई, नाई जाणदै, इणो बोलाऊ, कि हाऊं तुमु माथे औजौं भार नाई पांडी। 25 पर हां, जो तुमुके आसा सा, तेस मुं आशणै झाऊं पाकडी छाडौ। 26 जो ज़िता लौ और मैरै कामा रै ज़रीयै आखरी झाऊं कौरदै रौआ लौ, हाऊं तेसकै जाति-जाति रै लोगु माथे हक दिआऊ, 27 और सेऊ लोए रौ राजदण्ड निर्दयो तिरुं माथे राज कौरा आ, जिणो कि कुम्हारा रै माटै रै ओखर फुटा ई : जिणो कि मुंइरै भी इणी ई हक आपणै बाबा कु पाओ आ; 28 और हाऊं तेसलै दोतकौ तारौ दिआ ऊ। 29 जासरै कौन्थु ई, सै शुणा लै कि आत्मा खुंबलीऊ लै का बोला आ।

सरदीसा लै खौबर

3 और सरदीसा री खुंबली रै दूता लै इणो लिख, कि, जासकै परमेश्वरा री सात आत्मा और सात तारै ई, सेऊ इणो बोला आ, कि हाऊं तैरै काम जाणाऊ, कि ताउंलै ज़िऊंदो ता बोलाई, पर आसा तु मौरौ औन्दौ। 2 उज्जी रौओ, तिरुं चीजेउ लै जो बाकी रौई गोई ई, और जो मिटणै वाली थी, तिरुं पाकी कौरौ; कैलैकि मुंइरे तुमै केजै कामा लै आपणै परमेश्वरा रै नजदीक नाई पाए। 3 ता याद कर, कि तांइरे किणी रीति कौरौ शिक्षा पाई थी और शुणी थी, और तेसदी बाणी रौऊ, और ज़ीऊ बौदुल: और अगर तू ऊज्जी नाई रौआ लौ; ता हाऊं चोरा जिणो आशाऊ और तू केबी भी ना जाणी सौका लौ, कि हाऊं एकी ई घौडी ताऊं काई आशाऊ। 4 पर हां, सरदीसा दी तैरै कुछ इणै लोग ई, जुणिए आपणै-आपणै जुडकै गांदे नाई किए सै शैतै जुडकै भीड़ियो मुं आइलै घूमाई कैलैकि सै इणै लायक आ। 5 जुण ज़िता लौ, तेसकै इणी ई शैतै जुडकै भीड़ाइणे ई, और हाऊं तेसरौ नाउं जिन्दगी री किताबी कु केज्जी भी रीति कौरौ नाई काटू लौ, पर तेसरौ नाउं आपणै बाब और तेसरै सौरगा रै दूतु कारे मानू लौ। 6 जासरै कौन्थु ई, सै शुणा लै कि आत्मा धार्मिक खुंबली लै का बोला सा।

फिलदियाफिया लै खौबर

7 और फिलदिलफिया री धार्मिक खुंबली रै दूता लै इणो लिख, कि, जुण पवित्र और सौच्यो आ, और जुण दाऊदा री तालटी छाडा ई, जासरौ खोलौ औन्दौ कोई बन्द नाई कौरौ बौलदो और बन्द कियो औन्दौ कोई नाई खोली बौलदौ, सेऊ इणो बोला आ, कि 8 हाऊं तैरै काम जाणाऊ, (देख मुंइरै ताऊं कालै एक दार उगाडी आ छाडौ औन्दौ, जास कोई बन्द नाई कौरौ बौलदौ) कि तेरी शक्ति थोडीई आ, और तांइरे मैरौ वचना रौ पालन कियो आ और मैरै नावां लै नाई मुकरौ। 9 देख, हाऊं शेताना रै तिरुं खुंबली वालेऊ तैरै वशा दी कौराऊ जो यहूदी ई बाणै औन्दै, पर आसतै नाई, और झूठ बोलाई-देख हाऊं इणो कौराऊ, कि सै ताऊं कारे आशियो तैरै बांगणै माथे पौड़ियो

ताऊंके ढाल कौराई, और इणो जाणा ई, कि मुंइरै ताऊं कु प्यार छाडौ आ, 10 ताइयै मैरै सौबरा रै वचन पाकडी छाडे ई, एथीलै हाऊं भी ताऊं मुसीबता रै बौन्तै बचाई छाडाऊ, जो घौतरी माथे रौइणै वालेउ परखणालै संसारा दी आशणै वालो आ। 11 हाऊं शीगरी ई आशणैवालौ ऊ; जो कुछ ताऊं कारे आ, तेस पाकडी छाडै, ताकि कोई तैरौ ताज ना छुडावा। 12 जुण ज़िता लौ, तेस हाऊं आपणै परमेश्वरा रै घौरा दी एक खाम्बो चाणाऊ; और सेऊ केबी भी बाइरै नाई निकला लौ; और हाऊं आपणै परमेश्वरा रौ नाउं, और आपणै परमेश्वरा रौ इलाकौ, मतलब नौए यरुशलेमा रौ नाउं, जो मैरै परमेश्वरा कारे कु सौरगा माथा के आशणै वालो आ और आपणै नौवो नाउं तेस माथे लिखा ऊ। 13 जास रै कौन्थु ई, सै शुणा लै कि आत्मा धार्मिक खुंबली लै का बोला आ।

लौदिकिया लै खौबर

14 और लौदिकिया री धार्मिक खुंबली रै दूता लै इणो लिख, कि, जो आमीन, और विश्वासा रै लायक, और सौच्यो गवाह सा, और परमेश्वरा री दुनिया रौ मुख्य कारण आ, सेऊ इणो बोला आ 15 कि हाऊं तैरै काम जाणाऊ कि तू ना ता शेलौ, और ना ता तातौ, भौलौ हुआ थौ कि तू शेलौ या तातौ हुआ थौ। 16 एथीलै कि तू गुनगुनो ई, और ना शेलौ ना तातौ : हाऊं ताऊं आपणै मुआं कु फिराउणै वालो ऊ। 17 तू जो बोला ई, कि हाऊं अमीर उ, और अमीर हुई ऐरौ ऊ, और मुलै केज्जी भी चीजा री कामी नाई, और इणो नाई जाणदौ, कि तू अभागो और बेकार, कंगाल, शेडौ, और नांगौ ई। 18 एथीलै हाऊं ताउंलै सलाह दिआऊ कि आगी दी तौपाओ औन्दौ सुनौ मुकु मोल निऊं, कि तू अमीर हुआ लौ; और शैतै जुडकै निऊ कि तिरुं भीड़ियो तू बेइजत ता नाई हुआ लौ; और आपणी आखी दी लाइणा लै सुरमौ निऊं, कि तू देखदै लागा। 19 हाऊं जास-जास कु प्यार छाडा ऊ, तिरुं सौबी लै अकल और ताडना दिआऊ, एथीलै जोशिलै हुआ, और जीऊं बौदलौ। 20 देख, हाऊं दारा कारे खौडौ हुइयो खटखटावा ऊ ; अगर कुण मेरी बाच शुणियो दार खोला लौ, ता हाऊं तेस कारे भीतै आशियो तेस आइलै रोटी खाआऊ, और सेऊ मुं आइलै रोटी खाआ। 21 जुण ज़िता लौ, हाऊं तेस आपू आइलै आपणै राजगादी माथे बौशला ऊ, जिणो हाऊं भी ज़ीतीयो आपणै बाबा आइलै तेसरी राजगादी माथे बौशी गौ ऊ। 22 जास रै कौन्थु ई, सै शुणा लै कि आत्मा धार्मिक खुंबली लै का बोला आ।

सौरगा ई आराधना

4 एजी बुशु बासिए जो मुंइरे देखी, ता का देखाऊ कि सौरगा दी एक दार खुलौ औन्दौ आ; और जो मुंइरे पैहलै तुहरी री बाचा कु आपू आइलै बुशे लाइंदे शुणो थौ, सेऊ ई बोला सा, कि इदै उपरै आश: और हाऊं सेजी बुशे ताऊंके बोलाऊ, जेथ रौ इऊं बुशु बासिए पुरौ हुणो ज़रुरी आ। 2 और खरकचार हाऊं आत्मा दी भौरुई गो; औजौ का देखा ऊ, कि एक राजगद्दी सौरगा दी बाणी औन्दौ आ, और तिरें राजगद्दी माथे कोई बौशौ औन्दौ आ। 3 और जो तेथ माथे बौशौ औन्दौ आ, सेऊ यशब और माणिक्या जिणो दिशा आ, और तिरें राजगद्दी रै चारो तौरफा दी मरकता जिणो एक मेघधनुष दिशा सा। 4 और तिरें राजगद्दी रै चारो तौरफा दी दुई बीयें चार राजगद्दी ई; और इऊं राजगद्दी माथे पुराणै जमानै रै लोग शैतै जुडकै भीड़ियो ई बोशै औन्दै, और तिरुं रै मूढा माथे सुनै रै ताज ई। 5 और तिरें राजगद्दी कु बिजली और गुडनौ निकला आ और राजगद्दी कारे आगी रै सात दीयै ई जौलै औन्दै, इयै परमेश्वरा री सात आत्मारै ई। 6 और तिरें राजगद्दी कारे बिल्लोरा रै जिणो शीशै रौ समुन्दर आ, और राजगद्दी रै बीचा दी और चारो तौरफा दी चार आदमी ई, जास रै आगे पिछे आखी ई आखी आ। 7 पैहलौ आदमी बरागा जिणो आ, और दूजौ आ बाशटु जिणो, चिजै आदमी रौ मुंह आ आदमी जिणो, और चौथौ आदमी आ उड्डे उकाबा जिणो। 8 और चारीया आदमीऊ रै छौं-छौं पांखे ई, और चारीया भिलै, और भीतै आखी ई आखी आ; और सै राची दौऊती बिण आराम कौरियो इणो बोलदै थाका ई लागी, पवित्र, पवित्र, पवित्र प्रभु परमेश्वर, सौबी कु शौक्ति वालो, जो थौ, और जो आसा, और जो आशणै वालो आ। 9 और जैबे सै आदमी तेस री, महिमा

और सेवा और धन्यावाद कौराई; जो राजगद्दी माथे आ बोशौ औन्दौ, और सौदा ज़िउंदौ आ; 10 तैबै चार बिरे दुई पुराणें आदमी राजगद्दी माथे बोशौणें वालें काए धौनी पौडै, और तेसकें जो सौदा जीऊंदी आ ढाल कौराई; और आपणों-आपणों ताज़ राजगद्दी काए इणों बोलीयो धौनी पाई, 11 ओ आमारें प्रभु, और परमेश्वर, तू ही महिमा, सेवा, शौक्ति रै लायक ई; कैलैकि ताइरे सौबी चिजें चाणी और सै तेरी ई मौरजी री थी, और चाणी ई।

मुहरा कौराई बंद किताब और मेन्नों

5 और जो राजगद्दी माथे बोशौ आ, मुंइरे तेसरें सुलटै हाथा दी एक किताब देखी, जो भीतें और बाइरें लिखी औन्दी थी, और सै सात मुहरा लाइयो बन्द कौराई ऐन्दी थी। 2 तैबै मुंइरे एक शक्तिशाली सौरगा रौ दूत देखौ जो ऊंचे बाचा दी इणों परचार कौरा थौ कि इणें किताब खोलणें और एथरी मुहरा चोड़णें रै लायक कुण आ? 3 और ना सौरगा दी, ना धौतरी माथे, ना धौतरी थालें कोई तिणें किताब खोलणें या तिणें देखणें रै लायक ना निकलौ। 4 और हाऊं ढीकरी-ढीकरीयो लेरदें लागौ, कैलैकि तिणें किताब खोलणें, या तिणें देखणें रै लायक कोई ना मिलौ। 5 तैबै तिउं पुराणें ज़मानें रै लोगू मांझिया कु एकियें मुंलें बोलौ, “नाई लेर; देख, यहूदा रै खानदानी (गौत्रा) रौ सेऊ बराग, जो दाऊदा रौ मूल आ, तिणें किताब खोलणें और तिणें किताबी री साता मुहरें चोड़णा लें ज़िंतौ औन्दौ आ। 6 और मुंइये सै राजगद्दी और चारीया आदमी और तिउं पुराणें ज़मानें रै लोगू मांझीरे, जिणों एक इणों औन्दौ गाबडु खौडौ देखौ: तेसरें सात शींग और सात आखी थी; इयें परमेश्वरा री सात आत्मारें ई, जो सारी धौतरी माथे ई भेजी ऐन्दी। 7 तिणिए आशियो तेसरें सुलटै हाथा कु जो राजगद्दी माथे थौ बोशौ औन्दौ, सै किताब नीं गोई। 8 और जैबै तिणिए सै किताब नीं गोई, ता सै चारीया पुराणें लोग और सौबी दुई बिरे चार पुराणें लोग तेस गाबडु काए धौनी लोटौ गौरे; और सौबी रै हाथा दी बाइशी और धूपा कु भौरें औन्दै सुनै रै ओखर थै, इयें ता पवित्र लोगू री प्राथना आ। 9 और सै एजौ नौवौ गेट गांइदें लागै, तू इयें किताब निणा, और एथ री मुहरें खोलणें रै लायक ई; कैलैकि ताइरे मौरियो आपणें लोहू कौरा हर कुल, और भाषा, और लोग और जाति मांझिया कु परमेश्वरा कालें लोग खरीदें ई, 10 और तिउंरे आमारे परमेश्वरा कालें एक राज्य और याजक चाणें; और सै धौतरी माथे राज कौरा ई। 11 और जैबै मुंइये देखौ, ता तिणें राजगद्दी और तिउं आदमीऊ और तिउं पुराणें ज़मानें रै लोगू रै चारो तौरफा दी भौरी सौरगा रै दूत री बाच शुणी, जैथ री गिनती लाखौ और करोड़ा री थी। 12 और सै ऊंची बाचा कौरा बोला थै, कि इणों औन्दै गाबडु ही शक्ति, और धन, और बुद्धी, और शक्ति, और सेवा, और महिमा और धन्यावादा रै लायक आ। 13 तैबै मुंइये सौरगा दी, और धौतरी माथे, और धौतरी थाल, और समुन्दरा री सौबी चाणी औन्दी चीजेउ लै, और सौबी कुछ जो तेथ दी आ, इणों बोलदें शुणौ, कि जो राजगद्दी माथे बोशौ आ, तेसरें, और गाबडु रौ धन्यावाद, और सेवा, और महिमा, और राज्य, सौदा रौआ। 14 और चारीया आदमीउरे आमीन बोलौ, और पुराणें ज़मानें रै लोगू धौनी पौडियो ढाल कियो।

सात मुहरा रौ खोलिणों

6 तैबै मुंइये देखौ, कि गाबडुरे तिउं सात मुहरा मांझिया कु एक खोली; और तिउं चारीया आदमीऊ मांझिया कु एकी री गूडने री बाच शुणी, “आश!” 2 मुंइये नौजर फेरी, और देखौ, एक शेतौ घोडौ आ, और जूण तेस माथे बोशौ औन्दौ थौ तेसकें एक धनुष आ; और तेसकें एक ताज़ आ दैऔ औन्दौ, और सेऊ जय कौरियो निकलौ कि औजौ भी जय मिला। 3 जैबै तिणिए दुजी मुहर खोली, ता मुंइये दुजौ आदमी इणों बोलदें शुणौ, “आश!” 4 तैबै एक घोडौ औजौ निकलौ जो रातें रौगां रौ थौ; जूण तेस माथे बोशौ औन्दौ थौ तेसकें इणों हक थौ दैऔ औन्दौ कि धौतरी माथा कु मेल चुंगा लौ, ताकि लोग एकी दुजेऊ इणों लै; और तेसलें एक बौडी तलवार आ देई ऐन्दी। 5 जैबै तिणिए चीजी मुहर खोली, ता मुंइये चिजौ आदमी इणों बोलदें शुणौ, “आश!” मुंइये नौजर लाई, और देखौ, एक कालौ घोडौ आ, और जूण तेस माथे बोशौ औन्दौ थौ तेस रै हाथा दी एक तराकडी आ; 6 और मुंइये

तिउं चारिया आदमीऊ मांझिया कु एक बाच इणें बोलदें शुणी, “दीनारा रौ सेर भौर गीऊं, और दीनारा रौ चीन सेर जौ, पर तेल और दाखरस नाश नाई कौरैऊ।” 7 जैबै तिणिए चौथी मुहर खोली, ता मुंइये चौथे आदमी री बाच इणों बोलदें शुणौ, “आश!” 8 मुंइये नौजर लाई, और देखौ, एक पीउलौ घोडौ आ; और जूण तेस माथे बोशौ औन्दौ थौ तेसरौ नाऊं मौरणौ आ, और अधोलोक तेस पिछु आ; और तिउंके धौतरी री एक चौथाई माथे इणों हक आ दैऔ औन्दौ कि तलवार, और काल, और मौरणौ, और धौतरी रै जागली जानवरा रै जरीरे लौगू पोरु इणों लाई। 9 जैबै तिणिए पांजवी मुहर खोली, ता मुंइये वेदी थालें तिउंरे प्राण देखें जो परमेश्वरा रै वचना रै कारण और तिणें गवाही रै कारण जो तिउंरे देई थी इणों औन्दै थै। 10 तिउंरे जौरे हाका देइयो बोलौ, “ओ मलिक, ओ पवित्र और सौचौ; तू केबी इणों फेसलौ नाई कौरदौ? और धौतरी रै रौइणे वालेऊ कु आमारे खुना रौ बौदलौ केबी इणों नाई निआलौ?” 11 तिउं मांझीआ कु हर एकी के शेतें जुडके दै, और तिउंलें बोलौ कि औजौ थोडै बौगता इणों आराम कौरौ, जेबी इणों की तुमारे साथी दास और भाई जो तुमु जिणें मौरणें वालें ई तिउंरी भी गिनती पुरी ना हुआ। 12 जैबै तिणिए छौवी मुहर खोली, ता मुंइये देखौ कि एक बौडी भुईचल आशौ, और सूरज काम्बला जिणौ कालौ और पूरी जून खूना जिणी हुई गोई। 13 आसमाना रै तारें धौतरी माथे इणें पौडै जिणें बौडी आंधी (बागुरा) कारी हिलीओ अंजिरा रै पेडा रै काचूचै फल इणों लाई। 14 आसमान इणों हिली गौ जिणों चिडी मेटडी बारें सौरका; और हर एक पहाड़, और टापू, आपणी-आपणी जागा कु टौली गौरे। 15 तैबै धौतरी रै राज, और परधान, और फौजी आफसर, और अमीर और शक्तिशाली लोग, और हर एक सेवक और हर एक आजाद पहाडी रै ओडाचीउ दी और डोकेऊ दी चोरुई गौरे, 16 और पहाडी और चट्टाना लै बोलदें लागें, “आमूं माथे पौडै; और आमूं तेसरें मुंआ कू जो राजगद्दी माथे आ बोशौ औन्दौ, और गाबडु रै रोशा कु चोर। 17 कैलैकि तिउं रै रोशा रौ भयानक दिन आशी गौ आ, आबे कूण रुकी सौका?”

इस्राईला रै 1,44,000 लोग

7 एथ बासिरे मुंइरे धौतरी रै चारीया कूणें दी चार सौरगा रै दूत खौडै देखें। तिउंरे धौतरी री चारीया भिला री बागुर थाम्बी ऐन्दी थी ताकी धौतरी या समुन्दर या केजें भी पेडा माथे बागुर ना चाला। 2 तैबै मुंइये एक औजौ सौरगा रौ दूत जीउंदे परमेश्वरा री मुहर पाकडीयो पूरबा कु उपरें आशदें देखौ; तिणिए तिउं चारीया सौरगा रै दूता लें जासकें धौतरी और समुन्दरा रौ नुकसान कौरणें रौ हौक थौ दैऔ औन्दौ, जौरे हाके मारियें बोलौ, 3 “जेबी इणों आमै आपणें परमेश्वरा रै सेवका रै कौपाला दी मुहर ना लाई लै, तैबी इणों धौतरी और समुन्दर और पेडा लें नुकसान ना कौरैऊ।” 4 जास माथे मुहर लाई ऐन्दी आ मुंइये तिउंरी गिनती शुणी, मतलब इस्राएला री संताना रै सौबी गौत्रा मांझिया कु एक लाख दुई बियें चार हजारा दी मुहर लाई ऐन्दी : 5 यहूदा रै गौत्रा मांझिया कु बाराह हजारा माथे मुहर लाई ऐन्दी: रुबेना रै गौत्रा मांझिया कु बाराह हजारा माथे, गादा रै गौत्रा मांझिया कु बाराह हजारा माथे। 6 आशेरा रै गौत्रा मांझिया कु बाराह हजारा माथे, नपताली रै गौत्रा मांझिया कु बाराह हजारा माथे, मनशिशहा रै गौत्रा मांझिया कु बाराह हजारा माथे, 7 शमोना रै गौत्रा मांझिया कु बाराह हजारा माथे, लेवी रै गौत्रा मांझिया कु बाराह हजारा माथे, इस्राकाकारा रै गौत्रा मांझिया कु बाराह हजारा माथे, 8 जबूलूना रै गौत्रा मांझिया कु बाराह हजारा माथे, यूसुफा रै गौत्रा मांझिया कु बाराह हजारा माथे, और बिन्धामीना रै गौत्रा मांझिया कु बाराह हजारा माथे मुहर लाई ऐन्दी।

एक बौडी भीड़

9 एथ बासिरे मुंइये नौजर लाई, और देखौ, हर एक जाति और कुल और लोग और बोली मांझिया कु एक इणी बौडी भीड़, जास कोई भी गिणी नाई सौकदौ, शेतें जुडके भीड़ियो और आपणें हाथा दी खजुरा रै शाउंटें निइओ राजगद्दी रै सामने और गाबडु काए खौडी ई। 10 और बौडी बाचा कौरा औटाइओ बोलाई, “छुटकारें लै आमारे परमेश्वरा रौ, जो राजगद्दी माथे आ बोशौ औन्दौ, और गाबडु री जय-जयकार हौआ!” 11 और सारें स्वर्गदूत तिणें

राजगादी और स्याणें और चारिया आदमीऊ रें फिदियालें खौड़ें ई; तैबें सै राजगादी रें सामनै धौनी लोटै; और परमेश्वरा लें नमस्कार कौरियो बोलौ, 12 "आमीन! आमारै परमेश्वरा री बौड़ाई और महिमा, ज्ञान, धन्यवाद, ईज्जत और ताकत और शक्ति सौदा बौणी रौआ। आमीन!" 13 एथ माथे स्याणेरु मांझिया कु एकीए मुलै बौलौ, "एऊ शते जुडकै भीड़ियो कूण आ? और किये कु आशौ आ?" 14 मुंइयै तेसलै बौलौ, ओ गुरु, तू ई जाणा ई।" तिणीए मुलै बोलौ, "एऊ सेऊ आ, जो तेस महाकेशा मांझिया कु निकलिओ आशौ आ; इऊंए आपणै-आपणै जुडकै गाबडु रें लोऊ दी धोड़ौ शते किये ई। 15 एजी बजाह कु सै परमेश्वरा री राजगादी रें सामनै ई, और तेसरै घौरा दी रात्र-दिन तेसरी सेवा कौराई, और जो राजगादी माथे आ बोशौ औन्दौ, सेऊ तिऊं माथे आपणौ ताम्बु ला आ। 16 सै तैबे भुखे और चिशे नाई रौआले; और ना तिऊं माथे रुड, ना कोई तौपिश पौडाली। 17 कैलैकि गाबडु जो राजगादी रें बिचा दी आ तिउंरी रखवाली कौरा आ, और तिऊं जिन्दगी रें पाणी रें जौला काए निआ आ; और परमेश्वर तिउंरी आखी कु सारै आशु गुशा आ।

सातवी मुहर और सुने री धूडस

8 जैबे तिणीए सातवी मुहर खोली, ता सौरगा दी आधै घाण्टे झाऊं शान्ति रौई। 2 तैबे मुंइयै सै सातिया सरगा रें दूत देखे जो परमेश्वरा रें सामनै खौड़ें रौआ ई, और तिउंके सात बांइशी देई। 3 तैबे एक औजौ सौरगा रौ दूत सुनै री धूडुसा कौरी आशौ, और बेदी काए खौड़ौ हुओ; और तेसलै भौरी धूप दैओ ताकी सेऊ सारै पवित्र लौगु री प्राथना तिणै सुनै री बेदी माथे चडावा, जो राजगादी काए आ। 4 तेस धूपा रौ धुंओ पवित्र लौगु री प्राथना कौरी सौरगा रें दूता रें हाथा कु परमेश्वरा काए पौउचौ। 5 तैबे सौरगा रें दूतै धूडुस निईओ तेथदी बेदी री आग भौरी, और धौतरी माथे पाई; ता गुडनौ और बाच, और बिजली और भूईचल औन्दै लागै।

सात तुरही

6 तैबे सै सातिया सौरगा रें दूत जास कै सात बांइशी थी, तिऊं फुकुरना लै त्यार हूई गोए। 7 पैहलै सौरगा रें दूतै करनाल फुकरी, और लोऊ दी मिलै औन्दै शौरु और आग पैदी हुई, और धौतरी माथे पाए; और धौतरी रौ एक हिस्सौ पोरु जौलौ, और पेड-पौधेरु रौ भी एक हिस्सौ जौलौ, और सारौ हौरौ घास भी जौलौ पोरु। 8 दूजै सौरगा रें दूतै करनाल फुकरी, ता जिणौ कि आगी रौ जौलद लागौ औन्दौ एक बौड़ौ पहाड समुन्दरा दी पाओ; और समुन्दरा रौ एक तिहाई हिस्सौ लोऊ हुई गौ, 9 और समुन्दरा रें एक तिहाई हिस्सै रें जीव-जन्तु मौरौ गोए, और एक तिहाई हिस्सै दी पाणी रें जहाज नाश हुई गोई। 10 चिजै सौरगा रें दूतै करनाल फुकरी, और एक बौड़ौ तारौ जो मशाला (प्याशै) रें जिणौ जौला थौ, सौरगा कु चुटौ, और नौई रें एक तिहाई हिस्सै माथे, और पाणी रें जौला माथे पौडौ। 11 तेस तारै रौ नाऊं नागदौना सा; और एक तिहाई हिस्सै रौ पाणी नागदौना जिणौ कौडुवौ हुई गौ, और भौरी का आदमी तेस पाणी रें कौडुवै हुणै रें कारण पोरु मौरै। 12 चौथे सौरगा रें दूतै करनाल फुकरी, और सूरजा रौ एक तिहाई हिस्सौ, और जुना रौ एक तिहाई हिस्सौ और तारेऊ रें एक तिहाई हिस्सै माथे परेशानी आशी, इदरा झाऊं कि तिउंरौ एक तिहाई हिस्सौ न्यारौ हुई गौ और दिना री एक तिहाई दी प्याशौ नाई रौओ, और तिणी ई राची दी भी। 13 जैबे मुंइयै औजौ देखौ, ता सौरगा रें बीचा दी एक उकाब उडदै और ऊँची बाचा दी इणौ बोलदै शुणौ, "तिऊं चीन सौरगा रें दूता री करनाला री बाचा रें कारण, जो इबी झाऊं फुकुरना लै ई रौई ऐन्दी, धौतरी दी रौइणै वाले माथे फिटकार, फिटकार, फिटकार!"

9 जैबे पांजवै सौरगा रें दूतै करनाल फुकरी ता मुंइयै सौरगा कु धौतरी माथे एक तारौ लोटदै देखौ, और तेसकै पौइताला री तालटी देई आ। 2 तिणीए पौइताल खोलौ, और पौइताला कु बौड़ै कुण्डा रें जिणौ धुंओ उठौ, और कुण्डा रें धुंए कौरी सूरज और बागुर न्यारै हुई गोए। 3 तेस धुंए मांझिरे कु धौतरी माथे भौरी का (किडै-किमलै) टिड्डी निकली, और तिउंके धौतरी रें बिचछु जिणी शक्ति देई। 4 तिउंलै बौलौ कि ना धौतरी रें घास, ना कासी

हरियाली, ना ता कासी पेड़ा रौ नुकसान कौरैऊ, सिर्फ तिऊं आदमीऊ रौ, जासरै कौपाला दी परमेश्वरा री मुहर नाई आ। 5 तिउंके लोगु झांगणा लै ता नाई पर पाजं मीहनै झाऊं दुःख दैणै रौ हक दैओ आ : और तिउंरौ दुख इणौ थौ जिणौ बिचछु रें काटणै कु आदमीऊ कै हुआ आ। 6 सेजै बौगता दी आदमी मौरना लै लोडिआ ई पर नाई मिलदी; और मौरने री इच्छा कौराई, पर मौउत तिऊंकु पोरु भागा आ। 7 सै टिड्डी इणै थै जिणै लडाई लै त्यार किये औन्दै घौड़ै औआ ई, और तिउंरै मुंडा माथे सुनै रें जिणै ताज थै; और तिउंरै मुंह आदमीऊ जिणै थै। 8 तिउंरै बाल छेउडीउ रें बाला जिणै और दांद बरागा (शेरा) रें दांदा जिणै थै। 9 तिउंरै लोहै रें झिलम थी भीडी ऐन्दी: और तिउंरै पाखेरु री बाच इणी थी जीणी रथ और भौरी घोडेऊ री लडाई दी दौडदी बारै औआ सा। 10 तिउंरी पूंछ बिचछु जीणी थी, और तिउंकी जैहर थौ, और तिउंके पांज मिहनै झाऊं आदमीऊ लै दुःख दैणै री जो शक्ति थी मिली थी, सै तिउंरै पूंछ दी थी। 11 पौइताला रौ दूत तिऊं माथे राजौ थौ; तेसरौ नाउं इब्रानी बोली दी अबदोन, और यूनानी बोली दी अपुल्लयोन आ। 12 पैहलै मुसीबत टौली एरी, शुणौ, आबै एथ बासिरे दुई मुसीबत औजौ आशणै वाली ई। 13 जैबे छौउवै सौरगा रें दूतै करनाल फुकरी ता सुनै री बेदी जो परमेश्वरा रें सामनै आ तेसरै शिंगा मांझिया कु मुंइयै इणी बाच शुणी, 14 जिणौ कोई छौउवै सौरगा रें दूता लै, जासकै करनाल थी, बोलदै थौ लागौ औन्दौ, "तिऊं चार सौरगा रें दूता लै जो बौडी नौई फुराता काए बानै औन्दै ई, तिऊं पोरु खौल।" 15 सै चार दूत खोली गोए जो तेभी, और सेजै दिने, और महीनै, और बौर्ष लै आदमीऊ री एक तिहाई हिस्सै रें पोरु जांगणा लै तैयार थै किये औन्दै। 16 तिउंरै फौजा रें सवारीऊ री गीनती एक बिरे करोड थी; मुंइयै तिउंरी गीनती शुणी। 17 और मुकै एजै दर्शना दी घोड़ै और तिउंरै इणै सवारी दिशी जासरी झिलम आग, और लाल रंगा री गहरी आग, और गन्धका जीणी थी, और तिऊं घोड़े रें मूढ शेरा (बरागा) जिणै थै; और तिउंरै मुंहा कु आग, धुओँ और गान्दी बास निकला थी। 18 इऊं चिनी ई माहामारीऊ मतलब आग, धुओँ और गान्दी बासा कौरी, जो तिउंरै मुंहा कु निकला थी एक तिहाई हिस्सै रें आदमी पोरु झागै। 19 कैलैकि तिऊं घोडेऊ री शक्ति तिउंरै मुंहा और तिउंरी पूंछा दी थी; एथिलै कि तिउंरी पूंछ सापा जीणी थी, और तिऊं पूंछा रें मूढ भी थै और इऊं कौरै सै दुःख पौउंचावा थै। 20 बाकी आदमीउरे जो तिऊं मरिऊ कौरी नाई मौरै थै, आपणै हाथा रें कामा कु जीऊ नाई बौदला, कि बुरी आत्मा री, सुनै और चांदी और पीतल और ढोल और काठा री मूर्तिऊ री पुजा नाई कौरौ, जो ना देखदै, ना शुणदै, ना हाण्डी बौलदै, 21 और जो खून, और जादु-टोणो, और बुरै काम, और चोरी तिउंरै कौरी थी, तिऊंकु जिऊ नाई बौदलौ।

स्वर्गदूत और छोटी किताब

10 तैबे मुंइयै एक औजौ शक्तिशाली सौरगा रौ दूत बादला कौशटौ औन्दौ सौरगा कु उतुरदै देखौ। तेसरै मुंडा दी पौणीयार थी। तेसरौ मुंह सूरजा जिणौ और बागणै आगी रें खाम्बे जिणै थै। 2 तेसरै हाथा दी एक छोटी किताब खोली ऐन्दी थी। तिणीए आपणौ सुलटौ लात समुन्दरा माथे और उलटौ लात धौतरी माथे थौ छाडौ औन्दौ, 3 और इणी बौडी बाचा कौरी राड देई, जिणौ शेर(बरागा) भुंगरा सा; और जैबे सेऊ जोरै औटाउओ ता गुडनै रें सात बाच शुणुई। 4 जैबे सातीया गुडनै री बाच शुणुई गोई, ता हाऊं लिखदै थौ लागौ औन्दौ, पर मुंइयै सौरगा कु एजी बाच शुणी, "जो बुशै गुडनै रें तिऊं सात बाचा कु शुणी आ तिऊं गुप्त छाड, और नाई लिख।" 5 जो सौरगा रौ दूत मुंइयै समुन्दर और धौतरी माथे खौड़ौ देखौ थौ, तिणीए आपणौ सुलटौ हाथ सौरगा भिले उपरै कियौ, 6 और जो सौदा जीऊंदौ आ, जुणिए सौरग और जो कुछ तेथ दी आ, धौतर, और जो कुछ तेथ माथे आ, समुन्दरा, जो कुछ तेथदी आ चाणौ औन्दौ, तेथरी कसम खाइयो बोलौ, "आबै ता औजौ बेर नाई पौडदी। 7 पर सातुए सौरगा रें दूता रें करनाल फुकुरनै दी हुणै वाली बाचा रें दिना दी, परमेश्वरा रें जिवा रौ संचौ औन्दौ तेस खुशी रें खौबरा रें अनुसार जो तिणीए आपणै सेवक भविष्यवाणी कौरनै वालेउ कै दैओ, पूरौ हुआ।" 8 जेजी बाच मुंइयै सौरगा कु बोलदै शुणी थी, सै तौइंरे मुं आइलै बुशै लाइदै लागौ, कि "डेऊ, जो सौरगा रौ दूत समुन्दर और

धौतरी माथे खौडौ आ, तेसरै हाथा कु तिऐं खोली ऐन्दी किताब निऊं।" 9 मुंड्यै सौरगा रै दूता काऐ डेइयौ बोलौ, "एजी छोटी किताब मुकै दै।" और तिणीऐ मुलै बोलौ, "नीऊं, इऐं खा; इयै तैरौ पेट कौडुआँ ता कौरा आ, पर तैरै मुंआ दी मौआ जिणी मीठी लाग़ा आ।" 10 तैबै मुंड्यै सै छोटी किताब तेस सौरगा रै दूता रै हाथा कु नीईयो खाई गोई। सै मरै मुंआ दी मौआ जिणी मीठी ता लाग़ी, पर ज़ैबै मुंड्यै सै खाई गोई, ता मरै पेट कौडुआँ हुई ऐरौ। 11 तैबै मुलै इणौ भी बोलौ, "कि ताइरै भौरी लोगु और ज़ातीऊ, और बोलीऊ और राज़ेऊ रै बारे दी औजौ भविष्यवाणी कौरनी जा ई।"

दुई गवाह

11 तैबै मुकै नापणा लै एक डिंगौ दैओ, और कुणिए मुलै बोलौ, "उठ, परमेश्वर रौ घोर और बेदी, और तेथदी भक्ति कौरणै वालेऊ नाप। 2 पर परमेश्वर रै घौरा रौ खौलौ नाई नाप, कैलैकि सेऊ दुजी जातिऊ लै आ दैओ औन्दौ, और सै तेस पवित्र इलाकौ दुई बिऐ दुई मीहनै झाऊं फेचा ई। 3 और हाऊं आपणै दुई शाजता लै एस हक दिआऊ, कि चादरु(टाट) कौशटियोँ एक हज़ार दुई शौ साठ दिना झाऊं भविष्यवाणी कौरा। 4 इयै सै ई जैतूना फेडु रै दुई पेड और दुई धूडुस, जो धौतरी रै प्रभु काऐ खौडै रौआ ई। 5 अगर कुण तिउरौ नुकसान कौरा लौ, ता तिउरै मुंआ कु आग निकलियोँ तिउरै दुश्मनु ज़ालियोँ राख कौरा आ; और अगर कुण तिउरै बुरौ कौरा ई, ता ज़ुरुर इणै कौरौ पौरु झांगाई। 6 तिउरै हक आ कि सौरग बौन्द कौरा, कि तिउरै भविष्यवाणी रै दिना दी पाणी ना लाग़ा; और तिउरै सौबी पाणी माथै हक आ, कि तेस लोहु चाणा, और ज़ेबी-ज़ेबी चाहालै तेबी-तेबी धौतरी माथै काई रौंगा री मुसीबत आणा। 7 ज़ेबी सै आपणी गवाही देई एरा लै, ता सेऊ जानवर जो पौइताला मांझिया कु निकला आ, तिउंकु लौडियोँ तिउं ज़ितालौ और तिउं पोरु झांगा आ। 8 तिउरै लाशै तेस बौडै इलाकै रै आडुई दी पौडी रौआ ई, ज़ासलै आत्मा रै रुपा कु सदोम और मिस्र बोला ई, ज़िए तिउरौ प्रभु भी कुसा माथै चोडाओ थौ। 9 और सौबी लोगु, और राज्य और बोलीऊ और ज़ातिऊ मांझिया कु लोग तिउरै लाशै साडै चिया दिना झाऊं देखा ई, और तिउरै लाशै औडिची दी छाडनै नाई दिआ लै। 10 धौतरी रै रौइणै वालै तिउरै मौरना कु खुश और मौगन हुआई, और एकी दुजै कै भेंट दिआ ई, कैलैकि इऊं दुइया भविष्यवक्तुऐ धौतरी रै रौइणैवालै सताऐ थै। 11 पर साडै चिया दिना बासीऐ परमेश्वर री तौरफा कु जीवना री आत्मा तिउंकी आशी गोई, और सै आपणै बांगणेऊ माथै खौडै हुइ गौऐ, और तिउं देखणै वालेऊ माथै बौडौ डौर छाई गौ। 12 तैबै तिउंके सौरगा कु एक हाक शुणुई, "इदैं उपरै आशौ!" इणौ शुणियोँ सै बादला माथै आपणै दुश्मना रै देखदैं-देखदैं सौरगा माथै डेइ गौऐ। 13 तैबै सेजे बौग्तै एक बौडौ भूईवल पौडौ, और इलाकै रौ दसुआँ हिस्सौ डौली गौ; और तेस भूईवला कौरिए सात हज़ार आदमी मौरौ गौऐ, और जो बौचै औन्दै लोग थै सै डौरौ गौऐ और सौरगा रै परमेश्वर री बौडाई की ई। 14 दुजी मुसीबत टौली गोई; देखौ, चीजी मुसीबत शीगरी आशणै वाली आ।

सातवी तूरही

15 ज़ैबै सातुऐ दुतै करनाल फुकरी, ता सौरगा दी एथरै बारे दी हाके देइयो बोलदैं लागै: "धौतरी रौ राज़ आमारै प्रभु रौ और तेसरै मसिहा रौ हुई गौ, और सेऊ जुगा-जुगा झाऊं राज़ कौरा आ।" 16 तैबै एक बिऐ चार स्याणै (पुराणै गुरु) जो परमेश्वर काऐ आपणी-आपणी राज़गादी माथै थै बौशै औन्दै, धौनी पौडियै परमेश्वर कै ढाल कौरौओ। 17 इणौ बोलदैं लागै, "ओ सौबी कु शौक्ती वालौ प्रभु परमेश्वर, जो आसती आ और जो थौ, आमै तैरौ धन्यावाद कौरौ ई कि ताइरै आपणी शौक्ती कामा दी लाइयोँ राज़ कियोँ आ। 18 दुजी जातिउऐ रोष गाडै, पर तैरै रोष आशी गौऐ, और सेजौ बौग्त आशी गौ आ कि मौरै औन्देऊ रौ फैसलौ कौरनौ जा, और तैरै सेवक भविष्यवक्तु और पवित्र लोगु लै और तिउं छोटे-बौडेऊ लै जो तैरै नावां कु डौरा ई बौदलौ दिया आ, और धौतरी रै बिगाडनैवालै नाश कौरौआ।" 19 तैबै परमेश्वर रौ घोर जो सौरगा दी आ सेऊ खोलौ, और परमेश्वर रै घौरा दी तेसरै वादै रौ सन्दूक

दिशौ; और बिजली और बाच और गुडनौ और भूईवल आशौ और बौडै-बौडै शौरु पौडै।

छेवड़ी और बौडौ साप

12 तैबै सौरगा दी एक बौडी निशाणी दिशी, मतलब एक छेउडी जुणिए सूरज थौ कौश्टौ औन्दौ, और जून तियाँरे बांगणै थालै थी, और तियाँरे मूंडा माथै बाराह तारेऊ रौ ताज थौ। 2 सै गौरकडी हुई, और जोरै जोरै औटाइआ थी कैलैकि सै हौलखिणै वाली थी। 3 और एक औजौ निशाणी सौरगा दी दीशी; और देखौ एक लाल रौंगा रौ अजगर (साप) थौ, ज़ासरै सात मूंड और सात शींग थै, और तेसरै मुंडा माथै सात राज़ा रै ताज थै। 4 तेसरी पूछे सौरगा रै तारेऊ री एक तिहाई रौ हिस्सौ झीडियोँ धौतरी माथै पाई गौ, और सेऊ अजगर तिऐं छेउडी काऐ जो जचा थी, खौडौ हुओ ताकि ज़ैबै सै हौलखीया ली ता तिआरौ छेहर पोरु खा आ। 5 तैबै तियाँरौ छेहर हुओ जो लोहै री सौजा कौरिए सौबी ज़ाति माथै राज़ कौरनै वालौ थौ, और तिआरौ सेऊ माऊं तेभी ई परमेश्वर काऐ और तेसरी राज़गादी काऐ चुंगीयोँ निर्ई ऐरौ; 6 और सै छेउडी तेस ज़ांगला लै भागी गोई ज़ियै परमेश्वर री तौरफा कु तियाँ कालै एक ज़ागहा त्यार थी की ऐन्दी, कि तिऐ सै एक हज़ार दुई शौ साठ दिना झाऊं पौला-बौडा, 7 तैबै सौरगा दी लडाई हुई, मिकाइल और तेसरै सौरगा रै दूत अजगरा आइलै लौडना लै निकलै; और अजगर और तेसरै दूत तेस आइलै लौडै, 8 पर सै नाई ज़ितै, और सौरगा दी तिउं कालै औजौ ज़ागहा नाई रौई, 9 तैबै सेऊ बौडौ अजगर, मतलब सेऊ पुराणौ साप ज़ासलै इबलीस और शैतान बोला ई और सारौ संसार बहकाउणै वालौ आ, धौतरी माथै लोटाळौ; और तेसरै दूत भी तेसी आइलै लोटाळै। 10 तैबै मुंड्यै सौरगा कु एजी बौडी बाच आशदै शुणी, कि आबे आमारे परमेश्वर रौ फ़ुटकारौ और ताकत और राज्य और तेसरै मसिहा रौ हक परगट हुओ आ, कैलैकि आमारे भाईऊ माथै आरोप लाइणै वालौ, जो राच-दीन आमारे परमेश्वर काऐ तिउं माथै आरोप ला थौ, लोटाळी गौ। 11 और सै गाबडु रै लोऊ रै कारण और आपणी गवाही रै वचना रै कारण तेस कु ज़ितै ई, और तिउंऐ आपणै प्राण आच्छै नाई ज़ाणै, इवरा झाऊं कि मौउत भी सहन की ई। 12 एथीलै, ओ सौरगा, और तेथदी रौइणै वालेओ, मौगन रौओ; ओ धौतरी, और समुन्दर, तुमु लै फिटकार! कैलैकि शैतान बौडै रोशा कौरौ तुमु काऐ उतरीयोँ आशौ आ; कैलैकि ज़ाणा आ कि तेसरौ थौडौ ज़ेई बौग्त औजौ रौ औन्दौ। 13 ज़ैबै अजगरै देखौ की हाऊं धौतरी माथै शोटी गोअऊ, ता सै छेउडी तंग कीई, ज़ासरौ, छेहर हुओ थौ। 14 पर तिऐं छेउडी कै बौडै उकाबा रै दुई पांखे दैरे, कि सापा काऐ कु उडियोँ ज़ागला दी सेज्जी ज़ागहा दी पौउंचा, ज़िए सै एकी बौगता झाऊं पालीआ। 15 और सापै तिऐं छेउडी पिछु आपणै मुंआ कौरौ नौई ज़िणौ पाणी बहाओ, ताकी तिआ छेउडी एजी नौई कौरौ बाहावा। 16 पर धौतरीऐ तिऐं छेउडी री मजद की ई। और आपणौ मूंह खोलीयोँ तिऐं नौई रौ पाणी जो अजगरै आपणै मुंआ कौरौ बहाओ थौ, पीई गौ। 17 तैबै अजगर तिऐं छेउडी लै रोशुओ, और तिआ री बौचची ऐन्दी औलादा काऐ, जो परमेश्वर रौ हुकम मानणा लै और यीशु री गवाही दैणा लै मजबूत ई, लौडदैं डैओ। 18 और सेऊ समुन्दरा रै बालू माथै खौडौ हुओ।

दुई धौण

13 तैबै मुंड्यै समुन्दरा कु एक जानवर निकुलदैं देखौ, ज़ासरै दस शींग और सात मूण्ड थै। तेसरै शींगा माथै दस राज़ा रै ताज थै, और तेसरै मूण्डा माथै परमेश्वर री बुराई रै नाऊं लिखै औन्दै थै। 2 जो जानवर मुंड्यै देखौ सेऊ शेरा (बराग) ज़िणौ थौ; और तेसरै बांगणै रीखा रै ज़िणै, और मुह बरागा रौ ज़िणौ थौ। और तिणी अजगर सापै आपणी शक्ति और आपणी राज़गादी और बौडौ हक तेसकै दैओ। 3 मुंड्यै तेसरै मुंडा मांझिया कु एकी दी इणी बौडी चोट लागी ऐन्दी देखी, ज़िणौ कि सेऊ मौरनै वालौ थौ; तैबै तेसरी जान निणै वाली सै चोट ठीक हुइ गोई, और सारी धौतरी रै लोग तेस जानवरा पीछु हौरानी कौरियोँ हाण्डै। 4 और तिउं लोगूऐ तेस सापा री पूजा की ई, कैलैकि तिणिए आपणौ हक जानवरा कै देई गौ थौ, और इणै बोलियोँ

जानवरा री पूजा की ई, “कि एस जानवरा जिणौ कुण आ? कुण लौड़ी सौका एस आइलै?” 5 बौड़ी बाच बोलणें और बुराई कौरना लै तेसकै एक मुंह थौ दैओ औन्दौ, तेसकै दुई बिरे दुई दिना झाऊं कामा कौरनै रौ हक दैओ। 6 और तिणिए परमेश्वरा री बुराई कौरना कालै मुंह खोलौ कि तेसरै नावां और तेसरै ताम्बू मतलब सौरगा दी रौइणें वालेऊ री बुराई कौरा। 7 तेसकै एजौ भी हक दैओ कि पवित्र लोगू आइलै लौडा और तिऊ कु जिता, और तेसकै हर एक राज्य और लोग और बोली और जातिऊ माथे हक दैओ। 8 और धौतरी रै, सै रौइणें वाले, जासरै नाऊं तेस गाबडू रै जीवना री किताबी दी नाई लिखै, जो धौतरी रै शुरुवाता रै बौगता कु झांगे औन्दै ई, तेस जानवरा री पूजा कौरा ई। 9 जासरै कौन्थु ई, सै शुणा लै। 10 जुणिए जेला दी डेउणौ आ, सै जेला दी डिआ आ; जुण तलवारा कौरी झांगा ई, पाकौ ई सेऊ भी तलवारा कौरी मोरा आ। पवित्र लोगू री सौबर और विश्वास एथीदी आ। 11 तैबे मुंड्ये एक औजौ जानवर धौतरी मांझिआ कु निकुलदै देखौ, तेसरै गाबडू रै जिणें दुई शींग थै; और सेऊ अजगर सापा जिणौ बोला थौ। 12 सेउ तेस पैहलै जानवरा रौ सारौ हक तेस काए कामा दी आणा थौ; धौतरी और तेथदी रौइणें वालेऊ कु तेस पैहलै जानवरा री, जासरी ज्ञान निणें वाली चोट ठीक हुइ गोई थी, पूजा कौरावा थौ। 13 सेऊ बौड़ी-बौड़ी निशाणी देखाला थौ, इदरा झाऊं कि आदमिऊ काए सौरगा कु धौतरी माथे आग ला (बौरसावा) थौ। 14 तिऊं निशाणी कौरीए, जो तेस जानवरा काए देखालनै रौ हक तेसकै दैओ औन्दौ थौ; सेऊ धौतरी दी रौइणेंवालेऊ इणें कौरी बहकावा थौ और धौतरी दी रौइणें वालेऊ लै बोला थौ, कि जास जानवरा दी तलवार थी लागी ऐन्दी, सेऊ जिउंदौ हुई गौ आ, तेसरी मूर्ति चाणौ। 15 और तेसकै तेस जानवरा री मूर्ति दी प्राण दैणें रौ हक दैओ, कि जानवरा री मूर्ति बौताइंदै लागा; और जुण तिणें जानवरा री मूर्ति री पूजा नाई कौरा लौ, तिऊं पोरु झांगा। 16 तैबे तिणिए छोटे-बौड़े, अमीर-कंगाल, आजाद-सेवक सौबी रै सुलटै हाथ या तिउरै कौपाला दी एक-एक छाप लाई गोई, 17 ताकी सेऊ ई जासदी छाप मतलब तेस जानवरा रौ नाऊं या तेसरै नावां रौ नम्बर औलौ लेन-देन (खरिददारी) कौरी सौका, ओर कोई भी नाई। 18 औक्कल ऐथीदी आ, जासकै दिमाग आ, सेऊ एस जानवरा रौ नम्बर जोडा लौ, कैलैकि सेउ आदमी रौ नम्बर आ, और तेसरौ नम्बर छौ: शौ चिन बिरे छौ आ।

गाबडू और तेसरै लोग

14 तैबे मुंड्ये नौजर लाई, और देखौ, सेऊ गाबडू सिय्योन टिरा माथे खौडौ आ, और तेस आइलै एक लाख दुई बुए चार हजार लोग ई, जासरै कौपाला दी तेसरौ और तेसरै बाबा रौ नाऊं आ लिखौ औन्दौ 2 और सौरगा कु मुकै एक इणी बाच शुणुई जिणौ पाणी रौ भौरी शोर और गूडनै री बाच थी, और जो बाच मुंड्ये शुणी सै इणी थी जीणी बांइशी बाजणें वाले बांइशी बाजा ई। 3 सै राजगाद्दी काए और चारिया आदमीऊ और पुराणें गुरु काए एक नौवौं गेत थै गाइंदै लागै औन्दै। तिऊं एक लाख दुई बिरे चार हजार लोगू छाडियौ, जो धौतरी माथा कु खरीदियौ थै आणें औन्दै, कोई भी तेस गेत नाई शीखी बौला बौला थै। 4 इयै सै ई जुण छेउडीऊ आइलै अशुद्ध नाई हुए, पर तिउरी शादी नाई हुई; (क्वारे) इयै सै ई, कि जियै-कियै गाबडू डिआ आ, सै तेस पीछू डिआ ई; इयै ता परमेश्वरा लै फसला रै पैहलै फल हुणा लै आदमीऊ मांझिया कु खरीदै औन्दै ई। 5 तिउरै मुआ कु झूठ केबी नाई निकलौ थौ, सै निआरोप ई।

चीन स्वर्गदूत

6 तैबे मुंड्ये एक औजौ सौरगा रौ दूत सौरगा दी उडदै देखौ, जास कै धौतरी माथे रौइणें वाले री हर एक जाति, और कुल, और बोली, और लोगू कै शूणाउणा लै सौदा री खुश खबरी थी। 7 तिणिए बौड़ी बाचा दी बोलौ, “परमेश्वरा कु डोरौ, और तेसरी बौडाई कौरौ, कैलैकि तेसरै फैसलै कौरणें रौ बौग आशी गौ आ; तेसरौ भजन लाओ, जुणियै सौरग और धौतरी और समुद्र और पाणी रै जौल चाणौ।” 8 तैबे तेत बासिए एक दुजौ सौरगा रौ दूत इणौ बौलिओ आशौ, “ढौली गौ, सेऊ बौडौ बेबीलोन ढौली गौ, जुणियै आपणें गान्दै कामा री शराब सौबी जाति लै पिलाई।” 9 तैबे इऊं बासिए एक

औजौ सौरगा रौ दूत बौडी बाचा कौरी इणौ बोलियौ आशौ, “कि जुण-कुण तेस जानवर और तेसरी मूर्ति री पूजा कौरा, और आपणें कौपाल या आपणें हाथा दी तेसरी छाप लाआ लौ 10 ता सेऊ परमेश्वरा रै भौरी रोषा री सूर, जो तेसरै रोशा रै कटोरै दी आ पाई ऐन्दी, पिया लौ, और पवित्र सौरगा रै दूता काए और गाबडू काए आग और गन्धका री बैदणी दी पोडा आ। 11 और तिउरी बैदणी रौ धुंओ सौदा उठदै रौआ आ, और जो तेस जानवर और तेसरी मूर्ति री पूजा कौरा ई, और जो तेसरै नावां री छाप लाआ ई, तेसकै राच और दीन चैन नाई मिलालौ।” 12 पवित्र लोगू री सौबर ऐथी दी आ, जुण परमेश्वरा रै हुक्म मानाई, और यीशु माथे विश्वास छाडा ई। 13 तैबे मुंड्ये सौरगा कु एजी बाच शुणी, “लिख : जुण मौरै औन्दै प्रभु दी मोरा ई, सै इबी कु भौलै (आशीष वाले) ई।” आत्मा बोला आ, “ओ, कैलैकि सै आपणी सारी मैहनता कु आरामा पा लै, और तेसरै काम तेसरै साथी दी औआ ई।”

लौईणी

14 मुंड्ये नौजर लाई, और देखौ, एक उजलौ बादल आ, और तेस बादला माथे आदमी रै छोहरु बाशिरे कुण बौशौ औन्दौ आ, जासरै मुंडा माथे सूनै रौ ताज और हाथा दी चोखी दाची आ। 15 तैबे औजौ एक सौरगा रै दूत परमेश्वरा रै घोरा कु निकलियौ तेसलै, जुण बादला माथे थौ बोशौ औन्दौ, बौडी बाचा दी हाके मारीयो बोलौ, “आपणी दाची लाइयो लौउणौ शुरु कर, कैलैकि लौउणें रौ बौग आशी ऐरौ आ, एथीलै कि धौतरी री फसल पाकी गोई आ।” 16 ता जो बादला माथे बोशौ औन्दौ थौ तिणिए धौतरी माथे आपणी दाची लाई, और धौतरी लौउणौ शुरु की एरी। 17 तैबे एक औजौ सौरगा रौ दूत तेस परमेश्वरा रै घोरा कु निकलौ जो सौरगा दी आ, और तेसकै भी चोखी दाची थी। 18 तैबे एक औजौ सौरगा रौ दूत जासकै आगी माथे हौक थौ, बेदी कु निकलौ, और जासकै चोखी दाची थी तेसलै उंची बाचा दी बोलौ, “आपणी चोखी दाची लाइयो धौतरी रै अंगुरा रौ जुबकु काट, कैलैकि सेऊ पाची ऐरौ आ।” 19 तैबे तिणी सौरगा रै दूत धौतरी माथे आपणी दाची लाई और धौतरी रै अंगुरा रौ फल काटियौ आपणें परमेश्वरा रै रोशा रै बौडै रोसा रै कुण्डा दी पाई गो; 20 और इलाकै कु बाइरै तेस रोसा रै कुण्डा दी अंगूर फैची गौए, और रोसा रै कुण्डा कु एतरौ लोहू निकलौ कि घौडेऊ री लगामा झाऊं पौउंचौ, और शौ कोसा झाऊं बौई गौ।

आखरी मुसिबता आइलै स्वर्गदूत

15 तैबे मुंड्ये सौरगा दी एक औजौ बौडौ और नौखौ निशाण देखौ, मतलब सात सौरगा रै दूत जासकै सातिआ आखरी मुसिबत थी, कैलैकि तिउरै पुरै हौणें माथे परमेश्वरा रै रोषा रौ खात्मौ आ। 2 तैबे मुंड्ये आगी कु मिलै औन्दै शीशें जिणौ एक समुन्द्र देखौ; और जो तेस जानवरा माथे और तेसरी मूर्ति माथे और तेसरै नावां री गिनती माथे जिंतौ औन्दौ थौ सै तेस शीशें रै समुन्द्रा रै नजदीक परमेश्वरा रै नौरशिणें कौरी खौडे देखै। 3 और सै परमेश्वरा रै सेवक मूसा रौ गेत, और गाबडू रौ गेत गाई-गाइयो बोला थै, “ओ सौबी कु शक्तीवालौ प्रभु परमेश्वर, तैरै काम महान और नौखे ई; ओ जुगा-जुगा रौ राजौ, तेरी चाल ठीक और सौचची आ।” 4 “ओ प्रभु, कुण ताऊंकु नाई डोरदो और तैरै नावां री महिमा नाई कौरदो? कैलैकि सीरफ तू ई पवित्र ई। सारी जाति आशियौ ताऊं काए ढाल कौराई, कैलैकि तैरै फैसलै रै काम परगट हुई गौए ई।” 5 तेथ बासिए मुंड्ये देखौ कि सौरगा दी गवाही रौ ताम्बु खोलौ; 6 और सै सात सौरगा रै दूत जासकै सात दुख थै, मलमला रै शुद्ध और चोमकणें वाले जुडकै भीडीयो और हिकडा काए सुनै री गाची बानियौ ताम्बु (मन्दिरा) कु निकलै। 7 तैबे तिऊं चारिया आदमीऊ मांझिआ कु एकीए तिऊं सात सौरगा रै दूता कै परमेश्वरा रै जो सौदा जिउंदौ आ, रोषा कौरी भौरै औन्दै सुनै रै सात कटोरै दै; 8 परमेश्वरा री महिमा और तेसरी शक्ति रै कारण सेऊ ताम्बु धुंए कौरी भौरुई गौ, और जेबी झाऊं तिऊं सातिआ सौरगा रै दूता रै सातिआ दुख खातम नाई हुए तेबी झाऊं कोई ताम्बु (मन्दिरा) दी नाई डेई बौलौ।

परमेश्वर रै रोशा री सात कटोरै

16 तैबै मुंइयै (ताम्बु) मन्दिरा दी कुण ऊंची बाचा कु तिऊं सात सौरगा रै दूता लै इणौ बोलदैं शुणौ, “डैओ, परमेश्वर रै रोशा रै सात कटोरै धौतरी माथे पेरौ।” 2 तैबै पैहलै सौरगा रै दूतै डेइयौ आपणौ कटोरौ धौतरी माथे पेरौ। तैबै तिऊं आदमीऊ रै, जास माथे जानवरा री छाप थी और जो तिउंरी मूर्ति री पूजा कौरा थै, एकी रौंगा रौ बुरौ और दुख दैणै वालौ दुखणौ निकलौ। 3 दूजै सौरगा रै दूतै आपणौ कटोरौ समुन्द्रा दी पेरौ, और सेऊ मौरै औन्दै आदमी रै लोऊ जिणौ बौणी गौ, और समुन्द्रा रौ हर एक जीव मौरौ गौ। 4 चिजै सौरगा रै दूतै आपणौ कटोरौ नौई और पाणी रै जौला माथे पेरौ और सेऊ लोऊ बौणी गौ। 5 तैबै मुंइयै पाणी रै सौरगा रौ दूत इणौ बोलदैं शुणौ, “ओ पवित्र, जो आसा और जो थौ, तू फैसलौ ई और ताइरे एऊ फैसलौ कियो। 6 कैलैकि तिउंरे पवित्र लोगु और भविष्यवाणी कौरनै वालै गुरु रौ लोऊ बहाओ थौ, और ताइरे तिउंलै लोऊ पिलाओ; कैलैकि सै एधीरै लायक ई।” 7 तैबै मुंइरे एजी बाच शुणौ, “हां, ओ सौबी कु शक्ति वालौ प्रभु परमेश्वर, तैरै फैसलै ठीक और सौच्यै ई।” 8 चारवै सौरगा रै दूतै आपणौ कटोरौ सूरजा माथे पेरौ, और तेसकै आदमीऊ आगी कौरौ जालणै रौ हक्क दैओ। 9 आदमी भौरी गौमी कौरौ जौली गौरे, और परमेश्वर रै नावां री जासकै इऊं परेशानी माथे हक्क आ, बुराई की ई पर तेसरी महीमा कौरणा लै जिऊ नई बौदलौ। 10 पांजुवै सौरगा रै दूतै आपणौ कटोरौ तेस जानवरा री राजगाद्दी माथे पेरौ गौ, और तेसरै राज्य माथे न्यारौ छाई गौ। लोग बेदणी कौरौ आपणी-आपणी जीभ चाकदैं लागै, 11 और आपणै दुखा और दुखणै रै कारण सौरगा रै परमेश्वर री बुराई कौरौ; पर आपणै-आपणै कामा कु जिऊ नई बौदलौ। 12 छौउवै सौरगा रै दूतै आपणौ कटोरौ बौडी नौई फराता माथे पेरौ गौ, और तेसरौ पाणी शुकी गौ ताकि पूर्वा री तौरफा रै राजै काले बाट तयार हुआ। 13 तैबै मुंइरे तेस अजगरा रै मुंआ कु, और तेस जानवरा रै मुंआ कु, और तेस झूठी भविष्यवाणी कौरणै वालै गुरु रै मुंआ कु चीन अशुद्ध आत्माए मानु मिडकै रै रुपा दी निकलदैं देखै। 14 इयै निशाणी देखाणै वाली बुरी आत्मा आ, जो सारी दुनिया रै राजेऊ कु निकलियो एथीलै डिआ ई कि तिऊं सौबी कु शक्ति वालै परमेश्वर रै बौडै दिना री लड़ाई लै कौठौ कौरा 15 “देख, हाऊ चोरा जिणौ आशा ऊ; भौलौ सेऊ आ, जुण ऊज्जीई रौआ आ, और आपणै जुडकेऊ ज़ागा आ ताकी नांगी ना हाण्डा लौ, और लोग तेस नांगी नई देखाले।” 16 और तिउंरे सै सेज्जी ज़ागहा दी कौठै किरै ज़ेथलै इब्रानी बोली दी हर-मगीदौन बोला ई। 17 सातवै सौरगा रै दूतै आपणौ कटोरौ बागुरा माथे पेरौ, और (सौरगा मन्दिर) री राजगाद्दी कु एजी बौडी बाच बोली, “हुई गौ आ!” 18 तैबै बिजली चोमकी, और बाच और गुडणौ हुआ, और एक इणौ बौडौ भूइंचल आशौ कि जेबी कु आदमी रौ जन्म धौतरी माथे हुआ, तेबी कु इणौ बौडौ भूइंचल केबी नई आशौ थौ। 19 एथी कौरौ तेस बौडै इलाकै रै चीन टुकडै हुई गौरे, और जाति-जाति रै इलाकै ढौली गौरे; और बौडै बेबीलोना री याद परमेश्वर काए हुई कि सेऊ आपणै रौशा री जलना री सूर तेसलै पीलावा। 20 और हर एक टापू आपणी ज़ागहा कु टौली गौरे, और धारा-टीरा रौ पौतौ ना लागौ। 21 सौरगा कु आदमीऊ माथे जीवा भौरीयौ बौडै शौर पौडै, और एथीलै कि एजी मुसीबत भौरी ई गौरकी थी, लोगुए शौर री मुसीबता रै कारण परमेश्वर री बुराई कौरौ।

बौडी गांदे कामा कौरणै वाली छेवडी

17 जैजै सात सौरगा रै दूता कै सै सात कटोरै थै, तिऊं मांझिया कु एकी ए आशीयौ मुकै इणौ बौलौ, “ओरु आश, हाऊं ताउंकै तिरे बौडी वेश्या (गान्दै काम कौरनै वाली) री सौजा देखातु, जो भौरी पाणी माथे आ बोशी ऐन्दी, 2 जास आइलै धौतरी रै राजेउरे गान्दै काम किरै ई; और धौतरी रै रौइणै वालै तियारै गान्दै कामा री सुरी कौरौए बौहकी गौरे थै।” 3 तैबै तिणिए हाऊं आत्मा दी ज़ांगला दी नियो, और मुंइयै रातै रौंगा रै जानवरा माथे, जो बुरै नावां कौरौए थौ भौरौओ औन्दौ और जासरै सात मूण्ड और दस शींग थै, एक छेउडी बोशी औन्दी देखी। 4 इंरे छेउडिरे बैगनी और रातै रौंगा रै जुडके थै भीडै औन्दै, और सुनै और भौरी महँगै मोगी और

मोती कौरौए थी सौज्जी ऐन्दी, और तियारै हाथा दी थौ एक सुनै रौ कटोरौ जो जौगरी चिजेऊ कौरौ और तियारै बुरै कामा री अशुद्ध चिजेऊ कौरौ थौ भौरौ औन्दौ। 5 तियारै कौपाला दी एऊ नाउं थौ लिखौ औन्दौ, “भेद—बौडौ बेबीलोन धौतरी री वेश्या और जौगरी चिजेऊ री मां।” 6 और मुंइरे सै छेउडी पवित्र लोगु रौ लोऊ और यीशु रै गवाही रौ लोऊ पीइयो माची ऐन्दी देखी; तियां देखीयौ हाऊं हैरान हुई गौ। 7 तैबै तिणी सौरगा रै दूतै मुलै बौलौ, “तू हैरान कैलै हुआ? हाऊं इंरे छेउडी और तेस जानवरा रौ जास माथे सै बोशी ऐन्दी आ और जासरै सात मूड और दस शींग ई, ताउंकै भेद बोलाऊ। 8 जो जानवर ताइयै देखौ आ, सेऊ पैहलै ता थौ पर आबै नई आ, और अथाह कुण्डा (पौइताला) कु निकलियो मौउता दी पौडा ई; और धौतरी रै रौइणै वालै जासरै नाउं धौतरी रै बौणनै रै बौगता कु जीवना री किताबी दी नई लिखै, एस जानवरा री इणी हालत देखियो कि पैहलौ थौ और आबै नई आ और तौइरे आशा आ, हैरान हुआ लै। 9 तियां औकला काले जासदी ज्ञान आ, एऊ ई मौक़ो आ : सै सात मूड सात टिरे ई जास माथे सै छेउडी बोशी ऐन्दी आ। 10 सै सात राजै भी ई, पांज ता हुई गौरे ई, और एक औजौ आस्ती ई, एक इभी झाऊं नई आशौ, जेबी आशा लौ ता कुछ बौगता झाऊं तेसरौ रौइणौ भी ज़ुररी आ। 11 जो जानवर पैहलै थौ, और आबै नई आ, सेऊ आपु ई आठवौ आ और तिऊं सातिया मांझिया कु पैदौ हुआ, और नाशा दी पौडा लौ। 12 जो दस शींग ताइरे देखै सै दस राजै ई ज़ुणिए इभी झाऊं राज्य नई पाओ, पर तेस जानवरा आइलै थोडै ई बौगता लै राजेऊ जिणौ हक्क पा लौ। 13 इयै सौबी एक जिऊ हुणै, और सै आपणी-आपणी शक्ति और हक्क तेस जानवरा कै दिआई। 14 सै गाबडू आइलै पिटिया ई, और गाबडू तिऊं कु ज़िता लौ, कैलैकि सेऊ प्रभु रौ प्रभु और राजेऊ रौ राजौ आ, और जो औटाए औन्दै और छांटै औन्दै और विश्वासी ई सै तिऊं आइलै ई; सै भी ज़िता ई।” 15 तैबै तिणिए मुलै बौलौ, “जो पाणी ताइरे देखौ, जास माथे वेश्या बोशी ऐन्दी आ। सै लोग और भीड और ज़ाती और बोली ई। 16 जो दस शींग ताइरे देखै, सै और जानवर तिरे वेश्या कु नफरत छाड़ाई, और तिरे लाचार और नांगै कौरालै, और तिआंरौ मास खा लै, और तिआं आगी कौरौ ज़ाला लै। 17 कैलैकि परमेश्वर तिउंरै ज़िवा दी इणौ पा आ, कि सै तिआं रै ज़िवा री पूरी कौरालै; और जेबी झाऊं परमेश्वर रौ वचन पुरौ नई हुआ लौ तेबी झाऊं एक जिऊ हुइयौ आपणौ-आपणौ राज जानवरा कै दैओ। 18 सै छेउडी, जो ताइरे देखी आ, सेऊ बौडौ इलाकौ आ जो धौतरी रै राजेऊ माथे राज कौरा आ।”

बेबीलोना रौ बिनाश (पतन)

18 तेत बासिए मुंइयै एक सौरगा रौ दूत सौरगा कु उतुरुदै देखौ, जासकै बौडौ हक्क थौ दैओ औन्दै; और धौतरी तेसरै प्यार्शे कु चोमकी। 2 तिणिए ऊंची बाचा दी औटाइयो बोलौ, “लोटी गौ बौडौ बेबीलोन लोटी गौ आ! और बुरी आत्मा री रौइणै री ज़ागहा और हर एक बुरी आत्मा रौ घौर (आड्डौ), और एक बुरी और जौगरी चिडू-चिटकुरु रौ आड्डौ हुई गौ आ। 3 कैलैकि तेसरै गान्दै कामा री खतरनाक सुरा रै कारण सारी ज़ाती लोटी गोई, और धौतरी रै राजेउरे तिआं आइलै गान्दै काम कियै औन्दै, और धौतरी रै बणीए तिआंरै भौरी सुख हुणै रै कारण अमीर ई हुए औन्दै।” 4 तैबै मुंइयै सौरगा कु एक बाच तौइरे शुणौ, ओ मरै लोगुओ, तिऊं मांझिया कु निकलियो आशौ ताकी तुमै तिउंरे पापा आइलै नई ज़ुडा, और तिआंरी परेशानिऊ कु केजी भी तुमु माथे ना पौडा। 5 कैलैकि तिआंरै पापा रौ ढेर सौरगा झाऊं पौउंवी गौ आ, और तिआंरौ अधर्म परमेश्वर कै याद आशौ आ। 6 जिणौ तिणिए तुमुलै दैओ औन्दौ आ तिणी ई तिआंलै दैओ, और तिआंरै कामा रै अनुसार तिआंलै दुई गुणौ बौदलै ई दैओ; जेजे खोरु दी तिणिए भौरी गौ थौ तेथी दी तिआंलै दुई गुणौ भौरौ। 7 जेती तिआंरै आपणी बौडाई की और सुख और आराम कियो तेती तिआंलै दुख और शोक दैओ; कैलैकि सै आपणै मौना दी बोला आ हाऊं राणी बौणी गोई ऊ, विधवा नई ऊ; शोका दी केबी नई पौडदी। 8 एजै कारण एकी ई दिने तिआं माथे परेशानी आशा आ, मतलब मौउत और शोक, और काल; और सै आगी दी छार बौणा आ, कैलैकि तिआंरौ फैसलौ कौरणै वालौ प्रभु परमेश्वर शक्तिमान आ। 9 और

धौतरी रै राजे जुगिरे तिआं आइलै गान्दे काम और ऐश-आराम किये, जेबे तिरे जौलणें रौ धुआँ देखालै ता तिआंलै लेराई और हिकडौं पिटा ई। 10 तिआंरौ दुःखा रै डौरा कु भौरी दूर खौडै हुइयौं बोलालै, ओ बौडौं इलाकौ, बेबीलोन! ओ काठौं इलाकौ, ताउंलै फिटकार! थोडै ई भौगता दी ताउंलै सौंजा मिली गोई आ।¹¹ "धौतरी रै बणीरे तिआं लै लेराई और तौडफा ई, कैलैकि आबे कोई भी तिउंरी चिजै नाई नीदें; 12 मतलब सुनौ, चांदी, रतन, मोती और मलमल और बँगनी, रेशमी, रातै रौंगा रै जुडकै, और हर रौंगा रौ खुशबुदार झुखडौं, हाथी रै दांदां री रौंगा-रौंगा री चिजै, कीमती झुखडौं और पितल और लोहौं और संगमरमरा री सारी रौंगा री चिजै, 13 और दालचिनी, मसालै, धूप, खुशबूदार तेल, लोबान, सूर, तेल, मैदौं, गीऊं, गाई-बौलद, भेरी-बाकरी, घोडै, रथ, और नुकर, और आदमीऊ री जिन्दगी। 14 आबे तैरै जिवा दी लागणै वालै फल ताऊं काए कु डेउंदै थाका लै लागी, और मिट्टी और भडकाउणै(बहकाउणै) वाली चिजै ताऊं कु दूर हुई आ, और सै केबी भी तौइरे नाई मिलदी। 15 एजी चिजेऊ रै बणीरे जुण तिआं कौरी अमीर हुई गोए थे, तिआंरै बेदणी कु डौरीयो दूर खौडै हुआई, लेरीयो और तौडफिआँ बोलाई, 16 'ताउंलै फिटकार! ताउंलै फिटकार! एजौ बौडौं इलाकौ जूणिरे मलमल, बँगनी और रातै रौंगा रै जुडकै थे भिडै औन्दै, और सूनै और रतन और मोतीऊ कौरी सौंजौं औन्दौं थौ; 17 थोडै ई भौगता दी तिआंरी मोकती जयदाद नाश हुई आ। हर एक किशती चलाउणै वालौं और सवारी और समुद्रा दी कामा कौरणै वालौं और जेती समुन्द्रा कु कौमावा ई, सारै दूर खौडै हुरे, 18 और तिआंरौ जौलणें रौ धुआँ देखदी बारै औटाइयो बोलाई, 'केजौं इलाकौ आ एजै बौडै इलाकै जिणौ?' 19 और आपणै-आपणै मुंडा माथै माटौं टालाई, और लेरदी बारै और तौडफदै बारै हाकै देई-देइयो बोलाई, 'ताउंलै फिटकार! फिटकार! एजौ बौडौं इलाकौ जासरी जयदादा कु समुन्द्रा रै सारै जहाज वालै अमीर हुइ गोए थे, थोडी देरा दी उखडी गोए। 20 ओ सौरग, और ओ पवित्र लोगूओ, और प्रेरीतो, और भविश्यवक्ताओ, तिआं लै खुशी मनाओ, कैलैकि परमेश्वर फैसलौं कौरीयो तिआं कु तुमुरौं बोदलौं नीई गो।" 21 तैबै एक शक्तीवालै सौरगा रै दुतै बौडै गौरटा रै जौदरा रै बराबर एक पात्थर चुंगौ, और इणौ बोलियो समुन्द्रा दी शोटौं, बौडौं इलाकौ बेबीलोन इणी ई बौडी ताक्ता कौरीरे ढालीया, और तैबै केबी भी तेसरौं पौतौ नाई लागदौं। 22 वीणा बाजणै वालै, और गाइणै वालै, और बांइशी बाजणै वालै, और कौरनाल फूकरणै री बाच तैबै केबी भी ताऊंदी नाई शुणीदौं; और केजे भी कामा रौ मिस्त्री भी तैबै केबी ताऊंदी नाई मिलदौं; और गौरटा चालणै री आवाज तैबै केबी ताऊंदी नाई शुणीदी; 23 और दीयै रौ प्याशौं तैबै केबी ताऊंदी नाई चमकुदौं, और लाडै और लाडी री आवाज तैबै केबी ताऊंदी नाई शुणीदी; कैलैकि तैरै बणीरे धौतरी रै परधान थै, और तैरै जादु कौरी सारी जाती ठौगुई गोई थी। 24 भविश्यवक्त्रे और पवित्र लोगूरे, और धौतरी माथै सारै ज्ञाणै औन्देऊ रौ खून तेथी दी पाईया लौ।"

19 एथ बासिरे मुंड्यै सौरगा दी जिणी बौडी भीड ऊंची बाचा दी इणौ बोलदै शुणी, "हाल्लेलुय्याह! छुटकारौं और बौडाई और शक्ति आमारे परमेश्वरा री ई आ। 2 कैलैकि तेसरै फैसलै सौंजे और ठीक ई। एथीलै कि तिणिरे तिरे बौडै बुरै काम कौरणै वाली रौ, जो आपणै गान्दे कामा कु धौतरी नाश कौरा थी, फैसलौ कियो और तियांकु आपणै सेवका रै लोऊ रौ बोदलौं निआँ आ।" 3 तैबै दुजी बारै तिउंरे बोलौं, "हाल्लेलुय्याह! तिआंरै जौलणें रौ धुआँ पीडी-पीडी झाऊं थाका आ उठदै लागी।" 4 तैबै चौब्वीस स्याणैउरे और चार प्राणिउरे धौनी पौडीयो परमेश्वरा कै ढाल की, जुण राजगद्दी माथै थौ बोशौ औन्दौं, और बोलौं आमीन! हाल्लेलुय्याह!"

गाबडू री शादी

5 तैबै राजगद्दी कु एक बाच निकली, "ओ मैरै परमेश्वरा कु डौरनै वालै लोगुओ, का छोटै, का बौडै; तुमै सारै तेसरी स्तुति कौरौ।" 6 तैबै मुंड्यै बौडी भीडा जिणौ और भौरी पाणी जिणी बाच, और गुडणै री बौडी बाच शुणी: "हाल्लेलुय्याह! कैलैकि प्रभु आमारे परमेश्वर सौबी कु शक्ति वालौं राज कौरा सा। 7 आशौं, आमै खुश और मगन हुई, और तेसरी बौडाई कौरी, कैलैकि गाबडू री शादी आशी गोई आ, और तेसरी लाडी आपु त्यार हुई गोई आ।

8 और तेसकै पवित्र और चमकदार महीन मलमला रै झुडकै भीडनै रौ हक देइ गो आ, कैलैकि तेस महीन मलमला रौ मतलब पवित्र लोगु रै धर्मा रै काम ई। 9 और तिणिरे मुलै बोलौं; एस लिख, कि भौलै ई सै, जुण गाबडू री शादी रै भोजा दी औटाए औन्दै ई; तैबै तिणीरे मुलै बोलौं, ऐ वचन परमेश्वरा रै सौचचै वचन ई। 10 और हाऊं तेसकै ढाल कौरना लै तेसरै बागणै माथै पौडौं; तिणीरे मुलै बोलौं; देख, इणौ नाई कौर, हाऊं तैरै और तैरै भाई रौ गवाह ऊ, जुण यीशु री गवाही देणा लै आ टेकौं औन्दौं परमेश्वरा कै ढाल कौर; कैलैकि यीशु री गवाही भविष्यवाणी री आत्मा आ।

शेतै घोडै री शवारी

11 तैबै मुंड्यै सौरग खुलौं औन्दौं देखौं; और देखौं कि एक शेतौं घोडौं आ; तेस माथै एक सवारी आ, जुण विश्वासा रै काबिल, और जासलै सौचचौं बोला ई; और सेउ धौर्मा आइलै फैसलौं और लौडाई कौरा आ। 12 तेसरी आखी आगी रौ प्याशौं आ; और तेसरै मुंडा माथै भौरी ताज ई; और तेस माथै एक नाऊं आ लिखौं औन्दौं, जास तेसरै सिवाए ओर कोई ना जाणदौं। 13 तिणिरे लोऊ कौरी छिडकाए औन्दै जुडकै ई भिडै औन्दै: और तेसरौं नाऊं परमेश्वरा रौ वचन आ। 14 सौरगा री फौज शेतै घोडै माथै बोशियो और शेतै और शुद्ध मखमला भीडियो तेस पिछु-पिछु आ। 15 जाति-जाति ज्ञाणणा लै तेसरै मुआ कु एक चोखी तलवार निकला आ। और सेऊ लोहै रौ राज दण्ड आणियो तिऊं माथै राज कौरा, और सारेऊ कु शक्ति वालै परमेश्वरा रै भयानक रोषा री जलना री सुरा रै कुंडा (उखली) दी अंगूर फेंचा ई। 16 तेसरै जुडकै और जांघा दी एऊ नाऊं आ लिखौं औन्दौं: "राजेऊ रौ राजौं और प्रभु रौ प्रभु।" 17 तैबै मुंड्यै सौरगा रौ एक दूत सूरजा माथै खौडौं देखौं। तिणिरे बौडी हाका मारियो सौरगा रै बीचा दी उडनेवालै सौबी चिडू-चौटकेरु लै बोलौं, "आशौं, परमेश्वरा रै बौडै भोजा लै कौठै हुओ, 18 जेथ कौरी तुमै राजेऊ रौ मास, और शौक्तीवालै आदमी रौ मास, और घोडेऊ रौ और तिऊं माथै बोशै औन्देऊ रौ मास, और का आजाद का सेवक, का छोटै का बौडै, सारै लोगु रौ मास खाओ।" 19 तैबै मुंड्ये सेऊ जानवर, और धौतरी रै राजेऊ और तिउरी फौज तेस घोडै माथै बोशै औन्दै और तेसरी फौजा आइलै लौडना लै कौठै देखै। 20 सेऊ जानवर, और तेस आइलै सेऊ झूठौं भविष्यवक्ता पाकडुओ जुणिरे तेस काए इणी निशाणी देखाई थी जास कौरी तिणिरे सै अजमारे थे जास माथै तेस जानवरा री छाप थी और जो तेसरी मुर्ति री पूजा कौरा थै। इयै दुइआ जिउंदै ई तिआं आगी दी पाए जो गन्धका कौरी जौला थी। 21 बाकी जो लोग बौचै औन्दै थे सै तिणिरे, जो घोडै माथै बोशौ औन्दौं थौ जासरे मुआ कु तलवार निकला थी, ज्ञाणै; और सारै चिडू-चौटकेरु तिउरै मासा कौरी डौटी गोए।

एकी हजारा बौरषा रौ राज

20 तैबै मुंड्यै सौरगा कु एक सौरगा रौ दूत उतरुदै देखौं, जासरे हाथै दी अथाह कुडा (पौइताला) री कुंजी और एक बौडी शांगल थी। 2 तिणिरे तेस अजगरा लै मतलब पुराणै सापा लै, जो इबलीस और शैतान आ, सेऊ पाकडियो हजारा बौरषा लै बानी ऐरौ, 3 और तेस अथाह कुडा (पौइताला) दी पाइयो बौन्द कौरी ऐरौ, और तेस माथै मुहर लाई कि एऊ हजारा बौरषा पुरे हुणै झाऊं जाति-जाति रै लोगु औजौं नाई पौरखा लौ। तेत बासिरे जरुरी आ तेस कुछ भौगता लै औजौं खौला। 4 तैबै मुंड्यै राजगादी देखी, और तिऊं माथै लोग बोशी गोए, और तिउंकै फैसलै कौरनै रौ हक दैओ। मुंड्यै तिउंरी आत्मा भी देखी, जासरे मूड यीशु री गवाही देणै और परमेश्वरा रै वचना रै कारण काटै औन्दै थै, और जुणिरे ना तेस जानवरा री, और ना तेसरी मूर्ति री पूजा की थी, और ना तेसरी छाप आपणै कौपाला और हाथा दी लाई थी। सै जीउंदै हुइयो मसीह आइलै हजारा बौरषा झाऊं राज कौरदै रौए। 5 जेबी झाऊं इयै हजारा बौरषा पुरे ना हुआलै तेबी झाऊं बाकी मौरै औन्दै लोग जीउंदै ना हुआ लै। एऊ ता पैहलौं जीउंदै हुणौ आ। 6 भौलै और पवित्र ई सै, जो एजै पैहलै जीउंदै हुणै रै साथी दी ई। इणैऊ माथै दुजी मौउता रौ कुछ भी हक नाई, पर सै परमेश्वर और मसीहा रै याजक हुआ ई और तेस आइलै हजारा बौरषा रौ राज कौराई।

शैताना रौ बिनाश

7 जैबे हज़ार बौर्ष पूरे हुआ लै ता शैतान कैदा कु पौरु छाड़ा ई। 8 सेऊ तिऊं ज़ातिऊ लै जो धौतरी रै चारीया भिले हुआ लै, मतलब गोग और मागोगा लै जासरी गिनती समुन्द्रा रै बालू रै बराबर हुआ आ, बहकाइयौ लड़ाई लै कौट्टे कौरना लै निकला लौ। 9 सै सारै धौतरी माथे फैलियौ पवित्र लोगु री छावनी और आच्छौ इलाकौ घेरा; और आग सौरगा कु उतुरियौ तिऊं भस्म (खत्म) कौरा आ। 10 तिऊंरौ बहकाउणै वालौ शैतान आग और गन्धका री तिऐं झिला दी, जासदी सेऊ जानवर और झूठौ भविष्यवकता भी हुआ, तेथदी पाआ ई; और सै राची दिनै सौदा झाऊं दुखा दी तौडफदै हुआ ई।

बौड़ी शेती राजगादी और आखरी फैसलौ

11 तैबे मुंड्यै एक बौड़ी शेती राजगादी और सेऊ देखौं जो तेथ माथे थौ बोशौ औन्दौ; तेस काऐ कु धौतरी और सौरग भागी गौऐ, और तिऊंके जागाह नाई मिली। 12 तैबे मुंड्यै छोटै-बौडै सारै मौरै औन्दै राजगादी काऐ खौडै देखे, और किताब खोली गोई; तैबे औजौ एक किताब खोली, मतलब जीन्दगी री किताब; और जिणौ तिऊं किताबी दि थौ लिखौ औन्दौ, तिणी ई तिउरै कामा रै अनुसार मौरै औन्देऊ रौ फैसलौ कियौ। 13 समुन्द्रै सै मौरै औन्दै जो तेथदी थै देई गौऐ और मौउत और अधोलोक (पौइताल) सै मौरै औन्दै जो तेथ दी थै देई गौऐ; और तिऊं माझिआ कु हर एकी रौ तिउरै कामा रै अनुसार फैसलौ कियौ। 14 मौउत और अधोलोक (पौइताल) भी आगी री झीला दी पाऐ। इऐ आगी री झील दुजी मौउत आ; 15 और जास कासी रौ नाऊं जीन्दगी री किताबी दी लिखौ औन्दौ नाई मिलालौ, सेऊ आगी री झीला दी पाओ।

नौवौ सौरग और नौई धौतरी

21 तैबे मुंड्यै नौउओ सौरग और नौउई धौतरी देखी, कैलैकि पैहलौ सौरग और पैहली धौतरी डेउंदै थाकी लागी, और समुन्द्र भी नाई रौओ। 2 तैबे मुंड्यै पवित्र इलाकौ नौवौ यरुशलेम सौरगा कु परमेश्वरा काऐ कु उतुरुदै देखौ। सै तियां लाडी जिणी थी जो आपणै बोउटै लै सौज्जी औन्दी हुआ। 3 तैबे मुंड्यै राजगादी कु कोई ऊंची बाचा दी इणौ ओटाउदं शुणौ, "देखौ, परमेश्वरा रौ डेरौ आदमीउ माझिऐ आ। सेऊ तिऊं आइलै डेरौ कौरा, और सै तेसरै लोग औलै, और परमेश्वर आपू तिऊं आइलै रौआ, और तिऊंरौ परमेश्वर हुआ। 4 सेऊ तिउंरी आखी कु सारै आशु मिटावा; और तेत बासिऐ मौउत नाई रौउंदी, और ना शोक, ना विलाप, ना दुख रौआ लौ; पैहली बुशै डेउंदै थाकी लागी।" 5 जो राजगादी माथे थौ बोशौ औन्दौ, तिणीऐ बोलौ, "देख, हाऊं सारौ कुछ नौउओ कौरा ऊ।" तैबे तिणीऐ बोलौ, "पौरु लिख, कैलैकि एऊ वचन विश्वासा रै लायक और सौच्यौ आ।" 6 तैबे तिणीऐ मुंलै बोलौ, "इयै बुशै पूरी हुई गोई आ। हाऊं अलफा और ओमेगा, आदि और अन्त ऊ। हाऊं चीशैऊ लै जीन्दगी रै पाणी रै जौला माझिआ कु संतमेंत पिलावा ऊ। 7 जुण जिता लौ सेऊ इऊं चिजा रौ वारिस हुआलौ, और हाऊं तिऊंरौ परमेश्वर रौउलौ, और सेऊ मैरौ छोहरु हुआ। 8 पर डरपोक, और अविश्वासीऊ, बुरे, और हत्यारे और गान्दै काम कौरणै वालेऊ, और जादु-टोन्है कौरनै वाले, और मुर्तिपूजणै वाले, और सारै झूठेऊ रौ हिस्सौ तिऐं झीला दी मिलाई जो आग और गन्धका कौरी ज़ोलदै रौआ ई: इयै दुजी मौउत आ।"

नौवौ यरुश्लेम

9 तैबे जेजै सात सौरगा रै दूता कै पिछलै दुखा कौरी भौरै औन्दै सात कटोरै थै, तिऊं माझिआ कु एक मुंकाऐ आशौ, और मुं आइलै बुशै लाइओ बोलौ, "ओरु आश, हाऊं ताउंके लाडी मतलब गाबडु री बोउटी देखाळाऊ।" 10 तैबे तिणीऐ हाऊं आत्मा दी एक बौड़ी और ऊंची टिरा माथे निंओ, और पवित्र इलाकौ यरुशलेम सौरगा कु परमेश्वरा काऐ कु उतुरुदै देखाळौ। 11 परमेश्वरा री बौड़ाई तेथदी थी, और तेसरौ प्याशौ भौरी किमती ढोल,

मतलब बिलौरा रै जिणौ यशबा जिणी साफ थी। 12 तेसरी शहरपनाह भौरी ऊंची थी, तेसरै बाराह बौडै दार और बौडै दारा माथे बाराह सौरगा रै दूत थै; और तिऊं बौडै दारा माथे इस्राएलिऊ रै बाराह गोत्रा रै नाउं थै लिखे औन्दै। 13 पूर्वा री तौरफा दी चीन बौडै दार, उत्तरा री तौरफा दी चीन बौडै दार, दक्षिणा री तौरफा दी चीन बौडै दार, और पश्चिमा री तौरफा दी चीन बौडै दार थै। 14 इलाकै री शहरपनाह री बाराह पौई थी, और तिऊं दी गाबडु रै बारह प्रेरिता रै नाउं थै लिखे औन्दै। 15 जो मुं आइलै बुशै लाइदं थौ लागौ औन्दौ तेसकै इलाकै और तेसरै बौडै दार और तेसरी शहरपनाह नापणा लै सुनै रौ एक गज थौ। 16 सेऊ इलाकौ चार कुणै दी थौ बौसौ औन्दौ और तेसरी लम्बाई, चोड़ाई रै बराबर थी; और तिणीऐ तेस गजा कौरी सेऊ इलाकौ नापौ, ता साढे सात शौ कोसा रौ निकलौ : तेसरी लम्बाई और चोड़ाई और ऊंचाई बराबर थी। 17 तिणीऐ तेसरी शहरपनाह आदमी रै मतलब सौरगा रै दूता रै नावां कौरी नापौ, ता एक शौ दुई बिऐ चार हाथ निकलौ। 18 तेसरी शहरपनाह यशबा री थी बौणी औन्दी, और इलाकौ इणै आच्छे सुनै रौ थौ जो आच्छे शीशै रौ थौ बौणौ औन्दौ। 19 तिऊं इलाकै री पौई भौरी रौंगा रै किमती ढोला कौरी थी सज़ाई ऐन्दी; पैहली पौई यशबा री, दुजी नीलमणी री, चीजी लालडी री, चौथी मरकता री, 20 पांजवी गोमेदका री, छौउवी माणिक्या री, सातवी पीतमणि री, आठवी पेरिजा री, नौवी पुखराजा री, और दसवी लहसनिऐ री, ग्यारवी धूम्रकान्ता री, और बारहवी याकूता री थी। 21 बारह बौडै दार बाराह मोतिऊ रै थै: एक-एक बौडै दार एक-एक मोती रौ थौ चाणौ औन्दौ। इलाकै री सौडक आच्छे शीशै जिणै शुद्ध सुनै री थी 22 मुंड्यै तेसदी कोई मन्दिर नाई देखौ, कैलैकि सारेऊ कु शक्ति वालौ प्रभु-परमेश्वर और गाबडु तेसरौ मन्दिर ई। 23 तेस इलाकै दी सूरज और जूना रै प्याशै री जूरत नाई, कैलैकि परमेश्वरा रै प्याशै कु तेसदी प्याशौ आ लागदै लागौ औन्दौ, और गाबडु तेसरौ दिवौ आ। 24 जाति-जाति रै लोग तेसरै प्याशै दी आण्डा-फिरा ई, और धौतरी रै राजै आपणै-आपणै प्याशै रौ सौमान तेसदी आणाई। 25 तेसरै बौडै दार केभी भी दुसै बौन्द नाई औन्दै, और तिऐ राच नाई औन्दी। 26 लोग जाति-जाति रौ प्याशौ और वैभवा रौ सौमान तेसदी आणाई। 27 पर तेसदी कोई खराब चीज, या गान्दै काम कौरणै वालौ, या झूठ बोलणै वालौ नाई डेई बोलवौ, पर सिरफ सै लोग जासरे नाउं गाबडु रै जीवना री किताबी दी आ लिखौ औन्दौ।

22 तैबे तिणीऐ मुलै बिलौरा री जिणी चौमुक्दी, जीन्दगी रै पाणी री नौं देखाळी, जो परमेश्वर और गाबडु री राजगादी कु निकलियौ 2 तेस इलाकै री सौडकी रै बीचा दी बौआ थी। नौई पार भिले जीन्दगी रौ पेड थौ; तेसदी बाराह रौंगा रै फल लागा थै, और सेऊ हर मिहनै फोला थौ; और तेस पेडा रै पाचा कौरी जाति-जाति रै लोग ठीक हुआ थै। 3 तैबे श्राप ना हुआ लौ, और परमेश्वर और गाबडु री राजगादी तेस इलाकै दी हुआ और तेसरै सेवक तेसरी सेवा कौरा ई। 4 सै तेसरौ मू देखाई, और तेसरौ नाउं तिउरै हाथा ई हुआ लिखौ औन्दौ। 5 तैबे राच नाई औन्दी, और तिउंलै दिवै और सुरजा रै प्याशै री जूरत नाई औन्दी, कैलैकि प्रभु परमेश्वर तिउंलै प्याशौ दिया, और सै सौदा राज कौरा ई।

यीशु रौ दूजी बारै आशणौ

6 तैबे तिणीऐ मुलै बोलौ, "इयै बुशै विश्वासा रै लायक और सौच्यौ ई। प्रभुऐ, जो भविष्यवक्तु री आत्मा रौ परमेश्वर आ, आपणै सौरगा रै दूत एथीलै भेजे कि सै बुशै, जासरो हुणौ शीगरी आ, देखाळा।" 7 "देख, हाऊं शीगरी आशणै वालौ ऊ! भौलै ई सै जो इऊं किताबीउ री भविष्यवाणी री बुशै माना ई।" 8 हाऊं सेऊ यूहन्ना ऊ, जो इऊं बुशै शुणा और देखा थौ। जेबी मुंड्यै शुणौ और देखौ ता जो सौरगा रौ दूत मुकै इऊं बुशै देखाळा थौ, हाऊं तिउरै बाणणै माथे ढाल कौरना लै धोनी पौडौ। 9 पर तिणीऐ मुलै बोलौ, "देख, इणौ नाई कौर; कैलैकि हाऊं तैरौ, और तैरै भाई भविष्यवक्तु, और इऐ किताबी री बुशै मानणै वालेऊ रौ सौच्चौ सेवक ऊ। परमेश्वरा लै ढाल कौर।" 10 तैबे तिणीऐ मुलै बोलौ, "इऐ किताबी री भविष्यवाणी री बुशै बौन्द नाई कौर; कैलैकि बोग्त नौजदीक आ। 11 जो अन्याय कौरा आ, सेऊ अन्याय ई कौरदै रौआ; और जो मलिन आ, सेऊ मलिन बौणी रौआ; और जो धौर्मि आ, सेऊ

धोर्मी बोणी रौआ; और जो पवित्र आ; सेऊ पवित्र बोणी रौआ।”¹² “देख, हाऊं शीगरी आशणै वालौ ऊ; और हर एकी रै कामा रै अनुसार बौदलौ देणा लै फ़ल मुकै आ।¹³ हाऊं अलफा और ओमेगा, पैहलौ औ आखरी, सौबी कु पैहलै और अन्त ऊ।¹⁴ “भौलै सै ई, जो आपणै जुड़कै धोआ ई, कैलैकि तितलै जीन्दगी रै पेड़ा कई आशणै रौ हक़ मिला आ,¹⁵ पर कुकुर, और जादु-टोन्हें, और गान्दै काम कौरणै वालै, और खून कौरणै वालै और मूर्ति पूजणै वालै, और हर एक झूठ बोलणै वालै और गढ़णै वालै बाइरै रौआ।¹⁶ “मुइयै यीशुए आपणौ सौरगा रौ दूत एथीलै भेजौ कि तुमारै औगाऊं कलीसिया रै बारै दी इऊं बुशु री गवाही दिया। हाऊं दाऊदा रौ मूल और वंश, और दोतकौ चौमुकणै वालौ तारौ ऊ।”¹⁷ आत्मा और लाडी दुइआ बोला ई, “आश!” और शुणनै वालै भी बोला, “आश!” जुण चिशौ आ सेऊ आशा, और जुण भी चाहा लौ सेऊ जीन्दगी रौ पाणी सैतमेंत निया।

आखरी बूश

¹⁸ हाऊं हर एकी लै, जो इएँ किताबी री भविष्यवाणी री बुशै शुणा आ, गवाही दिया : अगर कुण आदमी इऊं बुशु दी कुछ बड़ावा ता परमेश्वर तिऊं बुराई, जो इएँ किताबी दी आ लिखी ऐन्दी, तेस माथे बड़ावा आ।¹⁹ अगर कुण इएँ भविष्यवाणी री किताबी कु कुछ गाड़ा लौ, ता परमेश्वर तेस जीन्दगी रै पेड़ा और पवित्र इलाकै मांझिआ कु, जेथरै बारै दी इएँ किताबी दी आ लिखौ औन्दी, तेसरौ भाग पोरु गाड़ा।²⁰ जो इऊं बुशु री गवाही दिआ आ सेऊ इणौ बोला आ, “ओ, हाऊं शीगरी आशणै वालौ ऊ।” आमीन। ओ प्रभु यीश आश!²¹ प्रभु यीशु री बौड़ी दया पवित्र लोगु आइलै रौआ। आमीन